

श्री ठ देवचंद लालभाई जैन पुस्तकोष्धार फंड

तथा

श्री आगमोदय समिति.



गोपीपुरा-सुरत.

जहैरी बजार-मुंबई.

१००००-१-७-१९२९.

दायंदर:-श्रीकृष्ण रुकींग प्रेस.

मुसलफा मारकेट मुंबई नं. ३.

श्रेष्ठि-देवचंद लालभाई जैनपुस्तकोद्धारे ग्रन्थाङ्कः ७५

कुलीनश्रीमदभयदेवस्वरिशिष्यश्रीप्रसन्नचन्द्राचार्योक्त्या श्रीसुमतिवाचकशिष्यैः श्रीगुणचन्द्रगणिभिर्विहितं

श्रीमहावीरचरित्रम् (प्राकृतं)

प्रकाशिका—श्रेष्ठि-देवचन्द लालभाई-जैनपुस्तकोद्धारसंस्था ।

राजनगरीयविद्याशालाकार्यवाहकैरागमाराधनोत्सवागततदन्यद्रव्येण वितीर्णम्

[अस्य पुनर्मुद्रणाद्याः सर्वेऽधिकारा एतद्भाण्डागारकार्यवाहकाणामायत्ताः स्थापिताः]
इदं ग्रन्थरत्नं मुम्बापुर्यां जीवनचंद साकरचन्द जवहेरी इत्यनेन निर्णयसागरमुद्रणालये कोलभाट
वीथ्यां २६-२८ तमे मन्दिरे रामचन्द्र येसू शेडगेद्वारा मुद्रयित्वा प्रकाशितम् ।

प्रतिसंख्या १२५०]

वीरसंवत् २४५५, विक्रमसंवत् १९८५, सन १९२९.

[मूल्यं रु. ४-०-०

Rs. 4-0-0

Shreshthi Devachand Lalbhai Jain Pustakoddhara Series, No. 75.

Śrī MAHĀVĪRA CHARITAM

(PRĀKRITAM)

BY

Śrī GUṆACHANDRA SŪRI

Copies 1250]

Price Rs. 4-0-0.

[A. D. 1929.

[All rights reserved by the Trustees of the Fund.]

Printed by Ramchandra Yesu Shedge, at the Nirnaya-sagar Press, 26-28, Kolbhat Lane, Bombay.

Published by Jivanchand Sakarchand Zaveri, on behalf of Seth Devachand Lalbhai Jain Pustakoddhara
Fund. No. 121-123, Javeri Bazar, Bombay.

॥ नमो वीतरागाय ॥

॥ श्रीमहावीरचरित्रम् ॥

॥ श्रीमद्गुणचन्द्रसूरिवर्यनिर्मितं ॥

ययाडियसमत्थपरमत्थवित्थरं भवचक्रकयसोक्खं । विप्फुरइ जस्स रविमंडलं व नाणं निहयदोसं ॥ १ ॥
जस्स य सोहइ पणमंतसक्कसंकंतनयणकमलवणं । कमविमलसरं तललीणमीणमयरं नहंसुजलं ॥ २ ॥
संगमयपणइणीहिं कडक्खविक्खेवखोभदक्खाहिं । जस्स मणांगं पि मणो न चालियं नियपइण्णाओ ॥ ३ ॥
नरत्तिरियदेवविहिओवसग्गरिउवग्गविजयजायजसो । ओहामियऽणवीरो सो जयइ जिणो महावीरो ॥ ४ ॥
यणमह सिरिरिसहजिणिंदचंदसुद्धामकामवलदलणं । गिहिसाडुधम्मपासायमूलपीढाइयं जेण ॥ ५ ॥
अजियाइणो जिणिंदा सुरिंदसंदोहनमियकमकमला । धम्ममहिधरणधीरा सेसन्व जयंति सेसावि ॥ ६ ॥
सो जयइ जिणो पासो जस्स सिरि सहइ फणिफणकडण्णो । पायडियसत्तजीवाइतत्तसंखं व दाविंतो ॥ ७ ॥
कविसेविचपयकमला सुत्तीहि पसाहिया महाभोगा । गोवग्गजणियसोक्खा सरस्सई जयइ सरियन्व ॥ ८ ॥

दंसियसमगसगापवरगमरगाण गोयभार्इणं । गुणवंताण गुरूणं शुणामि पयपंकयं निचं ॥ ९ ॥
 इय संथवणिज्जाण्यपणाममाहप्यनिहलियविग्घो । भव्वाण सोक्खमूलं धम्मवएसं पयंपेमि ॥ १० ॥
 जलहिजलगलियरयणं व दुल्लहं पाविऊण मणुयत्तं । पुरिसत्थज्जणकज्जे उज्जमियवं बुहज्जेणं ॥ ११ ॥
 तत्थ पुरिसत्थमत्थयचूडामणिविब्भमो परं धम्मो । सो पुण पइदिणसच्चरियसवणओ हवइ भव्वाणं ॥ १२ ॥
 तस्स य धम्मस्स जिणो पणायगो संपयं महावीरो । चरियंपि उ तस्सेव य सुणिज्जमाणं तओ जुत्तं ॥ १३ ॥
 तं पुण निस्सेसागमसमुहसवणासमत्थसत्ताणं । निउणेणावि न गुरुणा समग्गमवि तीरए वोत्तुं ॥ १४ ॥
 ता जह भुवणेक्कगुरू निप्पडिमपभावधरियधम्मधुरो । मिच्छत्ततिभिरसुसुमूरणेक्कमिहिरो महावीरो ॥ १५ ॥
 अच्चंतमणंतमणोरपारभववारिरासिमणवरयं । पुवं परियट्ठिय तिरियतियसपुरिसाइभावेणं ॥ १६ ॥
 ओसग्गिणी इमीए पढमं चिय गामचिंतगभवंमि । नीसेससोक्खमूलं सम्मत्तमणुत्तमं पत्तो ॥ १७ ॥
 तत्तो पाविय देवत्तमुत्तमं भरहचक्कवट्ठिस्स । मिरिइत्ति सुओ होउं काउं जिणदेसियं दिक्खं ॥ १८ ॥
 दुस्सहपरिसहनिम्ममहियमाणसो पयडिउं तिदंडिवयं । मिच्छत्तविउत्तमई कविलस्स कुदेसणं काउं ॥ १९ ॥
 तद्दोसेणं अयराण वट्ठिउं कोडकोडिसंसारं । छब्भवगहणे पुणरवि पारिच्चजं पवज्जिता ॥ २० ॥
 दीहं संसारं हिंडिऊण रायग्गिहंमि रायसुओ । होऊण विस्समूई धोरं संजममणुचरित्ता ॥ २१ ॥

मरणे नियाणवंधं निवृत्तिय सुरसुहं च भोत्तणं । पोयणपुरे तिविट्ठ परिपालिय वासुदेवत्तं ॥ २२ ॥
मूयाए पियमित्तो चक्कित्तं संजमं च अणुचरिउं । छत्तगाए नंदण नरनाहत्तं च पव्वज्जं ॥ २३ ॥
परिपालिय वीसइकारणेहिं तित्थाहि वत्तमज्जिणिउं । पाणयकप्पा चविउं कुंडगामंमि नयरंमि ॥ २४ ॥
सिद्धत्थरायपुत्तो होउं जंतूणमुद्धरणहेउं । सबविरइं पवज्जिय दुविसहपरीसहे सहिउं ॥ २५ ॥
केवललच्छिं लहिउं संपत्तो मोक्खसोक्खमक्खंउं । अट्ठहिं पत्थावेहिं सिद्धंताओ तह केहमि ॥ २६ ॥

द्वादशभिः कुलकम् ॥ अहवा-

कत्थ भुवणेक्कपड्डणो चरियं अम्हारिसो कहिं कुकई ? । साहसमिममसमुयहिपवाहतरणाभिलासोव ॥ २७ ॥
तहवि हु गुरुजणवयणोवरोहओ सुद्धलोयसुहवोहं । विरएमि चरियमेयं खमियवं एत्थ सूरीहिं ॥ २८ ॥
एत्थ य पत्थुयचरिए नाणाविहसंविहाणगाइन्ने । अमयजलकुल्लतुल्ले महल्लकल्लाणवल्लीणं ॥ २९ ॥

कत्थवि जइवि हु किंपिप्पसंगओ किंपि तुहवयणाओ । सत्थंतराणुसरणाओ किंपि किर भणइ अउच्चं ॥ ३० ॥
चरिएयरंति तहवि हु न संकियवं कहिंपि कुसलेहिं । उवकहपमुहं एत्तो पज्जत्तं बहुपसंगेणं ॥ ३१ ॥ विशेषकम्

अत्थि समत्थावरविदेहालंकारक्कप्पपड्डुमणिमउडविडंक्कविचिहरयणकंतिविच्छुरियचरणजिणनाहविहरणप-
संतडिंचडमरं अमरागारसमुत्तुंगसिंगसमुवहसियहिमगिरिवरं वरेवरुलियकणयकलहोयपमुहमहागरसोहियवसुंधराभोगं

भोगोवभोगलालसज्जनणियपरितोसं सुरभूमिसोहगमडफ्रफंसयं महावप्यं नाम विजयखेत्तं, तत्थ य विसालसा-
लवल्यखाइयापरिक्खत्ता नाणाविहविहारवापीकूयमहासरसरियपरिसराभिरामा सुविभत्तत्तियचउक्कचच्चरउप्पह-
पसोहिया पासायसयमालालंकिया सुइनेवत्थमहिच्छेयजणसंकुला पागसासणपुरिव दीसंतनाणाविहरयणा कम-
लासणसुत्तिव सवधोमुही विंझगिरिमेहलव पुन्नागनागसोहिया जहत्थाभिहाणा जयंती नाम नयरी

कुलसेलुचुंगथणत्थलीएँ नहनइजलोहहाराए । धरणीरमणीएँ मुहे जा सोहइ चित्तलेहव ॥ ३२ ॥

सत्तमुणिमेत्तगच्चियमणेगमुणिसंकुला सुरपुरिंपि । एगबुहं भूरिविबुहा हसइ व जा तूरसिएहिं ॥ ३३ ॥

जीए य कमलसंडाण मित्तविरहसंकोयपीडणाणि सुणिवराण करवालुप्पाडणं बालकुंजरेसुं कलहसदो रहंगमि-
हुणाण पियविरहवेयणा तंतुवायसालासु वसणुभवो, न कथाइ लोएसु, तहिं च-सायरपणमंतमहंतसामंतमउलिमा-
लामणिमसिणियपायवीढो पयंडमुयदंडमंडलियकोडंडनियत्तत्तिसखलुरुप्पखंडियसयसचुमुंडमंडियसमंगणो, दण्णुभ-
डसुहडपरिबुडदंडनाहसहस्साणुसरिजमाणमग्गो मगणगणवंछाइरित्तपूरियमणोरहो, रहोव सुसिलिट्टलट्टसुचक्कक-
यसंचरणो रणरसियपुरिसोव कयवहुकयपरिगहो गहगणोव कविमुहगुरुयणाणुगओ गओव अणवरयदाणवरिसो
रिसिव निग्गहियछवगपयारो पाथारोव पुवपुहइपालपवत्तियनयनयरीए हिमगिरिव डिंडीरपिंडपंडुरकित्तिसुरस-
रियाए जलहिव अणेगगुणगणरयणरासीए

विपक्खदप्पखंडणो नरिंदवंसमंडणो, अजायभंगसासणो कुनीइलोयनासणो ।
असेससोक्खकारणं करेइ लोयपालणं, नरिंदसत्तुमहणो म(ज)णंमि चित्तनंदणो ॥ ३४ ॥

जंमि य नराहिंवे पवलवलसालिभुयपरिहारोवियधरणिभारे रायनीइमेत्तं मंतिणो सोहा हरिकरिरहजोहसामग्गी
आडंबरं असिचक्कचावसरकुंतप्पमुहपहरणपरिगहो सेवगा पणयावेक्खा सजीयनिरवेक्खंगरक्खपरिक्खेवपरिक्कप्पणा ।
तस्स य रण्णो विसिद्धायापरिपालणपरायणो धम्मसत्थसवणवियाणियेहज्जोवादेयवत्थुसरूवो गंभीरिमाइगुणग-
णावासो पयइसरलो पयइविणीओ पयइपियंवओ पयइपरोवयारपरो पुहइप्पइट्ठाणनामंमि गांमे नयसारो नाम गाम-
चित्तगो अहेसि । जो य तहाविहसाहुसेवाविरहेऽवि अलसो अक्खयवित्तीए परमुहो परपीडाए सयणहो गुणगणो-
वज्जणाए अचक्खू परछिदपलोयणाए । एवंविहगुणो य सो सविसेसगुणकरिससाहणनिमित्तं भणिओ गुरुअणेण,
जहा-धणरिद्धी दूरं वड्डियावि दुव्विणयपवणपडिहणिया । एक्कपएच्चिय पुत्तय ! पणस्सए दीवयसिहव ॥ ३५ ॥

णीहारहारधवलोवि वच्छ ! सेसो गुणाण संघाओ । विणएण विणा वयणं व नयणरहिंयं न सोहेइ ॥ ३६ ॥
अचंतपिओऽवि परोवयारकारीवि भुयणपयडोऽवि । वज्जिज्जइ पुरिसो विणयवज्जिओ गुरुमुयंगोव ॥ ३७ ॥
इय दुव्विणयत्तणदोसनिवहमवलोकण बुद्धीए । पुत्त ! रमेज्जसु विणए समत्थक्खणकुलभवणे ॥ ३८ ॥
तहाहि—विणएणं हुंति गुणा गुणेहिं लोगोऽणुरागमुवहइ । अणुरत्तसयललोयस्स हुंति सवाओ रिद्धीओ ॥ ३९ ॥

रिद्धीहिं संगओ गयवरोव अणवरयदाणवरिसेण । मगणगणपणईणं उवयारं कुणइ लीलाए ॥ ४० ॥
उवयरणेणं तेसिं लब्भइ आचंदकालिया कित्ती । तीएडविहु लद्धाए किं नो लद्धं तिहुयणेडवि ? ॥ ४१ ॥
एसच्चिय जेण थिरा जुगविगमेडविहु न वच्चइ विणासं । उप्पत्तिपलयकलियं सेसं पुण थेवदियहथिरं ॥ ४२ ॥
इय गुरुजणसिक्खं गिणिहुज्जण तह कहवि संपयट्ठो(सो) । वीसासट्ठाणं नरवइस्स परमं जहा जाओ ॥ ४३ ॥

अन्नया य सत्तुमद्दणनराहिवेण भवणसंदणाइनिमित्तं पवरदारूहिं पओयणंमि संपत्ते आणत्तो एसो—भइ !
गच्छसु तुमं पभूयं सगडसमूहं किंकरनरनियरं च गहाय दारुनिमित्तं महाडवीएत्ति, तओ सिरसा सासणं से पडि-
च्छिय विसिट्ठसंवलगसमेओ समगसामग्गीसणाहो पट्ठिओ गामचिंतगो, पत्तो य अणवरयगमणेण महाडवीए,
जा य केरिसी?—गयणयलाणुलिहंतमहंतचित्ततरुवराभोगावरद्धदिसावगासा अणवरयझरंतगिरिनिज्झरझंकारमणहरा
जहिच्छविसरंतरुवरुयारिच्छहरिहरिणसंदूलभीसणा महापुरिसवच्छत्थलिच्च सिरिवच्छालंकिया मिगरायकंधरच्च
केसरविसरविराइया उवसनगरभूमिच्च मायंगकुलसंकुला सुहडावलिच्च धरियवाणासणा । ताहिं च निउत्तपुरिसेहिं
सरला य दीहरा य विसाला सुंदरा य सुजायवट्ठवंधवद्धा य तरुणो समारद्धा छिंदिउं, एवं च छिंदंताण जाओ मज्झणह-
समओ, संपत्ता भोयणवेला, पगुणीभूओ भोयणकरणाय गामचिंतगो, उवणीया किंकरगणेण विचित्तखंडखज्जप्पहाणा
रसवई, जइ पुण सत्थपरिब्भट्ठो वा मगं अयाणमाणो वा एत्थ तडियकप्पडियसमणप्पमुहो अतिही छुहाभिभूओ एज्ज

ता तस्स दाऊण सयं भुंजामिप्ति संपधारिऊण गामचिंतणेण धेवं भूमिभागं गंतूण तक्खणमवल्लोइयं दिसावल्लयं,
 एत्थंतरे सत्थपरिब्भट्ठा संता परिसंता खुहापिवासाभिभूया मज्झंदिणदिणयरतावविगलंतसेयसल्लिधरा तरुवरनि-
 वडणकडयडारावनिसामणसंभावियसत्थावासा समागया तं पएसं तवस्सिणो, दिट्ठा य तेण ससंभमं, गओ तदभिमुहं,
 गाढकरुणारसाउरिजमाणमाणसेण पणमिऊण पुच्छिया अणेण—भयवं ! किमेवं विजणविहारमायरह ? , साह्वहिं भणि-
 यं—भद्द ! सत्थेण(समं)पढमं अम्हे पत्थिया, भोयणकाले जाव असणपाणट्ठा गामं पविट्ठा ताव गओ सत्थो, अम्हेऽवि-
 तुरंता सत्थाणुमगलग्गा इंता निगया एत्थ महाडवीए, गामचिंतणेण भणियं—अहो निक्करुणया अहो दुट्ठसीलया अहो
 नरकनिवासललसत्तणं अहो वीसत्थधाइत्तणं अहो पावाभीरुत्तणं अहो आजम्मा नियकुलकलंककरणं तेसिं सत्थियाणं,
 अविय—सत्तपयमेत्तसंथवसेऽवि सुयणाण वड्डए नेहो । आजम्मदंसणेऽविहु निद्वयचित्ताण न खलाणं ॥ ४४ ॥

सत्थाणुसरणकालेऽवि वारिया किं न पावबुद्धीहिं । एए महाणुभावा पढमं चिय साहुणो तेहिं ? ॥ ४५ ॥

जइ एएसिं सीहाइएहिं कीरेज एत्थ विद्वणं । ता नूणमेव तेसिं नरगेऽविहु होज्ज संवासो ॥ ४६ ॥

अहवा पावाण कहाँए होउ नियधम्मदूसणकरीए । आगच्छह आवासं कुणह पसायं ममेयाणिं ॥ ४७ ॥

इय भणिए ते सुणिणो जुगमेत्तनिहित्तचक्खुणो धीरा । तस्सावासंमि गया पच्चक्खा धम्मनिहिणो व्व ॥ ४८ ॥

पुण्णत्रससाहुदंसणसिणेहसंजायतिव्वसद्धेणं । विउलेहिं असणपाणेहिं तेणऽवि पडिलाहिया त्रिहिणा ॥ ४९ ॥

गहियभत्तपाणेहि य षडिनियत्तिऊण जीवोवरोहरहि ए थंडिलमि पडिक्कंता ईरियावहिया आलोइयं भत्तपाणं कयं चितिवंदणं विहिओ तक्कालोचिओ सज्झाओ, सुहज्झाणेण खणंतरं गमिऊण समुज्झिय रागदोसं सुणिणो परिजिमियत्ति, गामचिंतगोऽवि कयत्थमप्पाणं मन्नतो भोत्तूण समागओ तेसिं सगासे भणिउं पवत्तो—भयवं ! आगच्छह तुम्हे जेण नगरगामिणिं वत्तिणिं उवदंसेमि, तओ पत्थिया साहुणो तेण सद्धिं, तेसिं च मज्झे एगो सुणी धम्मकहालद्धिसंपन्नो, तेण य णायं—जहा एस धम्मजोगोत्ति, ता अवस्सं सद्धम्मे निजुंजियन्वो होइत्तिचिंत्तिऊण भणिओ सो गामचिंतगो—भो महायस ! कुमग्गपरिब्भमणपीडियाणं तण्हाछुहाभिभूयाणं अम्हाणं तहाविहपडि-वत्तीए असणपाणदाणेण य परमोवयारी तंऽसि ता किंवि अणुसासिउं समीहामो, गामचिंतएण भणियं—भयवं ! किमेवमासंकह ? नियसिस्सनिन्विसेसं सिक्खवेहित्ति, तओ साहुणा पारद्धा धम्मदेसणा, जहा—

धणुसिक्खाविरहियपुरिसिखित्तसरजणियराहवेहं व । तुडिजोगा मणुयत्तं लद्धूणं कुसलबुद्धिमया ॥ ५० ॥

सग्गापवग्गफलसाहगस्स धम्मस्स पायवस्सेव । मूलं सम्मत्तमहो जाणेयन्वं पयत्तेणं ॥ ५१ ॥

मिच्छत्तंपंकपडलावलुत्तसन्नाणनयणपसराणं । सिरसूलमूलमेसा जणाण सम्मत्तवत्तावि ॥ ५२ ॥

जुत्ताजुत्तं केणवि करुणापरबुद्धिणोवइट्ठपि । दुस्सुमिणंपिव सोउं नेव वंछंति तुच्छमई ॥ ५३ ॥

दढमूढगुरुरूपरूवणवसेण कम्मं च तं पकुब्बंति । जेण निमज्जंति अहो कूत्रवखणणुज्जयनरो न्व ॥ ५४ ॥

जं मिच्छतोदयओ अगुरुं पि गुरुं अदेवमवि देवं । धत्तूरिओव्व गेणहइ लेहुं व सुवणणबुद्धीए ॥ ५५ ॥
तेणं चिय पाणिगणो गणणाइकंतवेल्मणुभवइ । तं किंपि दुक्खनिवहं जं जाणइ केवली सम्मं ॥ ५६ ॥
इय भो देवाणुप्पिय ! मिच्छत्तं सयलदोसकुलभवणं । नीसेसदुग्गदुग्गइसंसग्गकरं लहुं चयसु ॥ ५७ ॥
सम्मत्तं पुण नीसेसदोसविरहियमसेससुहफलं । जीवाण तिव्वजरमरणदुक्खवुच्छेयणसमत्थं ॥ ५८ ॥
जं मोहणिज्जपवलत्तविगमओ गुरुवसा संयं वावि । उल्लसई कल्लाणयवल्लीजलुल्लतुल्लं व ॥ ५९ ॥
तत्तो अट्टारसदोसवज्जिए जिणवरंमि पडिवत्ती । देवोत्ति समुप्पज्जइ निरवज्जा वज्जघडियव्व ॥ ६० ॥
सयमवि धम्मपरेसुं सिद्धंतवियारणेक्ककुसलेसुं । धम्मोवएसनिरएसु होज्ज साहसु गुरुबुद्धी ॥ ६१ ॥
ता जिणवयणायणणविण्णायसमत्थतत्तरयणस्स । विरमइ य मई लोइयधम्माउ कुवस्सयाउव्व ॥ ६२ ॥
अवगणइ गोपयं पिव दुग्गइदुहमयरभीसणावत्तं । कम्मजलुप्पीलाउलमरइउदं भवसमुदं ॥ ६३ ॥
तहा—सम्मत्तुत्तमसन्नाहविहियक्खो खणेण विक्खिवइ । सुहडोव्व तित्थियभडुब्भंडपि मिच्छत्तसंगमं ॥ ६४ ॥
पासायस्स व पीढं पुरस्स दारं व मूलमिव तरुणो । बारसविहधम्मस्सवि आइं किंत्तिंति सम्मत्तं ॥ ६५ ॥
इय भो एवं लक्खिय निरवेक्खो लोइएसु मग्गेसु । सदहणनाणसारं सरहसमणुसरसु सम्मत्तं ॥ ६६ ॥
ताहे भत्तिभरोणयभालयलमिलंतमउलकरकमलो । सोच्चा सो गुरुवयणं भत्तीए भणिउमाढत्तो ॥ ६७ ॥

भयवं ! किमेवमुवइसह पावनिरयाण बुद्धिरहियाणं । पच्चक्खपसूणं पिव अम्हाणं दढमजोगाणं ॥ ६८ ॥
गुरुणा भणियं मा वयसु एरिसं जेण जोगया तुज्झ । जाणिज्झइ संपन्ना संपइ पच्चक्खलिंगोहिं ॥ ६९ ॥
कहमण्णहमेवंविहमहाडवीनिवडिया तए अम्हे । दिट्ठा पहपब्भट्ठा गाढस्समसुट्ठिय(सिट्ठिल)सब्बंगा ॥ ७० ॥
कह तत्थवि दंसणमेत्तओऽवि चिरदिट्ठवल्लहजणे व्व । पुलयपडलाणुमेओ उप्पणो तुह पमोयभरो ॥ ७१ ॥
कह वा भोयणसमओवणीयनियभोयणेण दाणमई । जाया अम्हाणुवरिं खुहापिवासाभिभूयाणं ॥ ७२ ॥
एवंविहपरिणामो उप्पज्झइ नेव पुण्णरहियाणं । एवंविहा य अतिही न य चक्खुपहं पवज्जंति ॥ ७३ ॥
रयणनिहाणं किं रोरमंदिरे किं मरुमि कप्पतरू । कत्थवि थलंमि जलकमलसंभवो हवइ कइयावि ॥ ७४ ॥
ता एवंविहविघडंतवत्थुसंघडणालिंगसद्धेया । कहमिव तुज्झ न सद्धम्मजोगया भइमुह ! होज्जा ॥ ७५ ॥
जेणेरिस सामग्गी निरवग्गहपुण्णपगरिसवसेण । सिवलच्छिपेच्छियाणं निच्छयओ घडइ मणुयाणं ॥ ७६ ॥

किंच—आरियखेत्तुप्पत्ती कुलमकलंकं नरत्तसंपत्ती । निरुवहयरूयलाहो रोगोरगदूरविगमो य ॥ ७७ ॥
आउयमवि पडिपुणं कलाकलावंमि कोसलं विमलं । साहूहिं समं जोगो एत्तिथमेत्तं तए पत्तं ॥ ७८ ॥
एत्तो एगयरंपिहु पण्णं व सक्कम्मपवणपडिहणिया । संसारंमि भमंता अणंतसत्ता ण संपत्ता ॥ ७९ ॥
तुमए पुण सव्वमिमं उवलद्धं पुण्णपगरिसवसेणं । ता एत्तो निरुवममोक्खसोक्खफलदाणदुल्ललियं ॥ ८० ॥

सिंहिणो सिंहं व सारं फणिवइफणरयणचक्कवालं व । एकं अपत्तपुवं गिणहसु जिणदेसियं धम्मं ॥ ८१ ॥ युग्मम्
इय भणिए सो चित्तउमारद्धो तिव्वजायसंवगो । कह नियकज्जपसाहणपरम्मुहाणं गुणनिहीणं ॥ ८२ ॥
केवलकरुणारससायराण समगणियरायरोराणं । जाओ मइ पडिवंधो गुरूण खणदंसणे वावि ? ॥ ८३ ॥ युग्मम्
निप्पुणोसु जणेसुं चक्खुं पि खिवंति नेरिसा समणा । ता सब्वहेसि वयणं जुत्तं मह संपयं काउं ॥ ८४ ॥
विस्संभरतलविलुंतमउलिमह पणमिऊण गुरुचलणे । आणंदसंदिरंसूनयणो सो भणिउमाढत्तो ॥ ८५ ॥
निककारणेक्कवच्छल ! भयवं नीसेससत्तताणपरा । आरोहेसु ममिणिह सम्मत्तं भवविरत्तस्स ॥ ८६ ॥
ताहे गुरुणा जिणभणियनीईओ नायजोगयगुणेण । चित्तुच्छाहप्पमुहपहाणसउणोवलंभंमि ॥ ८७ ॥
अरिहं देवो गुरुणो य साहुणो जिणमयं मयं तुज्झ । इय एवं आरोवियमाजम्मं तस्स सम्मत्तं ॥ ८८ ॥
भणिओ य वच्छ ! निव्वाणलच्छिवीयं मए इमं दिण्णं । संकाइदोसचिरहेण सब्वहा ता जएज्ज इहं ॥ ८९ ॥
धम्मोऽसि तुमं भइय ! दुहसयइहंमि भवसमुदंमि । जेण तए जिणधम्मो तरणतरंडोवमो पत्तो ॥ ९० ॥
एयस्स पभावेणं पालिज्जंतस्स सब्वकालं पि । जीवेहिं अणंतेहिं दुक्खाण जलंजली दिण्णो ॥ ९१ ॥
पर्यईए खणविणस्स संसारुभवसुहस्स कज्जेणं । एयंमि मा पमायं काहिसि तं भइ ! कइयावि ॥ ९२ ॥
अह सो नमिउं चरणे गुरूण भवभीयपाणिगणसरणे । हरिसभरवंधुरगिरं उदाहरित्था वयणमेयं ॥ ९३ ॥

धेवोवयारिणोऽविडु लोया पूयं करिति सविसेसं । एवंविहोवयारीण तुम्ह किं संपयं करिमो ? ॥ ९४ ॥
तहवि नियत्तह भयवं ! गिण्हह धणरयणभवणसंसारं । अहवा किमेत्तिएणं ? जीयंप्पिडु तुम्ह आयत्तं ॥ ९५ ॥
गुरुणोवचूहिओ सो ससरीरेऽवि डु ममत्तरहिएण । सम्मं कयं महायस ! तद्यत्ति एवं जओ भणियं ॥ ९६ ॥
सम्मत्तदायगाणं दुप्पडियारं भवेसु वडुएसुं । सब्वगुणमेलियाहिंवि उवयारसहस्सकोडीहिं ॥ ९७ ॥
परमत्थेण महायस ! दिण्णं तुमए समत्थमम्हाणं । एयंभि धम्मकम्मंमि निच्चमब्बुज्जमत्तेण ॥ ९८ ॥
इय गुरुणा सिक्खविडं जिणिंदधम्मस्स सब्वपरमत्थं । भणिओ सो अणुजाणसु एत्तो अम्हे गमणकज्जे ॥ ९९ ॥
दूसहगुरुदंसणविरहवेयणावाडलीकयसरीरो । दूरपहं अणुगच्छिय दंसिय मगं नियत्तो सो ॥ १०० ॥
भावैतो गुरुवयणं चिंततो भवभयं महाघोरं । सम्मत्तभावियमई निययावासंमि संपत्तो ॥ १०१ ॥

तओ काऊणमणंतरकरणीयं भरिऊणं सगडाणि विसिट्टकट्ठाणं नीसेसभिच्चजणसमेओ नियत्तो नियगामाभिमुहं,
पत्तो य कालक्कमेण, पेसियाणि दारूणि नरिंदस्स । तओ पइदिणं अब्भस्संतो जिणधम्मं पज्जुवासंतो सुणिज्जणं
परिचिंतितो जीवाजीवाइणो नव पयत्थे रक्खंतो पाणिगणं बहु माणंतो साहम्मियज्जणं सबायरेण पभावैतो जिण-
सासणं कालं गमेइ । अणण्या य मरणपज्जवसाणयाए जीवलोयस्स खणभंगुरत्तणओ सब्बभावाणं तहाविहमुवक्कम-
णकारणं पाविऊण सोसम्मं परियालियाविरयसम्मदंसणभावो कयपज्जंताराहणाविहाणो सुमरंतो पंचनमोक्कारं

पंचत्तसुवगओत्ति ।

उववणो सोहम्मे पलियाउसुरो तओ सुदिट्ठीओ । अंतोमुहुत्तमेत्तेण पत्तपज्जत्तभावो य ॥ १०२ ॥

जय जय नंदा ! भट्ठत्ति वाहरंतेण किंकरज्जेणं । हरिसभरनिब्भरेणं कारियत्तक्कालकायवो ॥ १०३ ॥

उउंगथोरथणवट्ठलट्ठरेहंतमोत्तिथसरीहिं । छणमयलंछणसच्छहवयणाहिं कुवल्यन्धीहिं ॥ १०४ ॥

निम्मलक्कोलत्तल्लिहियचित्तविच्छित्तिपत्तव्हीहिं । करकिसलयपरिघोलिरचामीयरचारुवलाहिं ॥ १०५ ॥

सुरसुंदरीहिं सद्धिं कीलंतो तेसु तेसु ठाणेषु । रइसागरावगाढो कालं वोलेइ लीलाए ॥ १०६ ॥ तीहिंविसे०

कळाणगेषु पंचसु चवणप्पमुहेसु जिणवरिंदाणं । नंदीसरदीवाइसु परिचत्तासेसवावारो ॥ १०७ ॥

भवजलहिंतरंडमिमं तिटुक्खत्तत्ताणममयमेयंति । मणवंछियत्थपूरणचिंतामणिपचलमिमंति ॥ १०८ ॥

अम्हारिसाणमविरइपराण इय विहियगाढबहुमाणो । हरिसभरनिब्भरंगो कुणइ य अट्ठाहियामहिमं ॥ १०९ ॥ तीहिंविसे०

हिमवंतमहाहिमवंतपमुहकुलपन्वएसु अणवरयं । दिव्वविमाणारूढो सिद्धाययाणि पेच्छइ य ॥ ११० ॥

सुणइ य पच्चक्खं चिय विहरंतऽरिहतंवयणकमलाओ । संसारुब्बेयकरं भत्तीए धम्मसच्चस्सं ॥ १११ ॥

दुक्करतवचरणकिसंग(सारए)संगवज्जिए सुणिणो । मणवयणकायगुत्ते भत्तीए पज्जुवासइ य ॥ ११२ ॥

इय पवरसिद्धिमंदिरसोआणपरंपरासरिच्छंमि । सिरिवीरनाहजिणवरचरियंमि गुणोलिनिलयंमि ॥ ११३ ॥

अचंतुत्तमसम्पत्तलाभनामो समत्थिओ एसो । भवजणचित्तसंतोसकारओ पढमपत्थावो ॥ ११४ ॥ इह
सम्पत्तलाभनिरूपणो पढमो पत्थावो ।

अह बिइओ पत्थावो

एवं लाभो बोहीए परमसिवसाहिवीयभूयाए । भणिओ एत्तो सम्मं मिरीइवत्तव्वयं सुणह ॥ १ ॥
एत्थेव समत्थसमुद्दीववलओवगूढपज्जंते । मेरुविराइयमज्झे जंबूदीवंमि दीवम्मि ॥ २ ॥
आरोचियधणुगुणसच्छहंमि तह दाहिणह्मरहंमि । गंगासिंधूण महानईण बहुमज्झयारंमि ॥ ३ ॥
अत्थि पसत्थविविहतरुसंडमंडियपरिसरा पेरंतपरूढपंडुच्छुताडनीवारविराइया नाणामणिरयणरइयधर-
णिवीडा अमरावइव नासच्चाहिट्ठिया अहिणवपुरिव्व नवकुलालंकिया जणयतणयव्व कुसलवलालसा विलासिणिव्व
दीहरच्छेवसोहिया रामएवसेणव्व अदिट्ठिविहीसणदोसा पायालपुरिव्व अहीणजणाणुगया सुरिंदवयणोवरोहहरिसि-
यवेसमणजक्खविणिम्मिया वारसजोयणदीहा नवजोयणविच्छिण्णा समुत्तुंगकणयपायारपरिक्खत्ता पवरभवणमा-
लासहस्साभिरामा धणकणययणपरिपूरिया विणीया नाम नयरी ॥

जत्थ वम्महो इव अखंडरूवलावणजोव्वणगुणविब्भमो रेहइ पउरज्जणो, अकित्तिमंडणाओ सुरसुंदरीओ-
वि परिहवंति नियरूवेण तरुणीओ, जहिं च सुरेसु चेव सुव्वइ मग्गणसहो दोसियाणं दोसाभिलासो तरुवराणं गया-

परावत्तो रयणेसु वहरसदो ॥ तं च रक्खेइ खंचियचलियासणागाखंडलकरकलिकणयकलसविहियरज्जाभिसेओ
तक्कालसंगहियउग्गभोगरायन्नखत्तियचउन्विहपहाणपरियरो सुरवइविइणणकणयकडयतुडियमणिमउडपमुहदिवालं-
कारालंकियसरीरो सिरिउसभनराहिवो ॥

कसिणासाढचउत्थीए चत्तसव्वत्थसिद्धिवासो जो । उत्तरसाढानक्खत्तजोगमिंदुमि संकते ॥ ४ ॥

कुलगरनाभिस्स गिहे चोइसगयपमुहसुभिणकथसूओ । मरुदेवीए गव्भे पाउब्भूओ महाभूई ॥ ५ ॥

पुव्वज्जियपुण्णसमूहचलियसिंहासणेण सक्केण । भत्तीए जस्स पणया जणणी गम्भावयारंमि ॥ ६ ॥

चेत्तवहुलहुमीए उत्तरसाढासु अद्धरत्तंमि । सुवणजणजणियतोसो जाओ जो पुण्णचंदोव्व ॥ ७ ॥

जस्स य जम्मणकम्मं तक्खणचलियासणा उ अकरिंशु । निययहिगारणुरूयं छप्पणणदिसाकुमारीओ ॥ ८ ॥

वत्तीससुरिंदेहिं नीसेसाभरसमूहसहिएहिं । मेरुमि जम्ममज्जनमहूसचो निम्मिमओ जस्स ॥ ९ ॥

जस्सोरुक्खसभलंछणदंसणसंजायहरिससुलएण । सिरिनाभिनरिंदेणं उसभोत्ति पइट्ठियं नामं ॥ १० ॥

सुरराथपाणितलसंठिओच्छुलट्ठिं करे धरंतेण । जेण जहत्यभिहाणं निम्मियमिक्खवागुवंसस्स ॥ ११ ॥

लेहप्पमुहा बावत्तरी कला जेण देसिया पढमं । वहुमेयं कासवलोहचित्तघडवत्थसिप्पं च ॥ १२ ॥

कम्मं च खेत्तवाणिज्जपमुहमाई निदंसियं जेण । अविपक्ककणविभक्खणहुक्खियजणजलणपयणं च ॥ १३ ॥

दुन्नयपसत्थजणसिक्खणत्थमुवदंसिया जए जेणं । सिट्ठजणरक्खणद्धा सामाइ चउच्चिहा नीई ॥ १४ ॥
दारपरिग्गहसमए जस्स सुरिदेण परमरिद्धीए । पुंखणगविहिसणहो विवाहमहूसवो विहिओ ॥ १५ ॥
वागरणछंदकहक्कम्मग्गजोइसपमोक्खवहुविज्जा । लद्धा जेणुवइद्धा पढमं चिय सुद्धबुद्धीए ॥ १६ ॥
नियनियकम्मनिसेवण नियमेणं गुरुजणस्स नमणं च । जायकुलण ववत्था जेण समत्था कया भुयणे ॥ १७ ॥
किं वहुणा-जुत्ताजुत्तवत्थुविण्णाणसुण्णहियएसु । नीई अज्जवि विफुरइ जस्स कित्तिव्व संव्वगया ॥ १८ ॥

तस्स य गयतुरयपसुहरज्जंगपरिबुडस्स संसएसु य ववत्थासु य कुलायारेसु य परोष्परविसंवाएसु य सयल-
जणपुच्छणिज्जस्स नंदाए देवीए सुमंगलाए य समं विसयसुहमणुहवंतस्स वचंति वासरा, अणया य सुमंगलाए
देवीए भरहो बंभी य मिहुणगं जायं, तहा सुनंदाएऽवि देवीए बाहुवली सुंदरी य जुवलंयं जायं, एवं वचंतेभि काले
पुणोऽवि सुमंगला देवी अण्णाणि एग्गपन्नासं पुत्तजुयलगणि पसूया, ते य भरहप्पमुहा कुमारा वड्ढति सरिरेण
नीसेसकलांकलावकोसलेण य, एवं च निदंसिय सयलकला कुलव्ववत्थाए सुहलोयवावारो उसभनरिसरो तेयासी-
पुव्वलक्खाइं जाव परिपालिऊण गिहत्थपज्जायं अवलोइऊण परलोयमगाणुरूवधम्मवावारविरिहियं भवंपकनिमज्जमाणं
(जणं)मणे अचंतकरुणारसालिद्धबुद्धी तक्कालचलियासणागयसारस्सयपमुहलोगंतियतियससमहिममुच्छाहियचित्तविती
विणिचित्तभोगपिवासो भरहपसुहपुत्तसयसंविभत्तपरिचत्तवसुंधराभारो आसंवच्छरक्कणयवारिधारावरिसाभिणंदियदी-

णमगणजणो चेत्तस्स बहुलट्ठभीए उत्तरासाढनक्खत्ते पच्छिमपहरावसेसे दिवसे कच्छमहाकच्छपसुहाणं नियनियपुण-
 (त्त)निहित्तरज्जवावडाणं चउहिं सहस्सेहिं मंडलेसराणं परिबुडो देवदाणबुक्खित्तविचित्तोवसोहियसुदंसणाभि-
 हाणसिविकाधिरूढो परमविभूर्इए समगकाणलच्छिलीलावणंमि उज्जाणे कयकट्टुक्कित्तवकम्मो परिचत्तसवंगसं-
 गिरयणाभरणो सयमेव चाउमुट्ठियं लोयं काऊण कयसिद्धनमोक्कारो पडिवणजसव्वसावज्जजोगधिरती वत्तीससुरेसरोहिं
 चउव्विहदेवनिकायसहिइहिं सव्भावसाराहिं महत्थाहिं पसत्थाहिं गिराहिं शुव्वमाणो पंचिंदियदित्ततुरयदमणो
 समणो जाओत्ति ॥

सुरारायनिसिद्धिसिद्धसंसावलंवि वहमाणो । कच्छमहाकच्छपमोक्खभिक्खुलोएण परियरिओ ॥ १९ ॥
 परिचत्तसव्वसावज्जजोगसंगो तिगुत्तिगुत्तो य । अप्पडिवद्धो गामाणुगाममह विहरिओ भयवं ॥ २० ॥ जुम्मं ।
 धणकणयसमिद्धसमुडुरा य मणुया मुणंति नो तइया । का भिक्खा के तग्गाहिणोत्ति भिक्खं भमंतंमि ॥ २१ ॥
 परमेसरंमि ताहे नियपहुपणएण कणगकरितुरए । इत्थी महत्थवत्थे पणया मणुया पणामेति ॥ २२ ॥ जुम्मं ।
 भिक्खं अपावमाणा कच्छमहाकच्छपभिइणो सुणिणो । पइदियहमणसणेणं संजायसरीरसंतावा ॥ २३ ॥
 तेलोक्कनायगे मोणमस्सिए ते उवायमलभंता । परिसडियपंडुपत्ताइभोइणो काणणंमि ठिया ॥ २४ ॥ जुम्मं
 भयवंपि निप्पकंपो सुरसेलो इव विसिद्धसंधयणो । पइदिणमदीणचित्तो एगागी विहरइ महंमि ॥ २५ ॥

कच्छमहाकच्छसुधा नमिविनमी रायलच्छिमिच्छंता । चिंतामणिव्य सव्याथरेण सेवन्ति भयवंतं ॥ २६ ॥

तन्मत्तिरंजियमणेण नागराएण दिन्नवरविज्जा । विज्जाहरायत्तं पाविद्य विगया जहाभिज्जयं ॥ २७ ॥

भयवंपि गामनगरागरेसु भिक्खं अपावमाणोऽवि । विहरंतो किमियतणू कुरुदेसे गयपुरंभि गओ ॥ २८ ॥

जिणदंसणसुमरियपुव्वजम्मसंजायतिवसद्धेण । सेजंसकुमारेणं सिरिवाहुवल्लस्स पउत्तेणं ॥ २९ ॥

तक्कालागयपुरिसोवणीयंपंडुच्छुगंडयरसेणं । संवच्छरयज्जंते भयवं पाराविओ तत्थ ॥ ३० ॥ जुम्मं ।

पडिया य कणयधारा तियसेहं समाहयाइं तूराइं । मिलिओ य पउरलोओ तेणवि कहिओ सबुत्तंतो ॥ ३१ ॥

भयवंपि पारणयं काऊण बहलीयडंबइल्लसुवणभूमिपग्गेसु देसेसु विहरमाणो तव्वासिमणुयाणं मोणमल्लिणोऽवि समाहप्पेण भद्दगभावं जणंतो विविहतवचरणपरायणो असंकलिट्ठयाए तक्कालियलोयस्स अतहाविहवेयणीयकम्मओ य निरुवसगं संजममणुपालितो समइक्कंते एंगंमि वाससहस्से विणीयनयरीपच्चासणणंमि पुरिमत्तालंमि नयरंमि संपत्तो, तस्स उत्तरपुरत्थिमे दिसीभाए सगडमुहं नाम उज्जाणं, तंमि नग्गोहपायवस्स हेड्डा संठियस्स अट्टमेणं भत्तेणं पुव्वण्हदेसकाले फग्गुणवहुलेक्कारसीए उत्तरासाढानक्खत्ते भगवओ तिहुयणेक्कचंधवस्स ज्ञाणंतरियाए वट्टमाणस्स दिव्वं अणंतं लोयालोयगयभावाभाबसहावत्थुसत्थपरमत्थनिब्भासणसभत्थं केवलनाणं समुण्यणं ॥ अह जिणनाहनाणुप्पायमाहप्पपरिकंपियसीहासणप्पलोयणपउत्तावहिसुणियनाणवइयरा पहयपडहप्पमुहंगंभीरतूरवा संखोभि-

यसुरलोया सरभसपणचिरसुरसुंदरीभुयलयालोलंतरयणवलयरणज्झणारवनिब्भरभरियभुवणंतरा वत्तीसं
ससुरा सुरिंदा समवसरणं विरइंति । केरिसं चिय ?—

अइसुरभिसिसिरमारुयपडिहयतणुरेणुतक्कणुक्करं । द्युसिणघणसारंगंवाभिरामसलिलोवसंतरयं ॥ ३२ ॥

आजाणुमेत्तविक्खित्तकुसुमेरंहंतरयणमहिवीढं । डज्झंतधूवधूमंधयारघणसंक्रियसिंहडिं ॥ ३३ ॥

मणिचामीयरनिद्धंतरुप्पपायारवलयतियकलियं । सव्वत्तोसुहमणिरयणरइयसिंहासणसणाहं ॥ ३४ ॥

डिंडीरपिंडपंडुरछत्तत्तरुद्धरविकराभोगं । पवणुव्वेच्छियकंकेल्लिपल्लुल्लिहियनंहविवरं ॥ ३५ ॥

गयणट्टियसुरकरपहयगहिरवज्जंतदुंडुहिसमूहं । दिसिसुहपसरियनिम्मलभामंडलवंडियतमोहं ॥ ३६ ॥

सरयनिसायकरनियरागारधुव्वंतचामरुप्पीलं । इय एवंविहसुद्धाप्रदोसहरणं समोसरणं ॥ ३७ ॥ छहिं कुलयं ।

तंमि य भुवणेक्कपहू पवरे सीहासणे तियसपणओ । पुव्वासुहो निसीयइ तित्थस्स नमोत्ति भणिऊणं ॥ ३८ ॥

हरिसभरनिब्भरुब्भिणपुलयपडलोवसोहियसरीरा । सट्ठाणेसु निलीयंति तद्वखणं चउविहा देवा ॥ ३९ ॥

पूरिज्जइ अंबरमित्तंजंततियसाण पंचवणेहिं । उडूयच्चिंधेहिं विमाणलक्खमालासहस्सेहिं ॥ ४० ॥

एत्थंतरे जिणपउत्तिपरिज्ञाननिमित्तं पुव्वनिउत्ता केवलनाणुप्पत्तिनिवेयणत्थं तथा पहरणसालापाउब्भयप-
भूयज्जक्खसमहिट्ठियनिस्सामन्नकुरंतफारपहाभरनिक्कत्तिथपयंडतमंकडुडुमारचक्करयणवइयरसंसणत्थं च भरहनरिंदस्स

पुरओ जुगवं चिय समागया बद्धवेगा पुरिसा । तओ भरहो इहलोयतुच्छसुहमेत्तसंपायणपच्चलत्तं निच्छिऊण चक्करय-
णस्स उभयलोगसुहजणत्तं पुण परमेसरस्स पवरकरेणुगांघाधियोहियसुयविरहविहुरमरुदेवासमेओ नीसेसकुमारनि-
यरपरियरिओ समग्गवल्लाहणो हरिसभरनिब्भंगो भगवओ केवलमहिमं काउं संपत्थिओ । अंतरेण मरुदेवीए
भगवओ उत्ताइछत्तपमुहं विभ्रूससुदयं पेच्छंतीए तहाविहभवियव्वयावसेण सुहज्झाणपरायणाए अंतगडकेवलित्तं
जायं । भरहखेत्ते पढमसिद्धोत्ति परिचिंतित्ता देवदाणवेहिं कया तीसे महिमा, खित्तं खीरोयसायरे से सरिरं, भरहो
य परमपमोयसुव्वहंतो तित्थयरं तिपयाहिणीकाऊण बहुप्पयारं थोऊण सदेवमणुयासुराए सभाए आसीणो । सामि-
णावि सजलजलहरारावंगंभीराए आजोयणप्पमाणखेत्तपडिप्फलणपच्चलाए पइजणमेक्ककालं संसयसयवुच्छेयजण-
णीए वाणीए पारद्धा धम्मदेसणा ॥ कहं ?

भो भो महाणुभावा ! दुलहं लहिऊण माणुसं जम्मं । उप्पत्तिपलथकलियं वियाणिउं भवसरूवं च ॥ ४१ ॥
कीसायासनिबंघणसयणसरीरेसु मोहवामूढा । धम्मोवज्जनरहिया निरत्थयं गमह नियजीयं ? ॥ ४२ ॥
सुमरह किं न निरंतरमणंतसो तिवखुदुक्खसंतत्ता । विवसाएसु ववसिया जं भे चउसुंपि विगईसुं ॥ ४३ ॥
तथाहि—नरए परमाहम्मियपहरणछिज्जंतअंगपच्चंगा । तिरियत्ते बहवंघणदहणंकणवाहणाभिहया ॥ ४४ ॥
देवत्तेऽवि य ईसाविसायपेसत्ततावसंतत्ता । मणुयत्ते पुण दोगच्चवाहिविहुरा चिरं वुत्था ॥ ४५ ॥

इय चउगइडुहनिवहं अणुसुमरिय मोक्खसोक्खकंखिच्छा । निरवज्जं पव्वज्जं पव्वज्जिउं उज्जमह धम्ममे ॥ ४६ ॥

एवमाइ भगवओ धम्मदेसणं का(सो)ऊण भरहो सावगो जाओ, वंभी य पव्वइया, भरहपुत्तो पुव्वभववद्ध-
गणहरनामगोत्तो उसमसेणो नाम, सो य जायसंवेगो पव्वइओ, सुंदरी पुण साविगा जाया, एस चउव्विहो समण-
संघो पढमसमोसरणे भगवओ पाउब्भूओत्ति । ते य कच्छमहाकच्छवज्जा तावसा सुणिऊण जिणनाहेकवलनाणमहिमं
भवणवइवाणमंतरवेमाणियजोइसियेदेवगणपरिखुडं भगवंतं दट्ठूण पव्वइया । एत्थंतरे जायभववेरग्गा पडलग्गतणं
व रायसुहं उज्झिऊण भरहस्स पंच पुत्ताणं सत्त नत्तुयाणं सयाइं समकालमेव तंमि चेव समोसरणे पव्वज्जं पव्वणाइं ।

अह गामच्चित्तगजिओ सोहम्ममे पालिऊण देवत्तं । पलिओवमपज्जंते भरहनरिंदस्स भज्जाए ॥ ४७ ॥

वम्माए गब्भंसि पाउब्भूओ सुसुमिणकयसूओ । पुव्वभवसाहुदंसणपावियधम्माणुभावेण ॥ ४८ ॥

अद्धट्टमदिवसाहिय नव मासे वसिय गब्भवासंसि । उववन्नो कयपुन्नो पवित्तनक्खत्तसुसुहुत्ते ॥ ४९ ॥

दसदिसिसुहेसु पसरंतसुत्तमं निहयतिमिरसंभारं । जाओ सूरोव्व तओ मिरियजालं विमुच्चंतो ? ॥ ५० ॥

परमब्भुयभूयं जम्मवइयरं चक्किणा निसुणिऊण । तस्स जहत्थं ताहे मिरिइत्ति पइड्डियं नामं ॥ ५१ ॥

करकिसलयसोहिळो कंकिळितरुव्व जणमणाणंदो । देहोवचएण तओ कुमारभावं समणुपत्तो ॥ ५२ ॥

अन्नया य सो मिरिई कुमारो भगवओ आइतित्थगरस्स असोगपुप्फधुट्ठिपमुहं च पाडिहेरविभूइं चउव्विहदेवनि-

काएण कीरमाणं दहूण तीयाणागयपडुण्णवत्थुसत्थवित्थरागयसंदेहसंदोहदहणपसमणेक्कपीऊसधाराणुगारिणे धम्मदेसणं निसामिऊण य करिकलहकन्नतालतरलमवलोइऊण जीविचं उव्वेलिरमहल्लविसवेछरीसरित्थं निच्छिऊण कुवलथच्छिसंजोगसमुम्भवसुहं अयंततडिंदडंभुरं जाणिऊण षणइजणपेम्मप्पवंधं परूढगाढसद्धम्मपरिणामो महाविभूईए पियामहस्स पासे पव्वइओत्ति ।

तओ सम्ममहिगयसमणधम्मो पंचण्णपारायासमायरणपरायणो पंचसमिइसमिओ तिगुत्तिगुत्तो पंचमहव्वयरक्खणवद्धलक्खो ससरीरेऽवि निरवेक्खो रयणवणिओ इव परिचत्तलोहायरो सायरो इव अयरहिओ दिणयरो इव दोसुम्मूलणकरो नागराओव्व दूरुद्धूळ्खभावलओ मंदरो इव निम्महियजलही सुहडो इव निहयविसमकरणो गामागरनगरेसु अप्पडिवद्धो थेराण पासे सामाइयाइं एक्कारसंगाइं ससुत्ताइं सअत्थाइं थिरपरिचियाइं करेमाणो सामिणांसंद्धिं विहरइत्ति ।

इओ य-भरहराया समुण्णन्नचक्करयणो चाउरंगवलकलिओ पुव्वदिसाए सागहतित्थं दाहिणेण वरदामं पण्डिमेण पहासं उत्तरेण य तुल्लहिमवंतपरिसरं जाव साहिऊण छक्खंडभरहं सट्ठीए वाससहस्सेहिं वत्तीसनरवइसहस्सपरियरिओ अइगओ विणीयरायहाणिं, कओ से नारस वासाइं महारायाहिसेओ, विसज्जिया य रण्णा नियनियट्ठाणेसु दूरदेसागवा नरवइणो ।

अन्नया य भरहो अट्टाणउइए चुल्लभाउयाणं दूयं पेसेइ, भणवेइ व जहा-सम सेवं पडिज्जह अहवा रज्जाइं परिहरह जुज्झसज्जा वा हवह उवायंतरं वा परिकंप्पहत्ति, एवं च राइवयणं समगमवधारिऊण गओ दूओ, निवे-इओ तेसिं भरहनरिंदाएसो, तं च समायन्निऊण कोवावरत्तनेत्तेहिं लीलाजट्टिताडियधरणिवट्टहिं भणियं तेहिं-रे दूया-हम ! को भरहो ? को वा एरिसवत्तवे तस्साहिगारो ? जेण तस्स अम्हाणं च ताएणं दिण्णं रज्जं तम्हा ताओ चैव जं आणवेही तं करिस्सामोत्ति, रोसेण कंठे घेत्तूण निद्धाडिओ दूओ अवदारेणं । एत्थंतरे गाभाणुगामेण विहरमाणो भयवं आइतित्थयरो अट्टावयंमि नगवरे समोसरिओ, आगओ चउव्विहदेवनिकाओ, तेऽवि अट्टाणउइंपि कुंमारा तुरियं समोसरणमागया, सहरिसं च सामी वंदिऊण निसन्ना सट्ठाणे, पत्थावे च भरहाएसं कहिऊण पुट्ठं तेहिं-ताय ! कहेसु किं जुज्झामो उयाहु रज्जाइं चयामोत्ति, ताहे सामी तेसिं जोगयमुत्तलम्भ भोगनिवित्तिनिमित्तं असम्भावपट्ठावणाए इंगालदाहगदिट्ठतं कहिउमाढत्तो-

जह एगो किर पुरिसो भायणमेगं तु भरिउ सलिलस्स । इंगालाण निमित्तं काले गिम्हे वणंमि गओ ॥ ५३ ॥
तत्थेगत्य वट्ठइं खायरपमुहाइं सारकट्ठाइं । सो मेलिऊण जलणं पज्जलइ तस्समीवगओ ॥ ५४ ॥

उज्झंतकडसिहिताविउत्ति संछिन्नदारुसमिओत्ति । सज्झंदिणदिणययीडिओत्ति तण्हाउरो सुत्तो ॥ ५५ ॥
तं पुब्बाणीयं जलमसेसमापियइ तत्थ सुमिणंमि । गिंमुच्चवदिणयरकिरणविहुरमरुथेरवसहोव्व ॥ ५६ ॥

तद्वचि दु असमियतण्हो गेहे गंतूण सयलकलसजलं । निट्टविऊण निलीयइ पोक्खरिणीवाविकूवेसु ॥ ५७ ॥
 पीए तस्सलिलंमिवि गंगाइमहानईसु ओगाढो । ताओऽविहु सोसेई पलएव्व पयंडमत्तंडो ॥ ५८ ॥
 तत्तो जलहिजलं पिय अंजलिसलिलं व पियइ नो तहवि । तस्स उवसमइ तणहा अवि अहिययरं पवट्ठेइ ॥ ५९ ॥
 ताहे अपावमाणो कहिपि सलिलं समत्थमुवणेऽवि । अवलोइउं पवत्तो सो संतत्तो पयत्तेण ॥ ६० ॥
 अह एगतथ पएसे अइउंडो पूइयवो य (पूइथोव)सलिलेव(य) । तेणं दिट्ठो कूवो चिरेण परितुट्ठचित्तेण ॥ ६१ ॥
 पविसिउमसमत्थो दीहरज्जुणा वंधिऊण तणपूलं । सो खिवइ तत्थ तणहासमत्थदुक्खस्स पसमट्ठा ॥ ६२ ॥
 तो तक्कड्डियपूलयेपरंतगलंतविंदुसंदोहं । उहुं वियारियसुहो आसायंतो गमइ कालं ॥ ६३ ॥
 जह तस्स वाविदीहियसायरसलिलेहिं अहयतण्हस्स । नो किंपि होल्ल तेसिं तणगलगगेहिं विंदूहिं ॥ ६४ ॥
 एवं देवाणुपिया ! तुम्हाणं पुक्कालियभवेसु । उवमुत्तपवरपंचप्पयारसद्दाइविसयाणं ॥ ६५ ॥
 पुणरवि सन्वाणुत्तरसवत्थविमाणपत्तसोक्खाण । तेत्तीसं अयराइं निव्विग्घमणंतरभवंमि ॥ ६६ ॥
 जइ भो महाणुभावा ! तित्ती भोगे पडुच्च नो जाया । ता किं इमिणा होही मुत्तेणं तुच्छरज्जेण ? ॥ ६७ ॥
 तो असुइसंभवेसुं तुच्छेसुं माणुसेसु भोएसु । अइथोव्वकालिएसुं पज्जते दुहविवागेसुं ॥ ६८ ॥
 सुहमडुरेसुं आवइसहस्सहज्जसु निंदणिजेसु । साहुजणवज्जिएसुं मुहुत्तमवि मा कुणह संगं ॥ ६९ ॥

तवखणकयेयालियपवरज्जयणेण बोहिऊणेवं । ते जिणवरेण सम्मं सुणिदिक्खं गाहिया संवे ॥ ७० ॥
 तो सुचरियसामन्ना विणिहयनीसेसघाइकम्मंसा । सुवणजणपणयचरणा जाया संवेडवि केवल्लिणो ॥ ७१ ॥
 विहरंति जिणेण समं गामागरनगरमंडियं वसुहं । अह दूयं भरहवई पुणं पेसइ वाहुवल्लिणोडवि ॥ ७२ ॥
 तेणवि दूयं निब्भच्छिऊण भरहेण सह समारद्धो । दिट्ठीवायाइओ संगमो जावं पव्वइओ ॥ ७३ ॥
 तत्थेवुस्सग्गठिओ कह लहुभाईण वंदणं काहं १ । वंभीमुंदरिपेसण ओयरणं कुणसु हत्थीओ ॥ ७४ ॥
 बुत्ते चिंतानाणं जिणस्स पासंमि गमणमह तस्स । भरहोडवि हयविपक्खं मुंजइ रज्जं सनगरीए ॥ ७५ ॥
 इओ य-तस्स मिरियस्स दसविहचक्खवालसामायारीनिरयस्स सिद्धन्तपसिद्धसंजमकरणपरायणस्से संसारा-
 सारयं परिभावंतस्स अट्टारसविहं वंभचेरमणुपालेतस्स बोलीणाइं बहूइं वरिसाइं, एग्गा य गिम्हमासे विप्फुरं-
 तेसु जलणजालाकरालेसु रविकरेसु धम्ममाणलोहागरनिज्जा (ज्झा) मयसरिसेसु वायंतेसु खरसमीरणेसु विरहिणीजणहिय-
 यव्व तत्तंमि महियलंमि अण्हाणवसविसंप्पमाणवहलमलाविलसरीरत्तणेण पवंहंतसेयसलिलुप्पिलाउलत्तणेण य
 चाढं किलंतस्स दढचारित्तावरणीयकम्मदोसेण मइलहिययस्स परिचत्तकुमित्तस्सवि गुरुकुलवासे ठियस्सावि छट्ठमा-
 इनिट्ठुरतवकिसियसरीरगस्सवि सयावि सुत्तत्थे विपरिभाविस्स एक्कारसंगाइं तण्हाभिहयस्स पयंडगिंभसंतत्त-
 सव्वगत्तस्स पल्लत्थं संजमओ झडत्ति चित्तं मिरियस्स ।

अइगाढो मोहमडो जमेरिसाणवि मणो विकंपेइ । अघडंतघडणपडुयाण किं व सज्जं न कम्ममाणं ? ॥ ७६ ॥
अन्नं च-तावच्चिय धम्ममई तावच्चिय निंदियत्थपरिहारो । जावडज्जवि मोहमहापिसायपांसमि नो पडइ ॥ ७७
एत्तो चिय मोक्खमहानिहाणमुखणियमुज्जयं समणं । धाडिति विसहरा इव बावीस परीसहा सहसा ॥ ७८ ॥

अह मिरिइणा चित्तिं-न सब्बहा समत्थोऽम्हि सम्मभियाणिं समणत्तणमणुट्ठिं, ता किं करेमि ? कसुवाय-
मणुसरामि ? किं देसंतरं वचामि ? कस्स वा साहेमि ?, होउ वा विकप्पिएणं, पवज्जापरिचाएणं नियमवणगमणं
संपयं मे पत्तकालंति, अहवा-चउजलहिमेहलामंडलाए महिमहिलाए अहिवइस्स पयंडमुयदंडदलियदुंदंतवइरिव
ग्गस्स सयलपणमंतमहिवालमडलिकिरणावलिकब्बुरियवलय(चलण)स्स छन्नवइगामकोडिनाहस्स अण्णडिहयसा-
सणस्स भरहचक्कवइणो पुत्तो होऊण सयमेव परिचत्तं मंदिरमणुसरंतो कंहं न लज्जामि ?, कंहं वा तत्थगयं निह-
यपइणं मं जाणिऊण न लज्जाए हेट्टासुहा ठाइस्संति जणणिजणया ? कंहं वा तुसारहारगोखीरकुंदेंदुधवलस्स
इक्खागुक्कुलस्स पढमकलंको न भविस्सामि ? के वा परिचत्तुत्तमंगीकयधम्मस्स न करिस्संति हीलं सहसंवड्डियावि
बंधुणो ? कस्स कस्स वा महापाचकारिणो निदंसणं न भविस्सामि ?, ता सब्बहा न जुत्तं गिहगमणं, किं तु सब्ब-
प्ययारेहिवि परिसुद्धं नियमणस्सेव नियमणं मे काउं जुज्जइ, तं पुण सेलसिरयलोट्टट्टोलंगंडसेलंपिव जुगंतसमय-
समीरणुद्धयसिंधुसमुच्चलियमहल्लकल्लोलपडलं पिव पयंडमत्तंडमंडलपगलंतपहाजालं पिव दढसुकंकाणगणगयमहाडुया-

सगं पिव न मणांगं पि सकेमि संठविउं, अयं च जइधम्मो अच्चंतमपमत्तचित्तमहासत्तनिव्वहणिज्जो, अहं पुण दुइंतग-
इभो इव समुदुरखंधसिंधुरमहल्लयणोवसरणं कायरो इव दुगसंगामभीमसवडं मुहुब्भडभिडंतसुहडभिडडिफडाडोवं
दुस्सहपरीसहचमूपराजियमाणसो न सकेमि अट्टारसंसीलंगसहस्साभिरामं सव्वहा जहुत्तं समणधम्ममणुचरिउं ।
अविय—

सुरसेलुल्लभारो एसो अहि(अहयं तु)भगपरिणामो । आजम्मं वोढव्वो कह तं एवंविहेण मए ? ॥ ७९ ॥
एसोऽवि भवविरक्ख(क्क)णपडयपभावो पियामहो जइवि । करकलियामलयं पिव जाणइ मम विहडियं चित्तं ८०
तहविडु संसारुव्वेयविरत्तओ कहमहं महाघोरं । काउं सुणीण धम्मं तरामि एयाणुवित्तीए ? ॥ ८१ ॥
कीरइ अणुवित्तीविडु सद्धम्मगुरूण थोवदिणसज्जे । कज्जे आजम्मं पुण कायव्वो संजमो कह णु ? ॥ ८२ ॥
इओ य-(असुहं)गिहत्थभावं संजममकलंकमवि न सकेमि । काउं किलिट्ठचित्तो कसुवायं संपवज्जामि ? ॥ ८३ ॥
एवं च तस्स किंकायव्वयाअ मूढस्स अचित्तणीयमहिमयाए कम्मयाणं अघारसंसारसागरपरिब्भमाणुकूलसी-
लयाए जीवस्स अवस्सं भवियव्वयाए तहाविहभावस्स इओ तओ उभयमग्गाणुसारिणसुवायं मग्गमाणस्स सह-
सच्चिय सयमेव एयारिसी बुद्धी पाउब्भूया, जहा—किर भगवंतो सुणिणो मणवयणकायदंडत्तरहिथा असुभवावारप-
रिचाएणं सया संलीणसरीरा अहं पुण न एवंविहगुणजुत्तो, जओ पराजिओ इंदिएहिं अहिभूओ य उस्सिखलेहिं

मणचयणकायंदेहिं, तम्हा एरिसस्स मम हवउ सच्चरियपयडणपरं तिदंडं चिंधं, जइ पुण एयं अणवरयं पेच्छमाणस्स सदुच्चरियपच्छायावेण विसिट्ठपरिवालणुज्जमो होज्जा १, तद्वा सुणिणो सिरकेसावणयणेण सव्विदियनिगहेण य मुंडियो भवंति, मम पुण इंदियनिगंहरहियस्स किं निरत्थयं मत्थयलुंचणेण १, अओ खुरमुंडणं सुणिवेसविसरिसत्त-
परुवणपरं, सिहाधरणं च संपज्जउत्ति २, तद्वा समणा भयवंतो तिविहं तिविहेण पच्चक्खायसुद्धमवायरपमुहभे-
यपाणाइवाया संजममणुपालेति, मज्झं पुण अतद्वाचिहजोगयाजुत्तस्स थूलपाणाइवायवेरमणं जुत्तंति ३, परिचत्तस-
मगगकिंचणा सुणिणो, अहं पुण न एयंविहो ता नियमगाविसरणनिमित्तं सुवणणपवित्तगाइमेत्तं मम किंचणमवि-
हवउ ४, तद्वा जिणवरुद्धिसमगसीलजलपक्खालियकम्ममलसेयत्तेणेण निचं सुंदरगन्धाभिरामां (सुणिंवरं) अहं
पुण निम्मलत्तणेण दुगुच्छियगंधो ता बार्हिपि तस्सावणयणनिमित्तं गंधचंदणाइपरिगहो मम समुच्चिओत्ति ५,
तद्वा ववगयमोद्वा निक्कारणविसुक्कोवाहणपरिभोगा य तवस्सिणो, अहं पुण महामोद्वाभिभूतो सरीरक्खापरो अओ
छत्तयंधरणं उवाहणापरिभोगो य मम संपज्जउत्ति ६, तद्वा परिजुन्नसुद्धकुत्थियथोवसुक्खित्थपरिगहा महाणुभावा
सुणिणो, अहं पुण गाढकंसायकलुसियबुद्धिप्रसरो तम्हा धाउरसरत्ताणि चत्थाणि मए परिहियन्वाणि ७, तद्वा
सावज्जजोगभीरुणो जइणो मणसावि न पत्थंति बहुजीवाउलं जलारंभं, अहं तु संसाराणुसारिबुद्धी तम्हा
परिमिएणं सल्लेणं पाणण्हाणाइं वावरमणुचरिस्सामिति ८ ॥

एवं संबुद्धिपरिकल्पिणेण जइविसुरिसेण वेसेणं । मुणिधम्ममंगचत्तो पारिव्वज्जं पवत्तेइ ॥ ८४ ॥
 गामागरेनगराइसु सिरिरिसहजिणेण सह परिभ्रमंइ । सुस्सवणपक्खंवायं निच्चं हियएण बहंमोणो ॥ ८५ ॥
 अहं तं करयलंगहियच्छत्तयं दीहलंबिरिसिहंडं । पासविमुक्कतिदंडं पवित्तमाइहिं परिहरियं ॥ ८६ ॥
 गेरुयरसरत्तंसुयविराइयं संझसूरविंव व । चंदणचच्चियदेहं उवाहणारोवियकमं च ॥ ८७ ॥
 असुरिसरूवं नीसेससमणसंगस्स मज्झयारंमि । द्रहुं कोऊहलिओ बहुजणो पुच्छए धम्मं ॥ ८८ ॥
 मिरिइविं सम्ममहिगयसुत्तथो तत्तेदंसेणसमत्थो । साहेइ वित्थरेणं मुणिधम्ममविहिं जणस्से पुणो ॥ ८९ ॥
 जहं एत्थं आजम्मं वायरसुहुमेसु सबजीवेसु । संघट्टणंविहवणाइ वज्जणिज्जं पयत्तेणं ॥ ९० ॥
 कोहेण व लोभेण व हासेण भएण वावि माऽ(ना)सच्चं । जीवोवघायजणंगं भासेयच्चं विणासेऽविं ॥ ९१ ॥
 गामे वो नयरे वा थोत्रं वा भूरि वा न धेत्तच्चं । सच्चित्तमचित्तं वा सबमदत्तंपि तिविहेण ॥ ९२ ॥
 देवनरत्तिरियरुमणीसु पवरलायेणंसुंदरंगीसु । पच्चक्खमुयंगीसु व खणंपि नो अभिरमेयच्चं ॥ ९३ ॥
 धम्मोवयोरि मोत्तुं वत्थपडिग्गहपमोक्खमुवगरणं । सेसमहिगरणरूवं परिहरियच्चं पयत्तेण ॥ ९४ ॥
 संथारगमेक्कं वज्जिऊण नेवोवहाणतूलीओ । फासस्साणुगुणाओ कइयावि य पत्थणिज्जाओ ॥ ९५ ॥
 अरसचिरसन्नपाणेहिं पीडिएणावि महुरदिज्जस्से । नो भोयणंमि चित्तं निवेसियच्चं मणांगंवि ॥ ९६ ॥

रम्भेसु बडलमालइकुवलयंगंधेसु तदियरेसुपि । घाणिंदियगोयरमइगएसु तुल्लेण होयवं ॥ ९७ ॥
रूयेसु सुंदरेसुं नयणमणाणंदणेसु दिट्ठेसु । तवइरित्तेसुं वा तोसपओसा न कायवा ॥ ९८ ॥
सदेसु वेणुवीणाकिन्नरकंदुब्भवेसु विविहेसु । खरमज्जारभवेसुवि सुणिएसु समेण होयवं ॥ ९९ ॥
तज्जणतालणहीलणकरणपसत्तेऽवि बालिसज्जणंमि । चिररूढंगण्डपणएव रूसियवं न थेवंपि ॥ १०० ॥
जयपयडेहिवि नीसेसलोयविम्हयकरेहिवि गुणेहिं । जुत्तेण मणांगंपिवि माणो न मणंमि ठवियवो ॥ १०१ ॥
विस्सासविणासणकारिणित्ति सुहगइदुवारपरिहोत्ति । दुहनंदियत्ति माया परिहरियवा कुभज्जव ॥ १०२ ॥
थेवंपि कज्जछिंदं पाविय पावस्स छलणसीलस्स । लोहस्स पिसायस्स व अवगासो नेव दायवो ॥ १०३ ॥
सच्छायं तिव्वफलं मइसउणं पवरसीलतरुसंडं । भंजंतो दुट्ठमणो बंधेयवो वणकरिव ॥ १०४ ॥
निस्संबवं सावज्जजोगये जंतुदुक्खजणगे तु । सचेऽवि भासियबे जीहावि पडिक्खलेयवा ॥ १०५ ॥
तत्तायगोलओ इव पमत्तचित्तंगविविहवाचारो । किं नेव विहवेज्जा ? ता देहो संठेयवो ॥ १०६ ॥
सत्तरंसभेयभिन्नो जइधम्मो नूणमप्पमत्तेणं । जं कायव्वो निच्चं तेणेसो दुक्करो होइ ॥ १०७ ॥
गिम्हुणहपीडिएणवि न छत्तयं न उवाहणाओऽवि । परिमुत्तन्वा हेओ संव्वोऽवि सरिरसंकारो ॥ १०८ ॥
नो सिरलोयप्पसुहं कट्ठाणुट्ठाणमंवि विमोत्तवं । रत्ताइवणवत्थंपि पत्थणिज्जं कयाइ नवि ॥ १०९ ॥

इय जइधम्मे सद्धो कायव्वविही निवेइओ तुम्ह । अक्खंडं सिवसोक्खं जइ वंछह ता तयं कुण्ह ॥ ११० ॥
 एवमायन्निज्जण जणो पहिट्टमणो भणिउमादत्तो—भयं ! जइ एवंविहो चरणधम्मो ता कीस तुम्हे छत्तप्प-
 मुहसुवगरणं गिण्हह ? सिरलोयाइयं च न सम्ममायरहत्ति, मिरिइणा भणियं—ओ भो महाणुभावा ! मा एवमासं-
 कह, जहा एसो अण्णहा भासइ अण्णहा करेइत्ति, अहं हि संसाराणुसारिबुद्धी पराजिओ मोहमहामल्लेणं पडिक्ख-
 लिओ उस्सिखलकसायखलेहिं मुसियपसमधणो दुद्धंतिदियचोरेहिं सायरमवलोइओ दुग्गइदुक्खरक्खसीए, ता मम
 दोसगुणविभावं उज्झिज्जणं नीओवणीयं पिव महामणिं खचरसमप्पियं पिव परमविज्जं मायंगदेसियं पिव समी-
 हियपुरपंथाणं रोगविदुरवेज्जोवइडं व परमोसहं अंगीकरेह सबहा तुम्हे सुणिधम्मंति ।

एवमाइन्निज्जण संजायभव्वेरगा निउणबुद्धिपरिभावियपरमत्था तणं व परिचत्तपुत्तकलत्तमित्तवित्ता जिण-
 धम्मनिवेशियथिरचित्ता समणदिकखागहणत्थं पाउब्भवंति अणेगउग्गभोगराइण्णपमुहा जणा, मिरिइइवि ते
 सिस्सभावेणोवट्ठिए णाऊण भगवओ सुवणपईवस्स संसारतरुहणदहणदावानलस्स अट्ठप्पयारपरपाडिहेरययडप्प-
 भावस्स उसभसामिणो समप्पेइ । एवं च पइदिणं सद्धम्मदेसणाए पडिबोहेमाणो नियदुच्चरिअं निरंतरं निंदमाणो
 सुस्समणपक्खवायं वहमाणो सुत्तत्थाइं मणे परिभावेमाणो सुहसीलयाए सबुद्धिपरिकप्पियपरिन्वायगवेसं धरेमाणो
 गामागराईसु सामिणा सद्धिं विहरमाणो कालं गमेइत्ति ।

अह अन्नया कयाई भयवं गामाग्रेसु विहरिऊण अट्ठावयंमि समोसरिओ, भरहचक्कवट्ठीवि भाउणो पवइए निसामिऊण संजायतिव्वसोगो जइ पुण भोगे दिज्जमाणे अज्जवि गेण्हंतिस्सि संचित्तिऊण भगवंतं उसभसामिं सविणयं वंदिऊण भाउगे भोगेहिं निमंतेइ, इहलोइयसुहनिस्सेव्वेहिं भणिओ तेहिं—

भो महायस !—सयमेव परिचत्ते दुहनिवहुप्पत्तिकारणुब्भूए । उरनिहयसल्लतुल्ले कहमिव भोगे अणुसरुमो ? १११
अच्छंतु पेम्मनिब्भरतरुणीसंबंधंधुरा भोगा । तेसिं न संकहंपिचिं सोउं संपइ समीहामो ॥ ११२ ॥

एवं भोगेसु पडिसिद्धेसु भरहो परिचत्तसंगाण एएसिं आहारदाणेणावि ताव धम्ममायंरामित्ति विकप्पिऊण पवरलक्खणभोगणभरिण्हिं पंचहिं सगडसएहिं असणदाणत्थमुवट्ठिओ, पुणरवि निवारिओ तेहिं—अहो महायस ! न कप्पइ आहाकम्मं आहडं च असणपाणं परिभोचुं सुणीणं, तओ गिहनिमित्तसंसिद्धभोगेण निमंतेइ, सोऽवि रायपिंडो न कप्पइत्तिकाऊण निसिद्धो साह्हिं, हा सव्वपगारेहिं परिचत्तो अहमियाणि एएहिंति दढं चित्तसंताव-मुवगओ भरहचक्कवट्ठी, तं च सोगविहुरं नाऊण वियाणमाणेणावि सक्केण तस्स परितोसनिमित्तं सुच्छिओ भयवं सप्पभेयमोगंहं, पुट्ठेण य भगवया भणियं—सुरिद ! पंचविहो उग्गहो, तंजहा—देविंदोगहो रायावग्गहो गिहिवइअ-वग्गहो सागारियावग्गहो साहम्मियावग्गहो, तत्थं देविंदावग्गहो जहा किरजं बुदीवदाहिणखेत्ताहिवइ तुमं, अहो सक्क ! तुहाणुजाणावणेण कप्पइ समणाण तहिं विहरित्तए, राया पुण छवखंडभरहाहिवइ जहो संपयं भरहो, तस्सांणुणाए

मुणीहिं तद्देसे वसियच्च, गिहवई य मंडलेसरो, सोऽवि समंडलनायगज्जणेण अणुणवणजोगो, तदणुमए चेय ठाइयच्च,
सागारिओ पुण सेज्जायरो, सेज्जा य संनिमित्तकयतहाविहगेहसालापमुहो भवणविसेसो, तद्दणेण तरइ संसारसायरंति
सेज्जातरो गुणनिष्फन्नजामो । कंह पुण सेज्जाए तरइत्ति ? भन्नइ—

तत्थ ठिया मुणिवसहा सज्जायज्झाणद्धोसियसरीरा । जं धम्मदेसणाईहिं भवलोयं उवयरंति ॥ ११३ ॥

जं वा अपुवसत्थं पढंति तह संजमे पयट्ठंति । छट्ठमाइयतवो दुक्करमवि जं पवज्जंति ॥ ११४ ॥

अन्नत्तोऽविहु जं वत्थपत्तंभत्ताइणा न सीरंति । परमत्थेणं सवत्थ तत्थ सेज्जा भवे हेऊ ॥ ११५ ॥

इय-सेज्जादाणेण महल्लुक्खल्लोलसंकुलमगाहं । संसारसायरं गोपयं व दाया लहुं तरइ ॥ ११६ ॥

इहरा सेज्जाऽभावे न जीवरक्खावि निव्वहइ सम्मं । किं पुण समग्गसद्धम्मपालणं होज्ज निव्विग्घं ? ॥ ११७ ॥

साहम्मियावगहो पुण सिद्धंतपसिद्धनाएण परोप्परं समणाण एगखेत्ते निवसिउकामाणमवगंतवो । एवं च
पंचविहावगहपरूवणमायन्निऊण पंचगपणिवायपुरस्सरं सक्को भणिउमाढत्तो-भयवं ! जे इमे अज्जप्पभिई दाहि-
णखेत्ते समणा निगंगा विहरंति एएसि णं अहं ओगहमणुजाणामि, भगवया भणियं-लुत्तमेयं, एयं च आयन्निऊण
भरहोऽवि जायपरितोसो भणइ-भयवं ! अहंपि भारहे वासे साहुणो विहरमाणे अणुमण्णेत्ति । तंपि तहाऽऽनीयमसणं

अणुध्वयगुणव्यसिक्खावयगुणसंगयाणं सावगाणं सक्कवयणाओ भरहेण दावियं, तद्वा एवंपि निज्जरा होउत्ति मणमा-
णेण सावगाणं पइदिणं भोयणदाणं कयं, भयवंपि अन्नत्थ विहरिओ ।

तेऽवि सावगा परिचत्तासेसघवावारा भरहपणीयजिणथुइगब्भे वेदे परावत्तयंता छट्ठे मासे परिण्णाननिमित्तं का-
गिणीरयणेण उत्तरासंगनाएण आलिहियतिरेहा निरवज्जवित्तीए कालं गमेति । अन्नया य भयवं पडिवोहिऊण तेसु तेसु
ठाणेसु भव्वज्जणं पुणरवि अट्ठावयमागओ, देवेहिं कयं विसालसालत्तयविहारं छत्ताइच्छत्तरमणिज्जं आजानुमेत्तभूमि-
निहित्तरुंतभमरं पंचप्पयारपुण्णुजोवयारं गयणंगोयरंततियसविमाणमालासहस्साभिरामं मंदमंदमुद्धयवेजयंती-
सयसोहिंयं पवरमणिमयमहप्पमाणासोगतरुविराइयं पंचवन्नरयणविणिम्मियसिंघासणं समवसरणं, तत्थ य निसन्नो
तइलोक्कपियामहो भयवं पढमज्जिणो, निचिट्ठा कमेण गणहरपमुहा साहुवगा, आसीणा अणेगसुरकोडिपरिवुडा
वत्तीसंपि सुरिंदा, विण्णायजिणागमवुत्तंतो समागओ सब्वविभूईए भरहो, परमभत्तीए पणमिय भयवं आसीणो
उच्चियभूमिभाए ।

अह सो तद्वाविहं भवणच्छरियं नीसेसतिडुयणसिरिचिरइयंपिव सब्वब्भुदयगेहंपि व समवसरणसोहं भगवओ
परमिस्सरियं च पासिऊण हरिसुण्णुल्लोयणो पुच्छिउमेवं पवत्तो-ताय ! जारिसा तुम्हे भवणगुरुणो एवंविहपूयाप-
यरिसपत्ता किमेत्थ भरहे अण्णेऽवि एरिसा भविस्संति न वा ?, भगवया भणियं-भविस्संति, भरहेण भणियं-केरिसा ?,

ताहे तेवीस जिणे अजियाई वीरनाहपज्जंते । समबुद्धिबलायारे तिहुयणजणपणययपउमे ॥ ११८ ॥
 तह तेसिं च अण्णोऽण्णमंतरं सयलकालकलणेणं । वण्णं पमाणमाउं गोत्तं तह जणणि जणगा य ॥ ११९ ॥
 जम्मणनयरे य तहा कुमारज्जाइ सव्वपरियागं । सिद्धिगईपज्जंतं भयवं भरहस्स साहेइ ॥ १२० ॥
 पुणरवि पुच्छइ भरहो मम सारिच्छा कईह होहिंति ? । सगराई एक्कारस चक्कहरे कहइ सव्वन्नू ॥ १२१ ॥
 अण्णुट्ठोऽविहु भयवं पुणोऽवि वागरइ भरहनाहस्स । नव वासुदेवबलदेवजुवलए भाविणो भरहे ॥ १२२ ॥
 पुणरवि भणिओ भरहाहिवेण तइलोकमंदिरपईवो । अवलोइऊण परिसं खयरामरनियरपरियरियं ॥ १२३ ॥
 छट्ठमाइतवकिसियसाहुसुधम्मकारिगिहिकलियं । भयवं ! किमेत्थ कोऽवि हुपाविस्सइ तित्थयरलामं ॥ १२४ ॥
 तह चक्कवट्ठिलच्छिं चोइसवरयणगुणमहग्घवियं । अहवावि वासुदेवत्तणंपि पावेज्ज भरहंमि ? ॥ १२५ ॥
 ताहे कलियकुलिंगं मिरिइं एंगंतसंठियं भयवं । दावइ जह एस जिणो चरिमो होही तुह सुओत्ति ॥ १२६ ॥
 एसोच्चिय गामागरनगरसमिद्धस्स भारहद्धस्स । सामी तिविहुनामो पढमो तह वासुदेवाणं ॥ १२७ ॥
 एसो महाविदेहे पियमिच्चो नाम चक्कवट्ठीवि । मूयाए नयरीए भविस्सई परमरिद्धिजुओ ॥ १२८ ॥

एवं च आयन्निऊण भरहनरिंदो पट्ठिमणो पणमिऊण भयवंतस्स चरणसरोरुहं तक्खणमेव अणेगसुहसेणाव-
 इनिवहपरिबुडो पयट्ठो नियसुयस्स मिरियस्स वंदणणिमित्तं, तदंतरे चारणलद्धिसंपन्ने ओहिनाणधरे मणपज्जवनाणिणो

विगिहृतवर्करुणनिरणं सुराभिमुहायावृणापरायणे वीरासणाइदुकरकायकिलेसकारए भंगियसुयपढणेकमाणसे य महासु-
णिणो परसभत्तीए ठाणे ठाणे विणयपणमंतमंडलिमंडलं वंदंतो अणिमिसदिहीए पेच्छमाणो य पत्तो जत्थ सो एक्कदे-
सविमुक्केणुतिदंडो पंडुरपुंडरियनिवारियविकरपसरो नियमइपरिकप्पियपवित्तिगाइउवगरणविसरिसरुवदंसणको-
उहलाउलियागयलोयधम्मकहणवक्खित्तचित्तो मिरिई निवसइत्ति, तं च दूराओ चिय निस्सामणभत्तिभरनिस्सरं-
तुव रोमंचच्छेण अंतरे अस्सायंतं व सिणेहसवस्समुगिरंतो पढमंदसणुन्नामियमत्थयनिवडंतकुसुमनिभेण अगधं व
वियरंतो विमलकरयलंगुलिमुद्दारयणकिरणजालेण दिसासुहपसरिएण मंगलदीवनिवहं व बोहिंतो पयाहिणादाणेण
तिगरणभत्तिपगरिसं व साहेतो भूमितलविलुलंतुत्तमंगं पणमिऊण पमोयभरनिभरगिरं भणिउमाढत्तो, कहं ?—

वच्छ ! तुमं चिय नीसेसपवरलक्खणनिहाणभूओऽसि । सुकयत्थाणं मज्झे तुज्झ परं पढमिया रेहा ॥ १२९ ॥
तिहुयणभुवणस्सुवरिं इक्खागूणं न होइ कह वंसो ? । जत्थ विमला विरायइ विजयपडाइव तुह कित्ती ॥ १३०
तुह भाविरिद्धिमायन्निऊण रंजिजए न कस्स मणं ? । कह वा नो वंदिजइ तुह पयपउमंकिया पुहइ ! ॥ १३१
कीरंतु नाम दुक्करतवोविहाणाइं भव्वलोएणं । जं तेसि फलं तं पुण तुमएच्चिय पावियं सव्वं ॥ १३२ ॥
जओ-सिद्धोऽसि तुमं ताएण भारहे कुंडगामनयरंमि । सिद्धत्थपत्थिवसुओ किर चरिमो एत्थ तित्थयरो १३३
पुणरंवि दसारवग्गे आइमो तं तिविहुनामेण । पोयणपुरंमि नयरे तिखंडभरहस्स सामिति ॥ १३४ ॥

मूयाए नयरीए महाविदेहंमि तहे ये चकवई । बत्तीससहस्रमहानरिंदसंदोहनयचरणो ॥ १३५ ॥
 पारिद्वजं जम्मं च तुज्झ नो पणिवयामि किंपि अहं । जं होहिसि तित्थयरो चरिमो तं तेण बंदांमि ॥ १३६ ॥
 एवं थोऊण वहुं गिराहिं अब्भहियभावगव्भाहिं । जयकुंजरमारूढो विणीयनगरिं गओ भरहो ॥ १३७ ॥
 मिरिईवि इमं सोउं हरिसुग्गयपुलयजालपीणंगो । गरुयकुलजम्मसहजायभूरि गंभीरिमं मोचुं ॥ १३८ ॥
 जिणवयणत्थविभावणसंपन्नविवेयमवि परिचइउं । देहुगयनिरवगह लज्जापसरंषि पडिखलिउं ॥ १३९ ॥
 दुवारवेगपफुरियफारसुम्मायेमेक्कमासज्ज । दप्पुब्भडमफोडिय तिवइं मल्लो व रंगंमि ॥ १४० ॥

पचासन्नमहासुणिसमक्खमह लोयमज्झयारंमि । आणंदसंदिरच्छो फुडक्खरं भणिउमादत्तो ॥ १४१ ॥ चउहिं कलावयं ।

जइ पढम वासुदेवो महाविदेहंमि चक्कवट्ठीवि । चरमो तित्थयरोऽविहु अहं भविस्सामि भरहंमि ॥ १४२ ॥

ता तिहुयणेऽवि नूणं अण्णो नो पुण्णवं ममाहिंतो ! कस्सऽण्णस्स व एरिस फलदायी होज्ज सुकयतरू ॥ १४३ ॥

तथा—अज्जो तित्थयराणं पढमो जणंगो य चक्किवंसस्स । अहयं च दसाराणं अहो कुलं उत्तिमं मज्झ ॥ १४४ ॥

एवं नियकुलचंगिमउक्कित्तणंपचएण संजणियं । नीयागोयं कम्मं मिरिइपरिद्यायेण दढं ॥ १४५ ॥

भयवं च जयपियामहो विहरिज्ज तेसु तेसु गामागरपुरमंडबदोणमुहपमुहेसु ठाणेसु किंचूणं पुब्वसयसहस्सं

केवलंपरियागं पाउणित्तो आउयकम्मस्स सावसेसयं नाऊण अट्ठावयपव्वयमारूढो, तओ महामासवहुलतेरसीए अभि-

ईनक्खत्तमुवागए चंदे पुव्वण्हसमयंमि सुसमदूसमाए एग्गूननउइपक्खेसु सेसेसु कयचउइसमतवोकम्मो दसहिं सुणि-
सहस्सेहिं सद्धिं परिचत्तचउव्विहारो कयपाओवगमणो पज्जंकासणसंठिओ वेयणिथाउयनामगोयकम्मणं अंतं
करित्ता सिवमयलमणुत्तरं पत्तोत्ति ।

अह वत्तीसंपि सुरिंदा दुस्सहदुक्खविहुरेण भरहनरिंदेण समेया बाहण्णव्वाहाउल्लोयणजुयला पणमिऊण भग-
वंतं नंदणवणाओ सरसगोसीसकसणागरुपमुहसोक्खकट्ठाइं आणावित्ति ।

तओ—पुब्बेण जिणस्स कए वट्ठायारं चियं रयावित्ति । दक्खिणदिसाए तंसं इक्ख्वागुहुलुब्भवनिमित्तं ॥ १४६ ॥

अवरेण उ चउरंसं वित्थरवंतं विसिद्धकट्ठेहिं । अवसेसाण मुणीणं सरीरसक्कारकज्जेणं ॥ १४७ ॥

ताहे खीरोदय(जल)ण्हवणमुइसुरहिचंदणविलित्तं । आरोवेत्ति सरीरं चियाए सक्का जिणिंदस्स ॥ १४८ ॥

भवणवइपमुहदेवा ण्हवियविलित्ताइं सेससाहूणं । आरोवेत्ति दुहत्ता देहाइं नियनियचियासु ॥ १४९ ॥

तत्तो अग्गिक्कुमारा जहक्कमं तासु सक्कवयेणं । वयणेहिं निराणंदा मुयंति जालाउलं जलणं ॥ १५० ॥

एवं सरीरसक्कारमायेणं सुरेसरा काउं । नियनियठाणेसु गया विच्छायमुहा विगयसोहा ॥ १५१ ॥

भरहनरिंदो पुण महासोगाभिभूओ सगिहमागओ, तत्थ य दढवज्जपडणाइरित्तसोगसंभारज्जज्जियसरीरो मन्हु-
पूरियगलसरणी संकंदणपोक्कमुक्कारा(वा)णुसारोयणारावविहियसोगपमोक्खो अट्ठावयसेलसिहरंमि सव्वरणमयं महंतं

श्रुमं रयावेइ, बाडुबलिपमुहाण य नवणउईए भाउगाणं अण्णाणि नवनउइ श्रूभाणि निवत्तावेइ, तहा भगवओ नि-
 व्वाणलाभप्पएसे तिगाउयउस्सेहं जोयणायामं सिंहनिसा(सेज्जा)इयं सव्वरयणविणिम्मियनियवणणप्पमाणोववेय-
 चउवीसजिणपडिमाहिट्टियं सुविभत्तसालिभंजियाभिरामतोरणावद्धबंधुरामिलाणवंदणमालं दुवारदेसोभयपासपइट्टिय-
 लद्धुंडरीयपिहाणपुण्णकणयकलसं सरसपंचप्पयारपुण्णफंजोवयारकलियं कालागुरुकुंदुरुक्ककप्पूरपमुहवत्थुसिद्धयधूमं-
 धयारियदिसाहोयं अणेगतियसंगणाजणुत्तालकरतालपुरस्सरदिज्जमाणारासयं भत्तिभरनिब्भरगायंतकिंनरनियरं दूरदेसा
 गयविज्जाहरचारणमुणिजणविचित्तथुइयोत्तखवहुंतहलबोलं पइट्टियलोहमयजंतदुवारपालं जिणभवनं कारावेइ ।
 जं च--संसारोयहिनिवंडतत्तसंताणजाणवत्तं व । रेहइ पवणुदुयधवलधयवडाडोवरमणिज्जं ॥ १५२ ॥

इक्खागुल्लुब्भवभूवकित्तिक्कडं व संठियं पयडं । सोहइ महीएँ केलाससेलसमसीसियाएव्व ॥ १५३ ॥
 पवणपणोछिरजलहरपडलाउलसिहरपरिसराभोगं । परिभमिरभमरनियरं विरायए कुमुयमउलं व ॥ १५४ ॥
 मन्ने पवणपणोछिरएयमहद्धयपलोयेणेण जणे । पव्वयसिरनिवडिरगयणसरियकित्तीकुडं जाया ॥ १५५ ॥
 भरहनरिंदनिवेसियजिणमंदिरदंसणाणुसारेणं । सेसजणोऽवि पयट्ठो जिणविंबाईण कारवणे ॥ १५६ ॥

श्रुतं च एयं, जेण—

एयं खु दुग्गइदुवार(पिहाण)फलिहोवमं जिणा विंति । नीसेससत्तसंताणताणदाणेक्कहेउं च ॥ १५७ ॥

एकौ(त्तो)च्चिय तंक्कालियमुणिगणहरकेवलीहिं न निसिद्धं । चेइहराभावे जं तित्थुच्छेओ भवे पच्छां ॥ १५८ ॥
तथा—जिणंसंतविंवदंसणविन्नायजहतथवत्थुपरमत्यो । पडिवज्जइ जइ किरियं कोई संसारभयभीओ ॥ १५९ ॥
मुणिणोऽवि वंदणत्थं इओ तंओ इति नियविहारेणं । तेऽवि य करेति सद्धम्मदेसणं समयनीईए ॥ १६० ॥
पडिवुज्झंति य भव्या गिणहंति जिणिंदधम्ममकलंकं । एवं च तित्थबुद्धी होइ कया सव्वकालंपि ॥ १६१ ॥
किं बहुणा?—जिणभवणाइनिवेशणसमुवज्जियणुणपगरिसवसेणं । सग्गापवग्गलच्छी निवसइ भव्याण करकमले १६२
इयं सो भरहनरिंदो निवेशिज्जणं जिणिंदवरभवणं । उवमुंजइ नियज्जं विसयसमिद्धं वडुं कालं ॥ १६३ ॥
अह अन्नया पविट्ठो आयंसघरंमि विमलफलिहमए । नियरूवपेच्छणकए सव्वालंकारियसरीरो ॥ १६४ ॥
विचिहपयारं पेच्छंतयस्स अह अंगुलीयगं गलियं । करकिसलयाउ ताहे वीभच्छा अंगुली जाया ॥ १६५ ॥
ववगयसोहं तं पासिज्जण सव्वंगसंगि याभरणं । मुक्कं साहावियरूवदंसणत्थं महीवइणा ॥ १६६ ॥
अत्थमियसयलतारं व नहयलं लुणियसस्समिव छेत्तं । ववगयकमलं व सरं तरं व संछिन्नसाहगं ॥ १६७ ॥
दट्ठुं च कट्ठघडियं व निष्पहं विगयरूवलायन्नं । चम्मावणद्धनिविडिट्ठिपंजरगारमह देहं ॥ १६८ ॥
तो चित्तिउं पवत्तो सुनिउणबुद्धीए जायसंवेगो । वेरग्गावडियंमई सरीरासारयं भरहो ॥ १६९ ॥
एवंविहनिंदियदेहकारणा कह मए महापावं । कयमच्चंतरउइं अहो विमूढेण चिरकालं ? ॥ १७० ॥

कहं वा विसयामिसमोहिण जिननाहदेसिओ धम्मो । निप्पुणणएण न मए सिवफलओ सम्ममायरिओ ॥ १७१ ॥
किं चिंतामणिमह कप्पतरुवरं कामधेणुमह यावि । कोऽवि सयन्नो कहमवि लङ्घूण परम्मुहो होज्जा ॥ १७२ ॥
ते बाहुबलिपमोक्खा धण्णा मह भाउणो महाभागा । जेहिं असारसरीरेण साहिओ सुंदरो मोक्खो ॥ १७३ ॥
एमाइसुहज्जवसाणजलण(जाले)जलाविउं झत्ति । निहड्ढो तणरासिच्च मोहपसरो भरहवइणा ॥ १७४ ॥

उप्पाडियं च केवलनाणं निप्पच्चवायसुहहेउं । देविसमप्पियालिं गो गेहाओ निगओ ताहे ॥ १७५ ॥
दसहि सहस्सेहिं नरेसराण तक्कालगहियदिकखाणं । परियरिओ भयवं भरहकेवली विहरिओ वसुहं ॥ १७६ ॥

अह पुव्वसयसहस्सं केवलपज्जायपालणं काउं । एक्कसमयेण निव्वाणमुवगओ भरहसुणिवसहो ॥ १७७ ॥
इओ य सो मिरिई परिव्वायगो सामिंमि निव्वाणमुवगएऽवि साहूहिं समं गामागरनगराइसु अप्पडिवद्धो

विहरइ, अपुव्वठाणेसु य धम्मदेसणं कुणइ, जो य कोवि पडिबुज्जइ पव्वज्जागहणं च समीहेइ तं साहूणं समप्पेइत्ति ।
एवं च तस्स विहरमाणस्स अन्नया कयाइ सरीरेलणया महती पाउब्भूया, तवसेण य सो न तरइ अप्पणो निमित्तम-
सणपाणंपि आहरिउं, न खमइ सरीरेचेडुं पि अणुट्ठिउं, न पंहवइ वइमेत्तमवि भासिउंति, ते य सगासंठिया पेच्छंति
सांहुणो तं तहट्ठियं तहावि असंजउत्ति कलिज्जण न पुच्छंति सरीरवत्तं, न समप्पेति भत्तपाणं, न दंसेति वेज्जस्स, न
उवयरंति ओसहाणं, किं बहुणा ?, न संकहंपि करंति तस्स, मिरिईवि जातसंकिलेसो चित्तेइ-अहो निहया

अहो निरपणं चित्ता अहो सकज्जपसाहणपरायणा अहो लोचववहारपरम्मुहा अहो नियउदरभरणरसिया इमे सा-
हुणो जं उवयारिणं चिरपरिचियं पि एगगुलदिक्खियं पि पासपरिवत्तिणं पि समाणधम्मपडिबद्धं पि अणवरयगुणग-
हणपरायणं पि ममं सिणिद्धचक्खुक्खेवमेत्तेण वि णाणुगिण्हंति, अहवा न सम्ममणुचिंतियमेयं मए, जओ एए
महाणुभावा सरीरस्स वि पडियारमकुणंता कंहं मम अस्संजयस्स उवयारे वद्धंतु?, केवलं जइ अहं पि इमाओ रोग-
महणवाओ पारं पावेमि ता निच्छियं पव्वज्जागहणुज्जुयं कमवि सयमेव पद्वावयाभि, न एगागीहिं तीरिज्जंति
सोढुमावयाओ, अह कंहं पि भवियव्वयाए वसेण खओवसमओ वेयणीयस्सं चिरकालभवियव्वत्तणओ पारिवज्ज-
पासंडवंसस्स तहाविहोसहसामग्गीउवहारओ ववगयरोगो सो समत्थसरीरो संपन्नो, विहरिओ य अण्णत्थ ।

अण्णया य धम्मदेसणं कुणमाणस्स तस्स कविलो नाम रायपुत्तो सगासमल्लीणो, तेणावि पंचमहन्वयरक्ख-
णपद्दाणो पसमाइगुणाहिट्ठिओ पंचिंदियनिगहविसुद्धो निस्सेयसफलदायी परूविओ से सुस्समणधम्मो, कविलेण
य वुत्तं-भयवं ! अण्णहा तुम्हे वज्झनेवत्थमुव्वहह, इमं च अण्णहा पण्णवेह, किमेत्थ तत्तं?, मिरिइणा भणियं-
भद ! एसो सुसाहुधम्मो तुह निवेइओ, इमं पुण जहुत्तसाहुधम्मासमत्थयाए पवलपावकम्मयाए दुग्गइगमणसी-
ल्याए य सबुद्धिसिप्पपरिकप्पियं कुलिंगं मए अब्भुवगयं, तात ! एयं पारगच्छियं, अओ पडिवज्जमु निस्सं-

१-यद्यपि चतुर्णां घातिनामेव क्षयोपशमस्तथापि अत्र प्रागुदितस्य वेदनीयस्य क्षयः नवस्य चोदयनिरोध इति क्षयोपशमता ज्ञेया, न तु मिश्रीभावताऽत्र ।

सयं समणधम्मं, कविलेण वुत्तं-भयवं ! तुम्ह संतिए एत्थ तहावि अत्थि किंपि णिज्जराठाणं नवा ?, मिरिइणा भणियं-भइ ! समणधम्मे ताव अत्थि, इहावि मणागंति, एवं च तेण अजहट्टियवत्थुदेसणओ निविट्ठो सागरोव-मकोडाकोडिमेत्तो संसारोत्ति । नणु किं एत्तियमेत्तविचरीयकहणेऽवि एवं संभवइ ?, किमिह चोज्जं ?, जेण-

विचरीयजिणागमपयमेत्त(स्स)परुवणेऽवि मिच्छत्तं । अप्पत्थभोयेणेण व दुहजणं रोगमज्झिणइ ॥ १७८ ॥
एत्तोच्चिय मूळुत्तरगुणगणविरहेऽवि लिंगधारीवि । सुवइ सन्वज्जुमयं जहट्टियं पन्नवेमाणो ॥ १७९ ॥
किं एत्तोऽवि हु ए(पा)वं जं सरणगए णु भवभएण जणे । उम्मग्गदेसणातिक्खल्लगगघाएण विहवइ ॥ १८० ॥
गरुयंपि कयं पावं न तहा जीवस्स दुक्खमावहइ । जह जिणवरयणपसूयसमयविचरीयपरिकहणं ॥ १८१ ॥
अलं वित्थरेण । पत्थुयं भणइ-

सो कविलो सन्निवायाभिभूओ इव परमोसहं महागहपरिगहिओ इव तहाविहं मंतकिरियं पुव्ववुग्गाहिओ इव सम्मपरिकहणं महापवलमिच्छत्तणओ न पडिवण्णो मणागंपि समणधम्मं, तओ मिरिइणा चित्तियं-न ताव परिगिणहइ एस जइधम्मं, ममावि छत्तगाइपरियरुवहणे गामंतरगमणे सरीरेलण्णे अच्चंतिगपओयणे एगेण सहाइणा कज्जमत्थि, तम्हा पद्दावेमि एयंति चिंतिऊण कविलो गाहिओ नियदिकलं, सिक्खविओ किंपि वज्झं कट्ठाणुट्ठाणं, एवं च सो नियंसियकासायवत्थजुयलो पाणिपरिग्गहियत्तिदंडो पवित्तिगापमुहोवगरणपरियरिओ

गामाणुगामं पियरं व देवयं व सामिर्यं व परमावगारिणं व रयणनिहाणदेसगं व जीवियदायारं व भिरिइं पज्जुवांसंतो परिभमइत्ति, एवं च काले वोळंतंमि भिरिइं चउरासीइं पुव्वसयसहस्साइं सवाउयं पालइत्ता अणालो-
इयपडिक्कंतंनियदुचरिओ कालं काऊण वंमलोए कप्पे दससागरोवमाऊ देवो जाओत्ति ।

सोऽवि कंविलो अपढियसत्थं परमतथो वज्झोवगरणधरणमेत्तरसिगो जहादिट्ठकडाणुट्ठाणपत्तपरमकट्ठो एगागी परियडइ । सुणिविलक्खणागारदंसणेण पुव्वकमेण समल्लियइ य से समीवे धम्मसवणत्थं बहू जणो, सोऽवि अ-
वियक्खणत्तणओ समणसत्थेसु तहाविहधम्मदेसणमवियाणमाणो 'युक्तायुक्तपरिज्ञानशून्यचित्तस्य देहिनः । अलब्ध-
मध्यताहेतुमौनं सर्वार्थसाधनम् ॥ १ ॥' इति परिचिंततो गाढपरिगृहियमोणव्वओ दिणगमणियं करेइ । अन्नया
य आसुरिरायपुत्तंपसुहं सिस्सगणं पच्चाविकुण जथादिट्ठं वज्झाणुट्ठाणं दंसिऊण य चिरकालं कयवालतवो मरिऊण
वंमलोए कप्पे देवो उववज्जइ । तहिं च—

अंसुयं अदिट्ठपुव्वं सुरलब्धिं पेच्छिऊण तारिच्छं । अणुर्चित्तिउं पयत्तो अइविम्हियमाणसो कविलो ॥ १८२ ॥
किं मन्ने होज्ज मए दारुणरूवं तवं समायरिउं (अं) ? । किं मयलंछणसच्छहमणुचरियमणुत्तमं सीलं ? ॥ १८३ ॥
किं वां दुक्करतवनियमनिरयचित्तेसु साहुपत्तेसु । होज्ज निहितं वित्तं नियमुयजुयलज्जियं पुब्बिं ? ॥ १८४ ॥
किं वा स्राहसमवलंविऊण खित्तं हेवेज्ज नियदेहं । पज्जलियतिव्वजालासहस्सजडिलंमि जलणंमि ॥ १८५ ॥

एमाइविविहसंसयसंकिचिचो खणं विगमिऊणं । सम्मं वियाणणह्वां ओहिण्णाणं पउजेइ ॥ १८६ ॥
 पारिवज्जपवन्नं अह देहं नियइ तं विगयजीयं । तेऽवि ससिस्से गंथत्थत्ताहिरे सुद्धबुद्धीए ॥ १८७ ॥
 ताहे नियदंसणपक्खवायओ चत्तेदेवकायव्वो । ओयरिओ आयासे सिस्साणं तत्थ(त्त)कहणह्वा ॥ १८८ ॥
 वरपंचवणमंडलमज्झगओऽदिससमाणरूवो य । आसुरिपमुहे सिस्से भासइ संबोहिऊणवं ॥ १८९ ॥
 अवत्ताओ वत्तं पभवइ इच्चाइ तत्तसंदोहं । तो सट्ठितंतगंथं तं सोच्चा आसुरी कुणइ ॥ १९० ॥
 अब्बोच्छिंती य तओ जाया सीसप्पसीसव्वगस्स । एवं सति वित्थरियं सव्वत्थ तिदंडिपासंडं ॥ १९१ ॥
 कंविलोऽवि हरिसियमणो ठाणाओ तओ गओ सुरावासं । तत्थ य अणणसरिसे पंचविहे भुंजाए भोए ॥ १९२ ॥
 अह सो मिरिई आउयखयंमि चइऊण बंभलोगाओ । दूरदिसागयेनगमपणियाउलविवणिमगंगंमि ॥ १९३ ॥
 परिसरेदेसट्ठियसाहुवगगपारद्धधम्मकम्मंमि । नीसेसगामतिलए कोह्वागे संनिवेसंमि ॥ १९४ ॥ जुम्मं ॥
 छक्कम्मनिरयचिचो वेयत्थवियारकुसलबुद्धी य । जाओ जयपयडजसो नामेणं कोसिओ विप्पो ॥ १९५ ॥
 सो विसयपसत्तमणो दविणज्जणक्यविचित्तवावरो । पाणवहपमुहगुरुपावठाणनिरवेक्खचिचो य ॥ १९६ ॥
 मिच्छत्तनिहयबुद्धी-तिदंडिदिक्खं विसेविउं अंते । असीई उ पुव्वलक्खे सव्वाउं पालिऊण मओ ॥ १९७ ॥

अह सकयकम्मजणिए सुरतिरियामोक्खविहिठाणंमि । उववज्जिऊण बहुसो पसुव विवसो दुहाभिहओ १९८
 भमिऊण चिरं कालं भवंमि थूणायसंनिवेसंमि । माहणिमाहणपुत्तो जाओ सो पुत्समित्तोत्ति ॥ १९९ ॥ जुम्मं ।
 तत्थवि चिरकालं निवसिंऊण निविन्नकामभोगो सो । परिवायगदिक्खं पडिवज्जेउण धम्मबुद्धीए ॥ २०० ॥
 काऊण तवं विविहं पालिय नियसमयसिद्धधम्मविहिं । सव्वाउयं च धरिउं वावत्तरिपुव्वलक्खाइं ॥ २०१ ॥
 मरिऊण पुत्समित्तो तत्तो सोहम्मदेवलोणंमि । दिव्वाभरणविभूसियदेहो देवो समुप्पन्नो ॥ २०२ ॥
 कालकमेण तत्तो चइऊणं चेइयंमि य निवेसे । अग्गिज्जोओनामा(स)बंभणो(अह)समुप्पन्नो ॥ २०३ ॥

सो य चउसहिं पुव्वलक्खाइं परिपालिऊण आउयं गहिऊण परिवायगदिक्खं मरिऊण ईसाण देवलोणे
 मज्झिमाऊ तियसो होऊण चिरं कालं भोगे भुंजिऊण आउक्खए जुओ संतो मंदिराभिहाणसंनिवेसे सोमिलस्स
 बंभणस्स सिवभदाए भारियाए पुत्तत्तेण उववन्नोत्ति, कयं च से अग्गिभूइत्ति नामं, सो य पत्तो तारुन्नं, अन्नया
 य तत्थ संनिवेसे परिब्भममाणो समागओ सूरसेणो णाम परिव्वायगो, सो कुसलो सट्ठितंतसिद्धंते वियक्खणो धम्मकहाव-
 क्खणो छेओ परचित्तपरिणणो, तं चागयं सोऊण समागओ बहुजणो, आरद्धो य तेण नियदरिसणतत्तपरूवणापवंचो,
 आणंदियहियओ गओ य सट्ठाणं जणो, जाया पसिद्धी, वीयदिवसे अग्गिभूइं अण्णो य लोओ आगओ तस्स सयासं,
 कया उचियपडिवत्ती, उवविट्ठो संनिहियपदेसे, कहिओ य तेण महया पगारेण नियदरिसणाभिप्पाओ, हरिसिया

सवे, एतथंतरे एगेण मणुसेण पुच्छिओ सो परिच्चायगो, जहा भयवं ! मयलंछणे इव जणनयणाणंदे मुत्ताकलावेव सह-
रिसहरीणच्छिसिहिण(हण्डि)संवासोचिए नंदणवणे इव विविहविलासजोगे जलहिंमि व लावणणपुण्णे रसायलेव भुंय-
गसंगसमुचिए भगवम्महसोहग्गे किमेरिसंमि तारुण्णे अणुडियं तुमए पव्वजागहणंति ? , न खलु सुणालंतंतुरज्जू परि-
खमइ मत्तसिंधुरखंधं धणपरिखेवं न यावि सहइ सहयारमंजरी जरढढेकपरिक्खेव चरणभारं न य पभवइ धाराकराल-
करवालसिद्धेहलीलं कमलदलं, न सव्वहा तुह एरिसी सरीरसिरी काउमरिहइ निट्ठुरजणजोगं तवचरणंति, केवलं
होयवमेत्थ पणइणीविरहेण वा धणभंगेण वा सयणविप्पियंदंसेणेण वा अण्णेण वा केणइ कारणेणं, बाढं कोऊहलं
मे, साहेह सव्वहा जइ न दूरमकहणिज्जंति । परिन्वायगेण भणियं—भइ ! तुम्हारिसाणवि किं किंमि अकहणि-
ज्जमत्थि ? , सुणसु जइ अत्थि कोऊहलं, अहं किर पुवं कोसंबीए नयरीए असंखदविणभायणं अणेगणं दीणाण
दुत्थियाण विदेसियाण भयंताण य सत्ताणं ताणदाणपरायणो आसि, अणया य रयणीए मे पसुत्तस्स सहसा
समुच्छलिओ तुसुलो रवो, तओ संभंतोऽहं समुट्ठिओ सयणीआओ जाव पेच्छामि आइद्धियनिसियखग्गे दढावव-
द्धपरियरे चावचक्कुंतपमुहाउहहत्ये हण हणत्ति भणंते धरणिथलगयंमि सयं निहित्तमिव अत्थसंचयं गिण्हमाणे
तहट्ठियाउ चेव तुरंगमंदुराओ अप्पायत्ताओ करमाणे संसुहट्ठियं परियणं विविहप्पयारेहिं विद्वेमाणे कंसं दोसं
घरवक्खरं च अवहरेमाणे जमसुहडे इव कलिकालमित्ते इव पावपियामहे इव भीसणे निक्खिे भिल्लपुरिसे, ते य

ददूण मरणभयविहारेण सिग्धं अवक्कमिज्जण मए वाहरिया आरक्खिया, तं यं जावं मत्ता इव मुच्छिया इव गयेचे-
यणा इव बहु बोछावियावि हुंकारमेत्तमवि न दित्तिं ताव नायं मए नूणमेए ओसोवणिमंतेण वा ओसहपओगेण
वा एएहिं चोरेहिं निहयेचेयणा कया भविस्संति, कहमणहा एवं निहा विहवेजा?, होउ वा ताव सजीवियं
रक्खाभित्तिपरिभाविज्जण सणियं सणियं निछुक्को एगत्थ वणगहणे, भिछावि भवणसिलायंभाइयं मोत्तूणं सेसं
चराडमेत्तं पि गहाय गया, कमेण पहाया रयणी, उट्ठिओ जणो, जाया पुरे वत्ता, आगओ लोओ अहं च, अवलोइयं
गेहं जाव, तत्थ एगदिणभोयणमेत्तं पि नेत्थि, खीणविभवत्तणओ कलंतराइपउत्तं पि दविणजायं न पावेमि, जओ
नेत्थि कोऽवि निव्वाहो तओ चित्तियं मए—

नीसेसजणपहाणत्तणेण ठाऊण एत्थ नयरंमि । संपइ कप्पडिओ इव कह निवसंतो न लज्जामि ? ॥ २०४ ॥
दीणाण दुत्थियाण यं दाउं भोयणविहिं कुणंतस्स । इण्हि तु निओदरभरणमेत्तनिरयस्स का सोहा ? ॥ २०५ ॥
कह वा तुरगारूढो पुब्बं भमिज्जणं पुरिसपरियरिओ । वच्चिस्सं एगागी इण्हि तु पयप्पयारेण ? ॥ २०६ ॥
कह वा सहंपंसुकीलियवंधवलोयस्स वंछियत्थस्स । अविपूरितो जीयं निरत्थयं उव्वहिस्सामि ? ॥ २०७ ॥
दुव्वहंगवन्दुइरिविसरदुव्विसहदुव्वयणजायं । पब्भट्ठलट्ठविभवो पच्चक्खं कह सुणिस्सामि ? ॥ २०८ ॥
ता मोत्तूण इमं ठाणं देसंतरं वच्चाभित्ति चित्तिज्जण चलिओऽहमुत्तरावहाभिमुहं, कालंतरेण पत्तो एगंमि सन्नि-

वेसे, भिक्खापरिभ्रमणेण कथा पाणवित्ती, बुत्थो तत्थेव किंचिकालं, अण्णदिवसे य दिट्ठो मए एगो तिदंडी,
 वंदिरुण सदायेरेण उवविट्ठो से समीवे, पुच्छिअोऽहं जहा मए तहा तेणवि नियवइयरं, निवेइओ य मए संखेवेण,
 तिदंडिणा भणियं—पुत्त ! परिचयसु सोयसंतावं, अणुसरसु धीरत्तणं, सवसाहारणो हि एस वइयो, किं च—
 किं वयणिज्जं जं निंदिए जणे नो धिरत्तणं कुणइ ? । पुरिसुत्तमं पि लच्छी छड्डइ महिलव दुव्वीला ॥ २०९ ॥
 नो सुइकुलं न रुयं नो विण्णणं न विक्रमं न वलं । बालव गयविवेया अवेक्खए किंपि सुयमाणा ॥ २१० ॥
 अहवा जलनिहिकल्लोलसंगसंगलगचंचलत्ताए । कोत्थुहमणिसहजम्मणवड्हियदढनिट्ठुरत्ताए ॥ २११ ॥
 मयलंछणसमसी(सा)सियमइलाणुस्सरणवद्धसीलाए । सुरगइतुरंगसंगइदूरुज्झियवरविवेयाए ॥ २१२ ॥
 दुस्सहविसमेत्ती(व)सदावियपजंतदुहविवेयाए । कंबुसिणेहसमुच्छूढगाढकुडिलत्तबुद्धीए ॥ २१३ ॥
 तह पारियायपणयपभावजडजायपक्खवायाए । निचं लवणोयहिवासमुक्कमधुरत्तभावाए ॥ २१४ ॥
 एयाए सच्चरियं कंहं हवेज्जा महाणुभावाए ? । न हि विसरिससंसग्गी विसिट्ठुणसाहणं कुणइ ॥ २१५ ॥
 ता चयसु सोगमहुणा पोरुससुबहसु कुणसु करणिज्जं । न हि विण्णायसरूवे गुण्यंति कंहिं पि सण्णुरिसा २१६
 किं भद ! तुमं एगो इमीए सुक्को ? जमेवमइगरुयं । संतावं वहसि न पत्तकालमहुणा समायरसि ॥ २१७ ॥
 भणियं च मए भयवं ! किं पुण एत्तोऽवि पत्तकालं मे ? । तेण कहियं ! महायस ! निच्छअओ सवहा धम्मो ॥ २१८ ॥

एयविउत्ताण जओ विहडंति समुद्धुरावि रिद्धीओ । एएण संपउत्ताण हुंति दूरं पलीणावि ॥ २१९ ॥
 एयं च सए आयन्निऊण संजायभवचिराणेणं । एसा तिदंडिदिक्खा पडिवन्ना दुक्खनिम्महणी ॥ २२० ॥
 ता भद्द ! तए वेरगकारणं जं पुरा अहं पुट्ठो । तं एयं तुह सिट्ठं एत्तोच्चिय कुणसु धम्ममइं ॥ २२१ ॥
 एत्थंतरंमि एयं सोच्चा ओभिन्नवहल्लोमंचो । पुणरुत्तनिवेशियपारिवज्जदिक्खाभिमुहबुद्धी ॥ २२२ ॥
 सो अग्गिभूइनामो मिरिइजीवो तिदंडिणं नमिउं । भालयलनिमियपाणी पयंपिउं एवमाढत्तो ॥ २२३ ॥
 भयवं ! जाए वेरगकारणे तारिसंमि तुम्हेहिं । जं दिक्खापडिवत्ती विहिया तं सम्ममायरियं ॥ २२४ ॥
 एयस्स निसामणओ ममावि घरवासवासणा विगया । छिन्नो मायामोहो विवेयरयणंपि विण्णुरियं ॥ २२५ ॥
 ता नियदिक्खादाणेणऽणुग्गहं कुणसु संपयं मज्झ । इय हुत्ते तेणं सो पवज्जं गाहिओ सहसा ॥ २२६ ॥
 काऊण तवं तो सो धरिउं छप्पणण पुव्वलक्खाइं । सद्वाउयं तदंते सणकुमारे सुरो जाओ ॥ २२७ ॥
 कालक्कमेण चविउं सेयवियाए पुरीए पवराए । बंभणकुले पसूओ भारद्वाओत्ति नामेण ॥ २२८ ॥
 तत्थवि सक्कम्मजणिए सुहदुक्खे भुंजिऊण थेरत्ते । पुव्वक्कमेण पुणरवि पारिवज्जं पवज्जेइ ॥ २२९ ॥
 काऊण य बालतवं कुदेसणापावधूलिपडलेणं । अवगुंजिऊण वाढं रम्मन्ताणं व बहुकालं ॥ २३० ॥
 सद्वाउयमणुपालिय चउयालीसं तु पुव्वलक्खाइं । पंचत्तगओ संतो तियसो होऊण माहिंदे ॥ २३१ ॥

निम्मलमणिरयणमउहजालउज्जोविए विमाणंमि । नियपरियणपरियरिओ कीलइ सच्छंदलीलाए ॥ २३२ ॥
 आउक्खएण तत्तो चविउं सो मणुयतिरियजोणीसु । नरयकुदेवेसुपिय पुणरुत्तं परिभमेऊण ॥ २३३ ॥
 रायग्गिहंमि नयरे दियवरकविलस्स कंतिमइयाए । गिहिणीए गब्भम्मी पुत्तत्तेणं समुप्पन्नो ॥ २३४ ॥
 जाओ समुचिअसमए नामंपि य थावरोत्ति से विहियं । सत्तेण य गत्तेण य कुमारभावं च वोक्कतो ॥ २३५ ॥
 अणवरयमरणजरजम्मवाहिदुहनिवहपीडियं लोयं । दट्ठूण काउकामोवि धम्ममइमोहमूढो सो ॥ २३६ ॥
 नो वचइ दुक्करतवविहाणनिरयाण जिणमुणिंदाणं । पासंमि कयावि हु नेव अन्नतिथियजणस्सावि २३७ जुम्मं ।
 एवं अच्छंतो सो पेच्छइ एगं तिदंढिणं समणं । चिविडियनासावंसं भग्गोट्टुउडं दलियदसणं ॥ २३८ ॥
 कुसुयं व चंदंसणवसेण कमलं व दिणयरुग्गमओ । सालत्तयतरुणचरणताडणाओ असोगुच्च ॥ २३९ ॥
 तं पासिऊण वियसंतनयणनलिणो परं पमोयभरं । अइदुल्लहवल्लहसंगमे व सो पाविओ झत्ति ॥ २४० ॥
 पइजम्मपरिच्चायगदिक्खागहणुभवंतुनेहाओ । तत्तपरिपुच्छणट्ठा तस्स सगासं समल्लीणो ॥ २४१ ॥
 नमिउं चरणे सद्वायेरेण सो पुच्छिओ य धम्मविहिं । जोगोत्ति कलिय तेणवि तिदंढिणा साहिओ तस्स २४२
 अन्नं च इमं सिट्ठं जहाऽहमिह दुक्खिओ ठिओ पुत्तिं । विसयपिवासाणडिओ कुसलेण तहा न ठायवं ॥ २४३ ॥
 अह थावरेण भणियं भयवं ! कह तं ठिओ इह दुहत्तो ? । विसयपिवासानडिओ कहेहि कोऊहलं मज्झ ॥ २४४ ॥

भणियं च तेण भद्ध्य ! सुणसु पुरा विसयसलिलपडिहत्थं । अन्नाणमीणभीमं विसोत्तियालोलकल्लोलं ॥ २४५ ॥
निहल्लिमजलवेलाविलासमवसत्तदुत्तरावत्तं । पावविकप्पणपंकं निस्संखपवंचसंखउलं ॥ २४६ ॥

अभिमाणघोरघोसं पयंडकंदप्पवाडवगिसिंहं । दोसघणपडलकिन्नं तारुणमहन्नवं पत्तो ॥ २४७ ॥ तीहिं विसेसयं ।

तच्चसेण य परिचत्तसगिहसंवासो दूरुज्झियसयणबंधवो परमतावसो इव विसट्टकंदोदुनयणासु पवरपओहरासु
महाभोगसालिणीसु ससुल्लसंतकल्लोलबाहुविलासासु हंसगणुसरियपथकमलासु सालसकुलकलरवासु सरसीव सुंदरासु
विलासिणीसु कयाभिरई समाणो एगया अणंगसेणाभिहाणाए वेसाए समं वुत्थो बडुं कालं, तदणुरागवसेण य
पवरभूसणदाणेण अणवरयमहामोहदोगुल्लसमप्पणेण तंवोलफुल्लविलेवणोवणयणेण य निह्वियं पियाप्रियामहपमुहपुरि-
सज्जियं दविणजायं, जाओऽहं निद्धणचंगो, सुणिओ दाइगाए, तओ निष्पीलियालत्तयं व पयत्तपीयवारुणीचसंगं व
मुत्तावसेस भोयणं व तेहिं तेहिं अवमाणकारणेहिं परिचत्तो म्हि तीए, तयणंतरं निग्गओऽहं वेसाघराओ, गओ
नियगेहे, दिट्ठं च तमणेगच्छिइसयसंकुलं पब्भट्टपुवसोहं मसाणं व भयज्जणगंति, तओ महाविसायाभिभूओ पयट्ठो
देसियालिए, गच्छंतेण य पइदिणं एगत्य सुन्नसन्निवेसे दिट्ठं भूमिनिवडियं रक्खावल्यं, गहिउं मए विहाडियाओ
निविडजउ जडियाओ रक्खागंठिओ, दिट्ठं च एगस्स मज्झनिहिच्चं लिहियपवरक्खरं मुल्लखंडं, वाइयं च कोऊहलेण,
परिभाविओ य तल्लिहियगामनामदिसाभागलंछणसमेओ रयणकोडिप्पमाणनिहाणवइयरो, हरिसियमणेण संगो-

वियं च तं सवपयारेण, पट्टिओ तयणुसारेणं, पत्तो अकालखेवेण मुज्जलिहियंमि गामे, निरुविओ निहाणप्पएसो,
 अवलोइयाइं लिंगाइं, जाव सव्वाणिवि लिहियाणुसारेण मिलंति, तओ मे पाउब्भूओ परमप्पमोओ, पसत्थनिसाए य
 दिसावलिपक्खेवपुरस्सरं खणिउमाट्तो णिहाणपएसं जाव य हत्थप्पमाणमेत्तं तं न खणामि ताव समुट्ठिया उब्भ-
 डफडाडोवभीसणा तडिसिहातरललंतजीहज्जुयला मुहमारुयसंवलयजलणफुल्लिगुगारदारुणा पुच्छच्छटाताडिय-
 धरणिवट्ठा दीवयसीहा फुरंतरत्तदित्तेत्ता महाभुयंगा, तेहि य संदंसेहि व तडतडत्ति तोडियं मह सरीरं, निच्चिट्ठो
 महाविसावेणेण निवडिओऽहं भूमीए, विइक्कता रयणी, ममाणुकंपाएव समुगओ भयवं दिणयरो, अवलोइओऽहं
 गामजणेण, विण्णायविसविगारेण य दयाए पडियारिओ, तहाविहोसहमंतकिरियाए जायं च पणुणं सरीरं, पुट्ठोऽहं
 गामजणेण रयणिवइयरं, कहिओ य मए तस्स जहट्ठियनिहाणवुत्तंतो, तओ तत्थेव वीसमिऊण कइवय वासराइं
 पुणरवि पत्थिओ एगदिसाए, अणया य गच्छंतस्स मिलिओ एगो पुरिसो, समाणसीलयाए य जाया मज्झ तेण
 समं मेत्ती, पत्थावेण य तेण एगंते सब्भावेण निवेइओ मम विवरप्पवेसजविखणीसाहणकप्पो, अब्भत्थिओ य
 सव्वायेरेण जहा-जइ तुमं सहार्इभवसि ता विवरं पविसामो, भोगगाढोलुयाए पडिवण्णमेयं मए, तओ अखं-
 डपयाणएहिं गया वलयासुहं नाम विवरं, विरइया से दुवारपूया, तप्पियाओ जोइणीओ, सुमुहुत्तनक्खत्तंसि गहाय
 वाढं पत्थयणं परिकलियहत्यपईवा पविट्ठां तत्थ, उच्चनीयठाणाणि वोळित्ता सणियं सणियं गया दूरदेसं, दिट्ठा य

झडति एगत्थ विज्जुपुंजभासुरा पवरकणगसिंहासणनिविट्ठा एगा जक्खकन्नगा, अविय—
गंडयललंतुज्जलकुंडलकिरणोलिविच्छुरियवयणा । नाणामणि(मय)भूसणससिरियेहंतदेहलया ॥ २४८ ॥
आमलयथूलमोत्तियनवसरहारावरुद्धथणवट्ठा । पप्फुल्लमणहर(हरा)वम्महततरुणसाहव ॥ २४९ ॥
पायालसिरिव रहव देवरमणिच्च जणियमणमोहा । ललियकरकलियलीलासरोरुहा सुंदरावयवा ॥ २५० ॥
सुवणच्छेरयभूयं रूवं दहुं अदिट्ठपुवं से । मयरद्धपसरविहुरा अम्हे तप्पासमल्लीणा ॥ २५१ ॥

सावि अम्हे आगच्छंते पेच्छिऊण सन्निहियपज्जलंतपयंडजालाकराले झडति कुंडे पविट्ठा, अम्हे पुण महा-
मोगगराहया इव विद्वाणवयणा चित्तिउं पवत्ता—किं पच्छाहुत्तं नियत्तामो उयाहु तत्थेव तदंगसंगसंलग्गलायन्न-
पुन्ने जलणकुंडे पयंगो इव अत्ताणं खिवामो?, केवलं दारुणो दहणो खणद्धेणवि दहइ देहं, संसइओ य तीए सद्धिं
मीलगो, जीवंता पुणोऽवि भदाइ पेच्छिस्सामो, ताव सहसच्चिय एगनिंजुजाओ कुंजरोव गरुयंगमारो अंगमारघरह-
रियधरणिगतलो धरणितलताडणसमुच्छलंतपडिसइयसहस्सबहिरियदिसाभोगो दिसाभोगपसरंतकज्जलगवलगुलि-
यालिवलयकालप्पभाजालो करधरियमहतनरसिरकवालो कालरत्तिजणगो इव दुप्पेच्छो वयणेण व धूमवत्तिं सुय-
माणो फारकुंफारउदकसिणभुयंगवद्धकेसमारो समायओ तं पएसं झडति खेत्तवालो, तओ तेण अचंतरोसारुणच्छेण
पेच्छिऊण भणिया अम्हे—रे रे पुरिसाहमा ! विणट्ठसीलसमायारा कायरडियमेत्तचित्तसियसरीरा किं नियचित्तावडुंभं

न मुणह ? जं एत्थ आगया, ता एण्हमणुभवह दुव्विणयफलंति भणिकुण पवणपणुणछिणपणं व भएण कंप्पमाणा सहसच्चिय चरणे धरिकुण बालच्छगलगव्व अम्हे महया वेगेण उल्लालिया तओ पएसाओ, निवडिया य वलयासुह- विवरदुवारमूले, तओ समागयमहानिद्दवेगा इव गमिकुण जामिणिं समुगयंमि दिणये उम्मीलियनयणकमला परिचिंतिउं पवत्ता—अहो को एसप्पएसो ? केणेहाणीया ? कंहं वा धरणीए पसुत्ता ? कत्थ वा तं विवरं ? कहिं वा सा कणगगा ? ।

सुमिणं माया वेयं विभीसिया व ? मइविब्भमो वावि ? । एवं चिर संसइया होऊणं मुणियपरमत्था ॥ २५२ ॥
 ठाणाउ तओ चलिया पत्ता वेण्णायडंमि नयरंमि । तत्थवि विज्जासिद्धो दिट्ठो सिवसुंदरो नाम ॥ २५३ ॥
 तो बहुविहप्पयारं विणएणाराहियो पयत्तेणं । तुट्ठेण तेण दिण्णे मज्झं कच्चाइणीमंतो ॥ २५४ ॥
 कहिओ य साहणविही तओ मए चंडिगाए गेहंमि । गुरुणा जहोवइट्ठो पारद्धो जाव होमविही ॥ २५५ ॥
 साहसरहियत्तणओ तणग्गकंपेवि भयविसिट्ठस्स । धिट्ठत्तणओचिय मंतसाहणं मम कुणंतस्स ॥ २५६ ॥
 उत्तालुत्तालकरालकालेवेयालंचंडपरियरिओ । एगो महापिसाओ सहसच्चिय उट्ठिओ भीमो ॥ २५७ ॥ जुम्मं ।
 ताहे तारिसविगरालंदसणुप्पणमरणभयविहुरो । विस्सुमरियमंतपओ पहाविओऽहं सगिहडुत्तं ॥ २५८ ॥
 तेणावि धिट्ठुस्सिक्खिओत्ति भणिकुण विगयसंकेण । अइलंचपाणिणा करिसिऊण नीओ सिवाए पुरो ॥ २५९ ॥

ताहे सुष्टीएँ हओ तहा जहा चिविडिया ममं नासा । अन्नेऽवि अगदंता भग्गा निब्भग्गरूवेण ॥ २६० ॥
 ता भो महायस ! तएजं पुटोऽहं सवइयरं पुवं । सो एस जइ न पत्तिजसीह ता पेच्छ मज्झ सुहं ॥ २६१ ॥
 अह थावरेण भणियं भयवं ! पच्चक्खदिस्समाणेऽवि । भोगपिवासादोसे को मइमं नेव पत्तिइ ? ॥ २६२ ॥
 जुत्तं तुम्हेहिं कयं अहंपि काउं इमं समीहामि । ता अणुगिण्हह संपइ पारिवज्जप्पयाणेणं ॥ २६३ ॥
 दिण्णा य तेण दिक्खा जाओ सो धम्मकरणनिरयमणो । दढतवियदुस्सहतवो मिच्छत्तविलुत्तवोहेणं ॥ २६४ ॥
 चोत्तीसपुच्चलक्खे सच्चाउं पालिऊण पज्जंते । मरिऊण वंभलोए उववणो भासुरो तियसो ॥ २६५ ॥
 नियबुद्धिसिप्पिकप्पियतिदंढिसणपरूढनेहेणं । पारिवज्जग्गहणं छब्भवग्गहणाइ संपत्तं ॥ २६६ ॥
 सकुलपसंसावइयरनिवद्धदढनीयगोयकम्मेणं । माहणपसुहे नीए कुलंमि जम्मं च मिरियस्स ॥ २६७ ॥
 दट्ठूण जिणवरागमविवरीयपरूवणं कुलपसंसं । दूरं परिवज्जह भो वियक्खणा ! सच्चकालंपि ॥ २६८ ॥
 इय वद्धमाणचरिए महच्छकळाणवद्धिपरियरिए । मिच्छत्तपंसुमइलियजणमणमलखालणजलंमि ॥ २६९ ॥
 भरहसुयपढमपयडियतिदंढिपासंडसंसणागन्भो । भव्वजणविम्हयकरो सम्मत्तो वीयपत्थावो ॥ २७० ॥

॥ इति गुणचंदसूरिए सिरिमहावीरचरिए वीयपत्थावो सम्मत्तो ॥

(ततीयपत्थावो)

तिहंदिभवसमेया भणिया वत्तवया य मिरिइस्स । एत्तो य जहावित्तं साहिज्जइ विस्सभूइस्स ॥ १ ॥
 इहेव जंबुदीवे दीवे भारहवाससिरसेहरोवमे पइदिणभवंतविविहमहूसवे नीसेसनयरविकखाए रायणिहे नयरे
 पढमो सोंडीरचक्कस्स वल्लहो गुणिवग्गस्स सम्मओ पयइलोयस्स पाणप्पिओ पणइजणस्स भुयदंडलीलारोविथभूमि-
 भारो विमुद्धुद्धिपगरिसवीमंसियधम्मविचारो विस्सनंदी नाम नराहिओ, मयणलेहा नाम से भारिया, विसाहनंदी
 कुमारो, तहा परूढगाढपेम्माणुवंधो सररमेत्तविभिण्णो विसाहभूती जुवराया, तस्स रूवाइगुणरणरोहणधारिणी
 धारिणी नाम देवी । इओ य सो मिरिइजीवो वंभलोगाओ नुओ संतो चउग्गइयं संसारकंतरमणुपरियट्टिऊण अणं-
 तरभवजणियतहाविहकुसलकम्माणुभावेण समुत्पण्णो तीसे गब्भंमि पुत्तत्ताएत्ति, अणया पसूओ विसिंहे वासरे,
 कयं विस्सभूइत्ति से नामं, कमेण परिचत्तवालभावो गाहिओ सो पिउणा कलाकलावकोसुहं, तारुणमणुप्पत्तो परि-
 णाविओ वत्तीसं सुरमणीविब्भमाओ पवररायकुलसमुभववालियाओ, ताहि य समं बहुघयां कीलंतो कालं
 गमेइत्ति । अणया य सयलतइलोयदरिसियविचारो तरुवराणंपि विहियलांवणो सुणीणंपि कयचित्तचमक्कारो स-
 मागओ महुमासो, जत्थ य—

पोढपुरंधिथोरथणमंडलपडिहयगमणवेगओ । पियथमचिरहविहुरतरुणीयदीहरसासतरलियो ॥ २ ॥

चंदणनीवकुमुदकमलाय रकुवलयगंधबंधुरो । दाहिणपवणुदिसिहिं पवित्रंमइ नावइ गंधसिंधुरो ॥ ३ ॥
 अणं च—चंचलचरणचलणपरिवोलिरमंजुलकणयनेउरं । करयलरणझणंतमणिकंकणकलरवपसरमणहरं ॥ ४ ॥
 कणिरनियंवविंवकंचिगुणकिंकिणिघालयलालयं । सहइ वरंगणाण चाउद्दिंसिं चच्चरि चारुगीययं ॥ ५ ॥
 एवंविहं महुसमयं दहुं विस्समूई कुमारो समग्गविभूईए चाडुकरनरमडचेडपरिकिन्नो अंतउतररुणीजणपरिय-
 रिओ गओ पुण्फकरंडयं नाम उज्जाणं, जत्थ तरुवराभोगे गायंतिव अमंदमयरंदविंदुपाणपरवसभमिरभमरगुंजिएहिं
 पणचंतिव खरपवणुवेछिरमहल्लपल्लवभुएहिं हसंतिव डिंडीरपिंडपंडुरपरिण्फुडकेयइदीहरदलेहिं । जम्मि य—

जंबुजंबीरखज्जूरसाहिंजणा, सज्जनालियरिफणिसप्पला अज्जुणा ।

खइरसिरिखंडकण्णूरपूगीतला, पीळुनिंवंबलिबउयवडपिप्पला ॥ ६ ॥

कयलिनोमालियामाहवीसालयासल्लइसगगननीवहिंतालया ।

बउलवंसालिताविच्छयाकच्छिया, सव्वकालंपि रेहंति जलसुत्थिया ॥ ७ ॥

जं च—कहिंचि सहयारतरुमंजरीमंडियं, कहिंचि वेइल्लफुल्लंतगंधद्वयं ।
 कहिंचि कंकेल्लिनवपल्लवालंकिंयं, नाइतरुणीकमालत्तयालंकिंयं ॥ ८ ॥
 कहिंचि नवपाडलापुण्फनियराउलं, कहिंचि विरुंततभमरावलीसंकुलं ।

कर्हिचि वरमालईमउलमालचियं, नाइनियविहवदंसेणेण रोमंचियं ॥ ९ ॥
 अणणं च—कारंडहंसवगचक्कवायभारुडकीरकुरेहिं । जीवंचीवकर्विजलजलवायसखंडरीडेहिं ॥ १० ॥
 हारीयपंचवणयपोरवयपमुहविविहपक्खीहिं । सुसिणिद्धवंधवेहि व सेविज्जइ जं सयाकालं ॥ ११ ॥
 जतथ य वम्महदुस्सहसराभिधाएहिं जज्जरंगीओ । बालमुणालुप्पलसत्थरेसु सिसिरसु रमणीओ ॥ १२ ॥
 विणयंति विरहिणीओ दिणाइं करपिहियसवणजुयलाओ । परहुयतारवारसियसवणमुच्छागमभएणं ॥ १३ ॥ जुम्मं ।
 रेहंति जत्थ चंपयतरुणो नवकुसुमनियरसेहरिया । आरुढमयणुजलणव्व पहियनिवहाण दहणत्थं ॥ १४ ॥
 खरपवणुद्धुयमयरंदपिंजरं पेच्छिऊण रविविंव । मज्झणहेऽवि डु संझं संकंति रहंगमिहुणाइं ॥ १५ ॥
 जत्थऽक्खमयणदमणा तरुणो सुणिणो य सुमणसोवेया । सुहलवलीलालसिया भुयगीओ विलासिणीओ य ॥ १६ ॥

तत्थ एवंविहंमि उज्जाणे सो विस्सभूई कुमारो पवरतरुणीजणसमेओ अणिमिसाए दिट्ठीए पेच्छमाणो वण-
 लंछि कोऊहलाउलियपरियणदेसिज्जमाणमग्गो काणणंतरेसु परिब्भममाणो सायरं पसीयह कुमार ! पेच्छह इओ
 मंजरिज्जइ सहयारावली इओ फुल्लंति मल्लियाओ इओ पल्लविज्जंति बालकंकिल्लिणो इओ कोरइज्जंति कुरुवयनि-
 उरुंवा इओ कुसुमिज्जंति कणियारनियरा इओ मउरिज्जंति पुन्नागाइसाहिणोत्ति, एवं उज्जाणपालेण निंदंसिज्जमाण-
 तरुणो वणकीलाए दिणाइं गमेइत्ति । अंतरा य सुणेइ राइनीईसत्थाइं विमरिसेइ गूढत्थपयाइं अभिणयावेइ वि-

सिद्धकविजणविरइयाइं नाडयाइं भरहविजाविक्खणेहिं हावभावहत्थयाइपत्थावणपडुएहिं नाडइज्जपुरिसेहिं नि-
सामेइ य वेणुवीणाणुगयं गायणजणाओ बहुघोलणप्पयारमणहरं पंचमेगंयं, तथा एगंतदेसद्धिओ निसुणेइ दूईणं
सोवालंभवयणाइं । कहं ?—

तीसे संकेयं संसिऊण पडिजुवइमणुसरतेणं । नाह ! तए जाजीवं दिन्नो लहुयत्तणकलंको ॥ १७ ॥
सुहय ! तुह विरहदुस्सहसिहिपसमत्थं ममाहरंतीए । तीसे सरसीसुं निद्धियाइं नवनलिणिनालाइं ॥ १८ ॥
परिसरसहयारुग्गयनवमंजरिखंडणेण पइदियहं । तीसे ताण निमित्तं घट्ठा मज्झंगुलीण णहा ॥ १९ ॥
पच्चासण्णे कयविचिहकलरवे नीलकंठकलयंठे । परिसंता मज्झ मुया पइक्खणं उडुवंतीए ॥ २० ॥
एइ पिउ एइ एसो सो हवसु तं खणं धीरा । थक्का मेण्हि जीहा पुणरुत्तं वाहरंतीए ॥ २१ ॥
इय एरिसा अवत्था वट्ठइ तुह पणयिणीए दुव्विसहा । जइ जीवंतिं वंछसि कुमार ! ता तं लहुं सरसुं ॥ २२ ॥
तहा कयाइ गोत्तखलियपरिकुवियकामिणीपसायणप्पवणवयणप्पवंचविरयेण कयाइ सुयसारियासंलाववि-
णोएण कयाइ परोप्परसवत्तिकामिणीकयकलहकोलाहलनिसामणेण कयाइ णाणाविहदूरदेसोवणीयापुव्वतरुसंदोह-
दोहलगदाणेण कयाइ समयवणसिंहंडितंडवावलोयेण विविहं कीलइ । अण्णया य कुमारस्स कामिणीहिं समं
दुरोदरेण रमतस्स समागओ मज्झंदिणसमओ ।

तओ अंतेउरसमेओ चलिओ जलकीलानिमित्तं, पत्तो काणणसरसीए, तयणंतरं च-
सरसीतडविडविसरावमुक्कझंपुच्छलंतसलिलभरं । झिल्लइ महल्लकल्लोलपेहणुवेह्लिरो कुमरो ॥ २३ ॥
मड्डाए तरुणीओ रणंतमणिमेहलाकलावाओ । खिप्पंति पराप्परपेहरीउ भयतरलियच्छीओ ॥ २४ ॥
करकलियकणयसिंगयसलिलपहारेहिं पोढरमणीओ । विद्दवइ कुमरो कोवभरियदरपाडलाट्ठीओ ॥ २५ ॥
पियकरफुंसुल्लासिरनियंवतडुदुमेहलगुणाहिं । निवडंतकिंकिणीहिं पलाइयं झत्ति वालाहिं ॥ २६ ॥
घोरघणघ(धा)मसमजलवट्टियपूराए झत्ति सरसीए । कमलाइं वयणलायणनिज्जियाइं व बुडंति ॥ २७ ॥
इय विविहसलिलकीलाहिं कीलिउं जुवइसत्थपरियरिओ । ओयरिओ सरसीओ गओ कुमारो नियावासं ॥ २८ ॥
एत्थंतरे अत्थमिओ गयणचूडामणी दिणनाहो, मडलिया कमलसंडा समं माणिणीमन्नुणा, विप्पउत्ताइं
चक्कायमिहुणाइं सह मिहुणदिणविरहेण, पवट्टियाणंदा इओ तओ परिब्भमिउं पवित्ता कोसिया समं पंसुलिविल-
याहिं, निलीणाइं नियट्ठाणेषु सउणिकुलाइं समं सुणिजणेण, तहा निसायरसेणं व भीसणं पसरियमंधयारं, मयर-
द्धओव विप्फुरिओ सव्वओ पढमपओसपईवनिवहा, एवं पयट्टे संझासमए कुमारो काऊण पओसकिच्चं तेहिं को-
ऊहलनम्मालावंकभणियगीयाइविणोएहिं विगमिऊण खणंतरं यमुत्तो सुहसेज्जाए, कमेण य पभाया रयणी,
समुगओ सहस्संसुमाली, उट्ठिओ कुमारो सयणीयाओ, कयपाभाइयकायव्वो पुव्वविहीए दोंगुंदुगुव्व विलासिणीम-
ज्झगओ विलसइत्ति । एवं च तत्थ सायंदिणमभिरसमाणस्स सरंति वासरा ।

अन्नया य विस्सनंदिणो महारायस्स अग्गमहिसीए दासचेडीओ पुप्फफलहणत्थमागयाओ पुप्फकरंडगुज्जाणं, दिट्ठो ताहिं विस्सभूइकुमारो अंतेउरसमेओ बहुप्पयारं तहा विलसंतो, तं च दडूण समुप्पणगाढामरिसंहिं ईसी-सच्छभिज्जमाणसाहिं सिग्घमेव पडिनियत्तिऊण कहिओ रायग्गमहिसीए कुमारस्स काणणकीलावइयारो, खणं-तरे य दीहं नीससिऊण पुणो भणियं ताहिं—देवि ! किं तुज्झ जीविणं ? किं वा रज्जवित्थरेणं ? किं वा विभवेणं ? जइ तुम्ह पुत्तो विसाहनंदी पुप्फकरंडगुज्जाणे न कीलेज्जा, एवं च आयन्निऊण अवियारमणीयत्तणओ इत्थीसहा-वस्स अदूरदंसित्तणओ मइयसरस्स अभीरुत्तणओ नियकुलकलंछुग्गमस्स पकओ महापरिकोवो देवीए, परिचत्तं भोयणं उज्झिओ सरीरसक्कारो पेसियो नियनियठाणेसु सहीवग्गो, कहवयदासचेडीपरिबुडा य पविट्ठा कोवघरंमि, रयणिसमए य समागयेण विस्सनंदिनरिंदेण देविं अपेच्छमाणेण पुट्ठो कंजुगिप्पमुहो परियणो, कहियं च एगेण-देव ! अमुगंमि गेहे मिलाणवयणकमला केणवि कारणेण देवी गयत्ति, तओ राया तमायन्निऊण ससंभमं तत्थेव गओ, दिट्ठा य कोवेण मिसमिसंती उट्ठसासरोगाउरव दीहं नीससंती देवी, दिन्नासणे आसीणो नराहिवो भणिउमाढत्तो य-देवि ! किमेरिसी अवत्था ? किमत्थ कारणं ?, सोहेसु परमत्थं, न ताव सुमरेमि थोवंपि निय-दुच्चरियं, न यावि ममाणुवित्तिपरायणो परियणोऽवि मणागंमि अवरज्झइ तुज्झ, नेव य विविहरयणाभरणसंभारेहिं खूणमत्थि, ता किं निरत्थओ एस कोवाडंबरोत्ति ?, देवीए भणियं—महाराय ! सचं चिय नत्थि केणावि पगारेण

खूणं, केवलं किमेएण निरत्थएण सयलजणसामणणेण ?, रायणा भणियं—किं पुण अनिरत्थयं सयलजणासामणणं च ?, देवीए भणियं—महाराय ! पुण्फकरंडगुज्जाणे परिभोगो, राइणा जंषियं—किं तेण तुज्झ ?, देवीए बुत्तं-तेण मे पओयणं विसाहनंदिकुमारस्स रमणत्थंति, राइणा भणियं—देवि ! मा कुप्पसु, मुंचसु असदज्झवसायं परिहरसु इत्थीजणसुलभं चावलं समिक्खेसु नियकुलक्कमं, किं तुमए दिट्ठो कोऽवि अम्हाणं कुले सुओ वा एगंमि पुण्फकरंड-गुज्जाणाट्ठिए पुर्विंपि पविसमाणो ?, ता कं पुवपुरिसागयं ववत्थं चूरेमि, सबहा अणं किंपि पत्थेसु, देवीए भ-णियं—महाराय ! गच्छ निययमंदिरं, उज्जाणलाभाभावे केत्तियमेत्ता अण्णपयत्थपत्थणा ? ।

रज्जेणं रट्ठेणं धणेण सयणेण बंधवजणेणं । ससरीरपालणेणवि न कज्जं किंपि मह एत्तो ॥ २९ ॥

जीवंतीविट्ठु नरनाह ! नाहमेयं तुहप्पसाएणं । जइ पुत्तं कीलंतं पेच्छामि तदाऽफलं जीयं ॥ ३० ॥

नरनाह ! तुह समक्खंपि नेस पुज्जइ मणोरहो जइ मे । पच्छा दूरे सेसं भोयणमेत्तेऽवि संदेहो ॥ ३१ ॥

इय सलिलेहि व बहुविहवयणेहिं णरिंदमाणसं तीए । तडमिव महानईए दुहाकयं नेहनिविडंपि ॥ ३२ ॥

रत्ता भणियं सुंदरि ! मा संतप्पसु कोरेसु करणिज्जं । अच्छउ सेसं दूरे जीयंपिह तुज्झ आयत्तं ॥ ३३ ॥

एवं बहु संठविऊण गओ नरिंदो अत्थाणमंडवंमि, आहूया मंतिणो, साहिओ तेसिं रहंमि समग्गो देवीको-

वचइयरो सकुलक्कभवत्था य, मंतीहिं भणियं-देव ! वीसत्था होह, अम्हे गंतूण देविं परूवेमो, अणुन्नाया य राइणा गया देवीए सगासं, भणिया य अणेगप्पगारेहिं, न य कंहपि संबुज्झइ, तओ विलक्खवयणा समागया राइणो सगासे, भणिउं पवत्ता य-देव ! निच्छयं देवी गाढजणियकोवा मरणंपि अब्भुवगमेज्जा, ता सव्वा जहा तथा अणुणयणजोग्गा, रन्ना भणियं—भो किमेवं वाहरह ? किं तुब्भे न जाणह अम्ह कुलक्कमं ?—जमेगंमि रसमाणे उज्जाणे अन्नो न पविसइ, वसंतमासपविट्ठो य मासगसो चिट्ठइत्ति, मंतीहिं भणियं—देव ! जाणेमो, केवलं दुन्नि-ग्गहो इत्थीमहाग्गहो, राइणा सविसायं भणियं—

एग्गतो मज्जाया पल्हत्थिज्जइ कुलक्कमपरूढा ! अन्नत्तो मरइ पिया आवडियं संकडमियाणिं ॥ ३५ ॥

संपज्जइ धुवमेणिंह अपत्तकालेऽविय विहिंवसेणं । दढनेहवंधवंधुरवंधवजणचित्तविच्छेओ ॥ ३६ ॥

महिलायत्तो राया जुत्ताजुत्तं न पेच्छए किंपि । इय अवजसो दिसासुं अखलियपसरो चिरं भमिही ॥ ३७ ॥

ता मंतिणो उवायं तमियाणिं कुणह कंपि परिसुद्धं । जह सा जीवइ देवी सकुलवत्था य निव्वहइ ॥ ३८ ॥

एवमायन्निऊण जं देवो आणवेइत्ति भणिऊण ठिया एगंते मंतिणो, सुनिउणबुद्धीए य सम्मं निच्छिऊण कज्जतत्तं साहियं नरिंदस्स, जहा-देव ! एयं पत्तकालं किल पच्चंतराया देसमुत्तंसखलो विद्देवेइ य, एतदत्थंसंवद्धा लेहारिया कीरंति, ते य तुम्हाण लेहे समप्पेति, तत्थावधारणाणंतरं पयाणयं च दवाविज्जइ, तथा कए खुब्भइ सामं-

तवगो; कुमरोऽवि विन्नायवइयो फुफ्फकरंडगुज्जाणं मोत्तणं एइत्ति, एवं च उभयमवि सुपडिविहिं भवइ, एव-
मायन्निऊण अब्भुवगयं राइणा, उट्टिया मंतिणो, साहियो देवीए एगंतट्टियाए एस वइयो, सहरिसाए कयं तीए
भोयणं, पमुक्को कोवाडवरो, बीयदिवसे य लिहियकवडलेहहत्था उडूलियजंथा गाढपरिस्समकिलंता उवट्टाविया
मंतीहिं अपुव्वपुरिसा, नीथा य रायसमीवे, खित्ता तेहिं लेहा, वाइया सयमेव राइणा, विन्नाओ तदत्थो, कवडको-
वप्फडाडोवपुव्वं च भणिया नियपुरिसा—रेरे पुरिसा! ताडेह सन्नाहभेरिं, नयरूरे पइट्टह गुडरं आयट्टह दिव्वा-
उहाइं सम्पपह जयहत्थि जेण करेमि पत्थाणंति बुत्ते तहत्ति निवत्तियं पुरिसेहिं, इओ य भेरीसहसवणओ संखुद्धं
सामंतमंडलं पगुणीकया मयगलंतगंडत्थला कुंजरघडा, संवूढा सुहडसत्था, चउदिसिंसिपि पयट्टाइं तुरयघट्टाइं, मिलिया
सेणाहिवइणो, किं वहुणा?—हलहलियं सयलं भूमंडलं, ठिओ पत्थाणंमि णरिंदो, एत्थंतरे अविन्नायपरमत्थो पत्था-
णट्टियसुवलब्भ नराहिवं निगओ पुफ्फकरंडगुज्जाणाओ विस्सभूई कुमारो समागओ रायसमीवे निवडिओ चलणेसु
पुट्टो वइयरं, साहिउमारद्धो य नरिंदेण, जहा—वच्छ! अत्थि पंचतसीमालो पुरिससीहो नाम मंडलाहिवो, सो य
पुव्वं पणयभावं आणावत्तित्तणं पडिवज्जिऊण य संपइ दरिसियतिव्वविचारो निहयसीमागामजणो अम्ह मंडलमइक्क-
मइ, ता पुत्त! महंतो एस मे परिभवो। अविद्य—

सपियपियामहपमुहज्जियं महिं पेच्छिऊण हीरांतं। कह सकलंकं जीयं निरत्थयं संपइ वहामो? ॥ ३९ ॥

अजवि केऽवि सपुरिसा पयंडभुयदंडदलियपडिवक्खा । गिणहंति परस्स महिं अम्हे न नियंपि रक्खामो ॥ ४० ॥
भग्गुच्छाहं रिउवगनंदणं सुक्कचित्तवट्ठं । निवडियसहं च सीमंतिणीओ जणयंति किं पुत्तं ? ॥ ४१ ॥
ता पुत्त ! पत्तकालं अवजसंपक्कप्पसमणगजलक्कपं । जरविहुंगरसायणमहुणा सरणं रणे मज्झ ॥ ४२ ॥
एवं च रण्णा सिट्ठे कोवदट्ठोट्ठुडो उट्ठिऊण निवडिओ चरणेषु कुमारो, विन्नविउमाढत्तो य-ताय ! सुंचह
कोवसरंभं, केत्तियमेत्तो सो दुरायारो ? , नहि लीलादलियमत्तमायंगकुंभत्थलो केसरी समोत्थरइ गोमाउयं, निय-
कुलसिलोच्चयसमुच्चसिहरदलणदुल्लियं निवडइ एरंडकंडे सहस्सनयणकुलिसं, नेव य पडिपुण्णमंडलहरिणंकदि-
णयरकवलणलालसो गिलइ तारयजालं गहकछोलो, ता पसीयह विरमह तुम्हे देह ममाएसं अवणेमि तुम्ह
पसाएण तस्स धट्ठसोडीरिमस्स भुयदंडकंडुं, न य अम्हारिसेसु विज्जमाणेसु जुत्तमेयं तायस्स, तुम्ह पयावोच्चिय
साहेइ कज्जाइ । तहाहि—

पुव्वमहासेलुच्छंगसंगिणो उगगमे व सूरस्स । दूरदिसिपसरियंपि डु तिमिरं किरणच्चिय हणंति ॥ ४३ ॥
गंभीरगहिरघोसा विवरंमुहवाहिउगगवइनिवहा । आगयगयाइं रयणायस्स बेलच्चिय करेइ ॥ ४४ ॥
उब्भडंडडुडामरविलसिरवरपत्तकोसगब्भाइं । हिमगिरिणो कमलाइं हणंति पवणुडुयतुसारा ॥ ४५ ॥

इय भणिए गाढोवरोहेण दिण्णो आएसो राइणा कुमारस्स, पणामपुव्वयं पडिच्छिऊण दवावियं तेण पयाणयं,
चलियं चाउरंगं सेन्नं, कंहं चिय ?—

गंडत्थलपगलंतुगदाणधारंधयारियदियंता । चलकन्नतालवाडियमयंगंधाथद्वियदुरेहा ॥ ४६ ॥
अइधोरघोसगलगज्जिविहियखीरोयमहणसंकासा । उज्जलताराभरणा गयणाभोगव भासंता ॥ ४७ ॥
कयलीचणकयसोहा गेरुयरसलित्तवियडकुंभयडा । जंगमया कुलसेलव पत्थिया हत्थिणो सिग्घं ॥ ४८ ॥
चलिया य पवणवेगा खरखुरसिहखणियखोणिणो तुरया । फेणुग्गिरणमिसेणं जसं व कुमरस्स वियरंता ॥ ४९ ॥
करकलियकुंतकोदंडसेल्लमल्लयसुत्तिक्खकरवाला । सन्नद्धवद्धकथया पयंडभुयंदंडवलकलिया ॥ ५० ॥
नियसोडीरिमवसओ रिउसेन्नं जरतणं व विगणिंता । सपट्ठप्पसायपरवसहियया जीएडवि निरेक्खा ॥ ५१ ॥
पइखणविमुक्कहक्कारुक्कारिसुत्तुट्टसन्नाहा । गेहनियत्तियदइया चलिया दप्पुब्भडा सुहडा ॥ ५२ ॥
बहुविहगहरणभरिया रहनिवहा घणघणारवरउहा । सवपेहेसु पयट्ठा पवणुद्धुयधयवडाडोवा ॥ ५३ ॥
इय चातुरंगसेन्नं नरवइवयणेण वड्डियाणंदं । मुणिदाणजायपुन्नं व कुमरपासं समल्लीणं ॥ ५४ ॥
तओ भंजंतो गिरिसिहराववद्धमहल्लमिच्छपल्लीओ निब्भच्छंतो जणवयविद्वगणबद्धलक्खं चरडपक्खं अवलोयंतो

नगनगरगामारामरणीयं महीमंडलं पडिच्छंतो मग्गे सामंतसमण्णियं विविहालंकारक रितुरयंपमुहं पाहुडं पत्तो

विज्झगिरिसमीवं, एगत्थ निवेसिओ खंधावारो, तओ य पहाणवियक्खणपरियणाणुगओ चलिओ कोउहल्लेण विज्झ-
गिरिमवलोइउं । अंतरे य—

उत्तंगमत्तकुंजरकुलाइं पेच्छइ जहिच्छचाराइं । रेवातडरूढमहल्लसल्लइकवलणपराइं ॥ ५५ ॥

निसुणइ पेम्मभरालसजुवईपरिकिन्नकिन्नरावद्धं । करकलियतालकलरवसंचलियं पंचमुग्गारं ॥ ५६ ॥

निज्झरझंकारवायणणघणयोससंकिथमणाणं । तंडवमस्सिक्खियंपंडियाण पेक्खइ सिहंडीणं ॥ ५७ ॥

तयणंतरे च पुरओ पयट्ठो समाणो गायंतं व पवणगुंजियसरेणं हसंतं व विष्फुरियफारफुल्लिगुगारेहिं पणचं-
तं व समीरपसरियमहल्लजालाकलावेहिं विलुलियकेसपासं व गयंगणलंबमाणधूमपडलेण नियइ दारुणं दावानलं,
तं च अइलंधिऊण कमेण पहाणपुरिसं व तुंगायारं सुवंसपडिबद्धं च, नरेसरं व वररयणकोसं जणाणुगयपायच्छायं च,
काऊरिसं व दुट्ठसत्ताहिट्ठियं निट्ठुरसरूवं च, महियाहिययं व दुल्लंधणिज्जं पओहरोवसोहियं च, आरूढो विंझगिरिं ।
तओ चिरं काणणेसु निज्झरेसु विवरेसु दुरारोहसिहरेसु कयलीलीलाहरेसु देवोवभोगुब्भडंगंधेसु सिलावट्टएसु विवि-
हमणोहरप्पएसु विहरिऊण परिस्संतो उवविट्ठो एगंमि माहवीलयाहरे । एत्थंतरे पढियमेगेण चारणेण—

विंझो साराणुगओ निचं चिय नम्मयाए परियरिओ । सारंगजणियसोहो गयकुलकलहो दयावासो ॥ १ ॥
उच्छूढखमाभारो विबुहपिओ मयणसुंदरसरीरो । एवंविहो तुमं पिय कुमार ! किं अब्भहियमेत्थ ? ॥ २ ॥ एयमा-

यन्निज्जण परितुट्ठो कुमारो, भणियं च-अहो साहु सिलेससारं पढियमेएण, ता देह एयस्स दीणारलक्खगं, जं देवो आणवेइत्ति भणिज्जण पडिवन्नं भंडागारिएण, खणंतरेण गओ नियआवासं । कयं पयाणयं, कमेण य पत्तो पच्चंत-देसं, तहिं च पेच्छइ पसुइयपक्कीलियं गोमहिसिपसुकरहरासहपउरं धणधणसमिद्धं सुद्धगामागरनगरं नियजण-जाणवयं, विम्भियजणेण य आहूया विसयमहत्तरा सिट्ठिणो य, तंवोलदाणाइवहुमाणपुरस्सरं पुच्छिया य लोयसु-त्थासुत्थवत्तं, तेहिं भणियं-देव ! तुम्ह भुयंपंजरंतरनिलीणाणं अम्हाणं को सयन्नो मणसावि असुत्थयं काउं समीहेज्जा ? , न हि जीवियसावेक्खो पंचाणणगंगंधकेसरकुरलिं तोडेज्जा भुयगरायफणफलगमणिं वा गिणहेज्जत्ति, केवलं एत्ति-यमेव असुत्थं—

जमेत्थ दावियसुद्धायारोहिं पणतरुणीगणेहिं, नयणचावपसुक्ककडक्खियमग्गणेहिं । दिसिदिसिनिहयपह-णिवि पइदिणु पंथियडुं, हीरइ हियउं हयासहि पहि पेक्खंतियहिं ॥ १ ॥ विसयदोसदुहसंचयकहणपरायणहं, धम्ममग्गु देसंतह पइदिणु सुणिजणहं । भोगुवभोगु जहिच्छइ गिहिं निवसंतएहिं, अम्हेहिं करणु न लब्भहिं भवभयसंकिर्यहिं ॥ २ ॥

इय निसुणिज्जण कुमरेण दरवियसियक्खोलं हसिज्जण सुचिरं पसंसिज्जण य तव्वयणविन्नासं दवावियतंबोला वि-सज्जिया सिट्ठिणो विसयप्पहाणा य, तयणंतरं दूयवयणेण भणाविओ पुरिससिंधो, जहा-कुमारो तुह दंसणुस्सुओ

वद्वद्वत्ति, एयमायन्निऊण य पुरिससिंघनरवइणा कुमारस्स आणयणनिमित्तं पेसियां नियपहाणपुरिसां, तदणुरोहेण समागओ कुमारो, पवेसिओ नगरंमि परमविभूईए पुरिससीहेण, काराविओ भोयणं, समप्पिया करितुरयंसंदणां, उवणीयमणंमि पभूयं दविणजायं, विन्नत्तो य भालतलघडियकरसंपुडेण तेण-कुमार ! गाढमणुग्गहिओम्हि तुमए जं नियचरणकमलेहिं पवित्तीकयं मह भवणं, ता कइवयदिणाइं पडिवालेह एत्थेव, पुणोऽवि दुलहं तुम्हेहिं सह दंसणंति भणिए वुत्तो कुमारेण-भो नरिंद ! अपुवो तुह पेम्मपवंचसारो पियालावो अणणविणयववहारो अच्छेयभूया प-डिवत्ती मणसावि अचिंतणिज्जं सज्जनत्तणं, ता एरिस तुह गुणगणेण गाढमागरिसियं मम खणद्धेणवि चित्तं, जइ पुण कइवय वासराणि तुमए सद्धिं वसामि नूणं न पहू परवसस्स नियचित्तस्स हवामि, सचं च इमं पढिज्जइ-“अत एव हि नेच्छन्ति, साधवः सत्समागमम् । यद्वियोगासिल्लनत्थ, मनसो नास्ति भैषजम् ॥ १ ॥” ताऽणुजाणेसि मं गमणाएत्ति वुत्ते दुस्सहतव्विओगसोगदमियमणोऽसुधरं हयगयरहसमग्गसामगीए अणुगच्छिऊण कुमारं वलिओ पुरिससीहो, कुमारोऽवि अक्खंडपयाणगेहिं चलिओ रायगिहनगराभिमुहं । इओ य विस्सनदिणा नरिंदेण सो नियपुत्तो विसाहनंदी भणिओ—

वच्छ ! जहिच्छं वणलच्छिपेच्छणं कुण मयच्छिमज्झगओ । परिसंकं सक्कस्सवि अवहंतो एत्थ उज्जाणे ॥ १ ॥
एवमायन्निऊण विसाहनंदी कुमारो वड्डियाणंदसंदोहो पमुक्कनीसेसवावारंतरो अंतेउरसमेओ विचित्तकीलाहिं

उज्जाणे संठिओ कीलइत्ति । सो य विस्सभूई अणवरयमागच्छंतो संपत्तो रायगिहे, नियनियठाणे पेसियसामंतसे-
णावइपमुहपरियरो गाढाणुरागेण य चिरदंसणुकांठिओ पुव्वपवाहेण पुप्फकरंडगुज्जाणे पविसिउमाढत्तो, भणिओ य
दुवारदेसट्ठिएण पडिहारेण—कुमार ! न जुत्तं तुम्ह एत्थ पविसिउं, जेण विसाहनंदी अंतैउरसहिओ इह पविट्ठो
कीलइ, विस्सभूईकुमारेण भणियं—भइ ! कइया पविट्ठो ? तेण भणियं—तुम्ह गमणाणंतरमेव, एवमायन्निकुण समु-
प्पन्नतिवकोवभरारुणनयणो णिडालतडघडियमिउडिमासुरियवयणो तक्कालुच्छलियसेयविंदुजलजडिलियसरीरो कु-
मारो एवं चिंतिउमारद्धो—

पच्चंतकुद्धनरवइवइयरवएसओ धुवं पुविं । उज्जाणाओ इमाओ नियबुद्धीए नीणिओ रत्ता ॥ १ ॥

जेण सयं चिय दिट्ठो सो देसो सुत्थगामपुरगोट्ठो । परंचक्कचोरअभिमरभयरहिओ धणकणसमिद्धो ॥ २ ॥

ता नूणं नियपुत्तस्स कीलणंइं इमंमि उज्जाणे । अवजसपरिहरणत्थं कवडमिमं विरइयं सवं ॥ ३ ॥

वाढं अजुत्तमेयं आयरियं निच्छियं नरिंदेण । न हि विस्सासपरवसहिययंमि जणे घडइ माया ॥ ४ ॥

एवं खणं निग्गमिज्ज तेण समुप्पन्नसमहिगकोवाइरेगेण तज्जिया विसाहनंदिपुरिसा—रे रेदुरायारा ! मए अप-
रिचेत्तेऽपि उज्जाणे केण तुम्हे पेसिया ? को वा तुम्ह पुरिसायारो ? कहां वा अविण्णायपरक्कमा एत्थ सच्छंदमभिरमह ?
मए निहयाणं कत्तो वा तुम्ह परित्ताणंति भणिकुण दुव्विसहाभिमाणपरव्वसयाए नियवलंदंसणत्थं पहाओ निट्ठुरसु-

द्विपहारेण फलभरणयसाहो पकिट्टो कचिट्टपाययो, तदभिघाएण य कुलसेलताडियं व थरहरियं मेइणीचिहुं तुट्ट-
निविडबंधणाइं निवडियाइं सयलफलाइं दंसियाणि य विसाहनंदिपुरिसाणं, सगबंधं भणिया य-रे रे पुरिसाहमा !
जह एयाणि पाडियाणि तहा पाडेमि तुम्ह मुंडाणि, अवणेमि दुव्विणयसीलयं, विहाडेमि उज्जाणरमणकोऊहलं,
केवलं लज्जेमि तायस्स वीहेमि नियकुलकलंकस्स विचिकिच्छेमि लोयाववायस्सत्ति भणिऊण उवसंततिव्वकोहावेगो
संवेगमगमुवगओ एवं चिंतिउमाढत्तो-

विसयपरव्वसहिथया हीलं किं किं जणा न पेच्छंति । कथं व न दुक्करंमिवि ववसाए संपयट्टंति ? ॥ १ ॥
को वा न आवयावत्तवट्टिया तिव्वखदुक्खरिंछोली । दंभोलिनिव्विसेसा अत्तक्किया निवडइ सिरंमि ॥ २ ॥
तुच्छोवि विबुहजणनिंदिओऽवि को वा विसुक्कमज्जाओ । न करेज्जा दुव्विणयं विसयपसत्ताण सत्ताणं ॥ ३ ॥
विसयाणं पुण निव्विगघकारणं निच्छयं मयच्छीओ । विहिणा पावेण विणिम्मियाउ नणु केण कज्जेणं ? ॥ ४ ॥
नूनं न दुग्गदुग्गइपडणदुहाइं कथावि सुमिणेऽवि । पेच्छेज्जा मणुयजणो जइ जुवइपरंमुहो होज्जा ॥ ५ ॥
पासव्व करिवराणं हरिणाण व वागुरा विसमबंधो । पंजरमिव विहगाणं पईवकलियव्व सलभाणं ॥ ६ ॥
मीणाणं जालंपिव जणाण सेच्छापयारसुहियाणं । अहह विसमं महंतं महिलाजंतं कयं विहिणा ॥ ७ ॥
अविय-नवमालइपरिमलमंसलोवि नवसुरहिक्कुसुमवरगंधो । किं कुणइ तेसि जेसिं मणंमि नो वसइ हरिणच्छी ॥ ८ ॥

अइरेगुदीवियवम्महोऽवि निम्महियसयलोओऽवि । जुवईविरत्तचित्तं नो चालइ मलयपवणोऽवि ॥ ९ ॥
 सयनिसायरकिरणुज्जलावि नो कोमुई मणांगं पि । दावेज्ज विथारं पंचवाणबलदलणधीराणं ॥ १० ॥
 जोव्वणतिमिरच्छाइयविवेयनयणो पुरा गिहे वसिओ । अहह कंहं दुट्ठमई निरत्थयं एत्तिथं कालं ? ॥ ११ ॥
 अहवा किमइकंतत्तसोयेणं निरत्थएणं मे । अज्जवि किंपि न नट्ठं करेमि सद्धम्मकम्ममहं ॥ १२ ॥
 एवं च गरुसंवेगावन्नमाणसो सब्बहा पवट्ठमाणविसयविरागो निच्छियसंसारसारत्तो गओ संभूइस्सरिस्स पासे, जो
 य केरिसो ?—

अइपसत्थगुणरणसाथरो, तेयरासिना वइ दिवायरो । सोमयाए संपुन्नचंदओ, जो विसुद्धसुहवेद्धिकंदओ ॥ १ ॥
 मेरुसेलसिहरव्व निचलो, संघकज्जभरवहणपचलो । सुरनरिंदपणिवयसासणो, दुट्ठकामतमपडलणासणो ॥ २ ॥
 तवऽग्गिदट्ठपावओ विसुद्धभावभावओ, सया तिगुत्तिगुत्तओ पसत्थलेसजुत्तओ ।
 पयंडदंडवज्जिओ जिणिंदमगरंजिओ, पणट्ठमाणकोहओ विणीयमायमोहओ ॥ ३ ॥
 जणाण बोहकारओ कुत्तिथिदप्पदारओ, अपुव्वकप्परुक्खओ पणट्ठसत्तुपक्खओ ।
 सुणिंदविंदवंदिओ असेसलोयनंदिओ, अणेगच्छिन्नसंसओ पणट्ठसव्वदोसओ ॥ ४ ॥

तस्स एवंविहस्स गुरुणो पलोयेणेण समत्थत्तिथदंसणपुयपावं पिवऽप्पाणं मणमाणो सन्वाथरेण पणमिऊण

चरणकमलं उवविष्टो सन्निहियभूमिभागे, गुरुणाऽवि पारद्धा महुमहणापूरियपंचयणरावाणुकारिणाः सरेणाधम्मदे-
सणा । जहा—

संसाररुंदरंगे सइल्लसेहिं व चित्तरुवेहिं । सो नत्थि किर पएसो जीवेहिं न नच्चियं जत्थ ॥ १ ॥
चउगइजलपडलाउलभवणवेडेणसो करंतेहिं । दुहिणहिं मज्जणुम्मज्जणाइं कुम्मेहिं व कहिंपि ॥ २ ॥
आरियखेत्तुप्पत्ती नो पाविज्जइ पभूयकालेऽवि । तीएवि हु पत्ताए कहिंचि कम्मक्खओवसमा ॥ ३ ॥
धम्मत्थकामसाहणकारणमेगंतियं न मणुयत्तं । पावंति पावविहया भममाणा विविहजोणीसु ॥ ४ ॥
लद्धेऽवि तत्थ जरकाससासकंडूपमोक्खदुक्खेहिं । निहयाण धम्मकम्मज्जमोऽवि दूरेण वच्चेज्जा ॥ ५ ॥
नीरोगत्ते पत्तेऽवि रुद्धदारिद्विहुयसरीरा । उदरभरणत्थवाउलचित्ता वोळिति नियजीवं ॥ ६ ॥
इस्सरिएऽविहु बहुदविणवद्धणारद्धविविहवावारा । लोभेण भोयणंपिहु काउं न तरंति वेलाए ॥ ७ ॥
संतोसेणवि मिच्छत्तंपकपसरेण मइलमइविभवा । सब्वणुमयं सम्मं सुयंति नेवावजुञ्झंति ॥ ८ ॥
सब्वणुधम्मवोहे जाएऽवि हु कम्मपरिणइवसेणं । नीसेसगुणावासो गुरुवि न कहिंपि संपडइ ॥ ९ ॥
लद्धेऽवि गुरुंमि समत्थवत्थुवित्थारपयडणपईवे । सिद्धिपुरपरमपयवी न पयट्ठइ तहवि विरइमई ॥ १० ॥
तीएवि तिकखबहुदुक्खलक्खनिरवेक्खकारणं पावो । पसरंतो न पमाओ खल्लिउं तीरेइ वणकरिच्च ॥ ११ ॥

इय उत्तरोत्तरमहप्पवंधेउप्पसाहणिल्लंमि । मोक्खसुहे धण्णाणं केसिं पि मणो समुल्लसइ ॥ १२ ॥
 अन्नेसिं एवंविहसमग्गसामग्गिसंभवेऽवि मई । उप्पज्जइ संसारियसुहेसु विरसावसाणेसु ॥ १३ ॥
 को वाऽविहु सलहेज्जा को वा नामं पि तेसिं गिणहेज्जा । जे भोगामिसगिद्धा रमंति इह सारमेयच्च ॥ १४ ॥
 अविय-जोव्वणपडलच्छाइयवियेयनयणा सुणंति तरुणीण । केसेसुं कुडिलत्तं न उणो तासिं चिय मणंमि ॥ १५ ॥
 बहुहाराबुद्धामं उब्भडनासं सुदीहरच्छं च । पवियंभियसत्तिलयं नियंति वयणं न उण नरयं ॥ १६ ॥
 परिणाहसालिवित्तं सि थि(थ)णेसुं न धम्मबुद्धिसु नियंति । पेहंति तणुयसुयं साणंदा न उण नियआउं ॥ १७ ॥
 सुरमणुयगईपरिहं पि सुंदरं सुयजुयं पसंसंति । जंधोरुजुयं अइअसुइयं पि उवमिंति रंभाए ॥ १८ ॥
 इय भो देवाणुप्पिय ! विप्पियहेउं पि जुवइज्जणदेहं । मणमोहणवधम्महच्चुण्णपुण्णचित्ता अभिलसंति ॥ १९ ॥
 तेच्चिय पमाणमवलंविज्जण भोगेसु को पयट्ठेज्जा ? । कुपहपवणो किं होज्ज कोइ कुसलाणुसरणिज्जो ? ॥ २० ॥
 नवजोव्वणोऽवि निप्पडिसरूचकलिओऽवि लच्छिनिलओऽवि । पवरविलासीवि तुमं भद्द ! धुवं धम्मजोगोऽसि २१
 तेणेवंविहपवरोवएसरयणाइं तुज्झ दिज्जंति । न कयावि पुण्णरहिया चिंतामणिलाभमरिहंति ॥ २२ ॥
 इय भणियंमि गुरुहिं समहिगसंजायधम्मपरिणामो । भत्तिभरनिब्भरंगो कुमरो भणिउं समाढत्तो ॥ २३ ॥
 भयवं ! सव्वमसेसं कहियं तुम्हेहि सिवसुहकएणं । ता सम्मं पव्वज्जं निरवज्जं देहमह इण्हि ॥ २४ ॥

एवं च भणिए सो गुरुणा समुज्झियरयणाभरणो अंगीकयगुरुचरणसरणो सिद्धंतभणियविहाणेण गाहिओ जिणिंददिक्खं सिक्खविओ पइदिणं कायव्वकलावं जाणाविओ सिवसुहनिबंधणं संजमघणं पाढिओ सामाइयप-
मुहं सुत्तंति । इओ य कुमारपव्वज्जासवणवज्जासणिताडणुप्पणपरमसोगो अंतेउरसमेओ समं जुवराएण समागओ
विस्सनंदी, सविणयं सूरिं वंदिऊण पणमिओ अणेण विस्सभूई साहू, भणिओ य सोपालंभं सम्पणयं च एसो-पुत्त !
किं जुत्तमेयं पवरकुलुप्पन्नाणं तुम्हारिसाणं ? अनिवेइऊण निययुत्तं जमेवंविहं दुक्करं साहुकिरियं पडिवण्णोऽसि, ता
वच्छ ! साहेसु को तुज्झ चित्तनिव्वेयहेऊ ? किं वा अम्ह दूसणं पडिवण्णो ? केण वा तुम्ह वयणं पडिक्कलियं ? कि-
मेवं एक्कपएच्चिय अदक्खिणत्तणमब्भुवगओऽसि ? हवउ वा सेसजंपणेण, तुमं विणा कस्सेयाणिं अम्हे सकज्जं सा-
हिमो ? विसमावयानिवडियाणं को वा आलंबणं ?, ता सव्वहा अज्जवि परिच्चयसु पव्वज्जं पडिवज्जसु रज्जं कीलेसु
जहिच्चं पुप्फकरंडगुज्जाणे मा पूरेसु सत्तुमणोरहे मा अणाहीकरेसु बालकमलिणीवणं व सस्सिसरीयं बहुजणं मा उवे-
क्खेसु पुव्वपुरिसरक्खियं नियजणवयं मा पडिवज्जसु गाढगंठिनिट्ठुरहिययत्तणंति ।

तो विस्सभूइसुणिणा पसमपह्माणं पर्यपियं एयं । भो मुंचह संतावं कुणह जहावंछियं कज्जं ॥ १ ॥
नो किंचिवि वयणिज्जं इहऽत्थि सव्वेऽवि निययक्खेसु । उज्जमह सेसचाणेण जेण लोगेऽवि पयडमिमं ॥ २ ॥
सयणाइसिणेहविमोहिएहिं कीरंति जाइं पाचाइं । दुग्गइगथाण ताइं कडुयविवागं फलं देति ॥ ३ ॥

न य बहुसुवयरिओऽविह विहुरे थेवंपि कुणइ साहारं । सयणजणो मोत्तूणं एक्कं जिणदेसियं धम्मं ॥ ४ ॥
 इय भणिए नियदुच्चरियपेहणुप्पणगाढसंतवो । काऊण पायपडणं जहाऽङ्गं पडिगओ राया ॥ ५ ॥
 विस्सभूई सम्ममहिगयसाहुधम्मो गुरुचरणमुस्सूसापरो दूरुद्धियसुहिसयणसंथवो जीवियमरणनिरवेक्खो
 पंचिंदियदित्तसत्तुविजयपरो वहुं कालं गुरुकुलं पज्जुवासेइ । अणण्या य सम्मं समहिगयसुत्तथो विसेसेण विहियम-
 णपरिकम्मो जोगोत्ति कलिऊण गुरुणाऽणुण्णाओ समाणो एगल्लविहारित्तणं पडिबल्लिऊण छट्ठमाइ निट्ठुरं तवो-
 कम्मं कुणमाणो सम्मं परीसहचमूं अहियासेजमाणो वीयरगोव्व गामनगरागराइसु अममाएंतो पइक्खणं वीरास-
 णुक्कुडयासणाइं कुणमाणो पइदिणं सूराभिमुहं आयावित्तो नियजीवियव्वमहिं पाणिगणं रक्खित्तो वायालीसदो-
 सविमुद्धचिरसाहारहणेण संजमसरीरमणुपालेतो गामाणुगामं विहरंतो समागओ सुरिंदपुरिविम्भमाए महुराए नय-
 रीए, ठिओ थिपसुपंडगविवज्जिए उक्किट्ठवनिरयमुणिजणसंगए एगंतदेसे, तहिं च निवसंतो एगया परमसंवेग-
 गयमाणसो नियजीवियनियमणत्थं चित्तिउमारद्धो । जहा—

एसोऽभिकंखइ सुहाइं जिओ दुहाइं, दूरेण मोत्तुमभिवंछइ तुच्छबुद्धी ।
 एवं न जाणइ जहा न कहिंपि धम्मसंवंधसिद्धिचिरेहेण भवंति ताइं ॥ १ ॥
 भोगे समीहइ करेइ रइं कहासु, देसिस्थिपत्थिवसुभोयणसंगयासु ।

सीउण्हदंसमसगाइ परीसहे य, सम्मं तितिक्खइ न मूढमई पमाया ॥ २ ॥

सत्तू वरं निसियधारकरालकालकंतिच्छडालकरवालकरो सुकुद्धो ।

घायत्थमुज्जुयमई वरमुग्गभोगभोगीसरो डसिउमुड्ढमरो रुणच्छो ॥ ३ ॥

उडंडमारुयपईवियदीहजालामालाडलो य जलणो वरसंगलग्गो ।

नीसेसदोसनिलओ न खणंपि नूणं, जुत्तो न गंतुमहमो हि इमो पमाओ ॥ ४ ॥

एए हि सत्तुपसुहा मणुयाण दित्ति, तिव्वावि एगभवगोयरेमेव मञ्जु ।

एसो पईभवसुदुस्सहत्तिकखदुक्खलक्खक्खणी तदहिगं परिवज्जणिज्जो ॥ ५ ॥

वज्जणमेयस्स पुणो आहारच्चागओ घडइ सम्मं । ता सद्धेव जुत्तं मम काउं उग्गतवचरणं ॥ ६ ॥

इइ संपहारिऊण य समारद्धं तेण मासखमणं, कओ विसेसेसुज्जमो समाढत्तो पइदिणं ज्ञाणप्पबंधो निरुद्धो मणप्पसरो, एवं च केमेण पडिपुण्णे मासक्खमणे पडिलेहियभंडोवगरणो अतुरियं अचवलं जुगमेत्तनिहित्तचक्खुयसरो सुत्तत्थपोरिसिपलंतकाले चलिओ भिक्खानिमित्तं उच्चावयगिहेसु गोयरचरियाए, परिभममाणो उग्गमउप्पायणादोसे सम्मं निरुवेमाणो लाभालाभेसुवि अरत्तहुट्ठो पगिट्ठतवाणुट्ठाणकरिसियसरीरत्तणेण य तणंपिव पवणेणावि पकंपमाणो परिसोसियमंससोणियत्तणेण य पयडसिराजालावणद्धऽट्ठिपंजरो धवलपाडिवयमयलंछणो इव कलावसेसो तं रायम-

गमोगाढो जत्थ सो विसाहनंदीकुमारो पिउच्छाए रण्णो अगमहिंसीए धूयापरिणयणत्थं पुव्वमावासिओ चिट्ठइत्ति ।
 अहं तं सुणिं दट्ठण जायपच्चभिण्णाणेहिं पुरिसेहिं भणिओ विसाहनंदी कुमारो, जहा-सामी ! मुणह तुम्हे एवं पव्वइ-
 यगं ? सो भणइ-सम्मं न जाणामि, तेहिं भणियं-कुमार ! एसो सो विस्सभूई कुमारो जो पुबिं पव्वइओ, तं लक्खिऊण
 जाओ तस्स पुव्वामरिसेण कोवोत्ति, एत्थंतरे सो तवस्सी तंमि पएसे वच्चमाणो इरियासमिइवक्खित्तचित्तणेण अत-
 क्कियमेव पणोळ्ळिओ अहिणवपसूयाए गावीए, पडिओ य निसड्डो धरणीए, ताहे तेसिं विसाहनंदिपमुहपुरिसेहिं दट्ठण
 तं तहानिवडियं संजायगाढहरिसेहिं कओ सिंहनाओ अप्फोडिया तिवई दिन्नाओ तालाओ पारद्धो कलयलो, भ-
 णियं च महया सदेण-भो भो कत्थ गयं तमियाणिं कविट्ठफलपाडणवलं जेण गोमेत्तेण विनिवाडिओऽसि ? इमं च
 निसामिऊण वलियकंधरो विस्सभूई जाव विप्फारियल्लोयणो अमरिसेण पलोएइ ताव दिट्ठा विसाहनंदिसुपहा पच्च-
 भिण्णाया य, तयणंतरं च पलीणो से उवसमपरिणामो ववगओ विवेओ समुच्छलिओ महाकोवो समुल्लसियं वीरियं,
 धाविऊण य सा गहिया सिंगेसु गावी पडाइयव्व भमाडिया सीसोवरिं पक्खित्ता य धरणीए, भणिया य ते, जहा-रे रे
 दुरायारा ! दुरुम्मसुक्कपरक्कमा हीणा सव्वसो य विरहिया मं उवहसह, न मुणह जहा दुव्वलस्सऽवि पंचाणणस्स सिगा-
 लसहस्सेहिवि न लंघिज्जइ परक्कमो, सुलहुयस्सवि विहंगरायस्स न तीरइ सोढुं मुयंगमेहिं चड्डलचंचुप्पहारी, तहा-
 जइविहु निट्ठुतवक्कम्मकिसियकाओ वियाणिओऽहमिह । तहवि न रे ! तुम्हाणं लक्खेणवि अत्थि मम गणणा ॥ १ ॥

रे पिसियपोसिया विउसदूसिया किं परेण भणिएण ? । अच्छिपडियावि तुम्हे न कुणह मे किंपि परियावं ॥ २ ॥

निब्भच्छिऊण एवं साहिकखेवं सुतिकखयणेहिं । गंतूण य नियठाणं साह्व चित्तेउमाढत्तो ॥ ३ ॥

अज्जवि न मणांगंपिवि पुब्बाणुसयं चयंति मइ एए । पव्वज्जोवगयंमिवि निक्कारणवइरिणो पावा ॥ ४ ॥

अहवा एयाणं बालिसाणं किं एत्थ दूसणं ? जेण । पुब्बायरियाण सुहासुहाण एसो दसावागो ॥ ५ ॥

ता तह करेमि संपइ परभवपत्तो जहा य सुमिणेवि । एवंविहअवमाणढाणं नो कहिंपि पेच्छामि ॥ ६ ॥

इय कयसंकप्पो सो अविभावियसमयसत्थपरमत्थो । अविचित्तिउत्तरोत्तरसंसारवडणहुहनिवहो ॥ ७ ॥

भत्तं पच्चक्खाउं नियाणबंधं च काउमुज्जुत्तो । पच्चासण्णमुणीणवि समक्खमेवं पजंपेइ ॥ ८ ॥

जइ ताव ममं दुक्करतवस्स छट्ठट्ठमाइरूवस्स । सज्झायझाणसहियस्सिमस्स सन्वायरकयस्स ॥ ९ ॥

बायालीसेसणदोसरहियसुट्ठुंछभोयणस्सडविय । सुत्तत्थतत्तचित्तण[पर]गुरुजणविणयाणुचरणस्स ॥ १० ॥

पंचमहव्वयधरणस्स वावि फलमउलमत्थि नणु किंपि । अतुलियबलकलिओऽहं ता होज्जा अणजम्मंमि ॥ ११ ॥

एवं च नियमिऊणं ठिओ सुद्धसिलायले, निसामियनियानबंधा य समागया इयरसमीववत्तिणो तवस्सिणो,

भणिओ य सबहुमाणं तेहिं-भो महाणुभाव ! सयंचिय सुणियजुत्ताजुत्तस्स नत्थि जइवि तुह किंपि कहणिज्जं त-

हावि एवं निवेइज्जइ-जेण न लोहकीलियानिमित्तेण कोऽवि कुणइ देवउलपलीवणं, न वा कोडिप्पमाणरयणरा-

सिणा किणिज्जइ कागिणी नेव य गोसीसचंदणागरुपमुहसारदारुणि दहिऊण कीरंति इंगाला, न य एवंविहनिक्कलं-
कसुचिरचरियविविहतवेहिं किंपागफलं पिव पजंतदारुणो काउं जुज्जइ नियाणवंधो, अणणं च—

किं पवणगुंजिएहिं कंपिज्जइ मंदरो रउदेहिं । दुज्जणवयणेहिं मणो किं वा पक्खुहइ साहूणं ? ॥ १ ॥

चिरकालुव्वूं किं मज्जायमइक्कमंति जलनिहिणो । हरिणंकदिणयरा किं तिमिरप्पसरेहिं रुज्झंति ॥ २ ॥

निम्मलगुणरयणमहानिहाण ! तुम्हारिसावि सप्पुरिसा । ववसंति एरिसं जइ धम्मसिरी ता कमल्लियउ ? ॥ ३ ॥

कत्थव वच्चउ विणओ ? वोढुं को वा खमो खममियाणिं ? । भग्गनिवासो गच्छउ कत्थ वराओ विवेओऽवि ? ॥ ४ ॥

एमाइविचिवयणेहिं भासिओ जा न देइ पडिवयणं । नियनियठाणेसु गया ताव सुणिंदा निराणंदा ॥ ५ ॥

विस्सभूइवि अविचलियणियाणवंधज्झवसाओ अणालोइयपडिक्कंतो कालमासे कालं किच्चा उक्कोसट्ठितीओ
महासुक्के देवलोगे देवो समुप्पण्णो, तत्तो उव्वट्ठित्ता जहा वासुदेवो होही जहा य से पिया पयावइत्ति भविही तहा
एत्तो कहिज्जइ ।

इहेव जंबुदीवे दीवे भारहे वासे पोयणपुरंमि नयरे जहत्थाभिहाणो रिउपडिसत्तू नाम राया, तत्स य सयल
अंतउरपहाणा भदा नाम अग्गमहिसी, तीसे चउमहासुभिणपिसुणियावयारो अयलो नाम पुत्तो, अचंतमहावलो
विस्सुओ य, एगया य तीसे देवीए पाउब्भूओ गब्भो, जाया य कालेण सव्वलक्खणपडिपुण्णसरीरा कण्णगा,

कथं च उचियसमए भिगावइत्ति से नामं, कमेण य निरुयमारूढजोवणगुणा एवं सोहिउं पवत्ता—
कसिणसुसिणिद्धकुंचिरचिहुरचओ तीएँ उत्तमंगंमि । वयणेंदुविन्भमागयविडप्पसोहं समुव्वहइ ॥ १ ॥
भालतलेऽवि लुलंती अतिकुडिला चिहुरवल्ली तीसे । रेहइ वम्महरणो विजयपसत्थिन्व आलिहिया ॥ २ ॥
सरलेहिं लेयणेहिं तीएँ कवोलेहिं चंदकंतेहिं । अहरेण पउमरागेण रयणट्ठाणं व सहइ सुहं ॥ ३ ॥
संखो इव रेहावलयलंछियं कंठकंदलं विमलं । संठियविचित्तमणिलुट्ठगंठियं सोहए तीए ॥ ४ ॥
कंदप्पनरिंदनिवासविन्भमे तीएँ थोरथणवट्ठे । हारो पडिहारतुलं आलंनइ लंबमाणो सो ॥ ५ ॥
रंभाभिरामपीवरमूरुजुयं कणयकमलकंतिछं । थंभजुयलं व छज्जइ विसयमहासोकखभवणस्स ॥ ६ ॥
बहलालत्तयरसपिंजरं व मणिकुट्टिमंमि संकतं । कमलोवहारसोहं चलणजुयं दावए तीसे ॥ ७ ॥

एवंविहा य वरजोगत्तिकाऊण सा सन्वालंकारविभूसियसरीरा भद्दाए पेसिया पिउणो पायवंदणत्थं, गया
चेडीचक्कवालपरिवुडा निवडिया नरिंदचलणेसु पेच्छिया संभमभरियच्छिणा सन्वायरं रणणा पणयालावपुरस्सरं च
आरोचिऊण तमुच्छंगे रूवेण जोव्वणगुणेण य वाढमक्खित्तचित्तो विचिंतिउमाढत्तो—अहो सुरसुंदरीरूवाइसयपराभव-
करं रूवं अहो सन्वावयवसुंदरं लायणं अहो सरयचंदचंदिमानिम्मलं कंतिपडलं, अहो वेणुवीणाविजइणी वाणी,
सव्वहा भुयणच्छेरयभूयमिमीए किंपि विलसियं, नूणं पुवं एरिसं न निम्भियं खत्तिथुकुले कन्नगारयणं परमेसरेण

विहिणा, तेणं चिय मयरद्धएण परिगहिया रई तिसलपाणिणाऽवि परिणीया पव्वयसुया महुमहेणवि मंदरुम्महि-य-
खीरजलहिसमुद्धिया जलमाणुसी पणइणी कया पुरंदरेणावि पुलोममुणिकन्नगा उव्वूढत्ति, अहो अहं नमो मज्झं
जस्स अंतरे रेयणाथरेव्व एरिसं कण्णगारयणं समुप्पणंति ।

अह कोमलुच्छुचावोऽवि वम्महो पंचकुसुम विसिहोऽवि । वज्झघणुलोहनिटुरसहस्सवाणो व विप्फुरिओ ॥ १ ॥
जत्तो जत्तो सा धवलपम्हले लोयणे परिक्खिवइ । तत्तो तत्तो सोऽविट्टु निसियं सरधोरणिं सुयइ ॥ २ ॥
अत्थाणजणोऽविट्टु वम्महेण संताविओ ङु पासेण । रिउपडिसत्तू राया तदेगचित्तो विसेसेण ॥ ३ ॥

एवं च मयणसरप्पहारविट्टुरियमाणसो सो नरिंदो परिभाविउं पवत्तो—अहो एसा इयाणिं वरजोग्गा वट्टइ
ता किं कायव्वं ? किमेरिसरूचाइसया कण्णगा परस्स दाऊण संगिहाओ निस्सारिज्जइ ?, सव्वहा न जुत्त-
मेयं, जइविट्टु जणो अविसेसेण कण्णगाणं अणप्पयाणेण पउत्तो तहावि गड्डरिकापवाहो एसो नालं वणट्ठाणं सुबु-
द्धीणंति कयनिच्छओ अणवेक्खिउं गरुयमाचंदकालियं लोयाववायं अविमंसिऊण चिरप्परूढं नायमग्गमनिगहि-
ऊण मयणवेयणं अप्पणा चेव तं परिणेउकामो कहकहवि आगारसंवरं काऊण धूयमंतेउरं विसजेइ, वीयदियेह
वाहाराविऊण सेट्टिसत्थवाहपमुहं नयरमहाजणं सामंतसेणावइवगं च सुहासणत्थं सबहुमाणं भणइ—भो भो
पहाणलोया ! तुम्हे कुलव्वत्थाणं जुत्ताजुत्ताणं नयाणं संसयत्थाणं लोयधामववहाराणं परूवगा निच्छयकारगा य,

अम्हाणंपि सब्बत्थेसु पुरावि पुच्छणिज्जा, ता संपयं साहेहजमेत्थ विसए रयणमुण्यज्जइ तस्स को सामी?, अविण्णा-
यपरमत्थोहिं तोहिं भणियं—देव! किमेत्थ पुच्छणिज्जं?, तुम्हेच्चिय सामिणोत्तिवुत्ते तिक्खुत्ते एयमेव वयणं भणावि-
ऊण नरवइणा उवढ्ढाविथा साऽवि य कन्नगा, भणिया य ते—अहो धूया एसा मम अंतोरे रयणभूया पाउब्भूया
अथो तुम्हाणुण्णाओ अहमेयं सयं परिणेतं वंछामि, अणइक्कमणिज्जं खु तुम्ह वयणं अम्हाणंति, एवं भणिए लज्जाव-
सवलंतकंधरा अवरोप्परसुहमवल्लोयमाणा ओहयमणसंकप्पा अपरिभावियवयणविसट्टमाणचित्तपीडा गया नियनियठा-
णेसु पुरजणपमुक्खा, सा कण्णया अवरवासेरे वारिज्जमाणेणऽवि भद्दाए देवीए पडिखलिज्जमाणेणऽवि कुलमहत्तरएहिं
उवहसिज्जमाणेणवि नम्मसचिवोहिं सोवालंभं वज्जिज्जमाणेणवि मंतीहिं दुहविवागमणुसासिज्जमाणेणवि धम्मगुरूहिं अ-
णुसरियविज्ञेण करेणुवइ(ण)व्व अणिवारियपसेरेण गंधव्वविवाहेण परिणीया सा नरिंदेण, ठविथा अगमहिंसीए, तीसे
सद्धिं विसयसुहमणुमुंजइत्ति । सा य भद्दा देवी दड्ढूण तारिसं जणनिंदणिज्जं उभयलोयविरुद्धं तियचउक्कचच्चेसु जणह-
सणिज्जं रण्णो वइयरं संजायगाढचित्तसंतावा अयलेण पुत्तेण समं महया रिद्धिवित्थरेणं पहाणजणसमेया गया दक्खि-
णावहं, तत्थ य पसत्थभूमिभागे निवेसिया नयरी निम्मियाइं धवलहराइं ठविथाइं सुरागाराइं कारावियाइं पाया-
रगोउराइंति, सा य पुरी महंतीए ईसरीए कारियत्ति माहेसरत्ति गुणनिप्फण्णनामेण देसंतरेसु पसिद्धिं गया ।
तत्थ य अयलो कुमारो भद्दादेविं मोत्तूण पिउपासमागओ, एवं च काले वचंतंमि लोणेणं तस्स राइणो सधूया-

कामित्तणेण पयावइत्ति नामं कयं । अणया य सो विस्समूई महासुक्खेदेवलोयाओ चविऊण उववण्णो भिगावइए देवीए गव्वंमि पुत्तत्ताए, तओ सा रयणिंमि सुहपसुत्ता सत्त महासुमिणे पासित्ता णं पडिबुद्धा, पडिबुद्धिया य गया रण्णो सगासे, निवेइओ सुविणवुत्तंतो, रत्ता भणियं-देवि ! निच्छियं भुवणविक्खायजसो सयलसामंतमउलिमंडल-मसिणियकमकमलो पयावपडिहयपडिवक्खो कुलकेऊ तुह पुत्तो भविस्सइ । जेण-

एवंविह सुमिणाइं देवि ! पुण्णेहिं कहवि दीसंति । हरिसभरनिब्भरंगी अभिनंदसु ता तुमभिसाइं ॥ १ ॥

इइ जंपिऊण रण्णा वाहरिया सुमिणपाढगा कुसला । ते य नरिंदाएसं तहत्ति पडिवज्जिउं सहसा ॥ २ ॥

णहाया कयवलिकम्मा परिहियसुविसुद्धसुंदरदुगुल्ला । सिरनिहियक्खयकुसुमा निडालकयरोयणातिलया ॥ ३ ॥

करकलियनिमित्तागमपोत्थयसत्था समत्थनयनिउणा । पज्जायागयविज्जा समागया झत्ति निवभवणं ॥ ४ ॥

सीहासणेसु सव्वायेरेण उववेसिया नरिंदेणं । फलफुल्लदाणपुव्वं सुमिणत्थं पुच्छिया तोहे ॥ ५ ॥

तेहि य निमित्तसत्थाइं वित्थरेणं सबुद्धिविहवेणं । परिचित्तिऊण तह निच्छयं च काऊण अण्णोऽण्णं ॥ ६ ॥

भणिओ पयावइनिवो जहेरिसाणं विसिद्धसुमिणाणं । अणुभावेणं नूणं पयडो नीसेसभुवणंमि ॥ ७ ॥

त्तिकव्वंडभरहसामी अप्पडिहयसासणो य तुह पुत्तो । होही अप्पडिमवलो इह पढमो वासुदेवोत्ति ॥ ८ ॥

आयन्निऊण एवं पडिबुच्चित्तेण ते नरिंदेण । दाऊण धणं विविहं विसज्जिया नियनियगिहेसु ॥ ९ ॥

सो य म्मिगावई देवी पुणोऽवि नरिंदेण कहिए सुमिणपाढगसिंदे सुमिणंदे पहिदुहियया सुहंसुहेणं गब्भमुबहइ,
अणया य पडिपुणंमि समए पसत्थंमि वासरे सुकुमारपाडलपाणिपद्धवं तमालदलसामलसरीरं सयलपुरिसप्पवरल-
क्खणविराइयं तिपिट्ठकरंडगाडंबराभिराभं दारयं पसूया । विण्णायसुयजम्मो पहिदुो पयावई, कराविओ सुरमं-
दिरेसु महूसवो, तथा—

दिज्जंतऽनिवारियकणयदानंदिज्जमाणमगणयं । पम्मुक्कपुप्फंपुंजोवयारेहंतरायपहं ॥ १ ॥
मंगलकलयलमुहलुम्मिलंतमहिलाजणाभिरमणिज्जं । पारद्धसंतिकम्मं जायं नयरं च तं सहसा ॥ २ ॥
अवरवासरे य तस्स दारयस्स परमविभूईए तिपिट्ठकरंडगंदसणनिच्छियाभिहाणवीएण पइट्ठियं तिविडुत्ति
नामं कुलथेरीजणेणं, अह सो तिविडू पंचघाईपरिक्खित्तो महारयणं व हत्थाओ हत्थं संचरंतो अणेगचेडचाडुकर-
परिगओ कुमारभावमणुप्पत्तो,

ताहे पिडणा जोगोत्ति जाणिउं सोहणे तिहिमुहुत्ते । उवणीओ सो विहिणा लेहायरियस्स पढणत्थं ॥ १ ॥
सयलो कलाकलावो अकालखेवेण गुरुसयासाओ । नियबुद्धिपगरिसेणं सविसेसो तेण गहिओत्ति ॥ २ ॥
अह सुणियसन्वनायन्ववित्थरो गुरुपए पणमिऊण । तदणुण्णाओ कुमरो गओ सगेहंमि परितुट्ठो ॥ ३ ॥
अयलेण भाउणा सह खणमविय विओगमसहमाणो सो । पवरुज्जाणार्हंसुं निस्संको कीलइ जहिच्छं ॥ ४ ॥

कोमलकायस्सवि तस्स सुयवलं पेक्खिऊण जायभया । पमिलाणवयणकमला सहस्समल्लावि कंपंति ॥ ५ ॥

लीलाएविडु पयंपकयाइं सो जत्थ जत्थ मेलेइ । वज्जाहयव्व धरणी तहिं तहिं थरहरइ बाढं ॥ ६ ॥

परिहासेणवि जे तेण पाडिया कहवि सुट्टिघाएणं । ते नूनं जइ परगेहिणीए पुत्तेहिं जीवंति ॥ ७ ॥

खिवइ य जत्तो दिट्ठिं तत्तो च्विय सायरं विणयपणया । अहमहमिगाए धावंति किंकरा मुक्कयांवारा ॥ ८ ॥

जस्साएसं वियरइ थेवंपि अणायरेणऽवि कुमारो । सो लद्धनिहाणो इव मन्नइ कयकिच्चमप्पाणं ॥ ९ ॥

सो भणइ जत्थ ठाणे तत्थ समप्पंति सेसवावारा । तस्सेव परक्कमवणणेण लोयस्स पुणरुत्तं ॥ १० ॥

इय पुव्वभवज्जियसुकयकम्मवसवट्टमाणसोक्खस्स । अयलसमेयस्स सरंति वासरा अह तिविडुस्स ॥ ११ ॥

इओ य-रायगिहे नयरे भारहद्धवसुंधराहिवमणिमउडकोडिलीढपायवीढो पयलकालमायंडमंडलुडामरपयावकंतदि-
सिचक्को निव्विसंकमुयदंडमंडवनिलीणरायलच्छिविलाससुंदरो समरसीमनिहयमत्तमायंगकुंभत्थलगलियमुत्ताहलविरइ-
यचउक्को महागोपुरपरिहसन्निहबाहुवद्धवीरवलओ निसियधारुक्कडचक्कनिक्कंतियवइरिगीवो आसग्गीवो नाम राया
पडिवासुदेवो पवरं पंचप्पयारमणिज्जं विसयसिरिमणुहवइ । एवं च वोळंतंमि काले सो विसाहनंदी कुमारो चिरं
रज्जमणुपालिऊण मओ समाणो नरयतिरिएसु भमिऊण उववण्णो एगंमि गिरिकंदरे सिंहेत्तणेणं, पमुक्कवालभावो
य इओ तओ हिंडंतो उवह्वेइ तस्स रण्णो पहाणसालिछेत्तनिवासिकरिसगजणे, ते य तेण उवह्विज्जभाणा आ-

गया आसगगीवनरिंदस्स सगासे, साहिओ सीहवइयरो, इमं च वागरियं जहा-देव ! इमाओ कयंतविब्भमाओ सिंहाओ न रक्खह अम्हे ता करिसावेह नियेछेत्ताई, अम्हे अन्नत्थ वचिस्सामो, राइणा भणियं-भो भो किमेवं का-यरा होह?, तहा करेमि जहा न मणांगं पि पीडइ एस दुट्ठसत्तो, तओ निरुविया जहक्कमं सोलसवि सहस्सा नरिंदाणं सीहपसरपडिक्खलणत्थं, गया य पहिट्ठा करिसगा सट्ठाणंमि । अणया य आसगगीवो सुरसुंदरीविब्भमंमि अंतेउरी-जणे वेसमणधणाइरेगे कोसविभवे अणणसरिसे करितुरगाइरज्जंगे सुरवइसमंमि आणाइस्सरिए अचंतं सुच्छिओ गिद्धिओ चिंतिउमारद्धो-किं मण्णे एरिससमगसामगीपरिबुडस्स परेण मणेणवि अणभिमवणिज्जस्स निचंपि अप्प-मत्तचित्तअंगरक्खपरिक्खेवस्स अणुसुमरणमेत्तकरतलपाउब्भवंतअप्पडिहयगइचक्काउहस्स ममावि संभवेज्ज कोइ वि-णासकरणपच्चलोत्ति?, जइ ताव तं जाणेमि कहवि ता करेमि पडिविहाणं, रक्खेमि सब्बप्पयारेण अप्पाणंति संप-हारिऊण आहुओ नेमिस्सिओ, दावियमेगंते आसणं, निसन्नो सो तत्थ, सक्कारपुब्बं पुट्ठो य सव्वायेरेण, जहा भद् ! नेमिस्सिय ! सम्मं चिंतिऊण साहेसु, कोऽवि अत्थि किं ममावि मच्चुकारी न वत्ति?, तेणवि य निमित्तवलेण अव-लोइऊण भणियं-देव ! पडिहयममंगलं, कहमणिट्ठं साहिज्जइ?, रत्ता वुत्तं-भद् ! मा संखुब्भ, साहेसु जहापुच्छियं, नेमिस्सियणं जंपियं-जइ एवं ता अत्थि तुब्भंपि मच्चुकारी, रत्ता कहियं-कहं सो नेओ?, तेण वुत्तं-देव ! जो सा-लिच्छेत्तसीहं वावाइस्सइ तुहसंतियं च नीसेसमंडलाहिवसम्माणट्ठाणं चंडवेगदूयं धरिसेही सो निच्छियं मच्चुकारी

जाणियवो, सबप्पयारेहिं रक्खणिज्जो य, एयमायन्निऊण रत्ता विसज्जिओ नेमिच्चिओ, सयंपि उवविट्ठो अत्थाण-
मंडवे, पुच्छिया य अमच्चाइणो-अहो को संपयं नरवई दंडाहिवो कुमरो वा अतुलवलपरक्कमो सुणिज्जइत्ति, तेहिं
भणियं-देव ! तुम्हाणंपि सयासाओ कोऽवि अतुलवलो ? जेण साहिजइ, महीए सूरमंडले पहवंतंमि विप्फुरइ ता-
रगगरुई ? राइणा भणियं-वडुरयणा वसुंधरा, किमिह न संभवइ ? मंतीहिं भणियं-देव ! निच्छियं न सुणिमो,
सवणपरंपराए पुण सुणिज्जंति-पयावइनरिंदस्स कुमार अन्नससिसपरक्कमा लीलादल्लियेसससोंडीरवलावलेवत्ति,
एवमायन्निऊण राइणा भणिओ चंडवेगो-जहा भइ ! गच्छु एयस्स राइणो सगांसे साहेसु य तस्स असुगं मम
पओयणं, जं देवो भणइत्ति पडिच्छिऊण सासणं निगओ, गओ महाया पुरिसपरियारेणं परिक्खित्तो पोयणपुरा-
भिमुहं चंडवेगो । इओ य पयावइराया कयपयरसिंगारो परिहरियमहामुद्धुगुल्लो कुमारपमुहपरियणाणुगओ अंते-
उरमज्जे ठिओ चिइइ, वट्टइ य तत्थ पेच्छणयं, केरिसं ?—

विविहंगहारविब्भमविचित्तरणप्पओगरमणिज्जं । रणझणिरमंजुमंजीरमणहरारावसंवलियं ॥ १ ॥

दढदेहायासवसुच्छलंततुटंतहारसरिविसरं । भूमंगविब्भमुब्भडपसरियवडुहावभावभरं ॥ २ ॥

कलयंतकंठगायणपारद्धविसुद्धतागेयसरं । ताडियपडुपडुडुम्मिस्समंजुगुंजंतवरसुरवं ॥ ३ ॥

इय एरिसंमि तरुणीजणस्स नट्टंमि संपयट्टंमि । अदिट्ठरुवपुवे संपन्ने परमरंगे य ॥ ४ ॥

सुत्तच्च चित्तलिहियच्च लेवघडियच्च रज्जुनद्धव्व । मइरामयनिप्फंदियव्व विमुक्कऽन्नवावारा ॥ ५ ॥

अणमिसनयणनिवेसा जणपरिसा तक्खणेण सा जाया । अइतुड तिविहुकुमार रायलोएण सह झत्ति ॥ ६ ॥

एत्थंतरे खीरोयनिम्महणपज्जंतुट्ठियविसुगारोव कंप्पियविबुहसत्थो कयंतोव अणिवारियागमणो पविट्ठो सो चंड-
वेगाहिहाणो दूओ, तं च दट्ठूण ससंभममुट्ठिया, सामिदूओत्ति कलिऊण कया महती पडिवत्ती, पुट्ठो य आसग्गीव-
नरिंदस्स सरीरारोगगवत्तं, सिरसा पडिच्छियं सासणं, संवरियेपेच्छणगवावारो नियनियगेहेसु गओ जणो, रंगभंग-
करणेण य बाढं अमरिसिओ तिविहुकुमारो, पुच्छिओ अणेण एगो पुरिसो-अरे ! को एस ? किं वा एयागमणेण अब्भु-
ट्ठिओ ताओ ? कहं वा पविसमाणो दुवारेच्चिय न रुद्धो पडिहारेण ? , तेण भणियं-कुमार ! एसो खु रायाहिरायस्स पहा-
णदूओ, अओ सामिच्च दट्ठव्वोत्ति राइणा अब्भुट्ठिओ, अओच्चिय पडिहारेणवि न खलिओ, एयाणुवित्तीए चेव सुहेणेत्य
निवसिज्जइ, पभुचित्ताणुवत्तित्तणं हि सेवगधम्मो, कुमारेण भणियं-जाणियच्चं कोऽवि कस्सवि पभू सेवगो वा, होउ
ताव किं एएण ? ,अनिवडियपुरिसायाराणं विफलो अत्तुक्करिसो निरत्थओ तुंडमंडवो अणुचिओ भुयवलावलेवो अबुत्तो
नेवत्थफडाडोवो, ता एयं एत्थ पत्तकालं-अरे ! साहेज्जसु तुमं मम जया एसो सनयराभिमुहं वच्चेज्ज, जेण करेमि
एयस्स पाहुन्नयं, जं कुमारो आणावेइत्तिमणिऊण अब्भुवगयं पुरिसेण, सो य दूओ गुणदोसे राइणा समं भासिऊण
साहियनरिंदपओयणो परिगहियविविहपाहुडो कयसक्कारसम्माणो चलिओ सनयराभिमुहं, अंतरा य गच्छंतो

चिन्नायगमणवइयरेणं पडिरुद्धो तिविट्ठुकुमारेण अयलपरिगएणं, भणिओ य—

रे दूयाहम ! अइदुट्ठ थिट्ठ पाविट्ठ कत्थ वचिहिंसि । पेच्छणयरंगभंगं तइया काउं मम समक्खं ? ॥ १ ॥
निब्भग्ग ! गरुयराउलसेवणओऽविट्ठ पभूयकालेणं । पत्थावापत्थावं न सुणसि किं सिक्खिओ तंसि ? ॥ २ ॥
नियजण ! वयणचिन्नासपमुहगुणवित्थरेण उवहससि । सक्कगुरुं पि विट्ठुकुह अन्नेव विगिट्ठिमा तुज्झ ? ॥ ३ ॥
ता पाव ! पाचसु फलं सदुट्ठचेट्ठियतरुत्तस दुविसहं । सुमरेसु य इट्ठदेवं माऽकयधम्मो धुअं मरसु ॥ ४ ॥
इय भणिऊण तिविट्ठू निट्ठुसुट्ठिप्पहारसुगिरिउं । जा हणइ नेव दूयं अयलेणं जंपियं ताव ॥ ५ ॥
भो भो कुमार ! विरमसु गोहचंपिय विमुंच एयवहं । दूया रंडा भंडा कयावराहावि अहणणिज्जा ॥ ६ ॥
तोहे भणिया पुरिसा ! रे रे सिग्घं इमस्स पावस्स । मोत्तूण जीवियन्वं सेसं अवहरह वत्थाइं ॥ ७ ॥
पुरिसेहिं तओ कुमारस्स वयणओ लट्ठिसुट्ठिपभिईहिं । गहिऊण तं समत्थं धणाइयं अवहउं तस्स ॥ ८ ॥
भयमरविहुरत्तणओ नियंसियं वत्थमविग्र से गलियं । भूमीए निवडणेणं धूलीए धूसरियमंगं ॥ ९ ॥
अह खमणगोव सुणिउन्व पंडरंगोन्व तक्खणं जाओ । सो चंडवेगदूओ नियजीवियरक्खणट्ठाए ॥ १० ॥
सेसो पुण परिचारी जीवियकंखी य पहरणे मोचुं । सयलदिसासु पलाणो दंसणमेत्तेऽवि कुमारस्स ॥ ११ ॥
एवं च लुंचविळुंचियं काउं दूयं वलिया कुमार, जाणिया य वत्ता पयावइणा, तओ भीउच्चिगो चिंतिउमाढत्तो—

अहो असोहणं कयं कुमारेहिं, एयंमि पडिक्कल्लिओ, अजहाबलमारंभो मूलं विणा-
सस्स, न य कुमारारवद्धे मम निहोसत्तणं वयणसएणवि कोऽवि पडिवज्जिही, पडिवज्जिएवि पयडो खलु एस वव-
हारो जं भिच्चवराहे सामिणो दंडो, ता विसममावडियं, अहवा अलं चिंतिएण, उवाओ चेव उवेयस्स साहगोत्ति-
निच्छिऊण आणाविओ दूओ, सविसेसं कया पडिवत्ती, समप्पियाइं महामोछाइं पाहुडाइं, कओ य चउग्गुणो
दाणक्खेवो, भणिओ य एसो-अहो महायस! बालभावसुलभनिव्वियत्तणेण जोवणवसविसंदुलचिट्ठियत्तणेण राय-
कुलजम्मसहयदुल्ललियत्तणेण य जइवि बाढं अवरद्धं कुमारेहिं तुम्ह तहावि सव्वहा न कायवो चित्तसंतावो, न बो-
दवो अमरिसो, मम निव्विसेसोऽसि तुमं, डिंमदुन्विलसियाणि न करिंति चित्तपीडं कहवि जणगत्थाणीयस्स, अहं
जणगो चेव एएसिं, उत्तरोत्तरगुणपगरिसारोहणं पुण तुमए इमेसिं कायन्वं, ता कुणसु पसायं परिहरसु अवमाणं,
दूएण भणियं—महाराय! किमेवमाउलो भवसि?, किं कोऽवि नियडिंभेसु दुव्विणयमासंकेइ?, पेमपरवसहियएसु
वा एगमवि अवरहं न मरिसेति?, राइणा भणियं—एवमेवं, जाणामि तुज्झ चित्तचित्तिं लक्खेमि पडिवन्नभरधवल-
त्तणं, केवलं तहा कायन्वं जहा देवो कुमारवइयरं न निसामेइ, इइ भणिए पडिवज्जिऊणं चलिओ चंडवेगो, कमेण
गच्छंतो पत्तो आसग्गीवनरिंदसमीवं,

अह पुद्वागयनरकहियकुमारवइयरनिसामणा रुसिओ । आवद्धभिउडिभीमो रत्तच्छो पेच्छिओ राया ॥ १ ॥

नार्यं च जहा पुत्रागृहिं सिद्धो स वइयो रन्नो । ताहे कय्यणामो उवविट्ठो सो नियट्ठाने ॥ २ ॥

घुट्ठो य तओ रत्ता कहिओ नीसेसवइयो तेण । जह कुमरोहिं पहओ अयाणमाणेहि निरवेक्खं ॥ ३ ॥

जइविट्ठु देवडवरद्धं वालत्तणओ सुएहिं मम किंपि । तहवि पयावइनिवई अहिगं सोगं समुव्वहइ ॥ ४ ॥

चूडामणिव सीसेण सासणं तुम्ह धरइ विणयनओ । निभिच्च(ब्भंत)भिच्चभावं सविसेसं दंसइ सयावि ॥ ५ ॥

न सुणिज्जइ जुवईणं मंजीरयो कयावि तस्स गिहे । मागहलोएणं तुह गुणनिवहं संशुणंतेण ॥ ६ ॥

किं बहुणा ? महिवइणो मए सुदिट्ठा कया समग्गावि । किं तु नियसामिभत्तीए तुलइ नो कोऽवि तेण समं ॥ ७ ॥

अह आसग्गीवनरिंदेण सुमरियं नेमिच्चिगवयणं परिकंपिओ मणेणं, चित्तिं च-अहो निव्वडियं ताव एगं नेमिच्चि-
गवयणं, वीर्यं पि जइ इत्थमेव हवेज ता निच्छियं अकुसलंति परिभाविऊण आहूओ अवरो दूओ, भणिओ य जहा-
गच्छसु रे पयावइस्स सगासे, भणसु य तं मम वयणेण-जेण सालिच्छेत्तेसु करिज्जमाणेसु सवलवाहणो गंतूण केसरि
परिक्खलहत्ति, जं देवो आणेवइत्ति भणिऊण निग्गओ दूओ, कमेण पत्तो पयावइस्स भवणं, सक्कारिओ रण्णा, पुट्ठो
य आगमणपथोयणं, साहियं च तेण सीहरक्खणरूवं नरिंदसासणं, अबुवगयं च पयावइणा, सट्ठाने य पेसिऊण
दूयं एवं उवालद्धा कुमारो—

पुत्ता ! अकाल एव हि तुम्हेहिं पवोहिओ धुवं मच्चू । आसग्गीवनरिंदस्स धरिसिओ जमिह सो दूओ ॥ १ ॥

तेणेव अयंडे चिय दारुणरूवा इमा ममावडिया । आणा कंयंतविबभमंपंचाणवरखणाणुगया ॥ २ ॥

कुमारेहिं भणियं-ताय ! कहां मच्चू पवोहिओ ? , रत्ना भणियं-पुत्ता ! सुणेह, आसग्गीवनरिंदस्स सालिखेत्तस्स केसरी करिसगजणं विह्वेइ, सो य पइवरिसं वारोवारएण जहक्कमं सव्वनरिंदेहिं रक्खिज्जइ, संपयं पुण धरिसियदूखुविएण आसग्गीवेण अपत्थावेच्चिय अहं समाइट्ठोऽम्हि, ता एयं मच्चुए पडिवोहंति, तेसिं कहिऊण समाढत्तं पयाणयं, एत्थं-तरे विन्नत्तं कुमारेहिं-ताय ! अम्हे वचामो, रत्ना भणियं-पुत्तया ! बालया तुम्हे, न जाणह अज्जवि कज्जाकजं, ता विर-मह इमाओ अज्झवसायाओ, अहं सयमेव वचिस्सामि, तेहिं भणियं-सव्वहा मोक्कलह, गंतवमवस्समम्हेहिं, महंतमेयं कोऊहलं, केरिसो सो केसरित्ति ? , राइणा भणियं-अरे पुत्ता ! हरिणंकमंडलनिक्कलंके कुले समुप्पत्ती कुबेरसमइरेगो धण-संचओ अविगलं आणाईसरियं कलाकलावंमि विमलंमि विमलं कुसलत्तणं समत्थसुत्थत्थेसु पवीणआ नीसेसेसु पहरणेसु परमो परिस्समो य नीरूवमं वीरियं अप्पडिमा रूवलच्छी, एएसिमेगयरंपि उम्मग्गपवत्तणसमत्थं, किं पुण एगत्थ समवाओ ? , एयाणि य सव्वाणिवि तुम्ह संति, ता एएहिं हीरमाणाणं तुम्हाणं को पडिखलणकारी ? , जम्हा वद्धमच्छरा वेरिणो उस्सिखला खला अविभावणिज्जागमाओ आवयाओ अचंतं पमत्तचित्ता य तुम्हे, न जाणिज्जइ केरिसो विवागो हवइ ? , अओ सुयह गाढगहंति, तेहिं भणियं-ताय ! हवउ किंपि, निच्छयं गंतवमम्हेहिं, तओ निवारिज्जमाणावि चलिया कुमार पहाणराइणा समेया कइवयकरितुरयरहपरियणपरियरिया, पत्ता य तेसु सालिच्छे-

तेसु जत्थ सो केसरी निवसइ, पुढा य तेहिं करिसगा—अरे किह अन्ने राइणो पुर्विं सीहं रक्खियाइया ?, तेहिं भणियं—
कुमार ! पयंडगुडाडोवभासुरेहिं पवरकुंजरेहिं पवणाइरेगेवगसुंदरंगेहिं जच्चतुरंगेहिं उडुंगंडीवसेल्लभल्लिनारायकुंतपमु-
हपहरणहत्थेहिं सुहडसत्थेहिं विरइऊण तिउणपायारपरिक्खेवं अचंतमप्पमत्तचित्ता मरणमहाभयवेवंतसव्वसरीरा केस-
रिगुहासुहनिहियानिमेसनयणा रक्खंसु नराहिवा, तहा रक्खमाणाणवि पइक्खणं सीहनायवससमुच्छलंतपडिसद्दायन्न-
णेण अवगणियतिक्खंकुसपहारा करडितडपणट्ठमयजला विहडंति करिघडा गाढखलितखलिज्जमाणाइं विदिसो
दिसिं फट्ठंति तुरयघट्टाइं विमुक्कपोरिसाभिमाणाणि इट्ठदेवयमणुसरमाणाणि सब्बओ पलायंति पायक्काणि, कुमारणे
भणियं—अहो महापरक्कमो अहो अनन्नविष्फुरियं वीरियं अहो ओहामियसथलसुहडदप्पमाहप्पं अहो भुवणच्छ-
रियं चरियं तस्स केसरिणो जं तिरियमेत्तस्सवि एवं परिसंकिज्जइ, अरे केत्तियं पुण कालं एवंविहपरिकिलेसेण एस
पडिक्खलिज्जइ ?, तेहिं भणियं—कुमार ! जाव सयलंपि करिसणं ण सगिहे पविसइ, कुमारेण भणियं—भो करिसगा !
को वासारत्तडुविसहसीयवायाभिहओ नियसुहिसयणपमुहपहाणलोयरहिओ चिक्खल्लोलंमि मेइणितले मेहमालाउले
दिसिक्खलए अणवरयं निवडंतीसु दिसिक्खसुत्तामणिहारचिन्भमासु सुणीणंपि कयमयणवियारासु तंडवियसिंहडिमंड-
लीसु विरहिणीहियनिहित्तंगारासु वारिधारासु एत्तियं कालं पडिवालेहि ?, ता दंसेह तं पएसं जत्थ सो निवसइत्ति,
जं कुमारो आणावेइत्ति मणिऊण दूरट्ठिएहिं चैव कहिया सा केसरिगुहा, तओ पुणो पुच्छिया कुमारणे—अरे ! केत्तिओ

तस्स परिवारो ? तेहिं भणियं-कुमार ! नियसरीरमेत्तो, कुमारेण भणियं—जइ एवं ता
निरत्थयं धी धी वित्थरंति किं पत्थिवा विगयलज्जा । नियमुयवलावलेवं गिज्जंतं मागहजणेण ? ॥ १ ॥
बहुसुहडकोडिसंबुडहरिकरिसंमद्दलियमहिबट्ठा । असहायं केसरिणं जमिमे नं सरंति भयविहुरा ॥ २ ॥
एसो जयंमि धन्नो जणणी एयस्स चैव पुत्तमई । जस्स गलगल्लिएणवि गरुयावि सुयंति नियजीयं ॥ ३ ॥
जस्सऽनिवारियपसरं पोरिसमेवंविहं परिप्फुरइ । एगागिणोऽवि स कहं न लहइ पंचाणणपसिद्धिं ? ॥ ४ ॥
इय सुच्चिरं तं पसंसिऊण गरुयकोऊहलाऊरिज्जिमाणमाणसो नियत्तियसेसपरियरो रहवरारूढो चलिओ गुहा-
भिसुहं कुमारो, कमेण य स पत्तो गुहादेसं, एत्थंतरे दंसणकोउगेण मिलिओ बहुलोगो, ठिओ उभयपासंभु,
कओ महंतो कोलाहलो, अह कलयलायन्नजायनिद्दाविगमो जंभाविदारियरउद्वयणो परिमुत्तकुरंगरुहिरपाडु-
ग्गारदाढाकडप्पेण संझारुणससिकलं व विडंबमाणो पडिधुणियकडारकेसरो सदुब्भडकंधरो उविहिरमहल्लंगूलवेद्धि-
ताडियधरणितडारावबहिरियदियंतरो पढमपाउसमेहोव्व गजंतो उट्ठिओ केसरी, लीलाए मंदं मंदं कुमारहुत्तमव-
लोइउं पवत्तो य, तिविहूवि निरुवयंतो फलभरेण य सस्सं निसुणंतो केयाररक्खिगाजणससए करंतो तस्सालावं
पेच्छंतो काणणरम्मयं ताव गओ जाव निवडिओ चक्खुगोयरे स सारंगाहिवो, तं च दड्ढण चिंतियं कुमारेण—अहो
एस महाणुभावो महीए चरणेहिं परिसक्कइ, अहं पुण पवरतुरयसंपगहिं विचिच्चपहरणपडिहत्थं रणज्झणिसंकिंकिणी-

जालसंपरिखित्तं संदणं अघिरूढो, ता विसरिसं जुञ्झं, न जुच्चमेयं उत्तमाणंति भाविंतो कुवियकयंतजीहाकरालं
अयसिक्खुमुप्पगासं करवालं गहिऊण दाहिणकरेण वामेण य पडिपुण्णचंदमंडलविब्भमं फुरंतफारतारगाभिरामं फरगं
च ओयरिऊण रहाओ ठिओ भूमीए, ताहे पुणोऽवि चित्तेइ-एस वराओ वयणंतरनिगूढदाढाकरपेरंतकुंठकुडिलनह-
मेत्ताउहो अहं तु तिक्खगखगफलगहत्यो, एयमवि न जुत्तिजुत्तंति विभाविऊण खगं फलहगं च परिच्चयइ, एत्थं-
तरंमि दइण तारिसं वइससं तिविहुस्स उप्पन्नगाढकोवो सीहो चित्तेउमाढत्तो—

कह मत्तमहामायंगतुरयरहजोहवूहरयणेणं । रक्खिज्जंतोऽहमहो महायरेणं महीवइहिं ॥ १ ॥

कह मज्झ दंसणपहे कीणासस्स व न कोइ निवडंतो । सुट्ठवि पगिट्ठवलदप्पिओऽवि रणकम्मरसिओऽवि ? ॥ २ ॥

कह एण्ह दुद्धमुहो तत्थवि णवणीयकोमलसरीरो । तत्थविय तुरगकरिचरपक्कलपाइक्कपम्मुको ? ॥ ३ ॥

तत्थवि य अवन्नाए ओयरिऊणं रहाओ पवराओ । अडुवियडुं लीलाए भासमाणो महिमि ठिओ ॥ ४ ॥

तत्थेव य समुयवलावेलवमुक्कप्पहरणाडोवो । मसंगव मं गणंतो एसो पविसइ मम गुहाए ॥ ५ ॥

किं वा जीयंतहिं नो दीसइ किं सुणिज्जए नेव । जं एरिसावि दावेंति संपयं मज्झ अवमाणं ? ॥ ६ ॥

जइवि हुंऊंजरसिरदारणोचिया मज्झ कुडिलनहविसिहा । तहविहु इमस्स दंसेमि गाढुब्बियणसाहिफलं ॥ ७ ॥

इय चित्तिऊण गलगजियरेण फोडित्तोव वंमंडमंडोयरं, पुच्छच्छडाब्छोडणेण दलित्तोव मेइणीतलं, चिडंनिय-

वयणदाढामऊहनिवेहेण भरंतोव्व गयणंतरालं रत्तनयणपहासरेण अयंडनिवडंतविज्जुदंडुडामरं व करंतो दिसिच्चक-
वालं वेगागमणवसविसंडुलुलंतकेसरभारेण अंतरे अमायंतं व कोवनिवहं उगिरंतो सज्जियदीहरकमुछासवसवि-
सेसखामोयरत्तेण अंतरा तुट्टिऊणं व अगकाएण गसिउकामो एगहेलाए भुवणजणकवलणकए कयंतुव्व भासमाणो
झडत्ति पत्तो तिविड्डुमारस्स सुणालकोमलकरकमलगोरं, तओ तिविड्डुणा एगेण करेण हेट्टिछोदुपुडं अवरेणुत्तरोडं
अणायरेण गहिऊण जिणपडं व परिसडियपंडुपत्तं व भुज्जतरुत्तयं व दुहा तडयडत्ति फालिऊण परिमुक्कोत्ति, एत्थं-
तरे उक्किट्टसीहनाओ जयजयरवो य कओ लोएणं, अन्नं च—

गंधव्वजक्खरक्खसविजाहरकिन्नोहिं गयणंमि । विक्कमदंसणसंजायहरिसपफुछनयणेहिं ॥ १ ॥

पहयाइं पडहकाहलमुयंगंडुहिपमोक्खत्तूराइं । कओ य जयजयरवो अहो सुजुज्झंति भणिऊण ॥ २ ॥

तिथसंगणाहिं विथसियकुवलयदलदामदीहरच्छीहिं । सुका य कुसुमबुट्ठी दसद्धवन्ना भसलमुहला ॥ ३ ॥

मणिमउडकणयकुंडलकडिमुत्तयतुडियहारपमुहाइं । पवराभरणाइं लहुं सुरोहिं दिन्नाइं कुमरस्स ॥ ४ ॥

तथा—गिज्जंतुदामगुणं विविहविलासुछसंतगोवज्जणं । नचंततरुणिसत्थं जायं रणंपि सुपसत्थं ॥ ५ ॥

सो य सीहो तहा दुहाकओऽवि गरुयाभिमाणेण परव्वससरीरो फुरफुरंतो विंचितेइ—एवं नाम अहं निराउहेण
एगागिणा कुमारेमेत्तेण अजुज्झेणं लीलाए विणिहओ, अहो मम काउरिसत्तणं अहो असामत्थं अहो निस्सारसरी-

रत्तणं अहो दइवविपरमुहया, सन्वहा निरत्थयमुव्वढो सारंगरायसदो एत्तियं कालं, दुहु दुहु एरिसिजीविण्णंति, एवं च तस्स फुरुफुरायमाणस्स सुणियतदभिप्पाएण कुमारसारहिणा भणियं महुसरणेण—

भो भो लीलानिहलियमत्तमायंगपुंगवसमूह ! । सारंगराय ! निष्पडिमसत्तिवित्तासियविपक्ख ! ॥ १ ॥

अविलंघियसज्जियकमनियवलपरिभूयनरवइसहस्स ! । सधुरिस ! कीस एवं निरत्थयं अमरिसं वंहसि ? ॥ २ ॥

मा सुणसु जहा एएण बालरूवेण विणिहओऽहमिह । जं एसो नियकुलनहयलेक्कचंदो जणागंदो ॥ ३ ॥

वररायलक्खणधरो समंगवीरगणी गुणावासो । निहुरभुयदंडबलो तिविहुनामो वरकुमारो ॥ ४ ॥

भावी भरहद्धवसुंधराए सामित्तणेण परिकहिओ । पढमं चिय सुमिणयपाढएहिं किर वासुदेवोत्ति ॥ ५ ॥

तं मिगसीहो भदय ! एसो पुण नरसमूहसीहोत्ति । सीहे सीहेण हए का अपसिद्धी ? किमवमाणं ? ॥ ६ ॥

अह सो केसरी इमाणि सारहिचयणाणि महुमिव अमयंपिव सवणपुडएहिं सम्मं पाऊण उवसंतचित्तो मरिऊण नरो नेरइओ उववन्नो । सो य किर सारही एस काले भगवओ महावीरस्स पत्तित्थयत्तस्स पढमो गणहरो गोयमनामो भविस्सइ । तिविहुकुमारोऽचि तं सीहचम्मं गहाय पड्डिओ सनयराभिमुहं, गच्छंतेण य भणिया करि-सगा, जहा—रे इमं केसरिचम्मं गेणिहऊण समण्येज्जह घोडयगीवराइणो, भणेज्जह य तं जहा—वीसत्थो निब्भओ भुंजेसु सालिभोयणं, जायं संपइ अणावाहंति । पडिबन्नं च करिसगेहिं, तिविहुवि गओ सनयरंति, पयावइं पण-

मिऊण कहिओ सयलबुत्ततो, जाओ पुरे पमोओ। ते य करिसगा गया आसगीवसयासे, निवेइओ पयावइसुय-
विणासियसीहवइयरो, एवमायन्निऊण य खुभिओ मणंमि राया, चित्तिउमाढत्तो-अहो पडिपुन्नं नेमिन्तिगाइंठं संपइ-
संविहाणगदुगं, ता निच्छियं पयावइसुआओ मम भयं, किं पुण कायवं?, निवडइ इयाणिं जमरायस्स दंडो, विहडइ-
सुदढगुणरज्जुनिगडियावि रायलच्छी, विलोडंति दाणमाणवसीकयावि सेवगा, विवरंमुहे विहिंमि किं किं न वा-
होइ?, केवलं अज्जवि न मोत्तन्वा बुद्धिपुरिसयारा, जेण एएहिं भाविणोऽवि अणत्था उवहणिज्जंति गलियाओवि,
संपयाओ पुणरवि पाउब्भवंति, तम्हा न जुत्तमुवेक्खणं, जावज्जवि लहुओ वाही ताव चिगिच्छणिज्जो, नहि लहु-
ओत्ति जलणफुल्लिगो न डहइ केलासगिरिगरुयंवि दारुरासिं, न वा परिब्भविज्जमाणोवि दिट्ठिविसभुयंगपोयगो न-
विणासं पयच्छेज्जा, ता इमं पत्तकालं-ते पयावइसुए उवलोभपुच्चयमिह आणावेऊण विस्संभिऊण य दाणसम्माणा-
इहिं विणासाविज्जंति संपहारिऊण य तेसिं आणयणनिमित्तं वाहरिओ दूओ, भणिओ य-अरे पयावइ एवं भणि-
ज्जासि-नुमं हि असमत्थो सेवाए, ता सिग्घं कुमारे पेसेहि जेण तेसिं इयरा सामंतमुत्ती दिज्जइ, जइ पुण न पेसेसि-
ता जुज्झसज्जो होजाहिति, जं सामी आणावेइत्ति पडिवज्जिऊण निग्गओ नयराओ दूओ, कमेण य पत्तो पोयण-
पुरं, दिट्ठो राया, कयसक्कारो उवविट्ठो आसणे, पुच्छिओ य पयावइणा आगमणकारणं, तेण भणियं-राया आस-
ग्गीवो आणवेइ-नुमं जराज्जरियसरीरो अच्चंतं परिणयवओ आएसदाणाणुचिओ य ता पेसेसु नियसुए जेण ते

सहत्थेण पूएसि, वरकरितुरगनगरागामदानेण य-केरमि गरुयदेसाहिवे, एवमायन्निऊण चित्तिं पयाचइणा-अतु-
 लवल्लो आसग्गीवो दुराराहणिज्जो असमिक्खित्खदंढनिवाडणदुविसहो य, अदिट्ठपरमया यमम कुमार, त्रिसे-
 सेण तिविहुत्ति विभाविकुण भणिओऽणेण दूओ-भद्द ! कुमार न मुणंति सेवाविहिं न जाणंति वत्तव्विसेसं न लक्खंति
 उच्चियाणुच्चियं न खमंति नरिंदाएसमणुद्धिं, ता अहं सयमेव सबलवाहनो सामिसालं ओलगिस्सामि, तेण भणियं न-
 एस आएसो पभुस्स, किं वा तुज्झ इमिणा सुणीणं पि दुक्करेण सेवाधम्ममेण ? उवमुंजसु निरंतरमंते उरमज्झगओ जहि-
 च्छियं विसयसोक्खं, कुमारवि तत्थ गया सपहुपसाएण जइ पाउणंति रायलंछि ता किमिव अक्कळाणं तुह हवे-
 ज्जा ? जओ देवो आसग्गीवो सीहवइयरनिसामणेण परमंसंतुड्हियओ काराविउं इच्छइ महामंडेलोवभोगं आरोविउं
 समीहेइ समुच्चैपीलुखंधे काराविउं वंछइ पाणिगहंति, राइणा विचित्तिं—अहो एस दूओ इंदवारुणीफलंपि
 वाहिं रमणीयं अंबिभतरदुहविवागं उभयरूवं भासइ, ता सबहा दुहावहमेयं, सम्मं परियालोयणिज्जं, अइरहसकय-
 कज्जाइं पजंतदारुणाइं हवंतीति निच्छिऊण पेसिओ दूओ निययआवासे, ठिओ सयमेगंते, वाहराविया विसमत्थनि-
 ण्णयकरणत्तिक्खद्विणो मंतिणो, सुहासणासीणा य भणिआ—अहो आसग्गीवो मम एवमाणवेइ-कुमोरे सिग्धं
 पेसेहिति, ता साहेह किमिह करणिज्जं ? मंतीहिं भणियं—देव ! उद्दामपरक्कमो गूढमंतप्पयारो य आसग्गीवो, तुम्हे

पुण तस्सेव सेवगा अणवरयं आणानिद्दसवत्तिणो अप्पबला य, ता को तेण सह विरोहो?, ससत्तीए अणणुरूवकोव-
करणं हि निदाणं विणासस्स, राइणा भणियं-जइ एवं ता पेसिज्जंतु कुमारा, भंतीहिं भणियं-देव ! असंजायबला
सेवाविहिअणभिन्ना य कंहं पेसिज्जंति ?

अन्नं च-जइविहु अइविसमत्थप्पसाहणे होज्ज कहवि लच्छीवि । तहविहु भुयंगभीमे विलंमि न खिवेज्ज कोऽवि करं ॥ १ ॥

असुणियंगम्मागम्मप्पयारमविगलियकलुसदोसं च । नरवइचित्तं सलिलं व कुणइ निन्नेसु नूण रइं ॥ २ ॥

कप्पासकणिक्काणं व सा णो परकज्जसाहिगा सेवा । उभयत्थविणासणकारिणी उ सेवा नरिंदाणं ॥ ३ ॥

जह भणियविहाणपरंमुहाण पुरिसाण सिढिलचित्ताणं । दुस्साहियव्व विज्जा विणासमच्चिरा कुणइ सेवा ॥ ४ ॥

इय देव ! नत्थि कुमराण जोगया काऽवि साभिसेवाए । ता संठवेह दूयं सिणेहवग्गूहिं वग्गूहिं ॥ ५ ॥

इइ तुत्ते पयावइणा आहूओ नरिंददूओ, भणिओ य सामवयणेहिं, जहा—भइ ! गच्छ तुमं साहेसु आसग्गी-
वस्स, अणुचिया तुम्ह सेवाए कुमारा, पयावइं सयमेव ओलगिगहित्ति, दूएण भणियं—भो पयावइ ! किमेवं पित्त-
पलाविओ इव पुणरुत्तं वाहरसि ?, कुमारे पेसेसु, जुज्झसज्जो वा हवसु, एस देवस्स आएसोत्ति भणिऊण निग्गओ
दूओ, अंतरे य दुव्वयणायन्नणेण रुट्ठेण तिविहुणा कुमारेण निट्ठुरलट्ठिमुट्ठिप्पहारेहिं हणिऊण कंठे वेत्तूण य अवद्दरेण
निद्धाडिओ, पत्तो य कमेण आसग्गीवनरिंदमंदिरं, निवेइओ निस्सेसो पयावइवइयरो, तमायन्निऊण परिकुविओ

राया, खुभिया य सहा, कहं ?—

अणवरयविणिणितुहामेसेयविंदुब्भंडं मुहं सुहडो । परिमुसइ कोऽवि कोवुग्गमेण अहियं दुरालोयं ॥ १ ॥
नवकुवलयमालाविब्भमंमि निम्मलपहंमि करवाले । निवडइ य भमररिंछोलिसच्छहा कस्सविय दिट्ठी ॥ २ ॥
परपक्खक्खोभकरिं कोवसिहाडंवरण भयजणणिं । पच्चक्खं नियसत्तिं व कोऽवि सत्तिं करे धरइ ॥ ३ ॥
कस्सवि निडालवद्धं रेहुक्कडभिउडिभंगदुप्पेच्छं । खयसमयसमुग्गयराहुमंडलं सहइ गयणं व ॥ ४ ॥
केणावि कुलिसनिडुसुट्ठिपहारेण ताडिया धरणी । अविणीयधारणेणं कयावराहव कंपेइ ॥ ५ ॥
संभावियरणरसनिस्सरंतरोमंचपीवरकरस्स । चिरपरिहियाइं कस्सवि विहडंति य कणयकडयाइं ॥ ६ ॥
कोऽविडु मच्छरसंभारतरलियं वयणभासणसयणहं । कट्ठेण दसणदट्ठोदुसंपुडेणं खलइ जीहं ॥ ७ ॥
इय जाया कोवभरुल्लसंतदेहाण विविहकिरियाओ । संगमसंगमुक्कंठियाण सुहडाण तवेले ॥ ८ ॥
एत्थंतरे भणियं आसग्गीवेण—अरे उवेक्खियाणं दुरायाराणं एस चिय गई, को तस्स दोसो?, अन्नहा—

नियधूयापरिणयणावराहकालेऽवि जइ तमहं निगिण्हंतो ता किं एवं पसरं लहंतो, तहा-जो नियधूयं कामेइ सो नियसामिपि दुहइ किमजुत्तं? । किं वा एएण?, इयाणिंपि विणिवाएमि एयं महापाचकारिणं, ता रे ताडेह पत्थाणविजयढक्कं, पगुणीकरावेह कुंजरसाहणं, संजत्तावेह तुरयघट्टाइं, जोत्तावेह संदणगणं, वाहरावेह समंगं

नरवइवगंति, वयणांतरमेव कथं पगुणं सयलं किंकरजणेण, एतथंतरे गओ राया मज्जणधरं, परमविभू-
ईए कथं मज्जणं, नियंसियाइं कासकुसुमसुंदराइं अंबराइं, वद्धाइं केसेसु सुरहिक्कुसुमाइं, कओ सवंगिओ चंदणर-
सेणंगरागो, विहिओ पुरोहिण्ण असिवोवसमनिमित्तं संतिकम्मविही, खित्ता दोवक्खया सिरे, पइट्ठिओ पुरओ मंगल-
कलसो, दंसियं घयपुणभायणं, लिहिया अट्ठमंगलया, उवणीओ य आधोरेण सिंगारियसरीरो सिंदूरपूरारुणकुंभ-
तथलो गंडयलगलंतमयजलो वइरिदलणदुद्धरो जयकुंजरो, तंमि आरूढो आसग्गीवो, धरियं फारफेणपुंजुजलं नियप-
रिमंडलविजियपडिपुणणचंदमंडलं लवंतमुत्ताहलकलावावचूलयं सियायवत्तं, टिया य उभयपासेसु चामरगाहिणीओ,
वज्जियाइं दिसिक्कुंजरगलगज्जिगंभीराइं भंभासुगुंदमहलढक्कापमूहतुराइं, टिओ पत्थाणंमि पत्थिवोत्ति । एतथंतरे—

चलंतकणचामरा पयंडदप्पदुद्धरा, गलंतगंडमंडला तमालनीलसामला ।

अलंघणिज्जविक्कमा महागिरिंदविब्भमा, रणंतवद्धचंटया महागयाणुपट्टिया ॥ १ ॥

पलंबपुच्छंसोहिया असेससिक्खगाहिया, सुवेयतुट्टसामिणो समीरवेगगामिणो ।

विसिट्ठलक्खणंक्रिया परेण नो निरिक्खिया, दिणंदवाइविब्भमा पयट्टिया तुरंगमा ॥ २ ॥

विचित्तचित्तवंधुरा महाउहोहनिब्भरा, जओवलंभपच्चलारणंतकिंकिणीकुला ।

निलीणभूरसत्थया पगिट्ठकेउमत्थया, दुसज्जेवेरिमदणा पवाहिया पसंदणा ॥ ३ ॥

सरासिचक्कधारिणो विपक्खसूदारिणो, ससामिभत्तिमंतया अईव जुत्तिजुत्तया ।

जएक्कलामललसा अचिंतणिज्जसाहसा, सरीरवद्धकंकाडा पयट्ठिया महाभडा ॥ ४ ॥

अह लाडचोडमरहट्टकच्छकालिंगपमुहनरवइणो । आणामेत्तेणं चिय समुज्झियासेसनियकज्जा ॥ ५ ॥

सन्नद्धवद्धकवया बहुपहरणसालिणो जयपसिद्धा । आसग्गीवसयासं पत्ता सयलेणवि बलेणं ॥ ६ ॥

एवं च समगसंवाहगे जाए द्वावियं रणणा पयाणयं, चलिओ खंधावारी, गच्छंताणय सहसच्चियः समुच्छलियं खरसमीरणंदोलणेणं, निवडियं छत्तं भग्गो दंडो गयणंगणाओ फारफुल्लिगदारुणा पडिया उक्का, दिधसेच्चिय उल्लसिया तारया, जायं रुहिरवरिसं, निरब्भमि चैव अंबरे फुरिया सोयामणी, अविण्णायसरूवो तडत्ति विहडिओ जयकुंजरो, निन्निमित्तं चिय जलणजालाकलोवेण कवलियाइं जच्चतुरंगमुच्छाइं, परिगलिया सयमेव भग्गदंडा जयपडाया, जाया य पलीणमयजला हत्थिमंडली, अणवरयेणुवरिसदुरालोयं विच्छाइभूयं दिसाचक्कं, असुध्पवाहो सुक्को देवयापडिमाहिं, परोप्परं हसियाइं चित्तकम्मरूवाइं, उट्टमुहेहिं दीणस्सरं परुत्तं सारमेएहिं, एवमाईणि उध्पन्नाणि बहूणि असिवाइंति ।

तोहे असिवनिरिक्खणसंजायमहाभया कुसलमइणो । आसग्गीवणरिंदं भणन्ति विणओणया सच्चिवा ॥ १ ॥

देव ! हिमं व विलिज्जइ पयावमेत्तेण तुम्ह पडिवक्खो । किमकंडविट्ठुरकरो पारद्धो समरसंवाहो ? ॥ २ ॥

तुह तुरयखरुदुययपडलेणं पणट्टकरपसरो । सूरौवि अंतरिज्जइ को अन्नो जो परिध्फुरइ ? ॥ ३ ॥

ता सुयह विजयजतं नयराभिमुहं लहुं नियत्तेह । असिवोवसमनिमित्तं कीरंतु य होमजागाई ॥ ४ ॥
नहु एरिस असिवेहिं कोसल्लं किंपि देव ! पेच्छामो । पूरिजंति किमेवं सत्तूण सणोरहा धणियं ? ॥ ५ ॥
एवमांइन्निऊण भणियं रत्ता—भो भो किमेव वाउलत्तणं तुब्भे निन्निमित्तं पडिवन्ना ? किं न सुणह मम भुय-
दंडपरकमं ? न वा सुमरह चिरपभूयसमरसम्मद्विद्वियपडिवक्खसंपत्तविजयं ? न वा पेच्छह अपरिकलियसंखं भरिय-
निण्णुन्नयमहिविभागं महोदहिसलिलं पि व चाउद्विसिं पसरियं चाउरंगं बलं ? किमिव अट्टाणे च्चिय भायह, किं वा
सनयराभिमुहं मं नियत्तावेह ? न हि पारद्धवत्थुपरिचाइणो सलहिजंति पुरिसा, न य तहाविहसंदिद्धकइवयअमं-
गलमेत्तेणवि खुब्भंति वीरा, जओ—

गहगणचरियं सुमिणाण दंसणं देवयाण माहण्यं । सुणखररसियप्पमुहा सउणा य तहा जणपसिद्धा ॥ १ ॥
उक्कानिचंडणरुहिराइवरिसपमुहाइं दुन्निमित्ताइं । सवाइं घुणक्खरसंनिभाइं को तेसि भाएज्जा ? ॥ २ ॥
ता धीरा होह, निवाडेमि नीसेसदुन्निमित्तसत्थं मत्थए पयावइस्स, इति भणिऊण विमुमरियनिमित्तिगवयणो
अवस्संभवियव्वयाए विणासस्स पडिक्कूल्याए देवविलिसियस्स वारिज्जमाणोऽवि पुराणपुरिसेहिं पडिखल्लिजमाणोऽवि
कुसउणेहिं सोवरोहं नियत्तिजमाणोऽवि अंतेउरजणेण छत्तभंगं सुणाविज्जमाणोऽवि निमित्तपाढगेहिं सयलवलसमेओ
गंतुं पयट्ठो, कमेण य पत्तो सदेससीमासंवत्तिणं रहावत्तपव्वयेदंसं, तहिं च खंधावारनिवेसं कारावेऊण वाहराविओ

दूओ, भणिओ य-अरे गच्छसु पयावइस्स सगासे, भणसु य तं-एस आगओ आसग्गीवो राया जुञ्जसज्जो वट्टइ, सिग्गं संमुहो एहि, कुमारपेसणेण संमाणं वा करेहि, मा अकालेच्चिय कुलक्खयं जणेसुत्ति, जं देवो आणवेइत्ति पडिञ्छिऊण से सासणं नीहरिओ दूओ, कमेण य गओ पयावइस्स मूलं, कहिओ णरिंदाएसो, रुद्धो तिविट्ठुमारो, भणिउमाढत्तो य—

रे दूय ! तुमभवज्झो निब्भयचित्तो ममोवरोहेण । घोडयगीवं गंतुं फुडक्खरं भणसु वयणमिमं ॥ १ ॥

मा होहिसि विगयभओ बहुपरिवारोत्ति चित्तिउं अचिरा । सीहोव मइसिलिंवं एस तिविट्ठु तुमं हणिही ॥ २ ॥

अज्जवि पयावइनिवो नियनामत्थं फुडं सुमरमाणो । रक्खइ तं जइ परिहरसि निट्ठुरत्तं वहसि पणयं ॥ ३ ॥

अहउभिणिविट्ठमईणं सुट्ठु भणियंपि दोसमावहइ । ता किं निरत्थएणं सिक्खादाणेण एएण ? ॥ ४ ॥

दूएण तओ भणियं अज्जवि दुस्सिक्खिया दढं तुम्हे । न मुणह देवस्स बलं तेणेवमसंकमुल्लवह ॥ ५ ॥

अह पयावइणा भणियं-भह ! वच्च नियनरिंदसगासं, साहेसु य जहा-एस आगओ पयावइत्ति, एवमाइन्निऊण निग्गओ दूओ, राइणावि काराविओ सेन्नसंवाहो, तओ पक्खरिज्जंतदण्णियवग्गतुरंगं गुडिज्जंतगयघडं समरपरि-हत्थुच्छहतफारफारक्कचकं चंडगंडीवगुणज्झणकारमुहलुच्छंतधणुद्धरं रहारुद्धपवरवीरं नाणाउहहतथसमुत्थरंतसुहड-सत्थं चलियं चाउरंगं बलं, तेण य परिवुडो पयंडगुडाडोयमासुरकुंजरकंधराधिरुद्धो नीहरिओ पुराओ पयावइ, एत्थं-

तरे नीलचलंतमंहततालज्झयाणुसारमिलियसामंतपरिगएण पवलनीलीनीलयदुल्लनियंसणेण कण्यलफुरंतहलमुसल-
पहरणेण संगामसंगमुक्कंखिरेण अयलकुमारेण अणुगममाणमगो आमलगथूलमुत्ताहलहारेण गयणाभोगोव नहसुरस-
रिपवाहेण सोहंतवियडवच्छत्थलो तरुणतरणिकिरणसन्निगससिचयजुयलेण बडवानलजालालाकलावेण जलरासिच्च
रेहंतदेहो सवणकयकणयकुंडलकंतिपसरेण तक्कालसंगमसूयरायसिरिसरागंतिसिच्छिच्छिविच्छोहेहिं व भासमाणवयणो
पुरो पइट्टियरणलट्टिनिविट्ठकणयकविलगरुलकंतिपडलच्छलेण कोवं व उरिगरंतो तिविट्ठुकमारो, सिग्धं गंतूण मि-
ल्लिओ पयावइनरिंदस्स, भणिडमाढत्तो य-ताय ! नियत्तह तुम्हे, देह ममाएसं, कित्तियमेत्तो एसो बोडयगीवो ?
अवणेमि तुम्ह पसाएण एयस्स धिट्ठसोंडीरयं, न य बहुसहाओत्ति संकणिज्जं, जओ भोयणमेत्तसहायिणो इमे,
परमत्थेण एगागी चेव एसो, रायणा भणियं-पुत्त ! लीलाविहाडियसमुक्कडेसरिकिसोरस्स अविगणियपडिवक्ख-
लक्खस्स किं असज्झं तुह परक्कमस्स ? केवलं दूरट्टिया कोऊहलेपेच्छणा एत्थ अम्हे, कुमारेण दुत्तं-एवं होउ,
अहं विसिट्ठसउणोवलंभवहुंतपरितोसाणं अणवरयपयाणेहिं वच्चंताणं तेसिं तस्स रहावत्तपन्वयस्स समीवे संप-
त्ताणं अवरोप्परासन्नदंसणवसेण जाए हलबोले परिकप्पियपक्खरगुंडाडोवाइं उट्टियाइं तुरङ्गहत्थिसाहणाइं उद्धुयध-
याचिंधाइं, संपलगगाइं उभयबलाइं, तओ-ताडियसरत्तूरतुट्ठजणं भयत्तरहरंतकायरगणं, उद्दामबंदिसहपढणुच्छंहतसु-
हडं वरधूलिधूसरियरहधयवडं ॥ १ ॥ खरखुरुप्पकप्परियतुरयपक्खरियनियतुरयघट्टलोद्दावियकुंतयरं । आसवारकर-

कखयतिकखकरवालविदारियसूरसिरं गुंडियगुरुकरडिघडफोडियतुरयघट्टं अन्नोन्नमिलणजायनिविडसंघट्टं ॥ २ ॥
 सरलसेल्लकल्लोलकीलिज्जंतकुंभपलायंतगयं सुन्नपुन्नहिंडंतचंडचंडुलहयं । तिसूलमल्लिसेल्लभिन्नवेल्लंतनरं, उत्तालनिवडियल्ल-
 त्तल्लत्तधरं ॥ ३ ॥ दंतिदंतसंघट्टपट्टानलकणं, उद्धवाहुनचंतकवंधपवन्धघणं । विप्फुरंतकुंतगघायधुम्मियरहियं, सारि-
 मज्झजुज्झंतजोहघायदुविसहं ॥ ४ ॥ कुंभिकुंभघायसमुल्ललियरुहिरप्पवहं भूमिवट्टनिचेट्टपडियसमुत्तुंगमायंगरुद्धपहं ।
 महल्लल्लभल्लभल्लुंकमुक्केफकारभीसणं, संगामरसियसुहडलोयतोसणं ॥ ५ ॥ काऊण(दंडपडण)विचित्तसमरवावारं ॥
 धाणुकडुकधाणुकयाहं, फारकियभडफारकियाहं । कुंतयरभिडियसमवगियाहं, खगगाउहउक्खयखगियाहं ॥ १ ॥
 पडिखलियतुरंगतुरंगमेहिं, मेल्लंतसेल्लभडुगमेहिं । मयगलगिलंतमयगिणगंड, अब्भिट्टपरोप्परवद्धसुंड ॥ २ ॥

पाउब्भवंतअइघोरोस खणि खणि विसुक्कभीसणनिघोस ।
 चाउद्विसि सुहड समोत्थरेवि पहरंति समरि नियपाण देवि ॥ ३ ॥
 नाणाउहहत्थनरिंदवग्ग अवरोप्परजुज्झित्तसंपलग ।
 गयजीविय निवडहिं दंडनाह, पवहंतरुहिरपहजुय अगाह ॥ ४ ॥
 सेसारुणच्छुरणवद्धकच्छु, मह दंसह आसग्गीवु हत्थु ।
 इय जंपिर रिउ पडिसत्तुराओ, एत्थंतरि पडिपहरंतु आउ ॥ ५ ॥
 तो वंगकलिंगनगराहिवेहिं, जुगवं चिय सुक्कमहाउहेहिं ।

पडिखलियउ पयावइ जुज्झमाणु, साहुव जाओ परिचंचुमाणु ॥ ६ ॥
आसग्गीवह सेनेण अइवहुसंखेण हरिकरिसंदणदुद्धरेण ।
निम्माहिय परक्कसु पहणिय उज्जसु कयउ पयावइ तक्खणेण ॥ ७ ॥
मुणिवि तं निज्जियं जायकोवुग्गमो, भिउडिभीमाणो पायडो नं जमो ।
अयलु पयलंतहलसुसलदिवाउहो, सिग्घवेगेण सत्तूण ठिओ संसुहो ॥ ८ ॥
तयणु चिरलद्धजयवायगवुद्धुरा, ते नरिंदा समुवूढदढमच्छरा ।
सेल्लनारायसरनिरयमेलंतया, अयलपासंमि वचंति वग्गंतया ॥ ९ ॥
हरिसभरतडयडुट्टुकंकडगुणो, सोयते पेच्छिउं वाढमबुभियमणो ।
जंपए रे लडुं चयह चक्खुप्पहं, कीस वचह विणा कारणं जमगिहं ? ॥ १० ॥
किं न भो नियह मह लंगलं सियसिंहं, कुवियकीणासजीवं व अइदुस्सहं ।
वइरिवच्छत्थलीविलिहणुडामरं, जस्स कंतीहिं अरुणिज्जए अंवरं ॥ ११ ॥
किं न वा सुसलमलिवलयकसिणप्पहं, धरणिमणिसारपरमाणुनिम्मियसुहं ।
जयह तुब्भे जमेवं रणे उज्जया, तेहि वुत्तं अरे तुज्झ का चंगया ? ॥ १२ ॥

जेण दीसंति तुह सन्निहा हालिया, धरइ लीलाएँ मुसलंपि किल महिलिया ।
 एवमुल्लाविरं वइरिसत्थं बलो, सरइ वेगेण करकलियसियलंगलो ॥ १३ ॥
 केऽवि सुट्टिप्पहारेण ताडइ भंडे, अवरि मुसलेण चूरइ सहाबुब्भडे ।
 हलसिहग्गेण केसिंपि उरु दारए, अन्नि चलणप्पहारेण मुसुमूरए ॥ १४ ॥
 एकधाएण पाडइ महाकुंजरे, तणयपूलं व गयणे खिवइ रहवरे ।
 सुयइ करुणाय परिचत्तसयलाउहे, ठाइ निग्गयपयावोऽवि नो से मुहे ॥ १५ ॥
 इय निट्टुरगत्तेण निरुवमसत्तेण निट्टुरेण बलदेवेण बलु वलु विरियहं ।
 तक्खणि विद्धंसिओ भडमउ नासिउ सयलदिसामुह पसरियहं ॥ १६ ॥

एवं चिय पइदिवसं दोण्हवि सेन्नाण जुञ्झमाणानं । विविहप्पयारभीमं एयं जायं समरठानं ॥ १७ ॥
 एगत्थ पडियनरवइपियंगणाकरुणरुन्नरवभीमं । अन्नत्थ बंदितज्जणसवंडमुहचलियपडिसुहंडं ॥ १८ ॥
 एगत्थ दंतिदसणगग्गिन्नसूरासिलेहहयरहिंयं । अणत्थ भीयकायरनियमुहखित्तंगुलीवलंयं ॥ १९ ॥
 एगत्तो ऊसियकरमाहूयऽण्णोण्णवीरवरपुरिसं, अवत्थोमिंठविणट्ठमिंठपरिभमिग्गयनिवहं ॥ २० ॥
 एगत्थुत्तालिमिलंतघोरवेयालविहिंयहलबोलं, अन्नत्थ सिवागणखज्जमाणगयजीवनरनिवहं ॥ २१ ॥

एंगत्तो दंसणत्तिक्खचक्खिज्जंतमहिगयजणोहं, अन्नत्तो भडतोसियमागहगिज्जंतवरचरियं ॥ २२ ॥
इय विहियविविहभीसणकिरिएहिं उभयसेन्नसुहडेहिं । समरंगणं सुराणवि जायं अचंतभयजणगं ॥ २३ ॥
किं च—रणट्टाणनिवडियकणणीसीसकरचरणजंधतणुखंडं । विहिणो घरं व नज्जइ जयजणघडणुजयमइस्स ॥ २४ ॥
एवं च बहूइं वासराइं महासम्महेण निवाडियणेगसुहत्थिसु तिव्खनारायनिब्बिन्नकुंभिकुंभत्थलेसु, तुरियचारु-
तुंगसिंगरहवरेसु सुसुमूरियनरवइसहस्सेसु जायंतेसु आओहणेसु पेच्छिऊण बहुजणक्खयं तिविहुणा भणाविओ
दूयवयेणेण आसग्गीवो, जहा—किमणेण निरत्थएणं निहोसपरियणक्खएणं?, तुमं च अहं च परोप्परवद्धेवरा, ता
अंगीकरेह नियमुयवलं, सम्मं ठवेहि चित्तावट्टुभं विमुंच कायरत्तं परिचय परपुरिसायारं दावेहि सहत्थकोसलं मेछेहि
सरीरसोकुमलं पणुणो भवाहि असहाओ मए एगागिणा सह जुज्झिउंति, सम्ममवधारिऊण गओ दूओ, निवेइओ
आसग्गीवस्स कुमारसेदेसगो, पडिवन्नो य राइणा, जाए बीयदिवसे विचित्तपहरणपडिहत्थं जोत्तियपवरतुरयं
सारहिमेत्तपरियत्तपरियरं संदणमारुहिऊण ओइण्णा रणभूमीए आसग्गीवतिविहुणो, ठियाइं उभयपासेसु सपहुपरक्क-
सावलोयणकोऊहलाइं दोन्निवि बलाइं, रुंदखंदचंडिकोहंडिपसुहदेवउवजाइयसयदाणपरायणाइं निलीणाइं उच्चपएसेसु
अंतेउराइं, पेक्खणुक्कंखिरा य गयणंगणमोगाढा सुरकिंनरकिंपुरिसविज्जाहारा, लंवंतमुक्कजडाडोवो पाणिपरिगहिय-
छत्तगो संगामदंसणुन्वूढगाढहरिसो पइक्खणअट्टहासे सुयमाणो देवसमूहं च सोवओगं कुणमाणो विर्यंभओ अंतरे

नारयमुणी । एतथंतरे आसग्गीवेण भणिओ तिविट्ठु—

गिरिगुहनिवाससि(खि)न्ने रोगजराज्जंगए सीहे । निहए करुणाठाणे अहो तुमं वलमयं वहसि ॥ १ ॥

किमहं तं न समत्थो विणासिउं पढममेव लीलाए । किं तु मयमारणे अवयसो सिया तेण नो हणिओ ॥ २ ॥

जइ कहवि दुद्धवणोत्ति कलियनो सिक्खविंति तं कुसला । किं एत्तिएणऽवि मुहा पंमुहो सुंदर ! नयस्स ॥ ३ ॥

सच्चं चिय न कयंतो कुद्धो विद्वइ करचवेडाए । किं तु दुलुद्धी दाउं परस्स हत्थेण मोरइ ॥ ४ ॥

जं चिय किंचि परूढं बाहुवलं तुज्झ नरजणब्भहियं । पक्खुब्भेओव पिवीलियाण तंपि डु वहट्ठाए ॥ ५ ॥

थेरस्स पयावइपत्थिवस्स पुत्तच्छलेण तं भइ ! । नूनं विणासपिसुणो समुग्गओ धूमकेउव ॥ ६ ॥

ताहे तिविट्ठुणा सो भणिओ बुहुत्तणस्स तुह पढमो । पाओ पाउब्भूओ दुव्वयणुल्लावरूवो किं ? ॥ ७ ॥

किं वा सन्निहियकयंतसंगसंजायनिट्ठुरसहावो । निम्मेरं थेर ! समुल्लवेसि वन्नसि समाहप्पं ॥ १ ॥

रणकसवट्ठयनिवडियपवरसोडीरिमासुवणस्स । अत्तुक्करिसो सोहइ नरस्स वन्निज्जमाणोऽवि ॥ ९ ॥

ता संघरेसु वयणं खणमेक्कं अंतरे परिभमंतु । तुज्झ महच्चिय वाणाऽरिपक्खमहणा महावेगा ॥ १० ॥

आसग्गीवेण पुणो भणिओ डिंभोत्ति मज्झ नो घायं । दाउं खमंति हत्था तोहे पहरसु तुमं पढमं ॥ ११ ॥

तिविट्ठुणा भणियं—भो घोडयग्गीव ! पुरा मम तायस्स तुमं सामिसइमुच्चहंतो ता तयणुवित्तीए चेव अणइक्कम-

णिज्वयणीऽसि अओ अवहिओ होहि एसा निवडइ कंयतदिट्ठिच्च दुव्विसहा विसिहंपरंपरत्ति भणिऊण आयन्नमा-
कट्ठिय कोयंडं रणज्झणाविद्या पंडचा, सुक्का सलोहा मम्मावेहिगा खलालिच्च निट्ठुरा सरधोरणी, तओ आसग्गीवेण
धणुवेयकुसल्याए अद्धमग्गमपत्तेच्चिय खंडिया तिवखलुरुणेहि, पुणरवि कुमारेण भिच्चोच्च सपक्खो निरेवेक्खगामी
खित्तो नारायनिवहो, सोऽवि निष्पुण्णजणमणोरहोच्च पडिखलिओ आसग्गीवेण, किं बहुणा?—

जं जं सत्थं किंपिवि खिवइ नरिंदस्स संसुहं कुमरो । तं तं आसग्गीवो दक्खत्तणओ पडिक्खलइ ॥ १ ॥

आसग्गीवोऽवि पयंडकोवओ सुयइ पहरणं जमिह । वेज्जोच्च रोगजायं कुमरोऽवि तयं पडिहणेइ ॥ २ ॥

अह भरहवाडुबलिणोच्च गाढममरिसभरेण पहरंता । खयसमए राहुसणिच्छरच्च रेहंति ते दोऽवि ॥ ३ ॥

एवं परोप्परं जुज्झिराण तेसिं पणिट्ठदप्पाणं । सचराचरावि धरणी धरहरिया पयभरंक्ता ॥ ४ ॥

एत्थंतरंमि अणवरयखिवणओ पहरणुच्चओ सब्बो । आसग्गीवनरिंदस्स निट्ठिओ सुकयरासिच्च ॥ ५ ॥

तोहो किंकायव्वयवाउलचित्तेण खेयविट्ठुरेण । अविभगपसररिउदप्पदंसणुवूढकोवेणं ॥ ६ ॥

आवयधणं व दढपणयचित्तमित्तं व पियकलत्तं व । विसमावडिण्णं नरवरेण संसुमरियं चक्कं ॥ ७ ॥

अह जलणुव्वभडपसरंतकिरणमालासहसपल्लवियं । जुगविगसुग्गयमायंडचंडमंडलयट्ठुपेच्छं ॥ ८ ॥

रुद्धजमारुणनयणं व मिलियनीसेसविज्जुपडलं व । आसग्गीवस्स झडत्ति चक्करयणं करे चडियं ॥ ९ ॥

तयणंतरं च पहरिसतडत्तिटुदंतवम्मबंधेण । तेण विमुक्कं वहणट्टयाए सिग्घं तिविहुस्स ॥ १० ॥

गंतुं कवाडवियेडे वच्छयेले तं जवेण कुमरस्स । चिरदंसणुस्सुयं वल्लहं व तुंवेण संलग्गं ॥ ११ ॥

एत्थंतरंमि दढचक्कतुंवसंघट्टघायवियलंगो । सुच्छानिम्मिलियच्छो पडिओ धरणीयले कुमरो ॥ १२ ॥

आसंगीववलेणं ताहे संपन्नवहुपमोएणं । जयजयसहुम्मिस्सो पकओ कोलाहलो सहसा ॥ १३ ॥

तथा-जाव य उग्गीरियिविविहपहरणा नावडति सत्तुभडा । ताव तिविहुकुमारेण तक्खणं विगयमुच्छेणं ॥ १४ ॥

भो घोडयगीव ! गओऽसि नासमहुणत्ति संलवतेणं । तं चिय तस्साभिमुहं मुक्कं चक्कं झलहलंतं ॥ १५ ॥

तो तं तालफलंपिव तडत्ति छेत्तूण तिकखधाराए । आसगगीवस्स सिरं करे ठियं पुण तिविहुस्स ॥ १६ ॥

अह निहर्यमि आसगगीवे हरिसवसविसप्पमाणसमुच्चरोमंचेहिं सहसच्चिय जयजयवं करंतेहिं सुरासुरेहिं सरसपा-
रियायतरुमंजरीनियरसंवलिया सोरभभरंगंधलुद्धमिलंतभसलजालुमुहला अणवरयविणिंतामंदमयरंदविंदुसंदोहविच्छु-
रियसयलदिसा कमलकुवलयमालइपमुहा मुक्का पंचवन्नकुसुमबुद्धी, उग्घोसियं च महया सदेणं जहा—भो भो पत्थिवा !
परिचयह कोवकंडुं मुयह दुव्वहदुव्विणयपणयं परिहरह आसगगीवपक्खवायं उज्झह असंज्झावारं पणमह सवायरेण
तिविहुं, एसो खु एत्थ भरहखेत्ते समग्गवलंतपुरिसप्पहाणो पुव्वभवसमुवज्जियसुकयसंभारवसविसप्पमाणमहल्लक-
ल्लाणनिहाणो उप्पन्नो पढमो वासुदेवोत्ति । एवं च आयत्तिऊण संभंतविलोयणेहिं दूरपरिसुक्कपहरणपवंधेहिं अहमंह-

मिगाए पडिक्खलंतमणिकिरीडकोडिमसिणियकमनहनिवहेहिं भालयलघडियकरसंपुडेहिं पंचंगपणिवायपुरस्सरं-
पणमिओ पत्थिवसहस्सेहिं तिविडू । चिन्नत्तो य—

देव ! परायत्तेहिं जुत्ताजुत्तं अयाणमाणेहिं । अम्हेहिं जमवरद्धं तमियाणि खमह नीसेसं ॥ १ ॥
कुणह पसायं नियचरणनलिणसेवापयाणओ अम्हं । मोत्तूण तुमं एक्कं अन्नो नो विज्जे नाहो ? ॥ २ ॥

एयमायन्निऊण तिविट्ठणा भणियं—भो भो नरेसरा ! किमेवं जंपह ? को तुम्ह दोसो ? परायत्तचित्ताणं एस-
च्चिय गई, ता सुयह पडिभयं, पसंतडिबडमराइं भुंजह नियनियरज्जाइं, मम छत्तच्छायापरिगहियाण पुरंदरोऽवि न
पह्वेइ तुम्हाणंति । एत्थंतरे तिविट्ठुसेवोवगयनरवइवगगवलोयणसंपन्नासग्गीवविणासनिच्छयं समागयं तं पएसमं-
तेउरं, दिट्ठो छिन्नगलनाडिनिस्सरंतरुहिरंपकविलुत्तगतो रत्तचंदणकयंगराओव्व उवरि परिब्भमंतपि सियासिपक्खि-
नवारियरविकरपसरो धरियमहप्पमाणच्छत्तोवमंव सन्निहिनिवडियपहाणपुरिसवगो अत्थाणगओव आ सग्गीवनरिंदो ।
अह अदिट्ठपुण्वं अचंततिकखदुक्खावहं तारिसमवत्थंतरं से पासिऊण अक्कंदिउमारद्धमेवमंतेउरं—

हा हा कयंत ! निक्करुण ! किं तए पाव एवमायरियं ? । जं एवंविहपुहइपहूऽवि एसो हयास हओ ॥ १ ॥
किं एत्तियाहिं निहयाहिं तुज्झ तित्ती न सुहडकोडीहिं । उप्पन्ना निप्पुन्नय ! जमेस रायावि संहरिओ ॥ २ ॥
हे चक्क ! निक्खिब ! कहां सपहुविणासाजसो तए विहिओ ? । तुब्भेहिऽवि किं जक्खा ! उवेक्खियं निग्घिणा एयं ? ॥ ३ ॥

हे काल ! बद्धचरवंसजाय तुज्झवि गुणेण किं तेण ? । हा हा रक्खामणिणो वीसत्थविणासगा तुब्भे ॥ ४ ॥
 धी धी पुरोहियाहम ! चिरकालं तप्पियं तए जलणं । निछज्ज ! कहसु संपइ असिवं किं जं पडिक्खलियं ? ॥ ५ ॥
 हे अंगरक्खवग्गा ! तुब्भेऽविडु कीस संपइ पलाणा ? । हा हा एगपए चिय सव्वंपि परंमुहं जायं ॥ ६ ॥
 हा पाणनाह ! संपइ पडिहयपडिक्खलसुहलक्खंमि । तुमए सग्गोवगए तडक्किही कस्स जयढक्का ? ॥ ७ ॥
 हा रायलच्छि ! वेहव्वदूसिए कीस जीवसि इयाणिं ? । इहराणुहवसि दुक्खं दूमिज्जंती कुनाहेहिं ॥ ८ ॥
 इय विलविरीहिं निहयताडियथणवट्टुट्टहाराहिं । वेहव्वदुक्खभरभज्जिरीहिं पलहत्थवलयाहिं ॥ ९ ॥
 अणवरयघोरगलियंसुवाहं रुन्नं तहा मयच्छीहिं । जह तदेसगएणं रुन्नं पक्खीणवि गणेणं ॥ १० ॥
 तोहेऽणुजीविणा परियणेण पम्मक्कपोक्करुत्तेण । आसग्गीवसरीरं खित्तं जालाउले जलणे ॥ ११ ॥
 एत्थंतरे अंतोउरीजणवेहव्वदुक्खमसहमाणोन्व पयंडरणकम्मदंसणभयभीओन्व तिकखासिखंडियहयंरुंडावलोयणु-
 तट्टरहत्तुरंगोन्व समीरणुद्धुररुहिरसीयरासारसंसित्तोन्व आलोहियमंडलो झडत्ति चक्खुगोयमइकंतो सहस्स-
 किरणो, गवल्लुलियालिवलयकज्जलतिमिरपडलपडकयावंगुठणा फुरंततारनयणा अणवरयनिवडंतउक्काफुलि-
 गुग्गारच्छेलेण मणोइरित्तपरिपीयसुहडजणरुहिरंगडूसं व सुयंती महारक्खसिच्च भयजणणी पसरिया रयणी, ठिओ
 नियनियट्ठाणेसु जणो, कमेण य जाए पहायसमए भणिया तिविडुणा नियपुरिसा—भो भो गच्छह संगमभूमिं,

निरुवेह पहारपरन्वसे जोहनिवहे करेह ओसहघायवंधाइणा परित्ताणं परिमग्गह दुट्टुरंगमपहत्थिए पत्थिवेत्ति-
सम्मं निउजिऊण(अंतरेण)समं समगगरवइवगपरियरिओ समेओ पोयणपुरं, तओ नयरलोएण कयं वेजयंती,
सहस्साभिरामं ठाणठाणनिवद्धमंचारूढविलासिणीनट्टरमणिज्जं पमुक्कसुरभिपुष्पकुंजोवयारकलियरायमग्गं पहयपडु-
पडहपमुहजयतूरनियरं नयरं पविट्ठो महया विभूइए तिविट्ठू, जहोचियठाणेषु ठिओ सेसो परिवारो । तओ कइवय
वासराइं तत्थ ठाऊण पुणोऽवि समग्गवलकलिओ चक्कच्छत्तधणुमणिमालागयासंखरयणपरिगओ निग्गओ दिसि-
विजयनिमित्तं तिविट्ठू, कमेण पसाहियं भारहद्धत्तं, अपणयपुव्वा नामिया पत्थिवा, गाहिया सेवावित्तिं, गहियाइं
तेहिंतो करितुरयरयणपमुहाइं पहाणपाहुडाइं, एवं च नीसेसमंडलाहिवसहस्साणुगम्ममाणमग्गो पेच्छंतो अपुव्वा-
पुव्वनयराइं ठाविंतो अंगवंगकलिंगाइसु अन्नन्नरिंदे पत्तो मगहाविसए, तहिं च दिट्ठा कोडिपुरिसवोज्झा महा-
सिला, सा य मुयवलावलेवओ लीलाए वाममुयदंडेण उक्खिविऊण छत्तगं व धरिया सीसोवरिं, अतुलियवलावलोय-
णहरिसुप्फुल्लोयणेहिं य कओ नरवइहिं जयजयारवो, पढियं च मागहगणेहिं, कंहं?—

देव ! मणालागारो तुज्झ करो कलियरुंदकोडिसिलो । सिरिघरियघरणिवट्टस्स व्हइ सेसस्स समंसीसिं ॥ १ ॥
तुह एवंविहलीलाइएण चित्तं न कंपए कस्स । जइ सव्वहावि पत्थरविणिम्मिओ होज्ज सो न जणो ? ॥ २ ॥
इय मागेहेहिं पेगप्पयारवयणेहिं संथुणिज्जंतो । मौत्तूणं कोडिसिलं चलिओ राया सपुरहुत्तं ॥ ३ ॥

गच्छन्तो य पत्तो दंडगारन्नपरिसरं, तर्हि च खंधावारनिवेशं
 मज्झनिम्भरपसुत्ते सेवगजणे अणुरत्तविरत्तपरिवारचारसुवलंभिउं करकलियचक्रो कयवेसपरियत्तो अणुवलक्खिखल्लमाणो
 जामकंरिघडारुढेहिं अंगरक्खेहिं नीहरिओ एगागी वासुदेवो निययगुड्डराओ, अमुणियपयप्पयारो य इओ तओ
 परिन्भमंतो जाव खंधावारनिवेशमइक्खमिऊण गच्छइ ताव निसामेइ थेवदेसंतरियं मंदं मंदं कोलाहलं, तं
 च निसामिऊणुप्पन्नकोऊहलो पधाविओ तयभिमुहं, कमेण पत्तो एगं बहलतरुवरसंछन्नं काणणं, तर्हि च पत्तस्स
 उवसंतो सो कोलाहलो, तओ किं विभीसिया एसा ? मइविन्भमो वा ममेत्ति जाव चित्तइ ताव काणणभंभतरओ
 ससुट्ठिओ सदुक्खनरधणियसदो, तदणुमाणेण य पुणो पट्ठिओ तिविद्धु, अह वच्छत्थलविप्फुरंतकोत्थुभमणिमऊढवि-
 ङ्खंसियंधयारे जाए तत्थ पएसे थेवंतरगएण हरिणा दिट्ठो रुक्खेण समं विविहबंधणबद्धो पुरिसो, (पुच्छिओ सो
 उच्चियार्येण) भो को तुमं ? केण वा इममवत्थंतरं पाविओसिस्ति ? तेण जंपियं-महाणुभाग ! निविडबंधणत्तणओ
 न सक्कमि परिकहिउं, ता अवणेहि बंधे जेण साहेमिस्ति कहिए तिविट्ठुणा चक्केण निक्कंतिया बंधा, जाओ वीसत्थो,
 भणिउं पवत्तो य-अहो निक्कारणपरमबंधुव्व निसामेहि मम वित्तंतं, अहं रयणसेहरो नाम विज्जाहरो रुवंलावन्नसु-
 दराइगुणावहिभूयाए सिंहलरायधूयाए विजयवईनामाए पुब्बं चिय बहुण्णयारपत्थणाहिं दिन्नाए परिणयणत्थं
 संपयं संमग्गसामग्गीसणाहो जाव तत्थ पट्ठिओ ताव एत्थप्पंएसे संपत्तो समाणो वाउवेगाभिहाणेण वेरिणां वि-

ज्वाहरेण सवस्समवहरिऊण दुक्खेण मरउत्ति विभावितेण एवं गाढं बंधिऊण चत्तोऽम्हि, तिविहुणा भणियं-तुमं विज्जाहरो होऊण केण कारणेण भूमिगोयरधूयं उव्वोढुमिच्छसि?, तेण जंपियं-महाभाग! अपुव्वं किंपि से रूवं असरिसं च लायन्नंति, तिविहुणा चित्तिं-जइ सच्चं चिय एवंविहगुणोववेया सा ता मम जोगा परिणेउंति विभाविऊण भणियो एसो-अहो तुमए उव्वूढावि एसा तेण वेरिणा हीरिही, ता किं निरत्थएण तदुवलंभेण?, विज्जाहरेण जंपियं-सच्चमेयं जइ तुम्ह सत्ती अत्थि ता तुम्भे परिणेह, परिचत्ता मए इयाणिं, पडिवन्नं तिविहुणा, कयप्पणामो गओ सट्ठाणं विज्जाहरो; हरिणावि सिंहलेसरं अणेगप्पयारोहिं पत्थिऊण परिणीया सा विजयवई धूया, आगओ य निययपुरं, पडिच्छिओ महारायाभिसेओ, जाया वत्तीसं सहस्सा जुवईणं-

अह निचपयद्विसट्ठगीयझंकारमिस्ससुवरवे । नडचेडचाडुकारयकिंकरनरनियरपरियरिए ॥ १ ॥

सुविभत्तचित्तविच्छित्तिसुंदरे मंदिरे निचसमाणो । अइपडिहयपडिवक्खं तिखंडभरंहं च रक्खंतो ॥ २ ॥

भयवसनमंतसामंतमंडलो तरुणिसत्थमज्झगओ । आलंडलोव्व मुंजइ विसए पंचप्पयारेऽवि ॥ ३ ॥

नवरं विजयवईए नामंपिहु नेव गिणहइ तिविद्धू । ईसाविसायवसओ सा य पओसं समुव्वहइ ॥ ४ ॥

एवं वोळंतंमि काले अन्नया नियमाहप्पनिहयदुब्भिक्खइदुक्खनिवहो समागओ भयवं सेयंसत्तिथयरो, विरइयं देवेहिं विसालसालवलयपरिक्खत्तं विचित्तमणिमयसिंहासणाभिरामं भवभयत्तसत्तंताणेक्कसरणं समोसरणं, तओ

सायरमिलंतसुरिंदसंदोहशुणिलमाणो उवविट्ठो सिंहासणे जिणो, एतंतरे जिणागमणनिउत्तपुरिसेहिं वद्धाविओ तिविट्ठो,
कहिओ जिणागमणवइयरो, तओ हरिसभरसमुल्लसंतरोमंचेण य दवाविं पीइदाणं सट्ठुवालसकलहोयकोडीओ तेसिं
पुरिसाणं, समग्गवलयाहणो अचलेण समेओ य गओ वासुदेवो वंदणवडियाए, छत्ताइच्छत्तपमुहं जिणाइसयमवल्लोइऊण
परिचत्तसयलरायचिंधो दूराओ चिय पयचारेण गंतूण तिपयाहिणापयाणपुव्वयं जयगुरुं नमंसिऊण एवं थोउं पवत्तो—

जय संसारमहोयहिपडंतजणजाणवत्त ! जयनाह ! । परमसिवमोक्खकारण ! रणवज्जिय ! विजियमयमाण ! ॥ १ ॥

निम्महियमोहमाहप्प ! दुट्ठकंदप्पदप्पनिहलण ! । मायाविसवल्लीविणासपरसु जय जय जयप्पवर ! ॥ २ ॥

जय संजमसिरिवल्लह कोहमहाजलणसजलजलवाह ! । जय निम्मलेकेवलकल्लियसयलजीवाइयपयत्थ ! ॥ ३ ॥

जय विणहुकुलंवरपुण्णचंद ! सुरायनमियपयकमल ! । निप्पडिमपसमवरपुरपायार ! गुणोहसाहार ! ॥ ४ ॥

जय करुणामयसारणिसरिच्छ ! निच्छिन्नकम्मदुममूल ! । दुहसेलदलणदंभोलिसरिसनामग्गहण ! देव ! ॥ ५ ॥

नाह ! तुह पायंपकयमंदमयनिवहकंतिमयरंदं । फुल्लंधयं व धण्णो सयाडवित्तहो समल्लियइ ॥ ६ ॥

को तुह जिणवर ! वयणं अमयं व समत्थदोसहरणखमं । पाऊण कुत्तिथियवक्ककलुससलीलं समीहेइ ॥ ७ ॥

जइविहु दूरमसारो संसारो तहवि देव ! तुम्हेहिं । विहरंतेहिं सुणिज्जइ सारो निब्बुइपुरीओडवि ॥ ८ ॥

आसग्गीवाइनरिंदविजयलाभाइ(भेडवि)नेरिसो नाह ! । जाओ ममप्पमोओ जह दंसणमेत्तओ तुज्झ ॥ ९ ॥

ता पसिय भुवणवंधव ! जइवि तुमं सवहा विगयरगो । निवचरणदंसणणुगहेण मम तहवि सेयंस ! ॥ १० ॥
एवं च सुचिरं थोऊण सो तिविहुनरिंदो निविट्ठो समुचियट्ठणो, भगवयावि आजोयणभित्ताणुसारिणीए वाणीए
समारद्धा धम्मदेसणा, जहा-भो भो देवाणुप्पिया ! कहकहवि चिरं संसारकंठारमणुपरियट्ठमाणेहिं तुम्हेहिं पा-
विओ एस मणुयजम्मो, जायं अविकलपंचिंदित्तणं, संपत्ता निकलंककुलारोगाइया सामग्गी, समुल्लसिया सद्धम्म-
बुद्धी, ता दुगुल्लह मिच्छत्ताविरइसंगं समीहह संमत्तनाणचरित्तचित्तं पेच्छह पमायपरपाणिगणदुहविविवांगं अणुचिं-
तह खणदिट्ठनट्ठसरूवयं सन्वभावाणं विमंसह पुणो दुल्लहत्तणं आरियखेत्ताइलाभस्स, अन्नं च—

तुच्छेहियसुहलवमेत्तलालसा कीस वसह निस्संका ? । किं तुम्ह कयंतेण निब्भयपत्तं सयं लिहियं ? ॥ १ ॥

किं वा केणवि अजरामरत्तणं तुम्ह दावियं ? अहवा । मरणाइदुक्खरहियं ठाणं वा कथविय दिट्ठं ? ॥ २ ॥

अहवा सासयभावत्तकारणं किं रसायणं लद्धं ? । जेणुसुगत्तठाणेऽवि गाढमंदायरा होह ॥ ३ ॥

भो भो देवाणुप्पिया ! सद्धम्मोवज्जणे समुज्जमह । परिहरह पावमित्तेहिं संगतिं दुक्खसयजणणिं ॥ ४ ॥

पडिबज्जह निरवज्जं पवज्जं देसविरइमहवावि । निमुणह पसिद्धसिद्धंतदेसणं मोहनिम्महणिं ॥ ५ ॥

अत्तसमं पाणिगणं रक्खह पालेह सीलमकलंकं । साहम्मिएसु रज्जह वज्जह विसएसु य पवित्तिं ॥ ६ ॥

निग्गुणजणं उवेक्खह अचुक्करिसं सयावि परिहरह । अणत्तपुव्वगुणगणमब्भत्सह नासह कसाए ॥ ७ ॥

संतोसं च निसेवह परपरिचायं कथावि माऽऽयरह । ईसरिए मा म(ज्जह मा र)ज्जह पात्रकज्जेसुं ॥ ८ ॥

दाणाईसु पयट्टह सेवह सुविमुद्धबुद्धिणा गुरुणो । परउवयारे गिज्झह मा मुज्झह बुज्झह सतत्तं ॥ ९ ॥

एवं च भगवओ धम्मकहमायन्निज्जण हरिसुप्फुल्ललोयेणेहिं केहिंवि परिचत्तपुत्तकलत्तेहिं पडिवन्ना सबविरेई, के-
हिंवि परिग्गहिंयं सम्मइंसणं, अन्नेहिं अंगीकथा देसविरेई, अन्ने य छिन्नसंसयां जाया वहवे पाणिणो, हलहरनारा-
येणेहिंवि अणाचक्खणिज्जं पमोयभरमुव्वहंतेहिं पडिवन्नं सम्मत्तरयणं । अहं समइकंताए पोरिसीए वंदिज्जण जयगुरुं
गया निययावासं । भयवंपि अन्नत्थ विहरिओ । एवं च वचंतेमि काले अचंतसुहसागरावगाढस्स त्तिविट्ठुराइणो
एगया समागया परिभूयकिन्नरकंठा गायणा, तेहि य पंदसियं गीयकोसलं, हरियं हियं त्तिविट्ठुरस्स,
अन्नं च-गीउरगारो तेसिं जस्स मणांगपि विसइ सवणंमि । उज्झियनियवावारो चित्तलिहिउव सो सुणइ ॥ १ ॥

अच्छउ दूरे एयं तिरियाविहु तेसि भेयवसणेणं । निम्मीलियच्छिणो उच्छहंति नो भोयणाईसु ॥ २ ॥

एवंविहसुस्सरयागुणेण हरिस्स ते सयावि पासवत्तिणो परमप्पसायठाणं जाया ।

अन्नया य सुसेज्जानिसन्नस्स वासुदेवस्स रयणीसमए समारद्धंतेहिं गेयं, जणिओ दाढं चित्तस्स अक्खेवो, निहागम-
णकाले य निरुविओ वासुदेवेण सेज्जावालो, जहा-भइ ! जया मम निहा एइ तथा इमे गायणा तुमं विसज्जेज्जासि, जं
देवो आपेवइ तं करिस्सामिति पडिवज्जियं सेज्जावालेणं, खणंतरेण य आगया राइणो निहा, तेऽवि अविसज्जियत्ति तदेव

गाइउमारद्धा, नवरं पच्छिमरयणिसमए पबुद्धेण राइणाने तथा गायंते निसामिऊण, पुच्छिओ सिज्जावालो-अरे ! कीस एए न विसज्जिया ? तेण भणियं-देव ! अइसवणसुहत्तणेणं मए खणंतरं पडिवालिया, एयमायन्निऊण जायगाढकोवो आगारसंवरं काऊण तुण्हक्को ठिओ तिविडू, उग्गए य कमलसंडपडिवोहणे मायंडमंडले उट्ठिऊण सयणीयाओ कयपा-भाइयकायवो निसणो अत्थाणमंडवे राया, ठिया य नियनियट्ठाणेषु सामंतंमत्तिमुहडाइणो, एत्थंतरंमि सुमरिओ रा-इणा रयणिवइयो, आहूओ सेज्जावालो, भणिया य नियपुरिसा-अरे गीयस्स (रत्तत्तणेण ममाणाभंजगस्सेयस्स) तत्तत-उयतंवरसं खिवेह सवणेसुत्ति, एयमायन्निऊण नीओ सो तेहिं एगंतदेसे, कढियतउयतंवयरसेण भरिया कन्ना, महाव्वेयणा-भिभूओ गओ य सो झत्ति पंचत्तं । तिविडुणावि गाढामरिसवसेण निबद्धं निविडं दुहविवागवेयणिज्जं कम्मं । सावि सिंह-लेसरसुया ठाणे अत्तणो पराभवं पेच्छंती-हरिणा वयणमेत्तेणवि अविगणिज्जंती सुचिरमप्पाणं झूरिऊण मया तिरिएसु य उववन्ना, सेसं उवरि भन्निही । तिविडूवि कालंतरेण विविहसोक्खमणुंभुंजमाणो रज्जे रट्ठे (य) सुच्छाणु-बंधमुव्वहतो नियमुयवलेण सेसपुरिसवग्गमवन्नंतो विविहपाणाइवायकिरियाए महारंभमहापरिगहेहिं अइकूरज्झवसा-णेण य परिगलियसम्मत्तरणो नारागाउयं (निकाइऊण) चुलसीईवाससयसहस्साइं सबाउयं पालिऊण कालमासे कालं किचा उववन्नो सत्तममहीए तमतमाभिहाणाए अप्पइट्ठाणंमि नरयावासे लक्खपमाणे पंचधणूसियसरीरो नारगो । अइगाढपावकम्ममेहिं पुव्वभवसंचिएहिं गरुएहिं निहओ विसहतो दुक्खाइं परमतिकखाइं चाउहिसिनिट्ठुर-

वज्रसूक्तिकखखगभिज्जमाणंगो अइदीणकरुणसहं पइक्खणं विलवमाणो य ।

किं पुव्वभवंमि मए कथंति जेणेरिसंमि ठाणंमि । निचंधयारतमसे उववन्नो कुच्छणिज्जंमि ? ॥ १ ॥

एवं विचिंतयंतो खणे खणे घोरवेयणाभिहओ । पज्जलियगेहमज्झप्पविट्ठपंगुव विलवेइ ॥ २ ॥

अग्रलोऽवि कयत्तप्पारलोइयकायवो गाढसोगाभिभूओ सुसाणं व भवणं मन्नमाणो अदिट्ठपुव्वयं पिव पियज्जणं च अवगणिंतो विसं विसयं मन्नमाणो बंधुणो बंधणं परिकप्पेमाणो पवरतरुसंडमंडिए नंदणवणे कमलकुवलयकलहारबंधुरासु सरसीसु सिंगारागारचारुवेसासु अंतोउरीसु खणंपि चक्खुमक्खिवंतो कत्थवि रइं अलभमाणो अचंतं संसारसारं भावेंतो सेयंसतित्थयरुवइट्ठधम्मवयणाइं चिंतितो वइरिभवणं व गिहावासं परिचइउकामो सयणोवरोहेण कइवयवासराइं ठाऊण गओ धम्मघोसायरियसमीचे, वंदिओ परमाए भत्तीए, सूरिणाऽवि दिव्वणाणेण गाऊण तस्साभिप्पायं समारद्धा धम्मदेसणा, जहा—

खणसंजोगविओगं खणपरियदंतविविहसुहडुक्खं । नडनचियव्व संसारविलसियं चित्तरुवधरं ॥ १ ॥

दट्ठण को पमायइ जिणिंदधम्मंमि सोक्खहेउम्मि ? । अचंतवल्लहे वा मयंमि को सोयमुव्वहइ ? ॥ २ ॥

जइ एगस्सेव भवेज्ज एत्थ वल्लहजेणेण सह विगमो । ता परिभवोत्ति काउं सोगोऽवि जणेण कीरेज्जा ॥ ३ ॥

जाव य समग्गभरहाहियावि भरहाइणो कयंतेणं । विज्झविया दीवा इव पवणेण पयंडवेगेण ॥ ४ ॥

ता कीस कुसलमहणो अट्टाणे चिय कुणंति संतावं ? । नाए वत्थुसरूवे खिज्जंति न जेण सप्पुरिसा ॥ ५ ॥ तीहिं विसेसयं ।
नियजीवियस्सवि जया धरणोवाओ न तीरए काउं । तत्थऽण्णजीवियेवे चळंमि कह कीरइ थिरत्तं ? ॥ ६ ॥
इयरजणस्स व सोगो काउं न उ जुजए तुह कहंमि ।

किं गिरितरूणि(ण) मंतरमणिलेण चळंति जइ दोवि (अणिलेण गिरितरूणि चळिज नवि मंदरो उ गिरी) ॥ ७ ॥

एसो खु सुद्धुद्धिस्स विब्भमो जं पियस्स मरणंमि । अकंदणेण सिरकुट्टणेण अवणिज्जइ सोगो ॥ ८ ॥

उत्तममईण पुण भवविरूवयाऽऽलोयेणेण निवेओ । उप्पजइ तत्तो चिय विसेसधम्मज्जमो होइ ॥ ९ ॥

इय चयसु सोगपसरं सरेसु संसारदारुकरवत्तं । पव्वजं निरवजं चिच्चा रजं च रट्ठं च ॥ १० ॥

एयं च समायन्निज्जण ववगयसमग्गसोगसंतावो हलहरो भणिउमाढत्तो-भयवं ! सचं तुम्हेहिं करुणापरहि-
यएहिं ममोवइट्ठं, ता पसिय इयाणिं देह पव्वजं निरवजंति बुत्ते पवाविओ सो गुरुणा, सिक्खविओ समणधम्मं,
देसिया दसविहचक्कवालसामायारी, अब्भुवगया य तेण सम्मं । अह गामागरेसु अप्पडिवद्धो विहरिज्जण किंमि कालं
दुक्करतवचरणेहिं सोसिज्जण सरीरं कम्मनिवहं च पत्तो सो सासयसोक्खं मोक्खंति ॥

तिविट्ठूवि तेत्तीसं सागरोवमाइं अप्पइट्ठाणे अणुहविज्जण दुक्खं जुओ समानो उववन्नो सीहत्ताए एगंमि गिरिकंदरे,
तओ—उम्मुक्कवालभावो विगयासंको समग्गरणंमि । परिभवइ कूरचित्तो जमोव अनिवारियप्पसरो ॥ १ ॥

दारइ गइंदकुंभत्थलाइं अइतिक्खनक्खनिवेहेण । सारंगकुलं अचलं तासइ गलगज्जिमेत्तेण ॥ २ ॥

हिंसइ विविहजीवे इय एवं जीविज्जण चिरकालं । मरिज्जण पुणो जाओ नेरइओ नरयपुढवीए ॥ ३ ॥

छिंदणभिंदणसामलिसूलारोवणपराइं दुक्खाइं । रोमुद्धोसकराइं सुमरणमेत्तेणवि जणाणं ॥ ४ ॥

आमरणंतं सोढुं भमिओ विविहासु तिरियजोणीसु । अह एगत्य भवंमी कम्मखओवसमभावेणं ॥ ५ ॥

लद्धूण माणुस्सत्तं काउं छट्ठट्ठमाइ तवचरणं । भोगफलमज्जिज्जणं उववन्नो देवलोगंमि ॥ ६ ॥

तंओ आउक्खएणं नुओ समानो रिद्धित्थिमियसमिद्धे निरंतरसुप्पज्जमाणजिणचक्कवट्ठिबलदेववासुदेवपहाणपुरि-
ससरिए हिए एगवीस(परियरिए एगस)रूक्ककालपरिकलिए अवरविदेहे खेत्ते मूयाए रायहाणीए धणंजयस्स रा-
इणो सयलंतेउरपहाणाए धारिणीए देवीए चउइसमहासुमिणसूओ सो तिविहुजीवो कुञ्चिसि पुत्तत्तणेण उवव-
न्नोत्ति । समुच्चियसमए य कयं से पियमित्तोत्ति नामं । वड्ढिओ य देहोवचएणं विण्णाणपगरिसेण य, अणण्या य
सो धणंजयराया सरयनिसायसरिसवयणं तरुणतरणिपडिबुद्धपुंडरियल्लोयणं मणिखंडमंडियकुंडलुल्लिहियपीणगंड-
मंडलं अकुडिल्लुचुंगनासावंसं वालप्पवालपाडलोड्डसंपुडं कुंदमउलमालासिणिद्धसुसिलिट्ठदंतपंतिं पसत्थरेहावल्लयरेहं-
तकंठकंदलं मंसलसुविसालवच्छत्थलं महानयरगोपुरपयंडवाहुदंडं संगयपासोवसोहियसुप्पमाणमज्झभागं वियसिय-
सयवत्तसरिच्छातुच्छनाभिं जचतुरयवट्ठियकडिभागं सुरिंदवारणकरकरणिजंघाजुयलं सुपइट्ठियलट्ठसुकुमालरत्ततलं

चलंतं कुमारं पेच्छिऊण जायपरमसंतोसो पवररायकुलपसूयाओ कण्णगाओ परिणाविऊण पसत्थवासरे रज्जे अभिसिंचिउं तओ तहाविहाण य सूरीणं पासे पव्वज्जं पडिवज्जइ । पियमित्तस्सवि अप्पडिहयसासणं रज्जं करिंतस्स कालक्कमेण समुप्पन्नाइं चउदस रयणाइं, ताणि य इमाणि—

सेणावइ गाहावइ पुरोहिय तुरय वहुइ गयित्थी । चक्कं छत्तं चम्मं मणि कागणि खगग्ग दंडो य ॥ १ ॥

एवं सो पियमित्तो समुप्पन्नचक्काइरयणो अणेगनरनाहनिवहपरियरिओ चक्करयणदंसिज्जमाणमग्गो विजयजत्ताए मागहतित्थाभिमुहं संपत्थिओ, कमेण य तस्सादूरदेसं पत्तो समाणो खंधावारनिवेसं काऊण मागहतित्थाहिवस्स देवंस्स साहणत्थं अट्टमभत्तं तवोकम्मं पडिवज्जइ, तस्स पज्जेते य हयरहजोहपुरिबुडो जोत्तियपवरतुरंगं चाउग्गटं रहमारुढो चक्काणुमग्गेण केत्तिंयपि भूमिभागं गंतूण कुवियकयंतभूविब्भमं अणेगरयणकिरणजालकब्बुरियदिं सावल्यं वामपाणिणा सज्जीकयजीवं कोदंडं गिण्हिऊण तहा वज्जसारतुंडं विविहरयणविरइयपंखेदंसं मणिचिणिं भिम्यचक्कवट्ठिनामचिंधं दाहिणकरेण सरं आयन्नमाकट्ठिऊण मागहतित्थाहिवस्स सम्मुहं सुयइ, सोऽवि सरो दुवालस जोयणाइं गंतूण मागहेदवस्स सहाए निसन्नस्स तस्स पुरओ निवडिओ, तं च सो दट्ठूण निट्ठुरनिडालवट्ठनिं विट्ठुभिउडिभीसणवयणो गाढकोवभरारुणनयणो भणिउमाढत्तो—

रे रे कस्स कयंतेण सुमरियं ? कस्स वल्लहं न जियं ? । को मज्झ कोवदीवयसिहं व वंछइ पयंगोव ? ॥ १ ॥

किं केणइ भुयबलदप्पिएण देवेण अहव मणुएणं । जक्खेण रक्खसेण व एसो खित्तो सरो होही ? ॥ २ ॥
इय खणमेगं परिचिंत्तिज्ज गिण्हइ सरं सहत्थेणं । पेच्छइ य चक्कवट्टिस्स नामयं मणिविणिम्मवियं ॥ ३ ॥

एवं च ववगयसंसओ उवसमियकोवविगारो विविहमहामोह्लचित्तमणिरयणाभरणानांमंकियसरसणाहो पियमित्त-
चक्कवट्टिणो सगासमुवंगंतूण मत्थए अंजलिं काज्ज य विजएणं वद्धावेइ, भणइ य-जहाडहं इयाणिं तुम्ह आणा-
निइसवत्ती किंकरनिविसेसो, ता पडिच्छह इमं पीइदाणंति भणिज्ज आभरणाइं सरं च समप्पेइ, चक्कवट्टीवि तं
सक्कारिज्ज सम्माणिज्ज य सट्ठाणे विसज्जेइ, रहं पि परावत्तिज्ज खंधावारमुवागच्छइ, भोयणाइ काज्ज य किंकर-
पुरिसेहिं मागहदेवस्स अट्ठाहियामहिमं कारावेइ । तस्स य पज्जंते चक्काणुमग्गेण खग्गचावनारायकणकप्पणिसू-
ललडलिभिं डिमालपमुहपहरणहत्थमुहडसत्थाणुजाथमग्गो हत्थिरयणमारूढो नरिंदो कालपीयरत्तपंडुरवण्णाणेगचिंध-
सहस्सेहिं छायमाणोव अंवरतलं हयहेसियगयगुलगुलाइयरहघणघणाइयरवेहिं वहिरयंतोव जीवलोयं वरदामति-
त्थाभिमुहं वच्चइ । कमेण य ताहिं पत्तो समाणो पुव्वविहीए वरदामदेवस्स अट्ठमभत्तं रयणपहरणं अट्ठाहियामहिमं च
करेइ । एवं पहासतित्थाहिवस्सडवि, नवरं पभासतित्थदेवो मालं मउडं मुत्ताजालं कडगतुडियाणि य चक्कवट्टिस्स
पीइदाणं पयच्छइत्ति । तओ पुणोऽत्रि जक्खसहस्सपरिवुडेण अंतरिक्खगएण चक्करयेण दंसिज्जमाणमग्गो चक्कवट्टी
सिंधुमहानईए दाहिणिह्णेणं कूलेणं सिंधूदेविमवणाभिमुहं गओ, तत्थवि अट्ठमभत्तं पगिण्हइ तस्स पज्जंते य सिंधु-

देवीए सुहासणत्याए चलयं सीहासणं; ओहिनाणसुणियचक्कवट्टिसमागमा य नाणामणिकणगरयणभत्तिचित्ताणि
दोन्नि भदासणाइं कडगाणि तुडिगाणि वत्थाणि पगहिऊण चक्कवट्टिसगासमागया पंजलिउडा विणएण सम-
प्पेइ, रायाऽवि तं सक्कारिय सम्माणिय सट्ठाणे विसज्जेइ । तओ पुगरवि चक्करयणं वेयहुपवयाभिमुहं गंतुमारद्धं,
रायाऽवि सवलवाहणो तदणुसारेण य(गच्छइ)कमेण य पत्तो वेयहुपवयस्स नियंबदेसं, तत्थ य खंधावारं निवे-
सावेइ, वेयड्डुगिरिकुमारदेवोऽवि पुव्वनाएण चलियासणो विविहालंकारहतथो सेवं पडिच्छइ । कइवयदिणानंतं च
तिमिसगुहासमीवमुवागयस्स चक्किणो अट्टमभत्तवचलियासणो कयमालयेवो भालयलविलुंतकरकमलो झडत्ति
चक्खुगोयरमागओ, थीरयणजोगं रयणालंकारं अन्नाणि य विविहाणि भूसणाइं पणांमेइ, आणानिहेसं च बहुम-
न्निऊण गए तंमि राया विजयसेणं सेणावइं रयणभूयं सदाविऊण एवं वागरेइ-भो विजयसेण ! गच्छाहि तुमं
सिंधुमहानईए पच्चत्थिमिछदेसं नगनगरागाराइपरिक्खित्तं सिग्घं साहिऊण एहित्ति, जं देवो आणवेइत्ति विणएण
सासणं पडिच्छऊण सेणाहिवो विहियतक्कालोचियमज्जणाइवावारो महापरक्कमो तेयंसी मेच्छमासाविसारओ
विस्सुयजसो पवरकुंजरखंधाधिरूढो सन्नद्धबद्धकवओ उष्पीलियसरासणधणुपट्ठो अणेगणनायगंदडनायगपरिवुडो
धरियधवलायवत्तो चलंतविमलचामरो पहयतूरवबहिरियदियंतरो सिंधुमहानईतीरमुवागच्छइ ।

ताहे स चम्मरयणं सिंधुमहानइजलंमि वित्थरइ । बारसजोयणमेत्तं नावारूवेण तरणडा ॥ १ ॥

तो तंमि समारूढो हरिकरिपाइक्कचक्कपरियरिओ । वीसत्थो पवणवसुद्धसंतसुमहल्लकल्लोलं ॥ २ ॥
 गोपयमिव सिंधुनइं लंघित्ता मेच्छजाइए सवे । आणानिहेसे संठवेइ रयणाइं गिणहेइ ॥ ३ ॥
 सामी ! तुम्हे सरणं गई य एमाइ जंपमाणे ते । ठविउं सट्ठणेसुं विणियत्तइ विजयसेणो तो ॥ ४ ॥
 पियमित्तचक्कवट्टिस्स पायपंकयजुयं पणमिऊण । रयणाइं समप्पइ सो मिलक्खुविजयं च वज्जरइ ॥ ५ ॥
 पुणरवि रण्णा भणिओ सेणाहिंवेइ जहा तुमं भइ ! । गच्छसु तिमिसगुहाए कवाडउग्घाडणत्थाए ॥ ६ ॥
 ताहे तहत्ति सम्मं पडिसुणिऊणं समग्गवल्लिओ । गंतुं गुहासमीचे अट्टमभत्तं तवो कुणइ ॥ ७ ॥
 अह तिक्खुत्तो पहणइ निविडेणं तिच्चदंडरयणेणं । ते तिमिसगुहाकवाडे महप्पमाणे वइरघडिइ ॥ ८ ॥
 दंडाभिधायपरिपेह्लियाइं कुंचारवं करैताइं । कुक्कलत्तकहियगुज्झं व ताइं विहडंति वेगेण ॥ ९ ॥
 तयणंतरं च वलिउं साहइ सो चक्कवट्टिणो वत्तं । सोऽवि य गयमारूढो समग्गसेणाए संजुत्तो ॥ १० ॥
 चउरंगुलप्पमाणं रोगासिवनासणं मणिं घेतुं । चक्काणुमग्गलगो तिमिसगुहं विसइ भयराइओ (महराया) ॥ ११ ॥
 तत्तो तिमिसगुहंतंधयारविद्धसणहुमइगरुए । मंडलगे सो विलिहइ कागिणिरयणेण भित्तीसु ॥ १२ ॥
 ताहे मंडलगमऊहजालउज्जोयहणियत्तिमिराओ । नीहरइ सुहेण समं सेणाए सो गुहाहिंतो ॥ १३ ॥
 इओ य वेयहुपरभागवत्तिणो विलाया महापरक्कमा अपरिभूयसामत्था कणगरययधणधन्नसमिद्धा नियनियद्धानेसु

निवसन्ता बहूनि गंधधनगररुहिरसभूमिकंपपसुहाइं उष्पाइयसयाइं पेच्छंति, तते णं ते ताणि पेच्छऊण उच्चि-
ग्गा निराणंदा ओहयमणसंकप्पा विणि(दीण)यं पिव अप्पाणं मन्नंता जाव चिट्ठंति ताव सहसच्चिय उक्किट्ठिसी-
हनायकलयल्लवेण समुद्दमहणसकं समुप्पायमाणो निसियकरवालसेल्लमल्लिकुंतपहरणकरोहिं सूरुहिं अणुगम्ममाणो
पत्तो तेसिं देसं पियमित्तनरवइ, तं च आगयं निसामिऊण ते मिलेच्छा पयंडकोवारुणच्छा परोप्परं मंतंति-भो भो
एस कोइ कयंतचोइओ अम्ह विसयं उवइविउकामो वट्टइ, ता तहा करोमो जहा एस अंतरां चैव विणस्सइत्ति,
एवं संपहारित्ता पीडियटुब्भेयकवया विचित्तपहरणहत्था समुद्धुयमगरनरवसहसदूलगरुलाइचिंधा पोरुसाभिमाण-
मुव्वहंता अहमहमिगाए गंतूण चक्किणो अगगसेन्नेण संपलग्गा जुज्झुं, तओ य अगगसेणं हयपरक्कमं निवडियसु-
हडं पडिभग्गरहवरं खंडियजच्चतुरंगवगं पडिखलियनरवइजणं तेहिं कयं पेच्छऊण विजयसेणो सेणाहिवइ जाय-
कोवो कमलामेलगनामं आसरयणं आरुहिऊण कुवल्लयदलसामलं सवत्थ अप्पडिहयं नरवइहत्थाओ खग्गरयणं
च गहिऊण ते विलाए चाउद्विसिंपि पसरिए पडिखलइ । किं बहुणा ?—

तिमिरं व दिणयेणं भुयगसमूहोव पक्खिराएणं । सेणाहिवेण निहया भीया ते अइग्गा सगिहं ॥ १ ॥

धेत्तूणं धरसारं पुत्तकलत्ताइयं च मरणभया । अइदूरमवक्कंता सिग्धं विसमेसु ठाणेसु ॥ २ ॥

ताहे सिंधुनईए कूले परिचत्तसव्वावारा । उत्ताणा निवसणा अट्टमभत्तं पगिण्हंति ॥ ३ ॥

सत्तुवलहणहेउं पुर्विपिय पाडिहेरणपरे । सुमरंति एगचित्ता कुलदेवे मेहमुहनामे ॥ ४ ॥

अट्टमभत्तस्संते तत्तो चल्यासणा सुरा एंति । गयणंगणमोइन्ना भणंति किं सुमरिया अम्हे ? ॥ ५ ॥

सिट्ठं च चिलाएहिं जह अम्हे रिउवलेण पडिहणिया । ता तुम्हे मुसुमूरह रिउपक्खं अम्ह रक्खट्ठा ॥ ६ ॥

देवेहिं तओ भणियं एसो पियमित्तनाम वरचक्की । काउमिमस्स विणासं अहो न सक्कोडवि सक्केइ ॥ ७ ॥

ता भो अणभिमवणिल्लो एस, केवलं तुम्ह पक्खवायमणुसरंता किंपि उवसग्गेमोत्ति निवेइऊण तेसिं अंति-
याओ ते मेहमुहा अवक्कमंति, नुरवइखंधावारस्स उवरिं मेहनिवहं विउवंति, तओ जुगमुसलमुट्ठिप्पमाणधाराहिं
निरंतरं वारिनिवहं सत्तरत्तं जाव सुयंति । पियमित्तचक्कवट्ठीडवि तं तहाविहं पिच्छऊण दिव्वचम्मरयणं परामुसइ,
तंपिय खिप्पमेव दुवालस जोयणाइं तिरियं पवित्थरइ, तत्थ सो समत्थोडवि खंधावारो समारुहइ, पुणोडवि नरिंदो
नवनवइसहस्सकंचणसलागपरिमंडियं महरिहं विविहभत्तिचित्तं डिंडीरपिट्ठपंडुरं छत्तरयणं खंधावारस्स उवरिं वारस
जोयणाइं समहियाइं वित्थारेइ, मणिरयणं च किरणजालं सुयंतं सरयरविसरिच्छं छत्तमज्झभागे ठवेइ, गाहावईवि
चम्मरयणेगेदेसंमि तद्विवसपइन्ननिप्फणपूयाणं सच्चयणाणं अणेगकुंभसहस्साइं उवट्ठवेइ, एवं च सो राया सब-
प्पयारेहिं अणुद्विग्गो चम्मरयणमारूढो छत्तरयणच्छन्नोवरिमविभागो मणिरयणकओल्लोओ गाहावइउवट्ठावियधन्न-
निचओ नियमवणगओव सुहेण अच्छेइ । किं बहुणा ?

नवि से छुहा न वाही नेव भयं नेव विज्जए दुक्खं । विजयाहिवस्स रणो खंधाचारस्सवि तेहव ॥ १ ॥
अह पियमित्तरिंदो संपत्ते सत्तरत्तपज्जते । चित्तेइ की णु एसो जो भं विहवइ सलिलेणं ? ॥ २ ॥
एत्थंतरेमि आवद्धपरियरा विविहपहरणसेमेया । सोलस जक्खसहस्सा मेहसुहाणं गया पासे ॥ ३ ॥
अणिया य तेहिं रे रे अण्णत्थियपत्थिया धुवं लुम्हे । जं चक्खवट्ठिणोऽविहु उवसगं एवमायरह ॥ ४ ॥
ता सुंचह चक्खुपहं अहवा जुद्धत्थमभिसुहा होह । इइ भणिए मेहसुहा गया चिलायाण पासमि ॥ ५ ॥
साहंति सव्वइयरमसमत्थत्तं च अत्तसत्तीए । नरवइसेवाक्खे पेसंति य ते चिलाएऽवि ॥ ६ ॥
अह मुक्खेकेसहत्था पहरणरहिया नियंसिओल्लपडा । भयवसविसंदुलंगा गंतूण नमंति ते मेच्छा ॥ ७ ॥
कणगं विचित्तरयणे अन्नपि विसिद्धवत्थुमपिंति । पडिवज्जिय तस्सेवं नियावराहं च खामंति ॥ ८ ॥
एवं च पवज्जियसेवा मिलेच्छा सम्माणिऊण चक्किणा विसज्जिया सट्ठणेसु, सेणावईवि सिंधुमहानईए बीअखंड-
साहणत्थं पेसिओ पुव्वविहीए, तं च साहिऊण पच्छाऽऽगए तंसि पियमित्तो राया चक्काणुमग्गेण पट्ठिओ वेयट्ठा-
भिसुहं, कमेण य पत्तो पव्वयनियंबदेसं । तओ मणसीकरेइ उत्तरदाहिणसेट्ठिविजाहरे, तेऽविय भयलुभियचित्ता
नाणाविहकणगरयणपसुहपहाणवत्थुसमंषणपुव्वयं नरवइणो सिरसा सासनं पडिच्छंति । सेणावईऽवि पुव्वकमेण गंगा-
महानईपुव्वखंडं साहिऊण पासमल्लियइ ॥

पुवक्कमेण पुणरवि खंडगुहं लंघिऊण नरनाहो । चउरंगबलसमेओ गंगापच्चत्थिमे कूले ॥ १ ॥
 खंधावारनिसेसं काऊणं पवररयणपडिपुण्णो । अट्टमभत्तपुरस्सरमह गिणहइ नव महानिहिणो ॥ २ ॥
 मणवंछियत्थकरणेक्कपच्चला वइरनिम्मियकवाडा । बहुपुन्नपावणिज्जा इमेहिं नामेहिं ते नेया ॥ ३ ॥
 एएसिं चिय चक्की निहीणमनिहीणपोरिसारंभो । काले य महाकाले माणवग महानिही संखे ॥ ४ ॥
 गंगापुरत्थिमिच्छं सेणावइणा दुइज्जमवि खंडं । गाहावइ तत्थ ठिओ भुंजंतो विविहविसयसुहं ॥ ५ ॥
 एवं च सो पियमित्तचक्कवट्ठी पसाहियछक्खंडो निज्जियपडिक्खचक्को अप्पणो आणाए ठवंतो नराहिवे दंसंतो

नियपरक्कमं सम्माणंतो सेवगजणं विरयंतो दीणाणाहाण अणवरयदाणं वत्तीसनरवइसहस्साणुगम्ममाणो पडिनियत्तो
 मूथानयरीए, पडिच्छिओ दुवालसचारिसिओ महारायाभिसेओ । एवं च कयकायवो वत्तीसाए वत्तीसबद्धनाडयस-
 हस्साणं सोलसण्हं जक्खसहस्साणं तिण्हं तिसट्ठीणं सूयसयाणं अट्टारसण्हं खेणिप्पसेणीणं चउरासीए तुरगसयस-
 हस्साणं चउरासीए पवरकुंजरसयसहस्साणं छण्णउइए मणुसकोडीए नावत्तरीए पुरवरसहस्साणं वत्तीसाए जण-
 वयसहस्साणं छन्नउइए गामकोडीणं नवणउइए दोणमुहसहस्साणं चउवीसाए कब्बडसहस्साणं अडयालीसाए
 पट्टणसहस्साणं चउवीसाए मंडवसहस्साणं वीसाए आगरसहस्साणं सोलसण्हं खेडसयाणं चउदसण्हं संवाहसह-

स्साणं अन्नेसिं च राईसरसेट्टिसेणावइपमुहाणं जणाणं आणिस्सरियसारं सामित्तमणुपालितो दिव्वं विसयसुहमणु-
मुंजंतो य कालं वोलेइ ।

एगया य पसंतचित्तो भवणोवरिभूमिगाए ओलोयणगओ जाव दिसावलयमवलोएइ ताव सहसच्चिय पेच्छइ
गयणंगणे समुत्थियं थेववित्थारं मेहखंडं, तं च-कज्जलभसलगवलकोइलकालिंदीजलसामलं फुरंतविज्जुदंडुड्डामरं
धंतकलहोयधवलगोपतिमणहरं समुछसंताखंडगंडीवाडंवरमणिज्जं मंदमंदमुक्कविंदुसंदोहसुंदरं गंभीरगज्जिरवतं-
डवियसिंहडिगणं खणमेगं दिसामुहेसु पसरिऊण सहसच्चिय समुच्छलियपवलपवणप्पणोलिज्जमाणं सच्चहा पणहु-
मवलोइऊण चित्तेइ-अहो केरिसी वत्थुपरिणई ? जं तारिसं घणपडलमचंतनयणाभिरामं खणमेत्तमुन्नइं पाविऊण संपयं
सच्चुच्छेयमावन्नं, एयाणुमाणेणं चिय सच्चवत्थूणं एसा गई, खणविगमधम्ममे य एत्थ किं पडिबंघट्ठाणं ? का वा रई ?
को वा उत्तरोत्तरकायव्यविहाणुज्जमो ? कहां वा खणमेत्तं पि वज्झवत्थूसु विस्सासो, अच्छंतु वा वज्झवत्थुणो, जं
इमं सयलमणोरहमंदिरं सरिरं जस्स किर निमित्तं कीरइ करितुरयरहजोहजुवइपुरागरपमुहरज्जंगोवज्जणसमुज्जमो
तं पि उप्पायधम्मत्तणेण पच्चक्खदिट्ठविणट्ठमेहमालं व धुवं विणस्सरसीलं, अओ कुसला कहमेयस्स निस्सार-
पोगलचओवचयरूवस्स अट्ठिमिंजवसारुहिरमंससुक्काइविलीणं कारणसमुच्चवस्स विविहरोगनिवहपरिगहियस्स पइ-
दिवसण्हाणविलेवणभोयणपमुहोवयारपरिपालणिज्जस्स सीयतावायंकाइदोसरक्खणिज्जस्स परमदुगुच्छणिज्जगंधस्स

असुइपडिपुणकलसस्सेव वाहिरभेत्तरमणीयस्स दुज्जणचेट्ठियस्सेव अविचारुंदरस्स महानरिंदस्सेव विसिद्धविस-
याणुरागिस्स दुद्धपाणपरव्वसमज्जारस्सेव अणवेक्खियपयंडजमंडडाभिघायस्स विविहप्पयारोहिं उवलालणत्थं गि-
ण्हंति रज्जं करेति निरेक्खचित्ता पाववावारं सयावि रक्खणत्थं विविहपहरणहत्थं धरेति सुहडसत्थं अणवरयसं-
तावकरं कोहलोहाइवेरिनियरं निच्चं पच्चासन्नट्ठियंपि अणवेक्खिऊण जोयणसहस्संतरियं संकंति सत्तुनिवहं सक-
ज्जमत्ताणुरागिणंपि निक्खवडपेम्मं मण्णंति परियणं अवस्संभाविनिहणंपि धुवं लक्खंति धणं, ता अहो तेसिं पम-
त्तचित्ता अहो निच्चियया अहो महामोहमहिमया अहो इहलोयपडिबंधपरव्वसया अहो आगामिदुक्खनिरे-
क्खया अहो दुहविवागावल्लोयणपडिक्कूला, इइ चिंतयंतस्स पडियमेगेण कालनिवेयएण वेयालिएण—

विच्छायं पच्छिमासागयमिममहुणा सूरविंवं मिलंता, रोवंति द्वाडल्लिजालुब्भडयमिसओ पुंडरीयाण संडा । कंदते
चक्कवाया गुरुचिरहमहादुक्खसंतत्तगत्ता, धी संसारो (संसारो धी) असारो जमिह फुडमहो सासयं नत्थि किंपि ॥१॥

राइणाऽवि एवमायन्निकुण चिंतियं अहो अणिच्चयाए संबद्धं साहु पडियं एएण, जुत्तो संपयं मम धम्मज्जमो काउंति
निच्छिऊण पसुत्तो रयणीए । ततो खणे भवनिग्गुणत्तं पेहमाणस्स पाणिवहपमुहाइ दुक्कियाइ गरिहंतस्स संसारुब्बयं
वहमाणस्स सुहिसंबद्धं बंधणं व गणंतस्स भोगे सुयंगेव परिकप्पितस्स मायंदजालं व जीवलोयविलसियमवल्लोयंतस्स
विसालसेज्जाएवि तल्लुवेळिं करंतस्स कहकहवि बोलीणा रयणी, समुग्गओ दिवायरो । एत्थंतरे पडियं मागहेण—

पडिहयपडिवक्खं चक्कदिनेक्कसोक्खं, मिउकरमणिज्जं सज्जणासंसणिज्जं ।

तुममिव रचिविं पुच्चसेलावलं, उदयमिममियाणिं जाइ दोसेक्कहाणिं ॥ १ ॥

इमं च उदयसहसुंदरं सिलोगमायन्निऊण संभाविथापुव्वलाभो नरवई समुट्टिऊण सयणिज्जाओ कथपाभाइयकायवो निसन्नो सीहासणे । एत्थंतरे समागया उज्जाणवालया, कयप्पणामा विन्नविउमाढत्ता य—देव ! वद्धाविज्जह तुब्भे जेण समागया भगवंतो बहुसीसगणसमेया पोट्टिलाभिहाणसूरिणो, समोसरिया य तुम्ह उज्जाणेत्ति । एवमायन्निऊण निब्भरं पमोयमरमुच्चहतो दाविऊण तेसिं चिंताइरित्तं पारिओसियं पवरवारणखंधाधिरूढो संवपरियणसंहिओ महाविभूईए गओ चक्की उज्जाणे, वंदिया सन्वायरेणं सूरिणो, उवविट्ठो य जहासन्निहियघरणीए, जोडियकरसंपुडेण साहिओ गुरुणो मेहविगमदंसणुब्भूओ सद्धम्मसमुज्जमसंमुहो नियचित्तपरिणामोत्ति, गुरुणा भणियंभो महाराय ! कुसलाणुसारिणी तुज्झ बुद्धी, संपन्नो कम्मविवरो करकमलं निलीणा मोक्खलच्छी, जस्स तुह एवंविहा वासणा, ता महाराय ! तिविहा पुरिसा भवंति, तंजहा—उत्तिमा मज्झिमा जहन्ना य । तत्थ—

उत्तमयुरिसा भवभंगुरत्तणं जाणिऊण णियमईए । परिचत्तगिहकलत्ता परलोयहिं पवज्जंति ॥ १ ॥

गरुयं रोगायकं तहाविहंपि अ विओगदुक्खं च । दट्ठूण मज्झिमा पुण कहमवि लगंति जिणधम्मो ॥ २ ॥

जे उ जहन्ना ते सव्वहावि त्रिविहावईनिमग्गावि । दुक्खसयपीडियाविट्ठु न सुत्तिमगंमि लगंति ॥ ३ ॥

करुणोयहिणा गुरुणा भणिज्जमाणावि विविहवयणेहिं । अच्छउ काउं धम्मं सहहिउंपि थि न सकंति ॥ ४ ॥
 इय मज्झिमा जहन्ना य हुंति धम्माहिगारिणो न तहा । जह मुणियभवसरूवा सभावओ उत्तिमा पुरिसा ॥ ५ ॥
 ता भो महायस ! तुमं जोगो सवणणुभणियधम्मस्स । संपइ करेसु सहलं एयायरणेण नियजीयं ॥ ६ ॥
 नहि विन्नायसरूवे चिंतामणिपसुहदिव्वरणंमि । अगगहणिच्छा जायइ क(इ)यावि (वि)सुद्धिबुद्धीण ॥ ७ ॥

अन्नं च-जललवतरलं जीयं सुरिंदकोदंडविब्भमं पेमं । गयकणतालचवलं पुण्णंपि सरीरलायणं ॥ ८ ॥
 मारुयपणुणणपणं व भंगुरं सुंदरंपि तारुणं । आवयलवखनिमित्तं वित्तंपि कहंपि पविढत्तं ॥ ९ ॥
 एएसिं एक्केकंपि नूण वेरगकारणं गरुयं । सुहबुद्धीणं जायइ किं पुण सव्वेसि समवाओ ? ॥ १० ॥

अच्छरियमिमं जे एरिसेहिं संवेगभावहेऊहिं । निच्चं विज्जंतेहिवि न मोक्खमगे पयट्ठति ॥ ११ ॥
 किं बहुणा कुणसु तुमं संपइ सद्धम्मकम्मपडिवत्तिं । बहुविग्घो सेयत्थो कालचिलंबो न ता जुत्तो ॥ १२ ॥

एवं सोचा चक्खवट्ठिणा भावसारं चलणेसु निवडिऊण भणिओ गुरू-अचित्तहमेयं, इयाणिं समीहामि अगाराओ
 अणगारियं पडिवज्जिउं, गुरुणा भणियं-मह ! मा पडिवंधं करेसु, जुत्तमेयं तुम्हारिसाणं मुणियपरमत्थाणंति जुत्ते
 चंदिऊण गुरुं गओ नयरीए चक्खवट्ठी । समाहूया नायरयंमत्तिसामत्तसेणावइपसुहपहाणपुरिसा, भणिया य-भो भो
 इयाणिं जाया अह गिहपरिचायबुद्धी, काउं वंछामो निगंगथावयणपडिवत्तिं, ता खमियवं तुम्भेहिं जं मए पुरा

निओइया आणानिद्देसे, काराविया सेवाविहिं, पीडिया समहिगकरगहेणत्ति, तेहिं भणियं-देव !
वज्जोवलेहिं घडियं हिययं अम्हारिसाण निब्भंतं । जं एरिसाइं वयणाइं तुम्ह सोउं न विहडेइ ॥ १ ॥

जणणीजणगा जेणं पढमं उवगारिणो परं जाया । परसुत्तरुत्तरगुणसु नूणं अम्हे तए ठविया ॥ २ ॥

ता कह इयाणिं तुह चरणकमलसेवाविवज्जिया गेहे । निग्घिणचित्ता अम्हे निवसंता नेव लज्जामो ॥ ३ ॥

जह तुम्हे तह को वा अवराहपयं तित्तिक्खिही अम्ह । जह इहलोए तह परभवेऽवि ता नाह ! तं सरणं ॥ ४ ॥

एवं भणिए राइणा वुत्तं-जइ एवं ता निययेहेसु गंतूण सट्ठाणे पुत्ते ठविकुण य कयसयलकायवा पवरसिविगा-
धिरूढा ममंतिं पाउब्भवह, तहत्ति पडिवज्जिकुण गया ते सगिहेसु, कयं तक्कालोचियं किच्चं, राइणावि
अभिसित्तो नियरजे पुत्तो, समप्पिया करितुरगाइणो, कयमज्जणालंकारपरिगहो य चारुसिविगाधिरूढो तेहिं सव्वेहिं-
वि पच्चज्जागहणाभिलासीहिं परिवुडो दिज्जंतेसु अणिवारियप्पसरं कणगाइदाणेसु वज्जंतेसु चउच्चिहतूरेसु नचंतेसु तरुणि-
सत्थेसु शुणंतेसु मागहनियेहेसु गओ उज्जाणं, ओयरिओ सिचिगाओ, तिपयाहिणीकाऊण वंदिओ सूरी परिचत्ता-
भरणस्स य दिन्ना से गुरूहिं पच्चज्जा, अंगीकया य तेण भावसारं । अह पढियजिणिंदुहिद्विसिद्धंतसत्थो गुरुजणपय-
आराहणुज्जुत्तचित्तो परिहरियपमायुम्मायमायापवंचो बहुविहतवकम्मासेवक्खीणदेहो ॥

विमलगुणकलावं अज्जिणंतो जिणंतो, कुसुमसरपमोक्खं वेरिवग्गं समग्गं ।

नियजियमिव सन्वे पाणिणो रक्खमाणो, खणमिव अचयंतो सुत्ततत्तत्थचित्तं ॥ १ ॥

सुहदुहमणिलेद्धूसुमित्ताइएसुं, तुलमिव समरूवं चित्तवित्तिं धरितो ।

तिणमिव पडलगं छंडिउं सव्वसंगं, विहरइ वसुहाए निप्पकंपो महप्पा ॥ २ ॥

तो वासकोडिमंगं पव्वज्जं पालिऊण कयमरणो । सुक्कमि देवलोए जाओ देवो महिड्डीओ ॥ ३ ॥

इय वीरनाहचरिए सुपवित्ते दुक्खदारुकरवत्ते । सिवपुरसंसुहपत्थियमंगलकलसेक्कवरसउणे ॥ ४ ॥

उसभजिणकहियहरिचक्कवट्टिपयपवरलाभपडिवद्धो । जणमणचिम्महयजणणो संमत्तो तइयपत्थावो ॥ ५ ॥ जुम्मं ॥

(इति तइओ पत्थावो)

चतुर्थः प्रस्तावः

हरिचक्कवईण इमा भणिआ वत्तवया पयत्तेणं । एत्तो नंदणनरवइवित्तंतं भे परिकहामि ॥ १ ॥

अत्थि सयलवसुंधारामणीरयणकन्नपूरोवमा वेसमणरायहाणिचिब्भमा छत्ता नाग नयरी, तत्थ धम्मराओ नयमगपव्वत्तेण कयंतो कोवेण अज्जुणो कित्तीए वलभद्दो भुयवलेण मयलंछणो सोमयाए दिणयरो पयावेण पवणो सरीरसामत्थेण गुरू गुरुवुद्धिविभवेण महुमहो वलिससुदमणेण वम्महो रूवेण सयलजयपायडजसो जियसत्तू नाम राया, तस्स य मथरद्धयपणइणीसमइरेगरूवविभवेऽवि विगयदप्पा इत्थिभावेऽवि दूरपरिचत्तमाया जहत्याभिहाणा

महा नाम देवी, तीए सद्धिं अणुरुवविसयसोक्खमणुहवंतस्स राहणो वच्चंति वासरा, अन्नया य सो पियमित्तो आउयक्खएणं देवलोगाउे चइऊण समुपण्णो तीसे पुत्तत्तणेण, कयं च समुचियसमए नंदणोत्ति नामं, धवल-
पक्खससहरव वड्डिओ सरीरेणं कलाकलावेण य । अन्नया पिउणा जोगोत्ति कलिऊण निवेशिओ नियपए, जाओ सो नंदणो राया, पुव्वप्पवाहेण पालेइ मेइणी । एवं च तस्स निज्जिणंतस्स सत्तुनिवहं इंदियगणं च वित्थारंतस्स दिसामुहेसु निम्मलं जसप्पसारं गुणनिवहं च पणासंतस्स दोससमूहं पियुणवगं च नितस्स समुन्नइं कोसं बंधुजणं च परिपालितस्स साहुलोयं गुरुजणोवएसं च समइक्कंताइं चउवीसवाससयसहस्साइं । अन्नया य वाहिरुज्जाणे समोसढा भयवंतो भीमभवजलहितरणतरंडा विमुद्धसन्नाणाइगुणरणकरंडा मोहमहामल्लपेहणपयंडा कुमयतमोमुमुमूरण-
चंडमायंडा मिच्छत्तंघजगअवलंबणेक्कदंडा पडिबोहियभवियकमलखंडा सुगहियनामधेया पोट्टिलाभिहाणा थेरा, तओ सो राया विण्णायतदागमणो वियसियवयणो समुल्लसियकवोलो वियंभियसवंगरोमंचकंचुओ समागओ वंद-
णत्थं । तओ तिपयाहिणीकाऊण पढमंदसणुच्छलियहरिसपगरिसविप्फारियाणं धवलदिट्ठिवायाणं छलेण विल-
सियसभमरसियक्कुसुमेहिं पूयापब्भारंपिव सव्वंगियं गुरुणो करेमाणो पयलंतनयाणाणंदजलेण पक्खालेउमुवट्ठिओव्व चरणे चरणेकरसियमाणसो माणसोयरहिओ हिओवएसोवलंबकामो कामोवघायसूरस्स सूरिणो निवडिऊण चलणेसु परमपमोयसुव्वहतो भणिउमाढत्तो—

वल्लिहरहरिसुराणंपि अज्ज मन्नामि अप्पयं अहियं । जं तुम्ह पायपउमं दुल्लहलंभं मए पत्तं ॥ १ ॥
 ते दूरनिरंतरवित्थरंतंसुहनिवहभाइणो मणुया । जे तुम्ह चलणकमले कुणंति भसलत्तणं धन्ना ॥ २ ॥
 जीविज्जइ कज्जि एत्तियस्स तुच्छेऽवि जीवलयंमि । जेण किर कहवि तुम्हारिसेत्थ दीसंति तित्थसमा ॥ ३ ॥
 उव्वहउ मही भुवणत्तएवि पयडं वसुंधरा नामं । जा अज्जवि तुम्ह सरिच्छयुरिसरयेणाइं धारेइं ॥ ४ ॥
 इय थुणिज्जणं विरए भंत्तीए नंदणे नरिंदंमि । जोगोत्ति कलिय कहिउं पारद्धो स्वरिणा धम्मो ॥ ५ ॥
 भो नरवइ ! संसारे सुचिरं परिभमिय दुक्खसंतत्ता । नरयाइगईसु केऽवि पाणिणोऽणंतकालेणं ॥ ६ ॥
 बालतवायराणाओ अहवावि अकामनिज्जरवसेण । पावंति माणुसंत्तं कहकहवि हु रिद्धिसंजुत्तं ॥ ७ ॥ जुम्मं ॥
 पत्ते य तंमि अविगणियभवभया चत्तधम्मपडिबंधा । हीलियधम्मायरिया उवहसियविसिद्धजणंचेट्ठा ॥ ८ ॥
 विसंएसु पसज्जंती पाणिवहाईसु संपयट्ठंति । भंगुरमवि ससरीरं मन्नता सासयं मूढा ॥ ९ ॥ जुम्मं ॥
 अन्ने पुण मणवंछियभोगुवभोगोवलंभभावेऽवि । आणिस्सरियपहाणे विस्संभरनायगत्तेऽवि ॥ १० ॥
 विसयवामूढाविहु धम्मगिरं सुणिय धम्मगुरुमूले । नरवइ ! नरसिंहो इव पव्वज्जं संपव्वज्जंति ॥ ११ ॥ जुम्मं ॥
 अहवा पुण्णवसज्जियरज्जुगुदामलच्छिविच्छड्ढो । नरविक्रमनरनाहो तस्सेव सुओ महासत्तो ॥ १२ ॥
 एए किय महणिज्जा पवरं एयाण चेव पुरिसत्तं । जेसिं जणविम्हयकरं चरियं सलहिज्जइ जयंमि ॥ १३ ॥

इमं च सोच्चा नंदणनराहिचेण जंपियं-भयवं ! को एस नरसीहो ? को वा तस्स सुओ नरविक्रमो ? कंहं वा एसो रज्जुदुगं लद्धूणवि पव्वजं पवन्नोत्ति सवित्थरं साहेह, महंतं मे कोउगं, सूरिणा जंपियं-निसामेहि ।

अत्थि कुरुविसयतिलयभूया अदिट्ठपरचक्कभया जणनिवहाणुगया जयंती नाम नयरी,
पालेइ तं च ससहरसरिच्छपसरंतकित्तिपन्भारो । निप्पडिमपयावकंतसत्तुपणिवइयकमकमलो ॥ १ ॥

उत्तुंगतुरयासिंधुरपक्कलपाइक्कचक्कवलकलिओ । सक्कोव्व सुरपुरिं परमविक्रमो राय नरसिंधो ॥ २ ॥
विसमच्छो इत्थीलोलुओ य दुग्गाववद्धनिचरई । जस्स हरोऽवि न सरिसो तस्स समं कं जणं भणिमो ? ॥ ३ ॥

तस्स य नीसेसअंतेउरप्पहाणा वयणलायणावगणियपडिपुण्णचंदमंडला सल्लियवेल्लहलगइविजियराय-
हंसा कुम्मुण्णयकमलकोमलपाडलचलणजुयला रायहाणिव्व मयरद्धयनरनाहस्स विसालसालव्व विमलसीलसाली-
णयामहामोह्लमंडस्स मंजूसव्व सव्वरइसोक्खमणिखंडमंडारस्स चंपयमाला नाम भारिया अहेसि, जीसे भंगुरत्तणं
तिरिच्छच्छिविच्छोहेसु न धम्मकम्मुच्छाहेसु तरलया विमलमणिमुत्ताहारे न विसिट्ठलोयववहारे तणुत्तमुदरस्स न
सरस्स कुडिलत्तं केसकलावस्स न सप्पणयालावस्स, अवि य—

नियरूवविजियसुरवहुजोव्वणगव्वाए कुवल्यच्छीए । उब्भडसिंगारमहासमुदुद्धरिसवेलाए ॥ १ ॥
को तीए भणियविब्भमनेवत्थच्छेययागुणसमूहं । वण्णेउ तरइ तूरंतओऽवि जीहासएणंपि ? ॥ २ ॥

तथा-नियचक्रसंधिरक्खणवियक्खणो पयइपालणाभिरओ । अन्नोऽन्नवद्धपणओ दूरं संतोससारी य ॥ ३ ॥
सुप्पणिहियपणिहियओ पसुणियरिउचक्कपुचिलवाचारो । पडुभत्तो गुणरागी निवूढभरो महारंभो ॥ ४ ॥
एक्केक्कपहाणगुणो मंतिजणो बुद्धिसारपसुहो से । अत्थी समत्थनयसत्थ(नि)समणचित्थरियमइपसरो ॥ ५ ॥

अणवरयमसुरकीरंतडमरभयविडुरसुरवहसुहडं । हीरंतपवररणं जो सोच्चा तियसरायपुरिं ॥ ६ ॥

उवहसइ सुरगुरुं पिच सबुद्धिमाहप्पपडिहयविपक्खो । तस्स किर मंतिवगस्स भणसु केणोवमं कुणिमो ? ॥ ७ ॥ जुम्मं ।
एवंविहगुणे मंतिजणे समारोवियरज्जाचिंतामहाभरस्स लीलाए चिय धरं धरंतस्स गामागरनगराडलं धरणिमंडलं

वससुवणिंतस्स जायमरणभयवामोहं दुइंतसामंतसमूहं पवत्तयंतस्स दीणाणाहजणमणोवंच्छियपूरेणक्कपच्चलाओ महा-
दाणसालाओ कारिंतस्स तुंगसिंगोवहसियहिमसेलसिहरसिंगाई मयणाइमंदिराई निसामितस्स धम्मत्थपयासण-
समत्थाई समयसत्थाई आराहितस्स दुक्करतवचरणसलिलपक्खालियपावमलाई गुरुचरणकमलाई निवारितस्स ज-
णियजणवामोहं धम्मविरोहं सम्माणितस्स गुणगणोदगं पणइसयणवग्गं पुव्वज्जियसुकयसमुब्भवंतंचिताइरित्तसो-
क्खस्स पुरिसत्थसेवणञ्जुयस्स नयविणयवंतस्स दाणाणंदियवंदिजणसंदोहुगुडुल्लुट्टुचरियस्स वोळिति वासरा तस्स
राइणो सुयणपयडस्स । अन्नया य विचित्तचित्तमणहरंमि मंदिरंमि पच्छिमरयणीसमए सुहसेज्जाए सुत्तस्स तस्स
मंदीभूयंमि निद्दापसरे वियक्खणेण पढियमेक्केण जामरक्खगपुरिसेण—

जे पुवपुरिसवंसप्परोहगाढप्परुढमूलसमं । वेरि कुलकमलनिदलणकुंजरं सयलगुणनिलयं ॥ १ ॥
पुत्तं ठविउं नियए पयंमि पडिवन्नसंजमुज्जोगा । इह परमवे य कह ते पाविति न निव्वुइं पुरिसा ? ॥ २ ॥ (जुम्मं)
एवं च सोच्चा चित्तिंयं रत्ता-अहो दुल्लंभमेयं, जओ मम एत्तिथकालेऽवि पउरासुवि पणइणीसु न एक्कस्सवि कुलालं-
वणस्स पुत्तस्स लाभो जाओ, अच्छउ सेसं, एवं ठिए य किं करेमि ? किं समाराहेमि ?, कत्थ वच्चामि ? कस्स
साहेमि ? को उवाओ ? के वा एरिसकज्जे सहाया ? को य मे पुरिसयारो ? का वा पुवकम्मपरिणइत्ति खणं किं-
कायवयमूढयं अणुभविय तवेलं चेव अंगीकयसत्तभावो एवं सम्मं परिभाविउं पवत्तो-

परलोयपवत्ताणं जइवि सुएहिं न होइ साहारो । जं सवंसय उवरिं गओवि नगओ दुहं कुणइ ॥ १ ॥
तहविय पुव्वनराहिवसंतइवुच्छेय दुक्खमक्खिवइ । मज्झ मणो पुव्वनारिंदरक्खिओ कुरुजणवओ य ॥ २ ॥ (जुम्मं)
एत्थंतरे जायाइं समुड्ढियमारुंडकारंडवहंसचक्कवायकुलकोलाहलाउलियाइं दिसिसुहाइं वियलंतपभापसरो वि-
च्छाईभूओ तारयानियरो पसरिया सिंदुरेणुपुंजपिंजरा सूस्साराहिपभा ताडियाइं पडहसुवच्चल्लरिभंभाभेरीभंकार-
भासुराइं पभायमंगलतूराइं समुगओ कमलसंडपयंडजड्विच्छुडुखंडणुडामरकरपसरो दिणयरो, तओ उट्टिज्जण स-
यणिज्जाओ निस्सरिओ वासभवणाओ कयपाभाइयकिचो अंगरक्खपीढमद्दप्पमुहपहाणपरियणाणुगओ अत्थाणीमंडवे
गंतूण राया अणेगमणिकिरणविच्छुरियंमि सूरोव पुव्वपवयसिहरंमि कणयसिहासणंमि निविट्ठो, तयणंतरं च ठियाओ

उभयपासेषु चामरगाहिणीओ निविट्ठा य नियनिथट्ठाणे मंतिसामंतसुहडखंडरक्खपामोक्खा पहाणपुरिसा पडि-
 च्छियाइं पंचंतरायपेसियमहरिहपाहुडाइं चित्तियाइं रज्जकज्जाइं, खणंतरे य पेसियनीसेससामंतपभिइजणो कइव-
 यपहाणजणपरियरिओ एंगंतट्ठिओ रयणिवइयरं बुद्धिसारपमुहाण मंतीणं संसिऊण पुच्छिउभेवं समारद्धो-भो
 मंतिणो ! सुणह तुब्भे समयसत्थाइं बुज्झह तंतमंतपडलाइं पज्जुवासह विज्जासिद्धे सयंपि सवोवहासुद्धबुद्धिणो विवे-
 यह गुविलंपि कज्जजायं, ता साहह कहमिसस्स सुयलाभंचितासायरस्स पारं वच्चिस्सामोत्ति ? खणंतरं च चित्तिय
 जुत्ताजुत्तं भणियं मंतिवगणे-देव ! सुहु सट्ठाणे समुज्जमो, अम्हे पुरावि देवस्स एयमट्ठं विन्नविउकामा आसि,
 संपयं पुण सयमेव देवेण सिट्ठे लट्ठं जायं, किं तु देवो अम्हे उवायं पुच्छइ, तत्थ य किं साहेमो ?

अइदिघनाणनयणोवलब्भरूवंमि एत्थ वत्थुंमि । कमुवायविहिं भणिमो ? किं वा पच्चुत्तरं देमो ? १ ॥

आगारिं गियगइमणिइगोयरं मिणइ मारिसो अत्थं । एवंविहे य कज्जे अम्हं को बुद्धिवावारो ? २ ॥

एयं पुण जाणेमो नियनियकम्माणुरूवठाणेसु । जीया उवायविरहेवि होंति पुत्ताइभावेणं ॥ ३ ॥

हसिऊण भणइ राया जइ एवं जणणिजणगविरहेऽवि । गयणंगणे पइक्खणसुववज्जंतीह किमजुत्तं ? ४ ॥

कम्मपहाणत्तणओ ता मा एंगंतपक्खमणुसरह । जं दव्वखेत्तकालावि कारणं कज्जसिद्धिमि ॥ ५ ॥

अह भालयलमिलंतकरकमलं जं देवो आणवेइ अचित्तहमेयंति मन्निऊण बुद्धिसारपमुहो मंतिवगो भणिउमा-

ढत्तो—देव ! जइ एवं ता निसामेहि, अत्थि इहेव साहियपयंडचंडियाविजो सुंडमालालंकियविगहो निउणो पि-
सायसाहणेसु साहसिओ साइणीनिगहे कयकरणो खेतवालावयारेसु खोइकखमो कन्नविजासु ओसहीसहस्ससंपि-
ट्टुरसायणपाणपाणासियजराचिहुरो विवरपवेसपरितोसियजक्खणीलक्खपरिभोगप्पयारपरूवणंपंडिओ महवइयेव-
सधारी घोरसिवो नाम तवस्सी ।

अवि य—आगिट्ठमि पगिट्ठो खुन्नो पन्नगमहाविसुद्धरणे । विक्खेवकरणदक्खो अमूढलक्खो वसीकरणे ॥ १ ॥

जं सत्थेसु न सिट्ठं बंधुखुद्धीहिं पुव्वपुरिसेहिं । जं नो पुव्वकईणवि कहिंपि मइगोयरंमि गयं ॥ २ ॥

जुत्तीहिचि जं विहडइ सुयंपि जं सहंति नो कुसला । जं सुइरंपि हु दिट्ठं संदिज्झइ तंपि दंसेइ ॥ ३ ॥ (जुम्मं)

भणइ य अत्थि असज्झं मज्झं भुवणत्तएवि नो किंपि । जइ सो एयसमत्थो एत्थवि देवो पमाणंति ॥ ४ ॥

एवं सोच्चा रत्ना कोउहलेण भणिया पहाणपुरिसा—अरे आणेह तं सिग्घमेव, जं देवो आणवेइत्ति भणिकुण
निक्खंता ते य रायभवणाओ, गया तस्सासमपयं, पणमिऊण निवेइयं से आगमणप्पओयणं, तओ हरिसुप्फुल्लो-
यणो कयकिच्चमप्पाणं मन्नतो तो चलिओ घोरसिवो रायपुरिसेहिं समं, पत्तो य रायभवणं, दुवारपालनिवेइओ गओ
रायसमीवं, दिन्नासणो उवविट्ठो, सम्मानिओ उचियपडिवत्तीए नरवइणा, खणंतरे य पुच्छिओ एसो—भयवं ! कयरीओ
दिसाओ आगमणं ? कत्थ वा गंतवं ? किं वा एत्थावत्थाणप्पओयणंति ? घोरसिवेण भणियं—महाराय ! सिरिपव्वयाओ

आगओऽहि, संपयं पुण उत्तरदिसिंदरीसवणकन्नपुरे जालंधरे गन्तुमिच्छामि, जं पुण पुच्छह अवत्थाणपओयणं तत्थ
 य तुम्ह दंसणमेव, संपयं एयंपि सिद्धंति, नरवइणा भणियं—भयवं ! निरवग्गहा सुणिज्जइ तुम्ह सत्ती मंततंतेसु ता
 दंसेसु किंपि कोउगं, तओ जं महाराओ निवेयइत्ति पडिवज्जिय तेहिं तेहिं दिट्ठिवंचणदेवयावयारणनरवेहुपुफेवहनट्ट-
 मुट्ठिसुहडुक्खपरिजाणणप्पमुहकोऊहलेहिं वसीकयं घोरसिवेणं नरिंदचित्तं, अह अवसरं लहिऊण भणियं राइणा-
 भयवं ! किं एएसु चेव कोऊहलेसु तुह विन्नाणपगरिसो उआहु अन्नत्थवि अत्थि ?, सुणिणा भणियं—किमेवमसं-
 भावणागग्गभमम्हारिसजणानुचियं बाहरसि ?, एगसद्देणेव सोहेसु जं दुक्करं पि कीरइ, तओ राइणा निवेइओ पुत्त-
 जम्मलाभविसओ दुत्तंतो, घोरसिवेण भणियं—किमेत्तियमेत्तेण किलिस्ससि ?, अहमेयमट्टं अकालेवि अविलंबं पसा-
 हेमि, राइणा भणियं—जइ एवं ता परमोऽणुग्गहो, केवलं को एत्थ उवाओ ?, घोरसिवेण भणियं—एगंते निवे-
 यइस्सं, तओ उक्खत्ता कुवल्लयदलसच्छाहा मंतीसु राइणा दिट्ठी, उट्ठिया य इंगियागारकुसला सणियं सणियं नरिं-
 दपासाओ मंतिणो, जायं विजणं, घोरसिवेण जंपियं—महाराय ! कसिणचउद्दसीनिसिए मए बहुपुप्फफलधूवक्ख-
 यवल्लिभक्खपरियरेण तुमए सह भयवं महामसाणहुयासणो तप्पणिज्जो, राइणा चित्तियं—कहं नु मए पुप्फाइपरि-
 यरेण सह हुयासणो तप्पणिज्जोत्ति ?, अवसद्देत्ति, अहवा अभिप्पायसाराइं इसिवयणाइं, नो विसंबंधलक्खणद्दुसण-
 मावहंति, सुणिणा भणियं—महाराय ! सुणणचक्खुक्खेवो इव लक्खीयसि, राइणा भणियं—मा एवमासंकह, निवेयह

जहा पारद्धं, मुणिणा भणियं—तओ सो भयवं हुयासणो—उब्भडयडियरूवो पयंडजालाकलावभरियनहो । दाही तुज्झं वंछियफलनियं कप्परुक्खोव ॥ १ ॥ राइणा भणियं—जइ एवं ता सब्बहा आगमिस्सं चउइसीनिसाए, एस अत्थो साहियवोत्ति, पडिवज्जं च तेण, अह कयकुसुमतंबोलदाणसम्माणे सट्ठाणंमि गए घोरासिबे राया निव्वत्तियदेव-
याचरणकमलपूयापडिवत्तीहिं तेहिं तेहिं अस्सदमणाइएहिं विचित्तविणोएहिं अप्पाणं विणोएंतो पइक्खणं दिणाइं गणमाणो य कालं गमेइत्ति, कमेण य पत्ताए कसिणचउइसीए आहूयं मंतिमंडलं, निवेइयं रहस्सं, पुच्छियं च-संपयं किं कायव्वंति ?, मंतीहिं पभणियं—देव ! किंपागफलाइंपिव मुहंमि मइराइं परिणइहुहाइं अन्नाइं तदिहराइं हुहावि दीसंति कज्जाइं, अत्थस्स संसओऽविहु पविच्छिहेउत्ति किं तु निहिट्ठो, अविमुक्काविस्सासेहिं सब्बहा उज्जमेयव्वं, एवं भणिए राइणा कुसुमतंबोलाइदाणपुव्वगं सम्माणिऊण मंतिवग्गो पेसिओ सगिहे, जाए य रयणिसमए सयं कयवे-
सपरियत्तो नियत्तियपीढमहाइपरियणो समग्गवल्लिफलफुल्लपमुहसाहणपडलसमेओ करकलियतिक्खग्गखग्गमंडलो घोरासिवसमेओ अलक्खिज्जंतो अंगरक्खेहिं अमुणिज्जंतो दासचेडचाडुकारनियरोहिं वारिज्जमाणो पवत्तिज्जमाणो य पडिक्खेहिं अनुक्खेहिं य अणेगेहिं सउणेहिं संबंगनिचिच्चिसिद्धरक्खामंतक्खरो संपत्तो महीवई महामसाणदेसं । जं च केरिसं ?—

निलीणविज्जसाहगं पवूढपूयवाहगं, करोडिकोडिसंकडं, रडंतधूयकक्कडं ।

सिधासहस्ससंकुलं मिलंतजोगिणीकुलं, पभूयभूयभीसणं कुसत्तसत्तनासणं ॥

पघुट्टुट्टुसावयं जलंततिवपावयं, भमंतडाइणीगणं पवित्तमंसमगणं ॥ १ ॥

कहकहकहट्टहासोवलकलगुरुरक्खलक्खलदुप्पेच्छं । अइरुक्खलक्खलसंवद्धगिद्धपारद्धघोररवं ॥ २ ॥

उत्तालतालसहुम्मिलंतवेयालविहिहयहलवोलं । कीलावणं व विहिणा विणिम्मियं जमनरिंदस्स ॥ ३ ॥

तत्थ य निरुविओ सल्लक्खणभूमिभागो घोरसिवेण, खित्तं च बलिविहाणं कया खेत्तवालपडिवत्ती खणिया वेइया भरिया खाइरंगाराणं मसाणसमुत्थाणं, भणिओ य राया-अहो सो एस अवसरो ता दढमप्पमत्तो ईसाणकोणे हत्थसयदेससंनिविट्ठो उत्तरसाहगत्तणं कुणमाणो चिट्ठसु, अणाहूओ य मा पयमवि चलेज्जासित्ति पुणो पुणो निवारिय पेसिओ नरिंदो, गओ य एसो, घोरसिवेणावि आलिहियं मंडलं, निसन्नो तहिं, निबद्धं तहिं पउमासणं, कयं सकलीकरणं, निवेसिआ नासावंसगगे दिट्ठी, कओ पाणायामो, नायबिंदुलवोववयं आढत्तं मंतसुमरणं, समारूढो ज्ञाणपगरिंसंमि । इओ य चित्तियं राइणा-अहं किर पुवं सिक्खं गाहिओ मंतीहिं, जहा-अविस्सासो सव्वत्थ काय-वोत्ति, निवारिओ य सव्वायरं पुणो पुणो एएण जहा अणाहूएण तए नागंतव्वंति, ता समहियायरो य जणइ संकं, न एवंविहा कावालियमुणिणो पाएण कुसलासया हवंति, अओ गच्छामि सणियं सणियमेयस्स समीवं, उवलक्खेमि से किरियाकलावंति विगप्पिउं जाव पट्ठिओ ताव विफुरियं से दक्खिणलोयणं, तओ निच्छियंवच्छियत्थलाभो करकलिय-

करवालो कसिणपडकथाचंगुठणो मंदं मंदं भूमिविसुक्कचरणो गंतूण पुट्टिदेसे ठिओ घोरसिवस्स, सुणिउमाढत्तो य, सो य ज्ञाणपगरिसत्तणेण अणावेक्खिय अवायं अविभाविय पडिक्कलत्तं विहिणो अविन्नायतदागमणो नरवइथोभक-
रणदक्खाइं मंतक्खराइं पुव्वपवित्तविहिणा समुच्चरितो निसुणिओ रत्ता, परिभावियं चउणेण-अहो एस दुट्टतवस्सी
मं थोभविहिणा चिवलं काऊण सन्निहितनिहित्तकत्तिथाए परिक्खवियकयंतममुहकोणकुडिलाए विणासिऊण हुयवहं
तय्पिउं वंछति, पहाणनरोवहारविहिणा हि सिज्झंति दुट्टदेवयाओ, ता किमेत्थ जुत्तं?, अवि यं—

एतस्स किं इयाणिं वावडचित्तस्स तिव्वखगगेण । कदलीदलं व सीसं लुणामि पासंडिचंडस्स ॥ १ ॥

अहवा दुद्धरिउगंधसिंधुराघायंदंतुरगगेण । खगगेण मज्झ लज्जिज्झइह घायं करंतेण ॥ २ ॥

केवलमुवेहणिज्जो नयेस एयंमि होइ पत्थावे । जं थोभकरणविहिणा मरणं मह वंछइ कांडं ॥ ३ ॥

तथापि-ज्ञाणाचरोहवक्खित्तचित्तपसरंमि हणिउकामस्स । सगं गयावि गुरुणो होहिंति परंमुहा मज्झ ॥ ४ ॥

ता जुत्तमिणं ठाऊण दूरदेसंमि वोहिउं एयं । पढमं दिन्नपहारे पडिपहरेउं ममेयंमि ॥ ५ ॥

इय चिंतितऊण रण्णा ठाउं दूरे पयंपियं एयं । गिणहसु करेण सत्थं रे रे पासंडिचंडाल ! ॥ ६ ॥

इइ सोचा ज्ञाणेगंगभंगरोसोवरत्तनयणजुओ । भालयलघडियभडभिउडिभीसणो उट्ठिओ सोउवि ॥ ७ ॥

करकलियनिसियकत्तियनियंतकसिणप्पमोलिजडिसंगो । अह तिव्वगव्वघोरं घोरसिवो भणिउमाढत्तो ॥ ८ ॥

रे रे दुहुनराहिव ! विलज्ज निस्सत्त मा पलाइहिसि । सुयविसयतिक्खदुक्खाओ जेण मोएमि तं झत्ति ॥ ९ ॥
 रणा पढियं मा गज्ज निष्फलं पहर रे तुमं पढमं । न कयाइवि अम्ह कुले पढमपहारो कओ रिउणो ॥ १० ॥
 तत्तो विचित्त वगगणसुनिउणकरणप्यारकुसलेण । धोरसिवेणं रत्नो पवाहिया कत्तिया कंठे ॥ ११ ॥
 रत्नावि तक्खणं चिय दक्खत्तणओ इमस्स सत्थजुओ । हत्थो पहारसमए वद्धो नियवाहुवंधेण ॥ १२ ॥
 भुयदंडनिविडपीडणविहडियदढपहरणंमि हत्थंमि । मुट्ठिप्पहारपहओ निवाडिओ सो धरणिवट्ठे ॥ १३ ॥
 दढमंततंसिद्धीवि विहडिया तस्स तंमि समयंमि । विवरंमुहंमि दइवे अहवा सबं विसंवयइ ॥ १४ ॥
 अह वीसमिऊण खणं धोरसिवो फुरियवीरिओ सहसा । पारद्धो रत्ना सह जुज्झेउं वाहुजुज्झेणं ॥ १५ ॥
 मज्झाण व खणसुट्ठीण पडणपरिवत्तणुव्वलणभीमो । सरहसहसंतंभूओ अह जाओ समरसंरंभो ॥ १६ ॥
 निविडभुयदंडचंडिमसंपीडणविहडियंगवावारो । मुच्छानिमीलियच्छो अह निहओ सो महीवइणा ॥ १७ ॥
 एत्थंतरंमि तियसंगणाहिं वियसंतसुरहिकुसुमभरो । जयजयसहुम्मीसो पम्मुक्को नरवइसिरंमि ॥ १८ ॥
 हारद्धहारकंचीकलावमणिमउडमंडियसरीरा । रणज्झणिरमहुरनेउरखपूरियदसदिसाभागा ॥ १९ ॥
 नवपारियायमंजरिसोरभरहसुम्मिलंतभसलंकुला । धरियधवलायवत्ता तहागया देवया एक्का ॥ २० ॥ जुम्मं ।
 तीए भणियं नरसिंघ ! निच्छियं तंसि चैव नरसिंघो । जेणस महापावो खत्तियखयकारओ निहओ ॥ २१ ॥

रषणा भणियं कह देवि ! कहसु खत्तियखयंकरो एस ? । मइ जीवन्ते संपइ, पडिभणइ निवं तओ देवी ॥ २२ ॥
एएण किंपि सिद्धिं समीहमाणेण पावसमाणेण । हणिया कलिंगवंगंगहूणपंचालपमुहनिवा ॥ २३ ॥
दिट्ठिप्पवंचमाइंदजालपमुहेहिं कूडकवेडेहिं । अच्छरियाइं दावितएण को को न वा नडिओ ? ॥ २४ ॥
न य केणवि एस जिओ न यावि एयस्स लक्खियं सीलं । तुमए उभयंपि कयं अहह मई निम्मला तुज्झ ॥ २५ ॥
इय तुह असरिससाहससुंदरचरिएण हरियहिययाए । मम साहसु किंपि वरं जेणाहं तुज्झ पूरेमि ॥ २६ ॥
तोहे मउलियकरकमलसेहरं नामिउं सिरं राया । भणइ तुह दंसणाओऽवि देवि ! अन्नो वरो पवरो ? ॥ २७ ॥
भणियं सुरीएं नरवर ! इयरजणेन्व न जइवि पत्थेसि । तहवि तुह वंछियत्थो होही मज्झाणुभावेण ॥ २८ ॥
इय भणिए नरचइणा पराएं भत्तीएं पणमिया देवी । लच्छिच्च पुण्णरहियाण झत्ति अंदसणं पत्ता ॥ २९ ॥
नरिंदोऽवि तारिसमच्चब्भुयं देवीरूवं सहसच्चिय नयणगोयरमइकंतमुवलब्भ चिंताकल्लोलमालाडलो एवं परि-
भावेइ—किमेयं सुमिणं उआहु विभीसिया अहवा एयस्स चेव दुट्ठकावालियस्स मायापवंचो किं वा मम मइ-
विन्भमो उयाहु अवितहमेयंति ?

इय जाव निवो संदेहदोलमालंबिउं विकप्पेइ । मा कुणसु संसयं ताव चारिओ गयणवाणीए ॥ १ ॥
घोरसिवोवि मत्तो इव सुच्छिओ इव दढदुघणताडिओ इव महापिसायनिष्फंदीकओ इव सुसियसारवक्खरो इव

पियविरहमहागहगहिओ इव दुट्टोसहपाणप्पणट्ठचित्तचेयणो इव खणंतरं चिट्ठिय सिसिरमारुएण समासासियसरीरो
 थोवोवलद्धचेयणो मंदमंदमुम्मीलियलोयणजुयलो लज्जावसविसंतुलसन्वंगोवंगो अइदीणवयणो दीहसुस्ससिय राया-
 णमवलोइउं पवत्तो, नरवइणावि दढसंजायकरुणभावेण अइदुक्खिओ एसोत्ति उवलक्खिय भणिओ घोरसिवो-
 भो किमवलोएसि?, घोरसिवेण सगगयं भणियं—महाराय! अवलोएमि नियकम्मपरिणइविलसियं, राइणा
 भणियं—किमेवं सविसायं जंपसि?, सन्वहा धीरो भव परिहर दुरज्झवसायं परिचय कोवकंडुं विमुंच विजयाभिलासं
 अणुसर पसमाभिरइं पियसु करुणारसं परिचित्तसु जुत्ताजुत्तं समुज्झसु खुहजणोचियं वावारंति, अह समीहियत्य-
 सिद्धी न जायत्ति सम्मसि ता गिण्हसु इमं परिकुवियकयंतजीहाकरालं नीलपहापडलसामलियसयलदिसिचक्कवालं
 मम करवालं, करेसु मम सरीरविणासणेण नियसमीहियसिद्धिं, जओ सुक्को मए संपयं पोरिसाभिमाणो तुह कज्जसाह-
 णड्ढाएत्ति । अवि य—

अच्छउ तरंगभंगुरमसारंगं नियसरीरयं दूरे । जीयंपि हु परीहियकारणेण धारंति सप्पुरिसा ॥ १ ॥

जं पुण पढमं चिय तुज्झ कारणे नो समप्पिओ अप्पा । विहिओ य ज्ञाणविग्घो एयं नणु कारणं तत्थ ॥ २ ॥

मम विरहे एस जणो एसो नीसेससाहुवगो य । धम्मन्भंसमवस्सं पाविस्सइ पावलोयाओ ॥ ३ ॥

इण्हिह तुह गुरु दुक्खं उवलक्खिय बद्धकक्खडसहावं । निरेवेक्खं मज्झ मणो जायं सेसेसु कजेसु ॥ ४ ॥

घोरसिवेण भणियं—महाभाग ! मा एवमुल्लवेसु, जीवसु तुमं मज्जीविण्णावि जाव जलहिकुलसेलससितारयदिवाये, पसीयसु मे, वियरसु एकं पसारयति, राइणा भणियं—किमेवं वाहरसि !, जीवियदाणाओऽवि किमवरमदेयं ? ता असंभंतो पत्थेसु, घोरसिवेण भणियं—जइ एवं ता अणुजाणसु मम एयंमि पज्जलंतजालासहस्सकवलियसलभकुलसंकुले भिसिमिसंतद्धदद्धकेलवरुच्छलंतविस्सगंधुदुरे मसाणहुयासणे पवेसुज्जमं, हवसु धम्मबंधवो, नन्नहा मे पुच्चविहिय-महापावपच्चयंकंतस्स अवस्सं विस्सामो भविस्सइत्ति, रण्णा भणियं—कुओ तुह पुवं पावसंभवो ?, जओ कयाइं तुमए चिविहाइं तवचरणाइं आपूरियाइं पावभक्खणदक्खाइं मंतज्झाणाइं पूइयाइं देवकमकमलाइं निवत्तियाइं वेयरहस्सज्झयणाइं उवासिओ गुरुजणो पवट्ठिया धम्ममग्गेसु पाणिणो, ता न सच्चहा वोत्तुमवि जुत्तमेयं भवारिसाणं, घोरसिवेण भणियं—महाराय ! अलमलं मम पासंडिचंडालस्स वीसत्थघाइणो पयडियविचित्तकूडकवडस्स दक्खिन्नर-हियस्स निसायरस्सेव निक्करुणस्स, किंपागतरुफलस्सेव बाहिरमेत्तरमणीयस्स वगस्सेव सुसंजमियपाणिप्पायप्पया-रस्स भुयंगमस्सेव परिच्छदावलोयणनिरयस्स दुज्जणस्सेव मुहमडुरभासिणो संकित्तणेणं, एवं च सच्चहा विरत्तोऽम्हि पावपंकपडिहत्थाओ नियकडेवराओ, नेव य अन्नो पावविसोहणोवाओ, राइणा भणियं—भो भो किमेवं पुणो पुणो अत्ताणं अत्ताणं व पुरिसं दूसेसि !, पयडक्खरं निवेएसु नियपुच्चवित्तंतं, घोरसिवेण भणियं—महाराय ! गरुओ एस बुत्तंतो, राइणा भणियं—किमजुत्तं ?, साहेसु, घोरसिवेण भणियं—जइ एवं ता निसामेहि—

अथ सुरसरितुसारपचित्तपरिसरुद्धेसं विविहावणभवणमालाविभूसियं समूसियसियवेजयंतीरेहंतसुरमंदिरसिहरं
 सिरिभवणं नाम नयरं, तत्थ य पंथंभयंभंडुद्दामपथावपरिसोसियविपक्खजलासओ अणेगसमरवावारविटत्तजसो
 अवंतिसेणो नाम राया अहेसि, जस्स विजयजत्तापत्थियस्स पत्थिवसहस्साणुग्गम्ममाणमग्गस्स उहंउपुंडरीयंपंडुरच्छत्त-
 च्छाइयगयणाभोगा नट्टदिवसावगासव सोहंति दस दिसाभागा, जस्स य गजंतमत्तकुंजरगंडत्थलगलंतनिरंतरमयजला-
 सारजायदुद्धिंधयारभीयाभिसारियव्व अणुसरइ क्वाडवियडं वच्छत्थलं रायलच्छी, जस्स चउविहाउज्जघोरघोसं मे-
 होहरसियंपिव सोऊण दूरं पलायंति रायहंसा, जस्स समरंगणेषु रोसारुणाओ पडिसुहडेसु पडिर्विवियाओ पण्फु-
 ल्लसुकुमारकरवीरकुसुममालाउव्व रेहंति दिट्ठीओ, तस्स य नियरूवलावन्नजोव्वणुणावगणियरइग्गपवायाओ नीसे-
 सपणइणीपहाणाओ दुवे भारियाओ अहेसि, पत्तलेहा मणोरमा य, पढमाए जाओ अहमेक्को पुत्तो वीरसेणो नाम,
 वियाए पुण विजयसेणोत्ति, गाहिया दोऽवि अहे धणुव्वेयपरमंत्थं कुसलीकया चित्तपत्तच्छेयविणोएसु सिक्ख-
 विया य खेडयखग्गुणवणियं जाणाविया महल्लजुद्धं, किं बहुणा?, सुणाविया सव्वकलाकलावं, अन्नया य उचिओत्ति
 परिचिंतिय ठाविओऽहं ताएण जुवरायपए, दिन्ना य मज्झ लाडचोडमरहट्टसोरट्टपमुहा देसा कुमारमुत्तीए, परिपालेमि
 जुवरायत्तणं, ममंपि अणुमग्गमणुसरइ सुहडाडोवसंकुडा पगलंतगंडत्थला दप्पुडुरसिंधुरघडा, ममावि मग्गओ धावंति
 तरलतरतुरंगपहकरा, मज्झंपि परसुसेल्लचंडगंडीधसरविसरकुंतगथापहरणहत्थाइं वित्थरंति चउद्धिसिंवि पुरिसवलाइंति,

दुइयस्सवि मज्झ सवत्तभाउणो दिन्नाइं ताएण कइवय गामसयाइं, एवं च विसयसुहमणुहवंताणं वच्चंति वासरा ।
अणया खणविपरिणामधम्मयाए जीवलोयविलसियाणं पइसमयविणाससीलयाए आउयकम्मदलियाणं अप्प-
डिहयसासणत्तणओ जममहारायस्स सुदिंदावचवलयए धियजणसंपओगसमुब्भवसुहस्स पाविओ अवंतिसेणाराया
पंचत्तंति, कयंमि यं तम्मयकिच्चे मंतिसामंतसरीरक्खप्पामोक्खपहाणलोएण निवेसिओऽहं रायपए, पयट्ठियाइं
मए तायस्स संगंगयस्स कएण तडियकप्पडियदीणाणाहाणिस्सियविदेसियजणाण महादाणाइं कारावियाइं उउं-
गसिंगसुंदराइं देवमंदिराइं निरुवियाइं अवारियसंत्ताइं, कालक्कमेण य विगओ मम सोगो, वसीकयं सामंतचक्कं, नि-
वासिया नियमंडलंविळुपगा पयट्ठिओ पुब्बपुरिसमगो । अन्नया य—

सियसिंधुरखंधगओ विलयाजणधुवमाणसियचमरो । धरियधवलायवत्तो किंकरनरनियरपरियरिओ ॥ १ ॥

उम्मगगपयट्ठुदामतुरयघट्टुक्खउद्धयरओहो । नयरओ निगओऽहं वणलच्छीपेच्छणट्ठाए ॥ २ ॥

जाव य तत्थ पेच्छामि पुप्फफलसमिद्धवंधुरं तरुणतरुणं परिब्भमामि माहंवीलयाहरेसु अवलोएमि कयली-
दलाणं रुंदत्तणं निरिक्खामि संपिडियससिखंडपंडुरं केयइपत्तंसंचयं अगघाएमि अणघवउलमालियासुरहिपरिमलं
केरमि करतलेण सोरभभरलोभमिलंतरणज्झणंतफुल्लंधयरिंछोलिलिज्जमाणमंथरंदं नवंसहयारीमंजरीपुंजं तावं सह-
सच्चिय सुणेमि नियपरियणंकलयलं । कहं ?—

सामी ! पेच्छह गयणंगणंमि कह वट्टए महाजुज्झं ? । सज्झसंकरमइभीमं सुराण विज्जाहराणं वा ॥ १ ॥
 एवं सोच्चा मएवि उत्ताणीकयानिमेसलोयेण उट्टमवलोयमाणेण दिट्ठा विविहप्पयारेहिं जुज्झमाणा गयणंमि
 विज्जाहरां, ते य एवं जुज्झंति—

सियभल्लयसच्चलसिंल्लसूल अवरोप्परु मेल्लहिं भिंडिमाल । वंचावहि तक्खणि लद्धरक्ख पुण पहरह जंय जंस सव्वपक्ख १

खणु निट्ठुसुट्ठिहिं उट्ठियंति, खणु पच्छिमभागमणुव्वयंति ।

खणु जणगजणणि गालीउ देंति, खणु नियसोंडीरिम कित्तयंति ॥ २ ॥

अच्छी निमीलियसुय रहिं चिर साहिय विजयविज्ज, उणु खणे खणे जायहिं जुज्झसज्ज ।

अविगणिय मरण रणरसियचित्त, सुयदंडमहावलमयविलित्त ॥ ३ ॥

इय तेसिं खयराणं परोप्परं जुज्झिराणमेक्कणं । लद्धूण छलं अन्नो पहाओ गुरुमोगरेण सिरे ॥ ४ ॥

पडिओ धरणीवट्ठे ममंतिए विगयचेयणो सो य । सुच्छानिमीलियच्छो विच्छाओ छिन्नरुक्खोव्व ॥ ५ ॥

एत्थंतेरे तयणुमग्गेण चेव कड्डियनिसियखग्गो पधाविओ इयरो विज्जाहरो तस्स वहनिमित्तं, सुणिओ यं मए
 जहा एसो एयस्स विणासणकए एतित्ति, तओ मए मणिया सहवेहिणो धाणुहिया अंगरक्खा य, जहा—

रे रे रक्खह एयं भूमीतलनिवडियं महाभागं । एयं विणासणुज्जयमित्तं खयरं पडिक्खलह ॥ १ ॥

असिखेडयहत्येहिं तस्संगं छाइयं वरभडेहिं । ओगासगलभमाणो रुद्धो खयरो तओ भणइ ॥ २ ॥
हे भो नरिंद ! मुंचसु एयं खयराहमं मम वहट्टा । एसो खु मज्झ वइरी चिणांसियव्वो मएऽवस्सं ॥ ३ ॥
भणिओ य मए खयरो किं पलवसि तं पिसायगहिओव । किं एस खत्तधम्मो ? जेणेवमहं करेमितिं ॥ ४ ॥
किं चावरद्धमिभिणा जेणेयं मारिउं समीहेसि । सो भणइ एस मम दारभोगरसिओत्ति ता हणिमो ॥ ५ ॥
ताहे मए स भणिओ साह् इयरो व होउ नऽप्पेमि । सरणागयरक्खणलक्खणं च राईण खत्तवयं ॥ ६ ॥
उब्बद्धभिउडिभंगो रोसारुणनयणजुयलदुप्पेच्छो । फरुसक्खरोहिं खयरो ताहे मं भणिउमाढत्तो ॥ ७ ॥
रे रे दुट्टनराहिव ! मा वोहसु केसरिं सुहपसुत्तं । दिट्ठीविसाहितुंडं कंइयसु मा करगणे ॥ ८ ॥
जालालिभीममर्गिण अवक्कमसु य मा तुमं पयंगोव । जइ वंछसि चिरकालं रज्जं काउं महियलंमि ॥ ९ ॥
भणिओ य मए एसो किं रे वाहरसि मुक्कमज्जाय ! । सप्पुरिसमगलगस्स मज्झ जं होइ तं होउ ॥ १० ॥
चिरकालजीविएणवि पेरंतेऽवस्समेव मरियवं । ता अवसर दिट्ठिपहाओ कुणसु जं तुज्झ पडिहाइ ॥ ११ ॥
जइ एवं ता विहिणो मा दाहिंसि दूसनं तुमं राय ! । इय भणिऊण सरोसो खयरो सो गयणमुप्पइओ ॥ १२ ॥
तयणंतरं मए निरूविओ सो भूमितलनिवडिओ विज्जाहरो जाव अज्जवि सजीवो ताहे काराविया
चंदणरसच्छडापहाणा सिसिरोवयारा संवाहियाइं सरीरसंवाहणनिउणेहिं पुरिसेहिं संबंगाइं, खणंतरेण लद्धा तेण

चेयणा उम्मीलितं नयणनलिणं अवलोइयं दिसिमंडलं आलविओ पासवत्ती परियणो-भो भो महायस ! कहमहमिह
 महीवट्टे निवडिओ ?, कथवा वेरिविज्जाहरो ?, को वा एस देसो ?, किंणमं इमं नयरं ? को वा एसो छत्तच्छायानि-
 वारियरविकरपसरो परिचलंतधवलचामरजुयलो मज्झकए नरनियरं वावारित्तो पुरो संठिओ चिट्ठइ महायसो नराहिव-
 इत्ति ?, इमं च सोच्चा निवेइयं से परियणेण गयणपडणाओ आरब्भ संबं जहावित्तंति । तओ सो खयरो दीहं नीससिय
 मम पचासन्ने ठाऊण जोडिय करसंपुडं विन्नविउमाढत्तो-महाभाग ! धन्ना सा महिमहिला जीसे तं पई कयलक्खणा
 इमे भिच्चा सेवति जे तुह चरणकमलं धन्ना ते सुहडा जे तुह कज्जे तणं व नवि गणंति नियजीविंयं, अहो ते परो-
 वयारित्तणं अहो सप्पुरिसकम्माणुवत्तित्तणं अहो नियकज्जनिरवेक्खया अहो सरणागयवच्छलत्तणं, न सव्वहा मम
 मणागं पिडसुप्पाएइ ससुपराभवो जं तुमं सयमेव पुरिसरयणभूओ दिट्ठोसि, मए भणियं-महाभाग ! अणवेक्खिय-
 जुत्ताजुत्तवियारो हयविही जं तुम्हारिसाणवि निवडंति एरिसीओ आवयाओ, अणुभूयपुव्वमवि पावंति विसमं
 दसाविवागं, सव्वहा असरिसमिमं जेण न कयाइं रंभाथंभो सहइ मत्तमायंगंडयलकंहुवुच्छेयं, (न रेहइ जुज्जमाणो
 सुणालतंतू) पासंमि, को पुण साहेसु एत्थ वइयो ?, खयरेण भणियं-किमेत्थ कहियवं ?, पच्चक्खमेव दिट्ठं महा-
 णुभागेणं, मए भणियं-सम्मं निवेएसु, खयरेण भणियं-जइ कोऊहलं ता निसामेसु-

कलहोयकूलकोडीविराइओ रयणकोडिविच्छुरिओ । वेयहुगिरी तुमएवि निसुणिओ भरहवेत्तंमि ॥ १ ॥

सुरसिद्धजक्खरक्खसकिंनरकिंपुरिसमिहुणरमणिज्जो । सुरहिवरकुसुमतरुसंडमंडिउद्दामदिसिनिवहो ॥ २ ॥
 विज्जाहरमणीजणरमणीयं विजियसच्चपुरसोहं । तत्थऽत्थि गयणवह्णभनयरं नामेण सुपसिद्धं ॥ ३ ॥
 तत्थ य राया निवसइ समगविज्जासहस्सवलकल्लिओ । पणंमंतखयरमणिमउडकिरीडटिविडिक्खिगंगकमो ॥ ४ ॥
 नियवलतुलियाखंडलपरक्कमो गुरुपयावहयसत्तू । तिहुयणविवक्खायजसो नामेणं विजयराओत्ति ॥ ५ ॥
 रूवाइगुणसमिद्धाए तस्स भज्जाए हिययंदइयाए । कंतिमईए पुत्तत्तेण जाओ अहं एक्को ॥ ६ ॥
 पकओ पुरे पमोओ मह जम्मे तत्थ खयरराएणं । करिणो मोत्तूण परे विमोइया बंधणेहिंतो ॥ ७ ॥
 अह सुपसत्थंमि दिणे सम्माणिय पणइसयणगुरुवगं । जयंसेहरोत्ति नामं ठवियं मम गुरुजणेणंति ॥ ८ ॥
 गयंगणपरिसक्कणपमोक्खविज्जाओ गाहिओ अहयं । अह तरुणभावंपत्तो गुरुहिं परिणाविओ भजं ॥ ९ ॥
 पउमावइत्ति नामेण पवरविज्जाहरिंदकुलजायं । रूवाइगुणगेणंण विजयपडायंव कामस्स ॥ १० ॥ जुम्मं ।
 एस पुण वइरिखयो रहनेउरचक्कवालपुरपहुणो । सिरिसमरसिंहनामस्स अत्तओ अमरतेओत्ति ॥ ११ ॥
 बालवयस्सो मम गाढरूढेपमाणुबंधसन्वस्सो । विस्सासपयं सधेसु पुच्छणिज्जो य कज्जेसु ॥ १२ ॥
 सहसयणपाणभोयणचंकमणट्टाणकरणनिरयाणं । अहं दोण्हवि कालो वोळइ दढमेक्कचित्ताणं ॥ १३ ॥
 अह परियणेण मज्झं निवेइयं एगया रहट्टाणे । जह एसं तुज्झ मित्तो विरुवचारी कलत्तंमि ॥ १४ ॥

असहहणाओ॑ मए स परियणो वारिओ खरगिराहिं । अघडंतमेवमन्नं न भासियव्वं मह पुरोत्ति ॥ १५ ॥
 समयमवि दिट्ठं जं जुत्तिसंगयं तं वयंति सप्पुरिसा । सहसत्ति भासियाइं पच्छाऽपत्थं वारिहिति ॥ १६ ॥
 रविकरपसरोच्च जणे घणपडलच्छाइओऽवि विप्फुरिओ । अह एस वइयरो गोविओऽवि पणयाणुरोहेण ॥ १७ ॥
 रायभवणाओ॑ सगिहंमि एगया आगओऽम्हि पेच्छामि । समयेव तं कुमित्तं अणज्जंकज्जंमि आसत्तं ॥ १८ ॥
 दट्ठूण तं तहट्ठियमेगंते जाव चित्तिउं लग्गो । नियपरियणपरियरिओ तावेस पलाइओ झत्ति ॥ १९ ॥
 अहमवि पहरणसहिओ नियथोवपहाणपुरिसपरियरिओ । तस्साणुपहे लग्गो सोऽवि य अहंसणं पत्तो ॥ २० ॥
 मणपवणजइणवेगेण जाव पत्तोऽम्हि एत्थ ठाणंमि । ता एस महापावो मम पडिओ चक्खुमग्गंमि ॥ २१ ॥
 परियणपुरिसावि मए सयलासु दिसासु पेसिया पुवं । एयस्स विणासकए अहमेक्को एत्थ संपत्तो ॥ २२ ॥
 असहायं मं दट्ठु एसो सहसत्ति जुज्झिउं लग्गो । एत्तो अन्नं सवं जायं तुमंहंमि पच्चक्खं ॥ २३ ॥
 एत्थंतरंमि सन्नाहकरणदट्ठगूढकायदुद्धरिसा । भूमियलं पेक्खंता खयरा तत्थागया तुरियं ॥ २४ ॥
 पुट्ठा य मए साहह किं भो तुज्झं समागमणकज्जं ? । तेहिं कहियं सामी इह सुवइ निवडिओ अम्मं ॥ २५ ॥
 सो दंसिओ य तेसिं तो ते दट्ठूण तस्स पडियरणं । अचंतहरिसियमणा मं पइ भणिउं समाढत्ता ॥ २६ ॥
 संमं कयं नराहिव ! जमेवमेयस्स पालणा विहिया । जं एयकए वाढं परितप्पइ खयरनरनाहो ॥ २७ ॥

एयस्सं मगगणकए सवत्थवि पेसिया खयरसुहडा । जं एक्को चिय पुत्तो एसो सिरिखथरनाहस्स ॥ २८ ॥
ता जयसेहरकुमरं पेसह एयं जहा समण्येसो । सुहिसयणजणजिजयाण दंसणुकंठियमणाणं ॥ २९ ॥
भणिओ मए स खथरो कुमार ! तुह परियणो भणइ किंपि । ता साह तुमं चिय किं पुणेसि पच्चुत्तरं देसो ॥ ३० ॥
कुमरेण तओ भणियं एगत्तो तुज्झ असरिसो पणओ । एगत्तो गुरुविरहो दोन्निडवि दोलंति मह हिययं ॥ ३१ ॥
तोहे विसिद्धभोयणदिब्बंसुयरयणभायणाईहिं । सम्मानिऊण कुमरो सट्ठाणं पेसिओ स मए ॥ ३२ ॥
तेणावि भणियमेयं नरिंद ! काएण एस वचिस्सं । हिययं तु निगडजडियं व तुम्ह पासे परिव्वसिही ॥ ३३ ॥
वरमत्थखओ वरमन्नदेसगमणं वरं मरणदुक्खं । सज्जनविरहो पुण तिकखदुक्खलक्खंपि अक्खिवइ ॥ ३४ ॥
इय भणिउं सोगगलंतनयणजलविंदुधोयगंडयलो । काऊण मम पणामं सपरियणो अइगओ गयणं ॥ ३५ ॥
अहंपि तेसिं गयणुप्पयणसामत्थमवलोइत्तो पुव्वदिट्ठसमरवावारसंभमणुचिंतयंतो चिंतयंतो केत्तिंयपि वेलं विलंबि
नियरज्जकजाइं अणुचिंतिउं पवत्तो, विसुमरियं च मम भोगपमुहकज्जकोडिकरणपसत्तस्स तं गयणनिवडियविज्जाहरमार-
णउज्जयदुट्ठखथरस्स सामरिसं वयणं । एगया य रयणीए जाव कइवयपहाणजणपरियरिओ नियदेससुत्थासुत्थपरिभाव-
भावणेण य रायंतररहस्सायन्नणेण य गयतुरयगुणवन्नणेण य किन्नराणुकारिगायणजणपारद्धकागलीगीयसवणेण य
सायरपणच्चिरवारविलासिणीचिच्चपयक्खेवनिरिक्खणेण य नम्मालावकरणेण य विंदुचुयपहेलियापणहुत्तरजाणेण य

विणोयंतो चिह्नमि ताव अयं विहडियवं भंडं डुडामरो जुगंत पणचिरभैरवपहयडमडमें तडमरुयनिनायनिद्रो खरनहर-
 निदारियमयगलगलजियदारुणो पासपरिवृत्तिभवनभित्तिपरिफालणसमुच्छलंत पडिसदयसहस्सडुविसहो समुट्ठिओ
 हलवोलोत्ति, तं च सोऊण विष्फारिनयणजुयलो सयलदिसिं डलमहप्रवलोयमाणो पेच्छामि तडिंदपयंडकरवाल-
 वावडकरे भवंगणमभिसरंते हणहणहणत्ति भणंते विज्जाहरे, ते य दट्टण मम परियणो भयभरथरहरंतसरीरो करुणाइं
 दीणाइं वयणाइं समुछविंतो सयलदिसासु सिग्घं पलाओत्ति, ताहे पहरणरहिओ एगागीवि ठाऊणाहं तेसिं संसुहं
 जंपिउमेवं पवत्तो य-रेरे किं गलगहियव्व निरत्थयं विरसमारसह? के तुब्भे? केण पेसिया? किं वा आगमणकज्जं?,
 तेहिं भणियं-रेरे नरिंदाहम! तइया अमह पडुणो सत्तुरक्खणेण वयणमवगणिय संपयं धिड्डयाए अयाणमाणो इव के
 तुब्भे केण पेसिया किं वा आगमणकज्जंति पुच्छसि, जइ पुण विसेसकहणेण तूससि ता निसामेहि, अमहे विज्जा-
 हरा रहनेउरचक्कवालपुरविज्जाहरनरिंदिसिरिसमरसिंघनंदणेण वेरिखयरासमप्पणपरूढगाढकोवानलेन सिरिअमरते-
 यकुमरेण तुह दुव्विणयतरुफलंदंसणत्थं पेसियत्ति, मए भणियं-जइ एवं ता जहाइं उवचिट्टहत्ति, तओ अखयसरीरं
 चेव मं गहिऊण उप्पइया ते गयणमगेण, गया य दूरदेसं, सुक्को य अहं एगत्थ भुयंगभीमे गिरिनिगुंजे, भणियं च
 मए-किं रे! एवं सुंचह? जं नेव पहरह, तेहिं भणियं-एत्तिया चेव पडुणो आणा, पडुचित्ताणुवत्तणं हि सेवगस्स
 धम्मो, एवं भणिय उप्पइया ते तओ ठाणाओ। अहंपि कोइलकुलगवलगुल्लियसामलासु सयलदिसासु केसरिकि-

सोरनिहयनिहारियसारंगपमुक्कविरसारावभीसणेसु काणणेसु वणमहिसावगाहिंजंतपंछलसमुच्छलंतपंकपडलुगगेसु म-
गगेसु तरुवरसाहासंहरिसवसनिवडंतदहणनिदञ्जमाणेसु वेणुगहणेसु पज्जलंतपईवसिहाभीसणविण्णुरंतरत्तलोयणेसु
इओ तओ वियरंतेसु निसायरणेसु वराहतिकुलदाडुक्किणलेट्टुनियरुचावचासु वणत्थलीसु अमुणियमग्गुम्मगो
विमूढदिसाभागो असोढपयप्पयारो एक्कंमि गुरुतरुवररे समारुहिउं साहाए पसुत्तोम्हि, दुडुमहिलव्व कट्टेण समा-
गया निहा, पच्छिमरयणिसमए य जामकरिघडव्व पासमल्लीणा चित्ता पवोहमंगलतूरेहिं पिव रसियं पुराणसि-
यालेहिं मागहेहिं व पढियं सुयगणेहिं, अह उइयंमि सयलतिहुयणभुवणप्पईवंमि दिवायरंमि उट्टिऊण कयपाभाइ-
यकिचो ओयरिऊण तरुवराओ एक्कदिसाए पयट्टो गंतुं, खणंतरेण य तरुणतरुचंक्कलाववद्धपरियरो कोदंडकंडवावड-
करो नियपणइणीए अणुगम्ममाणो गुंजाफलमालियामेत्तकयाभरणो भुयंगकंचुयनिव्वत्तियेकेसकलावसंजमणो तं-
क्खणविणिवाइयसिंहडिससिहसुहविरइयकन्नपूरो दिट्ठो एक्को पुल्लिंदो, सो य पुच्छिओ मए-भो महाणुभाग ! का एसा
अडवी ? को वा नियसिहरगभगरविरहतुरयमगो एस गिरिवरो ? का वा नयरगामिणी वत्तिणित्ति ? , पुल्लिंदेण भ-
णियं-अणामिया नाम एसा अडवी, सज्जाभिहाणो य एस गिरिवरो, एसावि वित्तिणी कंचणपुरनयरमणुसरएत्तिं ।
तओ लग्गोऽहं तीए वत्तणीए तावसतवस्सीव कंदमूलफलेहिं पाणवित्तिं करितो पत्तो कइवयवासरोहिं कंचणपुरं,
तत्थ य सुणिवरो इव निप्पडिंबद्धो वीथरागो इव सव्वसंगरहिओ ठाऊण कइवय दिणाणि पेच्छंतो पुव्वट्ठाणाइ अव-

लेण्तो गामागरे निरुवित्तो धम्मियज्जणकाराविद्याइं समुत्तुंगसुंदरागाराइं सुरमंदिराइं कण्णडिओ इव दाणसांलासु पा-
णवित्तिं कुणमाणो अणवरयपयाणएहिं पत्तो सरज्जसीमासन्निवेसं, तत्थ य कइवयदिणाणि वीसमिय पुणरवि चलिओ
नियनयराभिमुहं । इत्तेण य सुणिऊणं निथलहुभाउणो विजयसेणस्स संपत्तरज्जस्स विभववित्थरं चित्तिं मए—नूणं
विजयसेणेणाहिद्धियंमि रज्जे न जुत्तं तत्थ मे गमणं । जेण—

पुवकयधम्मकम्माणुभावओ पाविऊण रज्जसिरिं । चिंतामणिव्व दाउं को वंछइ वल्लहस्सावि १ ॥ १ ॥
पिच्छामि तहाविय मिच्चमत्तिसामंतवयणंविन्नासं । जं नट्टं नणु रज्जं तं दिट्ठं हरणंकालेऽवि ॥ २ ॥

इह चिंतयंतो पत्तो कमेण सिरिभवणनयरं, अलक्खिज्जमाणो पुरज्जेण पविट्ठो सहपंसुक्कीलियस्स सोमदत्ता-
भिहाणस्स वयंसस्स गिहे, सो य ममं दट्ठणं झडत्ति जायपच्चभिन्नाणो सहरिसं पाएसु निवडिय गाढं परुत्तो,
भणिउमाढत्तो—

तुह विरहे मम नरवर ! वरिसं व दिणं न जाइ पज्जंतं । हिमहारचंदचंदणरसावि दूरं तवित्ति तणुं ॥ १ ॥
भवणं पेयवणं पिव पणइणिवग्गो य डाइणिगणोच्च । सयणावि भुयंगा इव नं मणंपि मणा सुहावित्ति ॥ २ ॥
एत्तियदिणाइं लोएण धारिओ कहवि गुरुनिरोहेण । जंतो इण्हिं विदेसे जइ नाह ! तुमं न इंतोऽसि ॥ ३ ॥
तो एयं वरभवणं एसो धणवित्थरो इमे तुरया । एसो किंकरवग्गो पडिवज्जसु तं महीनाह ! ॥ ४ ॥

एमांश्च पण्यसारांश्च वयणांश्च भासतो भणिओ मए सोमदत्तो—पियवयंस ! किं सोयविहुरो हवसि ? किं वा निय-
भवणधणांश्च समप्पेसि ? किमेवं तुह पण्यसारो पयडीभवस्सइ ? को वा अन्नो ममाओवि तुह पाणप्पिओ ? किं
वा तुह देसणाओऽवि अन्नं ममेहागमणप्पओयणं ? ता धीरो भव, अच्छउ सवस्ससमप्पणं, तुह जीवियंपि ममायत्तं
चेव, तओ काराविओऽहं ण्हाणविलेवणभोयणपमुहं कायवं, खणंतरेण पुच्छिओ मए—पियवयंस ! साहेसु किमि-
याणिं कायवं ? सोमदत्तेण भणियं—देव ! किं निवेदेमि ? मं एकं पमोत्तूणं अन्ने स वेऽवि मंतिसामंता दढपक्खवाया
विजयंसेणे, नेच्छंति नाममवि तुह संतियं भणिउं, जइ सो कहवि आगमिस्सइ तहावि एयस्स चेव रज्जं, जओ एयस्स
मुद्धा मती अम्ह दढं वसवत्ती थेवंपि वयणं न विलंघेइत्ति, विजयसेणो पुण नियसरीरमेत्तेण तुम्ह विरहे वाढं परि-
तम्मइ, भणइ य—जइ एइ जेड्ढभाया ता धुवं समप्पेमि रज्जधुरं, जहाजेट्टरज्जपालणेमेव अम्ह कुलधम्मोत्ति, एवं ठिए
किंपि न जाणिज्जइ जुत्ताजुत्तं, ता एत्थेव अलक्खिज्जमाणो तुमं चिट्ठसु कइवयदिणाणि जाव उवलक्खेमि नरिंदाईण
चित्तं, मए भणियं—एवं हवउत्ति, तओ सोमदत्तेण सामेण य दंढेण य भेएण य उवप्पयाणेण य आढत्ता मंतिसामं-
तादओ भेइउं, निट्ठुरवज्जगंठिंपिच न य केणवि भिज्जंति उवाएणं, नाओ य तेहिं समागमणवइयरो, निवारिया य
रायधुवारपाला जहा न सोमदत्तस्स रायभवणे पवेसो दायवोत्ति, विजयसेणस्सवि सिट्ठं जहा तुम्ह जेड्ढभाया
पंचत्तं गओत्ति निसामिज्जइत्ति, तेणावि एवं निसामिय कओ महासेगो; पयट्ठियाइं मयकिचाइंति, एवंति मह

रजकज्जविसयं जं जसुवायं घडेइ सो निउणो । दइवो पडिक्खलो इव तं तं विहेडेइ निक्करुणो ॥ १ ॥ अन्नया य गाढवि-
 सायवसविसंउलेण सुणियपरमत्थेण भणियं सोमदत्तेण-देव ! निम्मज्जाएहिं मंतिसामंतार्इहिं तुम्ह पंचत्तगमणवत्ता
 निवत्तिया राइणो पुरो, ता जइ कंहपि रायवाडियाए निगयस्स विजयसेणस्स दंसणपहे ठाऊण नियंदंसण
 ठावेसि ता जुत्तं होइत्ति, जओ तुम्ह दंसणं वाढमभिकंखइ एसो, पडिवन्नं च मए एयं तदणुरोहेण, अन्नया य
 पवरकरेणुगाखंधओ निगओ विहारजत्ताए विजयसेणो, पासायसिहरमारुहिऊण य ठिओ अहं से चक्खुगोयरे,
 झडत्ति विट्ठोऽहमणेण, सागयं २ चिरागयबंधवस्सत्ति हरिसुप्फुल्लोयणो य जाव सो वाहरिं पवत्तो ताव तक्खणा
 चैव मंतिसामंतपमुहेहिं रइया अंबरे अंतरवडा, कओ हलबोलो, नियत्तिओ विहारजत्ताओ राया । भणियं च-
 असिवं तुह किंपि इमं जं देव ! पिसायदंसणं जायं । किं पंचत्तगयजणो दीसइ य कयावि पच्चक्खो ? ॥ १ ॥
 ता लुहु गच्छह भवणं संतिं कारेह देह भूयवालं । पारंमह होमविहिं सुमरह मच्चुजयं मंतं ॥ २ ॥
 चियरसु सुवणणाणं माहणसमणाण तक्कयजणाणं । एवं कहिए सिग्घं मिंठेणं चोइया करिणी ॥ ३ ॥
 भवणंमि तओ गंतुं जं जह भणियं तहेव नीसेसं । अइसुद्धुद्धिभावा करावियं विजयसेणेण ॥ ४ ॥
 अहं पुण निरुळाहो निराणंदो ववगयधीरिमभावो अवयरिय तओ ठाणाओ सोमदत्तस्स अकहमाणो चैव
 पच्छन्नदेसे ठाऊण चित्तिउमाढत्तो, कंहं ?—

अणवरथकणयवियरणपरितोसियमाणसावि कह पावा । सामंता मत्ता इव पुरट्टियंविहु सुणंति न मं ? ॥ १ ॥
कह वाऽवराहमणेण (सहणेण) भूरिसोगु(मइ) सपयंमि ठवियावि । न गणंति मंतिणो मं तणं व पम्मुक्कमज्जाया ? ॥ २ ॥
कह नयरमहत्तरया उवयरिया णेगसोऽवि कजेसु । माणंति न मं सप्पणयवयणमेत्तेण विहयासा ? ॥ ३ ॥
जयसेहरकुमरो सो विज्जाहरायसुक्कुलजाओऽवि । तह उवयरिओऽवि कहं उवेहए मं तदियरोव्व ? ॥ ४ ॥

होउ वा, किं एएण विगप्पिएण?, अत्तहियमियाणिं कीरइ मुच्चइ इमं नयरं गम्मइ अन्नत्थ देसे ओलगिगज्जइ
अन्नो गरुओ नरवइत्ति, अहवा सयलजयपडपरक्कमस्स सिरिअवंत्तिसेणमहानराहिवस्स सुओ होऊण कइवय दिणाइं
रज्जरिद्धिसुदुरमणुभविय कहमियाणिं अन्नस्स हेट्ठा ठाइस्सामित्ति सब्बहा न जुत्तं परिचिंत्तिउं, भेरवपडणेण अत्त-
परिचाओ चैव संपयं मे सब्बोवाहिविसुद्धोत्ति निच्छिऊण निगओ नयराओ लगो भेरवपडणाभिमुहं, वत्तिणीए
अखंडपयाणेहिं पवच्चंतो संपत्तो तरुणतरुसंडमंडियं उब्भडसिंहंडितंडवांडवरमणिज्जं हंससारसकपिंजलकोकिलकु-
लकलकलरवमुहलं पुंनागनागजंबुजं विरनिंबवंचंपयासोयसोहियपरिसरुहंसं भेरवपडणपचासन्नं एक्कमुववणं, दिट्ठो
य तत्थ अणेगजणनमंसिज्जमाणचरणो सल्लवखणनरसिरकवालमेत्तपरियरो मंतज्झाणपरायणो करकमलकलियजो-
गदंडो समत्थनाणविन्नाणपरमपगरिसपत्तो ससाहसपरितोसियवेयालो महाकालो नाम जोगायरिओ, पणमिओ य मए
सवायरेणं दिन्नासीसो य निविट्ठो संनिहियधरणिवट्ठे, अवलोइओऽहं तेण सिणिद्धाए दिट्ठीए, खणंतरे संभासिओ य-

भद् ! उद्विग्नचित्तो इव लक्ष्मीयसि, ता किं भट्टलच्छीविच्छडोत्ति उयाहु विदेसागओत्ति, अन्नं वा किंपि कारणं ?
 मए भणियं-भयवं ! अम्हारिसा पुन्नरहिया पाणिणो पए पए उद्विग्नचित्ता चेव, कित्तियाइं कारणाइं साहिज्जंति ?
 तेण जंपियं-तहावि विसेसयरं सोउमिच्छामि, मए भणियं-भयवं ! किं एएण ज्ञाणविग्घकारएण नियवइयरसाह-
 णेण ? महाकालेण भणियं-किं तुज्झ ज्ञाणचित्ताए ? जहाइंहुं कुणसु, तओ मए विज्जाहरावलोयणं च जुज्झनिवडि-
 यखयररक्खणं च महाडविनिवाडणं च नियनगरागमणं च मंतिसामंतपमुहजणावमाणं च रज्जावहारदुक्खं च
 उवयरियविज्जाहरोवेक्खणं च नयरनिगमणं च भेरवपडणं पडुच्च समागमणं च सिट्ठमेयस्स, अह महाकालेण
 भणियं-अहो विरुद्धकारित्तणं हयविहिणो जमेरिसे असमसाहसधणे जणे विणिम्मिय एरिसत्तिक्खदुक्खभायणं
 करेइ, अहवा—

साहसधणाण हिययं दुक्खं गरुयंपि सहइ निवडंतं । इयराण दुहलयेणवि विहडइ जरसिप्पिणिपुडं व ॥ १ ॥
 जह निवडइ गुरुदुक्खं तहेव सोक्खंपि संभवइ तेसिं । इयराण तुल्लसुहदुक्खसंभवो निच्चकालंपि ॥ २ ॥
 कस्स व निरंतरायं सोक्खं ? कस्सेव नावया इत्ति ? । को व्वसिओ खलेहिं नो ? कस्स व संठिया लच्छी ? ॥ ३ ॥
 इय नाउं चय सोयं पुणोउवि तुह वंछियाइं होहंति । स्रोउवि रयणितमनियरविगमओ पावए उदयं ॥ ४ ॥
 जं पुण तुमए भणियं भेरवपडणं करेमि मरणडं । तं तुहजणपडिसिद्धं खत्तिथधम्मे विरुद्धं च ॥ ५ ॥

जेण-वंभणसमणच्चिय मरणकज्जमभुज्जमंति नो धीरा । विहिंविहडियंपि कज्जं घडंति ते बुद्धिविहवेणं ॥ ६ ॥
तहा-चत्तविसायपिसायं अणलसमविमुक्कविकमेक्करसं । अणुसरइ सिरी दूरं गयावि पुरिसं हरिसियव्व ॥ ७ ॥
तओ मए भणियं-भयवं ! विमूढचित्तलक्खो म्हि संपयं, न जाणामि जुत्ताजुत्तं न सुणामि उवायं न समीहेमि
खत्तधम्मं न वियारेमि जणनिंदं न लक्खेमि सुहदुक्खं, सब्बहा कुलालददंडचालियचक्काधिरूढं व मम मणो न
मणांगंपि कत्थवि अवत्थाणं पावइ, तो भयवं ! तुमं चेव सोहेहि, किं कायवं ? को वा उवाओ समीहियत्थसि-
द्धीए ? महाकालेण भणियं-वच्छ ! पवज्जसु मम पवज्जं, आराहेसु चरणकमलं, अब्भस्सेसु जोगमगं, होहिति
गुरुभत्तीए मणोरहसिद्धीओ, तओ भयसंभंतो इव सरणागयवच्छलं दालिहाभिभूओ इव कप्पपायवं महारोगपी-
डिओ इव परमवेज्जं पहीणचक्खुबलो इव पहेदेसंगं सद्वायेण तमाराहिउं पवत्तो, दूरमागरिसियं च विणएण मए
तस्स चित्तं, निउत्तोऽहमेक्को तेण नियरहस्सठाणेसु सिक्खाविओ निस्सेसाइं आगिण्डिपमुहाइं कोऊहलाइं, अन्नया
य पसत्थेसु तिहिनक्खत्तमुत्तुत्तेसु परमपमोयमुव्वहंतेण तेण एगंते उवइद्धो मम तइल्लोक्कविजओ मंतो, कहिओ साहण-
विही जहा-अट्ठोत्तरसयपहाणखत्तिएहिं मसाणहुयासणो तप्पणिज्जो, कायवं दिसिदेवयाबलिवियरणं, पवहियवं
अणवरयमंतसुमरणं, तओ एस सिञ्झिहिई, काही य एगच्छत्तधरणिथलरज्जदाणं, पडिवन्नो य मए विणयपणएण,
समाढत्तो य साहिउं, गओ कलिंगपमुहेसु देसेसु, आरद्धो य जहालाभं खत्तियनरुत्तमेहिं होमो जाव एत्तियं कालंति ।

ता नरसेहर ! नरसिंघ जं तए पुच्छियं पुरा आसि । किं अप्पाणं निंदसि इणमो नणु कारणं तत्थ ॥ १ ॥
 भयवसचिसंलुंगा सारंगा इव विचित्तकूडेहिं । जं सत्ता विद्विया तमियाणिं दहइ मह हिययं ॥ २ ॥
 दुज्झाणकलुसबुद्धित्तेण पुवं न याणियं एयं । तुह दंसेण इण्ह विवेयरयणं समुल्लसियं ॥ ३ ॥
 नरसिंहेणं भणियं सचं पावं कयं तए भूरि । जं कीडियाणवि वेहे पावं गुरु किमु नरिंदाणं ? ॥ ४ ॥
 तेसि विणासे जम्हा धम्मब्भंसो य सीमविगमो य । अवरोप्परं च जुज्झं विलयाजणसीलविलओ य ॥ ५ ॥
 ता ठाणे तुह दुंचरियगरिहणं धम्मगोयरा बुद्धी । एवं ठिएऽवि जलणप्पवेसणं तुज्झ नो जुत्तं ॥ ६ ॥
 तित्थेसु वच कुरु देवपूयणं मुंच निंदियं भावं । पायच्छित्तं पडिवज्ज सुगुरुसयासे पयत्तेण ॥ ७ ॥
 निंदसु पइक्खणं दुक्कयाइं निसुणेसु धम्मसत्थाइं । उत्तमसंसर्गिं कुणसु चयसु तिबं कसायं च ॥ ८ ॥
 ईसाविसायमुच्छिद भिंद विसमविसयतरुनियरं । नियजीयनिव्विसेसं नीसेसं पेच्छ पाणिगणं ॥ ९ ॥
 पसमरसं पिवसु सया दूरं परिहरसु खुहचरियाइं । जुत्ताजुत्त वियारसु सब्बकज्जेसु जत्तेणं ॥ १० ॥
 खणपरिणइधम्मत्तं चित्तेसु भवंमि सब्बवत्थूणं । नियसुकयदुकयसचिवत्तणं च लक्खेसु परजम्मे ॥ ११ ॥
 इय जयमाणस्स सया सुद्धी तुज्झं भविस्सइ अवस्सं । जलणपवेसं सलभा कुणंति कुसला उ न कयावि ॥ १२ ॥
 एवं संठविकुण मरणदुरज्झवसायाओ घोरसिंघं जाव विरओ नरिंदो ताव प्हयपडहसुरवपसुहत्तरनिनायवहि-

रियदियंतरा विचित्तमणिभूसणकिरणकब्बुरियमसाणंगणा गयणाओ ओयरिया विज्जाहरा, परमपमोयसुव्वहंता निव-
डिया घोरसिवचरणेसु, भणिउमाढत्ता य-देव ! अम्हे गयणवल्लहपुराहिंवविजयरयविज्जाहरिंदसुएण। सिरिजयसे-
हरायकुमारेण पेसिया तुम्ह आणयणनिमित्तं, ता कुणह पसायं; आरुहह इमं समुद्धुयविजयवेजयंतीसहस्साभि-
रामं उज्झंतकसिणारुक्कणूरूपूरसुरहिधूवधूमंधयारियदिसाभोगं मणिकणगरयणरइयविचित्तविच्छित्तिभित्तिभागं कुसु-
मावयंसाभिहाणं वरविमाणं, घोरसिवेण भणियं-भो विज्जाहरा ! मुयह मम विसए पडिबंधं, अन्नोऽहमियानिं धिगय-
भोगपिवासो, विजणविहारेसु रण्णेसु जाया निवासबुद्धी चद्धा भिगकुलेसु सयणसंबंधसद्धा पलीणो मायामोहो
जलणजालाकलावकवलियमिव पेच्छामि जीवलोयं, ता जहागयं गच्छह तुब्भे, जहादिट्ठं च से निवेएज्जहत्ति, विज्जा-
हरेहिं भणियं-मा भणह एयं; जओ जहिणाओ तुम्ह पासाओ गओ जयसेहरकुमारो तदिणादारुभ जाओ रहने-
उरचक्कवालपुरनाहेण सिरिसमरसिंधेयसाहिवइणा सह महासमरसरंभो निवडिया अणेगसुहडा, कहमवि महाक-
डेण निष्पिट्ठो सो अमरतेयाभिहाणो दुट्ठमित्तो, वडिया इयाणिं परोप्परं संधी, कयाइं अन्नोऽन्नघरेसु भोयणवत्थ-
दाणाइं, अओ एत्तियकालं नियकज्जकोडिवावडत्तणेण संपयमेव नाओ तुम्ह अडविनिवाडणपामोक्खो वइयरो,
कुमारेण तओ अचंतजायतिद्वसोगसंदब्भेण विसज्जिया अम्हे सब्वासु दिसासु तुम्हावल्लोयणत्थं, भणिया य-अरे
सिग्घं जत्थ पेच्छह तं महाणुभावं तत्तो सब्बहा आणेज्जह, नन्नहा भोयणमहं करिस्सामि, तओ सब्बत्थ निउणं निउणं

निरुचंता पत्ता एत्तियं भूमिभागं, एत्थ आगएहि च निसामिओ तुम्ह सद्दो, को पुण भीसणे मसाणे एत्तिवेले होहिति कोऊहलेण सुणंतेहिं कुमारपचाणयणकालागएहिं पुरा तुम्ह निसुयसद्दणुमाणेण पच्चभिन्नायत्ति, ता कुण्ह पसायं जयसेहरकुमारजीवियदाणेण, एत्थंतरे विण्णायपरमत्थेण भणियं पत्थिवेण-भो महासत्त ! परिचय फरुस-भाचं, पणयभंगभीरूणि भवंति सप्पुरिसहिइयाणि ता अंगीकरेसु एएसि पत्थणं, घोरसिवेण भणियं-महाराय ! वाढं विरत्तं मम रज्जादीहिंतो चित्तं, गाढपावनिवंधणं खु एयं, रण्णा भणियं-मा मेवं जंपेसु, जओ-

सन्नायं दिसओ विसिद्धमुणिणो पालितयस्साणिसं, सासितस्स विसिद्धनीइ मणुए दाणाइं दितस्स य ।

धम्मो होइ निअस्स वस्समइणो रत्तेडवि संचिद्धओ, नो साहुस्स स सत्थवज्जियविहीजुत्तस्स गुत्तस्सवि ॥ १ ॥
घोरसिवेण भणियं-महाराय ! एवमेवं, राइणा भणियं-जइ एवं ता गच्छह तुम्हे, पडिच्छह [वि]जयसेहरकुमार-पूयापडिवत्तिं, घोरसिवेण भणियं-महाराओ निवेयइ तं कीरइत्ति, तओ पहरिसिया विज्जाहरा, सायरं पणमिउं तेहिं राया विन्नत्तो-अहो महायस ! परमत्थेण तुम्हेहिं दिन्नं अह पडुणो जीवियं, अह पमुक्कवालयमुहकुलिंगो-वगरणो विओगेवयणावसविसप्पमाणनयणंसुधाराधोचवयणो घोरसिवो गाढमालिंगिय नरवइं सगगयगिरं भणिउमाढत्तो-

कुम्भमत्तिमिरुम्भामियलयणपसरेण तुज्झ अवरद्धं । जं किंपि पावमइणा तमियाणिं खमसु मम सद्धं ॥ १ ॥

सीसो इव दासो इव रिणिओ इव किंकरो इव तुहाहं । ता साहसु किं करणीयमुत्तरं राय नरसिंह ! ॥ २ ॥
रत्ना भणियं जइया नियरज्जसिरिं समग्गमणुहवसि । मम संतोसनिमिच्चं तइया साहिज्जसु सवत्तं ॥ ३ ॥
एवं काहंति पयंपिऊण चिज्जाहरोहिं परियरिओ । दिवविमाणारूढो सो झत्ति गओ जहाभिमयं ॥ ४ ॥

रायावि पत्ततिहुयणरायसिरिवित्थरं पिव सयलमुकयसंचयपत्तोवचयंपिव समत्थपसत्थतित्थदंसणपूयं पिव अण्णाणं मन्नंतो पाणिपइट्ठियखगरयणो गओ नियभवणं, निसण्णो सेज्जाए सुत्तो खणंतरं समागआ निहा, निसावसाणे य रणज्झणंतमणिनेउररवाणुमगलगचक्कगखलियचंकमणा अणायरसट्ठाणिउत्तलट्टकंचीकलावण्णमुहाभरणा सहरिस- पधावियखुज्जिवामणिपुल्लिदिपमोक्खचेडीयाचक्कवालपरिखुडा पविट्ठा चंपयमाला देवी, दिट्ठो राया निहावसनिस्स- हसेज्जाविसुक्कसवंगोवंगो, भणियं चऽणाए-परिणीयपुत्तिओ इव हयसत्तू इव विट्तदविणोच्च परिपट्ठियसव्वसत्थोच्च निब्भयं सुयइ नरनाहो, अह खणंतरे पवज्जियाइ पाभाइयमंगलतूराइ पयडीहूयाइ दिसिसुहाइ, पट्ठियं मागहेण- लंघेउं विसमंपि दोसजलहिं गंजिनु दोसायरं, गोत्तं पायडिउं सबीरियवसा चंकमिउं भीसणे ।
आसाअंगसमुब्भवेण महसा सोरण संपूरिउं, सूरु देव ! तुमं पिवोदयसिरिं पावेइ सोहावहं ॥ १ ॥

एवं च निसामित्ता पबुद्धो राया, चित्तिउमाढत्तो य-अहो सारस्सयंपिव वयणं जहावित्तवत्थुगब्भं कहं पट्ठियं मागहेण ? , एवमेव पुणो पुणो परिभावेमाणो उट्ठिओ सयणाओ, अवलोइया य हरिसवसवियसंतनयणसहस्सपत्ता

देवी त्र्यम्बमाला, पुढा य सा आगमणपथोयणं, भणियं च तीए-देव ! अज्ज पच्छिमद्वज्जामे सेसरयणीए सुहपसु-
 त्ताए सुमिणयंमि सहसच्चिय वयणंमि पविसमाणो मए अनणुप्पमाणो मणिरयणमालालंकिओ पवणसमुदुयंचला-
 भिरामो फल्लिमयडिंडिरपंडुरडंडोवसोहिओ महज्जओ दिट्ठो, एवंविहं च अदिट्ठपुवं सुमिणं पासिऊण पडिबुद्धा
 समाणी समागया तुम्ह पासंसि सुमिणसुभासुभफलजाणत्थं, ता साहिउमरिहइ देवो एयस्स फलंति, रत्ता
 भणियं-देवि ! विसिट्ठो तए सुमिणो दिट्ठो, ता निच्छियं होही तुह चउसमुद्दमेहलावलथमहिमहिलापइस्स कुल-
 केउस्स पुत्तस्स लाभो, जं तुब्भे वयह अवितहमेयंति पडिवज्जिय निवद्धा देवीए उत्तरीयंमि निट्ठुरा सउणगंठी,
 खणंतरं च मिहोक्काहिं विगमिय गया देवी निययभवणं, रायावि कयपाभाइयकायवो निसण्णो सभामंडवंमि
 अह पढममेव गाढकोउहलाउल्लिजमाणमाणसा समागया बुद्धिसागरपमुहा मंतिणो, भूमितलविबुलियमउलिमंडला
 निवडिया चरणेसु, दिन्नासणा निविट्ठा सट्ठाणेसु, विन्नविउमाढत्ता य-देव ! अज्ज चउजामावि सहस्सजामव कहमवि
 पभाया अम्ह रयणी घोरसिवमुणिवइयरोवलंभसमूगत्तणेणं, जइवि किंपि पसंतवयणावलोयणाइलिंगोवगया कज्जसिद्धी
 वट्ठइ तहावि विसेसेण तुब्भेहिं साहिज्जमाणिं सोउमिच्छामो, ता पसियउ देवो रयणिवइयरनिवेयणेणंति, ताहे तेसं
 वयणाणुरोहओ ईसिं विहसियं काउं जहा घोरसिवेण समं ममाणदेसंमि संपत्तो जह विन्नाओ छोभमांयरमाणो
 जहा य सो भणिओ गिणहसु सत्थं जह तेण कत्तिया वाहिया कंठे जह पडिरुद्धो वाहू सकत्तिओ जह महीयले

निहओ जह उट्ठिओ पुणोऽविहु निफंदो जह हओ पच्छा सुरसुंदरीहिं खित्तो जह कुसुमभरो समागया देवी जह दिन्नो तीए वरो जह सा अहंसणं पत्ता जहा घोरसिवो निवेयमुपगओ पट्ठिओ य मरणत्थं जह पुव्वइयरो तेण संठिओ (निवेइओ) जह व संठविओ जह परिचियविज्जाहरविमाणमारुहिय सो गओ नमिउं संखेवेणं तह नरवरेण सिट्ठं समत्थंपि, सोच्चं हरिसिओ मंतिवग्गो, पयट्ठिओ य नयरीए महंतूसवोत्ति ।

अह अन्नया कयार्इ चंपयमालाए रायमहिलाए । दुहिसत्तरक्खणंमी दीणाणाहाण दाणे य ॥ १ ॥
देवगुरुपूयणंमी पणईणं चित्तिथत्थदाणे य । उप्पण्णो विसिट्ठगन्भाणुमावेण ॥ २ ॥ जुम्मं ।
चित्तेइ य सा एवं ताओ धन्नाओ अम्मयाउ इहं । इय पुन्नदोहलाओ जाओ गन्भं वहंति सुहं ॥ ३ ॥

एवं च अपुजंतदोहलयसंकप्पवसेण कसिणपक्खमयलंछणमुत्तिव्व कसत्तणमणुभविउं पवत्ता देवी । अन्नया य पुट्ठा नरवइणा-देवि ! किमेवं पइदिणं कसत्तणं पावेसि?, साहेसु एयकारणं, गाढनिबंघे सिट्ठं तीए नियमणवंछियं, ताहे परं पमोयमुव्वहंतेण विसेसयरं पुरियं नरिंदेण, माणियडोहला य धरणिच्च निहाणसंचयं दिसव्व नल्लिणीनाहं सुहंसुहेणं गन्भं वहमाणी देवी कालं गमेइ, अणया य पडिपुण्णेसु नवसु मासेसु अद्धमराइंदिएसु सुभेसु तिहि-करणनक्खत्तमुट्ठेसु पुरंदरदिसिच्च दिणयरं कोमलपाडलकरपडिपुण्णसवंगोवंगसुंदरं पुत्तं पसूया । तओ सहरिसं गयाओ नरिंदभवणंमि चेडीयाओ, दिट्ठो राया, भणिओ य-देव ! वद्धाविज्जसि जएण विजएण य तुमं, जओ

इयाणिं चैव पत्न्या देवी चंपयमाला, जाओ य समुज्जोतियसयलदिसामंडलो तेयरसिख पुत्तोत्ति, इमं च सोच्चा नरि-
देण दिन्नं तासिं भूरि पारिओसियं, कओ दासित्तविगमो, आहूया पहाणपुरिसा, समादिद्धा य जहा पयट्टेह नीसेस-
नयरीए तियचउक्कचचरेसु खंदसुगुंदसूरिंदिगयसुहमंदिरेसु य परममहूसवं, वियरह अणिवारियपसरं कणयदाणं सुयह
चारगाहितो जणंति बुत्ते जं देवो आणवेइत्ति भणिऊण पुरीए पारद्धं तेहिं वद्धावणयं ।

कहं चिय?—पंचप्पयारवन्नयविरइयपुपसत्थसत्थियसमूहं । विक्खित्तक्खयदोवापवालसोहंतमहिबीढं ॥ १ ॥

रहसपणचिरतरुणिगणवच्छत्थलतुट्टहारसिरिनियरं । अन्नोन्नावहरियपुण्णपत्तवंतहलबोलं ॥ २ ॥

पडिभवणदारविरइयवंदणमालासहस्सरमणिज्जं । कमलविहाणामलपुन्नकलसरेहंतगेहसुहं ॥ ३ ॥

वज्जंताउज्जसमुच्छलंतघणघोरघोसभरियदिसं । चिन्ताइरित्तिदिज्जंतदविणसंतोसियत्थिगणं ॥ ४ ॥

पमुइयनीसेसजणं कुलथेरीकीरमाणमंगळं । इय नरवइकयतोसं वद्धावणयं कयं तत्थ ॥ ५ ॥

एत्थंतरे मंतिसामंतसेणावइसत्थवाहपसुहा पहाणलोया गहियचिविहत्तुरयरयणसंदणपमोक्खविसिट्ठवत्थुवित्थरा
गंचूण नरवं वद्धाविंसु ?

इओ य सो घोरसिवो विजाहरेहिं नेऊण समप्पिओ जयसेहस्स कुमारस्स, तेणावि पिउणोव गुरुणोव तदागमणे
कओ परममहूसवो, पुडो य एसो पढमदंसणाओ आरब्भ सच्चुत्तंतं, धरिओ ण्हाणविलेवणभोयणदिंघंसुयदाणपुरस्सरं

कश्यपि वासराहं, अन्नदिग्दे चाउरंगसेणासण्णाहेण जयसेहरकुमारेण गंतूण सिरिभवणंमि नगरे विजयसेणरणो दंसिऊण जहावित्तं संसिऊण य दुद्धंतमितिसामंतुस्सिखलदलणपुव्वं सो घोरसिवो सहत्थेण निवेसिओ रायपए, विजय-सेणोऽवि ठविओ जुवरायत्ते, एवं कयकायव्वो जहागयं पडिगओ जयसेहरो, घोरसिवोऽवि पुव्वंपिव भुंजितं पवत्तो नियरज्जंति । अन्नया तेण सुमरिऊण नरसिंहनरवइणो रज्जसंपत्तिवुत्तंतनिवेयणं पुव्वकालपडिवन्नं तक्खणंचिय विसज्जिया पहाणपुरिसा विसिद्धपाहुडसमेया नरसिंघनरवइणो समीवे नियवइयरनिवेयणत्थं, पत्ता य ते अणवरयपयाणएहिं जयंतीनयरिपरिसरुहंसं, निसुणिया य रत्ता, पवेसिया य महाविभूईए, समप्पियाइं रत्तो तेहिं पाहुडाइं, साहिओ घोरसिवनरवइसमाइट्टवुत्तंतो, हरिसिओ राया, सम्माणिया उचियपडिवत्तीए, पेसिया य सट्ठाणंमि ।

अन्नदिवसे य समारद्धो कुमारस्स नामकरणमहूसवो, समाहूओ कुलथेरीजणो, तओ वज्जंतसु चउव्विहाउज्जेसु नचंतसु तरुणीसत्थेसु मंगलमुहलेसु वारविलयाजणेसु पढंतसु मागहेसु पइट्ठियं कुमारस्स पुव्वपुरिसक्कमांगयं नरवि-क्कमोत्ति नामं, कालक्कमेण य विइकंतवालभावो नीसेसविज्जापायस्स लेहायरियस्स चेडयचक्कवालपरिवुडो महा-विभूईए पढणत्थमुवणीओ, अकालक्खेवेण य बुद्धिपगरिसेण जाओ एसो कलासु कुसलो, कहं चिय?—

पत्तट्ठो धणुवेए कुसलो नीसेसमल्लविज्जासु । कयकिच्चो करणेसु विचित्तचित्तेसु निउणमई ॥ १ ॥

परभावलक्खणम्मी वियक्खणो जाणओ समयसत्थे । पत्तच्छेये छेओ निम्माओ सहमगेसु ॥ २ ॥

निउणो मंतविथारे तंतपओगेसु कुसलवुद्धी य । पुरिसकरितुरयनारीगिहलक्खणवोहनिउणो य ॥ ३ ॥

आउज्जनट्ठजूप्पओगवहुभेयगेयचउरो य । किं बहुणा?, सव्वत्थवि गुरुव सो पगरिसं पत्तो ॥ ४ ॥

एवं च गहियकलाकलावं कुमरं वेत्तूण गओ कलायरिओ नरवइसमीवं, अब्भुट्ठिओ परमायेरेणं नरवइणा, दवावियास-
णो उवविट्ठो पुट्ठो य—किमागमणकारणंति, कलायरिएण भणियं—देव ! एस तुम्ह कुमारो गाहिओ नीसेसकलाओ सुरगु-
रुव पत्तो परमपगरिसं, न एत्तो उत्तरेण गाहियव्वमत्थि, ता अणुजाणेउ देवो अम्हे सट्ठाणगमणायत्ति, अह अकालक्खे-
वसिक्खियकुमारकलाकोसलसवणपवहुमाणहरिसभरनिम्भरेण नरवइणा आचंदकालियसासणनिवद्धदसग्गहारदा-
णेण पवरचामीयरयणरासिवियरेणेण विसिद्धवत्थफुल्लतंतोलसहतथसमप्पणेण य सम्माणिऊण परमायेरेणं पेसिओ
कलायरिओ सट्ठाणं, कुमारोऽवि निउत्तो गयतुरयवाहीयालीसु सभकरणत्थं, सो य दढासणवंधधीरयाए महावलेण
य जामभेत्तेणवि समसुवणेइ सत्त मत्तसिंधुरे पयणजवणेवेगे परमजचे चउइस तुरंगमे अट्ट महामल्ले य, एवं च राया
असमचाहुवलेण य मइपगरिसेण य कलाकोसल्लेण य नयपालणेण य विणयपवत्तणेण य समओचियजाणेण य
असरिससाहसत्तणेण य मयणाइरेयरुवविभवेण य जणवच्छलत्तणेण य वाढमविखत्तचित्तो कुमारमेक्कमेव पढावेइ
मंगलपाढेसु लेहेइ चित्तभित्तिसु निसामेइ कित्तीसु गायवेइ गीएसु अभिणचावेइ नट्टेसु, अविय-

खेवि दुट्ठसीलेऽवि रुवरहिएऽवि गुणविहीणेऽवि । लोओ पुत्ते पणयं किंपि अपुवं पयासेइ ॥ १ ॥

किं पुनः चिरकालसमुद्भवमि नीसेसंगुणमणिनिहिमि ! सकलभुङ्गरणखमे न होज्ज नेहो नरवइस्स? ॥ २ ॥
एगया य अत्थाणमंडवनिसन्नमि नरवइमि पायपीढासीणे कुमारो नियनियट्ठाणनिविट्ठसु भंतिसामंतेसु समारद्धमि
गायणजणे मणोहारिसरेण गेए पणच्चिरमि चित्तपयक्खेवनट्टविहिवियक्खणे चारविलासिणीजणे पचांसन्नमांगत्तूण
चिन्नविं पडिहारेण-देव ! हरिसपुरनगराहिवइस्स देवसेणभूवइस्स दूओ दुवारो देवदरिसणं समीहेइ, राइणा
भणियं-भइ ! सिग्गं पवेसेहि, जं देवो आणवेइत्ति भणिऊण पवेसिओ अणेण, कया से उच्चियपडिवत्ती, पुट्ठो य
आगमणप्पओयणं, दूएण जंपियं-देव ! हरिसपुरपट्टुणा देवसेणनरिंदेण रूवजोच्चणगुणोवहसियनागकन्नगाए निय-
सुयाए सीलवइनामाए वरनिरूवणत्थं पेसिओऽमिह तुमह पासे, रणणा जंपियं-भइ ! पेच्छसु पायपीढासीणं कुमारं,
परिभावेसु य किमणुरूवो वरो न वत्ति, दूएण भणियं-देव ! चिन्नवणीयं अत्थि किंची, रत्ता भणियं-चिन्नवेसु, दूएण
जंपियं-जइ एवं ता निसामेसु, अत्थि अमह नराहिवस्स देवसेणस्स समग्गवीरवग्गपहाणो कालमेहो नाम
महामल्लो, तस्स य किं वन्निजइ वलपगरिसंमि?, तथाहि-

दढकटिणकायवणमहिसज्जूहनाहेण सह सरोसेणं । सीसेण संपलगइ जुज्जेउं सो बलमएणं ॥ १ ॥

सुंडादंडे धेत्तण पाणिणा मत्तदंतिनाहंपि । तद्दिणपसूयसुरहीसुयं व कहेइ लीलाए ॥ २ ॥
भारसयसंकलंपि हु तोडइ हेलाए जुण्णरज्जुं व । नियमुट्ठिपहारेण य सिलंपि सो जज्जरं कुणइ ॥ ३ ॥

मंसस्स विरुद्धं किर लोहं एयंपि तत्थ विवरीयं । जं नाराया खित्तावि तस्स वाहिंणि न छिबंति ॥ ४ ॥
 इय सो नियगाढवलावलेवजो तिहुयणं जरतणं व । मन्नंतो भमइ पुरे निरंकुसो मत्तहत्थिव्व ॥ ५ ॥
 अन्नया य तस्स पसिद्धिमसहमाणा समागया देसंतराओ मल्ला, दिट्ठो तेहिं राया, साहियं आगमणपओयणं,
 समाह्वओ य रण्णा कालमेहमल्लो, निवेइओ से तव्वइयो, अब्बुवगयं तेण तेहिं समं जुज्झं, सज्जीह्वा दोवि पक्खा,
 कओ अक्खाडओ, विरइया उभयपासेसु मंचा, निविट्ठो अवलोयणकोऊहलेण नीसेसअंतेउरसमेओ नरवई पुरपहा-
 णपुरिसवग्गो य, समाढत्तं च भुयाहिं य अड्ढपायइयाहिं च बंधेहिं य विसमकरणपओगेहिं मल्लेहिं सह तेण
 जुज्झजं, खणंतरेण य दढमुट्ठिण्णहारेहिं निहया कालमेहेण देसंतरागया मल्ला, कओ लोणेण जयजयसहो, दिन्नं से
 नरिदेण विजयपत्तं, सम्माणिओ विचित्तवत्थाभरणेहिं, गओ नियनियट्ठाणेसु नयरजणो, रायावि अंतेउरपरिचरिओ
 संपत्तो नियमंदिरं, वीयदिवसे य सव्वालंकारविभूसिया काऊण देवीए पउमावईए पेसिया सीलवई कण्णगा
 पिउणो पायवडणत्थं, चेडीचक्कवालपरिबुडा य सा पत्ता नरिंदसगासे, निवड्डिया चरणेसु, निवेसिया रण्णा उच्छंगे,
 पुच्छिया य-पुत्ति ! केण कारणेण आगयांसि ? , तीए भणियं-ताय ! तुम्ह पायपडणनिमित्तं अम्मगाय पेसियम्हि,
 राइणा चिंतियं-अहो वरजोगत्ति कलिऊणं नूनं देवीए पेसिया, ता किमियाणिं कायव्वं ?-
 एकं चिय मह तणया पल्लवणयाए अग्गमहिंसीए । एसा वरस्स जोग्गा को पुण एयाए होज्ज वरो ? ॥ १ ॥

एयाए चित्तवित्तिं अविद्याणिथ जइ वरेज्ज निवपुत्तो । जो वा सो वा आजम्म दुक्खिया होज्ज ता एसा ॥ २ ॥
इति परिभाषिऊण पुच्छिया सा नरवइणा-पुत्ति ! को तुज्झ वरो दिज्झइ ? किं सुरुवो उयाहु समरंगणसवडंसुह-
सुहडपडिक्खलणपयंडपरक्कणो किं वा समरभीरुओत्ति, तओ ईसिं विहसिऊण भणियं तीए-ताओ जाणइ, राइणा
भणियं-पुत्ति ! अवरोहकयकजाइं न सुहावहाइं होंति ता सम्ममणुचितिय भणसु, तीए भणियं-ताय ! जइ एवं
ता जो एयं कालमेहमहं नियभुयवलेण भहियपरक्कमं करेज्जा सो मम वरो होज्जत्ति, राइणा चित्तियं-अहो बलाणु-
रागिणी मम तणया, को पुण समत्थो एयस्स वइयरस्स ? , भणिया य सा-पुत्ति ! मा कुणसु एवं, अतुलमहो खु
एसो, ता अन्नं वरं पत्थेसु, तीए भणियं-ताय ! जइ परं इयासणो अन्नोत्ति, इय तीए निच्छयसुवल्लभ रत्ता पेसिया
सन्ननरवईणं दूया, निवेयाविओ एस वुत्तंतो, एयं च अणब्भुवगच्छमाणा नरवइकुमारा एवं पयंपंति-

को बोहेज्ज कयंतं ? को वा हालाहलं विसं भक्खे ? । को कालमेहमहेण जुज्झिउं सह पवजेज्जा ? ॥ १ ॥
तेण न कज्जं रजेण किंपि न कज्जं च तीए भज्जाए । जा लब्भइ खित्तंसंयजीवियवेहिं कट्टेण ॥ २ ॥

एवं च निब्भगजणमणोरहेहिं असिद्धकजेहिं चेव पडिनियत्तिऊण दूएहिं रणो कहिओ मल्लजुज्झाणब्भुवग-
मगब्भो नीसेसनरेसरकुमारवुत्तंतो, तं च सोऊण गाढसोगाउलो जाओ देवसेणनरवई, एत्थंतरे विन्नत्तो मंतिसामं-
तेहिं-देव ! किमेवं उच्छन्नच्छाहा होह, अज्जवि देवेण अनिरुविओ चिट्ठइ कुरुदेसाहिनरवइसुओ नरचिक्कमकुमारो,

राइणा भणियं-सोऽवि एवं चेव परंमुहो हविस्सइ, मंतिसामंतोहिं वुत्तं-देव ! मा एवं जंपह, जओ अपोरिसे(परिसे)ओ
 तस्स वलपगरिसो असंभाचणिज्जो निजुद्धपरिस्समो अणाइक्खणिज्जा मल्लविज्जाए कोसल्लया, किं वहुणा ? नरसिंहनरवइ-
 साहसतोसियाए भगवईए जो दिण्णो तस्स किं वन्नियं ? सरीरमेत्तेण चेव सो नरूयो सेसगुणेहिं निच्छियं देवोत्ति,
 एयं च समायणिज्जण संजायहरिसेण देवेण पेसिओऽहं तुम्ह समीवे, ता देव ! एयं तं विण्णवणिज्जंति, राइणा भणियं-
 भइ ! वररयणपुन्नकेसरिगुहव सेसाहिमतथमणिच्च समगं चिय भयहरिसे जणेइ विण्णत्तिया तुज्झ, दूएण कहियं-
 देव ! एवमेयं, तओ राइणा अद्धच्छीए पेच्छियं कुमारवयणं, कुमारोऽवि तक्खणं चिय उट्ठिओ निवडिओ रण्णो
 चरणेसु, भणिलमाढत्तो य-ताय ! समाइसह किं कीरउत्ति ? राइणा भणियं-कुमार ! निमुणियं तए दूयवयणं ?
 केरिसो वा तुह भुयंदंडपरक्कमो ? कुमारेण भणियं-ताओ जाणइ, तओ राइणा जोगयसुवलम्भ अब्भुवगयं मल्ल-
 जुज्झं, सम्माणिज्जण सट्ठाणं पेसिओ दूओ, गओ जहागयं, निवेइयं च तेण जहावित्तं देवसेणरणो, जाओ से परमो
 पमोओ, निरुक्खियं परिणयणजोगं लगं, पेसिया य वरागरिसगा पहाणपुरिसा, अणवरयपयाणएहिं पत्ता जयंति-
 नयरिं, विरइओ आवासो, अणुरूवसमए दिट्ठो राया, सिट्ठं नियकजं, तओ पउरकरितुरगसुहडकोडिपरिखुडो पेसिओ
 तेहिं समं कुमारो, पत्तो कालक्कमेण हरिसणुरनगरसमीवे,

तो तं इंतं नाउं, रत्ता काराचिओ पयत्तेणं । वंसग्गवद्धयचिंधवंधुरो झत्ति नयरमहो ॥ १ ॥

विहिया नरोहिं कुसलेहि कुसुमछडाडोवसुंदरा मग्गा । खित्ता य कुसुमपयरा रणज्झणिरभमंतभमरउला ॥ २ ॥
नचंतनाडइजा तालाथरकहगपवरमणिजा । जाया चउक्कचचरचउम्मुहप्पमुहदेसावि ॥ ३ ॥
ठाणे ठाणे रइया दसद्धवणेहिं सुरभिकुसुमेहिं । विच्छित्तिविचिच्चाओ लंबंतुहामदामाओ ॥ ४ ॥
भवणंपि तस्स जोगं निरुवियं सत्तभूमियं रम्मं । चंदणरसलिहियपसत्थसत्थियं थंभसयकलियं ॥ ५ ॥
तं नत्थि जं न विहियं कुमरागमणे पुरंमि नरवइणा । अहवा हरिसुक्करिसा पुरिसा किं किं न कुवंति ? ॥ ६ ॥
एत्थंतरे समागया पहाणपुरिसा, पणमिऊण भणियं तेहिं—देव ! वद्धाविज्जह तुब्भे पुरसमीवसमागयकुमारकु-
सलोदंतसवणेण, तओ समुद्धयविजयेजयंतीसहस्साभिरामाए चाउरंगिणीए सेणाए समेओ सियसिंधुरखंधाधि-
रूढो पडिपुण्णचंदमंडलाणुकारिणा छत्तेण धरिज्जमाणेणं निग्गओ राया कुमारभिमुहं, खणंतरेण दिट्ठो कुमारो
समालिंगिओ गाढपणयं पुट्ठो य सरीरारोगयं, दट्ठूण कुमारसरीरसंठाणसिरं चित्तियं रणणा—निच्छियं इयाणिं विण-
स्सइ कालमेहमल्लस्स बाहुवलमडप्फरोत्ति, अह मुहुत्तमेत्तमणुगच्छिय पुव्वनिउत्तनियनियट्ठाणेसु पेसिओ कुमारप-
रियरो, कुमारोऽवि विमुक्को तंमि चेव पासाए, दवावियाइं करितुरयाईणं जोगासणाइं, कुमारस्सवि कए पेसिया
पउरवंजणभवखभोयणसमिद्धा रसवई, कयं च अन्नपि तक्कालोचियं करणिज्जं, आहूया य अवरणहसमए पहाणपुरिसा,
भणिया य—भो गंतूण निवेयह कुमारस्स जहा एसा अम्ह सुया बलाणुरागिणी, ता दंसेह कालमेहमल्लस्स विजएण

नियसामत्यति, जं देवो आणवेइत्ति भणिऊण ते गया कुमारसमीवे, निवेइओ तस्स नीसेसवइयरो, अब्भुवगओ कुमारेण, ततो वीथदिवसे आढत्तो अक्खाडयपरिक्खेवो निवद्धा मंचा परमकोऊहलाउलिजमाणमाणसो मिलिओ नयरजणो, ठिओ मंचंमि संतेउरो नरवई, आरुढा य एकदेसंमि चेडीक्कवालपरिबुडा पाणिपइडियलट्टपप्फुल्लफुल्ल-माला सीलमई रायसुया, पडिक्खलिओ सवत्थ जणसंचारो, कओ अंगरक्खेहिं परिक्खेवो, वज्जियं पलयकालगज्जं-तपक्खुहियपुक्खलान्तपगज्जिरवगंभीरं चउविहमाउज्जं, जाओ अवसरो, मंचाओ तओ कुमारो गाढुप्पीडियनियं-सियकडिछो दढवद्धेकेसपासो पमुक्काभरणसंभारो कुलथेरीकयरक्खो जलणुभडगुरुपयावदुण्णेक्खो संनिहियपाडिहे-रोव भासुरो झत्ति अन्नरिओ, तहा—

कंठतडुभडपरिहियपयतलविडुलंतविमलवणमालो । आनद्धमल्लवलओ गजंतो पलयमेहोव ॥ १ ॥

मयाभिंमलरत्तच्छो गबुद्धुरकंधरो तुरियचवलं । पेच्छयजणपरियरिओ संपत्तो कालमेहोवि ॥ २ ॥

रे मल्ल ! मेल्लसु लहुं पुव्वज्जियविजयगव्वमेत्ताहे । अणुसरसु ममं सिग्घं अह भणिओ सो कुमारेण ॥ ३ ॥

सोउं कुमारवयणं जरोव गव्वो झडत्ति तस्स गओ । अणुचिंत्तिउं च लग्गो जुत्ताजुत्तं सडुद्धीए ॥ ४ ॥

कहं ?—जइ एस मए विजिओ एयजणाओ तहावि नो कुसलं । अह एएण जिओऽहं वित्तिच्छेओ तओऽवस्सं ॥ ५ ॥
अतुलवलविक्रमस्स उ इमस्स विजएऽवि मज्झ संदेहो । ता उभयपासरज्जुव संकडं एयमावडियं ॥ ६ ॥

इय बहुभेयविकल्पणवसाउल्लिङ्गंतच्चित्तवित्तस्स । कुट्टं तडत्ति हिययं तस्स कुमित्तस्स व रहस्सं ॥ ७ ॥
तओ जाओ कलयलो, उग्घोसियं च जणेण-अहो महप्पभावं दंसणं कुमारस्स, जेणावलयणमेत्तेणवि वज्जगंठिव
निट्ठरं कुट्टं तडत्ति हियमेयस्स, ता जयइ सबहा कुमारो, एत्थंतरे ओयरिऊण मंचाओ चेडीजणपरिबुडाए सील-
मईए खित्ता कुमारकंठेसे समं नियचित्तविचीए वरमाला, पवज्जियाइ असंखघोससंखोभियभवणाइ मंगलतूराइ, जाओ
णये पमोओ, तुट्ठो राया सह मंतिसामंतोहिं, पारद्धो विवाहो महाविभूईए उभयपदखपरितोसेणं, निवत्तिए य तंमि-
पगलंतमयजलुब्भडकरडतड्डाभमभिरभमराणं । सुहलक्खणं कियणं पंचसयाइ गइदाणं ॥ १ ॥
मणपवणजविणवेगाण जच्चतुरंगाण वंकगीवाणं । वारस चेव सहस्सा रहाण दो तुंगसिंगाणं ॥ २ ॥
कणगस्स तीस कोडी चीणंसुयपसुहवत्थरासीओ । दिन्नाओ कुमारस्सा पाणिस्स विमोयेणे रत्ता ॥ ३ ॥
कयमन्नंपि सविसेसं कायवं, जाओ अवरोष्परं पणयभावो । अवरवासरे य पेसिया कुमारेण पहाणपुरिसा देवसेण-
नरवइस्स पासे नियट्ठाणगमणाणुन्नागहणनिमित्तं, गंतूण निवेइयं तोहिं नरवइस्स, तओ देवसेणेण पुणरवि सम्माणिओ
पहाणवत्थुसमप्पणेण कुमारो, निरुवियं गमणजोगं दिणं, निउत्ता दंडनायगा अणुगमणत्थं, अह पसत्थवासरे
ससुरप्पभिईण कयसुचियकायवो पत्थिओ कुमारो हरिकरिनरनियरसमेओ सनयराभिमुहं । एत्थंतरे-
सत्वालंकारधरिं सीलवइं चेडियाजणसमेयं । लच्छिव कुमारपुरो काउं रत्ता भणियमेयं ॥ १ ॥

पुत्ति ! पवित्तं सीलं पालेज्जसु मा करेज्जसु कुसंगं । अणुवत्तिज्जसु गुरुज्जणमवणिज्जसु दुव्विणयभावं ॥ २ ॥
 सेविज्जसु नयमगं भियमहुरक्खरगिरं वएज्जासि । आराहेज्जसु सपियं देवो भत्ता कुलवहूणं ॥ ३ ॥
 कुमरोऽवि इमं बुत्तो एसा एक्का सुया ममं इट्ठा । छायव सहयरी जह हवइ सया तह तए किच्चं ॥ ४ ॥
 इय सिक्खविउं राया धूयं विरहग्निदूप्पियसरीरो । अणुगमिऊण कुमारं नियनयराभिमुहमह चलिओ ॥ ५ ॥
 कुमारोऽवि पेच्छंतो नगनगरागरगामकाणरमणिज्जं मेइणिं साहितो विसमपल्लीनिलीणे भिह्वाहिवइणो
 पयहंतो पुव्वनीईओ अवलोयंतो तावसज्जनिसेविए अणवरयडज्झंतघयमहुसमिहमहोसहिसमुच्छलंतवहलधूमपडल-
 कयमेहसंसिंहडितंडवाडंवररमणिज्जे आसमपए, पइदिणपयाणएहिं संपत्तो जयंतीए नयरीए वाहिरुज्जाणे, वद्धाविओ
 नरसिंघनरवई, काराविद्या नयरसोहा, जाया समुद्धयविचित्तचीणंसुयचिंधवंधुरा रायमग्गा, अह पसत्थंमि सुहुत्ते
 अंतैउरपुरप्पहाणजणपरियरिएण नरिंदेण अणुगम्ममाणो नरविक्रमो नयरिं पविसिउमारद्धो, ठिया य रायमग्गोभय-
 पासपासायमालासु तदवलोयणकोऊहलाउला कुसुमुम्मिस्सक्खयहत्था लोयसत्था, जाया य कुमाररूवपलोयणपा-
 उभवंतविचिवियाराण जुवईजणाण विब्भमा । कहां विय ?—

दट्ठूण कावि पडिज्जुवइकंतंगंडत्थलंतसंकंतं । कुसुमक्खएहिं ताडइ ईसाइतिव्व रायसुयं ॥ १ ॥
 पवियंभियकुसुमाउहवसवियसियलोयणा पलोयंती । न सुणइ सकडिल्लंपिहु पवणेणायट्ठियं अवरा ॥ २ ॥

कुमरपल्लोयणवामृदमाणसा निचला गिहग्गया । अनिलचलंचलचूडा काविहु रेहइ पडायव ॥ ३ ॥
अम्मे ! जामि पलोइदुं दसदिसं कोलाहला सुवए, सा मा गच्छ मयच्छि ! निच्छियमिमो सो एइ रणो सुओ ।
दिट्ठे जम्मि पणट्ठनिव्वुइमणा सुद्धावरा मग्ग(ङ्ग)णा, वट्ठंती विव सासुयाए पुरओ अन्ना इमं जपइ ॥ ४ ॥
इय एवं सविलासाहिं नयरनारीहिं सच्चविज्जंतो । कुमरो वहूसमेओ संपत्तो निययभवणंमि ॥ ५ ॥

तहिं गएण य कया सविसेसं गुरुजणाण पणामाइपडिवत्ती, समप्पिओ य रणा अंवरतलमणुलिहंतो निययभव-
णनिव्विसेसो पासाओ कुमारस्स, तत्थ ट्ठिओ य सो सक्को इव देवलोए धरणो इव पायाले विसयसुहं भुंजंतो
कालं गमेइ, अन्तरंतरा य तुरगवाहियालिं च मत्तसिंधुरदमणं च मल्लजुज्झब्भसणं च राहावेहकोऊहलं च धम्मसत्थ-
सवणं च देसंतरनयरवत्तानिसामणं च गुरुचरणनियेवणं च मग्गजणमणोरहपूरणं च करेइत्ति । अह कुमारस्स का-
लक्कमेण सीलमईए सह विसयसुहं भुंजमाणस्स कुसुमसेहरविजयसेहरनामाणो जाया दोन्नि पुत्ता, ते य बल्लहा पिया-
महस्स, विविहप्पयोरोहिं उवलालिज्जमाणा वट्ठंति । अन्नया राइणो समीचे निसन्नंमि नरविक्रमे जहोचियठानिनि-
ट्ठंमि सेवगजणे भयभरसंभरियसच्छंदजसुणावणविहारो तडयडारावतोडियनिविडधडणुत्तरतारसयप्पमाणलोहनिगडो
सयखंडच्चुन्नियमहालाणखंभो निदयकरप्पहाराहयारोहगवग्गो पहाविओ नयरमज्जेण जयकुंजरो उम्मूलियगरुयहुममो-
डियगुरुविडवकडयडरउदो कुंभत्थलपणोल्लणपाडियसुरभवणसिहरग्गो अइकट्ठिणकरप्फालणविहाडिउद्दामंतुंगयागारो

अइवेगुचालियकन्नतालविहविचियभसलउलो अइरभसभरपहावणसपक्खकुलसेलचल्लिकयसंको दढदंतदंडताडणढलढ-
 लियट्टालयसमूहो करघायदंतवेहणचरणुप्पीडणनिवाडियजणोहो सब्वत्थ भमइ भीमो जमोव्व जुगविगमसमयंमि, अह
 मंदरमहिजमाणमहोयहिघोसघोरें समुच्छलिए तियचउक्कचर्चरेसु जणाणं अक्कदियरेवे पुच्छियं नरवइणा-भो भो
 किमेवं नयरे कोलहलो सुम्मइत्ति ?, जणेण भणियं-देव ! एस तुम्ह जयकुंजरो भगालाणखंभो नयरं विहवेइ,
 एवं सोचा विसज्जिया कुमारपमुहा पहाणलोया जयकुंजरगहणनिमित्तं, भणिया य-अरे ! सब्वहा सत्थघायं परिहरं-
 तोहिं एसस वट्ठियव्वं, एवं च पडिवज्जिय गया ते तदभिमुहं, न य पेच्छंति कमवि उवायं जेण हट्थी वसमुवग-
 च्छइत्ति, एत्थंतरे वेलामासवत्तिणी गुरुगम्भभारवसविसंडुलनिवडंतचरणा गाढपाणभयकंपंतसरीरजड्डी इओ तओ
 य धावंती एगा कुलंगणा दिट्ठा जयकुंजरेण, तओ उल्लालियकरगो पवणवेगेण धाविओ तीसे अभिमुहो, सावि
 कुंजरं तहा सिग्घमागच्छंतं पेच्छिऊण सज्झसभरनिरुद्धपयप्पयारा कलुणाइं दीणाइं विलविउं पयत्ता, कंहं चिय ?-
 हे माइ भाय ताया तायह मं मा उवेक्खह इयाणिं । एसो मम वहणट्ठा दुट्ठकरी पासमल्लियइ ॥ १ ॥
 हं हो पेच्छगलोया ! निक्करुणा करिवरं पडिक्खलह । गुरुगम्भभरकंता एसा संपइ विवज्जामि ॥ २ ॥
 अहह कंहं पावकरी एसो सो आगओ मम समीवे । निस्सरणा नित्ताणा कमुवायं संपइ सरामि ? ॥ ३ ॥
 किं कोडवि महापुरिसो परोवयारत्थधरियनियपाणो । एत्थ न पेच्छइ सहसा मं दुक्खत्तं विणस्संति ॥ ४ ॥

इय दीणकलुणवयणाइं णेगसो भासिऊण खणमेकं । सुच्छानिमीलियच्छी धसत्ति सा मंहियेले पडिया ॥ ५ ॥
सोवि करिवरो दढरोसभरत्तणेत्तो संपत्तो तीसे थेवंतरेण, दिट्ठा य सा कुमारेण भयवसभूमिनिस्सहनिवडियंगी,
चित्तिं च-अलुत्तमलुत्तमियाणिं उवेहणं एयाए, जओ—

एकं अवला एसा अन्नं गुरुगन्धमारविवसंगी । अन्नं पुण सुच्छाए निमीलियच्छी धरणिपडिया ॥ १ ॥
अन्नं च पुणो ताथस्स एस जयकुंजरो अतीव पिओ । सत्थेण न हंतव्वो विसममिमं निवडियं कज्जं ॥ २ ॥
अहवा रुसउ ताओ जं भवइ तं करेउ मम इण्हि । हंतव्वो एस करी दुव्वलजणपालणं धम्मो ॥ ३ ॥

इय निच्छिऊण निविडवद्धुगुलंचलो तुरंगाओ अवयरिऊण अवलोइज्जंतो नरनारीजणेण निवारिज्जंतो पासव-
त्तिपरियेण पडिखलिज्जमाणो अंगरक्खेहिं निरवेक्खो नियजीवियस्स सिग्धं पधाविऊण मेहस्स व मयजलासार-
पसमियरयनियरस्स कयगंभीरगलगजियस्स सहस्सनयणोव थेवंतरेणासंपत्तस्स जयकुंजरस्स करणप्पओ-
गवसेण आरूढो पट्टिदेसंमि कुमारो, ताडिओ य कुलिसनिट्ठुरेण सुट्टिप्पहारेण करी कुंभत्थलंमि, अह खरयरं रोस-
मुवागओ मणांगंमि अनियत्तंतो नारीवहाओ सो कुमारेण जमजीहाडुन्विसहाए खगग्घेणूए आहओ सव्वसत्तीए
कुंभजुयलंतराले, तओ पढमुगगमंतरविमंडलाओव्व करपसरो खरपवणपणुन्नकमलसंडाओव मयरंदनीसंदो महागिरि-
गेरुयागराओव्व निव्वभरसलिलुप्पीलो कुंभत्थलाओ से वूढो महारुहिरप्पवाहो, सहसच्चिय विगयनयणोवलंभो विहलं-

घलीभूओ मओ इव मुच्छिओ इव दढपाससहस्ससंजमिओ इव निच्चलो ठिओ करी, तओ अवयरिऊण कुमारेण संठविया सा भूमिगया इत्थिया, विसुक्का य समीहियपएसंमि, सयंपि गओ नियमंदिरं, सोऽवि करिवरो गहिओ आरोहेहिं, पारद्धो अणवरयजलघडसहस्सखेवण सिसिरोवयारो, पयट्ठावियाइं घायविसोहणाइं, महाविमहेण नीओ निययावासे, निवेइयं नरवइणो जहावित्तं, रुद्धो राया, परं सोयसुवागओ, भणिउमाढत्तो य—

रे रे वचह पुरिसा ! निस्सारह तं सुयं दुरायारं । जयकुंजरंऽवि निहए अज्जवि इह वसइ जोऽलज्जो ॥ १ ॥

अव्वो साहसतुट्ठाए तीए देवीए सुंदरो दिन्नो । पुत्तो अमित्तल्लवो देवाविहु विप्पयारंति ॥ २ ॥

नूणं मूढो लोओ तम्मइ पुत्तस्स जो निमित्तंमि । न सुणइ एवंविहदोससाहणे पयडसत्तुत्तं ॥ ३ ॥

अन्नाणचिलसियमिणं गइं अपुत्तस्स जं निवारंति । इहलोयप्पडिणीओ परलोयसुहो कहं होज्जा ? ॥ ४ ॥

नीसेसरज्जसारं एयं जयकुंजरं हणंतेण । कह मह सावेक्खत्तं पुत्तेण पयासियं भणसु ? ॥ ५ ॥

ता जह पुवं एक्केण रक्खियं खोणिवल्लयमक्खंडं । रक्खिस्सामि तहेण्हि निस्सारह नेरियं एयं ॥ ६ ॥

जो एरिसं अणत्थं वीसत्थो कुणइ वसइ निस्संको । सो नूण ममंपि विणासिऊण रज्जंपिहु हरेज्जा ॥ ७ ॥

इय पुणरुत्तं नरवइस्स निच्छयमुवल्लभ विमाणदुम्मणा गया कुमारसमीवं रायपुरिसा, तं च पणमिऊण सामव-
यणा निविट्ठा एगदेसे, पलोइऊण य तेसिं सुहसोहं भणियं कुमारेण—किं भो ! गाढमुच्चिगा दीसह ? , साहह किमेत्थ

कारणं ? खणंतरं निरुद्धकंठं चिद्विद्य दीहुणहुणहुसुकनीसासपुरस्सरं दुस्सहचिरहविहुरनिस्सरंतवाहप्यवाहं परासुसियलो-
यणजुयलं भणियं पुरिसेहिं-कुमार ! निम्भगगसिरसेहरा किं सोहेभो ? कुमारेण भणियं-कहं चिय ? पुरिसेहिं भणियं-
जेण तुम्हेहिं सह दुस्सहो दीहचिरहो भविस्सइत्ति, इंगियाकारकुसलत्तणओ परियाणिऊण तेसिमभिप्पायं भणियं
कुमारेण-किं कुविओ ताओ निविसयमाणवेइ ? रायपुरिसेहिं भणियं-कहमेयं परुसक्खरं देवदुल्लहाणं तुम्ह भणि-
ज्जइ ? सयमेव जाणह तुब्भे जमेत्थ पत्तकालं, तओ वत्थतंवोलाइणा पूइऊण रायपुरिसा सट्ठाणे पेसिया कुमारेण,
वाहराविया य निययसेवगा, भणिया य-भो महाणुभावा ! वारणसिरवियारणकुविएण ताएण निविसओ आणत्तोम्हि,
ता गच्छह नियट्ठाणेषु तुब्भे, अवसरे पुणरवि एज्जहत्ति, सम्माणिऊण सप्पणयं पेसिया, देवी य सीलमई भणिया,
जहा-गच्छसु पिए ! तुमं पि पियहरं, पत्थावे पुणरवि एज्जाहि, सा य खणमवि विओगदुक्खमसहमाणी जसुणाजलस-
च्छहं सकज्जलं नयणवाहप्यवाहं सुंचंती रोचिउं पयत्ता, संठविया कुमारेण तेहिं तेहिं महुरवयणेहिं, नेच्छइ य सा खण-
मवि विओगं, तओ भणिया कुमारेण-पिए ! दुग्गा मग्गा आजम्मसुहलालियाणं दढमजोग्गा य, असंजायसरीरवला
बालजुयलपरिवुडा य तंसि, ता विरम सव्वहा ममणुग्गं कुणमाणी इमाओ असग्गहाओत्ति, सीलमईए भणियं-
अज्जपुत्त ! तइया ताएण तुह किमुवइहं ? कुमारेण भणियं-न सरामि, सीलमईए जंपियं-मम एक्कच्चिय धूया एसा
अचंतं निवुइठाणं छायव्व सहचरी जह हवइ सया तह तए किंचंति, कुमारेण भणियं-पिए ! सुमरियमियमियाणिं,

तीए जंपियं-ता कीस नियत्तेसि मं?, कुमारेण भणियं-मग्गगाढपरिस्समकारेण नियत्तेसि, जइ पुण अवस्समेवागंतव
मए समं ता पउणा भवसु, विमुंचसु भवणनिवासाभिरं परिचय सुकुमारत्तणंति, सीलमईए भणियं-एसा समसुह-
दुक्खसहा जाया पगुणस्हि, तथो करकलियसरासणो पिट्ठिप्पएसवद्धतोणीरो सुयजुयलसमेयाए सीलमईए सहिओ
सुहपसुत्तेसु नयरलोएसु पसंतेसु गीयरवेसु सट्ठाणनिविट्ठेसु अंगरक्खेसु पमत्तेसु जामकरिघडाधिरुठेसु सुहडेसु इओ
तओ पेसिएसु नियचेडगेसु नीहरिओ नयराओ कुमारो, अविच्छिन्नपयाणएहिं परं रजंतरं गंतुं पवत्तो य ।

इओ य आयन्निऊण कुमारस्स विदेसगमणं सयलोऽवि नयरीजणो सुक्ककंठं विलविउमारद्धो, मंतिणोऽवि परिच-
त्तनीसेसरज्जावारा हरियसवस्ससारा इव विमणहुम्मणा गंतूण नरनाहं उवलंभिउं पवत्ता, कहं विय ?

तिलतुसमित्तंपिहु नियपओयणं अम्ह साहिउं देवो । पुच्चिं करिंसु इण्हि पवयमेत्तेऽवि नो पुट्ठा ॥ १ ॥

ता देव ! जुत्तमेयं काउं किं तुम्ह थेवक्केऽवि ? । रज्जभरधरणधीरो जमेस निवासिओ कुमरो ॥ २ ॥

किं एगदुट्ठकुंजरकएण नियजीयनिन्विसेसस्स । पुत्तस्स एरिसगई विहिया केणावि नरवइणा ? ॥ ३ ॥

किं वा विंझमहागिरिपरिसरधणीए कुंजरकुलाइं । हरियाइं तक्करेहिं जं देवो ववसिओ एवं ॥ ४ ॥

इत्थीए रक्खणओ किमजुत्तं नणु कयं कुमारेण ? । नियडिंभदुट्ठचेट्ठावि जणेइ जणयस्स संतोसं ॥ ५ ॥

पररज्जेसु य अजसो अम्हाण पयासिओ तए नूणं । जह नरसिंघनराहिवरज्जमुवेक्खंति गुरुणो य ॥ ६ ॥

ता गिणहह नियमुदं सह भवणधणेहिं मोक्कलह अम्हे । न सहिस्सामो एत्तिमवजसरयफंसणं देव ! ॥ ७ ॥

इय मंतीहिं भणिए राया संजायचित्तसंतावो । अब्भुवगयनियदोसो ताहे ते भणिउमाढत्तो ॥ ८ ॥

मंसिहह मम अवराहं जमपुच्छिय एरिसं कयं कज्जं । नो कोवभराओ जओ जुत्ताजुत्तं मए नायं ॥ ९ ॥

जह तुब्भे भणह तहा न कोऽवि दोसेऽवि चयइ नियपुत्तं । इय वइयरछउमेणं मन्ने लच्छीए छलिओऽहं ॥ १० ॥

जं पुण इय दोसाओ मंतित्तविमोयणं कुणह तुब्भे । एसेव निरंजणसामिभत्तिजुत्ताण होइ मई ॥ ११ ॥

केवलमेक्को पुत्तो रज्जसमत्यो गओ विदेसंमि । तुम्हेवि उवेक्खह मं उभयं सोढुं न सकोऽहं ॥ १२ ॥

ता संपयं पसीयह रज्जं चित्तेह लहह कुमरस्स । सब्बथावि पउत्तिं एत्तो रोसेण पज्जत्तं ॥ १३ ॥

एवं गाढनिबंधेण पडिचन्नं मंतिजणेणमेयं, पेसिया य सयलदिसासु वरतुरयाधिरूढा पुरिसनियरा कुमारन्नेसण-
निमित्तं, गया य सब्बत्थ, निरुविओ सच्चजत्तेण, न केणवि दिसाभागमेत्तपि वियाणियं, तओ कहवयवासराइं
विथरिय तेसु तेसु ठाणेषु अकथकज्जेहिं चेव नियत्तिऊण तेहिं सिद्धो सभानिचिट्ठस्स मंतिजणसमेयस्स नरिंदस्स
कुंमाराणुवलंभवुत्तं, तं च सोच्चा अच्चंतं सोगं कुणंतो राया वागरिओ मंतीहिं-देव ! अलं परिदेविण, न
कयाइ करतलाओ विगलिओ पुणोवि पाविज्जइ चिंतामणी, न य दढकुनयदंडताडिया पुणोऽवि मंदिरे निवसइ
रायलच्छी, न गाढमक्कारणावमाणिओ नियत्तइ सण्णुरिसजणो, राइणा भणियं-जइ पढममेव सो तुम्हेहिं नियत्तिओ

होंतो ता जुत्तं हुत्तं, मंतीहिं भणियं—जइ मूलेऽवि से न रोसुप्पायणं देवो कॅरंतो ता जुतत्तंरं हुत्तं । अवि य—
 कल्लविणासे जाए जह बुद्धी बंधुरा पवित्थरइ । तह जइ पढमं चिय होल्ल देव ! ता किं न पज्जत्तं ? ॥ १ ॥
 यन्ना सबुद्धिबिभवेण जाणिउं वत्थु तस्स य सरूवं । पढमं चिय सुग्गहिंयं कुणंति सप्पस्स वयणं व ॥ २ ॥
 रन्ना जुत्तं सच्चं एयमहो केवलं बहुसणाहो । जाणेण विणा कह सो दूरपहं पाविओ होही ? ॥ ३ ॥
 मंतीहिं तओ भणियं जेणेसा चिहडणा कया देव ! । सो दूरेऽवि नएज्जा नूण कुमारं लहुं दईवो ॥ ४ ॥
 एवं चिरं परितप्पिय पुणोवि चारपुरिसे[हिं] कुमारवत्ताजाणत्थं पेसिय निग्रनियठाणेषु गया मंतिणो, रायावि
 सुयविरहवेयणाविहुराए चंपयमालाए देवीए संठवणनिमित्तमंतेउरं गओत्ति ॥

इओ य सो कुमारो कमंकेमण गच्छंतो चिरकमलवणविहारुद्धिगाए लच्छिदेवीए तुट्टेण पयायइणा निवासनिमित्तं
 व विरइए नाणाविहतरुणतरुसामलियसयलरचिकरपसरे अणेगकोडीसरीयजणसंकुले संदणपुरेवाउले संपत्तो, अवि-
 याणमाणो य तहाविहं गेहंतरं गोपुरपचासनस्स पाडलाभिहाणमालागारस्स मंदिरंमि पविट्ठो, दिट्ठो य सो पाड-
 लेण विन्नाओ य विसिट्ठागिईए जहा नूणं कोई एस महापुरिसोत्ति, तओ अब्भुट्ठिज्जण सपणयं कया उच्चियपडिचत्ती,
 दंसिओ गिहस्स एगदेसो, निक्कारणवच्छछयाए य भायरं व तं उवयरिउमाढत्तो, कुमारोऽवि तत्थट्ठिओ सज्जहभ-
 द्दोघपंगमो दिणगमणियं कुणंतो अच्छइ । अन्नया य पुवसमाणियंमि निट्ठियंमि दविणजाए पाडलेण भणियं—कुमार !

मेहायस निव्ववसायाणं केरिसो निव्वाहो?, ता परिचयसु आलस्सं, गिण्हसु ममारामस्स एगदेसं, समुच्चिणसु कुसुमाइं, गुंथिऊण य निविहमालाओ विक्किणसु रायमगंमि जहा सुहेण चैव निव्वहइ तुह परिगहोत्ति ।

तओ-जह जह वाएइ विही विसरिसकरणेहिं निठुरं पडहं । धीरा पहसितवयणा नचंति तहा तह चैव ॥ १ ॥
इय चिंतिऊण खत्तधम्माणणुरुवंपि तयणुरोहेण पडिवन्नमेयं कुमारेण, पइदियहं च सह सीलमईए मालागारो-
वदंसियकाणेगेदेसतरुकुसुमाइं उच्चिणिय नियगेहमांगंतूण मालाओ विरएइ, पाडलगभज्जाए य समं सीलमइं तविक्कय-
निमित्तं रायमगे पेसेइ, उप्पज्जइ जहू अत्थो, एवं च पइदिणं पुप्फविक्कयकरणेणं सुहेण संपज्जइ निव्वाहो, अन्नया
पप्फुल्लविइल्लमालाओ गहाय सीलवई गया रायमगे, अह तीसे रूवेण जोवणेण य लायणणेण य सोहग्गेण य अक्खि-
त्तचित्तो समागओ एगो कोडीसरीओ देहिलो नाम नावावणिओ, भणिया य तेण-भदे ! केत्तिएण इमाओ मालाओ
लभंति ?, तीए भणियं-पंचहिं सुवण्णधरणेहिं, तओ

दानेन वैराण्युपयान्ति नाशं, दानेन भूतानि वशीभवन्ति । दानेन कीर्तिर्भवतीदुशुभ्रा, दानात्परं नो वरमस्ति वस्तु ॥ १ ॥
इय चिंतितेण तीसे चित्तावहरत्थं समप्पिया तेण तिण्णि दीणारा, सहरिसाए तीए गहिऊण समप्पियाओ
फुल्लमालाओ, विणएण भणिया य सा-भदे ! इओ दिणाओ आरब्भ मा अन्नस्स दाहिसि, समहिगतरसुद्धेणवि अहमेव
गहिस्सामि, पडिवन्नं च तीए, गयाइं दोन्निवि नियनियगेहेसु, एवं पइदिणं सो तीए सगासाओ पुप्फमालाओ गि-

ण्हइ, साऽवि समहिगदविणलोभेण तस्स चवं दलयइ । अन्नया परतीरगमणनिमित्तं नाणाविहअसुह्रभंडभरियं जाणवत्तं
 ठावियं अणेण समुहतीरे, सावि भणिया, जहा-कळेऽहं परतीरे गभिस्सामि, तम्हा तुमे समुहतीरे असुगंभि पएसे
 आगंतूण नीसेसाइं कुंदवेइल्लनवमालईपाडलाइसुत्तयचंपयपमुहाइं कुसुमाइं समप्पेज्जासि, अहं ते चउग्गुणं मोहं
 दवाविस्सामि, पडिवन्नं च तीए हट्ठहिययाए, न सुणिओ कोऽवि परमत्थो, बीयदिवसे गया समग्गकुसुममालाओ
 गहिऊण निदिट्ठणो, दिट्ठो सो वणिओ जाणवत्ताधिरूढो, पणासियाइं तीए कुसुमाइं, पसारिओ तेण हत्थो, तीएवि
 समप्पणं(णत्थं)पलंबिया सुणालकोमला नियमुयलया, तेणवि हरिसभरनिम्भरगेण सकुसुममाला चैव गहिऊण आरो-
 विया सीलवई जाणवत्ते, उक्खित्ता उवरिगाए, एत्थंतरे वज्जावियाइं मंगलतूराइं पयट्ठियं पवहणं विमुक्का सियवडा
 वाहियाइं आवल्लयाइं चंडगंडीवविमुक्ककंडव वेगेण गंतुं पवत्तं जाणवत्तं । इओ य सो नरविक्रमकुमारो अचंतं तदणाग-
 मणकालचिलंबुधिग्गचित्तो इओ तओ सीलमइं पलोइउं पवत्तो, तं अपेच्छमाणेण य तेण पुट्ठा पाडिवेसिया, अवलो-
 इओ रायमग्गो, सम्मं निरिक्खिया तियचउक्कचचरा, अवलोइयाइं सयलदेवउलभवणकाणणाइं, निवेइया वत्ता पाड-
 लयमालागारस्स, तेणावि सदायेरेण गवेसिया सीलमईसच्चरणेषु, कत्थविय पउत्तिमपावमाणेण सिग्घमेव नियत्तिय
 भणिओ कुमारो-महायस ! धीरो भव, परिचयसु कायरत्तं, कुमारोण भणियं-भद्द ! न किंपि मम कायरत्तं, केवलं एए वालए
 जणणीविओगवसविसंहुलं रोयमाणे न सक्केमि पेच्चिउं, पाडलेण भणियं-एवं ठिएवि पुरिसाय(सयार)त्तं कायध्वं, ता

पुत्रदिसिविभागे तीसे अन्नेसणनिमित्तं अहं गच्छामि, तुमं पुण पुत्तसमेओ चिय उत्तरदिसिहुत्तं इमाए नईए उभयकूलेसु उज्झरेसु य दरीसु य दुत्तडीसु य विसमप्पवेसेसु य अवलोइज्जासित्ति, एवं करेमिच्चि पडिवज्जिय पुत्तजुयलंसमेओ चेव गओ नरविक्रमो नईए पासदेसंमि, ते य पुत्तए मणागंपि सन्निहिममुंचमाणे संठविय चिंतिउमारद्धो । कहं चिय?—

किं होज्ज केणवि हडा? वसीकया चावि केणवि नरेण? । किं वा सरीरपीडाए होज्ज कत्थवि निसन्ना सा ॥ १ ॥

किं वा ममावमाणं किंपि हु दट्ठण विलयमावन्ना । पुरिसंतंरमि अहवा जाओ तीसे पणयभावो ॥ २ ॥

सुमरामि न तावडवमाणकारणं होउ वाडवमाणेडवि । नो सा चएज्ज पुत्तं अवचनेहो जओ गरुओ ॥ ३ ॥

संभवइ न एयंपिहु जमन्नपुरिसं मणेडवि चित्तेज्जा । कह तारिसकुलजाया सीलं मइलेज्ज ससिधवलं? ॥ ४ ॥

अहवा जुवईण मणं कुडंगुविलं क एव जाणेज्जा? । वाहिंदंसियपणयाण कवडभरियाण मज्झंमि? ॥ ५ ॥

अन्नं वयंति पुवं पच्छा पुण वाहरंति गिरमन्नं । अन्नं धरंति हियए साभिप्पेयं करंति पुणो ॥ ६ ॥

गयणे गणंति गहगणमुयहिंमि जलंपि जे परिमिणंति । पेच्छंति भावि कज्जं न तेडवि जाणंति जुवइयणं ॥ ७ ॥

सचं चिय जुवईओ एरिसियाओ न एत्थ संदेहो । केवलमेयाए मए दिट्ठं लहुयंपि नो विलियं ॥ ८ ॥

ता सब्बहा न उवेहणिज्जा होइ एसत्ति निच्छिऊण पुत्ते य नईकूले संठविय परकूलेन्नसण्ढाए पविट्ठो नईए, पत्तो य मज्झयारे, एत्थंतरे अचंतपडिणिगयत्तणओ हयविहिस्स अघंडंतवत्थुसंघडणसीलयाए भवियवयानिओगस्स बलवत्त-

णओ वेयणीयकम्मस्स गिरिसिरचरिसणचसविप्पमाणसलिलप्पवाहेण पुरिया तक्खणेण नई, जाया अगाहा, खलिओ पयप्पयारो पवाहिओ तरुपल्लवचारिपूरेण नरचिक्कमकुमारो नीओ दूरप्पएसं, अह कहवि कुसलकम्मवसओ पावियमणेण फलंगं, तंनिस्साए अवयरिओ तीरे तीए, नुवन्नो तरुवरच्छायाए, चिंतिउं पवत्तो—

कह नियनयरचाओ ? कहेत्थ वासो ? कहिं गया भज्जा ? । कह पुत्तेहि विओगो ? कह वा नइवेगवहणं च ? ॥ १ ॥
खरपवणाहयजरतिणनियरो विव देवया दिसिचलिव । एकपए चिय कह मज्झ परियरो विसरिओ झत्ति ? ॥ २ ॥
हे दइव ! तुज्झ पणओ एसोऽहं खिवसु सच्चदुक्खाइं । मज्झं सयणजणाओ जेणऽन्नजणो सुहं वसइ ॥ ३ ॥

एत्थंतरे पचासन्नजयवद्धणनयराहिचई कित्तिवम्मनामो नरवई अनिवत्तगसूलवेयणाए अपुत्तो सहसा पंचत्तसुवंगओ, तओ मिलिआ मंतिसामंताइणो लोया, कओ पंचदिवाभिसेओ, रज्जारिहं च पुरिसं सच्चत्थ मग्गिउं पवत्ता, खणंतरेण नयरञ्चंतरे रज्जारिहमपेच्छंताणि वाहिं अवलोयणट्ठा निगयाणि पंच दिवाणि, गंतुं पयट्ठाणि य तसुहेसं जत्थ सो चिंताउरो नरचिक्कमकुमारो निवसइ, अह तदग्गगामिणं पयंडसुंडादंडुडामरं वेगेण पवरकुंजरमिन्तं दट्ठण विगप्पियं एवं कुमारेण—

मन्ने पुव्वभत्थं इयाणि दइवो समीहए काउं । कहमन्नेहेह हत्थी दूरुल्लालियकरो एज्जा ? ॥ १ ॥

अहवा एउ इमो लहु कुणउ य मणवंछियं जहा मज्झं । ससुयदइयविरहपमोक्खदुक्खवोच्छेयणं होइ ॥ २ ॥

अह गलगर्ज्जि घणघोसचिम्भं कुंजरेण काळ्ण । नियपट्ठीए ठविओ झत्ति कुमारो करगणेण ॥ ३ ॥
 दयहेसियं च जायं जयत्तूरवो वियंभियो सहसा । सामंतमंतिलोएण परिबुडो तो गओ नयरं ॥ ४ ॥
 जाओ पुरे पमोओ अपणयपुद्वावि पत्थिवा पणया । नरविक्रमेण रज्जं अत्तायत्तं कयं सव्वं ॥ ५ ॥
 नरसिंघनिधिसेसा जाया करितुरयरथणभंडारा । सक्कोव देवलोए विलसइ सो विविहकीलाहिं ॥ ६ ॥
 केवलमेक्को चिय फुरइ तस्स हिययंमि नट्टसल्लं व । दइयासुयदीहरविरहवइयरो दुस्सहो अणिसं ॥ ७ ॥
 अन्नया जयवद्धणनयरासन्नुज्जाणे अणेगसीसपरिबुडो सीहोव दुद्धरिसो सूरुव निहियतमपसरो चंदोव सोम-
 सरीरो मंदरो इव थिरो जच्चकणंगं व परिक्खखमो दूरविवज्जियराओवि अणंतराओ धरियपयडजमच्चओवि नीसे-
 ससत्तरक्खणवद्धलक्खो समिइवावारियमणपसरोऽवि सया पसंतचित्तो छत्तीसगुणमहामणिरोहणभूमिच्च धीनि-
 हाणं व पच्चक्खधम्मरासिच्च भुवणभवणेक्कदीवोव सिवपंथसत्थयाहोव कम्मतरुनियरहच्चवाहोव दढजा-
 यदप्पकंदप्पसप्पसन्नागदमणिच्च ससमयपरसमयजलप्पवाहसिंधुच्च लोयचक्खुच्च नियनियचिसंखुलकरणकुरंगे-
 क्कपासोव मिच्छत्तजलाउलभवसमुद्दनिवडंतजंतुवोहित्तो पंचविहायारमहाभरेक्कनित्थारणसमत्थो जइधम्मो असमत्थे
 सावयधम्मंमि संठवमाणो इयरे पुण जइधम्मो सिद्धंतपसिद्धनाएणं अपुद्वापुच्चजिणभवणाइं चंदमाणो गामाणुगामं
 विहरंतो आगंतूण समंतभदाभिहाणो सूरी समोसरिओत्ति, जाया नयरे पसिद्धी, जहा असेसगुणगणावासो सूरी

आगओ, तओ कोऊहलेण य भवनिव्वेएणत्ति य संदेहपुच्छणेण य बहुमाणेण य धम्मसवणनिमित्तेण य नियनियद-
रिसणाभिप्पायविमरिसेण य समागया बहवे मंतिसामंतसेट्ठिसेणावइसत्थवाहंदनाहप्पमुहा नयरलोया, निवड्डिया
चरणेसु, निविट्ठा जहासंनिहिया धरणिबट्ठे, सूरिवि पुवभवज्जियगुरुकम्मजलणजालालितत्तगत्तेसु करुणामयधुट्ठिपिब
दिट्ठिं सत्तेसु पेसंतो मंदरगिरिसंथमहिज्जमाणखीरोयरवंगंभीरेण सदेण सद्धम्मदेसणं काउमारद्धो, कंहं?—

खरपवणपणुन्नकुसगलगजलविंदुचंचलं जीयं । सुरायचावचवलं खणेणवि गलइ सरीरवलं ॥ १ ॥

पेम्मंपि तुंगगिरिसिरसरंतसरियातरंगमिव तरलं । लच्छीवि छड्डणुडुमरवंछिरी पेच्छइ छलाइं ॥ २ ॥

पयडपयट्ठियदारुणविबिहवियारा महासमुद्दे व । निवडंति आवया आवयव निचं सरीरंमि ॥ ३ ॥

मणिमंतंतदिद्वोसहीण वावारेणेवि अविणासं । मुंजंता देंति दुहं विसया विसवल्लीउव्व ॥ ४ ॥

मिच्छत्तमोहमोहियमईहिं कीरंति जाइ पावाइं । भवसयपंपरासुवि वेरिव्व सुयंति नो ताइं ॥ ५ ॥

पियपुत्तकलत्ताईण जाण कज्जेसु वट्ठियं वहुसो । परलोयपयट्ठाणं ताणिवि नो हुंति ताणाय ॥ ६ ॥

इय भो नाउं जिणधम्ममणुदिणं सरह सरहसं कुसला ! । जावज्जिवि वज्जमहासणिव्व निवडइ न तुम्ह जरा ॥ ७ ॥

तीसे पडणे पुण छिन्नपक्खपुडया विहंगवगव । उट्ठियदाढासुयगव्व हरियरज्जा णरिंदव्व ॥ ८ ॥

सच्छंदगमणपरभीइजणणसन्वत्थसाहणविहीणा । चिररिद्धिं सुमरंता सुचिरं तुब्भे किलिस्सिह ॥ ९ ॥

पज्जंतं एत्तो जंपिएण जइ कामियाइं सोक्खाइं । भोत्तुं वंछह ता वीयरायवयणे समुज्जमह ॥ १० ॥

इय संसारनिस्सारत्तणपरिकहणेण पडिबुद्धा बहवे पाणिणो । बीयदिवसे य समायन्नियसूरिसमागमणयुत्तंतो सम-
ग्गयत्तुरयनरनियरपरियरिओ भारियासुयसंपओगपुच्छणकए समागओ नरविक्कमनराहिवो, तओ वंदिऊण सूरिं
चिंतिउमाहत्तो-अहो एयस्स भुवणच्छरियभूयं रूवं विमुक्कामयबुद्धी दिट्ठी सजलघणघोससुंदरो सरो नीसेसपसत्थल-

क्खणजुत्तं गत्तं पाणिगणकयरई भारई, तहा—

तमनिग्गहिओ चंदो तवंमि मंदा रुई दिणयरस्स । गिरिविहियाभिभवो सायरोऽवि को हुंज एयसमो १ ॥ १ ॥

तं नत्थि जं न जाणइ भूयं भव्वं भविस्समवि वत्थुं । ता होइ पुच्छणिज्जो नियदइयापुत्तयुत्तंतं ॥ २ ॥

इय निच्छिऊण उवविट्ठो उचियासणे राया, गुरुणावि पारद्धा धम्मकहा, पुणरवि पडिबुद्धा पभूयपाणिणो,
राइणावि पत्थावमुवलब्भ पुच्छिओ सूरी-भयवं ! निच्छियं मए, जहा-तं नत्थि जं न जाणह तुब्भं, ता काऊणाणुकंपं
साहह कइया भारियाए सुएहि य सह मम समागमो भविस्सइत्ति, गुरुणा भणियं-महाराय ! धम्मज्जमेण तदंतरा-
इयकम्मक्खओवसमो जया होहिइ, राइणा भणियं-भयवं ! जाणामि एयं, केवलं दुस्सहविओगविट्ठो न सक्केमि
धम्मज्जमं काउं, चित्तनिरोहसव्वपेक्खो हि धम्मलक्खो कहमम्हारिसेहिं साहिउं तीरइ ?, ता सबहा कुणह पसायं,
निवेयह अवरमुवायंति, गुरुणा भणियं-जइ एवं ता पज्जुवासेसु पइदिणं मुणिजणं, एयं खु परमोवाओ वंछियकज्ज-

सिद्धीए, जओ-विहडइ निविडकम्मनिगडं पि हु भिंदइ दुगइ, लहु कछाणवल्लिमुछासइ नासइ दुक्खसंगइ ।

बंछइ लच्छि पास परिसप्पणु दप्पणु जिम पभासए, सुणिजणसंगमेवि किं किं जणु जं नवि सोक्खु पासए ? ॥१॥

तओ रोगिणव्व वेज्जोवइट्ठोसहं पंथपरिब्भट्ठेण व सुसग्गदेसणं तण्हाभिभूएण व विमलसलिलपडिपुण्णमहास-
रोवरनिवेयणं राइणा संसमब्भुवगयमिमं गुरुवयणं, गओ य पणमिऊण सट्ठाणं ।

इओ य ते दोवि तस्स सुया नदीए कूलंमि निलीणा तण्हाछुहाभिभूया जाव खणंतरं चिट्ठंति ताव एगो गोउलिओ
दहिमहियाणि णयरे विक्किणिऊण समागओ तत्थ पएसे, पेच्छइ देवकुमारनिविसेसरूवे करुणसरं रुयमाणे ते दोउवि
दारगे, तओ पुच्छिया तेण-रे पुत्तगा ! कीस रोयह !, केण तुब्भे एत्थ ठविया ? को वा तुम्ह एत्थ सयणजणोत्ति ?
जेट्ठेण साहिओ सबो पुव्वुत्तंती, अह अणाहत्ति परिकलिऊण तेण जहासंनिहियअसणपाणदाणेणमहिंनंदिऊण तेहिं
तेहिं पयारेहिं उवल्लोभिऊण य नीया ते नियगोउलंमि, समप्पिया य गोउलाहिवस्स, तेणावि पुत्तविराहियाए समप्पिया
नियदइयाए, सावि उदरुब्भवे इव परिपालेइ सव्वजत्तेण, उवयरइ खंडखल्लाइपमुहविसिट्ठवत्थुप्पयाणेण अणवरयं,
सोउवि गोउलाहिवई किल जयवद्धणनयरहिवस्स संवद्धोत्ति अन्नया कयाइ तेहिं दोहिवि पुत्तेहिं समेओ महासुल्लं
पाहुडमादाय नरविक्कमनरिंदंसणत्थं समागओ जयवद्धणनयरं, दिट्ठो य नरवई, पणसिओ सव्वायरेणं, समप्पियं पाहुडं,
दिट्ठो राइणा सहत्थेण तंचोलो, पुट्ठो य सयलसुत्थासुत्तवत्ताओ, एत्थंतरे निवडिया दोसु तेसु पुत्तेसु राइणो दिट्ठो,

जाओ गाढं पमोओ, परिभाविं च जहा धुवं एए मम तणयत्ति, तहावि पुच्छामि एयं-को पुण एत्थ वइयरोत्ति परिभावि पुट्ठो गोउलाहिर्वई, कस्स भो एए पुत्तगत्ति?, तेण भणियं-देव ! मम संबंधिणो, गेहिणीए आबालकालाओ उ वड्डियत्ति, राइणा भणियं-संमं साहेसु, जायसंखोभेण तेण सिट्ठो नईकूलाओ आरब्भ सयलो बुत्तंतो, एयमायन्निऊण राइणा परमहरिसपगरिसुब्बहंतेण ते दोउवि दारगा गाढमालिंगिय उच्छंगे निवेसिया, गोउलनायगेण भणियं-देव ! पुरावि मए विविहचेव्वाहिं नाया एए जहा कस्सइ सामंतस्स वा सेणावइस्स वा नरवइस्स वा मग्गे गच्छंतस्स केणावि विसमपओगेण पब्भट्ठा होहिंति, कहमन्नहा एएसिं पइदिणंमि मट्ठियाघडियदोघट्टघडभेडणेण य कित्तिमतुरयघट्टपयट्टणेण य संपिंडियसरिंडयपरिकप्पियसंदणवाहणेण य बुद्धिपइट्ठियकट्टलट्ठिखगुब्बहणेण य चाउरंगसेणासंमहुदामसंगामपरिकप्पणेण य डिभाण गामागरनगरपसायदाणेण य विविहा कीला अहेसि?, न य एवंविहा चेड्ढा पागयसुयाण होइ, तहा सब्बवेलासु मम तुम्ह दंसणत्थंमैतस्स एयाणवि नरिंदभवणदंसणकए गाढनिब्बंधो आसि, केवलमहं वावत्तिऊण विसिद्धवत्थदाणेण दिट्ठिचंचणेण य पुरा एंतो, इण्हं पुण गाढनिब्बंधं काऊण मम खणंमि पुट्ठिं अमुंचमाणा समागयत्ति, अहो महाणुभावेण कहं ममोवयरियंति चिंततेण रत्ता परमपमोयभरनिब्भरंगेण दिन्नं तस्स तं चेव गोउलं गामसयं च आचंदकालियं सासणनिवद्धं सुत्तीए, पभूयवत्थंतवोलाइणा य पूइऊण पेसिओ सट्ठाणंति । सयंपि पुत्तजुयलपरियरिओ गओ सूरिसमीवं, वंदित्ता परमायरेणं निवेइओ पुत्तसमागमबुत्तंतो, सूरिणा भणियं-महा-

राय ! सुमरिसि पुनर्वभणियं अमह वयणं ? राइणा भणियं—भयवं ! नियनामंपिच सुमरामि, स्वरिणा भणियं—महाभाग ! केत्तियेमेत्तमेयं ?, गुरुजणपज्जुवासणेण तं नत्थि जं न सिज्झइत्ति, रत्ता भणियं—अवितहमेयं, किं पच्चक्खेवि अणुववन्नं भंणिज्झइ ?, पसीयसु इयाणिं एक्केण दइयवियोगदुक्खवोच्चेयणेणं, गुरुणा भणियं—मा ऊसुगो होसु, एवंति पडिव-ज्जिय पणमिऊण य सन्वायरेण गओ राया सट्ठाणं ।

इओ य सो देहिलो नावावणिओ अणुकूलपवणपणोलिज्जमाणसियवडवसेगपयट्ठियजाणवत्तो गंतुं पवत्तो ससु-इंमि, सीलमईवि तहाविहं अदिट्ठपुनवं वइयरं अवलोइऊण हा पिय ! पाणनाह ! किमेवंविहं वसणं विसममावडियंति जंपिऊण य अकंडनिवडियवज्जदंडताडियन्व सुच्छानिमीलियच्छी परसुछिन्नन्व चंपगलया निवडिया जाणवत्तभूमितले, समासासिया पासवत्तिणा परियणेण सिसिरोवयारोहिं, खणंतरेण लद्धचेयणा गाढसुययियमवियोगवसविसंडुला गलंततथणजलप्पवाहा विलविउमेवं पवत्ता—

हा सुवणपयडपोरिस ताय ! सजीयस्स संनिहं दट्ठुं । किमुवेहसि अइडुहियं नियडुहियं संपयं एयं ? ॥ १ ॥

नरसिंहनराहिव ! नियवहुंपि किमुवेहसे अणज्जेण । एवंपि हीरमाणिं ? हा हा विपरंमुहो दइवो ॥ २ ॥

हा पाणनाह ! हा गोत्तेदेवया हा समत्थदिसिनाहा । रक्खह रक्खह एयं हीरंती पावमिच्छेणं ॥ ३ ॥

एवमईणि करुणाइं जंपंती सा संभासिया नावावणिएण—भदे ! कीस एवं विलवसि ?, धीरा भव, नाहं सुमि-

णेवि तुह पडिक्कलकारी, जओ एसा समुद्धुरा रिद्धी तुहायत्ता, एसोऽहं दासनिन्विसेसो, तो पडिवज्जसुं सामिणीसहं,
वावारेसु नियबुद्धीए गेहकज्जेसु एयं परियणंति, सीलमईए भणियं—

अवसर दिट्ठिपहाओ निट्ठुर ! पाविट्ठ ! धिट्ठ ! दुचेट्ठ ! । अहवा सासनिरौहेण जीवियं लहु चइस्सामि ॥ १ ॥

रे रे खत्तियकुलसंभवंपि आजम्मसुद्धसीलंपि । मं एवमुल्लवंतो नियजीयस्सवि न लज्जेसि ? ॥ २ ॥

किंच-खिज्जउ देहं निहरउ जीवियं पडउ दुक्खरिंछोली । नियतायदिन्ननामत्थविहङ्गं नेव काहामि ॥ ३ ॥

इय तीए निच्छयसुवलब्भ निवारियं तेण भत्तपाणं, छुहापिवासाभिभूयाएवि न परिचत्तो तीए नियनिच्छओ,
एत्थंतरे तीए विमुद्धसीलपरिपालणतुट्ठाए सण्णिहिस्समुद्देवयाए खित्तं महावत्ते तस्स जाणवत्तं, कओ जुगंतसम-
यदारुणो समीरणो, समुल्लासिया कुलसिहरविब्भमा जलक्कलोला, विउच्चियाइं गयणे घोरायाराइं गंधवनयराइं,
दंसिया गहिरगज्जिरवभीसणा फुरंतफारविज्जुपुंजपिंजरा जलहरा, तओ वाउलीहूओ कन्नधारो, जाया विहत्था
सुहडसत्था, ठिया विमणदुम्मणा अवल्लवाहगजणा, वाढं वाउलीभूओ नावावणिओ, एत्थंतरे गयणट्ठियाए
जंपियं देवीए—

रे रे जइ दुट्ठवणियतणय ! णयचिरहिय हियकाम कामगदह दहणसारिच्छ रिंछोव तुच्छेपेच्छय छयलगलथणसमाण
माणवजणगरहणिज्जसील ! सीलमइं धरिसिहसि एवं ता पाव ! पांवेसि इयाणिं विणासंति सोच्चा पंडुरपडपाउ-

रणो कयपूयाचित्तरो विणयपणओ करकलियधूवदहणो सो विन्नविउं समाढत्तो-देवि ! ममेकं दोसं दासस्स व
 खमसु परिहरसु कोवं न पुणो काहामीमं, पणए न परंमुहा देवा, ताहे भणियं देवीए-रे तुमं जइ सुहेण पालि-
 हिसि नियजणणिनिच्चिसेसं एयं ता जीवसि हयास !, तेण तहत्ति सवं पडिवन्नं गाढभयवसट्टेण, उवसंहरियं देवीए
 डमरं अहंसणं च गया । अह जाओ अणुकूलो पवणो, मग्गेण लग्गं जाणवत्तं, हरिसिया कन्नधाराइणो जणा, परि-
 तुट्ठो सो चणियो, पडिओ सत्तायेरेण चलणेसु सीलमईए, खामिया नियदुच्चरियं, भणिया य सा-सुयणु ! मा काहिसि
 सच्चहा सोगं, अचिरेण तहा काहामि जहा मिलसि नियपियमस्स, काराविया य पाणवित्तिं, समप्पिया निरुवद्व-
 निवासनिमित्तमेक्का उच्चरिगा, तओ पइदिणं मायरं व भयणिं व देवयं व गुरुं व सामिं व वत्थेण य भोगेण य भेसहेण
 य तंभोलेण य संमं पडियरमाणो पत्तो परतीरं, विक्किणियाइं निययभंडाइं पाविओ भूरिअत्थसंचओ निवत्तियासे-
 सकब्बो वल्लो सनयराभिमुहं, अंतरे आगच्छंतस्स अणुकूलपचणपणो हियं लग्गं जयवद्धनयपरिसरंमि वोहित्थं,
 तओ विमुक्का नंगरा पाडिओ सियवडो उत्तरिओ वडुकिंकरपरियरिओ सो वाणिओ, गओ विचित्ताइं महरिहाइं
 परतीरभवाइं पाहुडाइं गहाय नरविक्रमनराहिवस्स दंसणत्थं, पडिहारनिवेइओ य पविट्ठो रायभवणं, दिट्ठो राया, सम-
 प्पियाइं पाहुडाइं, कओ राइणा सम्माणो, तओ समुहलंघणवइयरनिचेयणेण परतीरनयररायसरूवत्ताकहणेण नियक-
 याणगुणदोसपडणेण य ठिओ नरवइस्स समीवे पहरमेकं, एत्थंतरे पणमिऊण विन्नत्तं तेण-देव ! सुन्नं पवहणं समागच्छइ

रयणी ता अणुजाणह ममं गमणायत्ति, राइणावि पिययमाविओगविहुरेण एस चैव अज्ज दीहरनिसाए विणोयकारी
हवउत्ति परिचिंतयंतेण भणिओ सो-भइ ! वीसत्थो इहेव चिट्ठसु, नियपहाणपुरिसेहिं रक्खावइस्सामि तुह जाण-
वत्तं, जं देवो आणवेइत्ति भणिकुण पडिवन्नं तेण, विसज्जिया य राइणा नियपहाणपुरिसा पवहणरक्खणत्थं, एत्थंतरे
उट्ठिया देवि कुमार, विन्नत्तं च तेहिं, जहा-ताय ! अदिट्ठपुवं अम्ह पवहणं, गाढं च कोउयं तइसणे, तां अणु-
जाणउ ताओ जेण गच्छामोत्ति, तन्निच्छयसुवलब्भ अणुन्नाया य नरिंदेण, गया य अंगरक्खनरपरिक्खत्ता ते जाण-
वत्ते, तं च इओ तओ निरिक्खऊण पसुत्ता तत्थेव । अह पच्छिमरयणिसमए पडिबुद्धा परोप्परं वत्ता काउमारद्धा,
खणंतरेण लहुएण भाउणा पुट्ठो जेड्ढो भाया-अहो भाय ! कहसु किंपि अपुवं अक्खाणयं, इह ट्ठियाण न झिज्जइ
कहमवि विभावरी, जेट्ठभाउणा भणियं-भइ ! किमन्नेण अक्खाणयसवणेण ?, एयं चिय अप्पणोतणयं अक्खाण-
यमपुवं निसुणेहि, तेण जंपियं-एयमवि साहेहि, तओ

करकलियकुसुममाला जह जणणी रायमगमणुपत्ता । जह वलिया नो पुणरवि जह नयरे मंगिया बहुसो ॥ १ ॥
जह ताओवि दुहत्तो अम्हेहिं समं गओ नईक्कले । जह परतीरनिरुवणकएण सलिलंमि ओगाढो ॥ २ ॥
जह सरियनीरपूरप्पवाहिओ दूरदेसमणुपत्तो । जह अम्हे गोउलिएण गोउलं पाचिया विवसा ॥ ३ ॥
जह बुद्धिं संपत्ता रायउले जह गया तओ अम्हे । रायावलोयणत्थं जह विन्नाया य ताएणं ॥ ४ ॥

जह वा महल्लकोजहलेण एत्थागया तहा सव्वं । अक्खाणयमप्पणं उवइहं लहुगभाउस्स ॥ ५ ॥

एयं च कहिज्जमाणमामूलाओ निमुणियं समग्गमवि समीवेदेससंठियाए सीलमईए, तओ अपुव्वं अणाइक्खणिज्जं केवलमणुभवगम्भं नियसुयसाहियवइयरपरिन्नायसमुत्थहरिसपगरिससुव्वहंती समुच्चरोमंचुच्चाइयकंचुया सुयसिणेहव-सपगलंतथणसुहसुद्धदुद्धधारा एह चिरकालपत्तगा पुत्तगा ! नियजणणिं गाढमालिंगहत्ति भणंती गया तेसिं पच्चा-सन्नं, निवेइओ पुव्ववित्तंतो, विन्नाया जेष्ठपुत्तेण, तओ गाढं कंठमवलंबिय चिरविरहुहुवावेगसूयगविसंदुलवयणगव्भं निव्वभंरं सपुत्तावि रोचिउं पवत्ता, विन्नायपरमत्थेण सुहुत्तमेत्तं विलंबिय समासासिया कुमारपरियणेण, अह उग्ग-यंमि दिणयेरे परियणमज्झाओ एगेण पुरिसेण तुरियं गंतूण भणिओ नरविक्रमो-देव ! तुम्ह दइया कुमारोहिं एयस्स चेव नावावाणियस्स जाणवत्ते पत्तत्ति, तओ हरिसभरनिव्वभरहियएण सविम्हयं पुच्छिओ राइणा एसो-भइ ! को एस दुत्तंचोत्ति ? , तेणवि संजायभएण भणियं-देव ! वियरसु मे अभयदाणेणप्पसायं जेण जहा वित्तं निवेएमि, पडिवन्नं नरिंदेण, तओ पढमाणुरागाओ आरब्भ जाणवत्तारोचणकंदणोचलोभणेदेवयाभेसणप्पमुहो साहिओ नीसेसो दुत्तंतो, एयमायन्निज्जण य नरवइणा समग्गधणजाणवत्तसहिओ निव्विसओ आणत्तो सो वाणियगो, सीलमईवि देवी करेणुगाखंधगया धरियसियछत्ता चामरोहिं वीइज्जमाणी पए पए पडिच्छंती नयरज्जणकयं पूयासक्कारं ठाणे ठाणे वियर-माणा दीणाणाहाण कणगदाणं पवेसिया परमविभुईए निययमंदिंरं, काराविओ पुरे अहुदिवसिओ महुसवो, अह

एहविविलिताए नियंसियामलमहघवत्थाए सुयंजुयलपरिबुडाए 'पमोयभरनिम्भंगीए सीलमईए पुरओ पुव्वणु-
भूयं कहं कहेतेण तीसे य हरणपमुहं वित्तं निसुणमाणेण रण्णा मालागारस्स तस्स पाडलयनामधेयस्स सच्चरिय-
मणुवयारं तहाविहं सुमरियं झत्ति, तो भणिया सीलमई-पिए ! पियाविहु न एरिसो होइ जारिसओ स महप्पा
मालागारो सिणेहपरो, भणियं सीलमईए-सच्चमिंणं नाह !, ता कुण पसायं सुसमिद्धिवियरेणं महाणुभावस्स
तस्स तुमं, फलमेयं चिय लच्छीए नाह ! संझम्भरागचवलाए जं पूरिज्जंति मणोरहाओ उवयारिलोगस्स ।

इय सोच्चा से वयणं रण्णा संदणपुराउ सो सिग्घं । आणाविऊण ठविओ चोडयविसए महाराओ ॥ १ ॥

दिन्नो से भंडारो समप्पिया करितुरंगरहजोहा । किं बहुणा ? अत्तसमो सोऽवि कओ तेण नरवइणा ॥ २ ॥

अन्नदिवसे य भज्जासु यसमेओ नरचिक्कमो महया रिद्धिसुदएणं गओ उज्जाणे, दिट्ठो सूरी, सच्चायेरेण पणमिऊण
पसाहिओ समीहि्यसंपत्तिवइयो, गुरुणा भणियं-महाराय ! एरिसकल्लाणवद्धिनिबंधणाणि सुणिजणचरणसेवणाणि,
राइणा चित्तिं-अहो अमोहं गुरुवयणं, अहो जिणधम्मस्स माहप्पं, सच्चहा धन्नोऽहं जस्स मे एवंविहेण सुणि-
णाहेण समं संगमो जाओ, एवं च चित्तंतेण रत्ता उवज्जियं सुगइक्कप्पतरुस्स सम्मत्तस्स वीर्यंति, गुरुणा भणियं-
महाराय ! पडिच्चसु निच्छइयं संपइ जिणधम्मं, राइणा भणियं-भयवं ! इट्ठमप्पमत्तुत्तमसत्तजणजोगो जिणधम्मो,
कहमम्हारिसजणा संकंति अणुपालिउं ? , गुरुणा नायं-अज्जवि निट्ठो मोहगंठी दढनिबंधणा मिच्छत्तवासणा

तिद्याणुवंधो विसयपडिंवंधो सवणमेत्ता विसेसधम्मवत्ता, तम्हा जहांभद्गत्तमेव एयस्स इण्हिमुच्चियंति चिंतिऊण
बुत्तो सो-महाराय ! जइ एवं ता पल्लुवासेज्ज सुसाहुणो पसंसेज्जसु जिणधम्मं अणुमोएज्जसु तप्पडिचन्ने भव्वज्जे,
एत्तियमेत्तेणवि होही दढकम्मविगमो, एवंति पडिवज्जिऊण गओ राया सट्ठाणंमि ।

निप्पचवायमउले भोगे भुंजेति पंचरूवेवि । सच्चत्थ जायकित्ती नरविक्रमनरवई ताहे ॥ १ ॥

सूरीवि धम्ममग्गे आरोविथ भूरि भव्वपाणिगणे । सीसगणसंपरिबुडो नयराउ विहरिओ वाहिं ॥ २ ॥

पडिचोहंतो सूरुओ भव्वकमलाइं वयणकिरणेहिं । कालक्कमेण पत्तो जयंतिनयारिं विहारेण ॥ ३ ॥

उग्गहमणुजाणाविथ नयरीए वाहिं चंपगुज्जाणे । सद्धम्मकम्मउज्जुयजइजणसहिओ ठिओ मयवं ॥ ४ ॥

जाया पुरे पसिद्धी सिद्धंतविसारओ जहा सूरी । इह आगउत्ति ताहे वंदणवडियाए नयरिजणो ॥ ५ ॥

अंतउरेण सहिओ हरिकरिरहजोहवूहपरिकिण्णो । नरसिंहभूमिनाहोवि आगओ सूरिपासंमि ॥ ६ ॥

सायरमह विणमंतुत्तिमंगमणिमउडलीढपयपीढं । पणमिय मुणिजणसहिं गुरुमुचविट्ठो धरणिचट्ठे ॥ ७ ॥

संसारासारयागन्भा, तओ सद्धम्मदेसणा । गुरुणा काउमाढत्ता, मोहविद्धंसकारिणी ॥ ८ ॥

जहा—चलयसिंधुनिम्ममगवडवीयं व दुह्हं । को माणुसत्तं संपप्प, पमाएज्ज विथक्खणो ? ॥ ९ ॥

खणोऽपि नाउकम्मस्स, जाइ जेणाविणस्सरो । तेणेस मुच्चिओ लोओ, निरुच्चिगो कंहं भवे ? ॥ १० ॥

भवेज्ज कोऽपि किं धीमं, निदाकरणलालसो । मंदिरे हववाहुगजालामालापलीविए ? ॥ ११ ॥
 विएसे सुहगम्ममेवि, सप्पाहेओ पयट्टइ । दुग्गेऽणंते भवट्ठाणे, जे न किंपि समीहए ॥ १२ ॥
 हए से नियबुद्धीए, ठाणे ठाणे विसीयइ । अन्ने सोक्खे न पावेइ, सिद्धिसद्धम्मसंबले ॥ १३ ॥
 बलेण तेण किं कज्जं ? किं वा तेण धोणेणवि ? । न जं सद्धम्ममग्गस्स, उवयारे निजुज्जइ ? ॥ १४ ॥
 जएज्ज सब्बहा धम्मो, पमायपरिहारओ । जीवघायनिवित्तिंमि, पवित्तिंमि सुहेसु य ॥ १५ ॥
 सुयाइमोहसंबद्धा, पावं कुव्वंति पाणिणो । तेण पावेण संतत्ता, निवडंति अहो गइं ॥ १६ ॥
 गइंदा इव बज्झंति, जोणिलक्खेसु णेगसो । किं किं दुक्खं न पेक्खंति, ते तिवक्खमवियक्खणा ? ॥ १७ ॥
 तम्हा एवं नाउं जइधम्मं सब्बहा समायरह । एसो खु तिवहुहजलणसमणघणवरिसणसमो जं ॥ १८ ॥
 सग्गापवग्गमंदिररोहणनिस्सेणिदंडसारिच्छो । कम्मबुभडविडविहाडणेक्कधारुक्कडकुहाडो ॥ १९ ॥
 अचिरेण दिन्ननिस्सेससारनिस्सेयसो सुहत्थीहिं । अणुसरियव्वो सम्मं सुसत्तिजुत्तेहिं सत्तेहिं ॥ २० ॥
 रत्ता भणियं भयवं ! जं तुब्भे वयह तं पवज्जामि । जाव नियरज्जभारप्पणेण सुत्थं करेमि जणं ॥ २१ ॥
 गुरुणा भणियं जुत्तं एयं तुम्हं भवेक्कभीयाणं । निविग्गं कुणह लहुं चयह पमायं पयत्तेण ॥ २२ ॥
 अह गुरुं पणमिऊण गओ राया समवणं कयमणंतरकरणिज्जं आह्मथा मंतिणो कहिओ निययाभिप्पाओ अवगओ

मंतीहिं, एत्थंतरे समागया कुमारचारोवलंभनिमित्तं पुव्वपेसिया गूढपुरिसा, पणमिओ तेहिं राया, निवेइओ नयरनि-
ग्गमाओ आरब्भ जयवद्धणपुरज्जलाभपज्जंतो सव्वो कुमारवुत्तंतो, उट्ठो राया, दिन्नं च चिंतियाइरित्तं तेसिं वित्तं, पेसिया
य कुमारणयणनिमित्तं बुद्धिसागरपमुहा मंतिणो, अणवरयप्पयाणएहिं पत्ता य ते जयवद्धणपुरं, नरविक्रमोचि नाऊण
तेसिमागमणं सपरियणो निग्गओ अभिसुहो, पेसिया वड्डविच्छेइणं, कया जणगनिव्विसेसा पडिवत्ती, पुट्ठा य उचि-
यसमए आगमणप्पओजणं, निवेइयं तेहिं जहा-पव्वज्जापडिवज्जणाभिलासो राया, तुमंमि नियरज्जभरारोवणमणोरहो
य देवस्स, अओ तुम्हाणयणनिमित्तं पेसियम्हि, इमं सोच्चा तक्खणमेव तत्थ रज्जे जेट्ठपुत्तं ठविऊण समग्गनियखंधा-
चारसमेओ चलिओ नरविक्रमो समं मंतीहिं, कालक्रमेण पत्तो जयंतिनयरिपरिसरं, विन्नायतदागमणो दूरं संसुहमागओ
नरसिंहनरवई समं चंपगमालाए देवीए, तओ दूराओ चेव नरविक्रमो जणगमागच्छंतं पेच्छिऊण हरिसुप्फुल्लोयणो
उयरिऊण करिवराओ मंतिजणसमेओ गंतूण निवडिओ चलणेसु जणयस्स जणणीए य, तेहिचि चिरदंसणुप्पन्नाणं-
दंसंदिरच्छेहिं गाढमालिंगिऊण निवेसिओ नियउच्छंगे, पुट्ठो य सरीरारोगयं, खणंतरे य पविट्ठाइं नियमंदिं,
पत्थावे पुट्ठो नरवइणा नरविक्रमो पुरीगमणकालाओ आरब्भ पुव्ववइयं, साहिओ नरविक्रमेण समत्थोऽवि, एवं
च चिरकालंदंसणसमुन्भवसुहंसंदोहमणुहंवताण गया कइचि वासरा, अन्नदियेहे य भणिओ राइणा नरविक्रमो-पुत्त !
पुव्वपुरिसपवित्तिवत्तिणीपरिपालणेण उस्सिखलजणताडणेण य एत्तिंयं कालं जाव मए पालियं रज्जं, इयाणिं पुण

ममाहितो सरीरवलेणं य पुन्नपगारसेण य विक्रमेण य समंतो तुमं ता अंगीकरोसु रज्जमहाभरं, परिवोल्लेसु पुंवप-
वाहेण जणवयं, अहं पुण पुव्वपुरिसायरियं धम्ममग्गं अणुचरिस्सामि, कुमारेण भणियं-ताय ! विरमह इमाओ
अज्झवसायाओ, तुमह दंसणुस्सुओ चिरकालेण अहमिहमागओ, नवि य अज्जवि एस पत्थावो पत्थुयवत्थुस्स, निव-
सह ताव सगेहे चिय कइवय वरिसाइं, राइणा भणियं-वच्छ ! किं न पेच्छसि जायविमलपलियसंगमुत्तिमंगं ? न
वा निरुवेसि विसंतुलसयलहिं सरीरलहिं ? न निरिक्खसि धेवपयासेवि चलंतिं दंतपतिं ? न विभावसि वत्थुवि-
ल्लोयणाबलियं लोयणजुयलं ? न कलयसि वलिपडलसंतयं सरीरत्तयं ? न वा सुणसि समत्थकज्जासाहणजायसदेहं
देहं ? एवं च पच्छिमदिसावलंवि विवं व रविणो रयणीविराममल्लिणं मंडलं व ससिणो गाढजरत्तणपत्तं पत्तं व तरुणो
जायसूरत्थमणसंभावणं वणं व कमलाण पव्वभट्टलट्ठपुव्वसोहं अप्पाणप्पाणमवल्लोइऊण कहं खणमवि गेहे वसामि ?
ता सुयसु पडिबंघं पडिवज्जसु मम वयणं भवसु धम्मसहाओ, तथो तायनिच्छयमुवल्लभ नरविक्रमो अणुभूयपुव्व-
दुक्खकंतो वज्जताडिओ इव लेप्पघडिओ इव पत्थरुक्कीरिओ इव चित्तलिहिओ इव खणं ठाऊण बाढं रोविउं पवत्तो,
समासासिओ य रत्ता कोमलवयणेहिं, पडिवन्नो य तेण महाकट्टेण रज्जाभिसेओ, समागए य पसत्थवासरे सव्वसा-
मग्गीए मंतिसामंतमित्तयप्पसुहमहाजणसमक्खं निवेसिओ नरविक्रमो निययसीहासणंमि, कओ अट्ठोत्तरकलस-
सएणं महाविभूइए रायाभिसेओ, पणमिओ य रत्ता मंडलाहिचपुरपहाणलोयपरियरिएण, भणिओ य सव्वायरेण

वच्छ ! जइवि नयचिणयसचाइगुणगणमणिमहोयही तुमं तहवि किंपि भणेजसि, एसा हि रायलच्छी अपडमंघ-
 त्तणं अमज्जपाणं मयजणणं सूरससहरकरप्पसरासज्झमंघयारं, ता तहाकहंपि वट्टिज्जासि जहा न मइलिज्जइ ससहर-
 धवलं नियकुलं, जहा न खंडिज्जइ दूरप्परूढो पयावपायवो, जहा न पमिलायइ नीइकमलिणी, जहा न उंसिसखली-
 हवंति खला, जहा न विरचंति पयइणो, जहा करभरोहिं न पीडिज्जइ जणवउत्ति, एवं च वट्टमाणस्स पुत्त ! इहलोए
 इच्छिया होहिंति सयलंवळियत्यसिद्धीओ, किमंग पुण परलोएत्ति ? एवं सिक्खविऊण नरसिंवनरवई पट्टिओ समंत-
 भइसूरिसमीवंमि, तओ पउणाचिया नरविक्कमनरवइणा सहस्सवाहिणी सिचिगा से निक्खमणनिमित्तं, कयमज्जणो-
 चयारो सव्वालंकारविभूसिओ समारूढो तत्थ नरसिंहनरवई, उक्खित्ता पवराभरणविभूसियसरीरोहिं सुइनेवत्थेहिं
 पवरपुरिसेहिं सिचिगा, तओ दिज्जेतेहिं महादाणेहिं वज्जेतेहिं चउव्विहाउजेहिं पढंतेहिं मागहसत्थेहिं गायंतेहिं
 गायणेहिं मंगलमुहरमुहीहिं नयनारीहिं पणचिराहिं वारविलियाहिं महाविभूईए निग्गओ नयरीओ, पतो सूरि-
 सगासं, ओयरिऊण सिचिगाओ तिपयाहिणपुव्वं पडिओ गुरुचलणेसु—

भालयलघडियकसंपुडेण भणिओ गुरू तओ रणणा । भयवं ! तायसु इण्ह जिण्हिदिक्खापयाणेण ॥ १ ॥

पडिवत्तंमि य गुरुणा पुव्वुत्तरदिसिसमुज्झियाहरणो । एगनिअंसियवत्थो पसंतवहुंतसुहलेसो ॥ २ ॥

सिद्धंतभणियजुत्तीए तत्थ सूरीहिं गाहिओ सम्मं । पव्वजं निरवज्जं कम्ममहासेलवज्जसमं ॥ ३ ॥

भणिओ य जहा भइय ! एसा संसारसिंधुनावव । तुमए गहिया दिक्खा ता सम्मं उज्जमिजासु ॥ ४ ॥
 मा काहिसि खणभेक्कंपि पावमित्तेहिं दुहनिमित्तेहिं । संसर्गिं दुक्खेहिं विसयकसाएहिं सह भइ ! ॥ ५ ॥
 एवं चंक्रमियं भोत्तं एवमेव सइयं । एवं भासेयं इच्चाइ निवेइयं गुरुणा ॥ ६ ॥
 संमं संपडिवज्जिय छट्ठट्ठमखमणकरणखीणंगो । अप्पडिवद्विवहारं विहरिय गामागराईसु ॥ ७ ॥
 अहिगयजइधम्मविही विहियाणुट्ठाणनिच्चतद्धिच्छो । लच्छिन्न संजमं रक्खिऊण निम्महियकम्मंसो ॥ ८ ॥
 सो मोक्खपयं पत्तो नरविक्रमनरवईवि तस्स सुओ । उवभुंजिय रज्जदुगं निययपए ठविय पुत्तं च ॥ ९ ॥
 पावियसम्मत्तगुणो पज्जते पालिऊण पव्वज्जं । कयदुक्करतवचरणो महिंदकप्पे सुरो जाओ ॥ १० ॥
 इय नंदण ! नरपुंगव ! चरियं एएसिं पुरिससीहाण । तुज्झ मए परिकहियं जं तुमए पुच्छिअं आसि ॥ ११ ॥
 सोऊण इमं तुममवि नरिंद ! धम्मे तहुज्जमं कुणसु । जह उत्तिमपुरिसाणं अचिरेण निदंसणं होसि ॥ १२ ॥
 इमं च सोच्चा राया जायपव्वजापरिणामो गुरुं विन्नविउं पवत्तो-भयवं ! तुमं महातावतवियस्स व अमयधारा-
 वरिसो छुहाभिभूयस्स व सुन्नखज्जगावणो दोगच्चचक्कंतस्स व चिंतामणी दुरालोयंधयारगिरिगुहागयस्स व पयास-
 दीवो नीरनिहिनिहित्तस्स व समासासदीवो विथडाडवीपडियस्स व पसत्थसत्थनाहो मह कहकहवि चक्खुगोयरं
 गओ ; ता इयाणिं परमपहु ! करुणाकुलभवण ! एयं पवाहओ अणाइयं अणवदगं अपरिच्छेयमिच्छाजलुप्पीलपडि-

हतयं मोहमहावत्तदुत्तरिच्छं निरंतरुभवंतजम्मणमरणकल्लोलमालाउलं कसायकलुसपंकसंकुलं वियरंतविविहायंकनक्का-
 चक्काउलं विथारगोअरुत्तिण्णण्णतिमिरभरगुविलं पयइदुग्गेज्झमज्झं पयइभीसणं पयइविवागदारुणं पयइ-
 निग्गुणं पयइकिलेसायासाइदुक्खसंखोहकारणं रणं व कायरणं सब्बहा चित्तिजमाणमवि परमरोसुद्धोसजणगं भव-
 समुदं निरवज्जपव्वज्जाजाणवत्तेण सुवद्धेण नाणदंसणविहिसंछाइयच्छिद्धेण संवरवज्जलेवेणं संममाविद्धेण तवपवणज-
 वेणं अणुल्लगेणं वेरग्गमग्गंसि अक्खोभेण विमुत्तिवावीईहिं पडिपुणेण अणेगसीलंगरयणसहस्सेहिं तुम्हेहिं कन्न-
 धारेहिं झत्ति समुत्तरिउं समीहामित्ति, सूरिणा भणियं—महाराय ! मा पडिवंधं करेहि, तओ नंदणनरिंदो पुत्तारो-
 वियरज्जभारो वाहिं व मोच्छूण रायलब्धिं विहगोव्व पंजरओ घरवासाओ निक्खंतो, जाओ य त्तिगुत्तिगुत्तो पंचसमि-
 इजुत्तो जियपरीसहो निहयंपंचिंदियपसरो समणो समियपावोत्ति । तओ कमेण अहिगयएक्कारसंगो कडाणं कम्मणं
 पुब्बं दुप्पडिक्कताणं खवणत्थं मासंमासेण अणिविखत्तेणं कायरदुरणुचरेणं धोरेणं तवोकम्ममेणं अप्पाणं सोसितो
 अप्पडिवद्धविहारेणं विहरइ । तित्थयरत्तलाभवीयभूयाइं वीसइ ठाणाइं सम्मं फासेइ य, कहां ?—

सब्बजगजीवंचंधुरवंधवभूए जिणे जियकसाए । सिवंपंथसत्थवाहे तत्थाहिं गिराहिं थुणमाणो ॥ १ ॥
 ववगयजरमरणभए सिवमयलमणंतमक्खयं पत्ते । परमेसरे य सिद्धे समिद्धसोक्खे नमंसंतो ॥ २ ॥
 सन्नाणचरणदंसणमहाभरुद्धरणपचलसहावं । चाउच्चन्नं संधं एकं सरणंति मन्नंतो ॥ ३ ॥

करुणोयद्दिणो गुरुणो पंचविहायारधरणधीरस्स । अणुवक्कयजणाणुगहभावं सम्मं पसंसंतो ॥ ४ ॥
सद्धम्मसिद्धिलचित्ते सत्ते धम्मो थिरीकरेमाणे । परियायपमुहथेरे उववूहंतो य भयवंते ॥ ५ ॥
ससमयपरसमयपरूढगाढसंसयसहस्सनिम्महणे । सुस्ससंतो निचं बहुस्सुए साहुणो पवरे ॥ ६ ॥
मासदुमासत्तिमासाइविविहतवक्कम्मकरणपडिबद्धे । विस्सामणाइणा तह तवस्सिणो पडिचरेमाणो ॥ ७ ॥
अंगांगंसरूवे सुयंमि सब्वन्नुनिच्छियत्थंमि । अणवरयं गयचित्तो तयत्थपरिभावणुज्जुत्तो ॥ ८ ॥
तत्तत्थसह्वाणप्पहाणसम्मत्तपवरवत्थुंमि । संकाइदोसजालं परिहरमाणो पयत्तेण ॥ ९ ॥
नाणार्इणं उवयारपमुहविणयंमि बहुविगप्पंमि । अइयारपरंपरयं वज्जंतो निउणबुद्धीए ॥ १० ॥
पडिलेहणापमज्जणपमुहावस्सयविहीसु चिविहासु । सद्धम्मवद्धलक्खो खलियं निचंपि रक्खंतो ॥ ११ ॥
सीले पिंडुगमपभिइदोसविरहा वएसु पंचसुवि । पाणवहार्इएसु य विसोहयंतो य मालिन्नं ॥ १२ ॥
पइसमयं संवेगाइभावणाजालभावणुज्जुत्तो । ससरीरेऽविहु निचं ममत्तबुद्धिं अक्कुणमाणो ॥ १३ ॥
वज्जब्भंतररूवं वारसभेयंपि घोरतवक्कम्मं । अनिगूहियनियसत्ती आयरमाणो य पइदिवसं ॥ १४ ॥
धम्ममोवगारिसाहुण व्रत्थकंवलयमोक्खसुवगरणं । देत्तो कोहार्इणं निचं चायं कुणंतो य ॥ १५ ॥
आयरिओज्झायतवस्सिथेरसाहम्मिप्राण सेहाणं । कुलगणगिलाणसंधे वेयावच्चंमि वट्ठंतो ॥ १६ ॥

एएसिपि तहाविहथावयवसजायदुत्थचित्ताणं । ओसहदाणार्हिं समाहिभावं च जणमाणो ॥ १७ ॥
 अक्खरपयगाहसिलोगमेत्तयं सवया अपुव्वसुयं । अहिगयसुत्तथोऽविहु सुयाणुराणेण पढमाणो ॥ १८ ॥
 भत्तिं तह चहुमाणं तद्दिट्ठयाण सम्मभावणयं । विहिगहणं चिय निचं सुयस्स सम्मं पयासितो ॥ १९ ॥
 भव्वाण धम्मकहणेण पइदिणं पववणुन्नइं परमं । सियवायसाहणेण य कुणमाणो सुद्धचित्तेणं ॥ २० ॥
 सो नंदणमुणिन्नसहो इय वीसइठाण्णाइं फासित्ता । तित्थयरनामगोत्तं कम्मं वंधेइ परमप्पा ॥ २१ ॥
 अह पमायपरिहारपरायणो एगं वाससयसहस्सं समणपरियागं पाउणित्ता पल्लंतसमए य सम्ममालोइयनिय-
 दुचरियवगो समुचारियपंचमहवओ खाभियसव्वसत्तसंताणो मासियसंलेहणासंलिहियसरीरो पंचनमोकारपरायणो
 मरिज्जण समाहीए समुप्पन्नो पाणयकप्पे पुप्फुत्तरवडिंसए विमाणे देवोत्ति ॥

ताहे सो सरभसभावियेण नियपरियणेण परियरिओ । विलसइ तत्थ विमाणे अयराइं वीसइं जाव ॥ १ ॥
 आउयकम्मविगमे य तत्तो चविज्जण इहेव जंबुदीवे दीवे भारहेखेत्ते माहणकुंडग्गामे सत्तिवेसे सयलवेयविज्जावियक्ख-
 णस्स उसभदत्तस्स माहणस्स देवाणंदाए भारियाए गन्धे सो नंदणदेवजीवो मिरियभवकयकुलप्पसंसणदोससमुवज्जि-
 यनीयगोयकम्मसामत्थेणं आसाडसुद्धछट्ठीए हत्थुत्तरे नक्खत्ते पाउञ्चूओ पुत्तत्तेणंति, दिट्ठा य तीए रयणीए सुहप-
 सुत्ताए गयवसदाइणो चउइस महासुमिणा, तओ अदिट्ठपुव्वतहाविहसुविणोवलंभजायहरिसा गया उसहदत्तस्स

माहणस्स सगासे, सिट्ठा चउइसवि सुमिणा, उसहदत्तेणवि ते सम्ममणुचिंतिऊण भणियं—

तुज्झ पिए ! धणलाभो पंचविहविसिट्ठभोगलाभो य । होही नीरोगत्तं नूनं एयाणुभावेण ॥ १ ॥

रिउजउसामाथन्वणचउवेयवियक्खणं जणपसिद्धं । जणिहिसि पुत्तं च तुमं समहिगनवमासपज्जंते ॥ २ ॥

इय सा निसामिऊणं पहिट्ठचित्ता विमुक्कुविगप्पा । निययावाससुवगया सम्मं गब्भं समुव्वहइ ॥ ३ ॥

जद्विवसं चिय चिंतामणिन्व गब्भे जिणो समोइन्नो । करितुरगरयणनिवहो तद्विवसं चिय न माइ गिहे ॥ ४ ॥

अणवरयहोमकरणुच्छलंतधूमोलिसामलं गयणं । उन्नयमेहासंकं कुणइ अकालेऽवि हंसाणं ॥ ५ ॥

अहं भयवओ गब्भगयस्स विइक्कंतेसु वायासीदिवसेसु वट्ठंते य तियासीतमदिणंमि सोहम्मकप्पवासी देविंदो सोहम्माए सभाए निसन्नो वत्तीसाए विमाणसयसहस्साणं चउरासीए सामाणियसाहस्सीणं तायत्तीसाए तायत्तीसाणं चउण्हं लोगपालाणं अट्ठण्हं अगमहिसीणं तिण्हं परिसाणं सत्तण्हं अणियाणं सत्तण्हं अणियाहिवईणं चउण्हं चउरासीणं आयरक्खेदेवसाहस्सीणं अन्नेसिंपि देवाणं देवीण य सामित्तमणुपालेमाणो इमं च जंबुद्वीवं दीवं विउलेणं अक्खलिय-पसरेण ओहिनाणेण करकमलनिलीणमुत्ताहलं च अवलोएमाणो भयवंतं चरिमत्तिथयरं माहणपणइणीकुच्छीगयं पेच्छइ, तओ आणंदवियसियनयणकमलो हरिसवससमुच्छलियरोमंचचियसरीरो संभमसट्ठाणचलियकडगतुडियके-ऊरकिरीडकुंडलाइभूसणो तक्खणविमुक्कसीहासणो पायपीढाओ पचोरुहइ, वेरुलियवरिट्ठिरिट्ठरत्तरयणखंडमंडियाओ

पाउयाओ विमुंचइ, एगसाडियं उत्तरासंगं करेइ, निडालतडघडियकरसंयुडो सत्तट्ट पयाइं तित्थयराभिमुहं अणुगच्छइ,
तओ वामजाणुं अंचित्ता दाहिणजाणुं धरणियले निहट्टु तिक्खुत्तो सुद्धाणं धरणियले निवाडेइ, तहा मत्थए अंजलिं
काऊण सुचिरं पराए भत्तीए संथुणइ, कहं ?—

तुम्ह नमो जिण ! निहयारिवग्ग ! भयवंत णाह ! आइगर !। तित्थयर सयं चिय जायवोध ! पुरिसोत्तम ! पसिद्ध ! ॥ १ ॥

भवभीममहाडविपडियपाणिगणसत्थवाह गयवाह । सिव मयलमणंतसुहं संपावियकाम गयकाम ! ॥ २ ॥

परमेसर तत्थ गओवि ताव अक्खलियनाणनयणेण । एत्थ गयंपिडु पणयं मं पेच्छसु किंकरसरिच्छं ॥ ३ ॥

एवं च थुणिऊण पुच्चाभिमुहसीहासणनिसन्नस्स देविंदस्स एवंरुवो संकप्पो समुप्पन्नो—अहो तित्थयरा भयवंतो न
कयाइ तुच्छकुलेसु दरिदकुलेसु किचणकुलेसु भिक्खागकुलेसु उप्पज्जंति वा उप्पज्जिस्संति वा, किं तु उग्ग-
भोगराइन्नखत्ति यइक्खागहरिवंसाइएसु सयलमुवणसलाहणिज्जेसु, केवलं कहवि कम्मवसेण हीणकुलेसु अवयरियाविय
भयवंतो अजोणीनिक्खंता चेव सेक्कहिं उत्तमकुलेसु संहरिज्जंति, जओ तीयपच्चुप्पन्नाणागयाणं सुरिंदाणं जीयमेयं,
एवं च जुत्तं ममावि इमं चरिमत्तित्थयरं इमाउ माहणकुलाओ कासवगोत्तस्स सिद्धत्थनरिंदस्स वसिट्ठगोत्ताए तिस-
लाए कुञ्चिसि संकामिउं, तिसलागन्धंमपि देवाणंदाए कुञ्चिसि, एवं संपेहिता पायत्ताणीयाहि वइं हरिणेगमेसिं
तिसलाकुञ्चिसि गन्धोवसंहरणत्थं निरुवेइ, सो य हरिणेगमेसी सक्काएसेण उत्तरवेउव्वियरूवधरो मणपवणजइणीए

गईए संपत्तो देवाणंदाए माहणीए समीवं, ओसोयणीदाणपुव्वं च तीसे अवहरइ भयवं गम्भाओ, माहणीवि
तक्खणं चिय वयणकमलेण ते चउइसवि महासुमिणे पडिनियत्तमाणे पेच्छऊण ववगयनिहा निहयताडियउरपंजरा
जरावेगविहुरियव नित्यामसरीरा अवहरिओ सम गम्भोत्ति सुचिरं अप्पाणं निंदंती करयलनिवेशियकवोला परमसो-
गसंभारं काउमारद्धा ॥

इओ य इहेव जंबुदीवे भारहवासतिलयभूयं समुत्तुंगपायापडिहयविपक्खपक्खुक्खेवं विचित्तपासायसहस्ससिहर-
रुद्धदिसावगासं खत्तियकुंडगामं नाम नगरं, तत्थ य कसिणत्तणं कल्यंठिकेसु सत्तावहारलोवो सहसत्थेसु कंटगु-
प्पत्ती कमलनालेसु कुडिलत्तं कोदंडदंडेसु निहुरत्तं तरुणीपओहरेसु मित्तचिरोहो रयणियरस्स बंधो य सारणिसलि-
लेसु । जहिं च पढमाभासी पियंवओ करुणापरो वेसमणोन्व अणवरयदाणरसिओ महातरुन्व सउणजणकयपक्ख-
वाओ पारद्धिलुद्धन्व कयसारमेयसंगहो गेवेज्जयसुरज्जणोन्व अणिंदो सारयसलिलंब्र अकलुसो निवसइ लोओ । जत्थ
य चउद्धिसिंपि अणवरयवहंतऽरहट्टघडिसुहमुक्कसलिलसिचमाणाइं सन्वोउयफुल्लफलमणहराइं जंबूजंबीरखज्जूरता-
लतमालपमुहतसंडसंडियाइं परिभूयनंदणवणाइं सोहंति काणणाइं, जं च संकेयठाणं व तिहुयणलच्छीए समुप्पत्तिभू-
मिन्व त्रिविहच्छेरयाणं लीलाभवणं व सिंगारस्स आवासोन्व धम्मस्स सुहमंडणं व वसुंधरारमणीए । तत्थ य पुरंदरोन्व
छिन्नभूधरपक्खो सुणिन्व समरसोवओगो सुरवारणोन्व दाणसित्तकरो जलनिहिन्व समज्जायाणुवत्ती अणेगत्तरिंदमउ-

ल्लिमात्मानमंसियत्तमकमलो भुवणपरिद्धो सिद्धत्थो नाम नरिंदो ।

हरिपीलुपरिगम्यत्तं भ्रमंतविचिह्नमगदिसिपरिकलियं । सुन्नंथि वसंतंथिव नज्जर जस्सारिज्जनमयणं ॥ १ ॥

पग्गेमु पळ्ळणोसुं जयत्तुरवेण सत्तुमु परेसुं । पणमंतेसुं जेणं समरमुद्धं नेव संपत्तं ॥ २ ॥

तरस य वम्महस्स न ररं महुमहणस्सेव लब्धी सन्वतेउरपद्दणा रूत्तादगुणगणाभिरामा तिसला नाम देवी,
जट्ठयाभिद्दणो य नंदिचद्धणो नाम पुत्तो सुंदरणा य धूया, अह आसोयनहुलेतरसीण अद्धरत्तसमण हट्ठुत्तर-
नकमत्ते सुहुपालंमवूलीपउल्लमुंदरंमि दहिप्पिउपंदुरपडपळ्ळारयंमि गंगापुळिणविसाले सयणिजे सुहपमुत्ताण तिस-
लादेवीण पुब्बगच्छं देवाणंदाकुळिंमि संक्तामिळण दिवसत्तीण सो पुब्बमणिओ हरिगेमभेभिंदेवो अमुमपोग्गलाय-
णायणपुब्बयं जिणं कुळ्ळीण मोच्छूण पणमिळण य जद्दामयं पडिगओ, गम्माणुभावेण य सा तिसलादेवी पळ्ळिमरय-
णीसमयंमि चउद्दम सुभिणाणि पासर, कदं चिय ?—

करउत्तउगल्लियमयसल्लिअंघुदुरं, गुळुगुल्लंतं सुदंतं मद्दासिंदुरं ।

वसद्धमुत्तासिसुइल्लंयपुळ्ळळुडं, चारुसिंमं सुतुंगं रणेणुग्गडं ॥ १ ॥

सुसिणरसरामेत्तसरसाउअंरं, केत्तरिं कंठरयमरियगणंतंरं ।

कुंभित्तरकल्लिगकल्लोहि कयपल्लणं, लळिळुसुत्तामक्तामत्थियुत्तासणं ॥ २ ॥

मालईमह्लियाकमलरेहंतयं, मालममिलाणमलिवलयलीढंतयं ।
किरणजालं सुयंतं ससिं सुंदरं, निहयतमपसरमइरुगयं दिणयरं ॥ ३ ॥
फलिहडंगलोलंतसियधयवडं, पुन्नकलसं च सुहकमलगंधुवभडं ।
कुसुयकल्हारम्मं महंतं सरं, बहुलकल्लोलमालाउरं सायरं ॥ ४ ॥
विविहमणियंभसालं विमाणं वरं, कंतिकब्बुरियगयणं च रयणुक्करं ।
धूमरहियं तहा हुयवहं सुमिणए, देवि वयणंमि पविसंतयं पेच्छए ॥ ५ ॥

पेच्छिऊण य इमे सुमिणे हरिसुद्धुसियरोमकूवा परमाणंदमुद्धहंती गया सिद्धत्थपत्थिवसमीवं, कहिओ चउद्दस-
महासुमिणोवलंभवइयो, तेणावि नियमइविभवाणुसारेण संमं चित्तिऊण भणियं-सुंदरि ! सयलनरिंदसंदोहवंदणिज्जो
निरुवक्कमविक्कमकंतसत्तुचक्को निप्पडिमपयावपरिभूयरविमंडलो निरुवमसत्तो पुत्तो ते भविस्सइ, सायरं पडिच्छिऊण
य इमं अणाइक्खणिज्जभूरिहरिसपब्भारमंथरगई गया नियभवणं, तहिं च देवगुरुसंबद्धाहिं मंगल्लाहिं असिवोवघाय-
दक्खाहिं सुहावहाहिं कहांहिं रयणिसेसमइवाहिउं पउत्तत्ति, राइणावि जाए पभायसमए समाइया अडुंगनिमित्तस-
त्थपरमत्थवियक्खणा नेमित्तिगा, आसणदाणपुव्वयं सक्कारिऊण पवरवत्थाइणा निवेइओ देवीदिट्ठचउद्दससुमिणवुत्तंतो,
तओ ते सम्मं निच्छिऊण परोप्परं जहावड्डियमतं भणिउमारद्धा-देव ! एयारिससुमिणाणुभावेण नूणसुप्पज्जिही

धम्मवरचक्कवट्ठी तिहुयणपूयणिज्जापायवीढो नियकुलनहयलमियंको अणुवमचरिओ तित्थयरो तुम्ह पुत्तोत्ति, एवमाय-
 त्रिऊण परमहरिसमुव्वहतेण राइणा दवाविंयं तेसिं आसत्तपुरिससंतइदालिद्विविद्वकरं मणोरहपहाइक्कंतं दविणजायं,
 विसज्जिया य नियनियठाणेसु, निवेइओ य एस वइयरो देवीए, जाओ य परमो पमोओ तीसे। एवं च पइदिणपुज्जं-
 तमणोरहाए जिणाणुभावेण दूरपलीणरोगाए सुररमणीसरिच्छवटंतविलासाए वड्डिउमारद्धो गब्भो, तयणुभावेण य
 एवं सा सोहिउं पउत्ता—

अंतरनिहिच्चवरयणसंचया फलिहमयधरित्तिव । संकतफारदिणनाहमंडला मेरुभित्तिव ॥ १ ॥

अंतट्टियमुत्ताहलरेहंतुदामजलहिबेलव । पढमुगमंतससहरपसाहिया गयणलच्छिव ॥ २ ॥

अंतोविफुरणसमुल्लसंतसोयामणीनिवहकिन्ना । उब्भडधणंत घणपडलपुन्ननवपाउससिरिव ॥ ३ ॥

इय गब्भगयजिणिंदाणुभावसोहंतकतसंवंगा । नवकण्णहुमलइयव मणहरा रेहए देवी ॥ ४ ॥

जद्विसं च भयवं भुवणमहासरेक्करायहंसो तिसलादेवीए उदरकमलमइगओ तद्विवसाओवि सुरवइवयणेण तिरियजं-
 भगा देवा विविहाइं महानिहाणाइं सिद्धत्थनरिंदभुवणंसि मुज्जो मुज्जो परिक्खिवंति, तंपि नायकुलं धणेणं धन्नेणं रज्जेणं
 रट्ठेणं वलेणं चाहणेणं कोट्टागारेणं पीइसक्कारेणं बाढमभिवहुइ, सिद्धत्थनराहिवस्सवि अंचंतबाहुवलदप्पिणो तहाविह-
 विसमपएसु संठिया अपणयपुन्वावि वसमुवगया पंचंतट्टियावि नराहिवा । अन्नवासरे भगवओ अस्मापिऊणं एया-

रूखो वियप्पो समुप्पणो, जहा-जप्पभिई एस गम्भो संभूओ तप्पभिई धणकणगाइरज्जविभवेणं अम्हे बह्मामो, ता जइया एस जाओ भविस्सइ तइया एयस्स इमं गुणनिप्पणं वद्धमाणोत्ति नामधेयं वयं करिस्सामोत्ति, एवंरूवाइं मणोरहसयाइं परिकप्पयंति ॥

अह भगवं सुवणपहू नाणत्तयपरिगओ महाभागो । करुणापरेक्कचित्तो समुहविरत्तो महासत्तो ॥ १ ॥

चलणप्फंदणरूवं संहरिउं सन्वमंगवावारं । सेलेसिपवन्नो इव अणुकंपट्टा सजणणीए ॥ २ ॥

तह कहवि वसइ गम्भे जह नियजणणीवि नो सुणइ सम्मं । तइलोक्कविम्हयकरो गरुयाणं कोऽवि वावारो ॥ ३ ॥

नवरं तिसलादेवी तहट्टिए जिणवरे विचिंतेइ । किं गलिओ मम गम्भो ? उयाहु देवेहिं अवहरिओ ? ॥ ४ ॥

किं मज्झेवि विणट्टो ? किं वा केणावि थंभिओ होज्जा ? । अहवा निप्पुन्नाणं रयणं किं करयले वसइ ? ॥ ५ ॥

जइ सचं चिय विगओ एसो ता निच्छयं निए पाणे । नीसेसदुक्खलक्खेक्कभायणेऽविहु परिचयामि ॥ ६ ॥

अट्टज्झाणोवगया करयलपलहत्यिएण वयणेण । अचंतदुक्खवसया दूरज्झियमंडणाभरणा ॥ ७ ॥

परिचत्तसमुल्लावा महियलकयरुक्खवखुविकखेवा । दीहुस्सासनिवारियसुहसोरभमिलियभसलकुला ॥ ८ ॥

इय भूरिसोगसंभारतरलिया गलियकेसपासा य । हिययंतो रोवंती देवी जावऽच्छए ताव ॥ ९ ॥

सिद्धत्थरायभवणं विमणहुम्मणं जायं । उवसंतसुइंगरवं उवरथवरगीयनिग्घोसं ॥ १० ॥

अह भयवं एवंविहवइयरमुखलक्खिऊण नाणेण । अंगं अंगावयवं चालइ जणणीसुहडाए ॥ ११ ॥
 ताहे तुट्ठा देवी हरिसवसुल्लसिरलोयणकचोला । जायं झडत्ति भवणंपि राइणो पमुइयजणोहं ॥ १२ ॥
 तत्तो भयवं चित्तइ गच्छुम्भवमेत्तओऽवि कह जाओ । जणणीजणगाणमहो पडिंवंधो कोऽवि अइगरुओ ? ॥ १३ ॥
 जं गच्छभनिप्पकंपमेत्तेणवि एरिसा विसमरूवा । नियंसंवेयणगम्मा एएसि दसा समावडिया ॥ १४ ॥
 जइ पुण जीवंतैसुवि समणत्तणमहमहो पवज्जिस्सं । तो मम विरहेण धुवं एए जीयं चइस्संति ॥ १५ ॥
 इय चिंतिऊण भयवं संतोसट्ठं सजणणिजणगाणं । इयरजणाणवि एवं ठिइं व लट्ठं पइट्ठंतो ॥ १६ ॥
 जीवंतैसुं अम्मापिईसु नाहं मुणी भविस्सामि । इय गच्छभगओऽवि जिणो पडिच्चज्जइ नियममइगरुयं ॥ १७ ॥
 अह सा तिसलादेवी गच्छभफुरणसंपत्तपरमपमोया गहाया नियंसियमहघचीणंसुया सरसचंदणकयंगराया आवि-
 द्धपवररयणा तं गच्छं नाइउणेहहिं नाइसीएहिं नाइत्तिहेहिं नाइकसाएहिं नाइअंविहेहिं नाइमहुरेहिं
 सबोउयसुहावहेहिं भोयणेहिं परिवालंती पूरियडोहला निब्भया पसंता सुहेण भवणतलसमारूढा कयाइ पवर-
 नाडयपेच्छणेण कयाइ पुराणपुरिसचरियायन्त्रणेण कयाइ विचित्तकोऊहलावलोयेणेण कयाइ सहीजणपरिहासकर-
 णेण कयाइ उज्जाणविहारविणोएण कयाइ दुक्खियजणतवणिज्जपुंजवियरणेण कयाइ नयरसोहानिरिक्खणेण कयाइ
 वंधुजणसम्माणणेण कयाइ धम्मसंचद्धकहावियारणेण दिणाइं गमेइत्ति ।

अन्नया य निष्फणसस्सोवसोहि ए पणट्टो गमारिपमुहाणिट्ठे जणवए नियनियधम्मकरणुजए सु समणलोएसु
उवसंतपयंडुडुमरेसु परोप्परं नराहि वेसु पसुक्कचाडभडचोरभयासु विलसंतीसु पयासु रेणुपडलविगमरमणिजांसु
जणमणाणंददाइणीसु सयलदिसासु उज्जाणतरुक्कुसुमसंबंधगंधुडुरेसु पयाहिणावत्तपरिभमणरमणिजेसु मंदं मंदं वायंतेसु
समीरणेसु परमविजयसाहगेसु सवसउणेसु गंभीरघोसासु सयं चिय वजंतीसु विजयडुडुभीसु चैत्तसुद्धतेरसीए सुरभव-
चवणकालाओ आरब्भ नवणहं मासाणं अद्धट्टमाणं य राइंदियाणं विइक्कंताणं उच्चट्टाणं गएसु महागहेसु अहरत्त-
समए हत्थुत्तराजोगमुवागए चंदे तिसलादेवी पुव्वदिसिच्च पयासियसयलजीवलोयं भयवंतं दिणयरं व भवियजणरहं-
गमिडुणकथपरमसंतोसं पसूयत्ति ।

तयणंतरं च पवरपंचवणरणयणचिणिस्मियविचिहविमाणमालारूढेहिं पहयपडुपडहपमुहजयतूरोहिं उक्कुट्टिसीहना-
यकलयलमुहलेहिं पवराभरणमणिविच्छुरियगयणंगणेहिं पहरिससमुल्लसंतसरीरोहिं अणेगेहिं देवेहिं देवीहिं य इंतोहिं
पडिनियत्तमाणेहिं य देवलोयपुरिंपिब रमणिज्जं अमंदाणंदसंदोहजणंगं च कुंडगामनयरं जायंति । सिद्धथरायभवणे
य वेसमणवयणाणुवत्तिणो जंभगा सुरा रयणकणगवत्थाहरणचासं वरिसंति, पत्तपुष्पफलंगंधचुणवांसं च सुयंति ।

अह जाए सूइक्कम्मपत्थावे अहोलोगवत्थवा चउसामाणियसहस्सपरिबुडा सत्तहिं अणिप्पहिं सत्तहिं अणियाहि-
वईहिं परियारिया—भोगंकरा भोगवई, सुभोगा भोगमालिणी । तोयधारा विचित्ता य, पुष्पमाला अणिंदिया ॥ १ ॥

एआओ अट्ट दिसाकुमारीओ जिणाणुभावचलियासणाओ ओहिन्नाणेण जिणजम्मवइयरं नाऊण दिव्वविमाणारू-
 ढाओ सविट्ठीए जिणजणिसमीवमागच्छंति, तिपयाहिणीकाऊण य जिणमायरं पराए भत्तीए थुणंति, कंहं चिय ?-
 तुम्ह महायसि ! रामाजणेक्कसिरयणविच्चमे नमिमो । पयकमलं निम्मलकोमलगुलीपवरदलकलियं ॥ १ ॥
 इत्थीणं मज्झे चंगिमाए लद्धा तए पढमेरहा । तुमए चिय निम्माहिओ महिलालहुयत्तणकलंको ॥ २ ॥
 पुत्तवईणं मज्झे तुमए चिय पावियं विजयपत्तं । मिच्छत्तंधजणस्सालंवणहेऊ तुमं जाया ॥ ३ ॥
 सरयनिसायरकरनियरहारगोरो जसो तुमाहितो । आसंसारं परिभमउ निब्भरं दससुवि दिसासु ॥ ४ ॥
 मूढोचिय सुयपमत्ते परमाणंदं जणो समुवहइ । तुज्झ सरित्था धूयावि पुत्तकोडिंपि परिभवह ॥ ५ ॥
 तिहुयणपणभियचलणो जीए कुच्चिमि वाढसुवूढो । कलणाइक्कंतवलो चरिमजिणिंदो जयाणंदो ॥ ६ ॥
 इय सुइरं जिणजणणिं पणभिय परमायेरेण जंपंति । देवि ! नहु भाइयवं अम्हे जं दिसिक्कुमारीओ ॥ ७ ॥
 परमेसरस्स सुवणेक्कचक्खुणो जिणवरस्स एयस्स । निययहिगारऽणुरूवं जम्मणमहिमं करिस्सामो ॥ ८ ॥
 एवं भणिऊण तित्थयरजम्मणभवणस्स समंतओ जोयणपरिमंडलं भूभागं वचगयतणकट्टपत्तकयवरं दुरुस्सारिया-
 सुरदुरभिगंधपोगलं तक्खणं विउच्चिएणं मणहरेणं सबोउयक्कुसुमंगंधाणुवासिएणं संवट्ठगपवणेणं काऊण भगवओ
 तित्थयरस्स तिसलदेवीए य अदूरे गायंतीओ चिट्ठंति ।

एवं चिय चलियासंमत्तदिवोहिमुणियपरमत्था । उट्ठुदिसावासाओ देवीओ इमा तओ इति ॥ १ ॥
मेहंकरा मेहवई, सुमेहा मेहमालिणी । सुवच्छा वच्छमित्ता य, वारिसेणा बलाहगा ॥ २ ॥
तो निहयरयं वेउविण्ण मेहेण महियलं काउं । गंधधलुद्धुल्लंघयाउलं पुप्फवरिसं च ॥ ३ ॥
जिणवरगुणगणमइकोमलेण सुइसोक्खकरणदक्खेण । अइदूरंमि ठियाओ गायंति सरेण महुरेण ॥ ४ ॥
अह पोरत्थिमरुयगट्ठिईओ अट्ठवि दिसाकुमारीओ । बहुपरियणपरियरियाओ एयाओ आगया झत्ति ॥ ५ ॥
नंदुत्तरा य नंदा, आणंदा नंदिवद्धणा । विजया य वेजयंती, जयंती अपराजिया ॥ ६ ॥
रविमंडलसारिच्छं हत्थे धरिऊण दप्पणं ताहे । पुव्वदिसिंमि ठियाओ कित्तिंति गुणे जिणवरस्स ॥ ७ ॥
अह दाहिणरुयगनिवासिणीओ अट्ठवि दिसाकुमारीओ । नायजिणजम्मणाओ इति विमाणेहिं एयाओ ॥ ८ ॥
समाहारा पइन्ना य, सुप्पबुद्धा जसोहरा । लच्छिमई सेसवई, चित्तगुत्ता वसुंधरा ॥ ९ ॥
करपल्लवेण कलि(गहि)उं भिगारं सुरहिवारिपरिपुन्नं । दक्खिणपासे पहुणो गुणथवणपरा परिवसंति ॥ १० ॥
अह पच्छिमरुयगया अट्ठेव पुणो दिसाकुमारीओ । भत्तिभरनिम्भराओ इमाओ पविसंति जिणगेहे ॥ ११ ॥
इलादेवी सुरादेवी, पुहवी पउमावई । एगनासा नवमिया, भद्दा सीया य अट्ठमी ॥ १२ ॥
करकलियतालियंटा विसट्ठकंदोदट्ठदीहरच्छीओ । पच्छिमदिसिम्मि ठाउं थुणंति जिणनाहगुणनिवहं ॥ १३ ॥

अह उत्तरिह्ररुगगभिहाणगिरिवासिणीओ॑ अट्टेव । आगच्छंति इमाओ देवीओ॑ दिसाकुमारीओ ॥ १४ ॥
 अलंबुसा मिस्सेकेसी, पुंडरीकी य वारुणी । हासा सवप्पमा चेव, हिरिदेवी सिरी तथा ॥ १५ ॥
 वंदित्ता जिणजणणीं घेचुं सियचामरं करग्गेण । उत्तरदिसिम्मि गुरुणो पुव्वकमेणं परिवसंति ॥ १६ ॥
 अह विदिसिरुगगपव्वयवत्थवा चउ दिसाकुमारीओ । चित्ता य चित्तकणगा सेतेय सोयामणीनाम ॥ १७ ॥
 नमिउं तिसलादेवीं जिणं च विदिसासु चउसुवि निलीणा । सुंदरपईवहत्था जिणगुणनिवहं पगारंति ॥ १८ ॥
 मज्झिमरुगगट्ठिइओ पुणोवि चत्तारि दिसिकुमारीओ । देवी रुया रुयंसा सुरुया रुयगावई नामा ॥ १९ ॥
 आगंतूणं पुव्वकमेण नाभिं जिणस्स कप्पेति । चउरंगुलपरिवज्जं ताहे वियरं परिखणिंति ॥ २० ॥
 तं नाभिनालमह तत्थ ठाविउं पंचवणरयणेहिं । पूरंति तं समगं तदुवरि पीढं च बंधंति ॥ २१ ॥
 पीढस्सोवरि हरियालिगं च वियरंति नीलमणिरम्मं । लोथणआणंदयरिं दिव्वाए देवसत्तीए ॥ २२ ॥
 तयणंतरं तिन्नि कयलीहराईं विउधंति, तेसिं च मज्झभागे पवरपंचप्पयारमणिचिणिम्मियकोट्टिमतलाइं विच्छि-
 त्तिचित्रंगचलीमणहराईं दुवारदेसठवियपुण्णकणयकलसाइं दिव्वरुवरेहंतसालभंजियाभिरामाईं दाहिणपुव्वुत्तरदिसासु
 तिणिण चउसालभवणाइं विसालाइं विरयंति, तेसिं च मज्झभागे महग्घमणिखंडमंडियाइं नियकिरणजालसुत्तिय-
 सुरिंदकोदंडाइं कणगसेलसिलाविच्छिन्नाइं तिणिण सीहासणाइं ठवेंति, तओ तित्थयरं करयलपुडेणं तित्थयरज-

णर्णिं च वाहाहिं घेतूण परमायेरेण दाहिणादिसिचाउसालसीहासणे निसियावेंति, तओ सयपागसहस्सपागतेल्लोहिं पहाणगंधुदुरेहिं तेसिं सरीरसम्भंगिंति, गंधुब्रह्मणेणं उधट्ठेति, तओ पुब्वट्ठिइए जिणं जणर्णिं च पुब्वदिसिचाउसाल-सिंहासणंमि आरोविऊण गंधोदएण पुण्णोदएण सुद्धोदएण मज्झिऊण पवरमणिरयणाभरणसंभारेण विभूसियसरीराइं काऊण परमायेरेण पुब्वविहीए एत्तरदिसिचाउसालसिंहासणे निवेसिंति, नवरं नियकिंकरेहिं चोल्लहिमवंताओ गोसीसचंदणदारुणाणि आणाविऊण अरणिनिम्महणुट्ठिएण जलणेण संतिनिमित्तं होमं च करेति, नियपभावपरिर-विखयस्सवि भगवओ जीयंतिकाऊण रक्खापोट्टलियं वंधिऊण रयणपाहाणगे सवणमूले ताडिंति, एवं भणंति य-

सत्तल्लपवैयाऊ अप्पडिहयसासणो हवसु देव ! । गयरोगसोगुक्खो पणईयणपूरियासो य ॥ १ ॥

इय भणिऊण पहिडा जम्मणगेहे ठवित्तु जिणजणर्णिं । गायंति जिणिंदगुणे तिसलापासे समल्लीणा ॥ २ ॥

इय जम्मस्स य कायवचित्थरो तित्थनाहभत्तीए । वेगेण समत्थिज्जइ छप्पन्नदिसाकुमारीहिं ॥ ३ ॥

एत्थंतरे सोहम्मकप्पाहिवइस्स सक्कस्स सीहासणं चलइ, तच्चलणेण ओहिनाणेण भगवओ तित्थयरस्स जम्मं मुणिऊण ससंभमं सक्को सीहासणाओ उट्ठइ, सत्तट्ठपयाणुगमणपुव्वयं परमाए भत्तीए तत्थट्ठिओऽवि जिणं शुणिऊण पाइत्ताणी-याहिवइं हरिणेगमेसिं देवं आणवेइ-अहो भइ ! गच्छसु सोहम्माए सभाए मेघोघघोरघोसं जोयणपरिमंडलं सुघो-सघटं तिक्खुत्तो ताडित्तो महया सदेणं एवमुग्घोसेहि-सक्को जंबुदीवभारहल्लेत्तसमुब्भवस्स जिणस्स जम्मणमहिंमं

काउं पट्टिओ, ता भो देवा ! तुञ्भे सधवलेणं सधविभूईए सधनाडएहिं सवालंकारविभूसाए दिवच्छरागणेणं परिबुडा पवरविमाणाइं आरूढा मम सयासं पाउठभवहत्ति, एवं भणिए हरिणेगमेसी देवे देवरणो वयणं विणएण पडिसु-
णिता तुरियईए सोहम्मसभाए गंतूण सुघोसं घंटं तिवखुत्तो ताडेइ, तीसे य पयंडनिगघोसवसुच्छलंतपडिसदयप-
डिफलणवसेण अन्नाइं एगूणाइं वत्तीसं घंटासयसहस्साइं समकालं रणज्झणारवं काउमारद्धाइं, एवं च दिसि दिसि
समुब्भवंतपडिनिगघोसवहिरियदियंतरो सोहमकप्पो समुप्पन्नोत्ति । एत्थंतरे—

पंचविहविसयेसापमत्तचित्ता समंतओ देवा । तं एगकालयज्जिरघंटागणगुरुसरं सोउं ॥ १ ॥

चित्तंति सधओ किंचि (च) फुट्टवंभंडरसमो घोरो । फालिहविमाणमालापडिफलणचउग्गुणीभूओ ? ॥ २ ॥

आपूरितोच्च दिसात्रगासमखिलं चराचरं लोगं । सदेगसरूवंपिव कुणमाणो निययमहिमाए ॥ ३ ॥

संखुब्बुद्वतियसंगणाहिं भयवेगतरलियच्छीहिं । हा नाह ! रक्ख रक्खत्ति जंपिरीहिं सुणिज्जंतो ॥ ४ ॥

दणुवइरणसुमरणतुट्ठतियसंचठोहकंठरवभीमो । अणिवारियं वियंमइ जयघंटारणणारावो ॥ ५ ॥

इय चिंतावससिद्धिलियदइयादढकंठवाहुपासंमि । सधत्तो सुरनिवहे जायम्मि विमूढहिययंमि ॥ ६ ॥

खणमेत्तस्सउवसाने समत्थघंटारवंमि उवसंते । हरिणेगमेसिदेवो भणइ सुरे अवहिए जाए ॥ ७ ॥

भो भो तियसा ! सक्को तुञ्भे आणवइ जह लहुं एह । जेण जिणजम्ममज्जणमहूसवो कीरए इण्हि ॥ ८ ॥

इय आणत्तियमायन्निऊण परिसुक्कसेसवावारा । मुणियजिणनाहमज्जनमहसवा हरिसिया तियसा ॥ ९ ॥
तो मज्जनपोक्खरिणीए जंति, बहुविहजलेण मज्जाणु करेति । कप्परमिस्सचंदणरसेण, आलंपहि देहु सुबंधुरेण ॥ १ ॥
अइकोमलनिम्मलदूसुअल, परिहंति वियंभियकंतिपडल । अह कंठपइट्ठियलट्ठहार, दूरज्झियकामुयजणवियार ॥ २ ॥
अइसुरहिक्कुसुमनिम्ममवियदाम, नवपारियायमंजरिसणाम । बंधंति सुगंधसमिद्ध सीसि, तक्खणकयकुंचिरचारुकेसि ३

मणिमउडकिरणविच्छुरियगयण, नियरूवमडण्फरहसियसयण ।

वरकडयतुडियभूसियसरीर, तणुकंतिपसरपरिभूयसूर ॥ ४ ॥

किवि मगरमरालयसन्निस्सन्न, किवि हरिणवसहसिहिप्पवन्न ।

आरुहवि केवि कुंजरि महंति, केवि तुंगतुरए वेगे वयंति ॥ ५ ॥

चीणंसुयचिंधसहस्सरम्म, अवलोयणिमेत्तह दिन्नसम्म ।

आरुहवि चलिय किवि वरविमाणि, किंकिणिरवसुहरि महप्पमाणि ॥ ६ ॥

सहुलसरहहरिपट्ठि चडिय, किवि पट्ठियवेगेऽन्नोन्न घडिय ।

इय सुरसमूहह सवे बलेण, सुरवइ समीवमागय जवेण ॥ ७ ॥

एतथंतरे खंभसहस्ससंनिविट्ठं फलिहमणिघडियसालभंजियाभिरामदारदेसं अणेगलंबंतमुत्ताहलमालं पवरवइरवे-

इगापरिक्लिप्तपरेतत्रिभागं रणतघंटावलीमहुरसरसुहयं पवणकंपमाणनिविडजयपडागापयडं सिहरं व तिरियलो-
 यमहामंदिरस्स फलं व पुवकयपुन्नमहापायवस्स तिहुयणसारपरमाणुविणिम्मियं व सयलविभूविच्छिडाखंडंभंडा-
 गारं सोलसभेयरयणरासिघडियं व सुरवइवयणसंभंतपालकामरविडवियं जोयणसयसहस्सविच्छिणं पंचजोयण-
 सयसमुवेहं वरविमाणमारुढो अणेगदेवदेविकोडिपरिवुडो पत्थियो पुरंदरो, तओ पवणविजइणीए गईए तिरियम-
 संखेज्जाणं दीवससुहाणं मज्झमज्जेणं नंदीसराभिहाणदीवस्स दाहिणपुरत्थिभिह्ले रइकरपव्वए आगंतूण तं दिव्वं
 देविहिं विमाणवित्थारं व पडिसंहरिकुण जेणेव जंबुद्वीवो जेणेव दाहिणडुभरहं जेणेव जम्मणभवणं तेणेव
 उवागच्छइ, तयणंतरं च तेण दिवेण विमाणेण तिक्खुत्तो आयाहिणपयाहिणं भगवओ जम्मणभवणस्स काऊण विमाणं
 उत्तरपुरच्छिमे दिसिभागे ठवेइ, तओ अट्टहिं अगमहिंसीहिं तुलसीइए सामाणियसाहस्सीहिं समेओ जत्थ भयव
 तित्थयरो तित्थयरज्जणी य ताहिं आलोएइ, पणामं करेमाणो पचिसइ, सामिं समायरं तिपयाहिणपुव्वयं वंदइ,
 वंदित्ता सव्विसेसं तिसलादेविं थुणइ, कहं ?—

जयसि तुमं देवि ! सगोत्तगयणपडिपुन्नचंदनचजुण्हे ! । सुविमुद्धसीलसालीणयाइ गुणरयणवरधरणि ! ॥ १ ॥
 तिहुयणचिंतामणिकुच्छिधारि ! तं धुवं जगे धत्ता । तुज्झं चिय सुहफलओ पसंसणिज्जो मणुयजम्मो ॥ २ ॥
 एत्तियमेत्तेणं चिय तुमए उल्लंघिउव भवजलही । परमासीसट्ठाणं जायासि सुणीसराणंवि ॥ ३ ॥

एवं च शुण्डिऊण ओसोयणिदाणपुव्वं तक्खणविउद्वियज्जिणपडिरुवं च ठविऊण तिसलादेवीसमीवे सयं पंच सरीरे विउव्वइ, तओ एगेण परमसुइभूओ सरससुरभिगोसी सचंदणपंकपंडुरोथेरे करकमले कयप्पणामो सबहुमाणं तित्थयं संठवेइ, एगेण य तस्सेव य पिट्ठिदेसट्ठिओ हरट्टहासकुसुमप्पगासं चामीयरचारुदंडं पुंडरीयं धरेइ, दोहि य रूवेहिं भगवओ उभयपासेसु सुरसरिवारिप्पवाहविब्भमे चामरे मंदं मंदं चालेइ, एगेण पुरओ ठिओ धारासहस्सभीसणं समुच्छलंतकिरणपडलं सरयस्सरमंडलं व दिसिवलयमुज्जोवितं पयंडपडिवक्खविक्खेवदारुणं कुलिसमुव्वइ । एवं च पंचरूवेहिं समायरियनियनियकायवो अणेगदेवदेवीहिं परियरिओ-

संपत्तपावणिज्जं समत्थतित्थोहदंसणपवित्तं । अप्पाणं मज्जतो हरिसेणंगे अमायंतो ॥ १ ॥

मंदरसेलाभिसुहं कंठपलंवंतरयणवणमालो । पयलंतदिक्कुकुंडजुयलो आखंडलो चलिओ ॥ २ ॥

सिग्घाए दिवाए देवगईए कमेण गच्छंतो । जोयणलक्खुच्चत्तं संपत्तो मंदरगिरिदं ॥ ३ ॥

जस्सावट्ठियरूवा पडिंविंविजिसिहरकाणणाभोगा । विमलपरिमंडला दप्पणव्व रेहंति ससिसूरा ॥ ४ ॥

जस्स रमणीययारंजियाइं गंधवदेवभिहुणाइं । उज्झियनियठाणाइं सिहरेसु सुहं परिवसंति ॥ ५ ॥

नाणाविहफलभरंभंगुरगसाहाइं जत्थ रेहंति । सवोउयक्कुसुमसमिद्धिसुंदराइं तरुवणाइं ॥ ६ ॥

किविणो व कणगपरिहाणिवज्जिओ सज्जणोव्व अइतुंगो । सुमुणिव्व एगरूवो जो निच्चं सिद्धिखेत्तं व ॥ ७ ॥

एगत्थुन्नयनवमेघगज्जिपरितुट्टनीलकंठो जो । अन्नत्थ किन्नरारद्धगेयसुइनिच्चलकुरंगो ॥ ८ ॥

एगत्तो मरगयनिस्सरंतकिरणोलिसामलियगयणो । अन्नत्तो रवितावियफलिहोवलगलियजलणकणो ॥ ९ ॥

तत्थ एवंविहे मंदरगिरिमि नीहारगोक्खीरहारुज्जलाए अइपंडुकंवलसिलाए विचित्तरयणप्पभापडलजलपक्खालियंमि अभिसेयसिंहासणे पुद्वाभिमुहो सुरिंदो उच्छंगनिवेशियजिणो उवविइ, एत्थंतरे जिणपुन्नमाहप्पचलियासणा ओहिनाणचिन्नायजहट्ठियपरमट्ठा नियनियसेणाहिइइताडियधंटावपडिवोहियसुरयपमत्ततियसगणा तक्कालविउच्चियपवरविमाणारूढा सच्चालंकारेहंतसरीरा ईसाणप्पमुहा चंदसूरपज्जंता एगत्तीसंपि समागया सुरिंदा, कयपणामा य द्विया सट्ठाणेषु, एत्थ य पत्तयाचे अब्बुयतियसाहिणेण भणिया नियदेवा-अहो सिग्घमुवणेमेह महरिहं पसत्थं तित्थयराभिसेयं, तओ ते पहिट्ठचित्ता अट्ठोत्तरसहस्सं सुवन्नकलसाण अट्ठोत्तरसहस्सं कलहोयमयाणं एवं मणिमयाणं सुवन्नरूपमयाणं रूपमणिमयाणं सुवन्नरूपमणिमयाणं भोमेयगाणं अट्ठसहस्सं रयणकलसाणं, एवं भिंगाराणं पत्तेयं पत्तेयमट्ठसहस्सं विउच्चित्ता गया खीरोयसमुदं भरिया खीरसल्लिण सयलकलसा, गहियाइं उप्पलकुमुयसय-पत्तसहस्सपत्ताइं,

एवं पसत्थतित्थाण मागहार्इण वरनईणं च । सल्लिलं महोसहीओ सुकुमारा मट्ठिया जा य ॥ १ ॥

वत्तधारसेल्लकुलपधाइसु सोमणसनंदगवणेषु । अंतरनइहरएसु य जाणि य कुसुमोसहिफलाइं ॥ २ ॥

आदाय तां खीरोयसलिलपडिपुन्नपुन्नकलसा य । अच्युसुराहिवङ्गो विणयप्पण्या समप्पेति ॥ ३ ॥
अह सो अच्युदेविंदो दडूण अभिसेयसमगसामग्गिं जायहरिसो सिग्घमासणाओ उट्टित्ता दंसेहिं सामाणिय-
सहस्सेहिं तायत्तीसाए तायत्तीसेहिं चउहिं लोगपालेहिं तिहिं परिसाहिं सत्तहिं अणिएहिं सत्तहिं अणियावईहिं
चत्तालीसाए आयरक्खदेवसहस्सेहिं संपरिबुडो तेहिं विमलतित्थुत्थखीरनीरपरियुत्तोहिं विमलकमलपिहाणेहिं
गोसीसचंदणपमुहपहाणवत्थुगन्भिणेहिं सब्वोसहीरससणाहेहिं बहुसहस्ससंखेहिं महप्पमाणेहिं कलसेहिं विउच्चि-
एहिं साभाविएहिं य परेणं पमोएणं भगवओ भुवणिक्कबंधवस्स चरमतित्थयरस्स जंमज्जणमहूसवं काउं समुवाट्टि-
ओत्ति । एत्थंतरे चित्तिं सुरिंदेण, जहा—

लहुयसरीरत्तणओ कहेस तित्थेसरो जलुप्पीलं । सहिही सुरसत्थेणं सम कालमहो खिविजंतं ? ॥ १ ॥

एत्तियकुंभजलुप्पीलपेल्लिओ गरुगंडसेलोऽवि । पल्लहत्थिज्जइ नूणं किमेत्थ जुत्तं न याणेमो ? ॥ २ ॥

इय एवं कयसंकं सक्कं ओहीएँ जिणवरो नाउं । चालइ मेरुं चलणंगुलीए बलदंसणट्ठाए ॥ ३ ॥

तच्चालणे य—चंगतुंगिरुद्धगयणगपरिकंपिय, सिहरसयकडयडंततड वियडविहडिय ।

टलटलियटोलोवलविच्छन्नटंकदोत्तडविनिवडिय ॥ १ ॥

कंदरगयकेसरिविहियगलगज्जियरवभीम । पवियंभियचाउदिसिहिं पडिसइय निस्सीम ॥ २ ॥

तथा-चलिसंदरभारसंभगसिरनमिरभुयगाहिवइ दूरसुक दुद्धरु धरायलु, विलुलंतकुलसेलगणु तुद्वंबु डोलिओ विसंतुलु।

उस्सिखलभयभरविहुर उद्धयसुंडादंड अनिवारण दिसिवारणवि गमणि पयट्ट पयंड ॥ ४ ॥

खुभियदारुणमच्छकच्छवयपुच्छच्छडताडणेण उच्छलंतकलोल-संकुलगयंगणविगयसिहसुकमेरवियरंतमहिजल ।

अइवेगप्पवणप्पहय हल्लियसयलसमुद । नज्जइ जगवोलण भणिय चाउदिसिहिं रउडु ॥ ५ ॥

सूरससहरतारयाणंपि विवरंसुहपट्टियइं तकखणेण सबइं विमाणइं, भयभीएण सुरगणेण अइजेण उज्झियसगणइं ।

विमणंभणुसुरवहुनिवहु जाउ विसंतुलचेडु, मरगासंकिउ खयरजणु गिरिकंदरिहिं पइडु ॥ ६ ॥

एवं वियंभमाणे तिहुयणसंखोहे पंचनमोक्कारसुमरणपरायणे चारणमुणिगणे विचिंहाउहनिचहमणुसरंते अंगरक्ख-

सुरसमूहे पयंडकोलुइमरभीमो वडियनिडालभिलडिभासुरो करकलियकुलिसो सुराहिवो भणिउमाढत्तो-अहो सो

एस संतिकम्मसमारंभेडवि वेयालसमुल्लासो भोयणपढमकवलकवलेडवि मच्छियासन्निवाओ पुन्निमाचंदपढमुग्गमेवि

दाढाकडप्पुप्पिच्छो विडप्पागमो जं सयलमंगलालयस्स अणप्पमाहप्पवलणिहाणस्स तित्थेसरस्सवि जम्मभणमहूसव-

समए एरिसो विग्घो समुवट्ठिओ, केण पुण अकालकुवियकयंतसंगमसुएण देवेण दाणवेण य जक्खेण रक्खसेण

नियभुयसामत्थचित्थारदंसणट्ठयाए वा जिणमहिमाचलीयणमच्छरेण वा भुवणसंखोहदंसणकोऊहलेण वा कओ हवेजत्ति

जायसंसओ ओहिन्नाणं पउंजइ । तओ दिव्वनाणमुणियजिणचलणचंपणुकंपिभेरुइयरो तकखणसंहरियकोडुग्गमो

निंदियनियकुवियण्यो खामिऊण बहुण्यारं भगवंतं जिणेसरं पाणिपरिगहियकलसेः तियसे भणिउमाढत्तो-
भो भो विबुहा!—

जह सिरिसहजिणिंदो ण्हविओ पुर्वि इहेव तियसेहिं । तह चरिमतिथनाहंपि न्हवह मोत्तूण कुवियण्णं ॥ १ ॥
एगसरूववल्चिय निब्भंतं जेण सव्वजिणनाहा । तणुगुरुलहुयत्तं पुण न कारणं वीरिउल्लासे ॥ २ ॥
एवं च सुरवइवयणाणंतरमेव समकालं निवडियं सयलकलसेहिंतो सारयससिमऊहजालं व गयणसुरसरिजलपडलं
व तुसारहारधवलं जिणोवरि खीरोयहिजलं, एवं च पचट्टे जिणाभिसेगे—

दुंदुहीपडहंभाहुक्काउलं, वेणुवीणारवुम्मिस्सहयमइलं । झल्लरीकरडकंसालरवबंधुरं, धोरंगंभीरभीरीनिनायुद्धुरं ॥ १ ॥
काहलारावसंचद्धखरमुहिसरं पूरियासंखसरदुत्तथवनिब्भरं ।

पलयकाले व गज्जंतघणवंदयं, ताडियं सुरेहिं चाउव्विहाउज्जयं ॥ २ ॥

हरिसभरनिब्भरुब्भिन्नरोमंचया, केवि संथुणाहिं जिणु तियस नचंतया ।

अवरि वरसुरहिं मंदारकुसुमुक्करं, सुयाहिं गंधवभसलावलीकब्बुरं ॥ ३ ॥

केवि फोडिंति मल्लव तिवइं सुरा, सिंहनायं च मुंचंति हरिसुद्धुरा ।

कुणहिं गलगज्जियं अवरि हयहेसियं, केवि य किर रासयं दिंति करणंचियं ॥ ४ ॥

अन्नि हरिसेण विरइति गलददरं, केवि सुट्ठीहिं ताडिति विस्संभरं ।
 केइ कलसे य खीरोयजलपूरिए, तक्खणं निंति तियसाण हत्थंतिए ॥ ५ ॥ ॥
 इय जहिं सुरसंघेण निहणियविग्घेण वट्ठिज्जइ सबायेरेण ।
 तहिं जिणवरमज्जाणि भवभयतज्जाणि किं वन्निज्जइ मारिसिण ? ॥ ६ ॥

जिणाभिसेगे य वट्टमाणे सवे सुरिंदा छत्तचामरधूयकडुच्छयपुफ्फंगंधहत्था पुरओ पमोयपुलइयंगा आणंदवियसि-
 यच्छा ठिया । अह अञ्चुयसुरेसरे जिणं ण्हविऊण विरए पाणयाइणो देविंदा नियनियपरिवारपरियरिया महाविभ-
 वेणं सोहम्माहिवइं मोत्तूण तीसंपि कमेण जिणं अभिसिंचंति । तयणंतरं च ईसाणिंदो भयवंतं उच्छंगे धारितो सिंहा-
 सणे निसीयइ, सोहम्माहिवइवि चउद्दिसिं तित्थयरस्स चत्तारि धवलवसहे संखदलुज्जले रमणिज्जसरीरे विउवइ,
 तेसिं च अट्टसिंगगेहिंतो अट्टखीरोयसलिलधाराओ उट्ठु गयणंगणगामिणीओ पुणो अहोनिवडणेण एगीभूयाओ
 काऊण जिणुत्तमंगे संठवेइ, अन्नेहि य बहुएहिं खीरोयकलससहस्सेहिं अभिसिंचइ, एवं कमेण निवत्तिए मज्जाण मह-
 सवे परमपमोयभरपुलइयंगो सोहम्मसुरनाहो सुकुमालंगंधकासाईए जिणदेहं ल्हिऊण गोसीसचंदणुम्मीसद्युसिणेणं
 अंगमालिंपइ, सियसुरभिकुसुमोहिं पूयावित्थरं विरएइ, सच्चालंकारविभूसियं च करेइ, पुरओ य ससिकलाधवलेहिं
 अक्खोहिं दप्पणभदासणवद्धमाणकलसमच्छसिरिचच्छसत्थियनंदावत्तलक्खणे अट्टमंगलके समालिहइ, वउलतिलयकण-

वीरकुंदमल्लियासोयचूयमंजरिपारियायपमुहं पंचवणकुसुमनियमाजाणुमेत्तं सुयइ, नाणाविहमणिभत्तिविचित्तदंडेण
वइरामयकुडुच्छुएणं पवरगंधाभिरामं धूवसुखिवइ, पज्जलंतदीवियाचक्कालमणहरं आरत्तियमंगलपईवं च समुत्तारेइ,
एवं च कयंमि सवकायवे हरिसुक्करिसनमिरसिरनिवडियकुसुमच्चियमहीयलं कोमलमुयमुणालअंदोलणमणिकंकणरवा-
उलं उब्भडकरणवेगारिखोलिरमुत्तावलिकलावयं तयणु सुरासुरोहं सवागरेण जिणपुरओ पणच्चियं, नच्चिऊण भत्तिभर-
निब्भरा भयवंतं थोउं एवमारद्धा—

जय भुवणत्तयवंदिय ! लीलाचलणगगधालियगिरिंद ! भवकूवमज्झनिवडंतजंतुनित्थारणसमत्थ ॥ १ ॥

परमेसर सरणागयपरुढदढवज्जपंजर जिणिंद । वम्महकुंगकेसरि मच्छरतमपसरदिवसयर ! ॥ २ ॥

सच्चं चिय सिद्धथो कहं न सामिय ! जहत्थनामत्थो ? चिंतामणिसारिच्छो जस्स सुओ तं विसालच्छो ॥ ३ ॥

अच्चंतमविरहपरायणं पि अइपुन्नवंतम्पणं । मण्णेमो जिणं ! जं तुज्झ मज्जणे एवमुवयरिया ॥ ४ ॥

भइं भारहखेत्तस्स नाह ! तं जत्थ पाविओ जम्मं । धरणीचि वंदणिज्जा जा वहिही तुज्झ कमकमलं ॥ ५ ॥

जइ तुह पयसेवाए जिणिंद ! फलमत्थि ता सया कालं । एवंविहपरममहं अहे पेच्छंतया होमो ॥ ६ ॥

इय चउविहदेवनिकायसामिणो जिणवरं शुणेऊण नियनियठाणेसु गया मोचुं सोहम्मसुरनाहं, गए य सट्ठाणं
देविंदे सोहम्माहिचई कयसन्वकायव्वो जिणिंदे करसंपुडेण गहिऊण अणेगदेवकोडाकोडिपरिबुडो गंतूण जिण-

जम्मघरंमि पडिरूवं ओसोवणिं च अवणिता तिसलोदेविसमीवे निसियोवेइ, एगं च पवरं देवदूसजुयलं कुंडलजुयलं च
ऊसीसगमूलंमि ठवेइ, एगं च पंचवन्नियरयणविच्छित्तिमणहरं जचकंचणविणिम्मियं लवंतसुत्ताहलावचूलयं लंबूसयं
भगवओ अभिरमणनिमित्तं अवलयंमि ओलंवेइ, जं अवलयंतो जिणो सुहेण चक्खुक्खेवं करेइ, तओ सको वेसमणं
आणवेइ—जहा भो ! सिग्घमेव वत्तीसं हिरन्नकोडीओ वत्तीसं सुवन्नकोडीओ वत्तीसं नंदाइं वत्तीसं भद्दाइं अन्नाणि य
विसिट्ठवत्थूणि भगवओ जम्मणभवणे उवणमेहि, सोऽवि जंभगेदेहिं सव्वं तहत्ति निवतेइ, पुणरविदेविंदो निय-
तियसेहिंतो सव्वत्थ एवं उग्घोसावेइ—भो भो भवणवइवाणमंतरजोइसियेवमाणिआ देवा देवीओ य ! सुणंतु
भवंतो—जो किर तित्थयरस्स तित्थयरजणणीए वा असिवमणिंहुं काउं संपहारेही तस्स अवस्सं अज्जगमंजरिव्व
उत्तिमंगं सहस्सहा तडित्ति फुट्टिहित्ति, एवं च सव्वं काऊण विहिं भगवंतं पणमिऊण उप्पइओ नीलुप्पलसामलं
गयणं पुरंदरो ॥

अह उग्गयंमि दिणयरे पगासीभूयासु सयलदिसासु वज्जिएसु गंभीरघोसेसु जयत्तरेसु सुहपडिबुद्धा तिसला
पेच्छइ सव्वालंकारविभुसियं पवरसुरहिपारियायमंजरीपरिमलमिलंतालिवलयसामलियसरीरं सुरहिगोसीसचंदणरस-
कयंगरागं जिणेसरं, इओ य सिद्धत्थनरिंदो सहसिपधाचिएण चेडीजणेण साहित्थिहुयणच्छेरयत्त्वसुयजम्ममहूसवो
चेडीजणरस अवणियदासत्तभावो आसत्तेवेणिवंछियत्थसमत्थरयणरासिदाणजणियाणंदो भणइ, जह—भो पुरिसा !

श्रीगुणचंद
महावीरच०
४ प्रस्तावः

॥ १२३ ॥

गच्छहं तुभे सन्वत्थ नयरे तियचउक्कचच्चेरेसु कयधरावणयणपुन्वयं वारिवरिसपसमियरयमणहरेसु कुंकुमपिंजरियधर-
णियलेसु कुणह पंचप्पयारपुप्फपुंजोवयारं, अगुरुलुक्कुंडुरुक्कधूवधूमंधयारियदिसिसुहाओ पइट्टह ठाणे ठाणे कणग-
धूवचडियाओ, पवरमणिमुत्ताजालेरेहंतमज्झभागे नच्चंततरुणीचरणकिंकिणीकलरवाळरियदिसिसुहे गायंतगायण-
जणे ऊसियचिविहवेजयंतीसहस्सोवसोहिए समंतओ समुत्तुंगथोरथंभावलीसुसिलिट्टलट्टावबद्धे मंचाइमंचे संचएह,
पडिभवणदुवारं च विसिट्ठपइट्ठाणगपइट्ठिए सहस्सपत्तपउमपिहियाणणे कुसुममालुम्भालिए सरसचंदणपंकपंडुरि-
ओदरे विमलसलिलपुन्ने पुन्नकुंभे निवेसह, सयलपएसेसु य कहगतालायरनडपेच्छणयाइ पयट्टावेह, नयरदुवारेसु य
नवचंदणमालाड बंधेह, जूयसहस्सं चक्कसहस्सं च उब्भवेह, उस्सुक्कं उक्करं अचाडभडपवेसं ववगयधरणिज्जं माणवु-
ट्ठिजुत्तं विमुक्कचारगागारनिरुद्धावराहकारिनरनियरं पुरं च कारवेहत्ति, जं देवो आणवेइत्ति सविणयं पडिसुणि-
ऊण वयणं गया पुरिसा, सविसेसो य साहिओ नरिंदाएसो, तओ—

हरिसपणचिरतरुणीकरंगुलीगलियसुद्धियाजालं । जालुब्भडधयमहुसित्तसंतिहोमानलाउलियं ॥ १ ॥
आउलियचित्तमगगणधणलामनिमित्तविहियहलवोलं । हलवोलसवणधावियनरचइजणदिज्जमाणधणं ॥ २ ॥
धणवियरणसुणणीकयनिहाणपक्खित्तियसतवणिज्जं । तवणिज्जपुंजपिंजरचीणंसुयचिंधसयरम्मं ॥ ३ ॥
रम्ममहीयलविलिहियपसत्थसत्थियसहस्ससोहंतं । सोहंतकंतपुरवरनरजणकीरंतमंगलं ॥ ४ ॥

श्रीसिद्धा-
र्थकृतो-
जन्मोत्सवः

॥ १२३ ॥

मंगलकरणावलपुरोहियांरुद्धदेवयापूयं । पूयावलिविक्खेवणपीणियनिस्सेसपक्खिगणं ॥ ५ ॥
 गणणाइकंतसमुच्छलंतमहिदूररूढनिहिनिवहं । वहबंधविरत्तपसंतलोयपारंभियचिलासं ॥ ६ ॥
 लासुह्मासिरकुलथेरिनारिपारद्धचच्चरीगीयं । गीयवियक्खणगायणसुस्सरसरपूरियदियंतं ॥ ७ ॥
 इय कुंडग्गामपुरं सवाहिरब्भंतरं समत्तेण । तित्थाहिवजम्ममहूसवंमि जायं सुरपुरं व ॥ ८ ॥
 एवं च पुरमहूसवे पयट्ठे समाणे सिद्धत्थनरिंदो ण्हाओ कयालंकारपरिग्गहो नियंसियमहग्घपहाणवत्थो निसण्णो अ-

त्याणमंडवे, एत्थंतरे समागया मंतिसामंतसेट्ठिपमुहा विसिद्धलोया, निवडिया चलणेसु, भणिउमाढत्ता य-देव ! विजएणं
 घणागमेणं रज्जवित्थारेणं सरीरारोगत्तणेणं वद्धाविज्जह तुब्भे, जेसिं तिहुयणेक्कचूडामणी नियकुलनहयलमियंको एसो
 पुत्तो पसूओत्ति जंणिकुण समप्पियाओ तेहिं पवरकरितुरयरयणरासीओ, राइणावि ते सम्माणिकुण पुप्फवत्थगंधालं-
 काराइदाणेण विसज्जिया नियनियट्ठाणेसु, खणंतरेसु य दंसणूसुओ पत्थावमुवलब्भ पत्थिवो उट्ठिओ अत्थाणाओ, गओ
 य मणिकुट्टिमलिहिज्जमाणसुरंगरंगावलीसत्थियं दुवारदेसनिवेसियलोहरक्खं उब्भवियमहंतसुसलजूसरं विविहरक्खा-
 परिवेस्सेवसस्सिरीयं जिणजम्मणभवणं, दिट्ठो य तत्थ रयणरासिब सरयदिणयोच्च एगट्ठियसच्चतेयपुंजोव समुज्जोइय-
 मंदिरब्भंतरो जिणवरो, तं च दट्ठुण चित्तिउमाढत्तो-अहो पढमदिवसजायस्सवि अपुद्धा सरीरकंती अनणसरिसरु-
 वंसंपया अविभावणिजं लायणं निम्मेरसुंदरं अमग्गं सोहग्गं, ता सवहा पुण्णपगरिसागरं मम कुलं जत्थ पसूमेवं-

चिहं पुत्तरयणंति विभाविऊण भणिआ तिसलादेवी—

पेच्छसु नियसुयपसरंतकंतिपब्भारविजियपहपडले । कज्जलसिहापदीवे परिगोविंतोव अत्ताणं ॥ १ ॥
पुब्बं बहुसोवि मए दिट्ठमिमं मंदिरं विसालच्छि । किं तु पमोयमियाणिं किंपि असरिच्छमावहइ ॥ २ ॥
संभुणियचामीयरुणयसरिसेण कंतिनिवहेण । एगसरूवा कीरंति उभयगिहचित्तभित्तीओ ॥ ३ ॥
इय एवमाइकहाहिं नरिंदो देवी य विगमिऊण भगवओ पढमदेवसियं ठितिवडियं करंति, तइयदिवसे य तरुणतरणिताराहिवबिंबाइं दंसेति, कमेण य जाए छट्ठवासरे रायकुलसंवड्डियाहिं अविणट्ठलुपंचिंदियाहिं नीरोग-
सरीराहिं जीवंतपाणनाहाहिं कुंकुमंपंकालितवयणकमलाहिं कंठकंदलावलंबियसुरहिमालइमालाहिं कुलविलयाहिं अचं-
तजायचित्तसंतोसाहिं जागरमहूसवं पयट्टेइ, आगए य एक्कारसदिवसे जहाभणियविहाणेण सुइजायकम्ममवणेंति,
बारसदिवसंमि नाणाचिहवंजणसमेयं बहुप्पगारखंडखज्जपरिपुन्नं विविहपाणयपरियरियं सुगंधगंधट्टोयणसूयसंपन्नं
रसचइं निवत्तावेंति, तयणंतरं कारियण्हाणविलेवणालंकाराणं नायखत्तिचाणं पणयजणपुरप्पहाणलोगाणं परमायेरेण
भोयणं पणामेंति, खणंतरेण य आयन्ताणं सूइभूयाणं वीसत्थाणं सुहासणगयाणं तत्थ गंधमल्लालंकारेहिं सम्माणिथाणं
तेसिं पुरओ सिद्धत्थनराहिवो एवं वयासी—भो भो पहाणलोया ! पुब्बंमि मम एस संकप्पो समुप्पज्जित्था जहा—जहि-
वसं एस कुमारो देवीए गब्भं संकंतो तद्विवसाओवि करितुरयकोसकोट्टागारज्जेहिं सुहिसयणपरियणेहिं परमं

तुमुमहसुवागओ, अओ मए एयस्स वद्धमाणोत्ति नामधेयं कायघंति, तस्सा इयाणिंपि तुम्ह समक्खं एयमेव नामं
 हवउत्ति, तेहिं भणियं-देव ! जुत्तमेयं, गुणनिष्फन्ननामधेजे विज्जमाणंमि कीस न जहट्टियमभिहाणं कीरइत्ति !,
 एवं तेहिं जंपिए पइट्ठियं जयगुरुणो वद्धमाणोत्ति नामं, जाओ परमप्पमोओ, पुरंदरेणावि अयलो भयभेवोवसग्गेहिं
 खंतिस्स मो य इत्तिकाऊण वरं महावीरोत्ति नामधेयं से कयंति, इय निघत्तियाभिहाणो सुरसंकाभियकाभियपपर-
 रसाए निययंगुलीए पाणेण कयभोयणकायवो जयगुरू पंचहिं धावीहिं परियरिओ अंतउरीजणेण सायरं चेव ला-
 लिज्जमाणो अम्मपापियेरोहिं वहुप्पयारं चरणवंकमणं काराविज्जमाणो चेडचडयरेणं पइक्खणमुह्हाविज्जमाणो सायरं
 देवेदीविंदेण पज्जुवासिज्जमाणो निरंतरं गीएहिं गिज्जमाणो पाढेहिं पढिज्जमाणो चित्तेहिं उवल्लिह्जमाणो दंसण-
 सुएहि लोएहिं अहगहमिगाए पलोएज्जमाणो गिरिकंदरगउघ कप्पपायवो वह्तिउमारद्धोत्ति कमेण य पडिपुन्न-
 सरीरावयवो ताविच्छगुच्छसच्छपरूढसिणिद्धमुद्धरुहसिंहडो विसुद्धपबुद्धुद्धिपगरिसागिठ्ठभासाविसेसविसारओ
 पडिपुन्नसुयसायरपारगामी ओहिज्जाणमुणियचक्खुगोयराइकंतवत्थुवित्थारो अतुच्छमुइनेवत्थधरो सयल्लोयलोयणाणं-
 दज्जणं दसण्हणरिसपज्जायं कुमारत्तणमणुपत्तो समाणो भयवं बालभावसुलहत्तणओ कीडारइए अणेगेहिं समव-
 एहिं मंतिसामंतसेट्ठिसेणावसुएहिं खेडुविहिवियक्खणेहिं समं पारद्धो रुक्खखेडेण अभिरमिउं, तत्थ य एसा
 ववत्ता-जो रुक्खेसु सिग्घं आरुहइ उत्तरइ य सो सेसाइं डिंभाइं पट्ठीए आरुहिऊण वाहेइ, इओ य सोहम्मो

देवलोए सोहम्माए संभाए अणेगदेवकोडिंपरिवुडस्स सहस्सनयणस्स पुरओ जायंतेसु तियसेहिं समं विविहंसमुहायेसु धीरत्तणगुणवन्नणपत्थावे भणियं पुरंदरेणं—भो भो सुरा ! अपुवं किंपि भयवओ वद्धमाणसामिस्स बालत्तणमणुपत्तस्सवि धीरत्तणं सरीरपरक्कमो य, जं न तीरइ केणावि बलपगरिसकलिएण देवेण दाणवेण वा सयमेव पुरंदरेण वा भेसिउं, परक्कमेण वा पराजिणिउंति । एवं च निसामिऊण एगो सुरो अचंतकिलिहुचिच्चत्तणओ अतुच्छमिच्छुचुच्छाइय-विवेयत्तणओ य चित्तिउमारद्धो, कहं ?—

जह तह जंपियरम्मं सच्छंदुद्दामचिट्ठियसणाहं । मुक्काववायसंकं धन्ना पावंति सामित्तं ॥ १ ॥

किं संभविज्ज एयं जं बालंपिहु न खोभिउं सक्का । अविचिंतणिज्जमाहप्पसालिणो देवदणुवइणो ? ॥ २ ॥

अहवा हत्थट्ठियकंकणस्स किं दप्पणेण परिमिणणं ? । गंतूण सयं चिय तस्स धीरिभं लहु परिक्खामि ॥ ३ ॥

एवं संकप्पिऊण जत्थ सामी अभिरमइ तत्थ आगंतूण तरुवरस्स हिड्डओ खोभणत्थं एगं महापमाणसरीरं अज-णपुंजगवलगुलियापडलकसिणप्पभोलिसामलियवणनिगुंजं तंवचूडचूडाईरगरत्तलोयणं विज्जुदंडचंचललंतलोली-हालुयलं उक्कडकुडिलवट्टुलकक्खडफडाडोवकरणदच्छं जुगक्खयखुभियसमीरघोरघोसं अणाकलियपयंडरोसवेगं तुरियगमणं संमुहमितं दिव्वमहाविसं सण्णरूवं विउवइ, सामीवि तं तहारूवं लीलाए अवलोइऊण जुन्नरज्जुखंडं व वामहत्थेण उहं दूरे निच्छुभइ, ताहे देवो विचिंतेइ—एसो एत्थ न ताव छलिओ । अह पुणोऽवि सामी तिंदूसएण

अभिरमई, सो य देवो धिद्विमंवलंबिऊण आगामियमवायमविभाऊण य वालयरूवं विउबिऊण सामिणा सद्धिं
 रमिउमारद्धो, अह जिणेण वियक्खणत्तणओ पराजिया सधेऽवि वालगा पट्टिए समारुहिऊण समाढत्ता वाहिउं,
 अह वाहिएसु सयलेसु तेसु समागओ सुरकुमारस्सवि वारओ, पणामिया तेण सहरिसं पट्टी, आरुढो य तत्थ वद्ध-
 माणसामी, तओ सो देवो सामिभेसणं तं पिसांयरूवं विउवित्ता पवट्ठिउमाढत्तो, केरिसं पुण तस्स रूवं ?—खरफ-
 रुसा सूयरवालसन्निभा से केसा घडीसंठाणसंठियं उत्तिमंगं उट्ठियाकभल्लखल्लयमज्झं निडालवट्ठं कविलज्जडिललोमाओ
 भसुहाओ, मरुक्खयंगंभीरं फुरंतपिंगलपभाजालं लोयणजुयलं, जमलत्तुल्लिमहल्लं चिचिडं च नासापुडं, रूंदगिरिकंदरा-
 गारं कवोलमंडलं, घोडगपुच्छसच्छहाओ दाढियाओ, करहस्स व दूरपलंविं ओट्टुजुयलं, कुंजरस्स व वाहिं निगया
 कुडिलभीसणा दसणा, अनिलंदोलियपडायव चंचला निसियकरवालदीहा जीहा, सुक्खवाणुसरिसा कंधरा, कोट्टिगा-
 णुरूवाओ दोवि वाहाओ, सुप्पचप्पडं पाणिसंपुडं, सिलापुत्तगोवमाओ करंगुलीओ, पुराणसिप्पिपुडरूक्खा अंगुलीणं
 नहा, पयडनसाजालजडिलं पंसुयंतराले पसुत्तघोरंतविसहरं उरट्ठिपुंजरं, अल्लिजरागारं उयरं, सुट्टिगेज्जा ठाणट्ठाणभग्गा
 कडी, वाळुंकीफलपलंचिरा वसणा, करिवरंगप्परूढं मेढं, दीहवीभच्छाविवन्नरोमावलीपरिखित्तं तालतरुदीहरं जंघा-
 जुगं, नीसाहपत्थरविच्छिन्ना चलणा, कुद्दालदारुणा चरणंगुलीणं नहा । अवि य—
 विगरालविडंविचययणकंदरुगिरियिजलणजालोहं । चलणतालपहयभूयलचालियपासायसिहरगं ॥ १ ॥

उट्टपसारियं दीहतरमुयगलाखलियसूरहपसरं । परिकुमहंतट्टहासपायडियदढदाढं ॥ २ ॥

कंठपलंबिरपयतलविलगबीभच्छसरडवणमालं । नउलकयकणणपूरं जन्नोइयकयमहासप्पं ॥ ३ ॥

उक्कत्तियचित्तयचम्मनिवसणं रुहिरमंसलित्ततणुं । अइधोरजराजज्जरअयगरपरिवद्धखंतलं ॥ ४ ॥

पइसमयमुल्लंतं नचंतं कहकहंति पहसंतं । उक्कट्ठिं च करिंतं भीसणसेहेण भासंतं ॥ ५ ॥

इयं तस्स भीसणं जिणवरेण दिट्ठं महापिसायस्स । पइखणविवहुमाणं रुवमसिमेहतमसामं ॥ ६ ॥

तओ मुणियकइयवविचारेण जिणेण सबहा असंभतेण सो पहओ हेलाए पट्टिवट्ठमि सुट्ठीए, करयलकुलिसजणि-
यसरीराभिघाओव विरसमारसंतो झडत्ति पत्तो मडहत्तणं, निरुवक्कमकायत्तणओ चेव न सयसिक्करमुवगओ, नवरं
निच्छियसुराहिचइववणो जायपच्छायावो नियदुचरियचुन्नियंगो सव्वायरं पणमिऊण जिणं पट्टिउमाढत्तो—

हा दुट्ठु, दुट्ठु, तइलोयनाह ! एयं मए समायरियं । सच्चं पि न सदहियं सहस्सनथणस्स जं वयणं ॥ १ ॥

तस्सऽणुरूवं संपइ संपत्तोऽहं फलं इमं भीमं । अवगन्नियगुरुवयणाण अहव किर केत्तियं एयं ? ॥ २ ॥

संसारमहाभयमवि जो तं विद्वसि देव ! लीलाए । अम्हारिसे भयकरे तुह तस्स हवेज्ज का गणणा ? ॥ ३ ॥

तथा—चलणंगुलिचालियक्रणयसेल डोल्लियमहल्लमहिगोल । जस्स किर बाललीलाइयं पि चित्तं चमकेइ ॥ १ ॥

तस्सविय तुज्झ तइलोक्कनाह ! जो विक्रमं न याणामि । सो नाममेत्तओ चिय विबुहोऽहं न उण किरियाए ॥ २ ॥

एवंविहस्स दुव्विणयविलसियं खमसु एकवारं मे । पर्यईएऽवि हु जं पणयवच्छला हुंति सप्पुरिसा ॥ ३ ॥
 इय खामित्ता सुवणेक्कबंधं पणमिऊण सो तियसो । गयणयलं उप्पइओ चलंतमणिकुंडलाभरणो ॥ ४ ॥
 भयवंपि खणं एक्कं कीलित्ता ताहिं ताहिं कीलाहिं । चेडसुहडंगरक्खेहिं परिवुडो नियगिंहमि गओ ॥ ५ ॥
 अह समहिगऽट्टवच्छरपज्जाए जयगुरुंमि जायंमि । हरिसियमणो नरिंदो तिसलाए पुरो इमं भणइ ॥ ६ ॥
 देवि ! कुमारो संपइ गहणसमत्थो कलाकलावस्स । वट्ठइ ता उवणिज्जउ लेहायरियस्स पढणत्थं ॥ ७ ॥
 इय भणिए देवीए जएक्कनाहो महाविभूईए । ण्हविओ पसत्थतित्थुत्थसल्लिभरिएहिं कलसेहिं ॥ ८ ॥
 नासानीसासोज्झं चक्खुहरं हरिणलंछणच्छायं । परिहाविओ य पवरं सुकुमारं देवदूसजुयं ॥ ९ ॥
 मणिमउडकडयकुंडलतुडियपमोक्खेहिं भूसणेहिं च । सुरवरसमप्पिएहिं अलंकिओ तक्खणं चेव ॥ १० ॥
 सिद्धत्थनरिंदेणवि नीसेसकलाकलावकुसलमई । अज्झावगो महप्पा वाहरिओ निययभवणंमि ॥ ११ ॥
 एगं महप्पमाणं ठवियं सिंहासनं च तस्स कए । अन्नं च धेववित्थरसुवणीयं जयगुरुनिमित्तं ॥ १२ ॥
 अह जाव नोवणिज्जइ सामी अज्झावगस्स पढणत्थं । सक्कस्स ताव चलियं सिंघासनममलमणिरुइरं ॥ १३ ॥
 ता ओहिन्नाणेणं सुणिउं जयनाहपढणदुत्तंतं । चित्तेइ अहह मोहो कह विलसइ जणणिजणगणं १ ॥ १४ ॥
 जं सयलसत्थपरमत्थजाणगं जयगुरुंमि पढणत्थं । अज्झावगस्स संपइ समप्पिउं अभिलसंतिति ॥ १५ ॥

सक्यो इय चिंततो आगतूणं महप्पमाणंमि । सिंहासणंमि ठविउं नाहं परमाएँ भत्तीए ॥ १६ ॥

वंदित्ता जोडियपाणिंसंपुडो सदसत्थपरमत्थं । आपुच्छिउं पवत्तो सामीडविय वोत्तुमारद्धो ॥ १७ ॥

सोऽवि उवज्झाओ परमं विम्बयसुव्वहंतो तं कहितं एगगचित्तो निसामेइ, जणणिजणगाइणो य विम्बियमणा जाया । अह सदसत्थपयत्थे कहिऊण ठिओ, ताहे सक्केण साहियं तेसिं-जह जाइसरणाणुगओ आगम्भवासाओऽवि नार्णत्तयपरिगहिओ एस भयवं, पाणिपइट्टियं लट्ठमणिं व सव्वं वत्थुं नियमईए सुणइ, ता किमेवं अणत्थओ संरंभो कओ ? एवमायन्निऊण विम्बियमणा परं पमोयसुवगया जणणिजणगा, पुरंदरोऽवि जिणं नमिउं दिवं गओ, तेण पुण उवज्झाएण जे केऽवि पयत्था भयवओ वागरेतस्स सम्ममवधारिया तयणुसारेण सुसिलिहं विरइयं इंदवागरणंति । भय-
वंपि निरुवसगं कमेण पत्तो तरुणत्तणं, तयणुभावेण य तस्स सुसिणिद्धसुहुमकसिणकुंचिरकेसपासेण विराइयं छत्ता-
गारमुत्तिमंगं, सवणमूलावलंविणा नलिणेणं व नयणजुयलेणोवसोहियं वयणं, अच्चंतसस्सिसरीएण रयणेणं व सिरिवच्छेण
पसाहियं कणयसेलसिलापिहुलं वच्छत्थलं, गंभीरदक्खिणावत्ताए सधुरिसचित्तवित्तीएव्व नाभीए अलंकियं झसाणु-
रुवसुयरं, हंसतणुरुहकोमलेहिं लोमेहिं करिकराणुरुव्वं मंडियं जंचाजुयलं, अंगुलीदलग्गविप्फुरंतनहावलीए चिंताम-
णिपरंपराएव्व सोहियं जयपडागामगरमच्छाइलक्खणलंछियं चरणकमलं ।

अन्नं च-भाविरमपायमासंकिऊण मन्ने जिणस्स पढमंपि । हिययाओ नीहरिउं ठियं व केसेसु कुडिलत्तं ॥ १ ॥

रागोचिहु श्रेष्ठुप्पन्नपण्यभावोऽवि भाविमयभीओ । वाढं कुणइ व वासं करचरणतलाधरतलेसु ॥ २ ॥

एवं च भयवंतं तरुणत्तणसुवगयं रुवविणिज्जियदेवदाणविंदसंदोहं नाऊण सेसमहीविईहिं नियनियधूयापाणि-
ग्गहत्यं पेसिया वरगपुरिसा सिद्धत्थनरिंदसमीवे, विन्नसो च तेहिं राया, जहा-देव ! अम्हे वद्धमाणकुमाररूवाइरेगरं-
जियमणेहिं नरिंदेहिं अप्पणप्पणधूयावरणत्थं तुम्ह सगासे पेसिया ता साहेह किमिह पच्चुत्तरं ? रत्ता जंपियं-सम्म-
मालोचिऊण कहिस्सं, वच्चह ताव तुब्भे नियावासेसु, एवं भणिए अवक्कंता ते पुरिसा, नरिंदेणवि साहिओ एस
वइयरो तिसलादेवीए, एयं च आयन्निऊण हरिसभरनिम्भराए जंपियं तीए-देव ! तुम्ह पुत्तपसाएण पावियाइं
मए पाच्चणिज्जाइं, अणुभूयाइं अणुभूयपुव्वसुहाइं, जइ पुण इण्हिं तस्स वीवाहमहूसवं पेच्छामि ता कयकिच्चा
होमि, रत्ता बुत्तं-जइ एवं ता देवि ! वच्चसु कुमारसमीवं, पन्नवेसु य तं विवाहनिमित्तं, देवीए भणियं-महाराय !
न जुज्जइ पढमं चिय तत्थ मह गंतुं, लज्जापहाणो हि कुमारजणो होइ, ता सिक्खविऊण पेसिज्जंतु तप्पणइणो, एवं
बुत्ते रत्ता पेसिया कुमारसमीवे पाणिग्गहणपड्विज्जावणत्थं पणइणो, तेहि य गंतूण सविययं जयगुरूणो साहिओ
तदादेसो, तं सोच्चा भगवया भणियं-भो महाणुभाव ! किं न सुणह मम चित्तचित्तिं ? नोवलक्खह विसयविरागं ?
न जाणह गिहवासपरिहरणाभिलासं ? जेणवसुल्लवह पाणिग्गहणविसए, तेहिं भणियं-कुमार ! सुणेमो सव्वं, किंतु
अणुवत्तणिज्जं अम्मतायाण वयणं अलंघणिज्जा नियपणइणो, न खलु दुल्लहो पच्छिमकाले गिहपरिचायभावो, न यावि

पुणमणोरहा पडिक्कलिस्संति पुणो तुम्हाभिप्पेयं अम्मापिउणो, भगवया भणियं-पाणिग्गहणमंतरेणावि पुवं चिय
अब्बुवगयं मए इमं-जं न जणणीजणगेसु जीवंतेसु सबविरइं पडिवज्जिस्सामि, ता जइ एवं ठिए मइ संतोसमुव-
हंति जणणिजणगा किमकल्लाणं हवेज्जा?, का वा पाणिग्गहस्स लट्ठया?, जेण पेच्छह पयडच्चिय विवाहसमए कलस-
परंपराठवणमिसेण दंसिज्जइ उत्तरोत्तरदुहाण पावपबंधो, पज्जलंतजलणच्छलेण पयडिज्जइ महामोहवियंभणं, गयणय-
लविलसंतधूमपडलनिमेण कहिज्जइ अत्तणो लहुयत्तणं, चउमंडलगवत्तणववएसेण परुविज्जइ चउगइयं संसारभमणं,
घयमहुपमुहवत्थुहुणकवडेण दाविज्जइ सयलगुणगणदहणं, तरुणीजणमणिज्जमाणमंगलछउमेणरियंउग्गिरियंभाविज्जइ
चाउदिसमजसो, कंठावलंवियकुसुममालामायाए परुविज्जइ समीववत्तिणी दुक्खदंदोली, चंदणरसंगरागमिसेण सूइज्जइ
तक्खणं चिय कम्ममलावलेवो, कन्नगापाणिग्गहणकइयवेण दाविज्जइ अट्टकम्ममहामोह्लभंडकिणणत्थं हत्थसन्नंति ।

किं बहुणा?-जं जं विवाहसमए चिहिं पलोएमि सुहुमबुद्धीए । सो सो चित्तिजंतो रोमुद्धोसं जणइ मज्झं ॥ १ ॥
ता सुयह मोहपसरं अणुजाणह मं विणा विवाहेण । एवं चिय निवसंतं अम्मापिउनिबुइकएण ॥ २ ॥
एवं भणिए पहुणा तो ते जंयंति विणयपणयंगा । तुम्हारिसाण काउं एयं नो जुज्जइ कुमार! ॥ ३ ॥
पणइयणपत्थणाभंगभीरुणो जं सयावि सप्पुरिसा । नियकजपवित्तिपरंमुहा य पर्यईए जायंति ॥ ४ ॥
तहा-किं उसमजिणवरेणं पाणिग्गहणाइ नो कयं पुबिं? । किं वा न चक्किलच्छी परिमुत्ता संतिपमुहेहिं? ॥ ५ ॥

इय एवं जंपंतेसु तेसु कंचुइजणेण परियरिया । तिसलादेवी सयमेव आगया भगवओ मूले ॥ ६ ॥

अह सत्तट्ठ पयाइं अणुगंतुं संसुहं जिणो तीसे । आसणदाणप्पसुहं पडिवत्तिं कारवइ सच्चं ॥ ७ ॥

अण्णोणघडियकरसंपुडं च देविं पडुच्च भगवंतो । जंपइ अम्मो ! साहह आगमणं किंनिमित्तंति ॥ ८ ॥

देवीए जंपियं-पुत्त ! तुह दंसणाओऽवि किमन्नं निमित्तं ? जओ एत्तिएण वसइ जीवलो गो भरियं दिसावल्यं सुहावहा रायलच्छी संतोसमावहइ गेहं निवुइं उवजणइ पणइजणो विगयंघयारं तिहुयणं, ता किमवरं वरं सोहेमि निमित्तंति, एवमाइन्निउण भगवया चित्तिं-अहो अणाइक्खणिज्जो कोऽवि जणणीजणस्सावच्चे सिणेहो, अतुल्लं किंपि वच्छल्लं, असरिसा कावि अवलोयणाभिरइ, जं सया चक्खुगोयरगएवि मए अम्मा ईसिअहंसणेऽवि संपइ एवं संतप्पइत्ति विगप्पिऊण पुणो भणिया देवी-अम्मो ! तहावि सोहेसु किंपि पओयणं ? तिसलाए भणियं-पुत्त ! जइ एवं ता पडिवज्जसु विवाहमहूसवं, जओ एयनिमित्तं एसो पणइजणो अम्हेहिं तुज्झ पासे पेसिओ, तुह विवाहुक्कंठिओ खु नराहिवो नयरजणो य, ममावि एत्तियमेव संपयं अपत्तपुडं सुहं, पडिपुन्ना सुहाणुभावेण सेसमणोरहत्ति, भगवयावि आगम्भकालाओऽवि मम एस पइन्नाविसेसो-जं अम्मापिऊणं अप्पत्तिथकारिणी पवज्जावि न कायवत्ति चित्तिऊण निरभिलासेणवि अब्सुवगयं तयाइहं, परितुट्ठा य देवी समं परिजणेण, निवेइओ एस वइयरो नरिंदस्स ।

एत्थंतरे सिद्धत्थरायसुवड्डिओ पडिहारो निवडिऊण चलणेसु विन्नविउमाढत्तो य-देव ! समरवीराभिहाणराइणो दूओ

दुवारदेसे तुम्ह दंसणसुओ चिह्नइ, तत्थ को आएसो?, राइणा भणियं-लहुं पवेसेहि, जं देवो आणवेइत्ति भणिऊण पवेसिओ पडिहारेण, पणमिओ य तेण राया, उवविट्ठो य दिन्नासणो, पत्थावे य पुट्ठो नरिदेण, जहा-भइ ! किं आग-मणकारणं ?, दूएण भणियं-देव ! निसामेसु, अत्थि निसोभापराजियकुवेरपुरे वसंतपुरनयरे समरंगणपरितोसिय-सुरउच्छरासत्थो जहत्याभिहाणो समरवीरो नाम राया, तस्स य नियपाणनिच्चिसेसा पउमावईए पणइणीए कुच्छि-संभूया जसोयानाम कन्नगा, सा य कहं जसोयत्ति नाममणुपत्तत्ति निसामेह कारणं, किर इमीए जम्मसमए देवो समरवीरो रयणीए सुहपसुत्तो पभायसमए सुमिणं पासइ-जहाऽहं अंगरक्खिगापरिक्खित्तगत्तेहिं विविहपहरणकरोहिं सुहडेहिं परिकरिणहिं तरलतुरंगमेहिं गुडियाहिं गयघडाहिं नाणाविहपहरणजोहजुत्तेहिं पहाणरहवरेहिं परिवेढिओ सयंपि मत्तकुंजराधिरूढो उज्जाणमइगओ, तत्थ य ठियस्स सहसच्चिय याउब्भूओ हलवोलो, अंतरंतरा नच्चत्ति केऽवि सुहडा केऽवि पलायंति केऽवि य महीयले धूलीधूसरा रूलंति पडंति विजयचिंथाइं विहडंति जयतूराइं, एवं च असमंजसं दट्ठण मए इओ तओ डोछंतं गहियं नियछत्तं हत्थेण, पत्तो एगो महाविजयद्धओ, सोऽवि संठ-विओ सारिओ य, एवंविहं च सुविणं पासित्ता पडिबुद्धो संभंतचित्तो पभायसमए सुमिणपाढगे सहावेत्ता तेसिं सुमिणं परिकहेइ, तेहि य सिट्ठं-देव ! पंचहिं कारणेहिं सुमिणोवलंभो हवइ, तंजहा-अणुभूएण दिट्ठेण चिंत्तिएण पयइवियारेण देवयावसेण वा, तत्थ न सुणिज्जइ तुम्हाणं एएहिंतो केणावि कारणेण सुमिणोवलंभो जाओत्ति, राइणा

भणियं-एवमेयं, न सम्मं उवलब्धेभि कारणं, तेहिं बुत्तं-जइ एवं ता करेह सच्चं सुविणंगं, जहा दिट्ठदिईए सबसा-
मग्गिं काऊण गच्छह उज्जाणं, को दोसो?, न सुणिज्जइ कोऽवि परमत्थो, एवंपि कीरमाणे कयावि गुणो होज्जा, होज्जा,
साभिप्पाओ य किंपि एस डोळंतच्छतधरणविजयचिंधलाभोत्ति बुत्ते राइणा पडिधज्जिऊण तेसिं वयणं ताडाविया
सन्नाहेभेरी, तीए सहायन्नणेण तक्खणादेव कयसव्वसंनाहो नरवइसमीवमुवगओ समंतवग्गो परिचत्तसेसवावारो
पुरो ठिओ जोहसमूहो, पासमल्लीणा करितुरयाइणो, तओ चाउरंगवलकलिओ पहाणहत्थिकंधराधिरूढो नयरदूरव-
त्तिणं गओ नंदणुज्जाणं, तत्थ य रयणिदिट्ठसुमिणभीसणत्तणं चित्तंतस्स तक्खणफुरियवामनयणपिसुणियानिट्ठवड-
णस्स किंपि अरइविगारमणुसालीणस्स वज्झवित्तीए काणणमणुपेच्छंतस्स नरिंदस्स सच्चिय पुवदिणपेसियचारपुरिससू-
इयपत्थावो चिरपरुढवेरसाहणगाढामरिसो अमुणियतदिवसन्नरवइवइयो जुज्झसज्जो पच्चंतसामंतो दुज्जोहणाभि-
हाणो पहुत्तो उज्जाणसमीवं, दिन्नो परिवेढो, जाओ हलवोलो, लक्खियतदागमणो य निगओ उज्जाणवाहिं नरिंदो,
दिट्ठो य पडिरिउणा संगमसज्जो राया, तओ किं वियाणियं ममागमणमणेणंति खुभियचित्तेणवि दुज्जोहणेण पारद्धं
रत्ता सह पहरिउं । अह-

निसियखगकप्पियपयंडं नरमुंडसंडियाभोगं । दट्ठोदुवद्धमोगरनिप्पिट्ठुक्किट्ठरहनिवहं ॥ १ ॥

कुंतगभिन्नकुंजरकुंभत्थलगलियमोत्तियसमूहं । तक्कालमिलियवेयालक्किलिकलारावभयजणं ॥ २ ॥

निवडंतछत्तधयिचिंधनिचयसंछन्नमेइणीवट्टं । उत्तट्टसहत्थिविहम्ममाणनियपवरपरिवारं ॥ ३ ॥

करितुरयघायनिस्सरियरुहिरपूरिजिमाणमहिगतं । रणतूरखुन्नचिरकबंधपेच्छणयभीसणयं ॥ ४ ॥

इय घोरसमरवाचारमेक्केहेलाए काउमचिरेण । सिरिसमरवीररणा वड्ढो सो नागपासेण ॥ ५ ॥

भणिओ य सुमर रे इट्टदेवयं एस वट्टसि जमस्स । संपइ पाहुणगो तं दुच्चरियरहंमि आरूढो ॥ ६ ॥

दुज्जोहणेण भणियं भो नरवर ! कीस वाहरसि एवं ? । पारंभे च्चिय समरस्स सुमरणिज्जं मए सरियं ॥ ७ ॥

नियकुलकमाणुरूवं अणुचेट्टसु संपयं विगयसंको । देहेण कयं देहोडवि सहउ को एत्थ अणुतावो ? ॥ ८ ॥

एवं च आयन्निऊण पडिवन्नकरुणाभावेण समरवीररत्ना नीओ नीयमंदिं, उच्छोडिया बंधा, काराविओ ण्हाणभो-
यणाइयं, समप्पियाइं समरगहियाणि करितुरयाईणि, तेणावि अंगीकया सेवावित्ती, तओ जाओ राइणो परमसं-
तोसो, पसरिओ चाउद्दिसिं जसोत्ति, भणियं च रत्ना-अहो मम इमीए कन्नगाए पसवकालेडवि एरिसो जसो दिण्णो,
तम्हा होउ एयाए जसोयत्ति जहत्यभिहाणंति वुत्ते महया रिद्धिसमुदणं कयं एवमेव से नामं ।

अह सा चंदलेहव वट्टती पत्ता कमेण जोवणं, अन्नया पुट्टो राइणा नेमित्तिओ-को इमीए पाणिग्गाहो भविस्सइत्ति ? ,
तेणावि साहियं-देव ! सिरिवच्छलंछियवच्छयलो सयलसुरासुरनभियकरकमलो अट्टसहस्सलक्खणधरो पुरिसप्पवरो नि-
च्छियं एयाए पई होहिति, एवं निसुणिए ठिओ नरिंदस्स हियए तुम्ह कुमारो, तओ आहूओ मेघनाओ नाम सेणावइ

समप्यिया तस्स जसोकन्नगा, दिन्नो सयंवरविवाहजोगो महंतो हयगयकणगाइविच्छहो, भणिओ य जहा-भइ !
 गच्छसु तुरियं, कारेवसु पाणिगहणमहिमंति, तओ नरवइवयणाणंतरमेव चलिओ अक्खलियपायाणगेहिं एसो, अहं
 पुण एयकज्जनियेयणत्थमेव पढमं चिय तुम्ह पासे पेसिओत्ति, ता देव ! एयं तं आगमणकारणं । रत्ता भणियं-भइ !
 सम्मं कयं, अणुरूवमेयं, पयट्ठिज्ज उ अकालपरिहीणं वंछियत्थो, दूएण जंपियं-देव ! कंहं न पयट्ठिज्जइ जेण विवाह-
 लगंपि आसन्नं वट्ठइत्ति तुत्ते रत्ता सेसनरवइवरगपुरिसा सम्माणिज्जया विसज्जिया नियनियट्ठाणेसु, अन्नदिवसे य
 समागया सा रायकन्नगा वद्धाविओ नरिंदो दवाविओ तीसे निवासनिमित्तं समुत्तुंगसत्तभूमिगो पासाओ पेसिया
 रसवई काराविया अन्नावि तक्कालोचिया पडिवत्ती, पसत्थमुत्ते य कयपवरसिंगारो अणेगसामंतसुहडपरिखुडो आगओ
 मेहनाओ सेणावई, पणमिओ अणेण राया, पुच्छिओ य कुसलोदंतं, राइणाऽवि तस्स दवावियं आसणं तंवोलाइदाण-
 पुव्वयं च पुट्ठो समरवीरनेरसररीरकुसलवत्तं, सविणयं साहिया य तेण, अह विविहसंकहाहिं गमिज्जण खणमेकं रत्ता
 अब्भणुत्ताओ समाणो उट्ठिओ मेहनाओ, गओ य निययावासे, समारद्धो विवाहोवक्कमो, वंधाविया मंचा, जहोचियं
 विरइयाइं आसणाइं, निरुविया विविहकम्मेसु किंकरा, परिकप्पियं वेइगाविमाणं । तं च केरिसं ?-

मरगयमणिचच्चिकिय सुवण्णवरकलसविरयणारम्मं । अइनिम्मलंभागब्भखंभउद्धूयविजयपडं ॥ १ ॥

परिसुक्ककुसुमपुंजोवयारपरिभमिरभमरवसुहरं । निम्मलसुत्ताहलभरियचारुमणिकोट्टिमचउकं ॥ २ ॥

चउदिसिर्विमुक्कदप्पणपडिंविंवियकामिणीवयणकमलं । ठाणट्ठाणनिवेसियवरमणिपडिंहणियसंतमसं ॥ ३ ॥

गरुडंमणिपसरियकिरणपंडलविच्छुरियमहियलाभोर्यं । नवगोमयरसलित्तं व रेहए वेइयाभवणं ॥ ४ ॥

एवं च निवृत्तिज्जणं तत्कालोचियकायवं मेहनोहेण कहावियं सिद्धत्थरन्नो, जहाँ-समीवंसागयं वट्टइ पसत्थं हत्थ-
ग्गहणमुहुत्तं, ता कुमारं घेत्तूण सिग्घमागच्छहत्ति । राइणावि एवमायन्निज्जण भणिथा तिसला-देवि ! सिग्घं करेहि
कुमारस्स पुंखगाई कायवं, आसन्नो वट्टइ समओत्ति, एवं सोच्चा देवीए परमायरेण विविहण्यारेहिं मंगलसद्दपुरस्सरं
पुंखिज्जण सव्वोसहीहिं ण्हविओ कुमारो, नियंसाविओ महामोच्छं धवलदुग्गुल्लजुयलं, काराविओ सवं कायवविहिं,

अविय-गोसीससुरभिचंदणविलेवणापंडुरो जिणो सहइ । सरयनिसायरजोणहाए धवल्लिओ कंचणगिरिव ॥ १ ॥

कसिणघणकेसपासो रेहइ सो कुसुमगुच्छसंचन्नो । पण्कुरियतारतारोवसोहिओ गयणभागोव ॥ २ ॥

सट्ठाणपिणद्धविचित्तरयणनवभूसणब्भहियसोहो । जंगमभावसुवगओ रोहणसेलोव पडिहाइ ॥ ३ ॥

साभावियावि सोहा न तीरए जिणवरस्स साहेउं । किं पुण विसेसमंडणमंडियदेहस्स तत्थ खणे ? ॥ ४ ॥

एवं च कयउचियकायवे कुमारं निवेइयं राइणो, तेणावि निउत्ता नियपुरिसा-अरे पयट्टेह नगरमहूसवं मेलेह
नायखत्तियवग्गं समण्पेह कुमारस्स पसाहियसरीरं जयकुंजरं जेण गम्मइ विवाहट्ठाणंमि, जं देवो आणवेइत्ति भणि-
ज्जण गया पुरिसा, निवृत्तिओ नरिंदाएसो, तओ धवलपसाहियकरिवारूढो पवणपणचंतधयवडुग्घायपुंदररहवरा-

रूढरायलोयपरियरिओ मणहरनट्टोवयारकुसलनचंतावरोहसुंदरीनंदनिरुद्धरायंमगो वज्जंतमंगलतूरवाऊरियसयलदि-
 सासुहो सिद्धतथनराहिवेण जेठभाउगनंदिवद्धणुवराएण य अणुगम्ममाणो सिरिवद्धमाणकुमारो सायरमबलोयण-
 विखत्तचित्तेण भवणभालातलसंठिएण पुरजणेण दंसिजंतो अंगुलिसहस्सेहिं पुजमाणो आसीससएहिं अग्घविज्ज-
 माणो अक्खयसम्मिस्सकुसुमुट्ठिवरिसोहिं संपत्तो कमेण विवाहमंडवंति, अह मंडवदुवारेच्चिय पडिरुद्धो पडिहार-
 जणेण सामन्नलोओ, पविट्ठो पहाणलोएण समं अन्भिंतरमि, विलयाजणेण ओमिलणपुवगं झत्ति विविहं पसाहिया
 सा जसोयवरारायकन्नावि, तथाहि—

रमणफलंगंसि तीसे आवद्धा पंचरायमणिकंची । अइविच्छिन्ने गयणंगणंसि हरिधणुहलेहव ॥ १ ॥

नयणेहिं कज्जलुम्मिस्सिरोहिं सइदीहरोहिं निद्धेहिं । पचवखा सरयसरिच्च सहइ सा नीलनलिणेहिं ॥ २ ॥

कंठतलंसि य तीसे लोलंतो नवसरो वरो हारो । वयणिंदुविन्धमागयतारावलिलीलसुव्वहइ ॥ ३ ॥

तीसे जावयरसंपकपाडलं कोमलं चलणजुयलं । पल्लवजुयं व नज्जइ वम्महकंकिल्लसाहिस्स ॥ ४ ॥

भालतलंसि य तीसे लिहिओ गोरोगणाए वरतिलओ । तह दससु अंगुलीसु आचिद्धं सुद्धियाजालं ॥ ५ ॥

इय सविसेसपसाहणपसरंतसरीरकंतिरमणिज्जं । मंजुमणिनेउरारवसवणागयहंसखलियगई ॥ ६ ॥

मणिकुट्टिमपडिर्विवियमुहकमला मत्तकुंजरगईए । चलिथा चेडीचक्रेण परिवुड्ढा सा नरिंदसुया ॥ ७ ॥

पत्ता य तवखणागयपुरोहियारद्धजलणकम्मंमि । नववंदणमालामणहरंमि चरेवेइगामवणे ॥ ८ ॥

तत्तो पाणिगगहणं पारद्धं गीयमंगलसणाहं । सयलतइलोकदाविचपरमाणंदं महिह्णीए ॥ ९ ॥

एत्थंतरे उभयपक्खेहिवि काराविओ जणाणसुवयारो दावियाइं मिगनामिपमुहसुरहिगंधविलेवणाइं सरभसरंत-
छप्पयपयनिवेसभञ्जिराइं कुसुमदामाइं सुरहिगंधंधुरा पडिवासा भूरिकप्पूपायीपहाणाइं पूगीफलसणाहाइं नागवल्ली-
दलाइं देवंगचीणद्धचीणदोगुल्लपट्टपमुहाइं पवरवत्थाइं केयूरकुंडलकिरीडतुडियकडयाइणो आमरणविसेसा सिंधुतुर-
क्कवल्लीयवज्जरकंबोजाइसुखेत्तजायाओ तुरयवंदुराओ मंदभद्दाइविसिट्ठवंस्पसूया महागयविसेसा, एत्थंतरे जलणे हुणि-
जमाणंमि महुचयार्देहिं कन्नावराण वित्तं चउत्थमंडलगपरिभमणं, ताहे सेणावइणा आणंदुच्छलियवहलपुलएण कोडी-
बत्तीसं पवररूवस्स कणगस्स कुंडलकडिसुत्तयमणिकिरीडपमुहं तमाभरणं कचोलसिप्पिथालाइयं च कलहोयमयभंडं
अइदूरदेससंभूयचित्तचेलाइं भूरिभेयाइं कन्नाए पाणिविमोयणंमि दिन्नाइं कुमारस्स, सिद्धत्थनरिंदेणवि बहुगाए
कणगवत्थलंकारा परितोसमुच्चहंतेण वियरिया भुवणदुल्लंभा ।

एवं च सुरासुरनरपरितोसकारए वित्ते विवाहमहूसवे कए भोयणाइसक्कारंमि सट्ठाणेसु पडिनियत्तंमि रायलोए
नियनयरसुवगयंमि मेहनायसेणावइंमि ससहरकरगोरपासायसिहरसंठियस्स उचियसमए दिव्वविसयमणुभुंजमाणस्स
पुन्नपगरिसुष्पजंतचित्तियत्थस्स देवगणोवणिज्जमाणपवरवत्थगंधमल्लविलेवणालंकारस्स ववगयरोगांधंकरस्स कयाइ

सेवागतुंवुरुसमारद्धकलरवपंचसुगारसवणेण कथाइवि सायरपणचिखुरवहूपेच्छणयावलोयेणेण कथाइ गंभीरजण-
विवायनिन्नयकरणेण कथाइ जणणिजणगसमीवगमणेण भगवओ वोलेति वासरा ।

अह गएसु कित्तिएसुवि संवच्छेरेसुवि आवन्नसत्ता जाया जसोया, कालक्कमेण य पसूया सुकुमारचरणकरयलं चारु-
रूवोवसोहंतसरीरावयवं तेयसिरिं व पच्चखं दारियं, कयं च समुच्चियसमए पियदंसणत्ति से नामं, सा य सायरसुव-
लालिजमाणा पवड्डिउमारद्धत्ति । अह भगवओवि वट्टमाणंमि अट्ठावीसइमे वरिसे पालियनिकलंकपासजिणपणीय-
धम्मा अम्मापियरो कुससंथारयमारुहिता कयभत्तपच्चक्खाणा अपच्छिमसंलेहणाञ्जुसियसरीरा तइयभवे अवरवि-
देहंमि अवस्सपावियवनिबुइणो कालं काऊण अचुयकप्पे देवत्तेण उववन्ना, ततो सोगाउरेण नंदिवद्धणपमुहेण
रायलोएण कओ तेसिं सरीरसक्कारो, कयतक्कालोचियकायवे य सट्ठाणट्ठियंमि तंमि अणिट्ठं दट्ठुं अपारंतोव पत्थिओ
अत्थमणगिरिं दिणयरो, सडणिकोलाहलरेवेण रोविउमारद्धव संझा, निस्सरंतभमररिंछोलिच्छलेण अंजुजालं व सुक्कं
कमलायेरेहिं, सदुक्खमहिलाजणमणुसासिउं व पयट्ठा रयणी, विरहानलसंततगंतं रायलोयं निव्विविकामोव
समुग्गओ ताराहियो, अहापभायाए रयणीए समुग्गयंमि दिणयरे अचंतदुस्सहसोगोवेगविवससरीरं पिव विरह-
विहुरंतैउरीपरिगयं नीसेससयणवगपरिवुडं नंदिवद्धणजुवरायं पेच्छिऊण भणियं भगवया-भो परिचयह सोयं,
अणुचिंतह परमत्थं, निरत्थओ खु सोगो, जओ-अणिवारियसच्छंदसंचरणदुल्लिओ पंचाणणोव कयंतो सुमिगंगं व

खणदिट्टनट्टं संजोगविलसियं माइंदजालरमियं पिव सुहुत्तमेत्तसुंदरं पेम्मं कोदंडलट्टिच्च गुणाणुगयावि कुडिला कज्ज-
परिणई संझब्भगोच्चं अचिरावत्थाणं धणं महाभुयंगा इव दुन्निवारा विविहरोगायंका, ता सव्वहा नत्थि किंपि
एत्थ संसारे सोयंणिज्जं पडिबंधट्ठाणं वा पवळं, एकं चिय अणुसरह विवेयं परिचयह भोगपिसायं कुणह कायच्चं,
सव्वसाहारणो हि एस वइयरोत्ति । एयं ते निसामिऊण पयणुपेमाणुबंधा सिट्ठिलियसोयावेया जायत्ति ।

अन्नदिवसे य जोइससत्थपरमत्थवियक्खणनिमित्तिगोवइट्ठपसंतथसुहुत्तंमि पहाणलोणेण अणेगपयोरेहिं भणिओऽवि
जयगुरू जाव न पडिबज्जइ रज्जं ताव नंदिवद्धणो अभिसित्तो सिद्धत्थराइणो पए, पणमिओ नायखत्तियवगणेणं
बहु मन्निओ नयरकारणिएहिं परियरिओ सामंतेहिं पडिबण्णो सेवगजणेणं पूइओ पंचंतराईहिं, एवं जाओ
सो महाराओत्ति ।

अन्नया य तं सयणवग्गाणुगयं भयवं भणिउसाढत्तो-भो पडिपुन्ना मम संपयं पुव्वपडिबन्ना पइन्ना, कयं च संचं
करणिज्जं, ता सिट्ठिलेह नेहगंठिं, होह धम्मसहाइणो, अणुमन्नेह मम सव्वचिरइगहणत्थंति, अह वज्जासणिनिवडणडु-
व्विसहं निसामिऊण वयणमेयं भणियं तेहिं-कुमारवर ! अज्जवि महारायसोगो तहट्ठिओ चेव अम्हाणं नट्टसल्लं व
विद्ववइ हिययं, किं पुण अकाले चिय तुम्हेहिं सह विओगो खयक्खारावसेगोच्च दुस्सहो ?, अहो मंदभग्गसिर-
सेहरा अम्हे जेसिं उत्तरोत्तरा निवडइ दुक्खदंदोलित्ति भणिऊण रोविउं पवत्ता, बहुप्पयारं च सासिया मडुरवय-

नेहिं भगवया, कहकहवि निरुद्धवाहपवाहा य तक्कालचउगुणीभूयं संताववेगं निरुंभिऊण भणिउमाढत्ता-अहो परमे-
 सर ! करुणापरो हवसु अम्ह जीवियेवे, परिहरसु संपयं सव्वचिरइवंछं, एयंपि काऊण तुमए पाणिणो रक्खणिज्जा, ते
 य जइ पढमंपि दुस्सहविओगकरवत्तभिज्जभाणहियया रक्खिज्जिस्संति ता किमजुत्तं होज्जा?, तुम्हेहिं रहिया नूनं
 अवगयलोयणव्व असुणियगम्मागम्मविभागा वइदेसिगा इव अणाहा खणमेत्तंपि न संधीरेसो अप्पाणंति, भगवया
 भणियं-जइ एवं ता सम्ममालोचिऊण भणह-केत्तियकालेण तुब्भे ममं दिक्खागहणत्थमणुमन्निस्सह?, तेहिं
 भणियं-संवच्छरदुगेणं अइगएणंति, भगवया जंपियं-एवं होउ, परं मम भोयणाइसु न तुम्हेहिं विसेसचिंता कायवा,
 तेहिं भणियं-एवं करिस्सामो, तओ तद्दिणाओ आरब्भ परिचत्तसव्वसावज्जवावारो सीओदगपरिवज्जणपरायणो
 फासुयाहंरभोई दुक्करवंभचेरपरिपालणपरो परिसुक्कणहाणविलेवणपसुहसरीरसक्कारो फासुओदगेण कयहतथपायपक्खा-
 लणाइकायवो जिणिंदो ठिओ वरिसमेगं ॥ तहिं च-

परिसुक्काभरणोऽविडु णहाणविलेवणविचज्जिओऽवि जिणो । जुगलुगयवारससूतयेयलच्छि ससुव्वहइ ॥ १ ॥

सयणोचरोहणेहेण धरियगिहसरिसवञ्चवेसोऽवि । लक्खिज्जइ जयनाहो संजमरासिच्च पच्चक्खो ॥ २ ॥

सा कावि गिहगयस्सवि जिणस्स मज्झत्थयां पवित्थरिया । जा निग्गहियमणावि सुणीण चित्तं चमक्केइ ॥ ३ ॥

अह वच्छरपज्जंते तिलोयचूडामणी महावीरो । वारिसियमहादाणं दाउं परिचिंतए जाव ॥ ४ ॥

सोहम्मदेवलोए सुहासणत्थस्स ताव सक्कस्स । रयणपहपसरपयडं झडत्ति सिंहासणं चलयं ॥ ६ ॥
तच्चलणे ओहीए सो नाउं नाहमाणसविकप्पं । अइरभसभरवियंभियपुलउप्पीलंचियसरीरो ॥ ६ ॥
सिंहासणाओ उट्ठिय सत्तट्ठ पयाइं संसुहं गंतुं । थोउं जएक्कनाहं चित्तेउमिमं समाढत्तो ॥ ७ ॥
भयवं जिणवरवीरो आवरिसं दाणमीहए दाउं । तस्स य धणप्पयाणं जुज्झइ मह संपयं काउं ॥ ८ ॥
इय चित्तिऊण जक्खं वेसमणं आणवेइ वज्जहरो । निक्खमणदाणजोग्गं खिव कणगं जिणगिहंमिप्पि ॥ ९ ॥
इमं च सोच्चा धरणिवट्ठुंविणा मत्थएण पडिच्छिऊण सुरिंदसासणं कयकिच्चमप्पाणं मन्नंतो वेसमणो तिरि-
यजंभगे देवे आणवेइ, तेऽवि तहत्ति विणएण पडियुणित्ता जिणिंदमंदिरे तरुणतरणिसप्पगासं चामीयररासिं वरि-
संति । तओ भयवं पइदिग्रहं तियचउक्कचरचउम्मुहमहापहपेसु अन्नेसु य तहाविहट्ठाणेसु बहूणं सणाहाण य
अणाहाण य पंथियाण य करोडियाण य कप्पडियाण य वाहियाण य वइदेसियाण य रिणपीडियाण य दोगच्चसं-
तावियाण य अन्नेसिं पि धणाभिलासीण अणिवारियप्पसरं वरवरियाघोसणापुच्चयं कणगं सययं दवावेइ, तं च महया
पवंधेण दिज्जमाणं अट्ठलक्खाहिगएगहिरन्नकोडीमेत्तं एगदिणेणं निट्ठविज्जइत्ति ।
अह मगहमसूरकलिंगवंगसोरट्ठपमुहदेसेसु । अच्छिन्नसुवन्नमहापयाणओ पसरिया कित्ती ॥ १ ॥
ताहे जंपंति जणा परोप्परं तेसु तेसु ठाणेसु । चल्लह लहु भयवंतं पेच्छामो तत्थ गंतूणं ॥ २ ॥

तवणिज्जुंजलाभेण इह भवे विगयदुक्खमप्पाणं । कुणिमो परलोयंमि य तदंसणजणियपुन्नेण ॥ ३ ॥
 परभवपरूढखरदुक्खनिवहंसंततसवगत्ताणं । अन्नो नत्थि उवाओत्ति अमह एसो हवउ सरणं ॥ ४ ॥
 इय गेगेसुं मग्गणगणेसु इत्तेसु दूरदेसाओ । पूरियमणोरहेसुं अन्नेसु नियत्तमाणेसु ॥ ५ ॥
 कुंडग्गामंमि पुरे रुंदासुवि तासु तासु रत्थासु । निदयनिदलियउरो दुक्खेण जणो परिब्भमइ ॥ ६ ॥
 जत्थ निहाणे दिट्ठिं पम्हलयवलं परिक्खवइ वीरो । दट्ठइ तत्थ हिरन्नं करुणारसमच्छरेणं व ॥ ७ ॥
 अत्थिजणपरियुडे जिणवरंमि गेहंगणे भमंतंमि । परिसक्किरकप्पमहादुमच्च लक्खिज्जाए पुहइ ॥ ८ ॥
 दाणे य जायणंमि य दायगतकुयजणेण सच्चत्थ । सरिसच्चिय उल्लावा वियंभिया देहि देहिति ॥ ९ ॥
 एत्थ रयणुक्कर एसु ठग्रेह एत्थ य पवित्थरे वत्थे । पूरेह एत्थ तवणिज्जुंजए मग्गणनिमित्तं ॥ १० ॥
 इय दाणनिउत्तजणस्स पइदिणं किंकरे भणंतस्स । पुणरुत्तो वावारो जाओ संवच्छरं जाव ॥ ११ ॥
 अखलियपसरं सिरिजिणचरेण दित्तेण दुत्थियाण धणं । सेसाणवि पयडिज्जइ सिचपुरपंथो धुवं एस ॥ १२ ॥
 सच्चाचायनिवंधण धणेवि जो कुणइ मोहिओ मुच्छं । सो दुक्करतवचरणे अत्ताणं कह व संठविही ॥ १३ ॥
 ता जिणवराणुमाणेण सच्चविरइं समीहमाणेण । अन्नेणवि एवं चिय पयद्वियवं सइ धणंमि ॥ १४ ॥
 एवं च दाणे अणुदियहं पयट्टमाणे नंदिवट्ठणनरिंदो नियपुरिसे सद्दावेत्ता एवं आणवेइ—भो भद्दा ! एयस्स नय-

रस्स तेसु तेसु पएसेसु बहूओ महाणससालाओ काराविऊण विउलं असणपाणखाइमसाइमरूवं आहारं उवक्ख-
डेह, तयणंतरं च जे जहागच्छति खुहाभिभूया तण्हापरिसुसियकंठा पासंडत्था गिहत्था वा अन्ने वा तहारूया
तेसिं तहा आसत्थाणं सुहासणगयाणं हरिसुफुल्लोयणाणं तं चउव्विहं पि आहारं सवायेरेण दवावेह, तहा ठाणे
ठाणे सुंचह मंदभद्दाइजाइणो करिणो चउदिसं संठवेह सूरहत्तुरयविब्भमे पवरत्तुरंगमे सवत्थ पयडह रहनिवेह
पएसे पएसे मेळह पवरपट्टणुगए वत्थसमुदए दंसेह गामागराइणो संनिवेसे, एएहिंतो जो जं समीहेइ तस्स तं
वियरहत्ति, जं देवो आणवेइत्ति भणिऊण निगया पुरिसा, समारद्धो सवत्थ नरिंदाएसाणुरूवो उवक्कमो । अह
अनिवारियवेरिए समगणियरायरोरे अमंदाणंदसंदोहजणणे भगवओ पयट्ठे संवच्छरियमहादाणे एत्तिं अत्थो
सव्वसंखाए गओ—

तिन्नेव य कोडिसया अट्ठासीयं च होति कोडीओ । असियं च सयसहस्सा संव्वगेणं दविणसंखा ॥ १ ॥

इय मग्गणलोयं तप्पिऊण आवरिस कणगवरिसेण । पव्वज्जापडिवत्तिं कुणइ मणे जिणवरो वीरो ॥ २ ॥

अह वंभल्लोयकप्पे रिट्ठमि विमाणपत्थडे विउले । दिव्विमाणोवगया एए देवा महासोक्खा ॥ ३ ॥

सारस्सयमाइच्चा वण्णी वरुणा य गहतोया य । तुसिया अच्चावाहा अग्गिच्चा चेव रिट्ठा य ॥ ४ ॥

तक्खणविचलियसीहासणा य ओहीए नायनियकिच्चा । नियनियपरियणसहिया झडत्ति जिणपासमल्लीणा ॥ ५ ॥

विणयपणमंतमत्थयगलंतमंदारसुरहिक्कुसुमभरा । तत्थाहिं गिराहिं जिणं थोडं एवं समारद्धा ॥ ६ ॥
जयसि तुमं मयरद्धयसिंथुरखरनहरदारुणमंडद ! । चलणगगचालियाचलसंखोभियसधरणिणयल ! ॥ ७ ॥
नियकज्जपरंमुहुवुणरक्खणक्खणिय ! परमकारुणिय । नायकुलकमलवणसंडचंडमायंड ! तुज्झ नमो ॥ ८ ॥
जह लोयालोयगयंपि नाह ! तं सुणसि वत्थुपरमत्थं । तह किं कयाइ जाणइ मंदमई मारिसो लोओ ? ॥ ९ ॥
अहवा हेलुछासियकरपसरनिरुद्धतिमिरनियरस्स । सूरस्स पुरो खज्जोयगाण का होइ देहपहा ? ॥ १० ॥
तहपि य निययाहिगारं नाह ! कलिऊण नूणमम्हेहिं । सुमरणमेत्तनिमित्तेण तुह इमं सीसए किंपि (सामी) ॥ ११ ॥
पवज्जं पडिवज्जसु भवरुयसंतत्तगत्तसत्ताणं । तित्थंकर ! तित्थमणत्थमंथणं लहु पयट्ठेसु ॥ १२ ॥
अइमृदक्कुत्तित्थियदुट्ठेदेसणातिमिरनियरअंतरियं । पयडेसु मोक्खमगं निरुवमनाणप्पईवेण ॥ १३ ॥
अइभूरिचिचिच्चाइसयरयणकारुन्नवारिभरियाओ । वयणामयं पणिहउ लोओ तुह सायराउच्च ॥ १४ ॥
निस्सामन्नं सामन्नभावमायन्निऊण सयलजणो । रोमंचकंचुइंछो आकप्पं तुह कंहं कहउ ॥ १५ ॥
इय सविणयेदेवगणोवइड्ठकायवदुणुणिउल्लासो । जाओ जएक्कचक्खू सविसेसं मोक्खसोक्खमई ॥ १६ ॥
एवं च चिन्नविऊण सट्ठाणं गएसु लोगतियतियसेसु उट्ठिऊण भयवं सीहासणाओ पासवत्तिणा परिणेण अणु-
गम्ममाणो गओ नंदिवद्धणपमुहाणं नायखत्तियाणं समीचे, तेऽवि जिणमित्तं दट्ठूण सत्तट्ठ पयाइं गया सम्मुहं, कया

उचियपडिवत्ती, दवावियं महप्पमाणं सिंहासणं, निसन्नो जिणो, अणुरुवासणेसु य जहक्कमं उवविक्का नंदिवद्धणाइणो। तओ ते भगवया अमयविंदुसंदोहसुंदरीए सभावमहुराए अणुरुत्ताए गंभीराए भारईए भणिया, जहा-भो देवाणु-पिया ! पडिपुन्नो तुम्हाणमवही, जाओ पथावो मम सबविरइपडिवत्तीए, ता सहरिसं अणुमन्नह इयाणिं, सुयह पेमाणुबंधं, निहुरं कुणह विओगकायरं नियमणंति, ते य एवमायन्निउण गाढमणुपरिपूरिजिमाणगलसरणिणो कह-कहवि निरुद्धसोगावेगा अणवरयनिस्सरंतनयणंसुविंदुजालच्छलेण पणयप्पब्भारं व चिरं उग्गिरिऊण भणिउमाढत्ता-भयवं ! तुम्ह एवं भणंता वज्जमया धुवं अम्ह सवणा जं न संपत्ता बहिरत्तणं, बहरसारप्परसाणुविणिम्मियं हिययं जं न वच्चइ तडत्ति सयसिक्करत्तणं, निह्विक्खन्नत्तणपरमसंदिं व सरीरमिमं जमज्जवि न पयज्जइ रसायलगमणं, एवं ठिए य कहं पत्थुयत्थाणुमन्नणनिमित्तं पयट्टउ वराइणी वाणी, जओ-को होही विसमकज्जोयहिनिचिडिराण अम्ह हत्थावलंबो ? कहं वा ससुरासुरनरिंदसंदोहचंदणिज्जपायपंकेरुहेण तुमए विरहियं भुवणत्तयपंचं सोहिस्सइ नायखत्तिथकुलं ? अहो महामंदभागिणो अम्हे जेसिं करयलाओऽवि अवक्कमइ रयणंति, एवमार्ईणि कलुणवयणाणि मासिऊण निरभिलासा चेव निवडिऊण चलणेसु भगवओ विन्नात्तिं काउं पयत्ता—

जइवि जिणनाह ! तुम्हे पव्वजं काउमुज्जमह इण्हिं । तहविहु अम्ह सुहट्ठा पडिवज्जह निक्खमणमहिमं ॥ १ ॥
तेसिं उवरोहेणं तओ जिणिंदो इमंपि पडिसुणइ । अब्भत्थणभंगपरंमुहाइं हिययाइं गरुयाणं ॥ २ ॥

अह नंदिवद्धणनरिंदेण भणिया नियपुरिसा-अरे सिग्धं महरिहं भगवओ अणुरूवं अभिसेओवगरणं उवाह-
रेह, जं देवो भणइत्ति सम्मं पडिसुणिऊण निग्गया पुरिसा, पडणीकया अट्टोत्तरसहस्ससंखा अणेगे सुवन्नाइ-
कलसा, उवाहरियाइं समत्थपसत्थत्तिथससुत्थाइं सलिलाइं, उवणीयाओ परमोसहीओ, पणामिया गोसीसचंद-
णाइविलेवणविसेसा, एत्थंतरे चल्यासणा वत्तीसंपि पुरंदरा विम्बियमणा ओहिणाणसामत्थमुणियपरमत्थां
तक्खणं महप्पमाणविमाणारूढा वियसियसयवत्तविसाललेयणा अहचंदणाणुलित्तगत्ता नियंसियसिलंधपुप्फसुह-
फरिसपवरदूसरथणा कुंदसंखदलदगरयधवलदंतपंतिरेहतवयणा अंजणपुंजघणमसिणरुयगरमणिज्जेकसपासा भद्दजो-
वणे चट्टमाणा मऊहपडलपल्लवियचूडामणिपसाहियमत्थया अणेगरूवाभरणभूसियसरीरा सोमचारूवा छत्तचिंधाइ-
विविहक्कुहधारिणो असंखदेवकोडिचडगरपरियरिया पडहसुइंगकाहलतिलिमडुक्काइतूरवभरियंवरा जिणिंदस्स
अंतियं समागया, तिपयाहिणादाणपुव्वगं च पणमिऊण पराए भत्तीए पट्ठणो पायपंकयं कयत्थमप्पाणं मन्नंता
जिणचरणसुहाविन्नाससुंदरे निसन्ना भवणंगणे ।

अह अच्चुयामरिंदेण हरिसुल्लसंतदेहेण भणिया नियनियदेवा-भो सिग्धमेव निवत्तह जिणस्स महावीरस्स जोग्गं
महतं निक्खमणाभिसेयं, ते य एयमायन्निऊण कयपणामा अणेगकणयाइकलसे खीरोयसलिलपडिपुत्ते असंखपुप्फप-
डलाइं च अन्नं च तहप्पगारमभिसेयपाओगं पहाणवत्थुनिवहं अच्चुसुराहियस्स पणामेति, तओ अच्चुयतियसाहिवो

सयलनियदेवपरियरिओ तेहिं दिवोहिं कणयाइकुंमेहिं अट्टसहस्ससंखेहिं दिवोसहिगुंगंधंभुम्मिस्सेहिं मंदिरद्वियं भयवंतं हरिसवियसियवयणो अभिसिंचइ, एवं कमेण सेसावि सुराहिवइणो चंदसूरपज्जंता णहंवति जयगुरुं, अह तेसु मज्जणं कारुण सट्ठाणड्डिएसु नंदिवद्धणो राया कयमुहकोसविन्नासो परेणं विणएणं अच्चंतमय्यमत्तचित्तो तेहिं पुवो-वणीएहिं चामीयराइकलससहस्सेहिं गंधुद्धुरपवरतित्थजलभरिएहिं मज्जेइ जिणवरं, तहा वट्टमाणे य भगवओ मज्जणमहूसवे केइ सुरिंदा चालिति मंदं मंदं चामीयरदंडुडामराओ चामराओ केवि धारिति नियधवल्लिमाविजियसिय-संयवत्ताइं आयवत्ताइं केवि संसुहमभिट्ठाविति पणट्ठखंपणं पवरदप्पणं केवि करयलेणुव्वहंति सुगंधखीरोयसलिलपुन्न-पिहाणपउमंगंधुक्खे कुळे केवि उप्पाडैति डज्झंतागुरुघणसारसुरहिध्वधूमंधयारलंछियं पंचवन्नरयणध्वकड्डुच्छुयं केवि समुव्वहंति परिमलमिलंतालिसामलाओ दसद्धवन्नकुसुममालाओ, अन्ने देवा य देवीओ य भगवंतं अभिसुहद्वियाओ पज्जु-वासिंति । अह निवत्तियम्मि मज्जणे नंदिवद्धणो राया दोचंपि उत्तरावक्कमणं सीहासणं विरयावेइ, तत्थद्वियं च भयवंतं सेयापीयकलसेहिं णहवेइ, तयणंतरं च णं अलंकारियस्स पुव्वाभिसुहसीहासणसन्निस्सस्स सामिणो सुरभिसुक्कुमालंगंध-कासाइल्लुहियसरीरस्स गोसीससरसचंदणचच्चियंगस्स परिहियनिरुवहयफलिहुज्जलदिवेदेवदूसजुयलस्स निवद्धपंचराय-रयणकडिसुत्तयस्स कणगसेलसिलाविच्छिन्नवच्छत्थलघोलंतविमलसुत्ताहलकलावस्स विचित्तमणिखंडमंडियकुंडलुज्जो-वियगंडयलस्स रयणक्कडकिरीडविभूसियसिरस्स पंचवन्नपुण्फमालालंकियस्स पाक्खित्तसुगंधवरवासस्स भगवओ वद्धमा-

णस्स वंदिऊण चलणञ्जुयलं सुरासुरिंदा पुणो पुणो धरणि यलनामिउत्तिमंगा आसीसासएहिं शुणिउं पवत्ता, कंहं ?—
 विजयसु जएक्कबंधव ! ससुरासुरतिहुयणेणवि अजेयं । अचंतमहल्लं मोहमल्लमचिरेण लीलाए ॥ १ ॥
 मिच्छत्तमिरसुच्छिदिऊण सन्नाणसूरकिरणेहिं । पयडेसु सुत्तिमगं विमगलग्गाण भवाण ॥ २ ॥
 पालेसु समणधम्मं चिरकालं जाव निगयययावो । अजियं जिणेसु मज्झे जियस्स निवससु तुमं नाह ! ॥ ३ ॥
 तुह अणवरयं गुणनिवहकित्तणारावओ विबुहलोगो । सबत्तो दिसिवलयं पळुणउ कोऊहलाउलियं ॥ ४ ॥
 तुज्झ जसो कुसुओयरगोरो भुवणत्तएवि हिंडंतो । सबत्तो उगगयचंदविंवसोहं समुच्चहउ ॥ ५ ॥
 सिंहस्स व तुह अचंतविक्रमं पेच्छऊण तरलच्छा । भीया कुत्तिथियमिगा एत्तो दूरे पलायंतु ॥ ६ ॥
 इय आसीवायपुरस्सराहिं शुणिउं गिराहिं भुवणगुरुं । नट्टविहिं च पयट्ठिय विरयंमि सुरिंदविंदमि ॥ ७ ॥
 भावियजयगुरुविरहग्गिदूमिओ नंदिवद्धणो राया । वाहरिउं निययुरिसे पयंपिउं एवमाढत्तो ॥ ८ ॥
 भो भो देवाणुपिया ! जगपट्ठणो निमित्तं विसिद्धवेइगापरिविखत्तपरिसरं सरसचंदणुम्मिस्सद्युसिणरसालिहिय-
 चिविहसत्थियं थिरनिवेशियसपायपीढनानामणिमयसीहासणं रणंतकणयकिंकिणीमडुरनिनायमुहलियदियंतरं रंगंत-
 चिविहचिंधसयसंपुन्नं पन्नासधणुहायामं पणुवीसधणुविच्छिन्नं छत्तीसधणुमुच्चिद्धं चंदप्पभनामधेयं सीयं उवट्ठवेहत्ति ।
 तओ ते सामिवयणं निसामिऊण पट्ठिहियया तहत्ति सच्चं निवत्तंति ।

एतथंतरे तियसाहिचेण हरिसुल्लसंतहियएण । पवरमणिखंडमंडियमहतखंभावलीकलिया ॥ १ ॥

पंचविहरयणकिरणोहविहियदिसिसुरिंदकोदंडा । चंदप्पभाए तुल्ला कारविया नियसुरेंहंतो ॥ २ ॥

सुवणच्छेरयभूया सिबिगा लंबंतमोत्तिओजला । नवरं इमावि तं चिय पढमं सिबिगं अणुपविट्ठा ॥ ३ ॥ त्रिभिर्विशेषकम् ॥

अह भयवं केसालंकारेण वत्थालंकारेण आभरणालंकारेण मल्लालंकारेणालंकिओ कयच्छट्ठतवोकम्मो उट्ठिऊण आस-
णाओ अणुप्पयाहिणीकुणंतो चंदप्पहं सीयमारुहिच्चा पुच्चाभिमुहंमि सीहासणे निसीयइ, तओ भयवओ कुलमहरिया
णहाया सूइभूया गहियपवरनेवत्था हंसलक्खणं साडयं आदाय सामिस्स दाहिणे पासे भद्दासणंमि निसन्ना, एवं
अम्मधार्वि वामपासे संठिया, तहा सामिस्स पिट्ठओ एगा वरतरुणी विचित्तसिंगारागारभूयं महंतं विमल-
सुत्ताजालंबंतावचूलयं पुंडरीयदंडं छत्तं धरेमाणी ठिया, उभयपासेसु य दुवे वरविलासिणीओ धोयरुप्पपट्टधवलं
चामरजुयलं गहाय संठियाओ, उत्तरपुरत्थिमंमि य भागे एगा अचंतदरिसणिज्जा विलया निम्मलसल्लिपडिपुन्नं
सुरकरिकरेहंतनालागारं रयथभिंंगारमुव्वहंती निसन्ना, एवं दाहिणपुरत्थिमेणं एगा वरसुंदरी विचित्तमणिकिरण-
जालं सुयंतं कणयदंडं तालवंटं करयलेण कलयंती दूरुढा, पिट्ठओ य सुवणनाहस्स भगवओ देविंदा हिमरययकुंदे-
दुप्पगासाइं वेश्लियमयदंडाइं अट्टसहस्सकंचणसलागाइं सव्वरयणामयाइं कुसुमदामंदतुराइं आयवत्ताइं धरेंति,
उभयपासेसु चंदप्पहसीयाइ सोहम्माहिवो ईसाणो य अमयहिमफेणुपुंजसन्निगासेहिं चामरेहिं भयवंतं वीर्यंति ।

एतथंतरे नंदिवद्धणनरवहणो वयणेण पवररूवा निरुवहयंगा णहाया कयविलेवणा परिहिथपवरवत्था सच्चालंकार-
मणहरसरीरा चिसिट्ठवलसालिणो समवथा पुरिसा समूससियरोमंचंकुया कयसच्चकायवा नीसेसपुन्नपरिसमप्पाणं
मन्नमाणा सहस्ससंखा झडत्ति आगंतूण तं सीयमुक्खिवंति, अह वच्चंतीए तीए सोहम्माहिचई सुराहिवो दाहिणिछु-
मुवरिल्लवाहं गिण्हइ, ईसाणोऽवि देविंदो उत्तरिल्लवाहं, चमरवल्लिणो य असुरिंदा दाहिणुत्तरसिबिगाहेट्ठिल्लवाहाओ
समुच्चहंति, अवेसेसा भवणवइवाणमंतरजोइसेवेमाणिया य जहारिहं सीयमुक्खिवंति । किं बहुणा ?—

पुविं उक्खित्ता माणुसेहिं साहट्ठरोमक्खेहिं । पच्छा वंहति सीयं असुरिंदसुरिंदनार्गिदा ॥ १ ॥

गेहाओ नीहरंते जिणंमि चाउच्चिहेहिं देवेहिं । इतेहि य जंतेहि य कहमिव उच्चमसियं गयणं ? ॥ २ ॥

वणसंडोव कुसुमिओ पउमसरो वा जहा सरयकाले । सोहइ कुसुममरेणं इय गयणयलं सुरगणेहिं ॥ ३ ॥

सिद्धत्थवणं व जहा असणवणं सणवणं असोगवणं । चूयवणं व कुसुमियं इय गयणयलं सुरगणेहिं ॥ ४ ॥

अयसिवणं व कुसुमियं कणियारवणं व चंपगवणं वा । तिलयवणं व कुसुमियं इय गयणयलं सुरगणेहिं ॥ ५ ॥

वरपडहभेरिल्लरिंदुंभिसंखाइत्तरनिग्घोसो । धरणिगले गयणयले पयट्ठिओ देवमणुएहिं ॥ ६ ॥

एवं च भुवणबंधवस्स वच्चमाणस्स तण्णमयाए सच्चयणविणिम्मविथा पुरओ अहाणुपुवीए सोत्थियाइणो
अट्ठमंगलगा संपट्ठिया, तयणंतरं च पुन्नकलसंभिगारा दिवा सच्छत्तपडागा गयणतल्लुंविणीओ पवणकंपमाण-

चलाओ महावेजयंतिथाओ संपट्टियाओ, तयणंतरं वेरुलियविमलदिप्पंतदंडं पलंबकोरिंटमालोवसोहियं चंदमंड-
लाणुरूवं समूसियं दिवमायवत्तं, पवरसिंहासनं च समणिरयणपायवीढं मणिमयपाउयाजोगसंपजुत्तं बहुकिंकरनरपरि-
ग्गहियं संपट्टियं, तयणंतरं च ललिययुलियलंघणजवणगईणं लोलंतलासगललामंबरभूसणाणं कणयमयसुहनिजोगजु-
त्ताणं उज्जलगथासगमंडियकडीणं तरुणपुरिसपरिक्खित्ताणं अट्टसयं जचतुरगाणं अहाणुपुवीए संपट्टियं, तयणंतरं
च सत्तंगपइट्टियाणं भद्जाइसमुब्भवाणं सव्वलक्खणोववेयाणं कंचणकोसीपविट्ठकलहोयधवलदंताणं कंचणमणि-
तारगाभूसियाणं कुसलारोहसंपउत्ताणं अट्टसयं उत्तमकुंजराणं संपट्टियं, तयणंतरं च सच्छत्ताणं सज्झयाणं सघंटाणं
सपडागाणं सतोरणवराणं सनंदिघोसाणं हिमचंतुगयतिणिसदारुनिम्मियाणं सुसिलिट्ठचक्रमंडलधुराणं जोत्तियपव-
रतुरंगाणं रणज्झणंतकिंकिणीजालाणं वत्तीसतोणपरिमंडियाणं चावपसुहपहरणनिवहभरियाणं अट्टसयं रहाणं अहा-
णुपुविए संपट्टियं, तयणंतरं निविडपरियराणं करयलकलियविविहाउहाणं निययविक्कमोवहसियसेसभडाणं पुरिसा-
णमट्टसयं संपट्टियं, तयणंतरं च अपरिगणियसंखं हयाणीयं गयाणीयं रहाणीयं प्रायत्ताणीयं च पहावियं, तयणंतरं
च पंचवन्नकुडभीसहस्सकल्लिओ बइरमयवट्टलट्टजट्टिपइट्टिओ विचित्तच्छत्ताइच्छत्तपरिक्खित्तो रंततभमरकुसुममाला-
मंडिओ अनिलंदोलिज्जमाणघंटियापडलमणहरारावपूरियनहविवरो जसपुंजोव सुत्तिमंतो सुत्तिमगोव पयडो नियगु-
रुयत्तणेण गयणं व परिमिणंतो सायरसुरविसरसंपरिग्गहिओ जोयणसहस्ससिओ महिंदज्झओ संपत्थिओ, तयणंतरं

च अन्ने य वहवे दंडिणो मुंडिणो सिंहडिणो हासकरा खेडकरा चाडुकरा गायंता य वायंता य नचंता य रमंता य हसंता य जयजयसदं पंजमाणा मंगलसहस्साईं कुणमाणा गुणगणं शुणमाणा संपत्थिया, तयणंतरं उग्गा भोगा रायन्ना खत्तिया सेट्ठिणो सत्थवाहा पुरिसनियरपरियरिया केइ पायविहारेणं केइ रहगया केइ तुरगाधिरूढा केइ कुंज-
रपट्टिसन्निसन्ना केइ जाणजंपाणाइगया सामिस्स पुरओ मग्गओ य संपट्ठिया, तयणंतरं अन्ने य वहवे देवा य देवीओ य सएहिं सएहिं विमाणेहिं सएहिं सएहिं चिंधेहिं सएहिं परिवारोहिं समंतओ संपट्ठिया, नंदिवद्ध-
णमहानरिंदोऽवि कयमज्जणो विहियसिंगारो गंधसिंधुरखंधगओ समूसियसियायवत्तो धुवंतधवलचामरो हयगयर-
हओहसेणापरिकिन्नो पिट्ठओ भयवंतं जणुगंतुमारद्धो ।

एवं च नियनियट्ठाणगयसुरासुरनरनियराणुगम्ममाणो वद्धमाणो सत्तरयणिप्पमाणसरीरो समचउरंसंठाणसं-
ठिओ वज्जरिसहनारायसंधयणो कमलुप्पलसुरहिनीसासो जह्मलकलंकसेयरयोसवज्जियतणू देहप्पभापन्भारभा-
सुरियदिसिचक्कवालो भिंगनीलकज्जलमसलसामलपसत्थसुहुमनिवद्धनिउरंचनिचियकुंचियपयाहिणावत्तेकसो अट्ठयं-
दम्ममनिडालवट्ठो पमाणजुत्तसुंदरसवणो चावदंडकुडिलमसुहो धवलपत्तलवियसियपुंडरियनयणो गरुडाययउज्जुतुं-
गनासो विपक्कविंवाफलसंनिभाधरोट्ठो संखगोखीरमुत्तामणिधवलसुसिल्लिहसमदंतपंती पीणमंसलकवोलुजुयलो सज-
लघणत्थणियंदुडुभिनिग्घोसंगंभीरसरो दाहिणावत्तेहावलयालंकियसुप्पमाणकंकठकंदलो वणमहिंससीहसदूलपडि-

पुन्नवदृखंधो सुहुमलोमरेहतंसलपलंववाहुदंडो संजमलच्छिनिवाससुभगविसालवच्छतलो पवरोमराइरेहिरगंभी-
रनाहिसोहियमज्झभागो वट्टाणुपुवोवचियचारुजंधो सुसिलिट्ठगूढगुंफो नगनगरमगरसागरचक्कुसमच्छाइलक्खण-
लंछियचलणतलो परिचत्तपाणभोयणेषु पासायसिहरमारुढेषु चेलुक्खेवं करंतेसु पुरजणेषु कुसुमनियरं मुंचमाणेषु
गयणट्ठितियसेसु सप्यणयपणचमाणासु विज्जाहरीसु मंगलसुहलेसु वारविलयासत्थेसु दिज्जमाणेषु सव्वकासुयदा-
णेषु गोत्तमुक्कित्तमाणेषु देवचारणेषु कमेण संपत्तो नायसंडाभिहाणंसुववणंमि । तं च केरिसं ?—

पढमुम्मिछिरपल्लवसोहिछमहल्लपायवसमूहं । सवोउयकुसुमसमिद्धगंधवायंतमिउपवणं ॥ १ ॥

तरुणतरुसंडपत्तलसाहापडिरुद्धसूरकरपसरं । अचंतरम्मयागुणरंजियपरिभमियसुरखयरं ॥ २ ॥

दिसिसुहपचियंभियकुसुमपरिमलायड्डिया भमरनियरा । उज्जाणंतरविहरणपरंसुहा जत्थ कीलंति ॥ ३ ॥

जं जिणमितं नाऊण पवणडोछंतपल्लवकरेहिं । चिरकालदिट्ठियमाणुसं व तं वाहरइ तुरियं ॥ ४ ॥

मयभरपरवससिहिकलरेवेण जं सागयं व वागरइ । निवडंतकुसुमनियरुक्क्रेण अगंधं व दोवेइ ॥ ५ ॥

इय निययचंगिमाविजियनंदणुज्जाणरम्मयगुणस्स । जयनाहचलणपूयस्स तस्स का वणणा होउ ? ॥ ६ ॥

एवंविहंसि तत्थ आगंतूण सिबियाओ ओयरिऊण सामी असोगवरपायवस्स मूले सयमेव अलंकारकुसुमनिवहं
ओमुयइ, सा य कुलमयहरिया हंसलक्खणेणं पवरसाडएणं तं पेच्छमाणी छिन्नमुत्ताकलावगलंतमुत्ताहलविब्भमाइ

अंसुयाइं विणिम्सुयमाणी सदुक्खं रोयमाणी मन्नुभरखलंतक्खराए गिराए भयवंतं भणिउं पवत्ता—

कासवगोत्तुब्भूओऽसि पुत्त ! सिद्धत्थपत्थिवसुओऽसि । नायकुलनहयलामलसारयणीमयंकोऽसि ॥ १ ॥

वासिद्धसगोत्तुब्भवतिसलादेवीए कुब्बिजाओऽसि । खत्तिथजणतिलओऽसि य नवजोवणदिवेदोऽसि ॥ २ ॥

गम्भावत्थाओच्चिय अइसुकुमालोऽसि सुंदरंगोऽसि । अप्पडिमरूवलायन्नकंतिपम्भारकलिओऽसि ॥ ३ ॥

तिहुयणविक्खायजसोऽसि सयलविन्नाणनीइनिउणोऽसि । ता कहमिममइदुक्करतवकम्मं संपवज्जिहिसि ? ॥ ४ ॥

इह असिधारसरिच्छं महद्वयं वच्छ ! अणुचरेयवं । घोरोवसग्गेयणनिवहाओ न भाइयवं च ॥ ५ ॥

सुद्धुत्तुच्छभोयणवित्ती निचंपि एत्थ कायवा । गामागराइसु तहा पडिबंभइ विमोत्तवा ॥ ६ ॥

इय वच्छ ! तुज्झ साहेमि केत्तियं सुणियसयलभावस्स । तह कहवि पयट्ठेजसु जह सिवसोक्खं लहुं लहसि ॥ ७ ॥

एत्थंतरंमि नीसेससयणवग्गेण परिगओ राया । आणंदांमंदगलंतनयणवाहप्पवाहेण ॥ ८ ॥

अभियंदिऊण चरणे जिणिंदसिरिचद्धमाणसामिस्स । एगंतमवक्कंतो दुस्सहविरहग्गिसंततो ॥ ९ ॥

कुलमयहरियावयणं तहत्ति पडिसुणिय जिणवरो वीरो । सयमेव पंचमुट्ठियलोयं काउं समारद्धो ॥ १० ॥

ते य केसे सामिकरयलपलहत्थिए सुरिंदो नियदेवदूसंचलेण ईसिविणमियसरीरो सम्मं पडिच्छइ, कमेण य निवत्ति-
यंमि लोयकम्मे जिणं अणुन्नविऊण तं कुंतलकलावं मेहपडलं व सामलं दुज्जणहियं व कुडिलं खीरोयसलिले पक्खिवइ,

दिद्वतूरनिनायं मणुस्समंगलुगारहलबोलं च निवारइ, अह मग्गसिरकिणहदसमीए पच्छिमणहसमए हत्थुत्तरनक्खत्ते बट्ट-
माणे सयमेव संबुद्धो भयवं नमोत्थु णं सिद्धाणंतिकहु करेमि सामाइयं सबं सावज्जं तिविहं तिविहेणं वोसिरामिति चारित्तं
पडिचज्जए, एत्थ य पत्थावे अंवरतलट्टिएण भूमितलगएण य देवदेवि विज्जाहरनरविसेरेण विमुक्को भगवओ चाउदिसिं पि
झंकारमुहलभसलविलुप्पमाणो सुगंधियसयलजीवलोओ पिंगलियगयणमंडलो पवरवासत्तुनो, बहलधूमसिहाजालुच्छा-
इयदिसामुहो ठाणठाणेसु ठविओ डज्झंतागुरुकुरंगमयमीणुगारकप्पूरधूवघडियनिवहो, पहयाओ असंखसंखघोसु-
म्मिस्सभंभासुइंगमइलकाहलातिलिमड्डुकढक्काओ, कओ य निब्भरभरियभुवणंतरालो जयजयारवोत्ति ॥

अह चत्तवसणभूसणमल्लसरा पुरंदरेण जयगुरुणो । वामंसतले नसियं अटूसियं देववरदूसं ॥ १ ॥
नीसामन्ने सामन्नगुरुभरे तह जिणेण उक्खित्ते । काउं साहिज्जं पिव मणपज्जवणाणसुप्पणं ॥ २ ॥
ओलंबियभुयपरिहो वाढं निक्कसियमोहमाहप्पो । मेरुच्च निप्पकंपो काउस्सग्गे ठिओ भयवं ॥ ३ ॥
चउविहदेवनिकाओ नयरजणो नरवई य नमिऊण । जयनाहं भत्तीए नियनिद्यठाणे पडिनियत्तो ॥ ४ ॥

इय उत्तमगुणगणवद्धमाणसिरिचद्धमाणचरियंमि । सग्गापवगसंगमलच्छीण निवासभवणंमि ॥ ५ ॥
गब्भभावयारजम्मणदिकखाकल्लाणकहणपडिबद्धो । संपत्तो पज्जंतं चउत्थओ एस पत्थावो ॥ ६ ॥

इइ सिरिगुणचंदसूरिइए सिरिमहावीरचरिए गब्भभावयारजम्मदिक्खाकल्लाणगमओ चउत्थो पत्थावो

भाचिरमणत्थसत्थं पेहंताविहु सवुद्धिविहवेण । धीरा सहरिसमणिसं पत्थुयवत्थुं समत्थंति ॥ १ ॥

इति विभाविज्जं व भविस्सोवसग्गवग्गसंग्गासंबुद्धमाणसो महाधीरजिणवरो गंभीरिमाइगुणरयणागरो दुरुज्झियनीसेसवसणोवि वासवोवरोहधरिएक्कचारुवसणो मग्गगणपूरिआसोऽवि निवाणकरो मुक्कतुरयचारोवि दूर-
दमियदुद्धिदियासो सकलत्तोऽवि परिचत्तपरिगहो परिहरियकरिवरोवि मत्तकुंजरगमणो भयवं आपुच्छिऊण अहास-
न्निहियं नायवग्गं नायसंडवणाओ निग्गओ, कमेण य अतुरियं जुगमिच्चनिहितचक्खुपसरो मुहुत्तावसेसंमि वासरे
कुम्मारगासं नाम संनिवेसं पाविओ, ठिओ य एगंते काउसग्गेणंति ।

इओ च सिद्धत्थरायवालवयस्सो कुंडगामपुरवत्थवो महाज्यूवसणविणासियासेसतहाविहद्वनिचओ भोगोव-
भोगलालसो असंपज्जंतवंच्छित्थो सोमो नाम वंभणो झीणविहवत्तणेण अचयंतो परिचियजणमज्झे निवसिऊण
गिहे मोच्चूण वंभणिं गओ वइरागराइसु दवोवज्जणनिमिच्चं, तत्थ य अइनिविडत्तणओ अंतराइयकम्मस्स अचंतपव-
लत्तणओ असायेवयणिज्जस्स निप्फलत्तणओ पुरिसयारस्स अवस्सं भवियद्वयाए तहाविहभावस्स सुचिरं कालं परि-
भमियस्सवि तेसु तेसु ठाणेषु न तस्स काणकवड्डयमेत्तावि संपत्ती जाया, समइक्कंताणि य आसापिसायनडियस्स
वह्मइं वच्छराइं, अपणया य—

धवलवलायादीहरवणो अह तरलियविज्जुलियनयणो । कलियसुरायचावो अंजणगिरिसिगसारिच्छो ॥ १ ॥

परिमुक्कगजिघोरट्टहासहयविरहिद्यवावारो । वरिसायालो वेयालदारुणो झत्ति संपत्तो ॥ २ ॥

तं च दट्टूण सो सुमरियनियकलत्तो तक्कालवियंभमाणनीलकंठरचसवणचउगुणीकयउक्कंठो दीहं नीससिऊण चलिओ
अचिलंबियपयाणेहिं सनयराभिमुहं, अइदूरत्तणेणं भगस्स दुब्बलत्तणओ सरीरस्स असमत्थत्तणेणं सिग्घगमणस्स
मासपंचमपज्जंते संपत्तो कुंडगामे नगरे, पविट्ठो नियगिहे, संभावियविट्ठत्तदद्वाए अब्भुट्ठिओ पणइणीए, दिण्णं
आसणं, पक्खालिया चरणा, पुच्छिओ सरीरकोसल्लं, वाहियं सरीरं, दंसिओ पणयभावो, भोयणकाले य उवट्ठा-
विया य कंठिगाइ हट्ठे विणिवट्टिऊण विचित्ता रसवई, काराविओ भोयणं, तडुत्तरकालं ठिओ सयणिज्जे, वंभणीवि
पहिट्टुहियया समीवमागया तस्स, आरद्धा य पुच्छिउं, जहा-अज्जपुत्त ! केसु केसु देसंतरेसु परिममिओ एत्तियं
कालं ? केत्तियं वा दविणजायमज्जियंति ? , तेण भणियं-पिए ! केत्तिए साहेमि देसे ? , किं वा कहेमि दविण-
ज्जणं ? तहाहि—

सिरिपच्चयइरागरसमुदपरतीरोहणगिरीसु । रसकूविगासु विवरेसु भुयंगभीमेसु विविहेसु ॥ १ ॥

भमिओ एत्तियकालं दव्वपिवासाए णेगठाणेसुं । विहिओ य खन्नवाओ धमिया य सुवणणपाहाणा ॥ २ ॥

अंजणसिद्धिनिमित्तं दिवोसहिणो निरूविद्या बहुसो । विहिया नरिंदसेवा विद्याणिद्या मंततंताई ॥ ३ ॥

असिचावकुंतचक्काइएसु सत्थेसु जणपसिद्धेसु । पकओ परिस्समोविहु किं किं अहवा मए न कयं ? ॥ ४ ॥

तहविहु पिए ! न जाया भोयणमेत्तावि मज्झ सामग्गी । तुह दंसणतण्हाए नियत्तिओ केवलं इण्हि ॥ ५ ॥

इमं च आयणिऊण वज्जताडियव सुसियव सा माहणी कसिणवयणा कोवफुरंताहरा रत्तनयणा भणिउमाहत्ता—आ पाविट्ट ! अवलक्खणसिरसेहर ! चाहणसरिच्छ ! निब्भग्गनिडाल ! जइ एवं ता कीस एत्तियं कालं कडुघोसेडीफलाइं बुक्कमाणो ठिओऽसि !, किं निरास ! तत्थ वसंतेण तुमए इमावि वत्ता न निसामिया ? जहा पोक्खलावट्टग्गमेहोव अणवरयकणगघाराहिं सिद्धत्थनरिंदनंदणो संवच्छरं जाव वरवरियापुव्वगं वरिसिओत्ति, किन्न पेच्छसि पुरओ आज-म्मदारिदियावि रहतुरयवाहणा परिहियदिवाभरणा कारियउचुंगभवणा नियपणइणीपरिगया जिणप्पसाएण विल-संति ?, किं वा न दिट्ठा पडिपुणमणोरहा उवलद्धकणयरसिणो सगिहेसु पडिनियत्तता देसंतरागयजणा ?, वंम-णेण भणियं—पिए ! दूरदेसंतरनिवासत्तणेण नो सुणियमेयं मए, किं करेमि विपरंमुहो हयविही दीहकालमणुम-वियवा विसमदसा, वंभणीए भणियं—अज्जवि लडुं गच्छसु तस्स सगासे, करुणापरो खु सो भयवं निच्छियं तुमए मग्गिज्जमाणो किंपि दाविस्सइत्ति, एवं निसामिऊण धाविओ महावेगेण जिणाभिमुहो वंभणो, आपुच्छंतो पत्तो कुमारगामं, दिट्ठो काउस्सग्गठिओ सुरवइनिहित्तसुंगधनुणपरिमलुम्मिमलंतच्छप्पयछणदेहो भयवं जिणवरो, तिपया-हिणिक्काऊण पणमिओ परमायेणं, विणत्तो य जहा—देव ! निसामेसु मम वत्तं—

कंठभंतरपक्खलियजीहमफुडक्खराए वाणीए । को को न पत्थिओ नाह ! दाणविपरंमुहोवि जणो ? ॥ १ ॥

कथं न वसिओ पहधूलिधूसरो देव ! पहियगेहेसुं । हयउयरपूरणट्टा किं वा न कयं कुकम्ममवि ? ॥ २ ॥
दविणोवज्जणेहं लहुं पविट्ठो कयंतवयणेवि । नेवत्थंपि नडेण व तं नत्थि मए न जं धरियं ॥ ३ ॥
इय दुरेदेसविहरणपरिसमुपपन्नविविहरोगस्स । विगओ एत्तियमेत्तो कालो मम मंदपुन्नस्स ॥ ४ ॥
संपइ पुण धरिणीए आगयमेत्तस्स साहिंयं एयं । जह संवच्छरसीमं दिन्नं तुमए महादानं ॥ ५ ॥
केसिंपि नगरपट्टणगामागरपवरदव्वभंडारा । अन्नोसिं मयजलगंधवंधुरा उट्टुरा करिणो ॥ ६ ॥
अन्नोसिं पारसवब्बरउलवलहीयसंभवा तुरया । केसिंपि जचकंचणजडिया वरभूसणुग्घाया ॥ ७ ॥
इय संकप्पियभूरिपभेयदानेण कप्पतरुणव्व । निम्महिया नाह ! तए तण्हा मेहेण व जणाणं ॥ ८ ॥
एक्कोच्चिय दुग्गयलोयतिलोयभूओ ठिओ अहं विहलो । पुव्वभवजणियदुव्विसहडुडकस्माणुभावेणं ॥ ९ ॥
करुणारसवरिसणसित्तदुक्खसंतत्तसव्वभुवणवण ! । ता पसिय पणयवच्छल ! पूरेसु मणोरहं मज्झ ॥ १० ॥
तुज्झ पयकमलसेवावियंभियं सगमच्चपायाले । जं कीलंति जहिच्छं सुरवइनरनाहदणुवइणो ॥ ११ ॥
सिद्धत्थरायनंदण ! तुमएऽविहु जइ कहंपि चत्तोऽहं । पायालनिवडियस्स वि नत्थि धुवं ता मम परित्ता (धरिती) १२
एमाइ दीणयावसगलंतनयणंसुधोयवयणेणं । तह तेण विन्नविज्जइ जह भिज्जइ वीयरागोऽवि ॥ १३ ॥
भगवयावि एवमायणिणऊण समुच्छलियापरिकलियकारुन्नपुणचित्तेण भणियं—भो भो देवाणुप्पिय ! परिचत्ता-

सेससंगोऽहं संपयं, तुमं च अचंतदोगच्चभरविदुरियसरीरो, अओ जइवि असारिच्छमेयं तहावि गिणहसु इमस्स देव-
दूसस्स अद्धंति, जं सामि ! आणवेइत्ति भणिऊणु हरिसवसुगयवहलपुलओ वंभणो वत्थस्स अद्धं गहिऊण कयप्प-
णामो अणुचिंततो पुणो पुणो सामिस्स अपुवसु दारत्तणं गओ नियगेहं, दिट्ठो य वंभणीए, पुच्छिओ परमायेरणं,
साहिओ तेण देवदूसद्धलामो, जाओ वंभणीए परमसंतोसो ।

अन्नदिवसे य तेणवि समप्पियं तं दूसद्धं दसिगाबंधणत्थं तुन्नागस्स, तेणवि तारिसमदिट्ठपुव्वं पेच्छिऊण
पुच्छिओ सो वंभणो-भइ ! तुमए कहिं लद्धमेयं ?, न जेण एसिदूसइं महीयले दीसंति, वंभणेण भणियं-मुद्ध !
भगवया दिण्णंति, तुण्णागेण भणियं-वीयंपि खंडमाणेहि, जेण उभयखंडमीलणेण तुण्णेमि एयं, पडिपुण्णं व दीणा-
रलक्खसुल्लं पावेइ, अद्धेण य तुज्झ मसंपि दव्वं भविस्सइत्ति, वंभणेण भणियं-कहं पुण दुइज्जयं वत्थद्धं लभि-
स्सामि ?, जिणसमायारविद्यक्खणेण भणियं तुन्नागेण-जया खाणुगाइफरिसेण सामिखंधेसाओ निवडइ
तया गिण्हज्जासि, एवं सोचा सो तल्लोभेण लग्गो भगवओ पिट्ठीए, जहा य तस्स तल्लामो भविस्सइ
तहा पुरओ भणिस्सामि ।

अह कुम्भारगाभवहिया पडिवन्नपडिमस्स पलंविद्यभुयस्स भगवओ महावीरस्स समीवे सयलदिणवाहपरिस्संते छुहा-
मिहए चरमाणे वसहे भलाविऊण एगो अचंतपावसंगयसरीरो विणयणयविण्णाणजा(ना)णविचज्जिओ गोवालो गावी-

दुहणनिमित्तं गओ गाममज्झे, तत्थ द्वियस्स वाचारंतरवावडणेण लग्गा महती वेला; ते य वईल्लगा खणमेकं भगवओ समीवे चरिऊण खुहाभिहयसरीरा सणियं सणियं तिणभवखणं कुणमाणा पविट्ठा अडविं, सो य गोवालो खणंतरेण आगओ भगवओ समीवे; वसहे अपेच्छंतो पुच्छिउमारद्धो-भो देवज्जया ! जे तुह मए भलाविया पुवं वसहा ते साहेसु कत्थ गयत्ति ? ,सामीवि असुणिंतोव तुण्हक्को ठिओ, तेणावि नायं-नूणमेसो महाणुभावो न जाणइत्ति, तओ गिरिकंदरेसु य नईसु य निज्झरेसु य महातरुगहणेसु य गामंतरालेसु य अन्नेसु य विविहप्पएसेसु य गोसामि-यभयभीओ विमणहुम्मणो तं मंगणं काउमारद्धो, ते य वसहा सुचिरं सच्छंदप्पयाणेण उवसंतल्लुहावेयणा पुणोवि समागया तत्थेव पएसे, भयवंतं दट्ठुण रोमंथता य ठियत्ति, सो य गोवालो अणुबलद्धगोणपउत्तिविसेसो चउपहर-रयणिजागरपरिमिलाणनयणो रेणुभरधूसरियसरीरो खानुकंटगाइपरिविहओ सुचिरं परिभमिऊण वलिओ तेणेव पएसेण, दिट्ठा य ते सामिणो समीवे सुहनिसन्ना नियवसहा, अह रोसारुणियच्छो फरुसगिराए भयवंतं तज्जिउमा-दत्तो, कहां चिय ?—

देवज्ज ! दुज्जणो इव दावेसि पसंतवत्थनेवत्थं । अन्भिभतरओ पुण चित्तकुडिलया एरिसी तुज्झ ॥ १ ॥

जं गोविऊण हरणट्ठया तुमं मज्झ संतिए वसहे । नूणमियाणिं गच्छंतओऽसि जइ मं न पेच्छंतो ॥ २ ॥
तावित्थ चंगिमा तुह वयस्स ! अरि भल्लिमा विवेयस्स । गोमट्टत्तणमणं किंपिय दक्खिन्नभावस्स ॥ ३ ॥

मन्ने पलंवियमुओ निरुद्धनीसेसवज्झवावारो । तं जणमुसणनिमित्तं उवायजालं विचित्तेसि ॥ ४ ॥

इय दुव्वयेणेहिं तज्जिऊण सो दावणेण हणिउमणो गोवालो वेयालोव धाविओ भयवओऽभिमुहं, एतथंतरे सोह-
म्मसभासीहासणनिसणणो सहस्सनयणो सामिस्स सुहविहारोवलंभनिमित्तं ओहिं पउंजइ पेच्छइ य भयवंतं पडुच्च
वेगेण धावमाणं तं गोवयं, तओ तत्थट्ठिओऽवि तं थंभिऊण सक्को दिव्वाए देवगईए उइणणो जिणसमीवे, तज्जि-
उमारद्धो य तं गोवालंयं, जहा-रे दुरायार ! पुरिसाहम ! पसुनिव्विसेस ! नूणं एयाण वसभाण चेव पुणेणेहिं न
भक्खेसि तूमं तिणाइं, जो एयं सिद्धत्थनरिंदनंदणं परिचत्तकरितुरयपाइक्कसंदणं संपयमेव गहियपव्वजं नियधम्मक-
ज्जसज्जं सममुणियतणमणिं वद्धमाणमहामुणिं पि न सुणेसित्ति, एवं निब्भच्छिऊण तं सक्को तिपयाहिणीकाऊण भय-
वंतं वंदेइ, सिरनभियकरकमलो य विन्नवेइ-भयवं ! तुम्ह दुवालस वरिसाणि जाव समणमेत्तेणवि दुक्खजणगा इयर-
जणजीवियंतकरणखमा पवरसूराणवि लोसुद्धोसजणगा उग्गा उवसग्गवग्गा भविस्संति, ता कुणह पसायं, अणु-
मन्नह एत्तियं कालं मम, जेण समीवट्ठिओ वेयावच्चं भे करेमित्ति, एयं च आयन्निकुणुस्सारियकाउसग्गेण भणियं
भयवया, जहा-भो भो देविंद !

तुह असरिसभत्तिमहाभरस्स जुज्जइ इमं न संदेहो । किं तु न भूयं एयं नो भवइ न भावि कइयावि ॥ १ ॥
जं तित्थयरा तुम्हारिसस्स निस्साए पुव्वकयकम्मं । खवइंसु खविस्संति य खवेति वा निच्छियं सक्क ! ॥ २ ॥

अह परसामत्थेणवि जइ कम्मक्खउ घडेज्ज ता विहलो । सिरलोयंभचेराइविविहतचरणवावारो ॥ ३ ॥
अइसंकिलिठ्ठचित्तत्तणेण दढवद्धरसचिवागाणं । सयमणुभवणं मोत्तुं कम्माण ण णिज्जरणमत्थि ॥ ४ ॥
एगोच्चिय सुहमसुहं एस जिओ सहइ कम्मवसवत्ती । अवयारुवयारकरा तस्सेव पभावओ हुंति ॥ ५ ॥
ता जे पुवं सिद्धा जे सिद्धिस्संति जे य सिद्धंति । ते नियवीरियकम्मक्खएण अन्नोऽत्थि नोवाओ ॥ ६ ॥
एवंविह विविहमहोवसगवगं वियाणिउं पुंविं । पडिवन्नोऽहं संजममेत्तो का तेसु मम गणणा ? ॥ ७ ॥
इय सुरनाहं विविहोवउत्तिजुत्तीहिं वोहिउं भयवं । काउस्सगंगमि ठिओ नूणं मियभासिणो गरुया ॥ ८ ॥

एत्थ य पत्थावे भयवओ चेव जणणिभगिणीए पुत्तो कयतहाविहघोरबालतवविसेससामत्थोवलद्धवंतरसुरभवो सि-
द्धत्थो नाम देवो समागओ तं पएसं, सो य भणिओ सुरिंदेण जहा-भो सिद्धत्थय ! एस भयवं तुह आसन्नसयणोत्ति
एगं कारणं, वीयं पुण ममाएसो, ता सव्वा पासट्ठिओ सामिस्स मारणंतियमुवसगं पडिक्खलेज्जासित्ति, सोऽवि
एयमायन्निऊण देविंदसंभासणजायपरमतोसो तहत्ति पडिसुणइ, पुंदरोऽवि सट्ठाणं गओ । अह जायंमि पभायसमए
भयवं चलिओ तओ ठाणाओ, कमेण य पत्तो कोल्लागसंनिवेसे, तत्थ य बहुलो नाम माहणो परिवसइ, तस्स य
गिहे महुसवो समारद्धो, निप्फाइया रसवइ, जेमेइ सयलजणो, एत्थंतरे भयवं सुणियभिव्वासमओ अतुरियं
असंभंतो छट्टुपारणगे पविट्ठो भिक्खानिमित्तं गाममज्झे, उच्चनीयगिहेसु य परिभमतो संपत्तो बहुलस्स मंदिरं, दिट्ठो

य अणेण अप्पडिमरूवो भयवं भवणंगणगओ, तं च दट्ठण चित्तिउमारद्धो-अहो इमस्स महासुणिणो सरीरलाव-
णया अहो निरूवमरूवया अहो सयललक्खणपडिपुणया अहो पसंतायारत्तणं अहो सस्सरीयत्तणं, निच्छियं न
होइ एसो सामन्नगुणो, ता धन्नोऽहं जस्स मम गिहमणुपत्तोत्ति परिभाविंतो उच्छलियवहलपुलयजालो सुत्ताहलालं-
किओव उट्ठिऊण परमायरेण वयमहुमिस्सं पायसं भगवओ पणामेइ, भयवंपि निच्छिइ चक्कुसलंछणलंछियं
पसारोइ करकमलं ।

अह पाणिसंपुडे वंभणेण खित्तंमि पायसे पवरे । गयणयले सुरनिवहा ओयरिउं भत्तिभरभरिया ॥ १ ॥

चायंति केवि जयदुंदुहीओ अन्ने सुयंति कुसुमाइं । चेलुक्खेवं केवि य करंति अन्ने शुणंति जिणं ॥ २ ॥

गंभीरगुरगिराए अहो सुदाणंति केइ द्योसंति । अच्छिन्नकणयधाराहिं हरिसिया केइ वरिसंति ॥ ३ ॥

सेसोऽवि गामलोओ तहाविहं पेच्छिऊण अच्छरियं । विम्बियहिययो सहसा जिणस्सगासं समल्लीणो ॥ ४ ॥

किं बहुणा ?—भयवं पायसलाभेण निबुओ माहणोऽवि कणणेण । विम्बियरसेण लोगो एवं जाओ महाणंदो ॥ ५ ॥

अह चम्मचक्खूहिं अपेहिजंतो पारिऊण भयवं अन्नत्थ विहरिओ । गामाणुगामेण परिभमंतस्स य सामिणो

पवज्जासमयसुरविखत्तकुसुमवासुद्धुन्नगंधवासियंमि सरीरे कयज्झंकारचा निरंतरं परिसुक्खवणकुसुमभयरंदा भमर-

नियरा पीडं उप्पायंति, चिरनिच्चूसेणेण य किंचि अपाचमाणा रोसेण नहेहिं विंधंति सुहेहिं खाइंति, वसंतसमए

रोमकूचनिगयं सिणेहमापिबंति, सरीरमारूढा य समं विहरंति, गामतरुणायवि तेण गंधेण आयरसियचित्ता भणंति-भयवं ! अमंहं पि देहि इमं गंधजुत्तिं, सुरभो तुल्ल सरीरगंधो, तथा नवनीलुप्पलपलाससरिच्छमच्छिजुयलं सुरभिनीसाससुभगं सुहकमलं रूवसंपयं च दट्ठण मयरद्धयसरपहारजज्जरियहिययाओ गामतरुणीओ गामाणुगामं परियट्ठमाणस्स भगवओ निवासट्ठाणं पुच्छंति, बहुप्पयारं उवसगंति यत्ति । एवं पवज्जादिणाओ आरब्भ चत्तारि मासा समहिआ जाव सुरनिहित्तवासपच्चइया दुट्ठभमराइणो उवसग्गा जायत्ति ।

अन्नया तेलोक्कतिलओ सयलगुणनिलओ सामी परियडंतो गओ मोरागसंनिवेसे, तत्थ दूइज्जंता नाम तावसरूव-धारिणो पासंडिणो परिवसंति, तेसिं च अहिंवई जलणसम्मो नाम, सो य भित्तो सिद्धत्थरणोत्ति पुवनेहेण सामिं दट्ठण सागयंति भणिऊण संसुहसुवट्ठिओ, भयवयावि पुवपओगेण चेव बाहा पसारिया, तओ कुलवइणा संसंभं आपुच्छिऊण पुववत्तं भणिओ भयवं-कुमारवर ! एत्थेव निवसह किंचिकालं, निप्पच्चवाओ एस आसमो, न य कोइ ज्ञाणविग्घकारी, वासारत्तस्सवि समुचिओत्ति, ता सबहा जइ संपयं न ठाउकामो तहावि वासासु इहावसेजासित्ति बुत्ते सामी तव्वयणं पडिसुणिय तत्थेव एगराई बोलेइ । तयणंतरं च—

पणट्ठपेमबंधणो असंखदुक्खनासणो । पसंतचित्तसुंदरो सथेज्जजित्तमंदरो ॥ १ ॥

बहूवसग्गसंगओ गओ व मंदगामिओ । मिओव सुन्नसेवओ व(पि)उव रक्खणुज्जुओ ॥ २ ॥

मडवखेडकच्चे अणेगलोगसंकडे । सुरिदविंदवदिओ परिंभेइ सामिओ ॥ ३ ॥

एवं च हिंडमाणस्स जयगुरुणो पज्जंतमणुपत्तो गिहसमओ, उवागओ वासारत्तो, तओ थणियसइं कुणमाणेसु सजलजलहरेसु मंदं मंदं निवडंतीसु चारिधारासु नियनियगेहमणुवचंतेसु पहियजणेसु माणससरं सरंतेसु रायहंसेसु सामी पडिनियत्तिऊण समागओ तत्थेव मोरागसंनिवेसे, दिट्ठो कुलवई, समप्पिओ तेण पेमसच्चस्समुच्चंतेण संछन्नो मंडो, बुत्थो तत्थ पलंवियमुओ काउस्सग्गेण भयवं, एवं वचंति वासरा ।

अह वट्टमाणंमि पढमपाउसारंभे निट्ठिएसु चिरं संचियबुसतणपलालपमुहचारिविसेसेसु अणुग्गमंतेसु अभिणवत-
णार्हसु कत्थवि किंपि भक्खणिज्जं अपावमाणाइं गोरूवाइं छुहापरिगयाइं आगंतूण तेसु तावसग्गिहेसु छायणतण-
भक्खणत्थमल्लियंति, तावसावि निट्ठुरलट्ठिप्पहारेण ताणि कुट्टिऊण निट्ठाडिंति, दुवारट्ठिया य निच्चंपि सव्वायेण
रक्खंति नियउडवए, गोरूवाणि तेहिं ताडियाणि इओ तओ परिब्भमिऊण अविज्जमाणरक्खणं भगवओ मंडं
उवहवेंति, तावसावि नियग्गिहट्ठिया तं विलुप्पमाणं पेच्छिऊण भयवओ उवरि परिओसमुच्चंति-अहो अहे निय-
उडवए रक्खेमो, एस पुण समणो मणांगंमि न रक्खेइ, ता किं करेमो?, कुलवइणा धरिओत्ति न किंपि धारिज्जइ
पच्चक्खं फरुस्समुल्लविउंति, एवं च पइदिणं जायमाणे परूढगाढमच्छराणुबंधा एगया गया ते कुलवइसगासे, सोवा-
लंभं च भणिउमाढत्ता, जहा-सामि !

अह गिहे तुम्हेहिं कोऽविहु सुक्को उ जो इसो समणो । सो अचंतं नियकज्जकरणपडिबद्धवावारो ॥ १ ॥
 एयंपि नो वियाणइ गोरुवेहिं जहागिहं एयं । पइदिणसुवहविज्जइ रक्खइ न खणंतरं एगं ॥ २ ॥
 किं आलस्सं अहवाऽणुकंपणं अहव होज्ज व उवेहा । निहक्खिणत्तं वा न याणिमो तस्सऽभिप्पायं ॥ ३ ॥
 अहवा मुणित्ति गोरुववारणं नो करेति स महप्पा । गुरुदेवपूयणपरा अम्हे समणा न किं होमो ? ॥ ४ ॥
 हे कुलवइ ! जइ रुट्ठोसि अम्ह तं उडवयं हणिज्जंतं । एएणावि पओगेण वंछसे ता लहुं कहसु ॥ ५ ॥
 जेण विमुंचामो तस्स संकहं को मए सह विरोहो ? । रुट्ठोवि तोसणिज्जो जो किर को तेण सह माणो ? ॥ ६ ॥
 तुह चित्तवित्तिमवियाणिज्जण णूणं मुहा कओ रोसो । तस्सोवरि अम्हेहिं का वा मूढाण होइ मई ? ॥ ७ ॥
 इय ईसाभरसम्मिस्सकोवदरफुरियअहरमुल्लविउं । दूइजंतगमुणिणो कुलवइपासाउ निक्खंता ॥ ८ ॥

ते य तथा गच्छमाणे दट्ठूण कुलवई सच्चारयेण वाहराविज्जण भणिउमाढत्तो, जहा-भो महाणुभावा ! किमेवं
 परिकप्पह ? , को मज्झ दोसो ? , मए वयंससिद्धत्थरायपुत्तोत्ति कलिज्जण एयस्स मुणिणो गउरवं कयं, किं मए एयं
 वियाणियं ? जं एसो एवं नियगेहसुवेहिस्सइ, एवं ठिएवि तथा करिस्सं जहा न विणस्सइ तुम्ह आसमो, एत्तो
 मा वहिस्सह संतावं, मा चिंतिज्जह कुविगप्पजालं, तुम्हां अवारो को मम पिओत्ति ? , एवमायन्निज्जण जायसं-
 तोसा गया ते जहागयंति, कुलवईवि गओ जिणसगासे, दिट्ठो उडवओ निलुत्तपुंखपुडविडओव नामभेत्तावसेसो,

तं च पेच्छिऊण चिंतियं कुलवइणा—अहो सम्मसुवइड्डं तेहिं वरागेहिं, मए पुवं वियाणियं—मच्छरेण एए जंपंति,
इयानिं पुण एयदंसणे जहावट्टियं नायंति, एवं संकप्पिऊण भयवंतं भणिउमाढत्तो—

चउरासभगुरुणो तं सुओऽसि सिद्धत्थभूवइस्स जओ । तइलोक्कपिहियकित्ती ता तं पइ किंपि जंपेमि ॥ १ ॥

तुज्झ पिउणावि एयं आसमपयमाथरेण निचंपि । रक्खियमिणिह पुत्तय ! पालेयवं हवइ तुमए ॥ २ ॥

दुड्डाण ताडणं चिय तुम्ह दयं तेण मुक्कपरिसंको । कीस न गोरूवाइं तणभक्खणओ निवारेसि ? ॥ ३ ॥

सउणीवि वच्छ ! नियनीडरक्खणं कुणइ सव्वजत्तेणं । भूभारधरणधीरो किं पुण तुम्हारिसो पुरिसो ? ॥ ४ ॥

अम्हारिसजइजणरक्खणड्डया निच्छियं पयावइणा । तुम्हारिसा महायस ! निष्फाइज्जंति सण्णुरिसा ॥ ५ ॥

अन्नह गोरूवेहि व दुड्डेहिं धम्मपच्चणीएहिं । उवहम्मंता अम्हे कं सरणं किर पवज्जंता ? ॥ ६ ॥

ता गिहनाहोव कुमार ! वससु तुह संतियं इमं संघं । पइं दिट्ठे पियमित्तं सिद्धत्थनिवं सेरेमि अहं ॥ ७ ॥

इय संथवणोवालंभणयसिक्खवणगब्भवयणेहिं । भणिऊण जिणं सो तावसाहिवो पडिगओ सगिहं ॥ ८ ॥

अह तेसिं भयवं तो सुणिउं अप्पत्तियं महासत्तो । जयजीवहिएक्करओ चित्तेउमिमं समाढत्तो ॥ ९ ॥

मज्झ निमित्तेण इमे पाविंति अवोहिवीयमइभीमं । ता सव्वहा न जुत्तं एत्तोऽवत्थाणमिह काउं ॥ १० ॥

इय सुवणगुरू संचिंतिऊण जाएऽवि वरिसयालंमि । ठाणाओ तओ चलिओ परपीडावज्जिणो गरुया ॥ ११ ॥

एत्तो चिय अन्नोहिंवि परपीडावज्जणंमि जइयवं । जहसत्तीए एयं जम्हा संद्धम्मसारोत्ति ॥ १२ ॥

एयं चेव भगवया वेरगगकारणमुव्वहंतेण तिवा पंच अभिग्गहा गहिया, तंजहा-अचियत्तकारए उगगंमि न वसियच्चं, निच्चं उस्सगं करेयच्चं, एगदुवयणवज्जं मोणेण ठाइयच्चं, पाणिपत्ते भोत्तच्चं, एगे किर सूरिणो एवं भणंति, तं च किर कहं?—सपत्तो धम्मो पन्नवेयवोत्ति भगवया पढमपारणगे परपत्तंमि मुत्तं, तेण परं पाणिपत्तंमि जाव छउमत्थोत्ति, गिहत्थो य न अब्भुट्ठेयवोत्ति पंचमो, एवं च गहियपंचाभिग्गहो अद्धमासावसाणे तत्तो नीह-रित्ता अट्टियगामंमि वच्चइ, तस्स पुण अट्टियगामस्स पढमं वद्धमाणनाममासि, तं च किर कहं ववगयंति? निसामेह कारणं—

कोसंबीए नयरीए असंखदविणसंचओ धणो नाम सेट्ठी परिवसइ, तस्स अणेगोवजाइयसएहिं पसंओ धणदेवो नाम पुत्तो, अच्चंतं पाणप्पिथो वीसासट्ठाणं च, सो य अन्नया अणेगकुवियप्पट्टुसत्तभीसणं समुल्लसंतमयणकुसुमसरं रंगंततण्हामिगवणिहयापडलं दुवारपसरेदिथचोरभयावहं दुरुत्तारमूढयामहानिन्नगाविसमं अरच्चं च रउद्धं सपत्तो तारुणं, तच्चसेण य वसइ वेसागिहेसु रमइ जूयं पइदियहं विद्वइ अत्थसंचयं, कुणइ विविहे विलासे, उवचरेइ दुल्ल-लियगोहिं, पोसेइ नडनाडइजगायणपमुहं अनिबद्धं जणं, नाउवेक्खइ कुलमेरं न परिचितेइ सयणाववायंति, एवं च वच्चंतेसु य वासरेसु खीणेसु दवपडिपुणमहानिहाणेसु, सुन्नीभूएसु कोट्ठागारेसु चित्तिं धणसेट्ठिणां-अहो

अजपज्जयाइपुरिसपरंपरागयंपि अपरिकलियसंखंपि खयं व पत्तमियाणिं सम धणं, ता न जुत्तं एत्तो पुत्तस्स उवेहणंति निच्छिऊण एगंते भणिओ धणदेवो-पुत्त ! तुम्हारिसाणं उवभोगाइनिमित्तमेव अत्थोवज्जणमम्हाणं, न एत्तो विसिद्धं ठाणमत्थि, केवलं जराज्जरियसरीरोऽहमियाणिं असमत्थो चंक्रमणमेत्तेऽवि अखमो समहिगभासियेव्वेवि अपरिहत्थो कलाकोसल्लेवि, ता वच्छ ! तुमए एस सबो कुंडुवभारो धम्मववहारोय अणुचिंतणिज्जो, सो य अत्थं विणा न तीरए सुहुत्तमवि सोढुं, अत्थोत्ति नाम पवरो पुरिसत्थो, तहाहि—

अत्थेण सुगुणमुणिजणखेत्तनिहित्तेण सुहफलोणमियं । निप्फाइज्जइ सद्धम्मसस्सयं विणु पयासेण ॥ १ ॥ किं पुत्त ! तए न सुयं जिणाण दिन्नाउ जेहिं भिक्खाओ । पढमाउ ते य तम्मिवि केऽवि जणा सिवपयं पत्ता ॥ २ ॥

केई तइयभवेणं सुरवरसोक्खाइं मुंजिउं धीरा । सट्ठाणनिहित्तहविहऽत्थसामत्थओ सिद्धा ॥ ३ ॥

अत्थेणं चिय कोमुइमयंकतुल्लाणणाउ तरुणीओ । आवद्धपाणिसंपुडमाणाए लहुं पयट्ठंति ॥ ४ ॥

निंदियकुल्लुम्भवोविहु सयलकलावज्जिओविहु धणेणं । पुरिसो गुरुव्व देवोव्व पुच्छणिज्जो हवइ लोए ॥ ५ ॥

जे सूरा समरसिरे जे माणेणं गिरिंदसारिच्छा । जे भवकच्चबंधेण जंति किंतिं परं भुवणे ॥ ६ ॥

जे रूचमरेट्ठेणं मयरद्धयमवि हसंति किर पुरिसा । अत्थट्ठाण जणाणं तेवि हु सेवं पवज्जंति ॥ ७ ॥

अच्छउ दूरे अन्नो नियगिहिणीऽविहु न जेण धणहीणं । आयरइ नरं पुत्तय ! सयलोऽविहु लज्जए तेण ॥ ८ ॥

चिरसंश्रुयावि चिर(सह)कीलियावि निचं कओवयारावि । गोहचकारंगपिव मित्तावि सुयंति धणरहियं ॥ ९ ॥

किं बहुणा दढदालिहदूमि(स)यं माणुसं विणासंतो । सवंकसो कयंतोवि पुत्त ! आलस्ससमुच्चहइ ॥ १० ॥

इयं सच्चगुणाहाणं सधणत्तं तदिदरं च दोगच्चं । नियबुद्धीए नाउं पुत्तय ! उच्चियं समायरसु ॥ ११ ॥

जइ ववसायं वंछसि काउं दविणज्जणत्थमिह भइ ! । ता एसो पत्थावो जावडज्जवि अत्थि किंपि धणं ॥ १२ ॥

सच्च विणासे जाए अगिंगवि समप्पिही न ते कोडवि । किं पुण ववहारकए भंडोछं जीविगाजोगं ? ॥ १३ ॥

एवं निसुणिऊण भणियं धणदेवेण-ताय ! जइ एवं ता किं तुमए उवेहिओडहेमत्तियं कालं ? किं मए

अवगणियं कयाइ तुम्ह वयणं ? दंसिया अणुचिया पडिवत्ती ? सुरुद्धताडणेणवि पासिओ विरूवो सुहरागो ?

जं विणस्समाणेडवि घरसारे ण सिक्खविओडम्हि, अहवा अलं पुव्वगयवइयरसोयणेण, पसीयह मे, देह

आएसं, दुट्ठमहिंलव आकरिसेमि दूरगयं पि लंछि, नंदह तुब्भे वहुं कालं केत्तिमेत्तमेयंति, सेट्ठिणा भणियं-

पुत्त ! किं न सुणेमि तुह कलाकोसंछं, न जाणामि साभावियं भुयवलं ?, न लक्खेमि अंगीकयभरधुरधव-

लत्तणं, न बुज्झामि महिंढं चित्तावट्ठं, अओच्चिय मए एत्तियदिणाइं न किंपि भणिओडसि, विसमदसावडि-

यस्सवि पुत्त ! किमसज्झं तुह परक्कमस्स ?, ता इयाणिं पि कुणसु समुज्जमं पूरेसु पणइज्जमणोरेहे दलेसु दुज्जणदुट्ठ-

चिंतियं अब्भुद्धेरेसु विहलियं जणं पयडेसु मयंकनिम्मलं नियकुलंति, धणदेवेण भणियं-ताय ! किं पुणरुत्तवयणवित्थ-

रेणं ? पगुणीकरेसु सपडि सत्थं सच्च(मग्ग)संवाहगं च, इय भणिए सेट्ठिणा नाऊण से निच्छयं वाहराविया नियपुरिसा,
 भणिया य-अरे ! करेह संबलगाइसमेयं समग्गं मग्गसंवाहगं, संजत्तेह विविहमहामोल्लभंडपडिपुणं सगडसमूहं
 उवणेह वलिट्ठं लट्ठखंधोगणगणं पव्वत्तेह कम्मकरजणं वाहरह पहरणत्थं गोहसत्थंति, जं सामी आणवेइत्ति पडिसु-
 णिऊण गया पुरिसा, अकालविलंबं समायरियं सब्बं, निवेइयं च सेट्ठिणो, सो य धणेदेवो ण्हाओ कयविलेवणो केस-
 वद्धसियकुसुमो परिहियपंडुरवत्थो पणयदेवगुरुचरणो आपुच्छियजणणिजणगसयणवग्गो गणिमधरिममेयपारिच्छे-
 ज्जपडिपुन्नपंचसयसगडीसत्थसमेओ सुमुहुत्ते पट्ठिओ दूरदेसंतरं, ताहे पेच्छंतो अपुवापुवसंनिवेसे किणंतो अन्नोन्न-
 मंडाई, आपुच्छंतो देसंतरसमायारं, विण्णासंतो विचित्तभासाविसेसे, देंतो दीणदुत्थियाण दाणं अइगओ दीहम-
 द्धाणं, कमेण रणज्झणिरवसहकंठपलंबन्तघंटियारावनिरुद्धावरसहवावारो अणेगसहाइजणपयट्ठियगंतियागणो पडुत्तो
 वद्धमाणगगमसमीवं, तस्स य अन्तरावि समनिन्नन्नयंगंभीरखड्डविसमप्पवेसा आनाभिमेत्तसुहुमेवलुगापडहत्थविसा-
 लपुलिणा महल्लचिक्खल्लाणुविद्धतुच्छसलिला वेगवई नाम नई, ताहिं च पविट्ठाओ सगडीओ, ताओ पुण उभयपा-
 सावलंविणा जणेण सुसमणेणैव धरियपवणेण (धरियवयणेण) सारहिणा निगिण्हंतेण वसहनिवहं कोहालाइणा पगु-
 णिज्जेतेण चक्कमग्गेण कहकहवि कट्टेण पावियाओ अद्धमग्गं, अह विसमत्तणओ नदीए दूरपहखीणसामत्थत्तणओ
 वसमाणं अइभारियत्तणओ सगडीणं बाढमायासिया सारहिणो अविगणियकसखं(वं)धाइघाया निवडिया महीयले

बलीवद्वा, बाढसुद्विग्नो धणदेवो, वाउलीहूओ परियणो, तत्थ य संत्थे एगो वसभो सयलगोमंडलप्पहाणो सप्पुरिसो
इवं लीलाए चिय समुद्धरियमहाभारो विसमप्पएसनित्थारणसमत्थो य अत्थि, सो य तहाविहविसमनिवडिण्ण
सुमरिओ धणदेवेण पप्फुक्कारपुच्चं च सक्कारिऊण जोत्तिओ सो सगडीए, तक्खणं अखेवेण य गओ सो निक्खवडसा-
मत्थेण गहिऊण लीलाए भारियं पि तं नईए परकूलं, जहा सा एगा, एवं पंचसयाणि वि सगडीणं निच्चाहियाणि
तेण विसमप्पएसाउत्ति । अविय—

एगत्तो सो वसहो अन्नत्तो सयलगोणसंघाओ । उत्तारइ सगडीओ सन्भावस्सत्थि किमसज्झं ! ॥ १ ॥

अइदुद्धरभरपरिकहुणेण तुहं तडत्ति से हियं । वयणुगगीरियरुहिरो धसत्ति धरणीयले पडिओ ॥ २ ॥

तं च तारिसमवत्थंतरं पत्तमवल्लोइऊण धणदेवो परिमुक्खसेसकायच्चो सोयभरमुच्चहतो वाहरावेइ विज्जे, कारवेइ
चिगिच्छं, सयमेव समीवट्ठिओ बंधवं च मित्तं व पडिजागेइ, अन्नदिवसे य भणिओ सो परियरेण जहा-सत्थवाह ! किमे-
गगेणनिमित्तं उवेहिज्जंति नियकज्जाइं ? किं न सुणह तुब्भे सीयंति वणियपुत्ता ? विणस्संति कियाणगाइं ? वोळंति
वहवे वासरा, समीवमणुसरइ वासारत्तोत्ति, धणदेवेण भणियं-एवमेयं, किं तु न सक्केमि एयं वरागं परममित्तं व
सन्भावसारं मोत्तुं, परियरेण भणियं-तुब्भे जाणह जमेत्थोचियंति, तओ तप्परिहारकायरमणेण वि धणदेवेण सहा-
विया वद्धमाणगगामप्पहाणा पुरिसा, सुहासणत्था तंवल्लोइदाणेण सम्मानिऊण सप्पणयं वसहस्स समवत्थं

भणियं जहा-एसो मम पवरवसभो एरिसदुष्टुत्थाममवत्थंतरं पत्तो ता तुम्हेहिं एयस्स इमिणा रुवगसएण ओसह-
 चरणाइचिंताए संमं वट्ठियवं, एसो तुम्ह नासगो इव समण्णियो मए, न सवहा अन्नहा कायव्वंति निरुविकुण सो
 मयहत्तरजणे मोयाविकुण वसहस्स पुरओ वहुं चारिं पाणियं च ससिणेहं खामिकुण य तं जहाभिमयं गओ धणदे-
 वसत्थवाहो । सो य वसभो गाढवेयणाभिभूओ जेढुमासदिणयरनिट्ठुरकरोलिकरालिओत्ति गिम्हुणहतत्तमहियलडज्झमा-
 णदेहो विरसमारसंतो दिणं गमेइ, तं पि से तिणाइयं अवरगोरुवेहिं भक्खिज्जइ, सोऽवि चारिवारिरहियत्तणेण गाढ-
 वाहिपीडियत्तणेण य सदीणं दिसाओ अवलोएमाणो तणसलिलहत्थे तं पएसं वोलेते जणे दट्ठूण चित्तेइ-नूणं मम
 निमित्तं एए इममुवाहरंतित्ति, लोगोऽवि तं अइक्कमित्ता नियनियकज्जेसु पयट्ठइ, एवं च सो वसभो पइदिणं तहा-
 दंसणविहलियासो, चम्मट्ठिपंजरावसेसो एवं सो परिकपेइ-अहो महापाविट्ठो वज्जंगंठिनिट्ठुरमाणसो निगिघणो
 चंडालविसेसो असच्चसंधो कलिकालकलिकलुसिओ एस गामजणो जेण मम एवं दुहियस्स अच्छउ दूरे करुणाए
 तण्णपूलाइदाणं जं तइया धणदेवसत्थवाहेण मम समक्खं जवसाइ जीवणमप्पियं तं पि गसिकुण ठिओत्ति । एवं
 च पइदिणं पओसमुव्वहतो अकामतण्हाए अकामच्छुहाए अकामतिववेयणाए आउलीकयसरीरो महानगरदाहमज्झ-
 पडिओ इव देहदाहाभिभूओ मरिक्खण तंमि चेव गामे अगुज्जाणे सूलपाणिनामो वाणमंतरो समुप्पन्नो, तहिं च उव-
 वण्णो समाणो तहाविहं देवरिद्धिं पेच्छिक्खण विमरिसिउमारद्धो-अहो मए पुव्वभवे किं दाणं किं दिन्नं ? किं वा तवं

तविष्यं ? कस्स वा उवयारे ठियं ? को वा धम्मो सम्ममाराहिओ ? कत्थ वा सुतित्थे सरीरच्चाओ कओत्ति ?, इइ विमंसिऊण पउत्तो ओही, दिट्ठं च तं तहाविगरालख्वं बलीवद्दसरीरं, ताहे समुच्छलिओ से महाकोवानलो विषं-
भिओ अविवेओ समुल्लसिओ अकज्जकरणपरिणामो, तयणंतरं पेच्छंतु दुरायारा नियपावपायवस्स फलंति विभावित्ते-
तेणं तेण विउच्चिया सयलगामवासिजणाण मारी, तप्पभावेण य अणवरयं मरिउमारद्धा उत्तिममज्झिमजहन्ना
बहवे जणा, जायंति य पइदिणं अक्कंदियवा । कहां चिय ?—

हा नाह ! पाणवल्लह ! कत्थ गओ मज्झ देसु उल्लावं । हा हा कयंत ! निक्खि ! कह सहसा ववसिओ एवं ? ॥ १ ॥
हा वच्छ ! किमुच्छंणेऽवि तं गओ अइगओ सि पंचत्तं । मम मंदमाइणीए अहो किलेसो सुहा जाओ ॥ २ ॥
हा जणणि ! तहा कट्ठेण पालिउं मं निलक्खणमियाणिं । कह निरवराहएच्चिय न देसि तं मज्झ पड्वियणं ? ॥ ३ ॥
हा भाय ! बंधुवच्छल ! हा हा तं भइणि ! निक्खवडपेम्मे । एक्कपए चिय चलियाइं कीस सुत्तूण मं दुहियं ? ॥ ४ ॥
हा वच्छे ! बहुदविणवएण परिणाविया पयत्तेण । तहविहु इमं अवत्थं संपत्ता हा हयासोऽम्हि ॥ ५ ॥
हा जक्खवंभहरिसूरबुद्धजिणखंदरुदपमुहसुरा । तह पूइयावि संपइ किमुवेक्खह तो कुणह रक्खं ॥ ६ ॥

इय अणवरयं तियचच्चरेसु लोयस्स रोयमाणस्स । परिमुक्कावरकज्जस्स जंति दुक्खेण दिवसाइं ॥ ७ ॥
एवं च जुगंतसमएव रोगेहि य छिद्दपवेसेहि य पियजणविरहदुक्खेहि य हिययसंघट्ठेहि य मरमाणंमि अणेगलोगे-

सुन्नीभवंतेसु पवरमंदिरसु बुच्छिज्जमाणेसु य अइगरुयकुलेसु मडयकोडिसंकुलासु गामरथासु भयभीओ अवसेसो
 जणो जीवियरक्खणनिमित्तं लिहावेइ रक्खावल्यं पाणिपल्लवेसु बंधेइ दिवोसहीओ कुणइ महागहपूयं समायरइ
 पियरपिंडप्पयाणं परावत्तेइ विविहमंते समीवट्ठियं धरइ दिवमणिगणं पयट्ठावेइ होमविहिं आयुच्छइ जाणयजोइ-
 सिए समारंभइ गिहेदेवयाणं ण्हवणवल्लिपूयामहूसवं, अन्नं पि जं कोइ समाइसइ तं सवं तहट्ठियं निवत्तेइ, तहवि
 ओइणमहाजरोव पढमल्लुहाभिभूयपंचाणणोव निकाइयकम्मनिवहोव न मणांगं पि सो सल्लपाणिवंतरो उवसमं
 गच्छइत्ति । अह गामजणो अणिवत्तं दट्ठण मारिं धणकणगसमिद्धां गोमहिसितुरगाइपरिकिन्नाइं गिहाइं मोत्तूण
 जीवियट्ठयाइं नियनियकुंडुवाइं घेत्तूण अन्नन्नगामेसु गओ, तत्थवि गयं महावेरिओव उवइवइ सो तग्गामवासिलेयं,
 एगया य तेसिं चिंता जाया-न नज्जइ तत्थ अम्हेहिं देवो वा दाणवो वा खेत्तवालो वा जक्खो वा रक्खसो वा
 विराहिओ होज्जा, तम्हा तहिं चेव गंतूण पसाएमोत्ति संपधारिऊण समागया तत्थेव गामे, उवट्ठाविया बल्लिऊसुम-
 धूवाइसामग्गी, तयणंतरं ण्हाया पंडुरवत्थकयउत्तरांसंगा लंवंतविमुक्केसा सच्चसमुदाएणं तियचउक्कचच्चरेसु
 पडिसडियभूयगिहेसु रुद्धंदावसहेसु उज्जाणेसु य बलिं च कुसुमपयरं च मुंचमाणा उट्ठुहा जोडियकरंजलिणो
 एवं जंपिउं पउत्ता—

भो अंतरिक्खनिलया देवासुरजक्खरक्खकिंपुरिसा । दिवाइसथसमेया निमुणह विन्नत्तियं एयं ॥ १ ॥

इस्सरियमएणं वा अन्नाणेणं व अविणएणं वा । जं अवरद्धं तुम्हं तं सवं खमह अम्हाणं ॥ २ ॥
 पणएसु सदुच्चरिओहखामणाउज्जएसु सत्तेसु । जं तुम्हारिस देवा खमंति गरुयावराहं पि ॥ ३ ॥
 कोवस्स फलं दिट्ठं पेच्छामो संपयं पसायस्स । इति भणिए सो देवो गयणठिओ बुत्तुमारद्धो ॥ ४ ॥
 रे रे विणट्ठसीला ! धट्ठा निष्पिट्ठसिट्ठजणचिट्ठा । लोहमहागहनडिआ एत्तो मे खामणं कुणह ॥ ५ ॥
 तइया न सरह पावा वसहस्स छुहाइणा किलंतस्स । तणजलसमप्पणेणवि अणुकंपा जं न विहियत्ति ॥ ६ ॥
 नियसयणवग्गमरणे जाए संतावमुग्गमुव्वहह । वसहे तहा मयंमिवि न थेवमेत्तोऽवि भे सोगो ॥ ७ ॥
 अलमडुणा भणिएणं वच्चह दूरेवि नत्थि भे मोक्खो । खलविसवेह्लिं आमूलओवि छिंदेमि दुहहेउं ॥ ८ ॥
 इयं तच्चयणमायन्निऊण भयवसकंपंतसरीरा धूवकड्डुच्छुयहतथा सुरभिण्णुफुंजोवयारं कुणमाणा जय जीव नंदाइ-
 कोमलवयणेहिं शुणंता अट्ठंगं निवडिया महीए, भणिउमाढत्ता य-देव ! सच्चमेव अवरद्धमम्हेहिं, नत्थि तुम्ह एत्था-
 वराहो, तहावि पसीयह इयाणिं, आइसह इमस्स दोसस्स निग्घायणनिमित्तं पायच्छित्तं, 'अइकंतत्थसुमरणं विह-
 लं चिय विणट्ठकज्जंमि' किं बहुणा !, खित्तं नियसिरं तुह चरणपुरओ, कुणसु जं किंपि कीरइ सरणागयाणंति भणि-
 ऊण अगघदाणपुरस्सरं पुणो पडिया चरणेसु, एवं च निसामिऊण सूलपाणिंवंतरो मणागं उवसंतचित्तो भणइ-जइ
 एवं ता एयाणि माणुसट्ठियाणि एगत्य पुंजीकाऊण उवरि पवरं कणंतकिंकिणीधयवडाडोवमणहरं देवहरयं विर-

एह, अचमंतरे वलीवद्वाणुगयं जक्खपडिंमं पइहुवेह, निचं वलिकुसुमच्चणियं पयट्ठेह, एवं कुणमाणानं तुम्हाणं जीवियं देमि, न अन्नहत्ति, तओ जं देवो आणवेइत्ति तं तहत्ति विणएण सासनं सिरेण पडिच्छिऊण तेहिं गामस्स अदूरदेसे जहोवइहुं तहेव कारवियं तस्स मंदिरं, इंदसम्माभिहाणो य निरुविओ तत्थ देवच्चओ, आयेरेण तिसंझं कीरइ पेच्छणयंति । एवं च अणेगमाणुसद्धिनिचयपूरियत्तणेण इंतजंतोहिं पहिएहिं अन्नगामजणपुच्छिऊमाणोहिं तस्स अडिगामोत्ति नामं कयं, पसिद्धिं च सबत्थ संपत्तं । एएण कारणेण अट्ठियगामं जायंति । तत्थ पुणवाणमंतरघरे जे तडियकप्पडियाइणो मगपपरिस्समपीडिया परिवसंति रयणीए ते सुलपाणी पुट्ठीए आरुहिऊण चिरं ताव वाहेइ जाव न सक्कंति पयमवि दाउं, पच्छा किलिकिलारावं कुणमाणो केइ तिंदूसगं व गयणे उल्लालिऊण अहो निवडंतोसु तिवख-खगेण छिंदइ केइ चरणेसु गहिऊण वत्थं व सिलायलंमि पच्छांडेइ केइ घंटं व दुवारतोरणे पलंवेइ केइ खंडाखंडिं काऊण वालें व सबदिसासु पक्खिवइ, एवंविहजायणाहिं पहियजणं विणासेइ, तब्भएण य गामलोगो दिवसे अ-च्छिऊण वियाले सगिहेसु वच्चइ, इंदसम्मदेवच्चगोऽवि धूवं पईवं पूयं च से काऊण दिवसओ चेव निक्खमइत्ति ।

एवं वचंतेसु वासरेसु भयवं महावीरसामी तावसासमाओ समागओ समाणो तं वंतरसुरं वोहिउकामो देवच्चगं भणइ-अहो एत्थ जक्खगिहे अम्हे निवसामो ?, तेण भणियं-गामो जाणइ, तओ भगवया तत्थेव मिलिओ सयलो गामजणो अवत्थाणनिमित्तेणमापुच्छिओ, लोणेणवि अचंतसोमसस्सिरीयरुवं भयवंतं दट्ठुण भणियं-देवज्जग ! न सक्का

एत्थ वसिउं, एहि गाममज्झे, गिणहाहि जहाभिरुइयं अम्ह गिहेसु वसहिं, भयवंपि अणिच्छमाणो भणइ-इत्थेव अणुजाणह, लोगेण भणियं-जइ एवं ता ठाहत्ति, ताहे गंतूण एगंमि कोणे पडिमं ठिओ सामी, सो य इंदसम्मो पच्छिमसेलसिहरं संपत्ते दिवसथरमंडले ध्रुवेले निम्मविऊण कप्पडियाइतडियवगं निस्सारित्ता भयवंतंपि भणइ-देवज्जगा ! तुब्भेवि नीहरहं, मा इमिणा जक्खेण मारिज्जिहिह, सामीवि असुणमाणोव तुसिणीए य गमेइ, पुणो पुणो इय भणंते य देवच्चगे सो वंतरसुरो चित्तेइ-अहो कोऽवि एस देवच्चएणं गामजणेण य भणिज्जमाणोवि न गओ एत्तो ठाणाओ, ता पेच्छिही जमज्ज करिस्सामि, बहूणं दिवसाणं दिट्ठियाखेछणगमुवागयंति । एत्थंतरे अत्थमिओ दिणयरो समागया संझा, सट्ठाणं गओ देवच्चगो, काउस्सग्गे ठिओ भुवणबंधवो ।

ताहे काउस्सग्गे ठिथस्स सो भेसणट्ठया गुरूणो । जुगविगमघोरघणघोसविब्भमं भेसियजणोहं ॥ १ ॥

अट्ठट्ठहासमसमं चाउदिसिपसरियं महाभीमं । उच्छलियवहलपडिसदनायविप्फारियं कुणइ ॥ २ ॥

गामलोओऽवि तं सहं सोऊण भयसंभंतो परोप्परं भणइ-अहो एसो देवज्जगो महाणुभावो जक्खेण मारिज्जइत्ति, तत्थ य उप्पलो नाम परिद्यागो पासजिणतित्थपुव्वपडिवन्नसामन्नो भोसुप्पायसुमिणंतलिकखअंगसरलक्खणवंजणरूव-अहुंगमहानिमित्तसत्थपरमत्थवियाणगो लोगाओ एरिसो तारिसो देवज्जगो जक्खेण मारिज्जिहित्ति निसुणिऊण मा तित्थंकरो महावीरो पडिवन्नदिकखो होज्जत्ति संकियमणो वंतरगिहे य तब्भएण गंतुमचाइतो अद्धिइं काउमारद्धो ।

सो य सूलपाणी जाहे अट्टहाससदेण भयवं न भीओ ताहे पिसायरूवं विउव्वइ, तं च केरिसं?—
 अइकविलथूलं विरकेसोहच्छन्नगयणयलमज्झं । अविपकसुक्कतुंवयसरिच्छवीमच्छवयणिहं ॥ १ ॥
 दिसिं कुंजरं कुसागारदूरनिक्कसियकलुसदसणगं । चिचिडग्गघोरघोणानिलकंपियकविलसुहलोमं ॥ २ ॥
 लं विरवलिचम्मोणद्धमडहवच्छत्थलट्टिसंघायं । पिट्ठावलग्गालिंजरकप्परसमजरढजठरतलं ॥ ३ ॥
 तालतरुयुयलदीहरनिम्मंसणहारुनद्धजंघजुयं । ठाणट्ठाणोलं वियपलंवतंडवियफणसप्पं ॥ ४ ॥
 अइवेगमुक्ककमभरथहरियससेलमेइणीवट्टु । कक्खंतरालनिग्गहियमडयपिसायासणाभिरयं ॥ ५ ॥
 अइकुडिलकत्तिउक्कत्तिगं निस्सरियरुहिरपाणपरं । उब्भवियपयंडमुयं पावसमूहं व पच्चक्खं ॥ ६ ॥
 इय एयं विहरूवं पिसायमवि पासिऊण जयनाहो । मसगं व अवगणितो धम्मज्झाणं विचिंतेइ ॥ ७ ॥
 ताहे स सूलपाणी उवउत्तो पेहए जिणवरिंदं । मेरुव निप्पकपं निब्भयचित्तं पवरसत्तं ॥ ८ ॥
 तयणंतरं च पुणरवि भेसणकज्जेण सो महापावो । निसियगकुंतभीसणउग्गविसुग्गाढाढालं ॥ ९ ॥
 अविकलियरोसवसनिस्सरंतविसमिस्सजलणजालोहं । पप्फुरियफारफुक्कारवायभजंततरुनियरं ॥ १० ॥
 वियडुब्भडचडुलफणाकडप्पपडिरुद्धदिसिमुहाभोगं । सिरियणकिरणसंचयदावियगुरुवणदवासकं ॥ ११ ॥
 कलिकालपढममित्तं व तिच्चदुरिओहभूरिरासिं व । जमपासंपि व सक्खा महिमहिलावेणिदंडं व ॥ १२ ॥

सम्पं चिउवइ मंह तो सो सार्मिं निएण देहेण । आगंतूणावेढइ वाढं थंभं व रज्जूए ॥ १३ ॥ पंचहिं कुलयं ।
पुच्छच्छडांए ताडइ सच्छंदं दसइ तिवखदसणेहिं । कंठस्स पीडणेणं कुणइ निरुस्सासयं सहसा ॥ १४ ॥
अह अट्टहासभीसणपिसायनांगोवसगकरणेवि । अविचलचित्तं सुणिऊण जयगुरुं गाढकुवियमणो ॥ १५ ॥

सो सवं सव्वरिं जाव अचंतरउइं दुरहियासं सत्तविहं वेयणं भगवओ करेइ, तजहा—सीसवेयणं सवणवेयणं नयणवेयणं
दसणवेयणं नहवेयणं नासावेयणं पिट्ठिवंसवेयणं, एयाणं वेयणाणं एक्केक्कावि समत्था पागयनरस्स जीवियं ववक्कमिउं, किं
पुण सत्त एयाओ एगकालपाउब्भूयाओ अणाइक्खणिज्जरूवाओत्ति?, भयवं पुण ताओ सम्ममहियासेइ, सो य वाणमंतरो
जाहे न पारेइ भयवंतं भेसिउं वा खोभिउं वा ताहे वाढपरिस्समसुवगओ अहो निष्फलो मम वावारोत्ति कयचित्तसं-
तावो धीरिमारंजियहियओ य भयवंतं पायवडिओ सव्वायरेण भणइ—भयवं! खमह मम अवरहं, अयाणमाणेण तुम्ह
सामत्थं सुचिरं मए अवरद्धंति, एत्थंतरे नियक्कजरणवावडचित्तो तक्खणसुमरियसुरवइजिणभलावणावयणो सो सि-
द्धत्थेदेवो दट्ठूण भयवओ तिवोवसगं धाविओ वेगेणं, पत्तो तं पएसं, भणित्थमारद्धो य—अरे रे सूलपाणिवंतराहमा!
अचंतदुडुलक्खणा दोगच्चमच्चुपत्थगा विसुद्धबुद्धिवज्जिया न जाणसि खलियारंतो इमं सिद्धत्थरायपुत्तं भयवंतं चरि-
मत्तित्थयरंति?, जइ रे दुरायार! एयं वइयरं सक्को कहवि जाणंतो ता को जाणइ तं किंपि पाविंतोत्ति?, सो य एव-
मायन्निऊण वाढं भयभीओ चउग्गुणं पुणो पुणो जिणं खाभेइ, सिद्धत्थो य तस्स धम्मदेसणं काउमाढत्तो जहा-

वीथरागो देवबुद्धीए गहियबौ, साहुणो य गुरुबुद्धीए परिमावियवा, तत्तथसदहणं कायबं, सबपाणीणं पीडा परि-
 वज्जियवा, पुबुद्धचरियाइं भुज्जो भुज्जो गरहणिजाइं, जओ एक्कसिं कयाणंपि तिबपओसेण पावाणं कोडाकोडाइरूवो
 दुहविवागो हवइत्ति, सूलपाणीवि एवमायन्निऊण अणेगलोगक्खयसुमरणउप्पन्नातुच्छपच्छायावो जायसंमत्तो अचंत-
 भवचिरत्तचित्तो असेसदोसपसमणद्धा तिडुयणपहुणो पुरओ गीयनट्टमहिमं काउं पयत्तो, गामवासिलोगोऽवि गीया-
 इसइं सोचा चित्तेइ-अहो तं देवज्जयं जक्खो मारित्ता इयाणिं परितुडो सच्छंदमेवं कीलइत्ति, भयवंपि चत्तारि रयणि-
 जामे देसूणे परित्ताविओ समाणो पमायकाले सुहुत्तमेत्तं निदापमायसुवगओ संतो इमाइं दस महासुमिणाइं पस्सइ,
 कंहं?, जहा किर मए तालपिसाओ उहुं बहुमाणो निहओ १ पंडुरो(सउणो)चित्तकोइलगो य हुवे पज्जुवासमाणा
 दिट्ठा २-३ सुरहिडुसुमंगंधुद्धुरं दामदुगं ४ गोवगो य पज्जुवासणापरो ५ पउमसरो विबुद्धपंकओ अवलोइओ ६
 कळोलमालाउलो सायरो ससुत्तिणो सुयाहिं ७ पइण्णरस्सिमंडलं चक्खुगोयसुवगयं दिणयरविंव ८ नियंतेहिं
 माणुसुत्तरगिरी परिवेढिओ ९ मंदरसिहरं चारूढोत्ति १०, एवं एए दस सुमिणे पासित्ता पडिबुद्धो सामी । एत्थंतरे
 ससुगओ सूरो, समागओ धूवकुसुमक्खयहतथो सयलगामजणो उप्पलनेमित्तिगो य, ते य दिव्वंगधनुणणपुप्फवासेहिं
 समच्चियं अक्खयसरीरं सामिं पेच्छऊण उक्कुट्टिसीहनायं करेमाणा चरणेसु पडिया, परोप्परं भणिउमेवं पवत्ता
 य-अहो देवज्जेणं जक्खो उवसामिओ, तेणेसा पूया कयत्ति, उप्पलोवि परियाणिऊण भयवंतं पडिडो, वंदिऊण

चलणजुयलंतिए निसन्नो, अह भगवओ काउस्सग्गावसाणंमि पुणरवि नमंसिऊण अट्ठगनिमित्तसामत्थओ सुणियसु-
मिणाइवइयरो भणिउमारद्धो-सामि ! तुब्भेहिं अंतिमराईए दस सुमिणा दिट्ठा, तेसिं इमं फलं-जो किर तालपि-
साओ महादेहो निहओ तमच्चिरेण मोहणियकम्मं उम्मूलेहिसि, जो य सियसउणो तं सुक्कज्झाणं झियाइहिसि, जो
विचित्तो कोइछो तं दुवालसंगं पणणवेहिसि, गोवगेण य जं तुमं परियरिओ तं ते चउच्चिहसमणसमणीपसुहो चउ-
विहो संघो भविस्सइत्ति, पउमसरा य चउच्चिहो य देवनिकाओ तुमं पज्जुवासेही, जं च सायरसुत्तिणो तं संसारसुत्त-
रिहिसि, जो य सूरुओ अवलोइओ तमच्चिरेण केवलनाणं उप्पज्झिही, जं च उदराउ निस्सरिऊण अन्तेहिं माणुसुत्तरगिरी
वेढिओ तं ते निम्मलजसकित्तिपयावा सयलतिहुयणे अनिवारियपसरा परिभमिस्संति, जं च मंदरसिरमारुढो तं
सीहासणत्थो सदेवमणुयासुराए परिसाए धम्मं पन्नविहिसि, जं च दामदुगं तस्स फलं न याणामि, सामिणा
भणियं-हे उप्पल ! जं तुमं न याणेसि तमहं कहेमि, जं इमं दामदुगं तमहं दुविहं सागारमनागारियं धम्मं पन्नेवेहा-
मित्ति, एवं निसामिऊण हरिसुल्लसियपुलयजालो उप्पलो नमंसिऊण जयगुरुं जहागयं पडिनियत्तोत्ति । भयवंपि धम्म-
ज्झाणपरायणो कालं गमेइ ।

अह अद्धमासखमणेहिं जयगुरुवि गमिऊण चउमासं । विविहाभिग्गहनिरओ अट्ठियगामाओ निक्खंतो ॥ १ ॥
ताहे स सूलपाणी जक्खो अणुगच्छिऊण भयवंतं । पयकमलनिलीणसिरो भत्तीए भणिउमाढत्तो ॥ २ ॥

नाह ! तुह तिद्वउवसगकरणओ नत्थि मम समो पावो । जं एत्थ तुमं वुच्छो तेण कयत्थोऽवि नेवत्थि ॥ ३ ॥
 जाणामि सामि ! मम वोहणट्टया तं समोसढो एत्थ । न इ सुणासालाए कोवि निवासं जओ कुणइ ॥ ४ ॥
 बहुजीवविणासणजणियपावपडलेण पीडिओ संतो । नो पेच्छंतो दुक्खं किमहं जइ तं न इंतोऽसि ? ॥ ५ ॥
 ता तुमए चिय भवक्खवाओ हत्थावलंक्खदाणेण । उत्तारियमिह जयगुरु ! नियसोक्खपरसुहमणेण ॥ ६ ॥
 इय सुलपाणिजक्खो संथविउं जिणवरं पयत्तेणं । दुस्सहविविओगमल्लीए सल्लिओ पडिनियत्तोत्ति ॥ ७ ॥
 पवज्जागहणाओ पढमं संवच्छरं जहावित्तं । सिद्धं जइक्कगुरुणो इण्हि वीयं निसामेह ॥ ८ ॥

अह धुणिऊण वलियंमि जक्खे भयवं गामाणुगामं विहरमाणो गओ मोरागसन्निवेशे, तत्थ य बाहिरुज्जाणे श्रीप-
 सुपंडगाइदोसरहिए पएसे ठिओ पडिमाए, तहिं च गामे अच्छंद्गा नाम पासंडत्था परिचसंति, तेसिं च एगो
 अच्छंदगो लोगाणं संततंतभूइकरणेहिं जीवइ, सो य सिद्धत्थवंतरो भयवंतंमि पडिमापडिवन्नंमि कलहकेलिपियत्त-
 नेण विणोयमपावमाणो नाहस्स एयमपेच्छमाणो य अधिइं करेइ, अन्नदिवसे य सो भयवओ सरीरे संकतो तेण-
 तेणं वोर्लितं एगं गामगोहं सद्दिता कीलानिमित्तं एवं जंपइ-ओ भइ ! तुमं कंगुक्करं सोवीरेण सह अज्ज पज्जिभिओ,
 संपयं च वसहरक्खणट्टया चलिओ, इंतेण य मग्गे सुयंगमो दिट्ठो, सुभिणंगंमि परुल्लो य ता रे संभवइ सव्वमेयं ?,
 गामगोहेण भणियं-भयवं ! अवितहमेयंति भणिए सिद्धत्थेण अन्नंमि से वहुं समाइहुं, सो परिट्ठो परमच्छेरयंति

श्रीगुणचंद
महावीरच०
५ प्रस्तावः
॥ १५६ ॥

मणमाणो गंतूण गाममज्झे नियसयणवग्गस्स पुरओ एवं परिकहेइ, अह कोऽवि देवजओ गामवाहिं ठिओ तीया-
णागयवट्टमाणाइं जाणइ, पूरिया मम तेण बहवे पच्चया, एवं च आयन्निऊण गाढकोऊहलाउल्लिमाणमाणसो
गामजणो कुसुमक्खयहत्यो गओ भयवओ समीवं, संभासिओ तेण जिणतणुसंकंतेण सिद्धत्थेण, जहा भो तुब्भे मम
अइसयपेच्छणत्थं एत्थ संपत्ता, गामजणेण भणियं-सामि ! एवंति । तदणंतरं—
जं पुव्वकालवित्तं जं च सुयं जं च दिट्ठमितेहिं । जं भासियं परोप्परमह जं रयणीए अणुभूयं ॥ १ ॥
जं इट्ठाणिट्ठिविओगजोगसुहदुक्खलामलोभाइ । अज्जवि भविस्सविसयं तं पि हु सो साहए तेसिं ॥ २ ॥

ते य तहाविहं कोउगं दट्ठूण सवायेण वंदंति पूयंति महिमं च करंति, एवं च पइदिणं इंतजंतसु गामिहएसु
पवित्थरिओ सिद्धत्थस्स परमो आणंदो । अन्नया य लोगो भणइ-भयवं !, एत्थं अन्नोवि अच्छंदओ नाम जाणओ
परिवसइ, सिद्धत्थो भणइ-सो वराओ न किंचि जाणइ, ताहे लोगो गंतूण तस्स पुरओ साहेइ, जहा देवजगो
भणइ-तुमं न किंपि जाणसि, सो य तं सोच्चा अहंकारसुवहंतो अप्पाणं ठाविउकामो भणइ-एह तुम्ह समक्खं अव-
धेमि जेण तस्स परिन्नाणाभिमाणं, दुक्करं खलु अम्हारिसस्स पुरओ अत्तणो पयासणं, सुकरा तुम्हारिसस्स पुरओ
गामिहयाण मज्झे विविहससुल्लावत्ति, एवं च नियथियक्खणत्तं पयडंतो ईसामहल्लसल्लिखियहिययो सकोउहल्लेण
लोणेण परियरिओ गओ सो तत्थ जत्थ जणसमूहोवासिजमाणपायपंकओ भयवं काउस्सगे चिट्ठइत्ति । तयणंतरं च

करंगुलीहिं उभयपज्जंतसु तणयं घेचूण भयवओ संमुहं ठिओ पुच्छिउमारद्धो-सो देवज्जय ! इमं तणं किं छिज्जिही नवत्ति ? , तस्स एस अभिप्पाओ-जइ किर देवज्जो भणिही-छिज्जिही तो न छिंदिस्सं, अह अन्नहा तो छिंदिस्सामि । एवं च विगप्पमाणंमि तंमि सिद्धत्थेण भणियं-न छिज्जिही, सो एवं सोचा समारद्धो छिंदिउं ।

एत्थंतरंमि सक्को खुहासणत्थो इमं चिंचितेइ । गामागरेसु भयवं ! कह विहरइ संपयं वीरो ? ॥ १ ॥

दिद्वोवओगविभवेण वइयरं तं तओ सुणइ सबं । पेच्छइ य तं पुरत्थं तणभंगसमुज्जयं समणं ॥ २ ॥

अहह महापावो कह जिणंपि मिच्छं समीहए काउं ? । इय चिंतिऊण मेछइ महल्ल धारुक्कडं कुलिसं ॥ ३ ॥

तं मणसमाणवेगं आंगंतुं करजुंगुलीवलथं । छिंदेइ तस्स सहसा अछिज्जमाणंमि तंमि तिणे ॥ ४ ॥

अह सो अच्छंदगो कुलिसघायनिवडियासु दससुवि करंगुलीसु जायवेलक्खभावो सयलगामजणेण धिक्कारिज्जमाणो गओ तप्पएसओ, ताहे सिद्धत्थो तस्सोवरि बाढं पओसमावन्नो तं गामजणं भणइ-अरे रे दुरायारो महाचोरो एसो, लोएण तुत्तं-भयवं ! कस्स एएण चोरियं ? , सिद्धत्थेण भणियं-निसामेह, अत्थि एत्थ वीरघोसो नाम कम्ममारओ, सोऽविय निसामिऊण नियनामं लोयमज्झयाराओ आंगंतूण निवडिओ चलणेसु, भणिउं पवत्तो य-भयवं ! तुम्हेहिं जो समुक्कित्तिओ सो अंहं, साहेह किं कीरउत्ति, सिद्धत्थेण भणियं-भइ ! तुह अमुगंमि काले दस-पालियं वट्टगं नट्टपुवं ? , तेण भणियं-आमं, सिद्धत्थेण तुत्तं-तं एएण पासंडियाहमेण हरियं, वीरघोसेण भणियं-कत्थ

तं पुण पाविस्सं?, सिद्धत्थेण भणियं-एयस्स चैव पुरोहडे महिसिंदुनामस्स पायवस्स पुरत्थिमेणं हत्थमेत्तं गंतूण भूमिनिहित्तं उक्खणिऊण गिणहसुत्ति बुत्ते सो कम्ममारओ लोणेण समं गओ जहोवइट्ठपएसे, आगरिसिऊण गहियं बट्ठयं, हलबोलं कुणंतो य जणो पडिन्नियत्तो जिणस्स अंतिए । तयणंतरं च पुणो सिद्धत्थेण भणियं-अन्नंपि सुणेह, अत्थि किमिह इंदसम्मो नाम गाहावई?, जणेण भणियं-अत्थि, एत्थंतरे सो इंदसम्मो निथयनामसुक्कित्तिज्जमाणं सोऊण सयमेव उवट्ठिओ भणइ-आणवेह सो अहंति, सिद्धत्थेण भणियं-अत्थि भद! तुज्झ पुवकाले ऊरणगो पणट्ठो?, तेण भणियं-अत्थि, सिद्धत्थेण भणियं-अरे एएण अच्छंदएण सो हणिऊण खाइओ, अट्ठियाणि से उक्कु-रुडियाए बदरीए दाहिणे पासे उज्झियाणि अज्जि चिट्ठति, जइ कोऊहलं ता अज्जवि गंतूण पेच्छहत्ति बुत्ते वेगेण धाविथा तदभिमुहं, अट्ठियाणि पलोइयाणि, कलकलं करेता आगथा जिणसगासे, पुणरवि सिद्धत्थेण भणियं-एयं दुइज्जं दुच्चरियं, अन्नंपि तइज्जं अत्थि, परं नाहं कहिस्सं, ते य एयमायन्निऊण गाढं निब्बंधं काऊण पुच्छिउ-मारद्धा, कहं?—

देव! पसीय महापहु पुणोवि अण्णं न पसिणइस्सामो । अट्ठोवइट्ठमेक्कं एयं अम्हं निवेएसु ॥ १ ॥

जह जह न साहइ सुरो तह तह पुच्छंति आउला धणियं । सच्चं जायं एयं जमद्धकहियं हरइ हिययं ॥ २ ॥
एवं निब्बंधपरेसु तेसु सिद्धत्थेण भणियं-अरे मा तरलायह, अम्ह अभासणिज्जमेयं, जइ अवस्सं सोयव ता

गंतूणं पुच्छह एयस्स चैव भज्जं, सा तुम्ह साहिस्सइत्ति, एयमायन्निऊण पधाविथा तग्गिहाभिमुहं, इओ य-सा अच्छं-
 दयस्स भज्जा तद्धिवसं तेण पिट्ठिया, बाढं पओसमावन्ना चित्तेइ-सोहणं जायं जं तस्स अंगुलीओ छिन्नाओ जणेण
 धिक्कारिओ य, तहा इयाणिं जइ गामो एइ ता सवं दुस्सीलयं पयेडेमिप्पि विगप्पंतीए संपत्तो गेहंगणे गामजणो,
 पुच्छिउं पवत्तो य, सा भणइ-मा इमस्स कम्मचंडालस्स नामंपि गिणहह, जओ एस नियमगिणीए सहोयराए
 सद्धिं विसए अणुमुंजइ, ममं निच्छइत्ति, एवमायण्णिऊण ते उक्किट्ठीसिहनायं कुणंता नियनियगिहेसु गया पणवेंति-
 जहा एरिसो तारिसो सो महापावोत्ति, एवं सो अच्छंदओ जणेण अवमाणिज्जमाणो कयवंभणहचो इव अपेच्छिज्ज-
 माणो लुक्खभिक्षाकवलंपि अपावमाणो एगया गंतूण जिणनाहं सकरुणं जोडिय करसंपुडं च भणिउमाढत्तो-
 देवज्जय ! वज्जेसुं निवासमिह तं महाणुभावोऽसि । ठाणंतरेवि तुज्झं पूयामहिमं जणो काही ॥ १ ॥

अन्नत्थ गओऽहं पुण कित्तिमकणगं व नेव अग्घामि । सदरीए चिय गोमाउयस्स सूरत्तणं सहई ॥ १ ॥

तुह पुरओ जो विहिओ दुव्विणओ देव ! मूढहियएणं । सो मं दढकुवियकयंतदंडघाओव्व दुक्खवइ ॥ २ ॥

एवं भणमाणे अच्छंदगे अचियत्तोग्गहोत्तिकलिऊण सव्वस्सापत्ति(पीत्ति)परिहारपरायणो भयवं नीहरिऊण मोराग-

सन्निवेशओ उत्तरवाचालाभिमुहं पत्थिओ, अह मग्गे वच्चमाणस्स दक्खिणवाचालसन्निवेशं समइक्कंतस्स उत्तरवाचा-
 लसंनिवेशं च अपावमाणस्स अंतरा सुवण्णकूलाभिहाणाए महानईए पुलिणं बोलेंतस्स भगवओ महावीरस्स खंधाव-

लंविचतथखंडं कहंपि पवणकंपिज्जमाणं कंटए विलगिगऊण निवडियं, सामीवि थेवं भूमिभागं गंतूण अत्थंडिले पडियं
होज्जत्ति मणागमेत्तं वलियंकंधरो तमवलोइऊण जहाभिमयं गंतुं पवत्तो । सो य पिउचयंसो पुव्वभणियंबमणो चिर-
कालेण तं निवडियं वत्थखंडं पडिडुचित्तो गिणिहऊण भयवंतं च वंदित्ता कुंडगामनयरमुवगंतूण पुव्वभणियतुन्ना-
गस्स समप्पेइ । तुन्नागोऽवि अइनिउणं तुन्निऊण एगरूवं विरएइ । तओ सो बंमणो देवदूसं आदाय गओ नंदिवद्धण-
नराहिवस्स समीवे, पणामियं तं वत्थं, राइणावि कोऊहलमुवहंतेण सुचिरं पलोइऊण भणियं-भइ ! एवंविहं पवर-
वत्थं कत्थ तए पावियं ? बंमणेण भणियं-देव ! महइ एयस्स कहा, राइणावि भणियं-वीसत्थो सम्मं साहसु, तओ

जह दालिदोवहओ सुचिरं देसंतरेसु भमिऊण । नियमंदिरमणुपत्तो गिहिणीए तज्जिओ पुवं ॥ १ ॥

जह जिणनाहो करुणक्खरेहिं गंतूण भूरि चिन्नविओ । अणुकंपाए तेणं जह दिन्नं देवदूसद्धं ॥ २ ॥

जह तुन्नाएण पुणो दुइज्जवत्थद्धलाभकजेण । जयगुरुणोचिय पासे सिक्खविउं पेसिओ सहसा ॥ ३ ॥

जह संवच्छरमेगं पुट्ठिमि ठिओ पुरागराईसु । सिस्सो इव परिभमिओ जयपहुणो विहरमाणस्स ॥ ४ ॥

जह वा सुवणणकूलानईए कंटगलगवत्थद्धं । चइऊण गए नाहे तयं च गहिऊण चलिओ य ॥ ५ ॥

जह तुन्नागेण तयं दुखंडसंसीवणेण मेलवियं । तह सयलं नरवइणो निवेइयं तेण सविसेसं ॥ ६ ॥

एवं च निसामिऊण तुट्ठो नंदिवद्धणनरिंदो दीणारलक्खमेगं वत्थस्स मुल्लं दाविऊण सबहुमाणं सक्कारिऊण

भणइ-अहो भद ! कहं भयवं विहरइत्ति, बंभणेण भणियं-देव ! सुणेह, सो जएक्कनाहो कयाइ फुट्टट्टहासजणियसं-
तासेसु भूयभवणेसु गोदुहियाए दुद्धरं नियमविसेमालंविऊण नासगसंगिचक्खुविक्खेवो मंदरोच्च भिमिओ झाणं
झियाइ, कयाइ करालवेयालभालाउलासु पयंडपडियनरमुंडमंडलीसु सुसाणभूमीसु वीरासणं संठिओ निरुद्धउ-
स्साससमीरपसरो सूरविंबनिहिनयणो मज्झंदिणंमि आयावेइ, कयाइ गुरुभारकंतनरोच्च ईसिअचणयकाएण पलं-
वियभुयदंडो गामबहिया काउस्सगेण चिट्ठइ, कयाइ निक्कारणकुवियपिसायविहियतिबोवसगं सोक्खपरंपरं पिव
सम्ममहियासेइ, कयाइ छट्ठममद्धमासाइतवविसेससुसियसरीरो पंतकुलपरिब्भमणलुंछुत्तुञ्जासाराहार गहेण
पाणवित्तिं निव्वत्तेइ ।

कइयावि हीणरूवेहिं दुट्ठसीलेहिं कीडमेत्तेहिं । पागयनरेहिं विहियं विसहइ सो तिच्चमुवसगं ॥ १ ॥

सा आवयावि मण्णे निमुणिज्जइ जा जएक्कदेवस्स । दइयच्च दुन्निवारा नेव समीवं समल्लियइ ॥ २ ॥

एवं किर तस्स महायसस्स उत्थरइ दुत्थिमा भीमा । कइयावि तियसनिवहा पूयामहिमं पकुवंति ॥ ३ ॥

इय नरवर ! तच्चरियं न मारिसो किंपि साहिउं तरइ । तारिसजणंचरियाइं सुणंति जइ तारिसा चेव ॥ ४ ॥

एवं निसामिऊण राया सपरिसाजणो दीहरमुक्कनिससासो अञ्छिन्ननिवडंतवाहापवाहाउलवयणकमलो सोगं
काउमारद्धो । बंभणोऽवि गओ सगिहं । समणियं तुन्नागस्स मोल्लऽद्धं, सेसद्वेण विविहं विलसंतो कालं वोलेइत्ति ।

इओ य-वद्धमाणसामी उत्तरवाचालसन्निवेशे गंतुकामौ कुडिलपहपरिहारेण उज्जयमगाणुलगकणगखलाभि-
हाणासमज्जेण पट्ठिओ संतो निधारिओ गोवालेहिं, जहा-भयवं ! एत्थ आसमे दिट्ठीविसो सप्पो अभिदेवेइ ता
मा एएण पहेण वचह, सामीविजाणइ, जहा-सो भविओ संबुज्झिहिति निवारिजमाणोऽवि गोवेहिं परकज्जकरणर-
सियत्तणेण गओ कणगखलं नाम आसमपयं, जं च केरिसं ?—

कप्पूरतमालवंगतिणिससाहारपमुहतलुछन्नं । अइसुत्तयवासंतिथकयलीहरनिवहरमणिजं ॥ १ ॥

तावसजणनिम्मियहोमहुयवहुच्छलियधूममलिणाओ । तेछोछा इव रेहंति जत्थ साहीण साहाओ ॥ २ ॥

पवणपकंपियपल्लवकरेहिं जं वारइच्च जिणमितं । दिट्ठीविससप्पभयं कहइ व सउणाण सहेणं ॥ ३ ॥

एवंविहंमि तत्थ आसमपए आगंतूण ठिओ जक्खभवणमंडवियाए सामी काउस्सग्गेण चंडकोसियसण्यं पडि-
बोहणत्थंति । को पुण एस सप्पो पुवभवे आसित्ति ?, निसामेह—

अत्थ अणेगधणधणकणगसमिद्धजणपरिच्छन्नो अदिट्ठपरचक्कोवद्वो समुदोच्च बहुवाणिओवेवेओ महासरोच्च वि-
चित्तचित्तपत्तपउमाहिट्ठिओ रासिसमुदओच्च मेसविसमिहुणकन्नासमेओ गयणाभोगोच्च सुरसोमगुरुबुहलोगाहिट्ठिओ
कोसिजो नाम सन्निवेशो । तत्थ असेसदेसमासाविसेसवियक्खणो नाणविन्नाणकोऊहलविहिविहण्णु छंदलक्खणजो-
इससत्थपरमत्थकुसलो छक्कम्मकरणनिरयचित्तो गोभदो णाम माहणो परिवसइ,

नियबुद्धिविणयविविहोवयारओ जेण सयलगामज्जणो । विहिओ पहिडुहियओ एगं लञ्छि विमोत्तुणं ॥ १ ॥
अहवा न सो कोऽवि गुणो जो तस्स न विज्जए दियवरस्स । तं नत्थि किंतु जं भुंजिएहिं दिवसं स बोलेइ ॥ २ ॥
एवं च धणविरहेवि सो अविचलचित्तणेण मणांगं पि दीणत्तमदंसितो नियनियपरिगहत्तणेण चैव संतोसमुब-
हंतो चित्तेइ-अहो महाणुभावा ! इमे धणिणो जे इमीए सिरीए परिगहिया पीडिज्जंति दाइएहिं विळुप्पिज्जंति
नराहिबेहिं अभिभविज्जंति तक्करनियरोहिं मग्गिज्जंति मग्गणगेहिं अणुहवंति विविहावयाओ, पयमेत्तं पि न परि-
भमंति सच्छंदयाए, तुच्छऽपत्थभोइणोवि अभिलसिज्जंति वाहीए, अहं पुण एत्तो एगस्सवि अणत्थस्स न गोयरसु-
वगओत्ति, एवं तस्स परिभावितस्स वच्चंति वासरा । अन्नया य सो सिवभद्दाभिहाणाए निययपणइणीए भणिओ,
जहा-अज्जउत्त ! आवन्नसत्ता वहामि अहमियाणिं, पसवसमए विसेसेण मह ओसहाइणा कज्जं भविस्सइ, तो कीस
तुमं न किंपि पुरिसयारमवलंबेसि ? न वा दव्वोवज्जणोवायं विगप्पेसि ?, न हि अणागयत्थचित्तापरंमुहा सलहि-
ज्जंति पुरिसत्ति, सो एवमायन्निज्जण तक्खणविसुमरियपुव्वविचेओ जलहिच्च मेहोदएणं कुवियप्पकल्लोलमालाउलो परि-
भाविउमारद्धो-किं एत्तो ववसायं करेमि ? कं वा जणं अणुसरा मि ? को वा इमस्स कज्जस्स होज्ज सोहेज्जदायगो ?
कत्थ व गयस्स एयं सिज्जेज्ज ? को इमस्स हेउत्ति, इय किंकायव्ववाउलत्तजलहिंमि सो बुड्ढो, ताहे सिवभद्दाए
भणिओ सो-कीस वाउलो होसि ?, केत्तियमेत्तं एयं तुह विमलकलाकलावस्स ?, जइ कमविडु धणवंतं गंतुं मग्गेसि

सोऽवि ध्रुवमेयं कज्जं पसाहइस्सइ, दुलहो तुम्हारिसो अतिही, गोभदेण भणियं—पिए ! साहेसु परपत्थणं मोत्तूण
अन्नसुवायं, पत्थणा हि नाम नरस्स जणेइ मरणसमयनिव्विसेसत्तणं, तहाहि—जायणापयट्टस्स सन्निवायाभिभूयच्च
पक्खलइ वाणी विगलंति विच्छायछायाओ अच्छीओ विगयसोहं हवइ वयणकमलं कंपंति अंगाइं पयट्टंति दीह-
दीहा उस्सासा संखुब्भइ हिययंति । अविय—

तावच्चिय कुमुयभयंकनिम्मला विप्फुरंति गुणनिवहा । जाव परपत्थणाकलुसपंकलेवं न पावेति ॥ १ ॥

तावच्चिय पूइज्जइ गुरुत्तबुद्धीए परमभत्तीए । जावऽत्थित्तं सत्तुत्तणं व पयडेइ न पुरिसो ॥ २ ॥

तावच्चिय सुहिसयणत्तणाइं दंसंति निच्छियं लोया । देहिति दुट्ठमक्खरजुयलं जा नेव जंपेइ ॥ ३ ॥

देहिति जंपिरेणं माणविसुक्केण विणयहीणेणं । धम्मत्थवज्जिएण य जाएणवि को गुणो तेण ? ॥ ४ ॥

ता अन्नसुवायंतरमहुणा मम दुक्करं पि किंपि पिए ! । साहेसु पत्थणंपिहु मरमाणोवि हु न काहामि ॥ ५ ॥

इय सा तन्निच्छियसुवलब्भ खणमेगं चित्तिऊण भणिउमारद्धा—अज्जउत्त ! जइ एवं ता अत्थि अन्नो उवाओ,
परं बहुसरीरायाससज्जो अचिरकालसाहणिज्जो य, जइ भणह ता निवेएमि, गोभदेण भणियं—पिए ! को दोसो ? निवे-
एहि, तीए भणियं—सुणेसु, अत्थि पुवदेसे असंखदेवउलमालालं किया चाणारसी नाम नयरी, तीसे समीवे फुरंतफा-
रभंगुरतरंगाविद्धविमुद्धसलिला हंसचक्कवायमिहुणोवसोहिया अणवरयवहंतमहासलिलप्पवाहपूरियरयणागरा गंगा नाम

महानई, तीसे तडंमि बहवे दूरदेसंतरागयराईसरसेट्टिसेणावइदंडनाहप्पमुहा जणा केइ परलोगत्थिणो केइ
कित्तिजसत्थिणो केइ अणत्थपडिघायत्थिणो केइ पियरतप्पणत्थिणो अणवरयं कारावित्ति महाहोमं पाडित्ति
पिंडं दिंति सुवन्नंदाणं सक्कारित्ति उद्धूलियचलणे माहणेत्ति, अओ अज्जउत्त ! जइ तुमंपि तंतथ वच्चसि ता उवत्थाण-
मेत्तेण पत्थणाविरहेऽवि पावेसि कणगदक्खिणं, थेवमेत्तकालेण य पडिनियत्तिहिंसि, इमं निसामिऊण भणियं गोभइ-
ण-पिए ! सुद्धाऽसि तुमं, सवणरमणीया खलु दूरदेसवत्ता, सिवभहाए भणियं-अज्जउत्त ! तहावि भवणनिविट्टस्स का
तुज्झ कज्जनिप्फत्ती ? गोभइण भणियं-किमजुत्तं ? एवंपि होउ, कुणसु संबलं जेण वच्चामि, तओ तीए कयं से नि-
मित्तं पाहेज्जं, अन्नदिवसे संबलगहत्थो पयट्ठो सो वाणारसीसंमुहो, कमेण वच्चंतेण दिट्ठो निट्ठुरसरीरसंठाणो नियंसि-
यवत्थजुयलो निराभरणोवि अहिगं सरीरप्पभाए उवसोहंतो वज्झागारेणविलक्खिज्जमाणातिसओ पवरपाउगाधिरूढो
रतिविरहिओ वम्महोव पच्चक्खो सलीलं असंभंतो पहे वच्चंतो एगो सिद्धुरिसो, तं च संभमभरियाहिं अच्छीहिं जाव
पेच्छइ ताव संभासिओ अणेण-भो गोभइ ! समागओऽसि ? किं संपयं तुमं वाणारसिं गंतुमिच्छसिस्ति बुत्ते सवि-
म्हयं गोभइो चित्तिउमारद्धो-अहो कंहं अदिट्ठं असुयं मं पच्चभिजाणइ ? कह वा मम गिहिणीए य एगंतजायं इमं
गमणवइयरं उवलक्खेइ ? सव्वहान एस सामन्नो हवइत्ति, तहा जो एत्तिंयं मुणइ सो अन्नपि मुणिसइ, ता देवयं
व उवचरेमि एयं, जइ पुण एत्तोच्चिय निप्फत्ती होज्जत्ति विभावित्तो जोडिय करसंपुंडं तं भणिउमाढत्तो-अज्ज !

एवमेयं, सम्मं तुब्भोहिं वियाणियं, तेण भणियं-भद्द ! एहि समं चिय, जेण तहिं वच्चासो, पडिवन्नं गोभदेण, गंतुं पयट्ठा, खणंतरे जाए भोयणसमए गोभदेण भणियं-अज्ज ! पविसह गाममज्झे, करेमि भोयणोवक्कमं, अहकालो वट्ठइत्ति, विज्जासिद्धेण भणियं-सोम ! किमत्थ पविट्ठेहिं कायच्चं ? एहि अज्जवि जाममेत्तो वासरो कोमला सूरकि-रणा थेवमगं अइक्कंता य, गोभदेण भणियं-जं तुब्भे वियाणह, तओ पुणो पयट्ठा गंतुं, मज्झंदिणसमए य संपत्ता बहलतरुसंडसंछणं उज्जाणं, दिट्ठा य तत्थ अच्छसलिलपडिहत्था कमलकेरवकलहारपरगपिंजरहंसेवसोहियतीर-देसा एगा महासरसी, पविट्ठा तत्थ, कयं मज्जनं, विहिया मुहसुद्धी, पयट्ठो य गोभदो देवयाणुसरणं काउं, इय-रोडवि ठिओ समाहीए ।

एत्थंतरंमि बहुमक्खभोयणा रसवई गुणसमिद्धा । बहुवंजणपडिपुण्णा मंतपभावेण अवयरिया ॥ १ ॥

कच्चोलथालदवीसिप्पिसणाहो उवकखरो सव्वो । सुविणीयपरियेणपिओच्च पुरओ ठिओ तस्स ॥ २ ॥

एरिसं च परमब्भुयभूयं वइयरमवल्लोइऊण विम्भिओ गोभदो, भणिओ य विज्जासिद्धेण-गोभद्द ! पगुणो भव, कुणसु भोयणंति, जमज्जो आणवेइत्ति पडिवज्जिऊण तच्चयणं उवविट्ठो सो भोयणकरणत्थं, विज्जासिद्धोडवि परिवे-सिउमारद्धो, कमेण य निव्वत्तियभोयणंमि गोभदे सयमुवविट्ठो विज्जासिद्धो, गोभदेणचि कओ से परिवेसणाइवा-वारो । एवं च निव्वत्तियंमि भोयणे विज्जासिद्धविमुक्केकुंकाराणंतरमेव अहंसणमुवगया थालाइसमेया रसवई, खण-

मेत्तं च वीसमिऊण माहवीलयाहरे निरुविग्गहियया विविहकहालो कहेमाणा संपट्टिया गंतुं, गच्छंताण य जाए रयणिसमए गोभेहेण भणियं—अज्ज ! कलयंतकंठसच्छहा समुच्छलइ तिमिरिंछोली न लक्खिज्जंति संपयं निणुणण्या महिमग्गा निदावसविसंतुलाइं घुम्मंति लोयणाइं पयत्तसंचालियावि न चलंति चलणा, ता गच्छह गामे, कुणह वीसामंति, विज्जासिद्धेण भणियं—सोम ! सिग्घगईए एहि सुहुत्तमेत्तं, किं गामपवे- सणकज्जं, गोभेहेण भणियं—एवं हयउत्ति । ताहे जाममेत्तं अद्धानमइलंघिऊण ठिया एगतथ पएसे । तयणंतरं च विज्जासिद्धो आवद्धपउमासणो निरुद्धसमीरण्यारो ज्ञाणं काउमारद्धो, अह—

कणगकलसकलियं रणंतमणि किंकिणी निवहरम्मं । सुसिलिट्ठलट्ठथिरथोरथंभसोहंतवरसालं ॥ १ ॥

सुचिभत्तचित्तेरंहंतवेइगावलयलीढेपरंतं । वज्झपएसनिवेशियमहल्लपल्लकसोहिल्लं ॥ २ ॥

गयणाओ अहापवरं विमाणमेगं समोयेरेऊणं । विज्जासिद्धस्स पुरो लहुं निविट्ठं धरणिवट्ठे ॥ ३ ॥

अह तत्तो नीहरिऊण दिप्पंतमणिमउलंकियसिरा विमलकुंडलकंतिविच्छुरियगंडयला पवरसुत्तासरिविराइय- सिरौहरा हारलयाच्छाइयथणकलसा पंचरायमणिकंकणमंडियकोमलवाहुलया रोमाचलीसणाहसुट्ठिगेज्झमज्झभाग- देसा रसणादामसंगयनियंवफलया नियंसियपंचवन्नदिबद्धसा झंकारमणहरमणिनेउराणुगयचलणा हरियंदणरसवि- च्छुरियसरीरा अप्पडिमरूवा एगाए समाणरूवजोव्वणाइगुणालंकियाए विलयाए अणुगम्भमाणा समागया विला-

सिणी, जोडियकरसंपुडा य विज्जासिद्धं भणिउमारद्धा, जहा-भो महायस ! उवसंहरेसु संपयं मंतसुमरणं अलंकरेसु चिमाणमेयंति निसामिऊण उट्टिओ विज्जासिद्धो, पविट्टो विमाणब्भंतरे निसन्नो सेज्जाए, उवणीयाणि य तस्स तंबोलवीडगाणि, ताहे वाहारिओ विज्जासिद्धेण गोभदो, तंबोलदाणपुव्वगं च विसज्जिओ निद्दाकरणाय, दूरे ठाऊण य तदीयसाहएपविम्भिहयमणो पसुत्तो एसो, विज्जासिद्धोवि ताहिं रमणीहिं समं विविहसंकहाहिं गमिऊण खणमेक्कं जेट्ठाए अणुचरिं जुवइं भणइ-भदे ! तुमं इमस्स गोभदस्स साहणस्स भज्जाभावदंसणेण अत्ताणं पवित्तं करेसु, तीए वुत्तं-एवं करेमि, अह जायंमि विज्जे विज्जासिद्धो पारद्धो इयरीए समं भोगे उवसुजिउं, सावि तदुवरोहेण गया गोभदसमीवे, पबोहिऊण सिद्धो विज्जासिद्धाएसो, तेण य कुसलमइत्तणेण नाऊण कज्जपरमतथं भणिआ सा, जहा-मयच्छि ! भगिणी तुमं मे होसि, ता अलं एत्थ पत्थुयत्थवित्थरेणं, जहाभिण्येयं समायरसु; अकज्जपवित्तीएवि जओ न एयस्स हयजीवियस्स कोऽवि समुण्णइ गुणो, अविय—

अइघोरमारुयाहयनलिणीदललगसलिलवचवलं । जीयं सुपालियंषिहु न चिरावत्थाणमणुहवइ ॥ १ ॥
विचिव्होवभोगविसयाणुकूलयालालियंपि बहुकालं । परिसडियविंदफलमिव विगलइ गत्तंपि अचिरेण ॥ २ ॥
सुव्वंति य नरएसुं धम्मविरुद्धत्थकरणसत्ताणं । सत्ताणं तिवखदुक्खाइं तेण कुणिमो कहमकज्जं ? ३ ॥
सकलत्तसंगइविहु उउकालाओ परेण पडिसिद्धा । किं पुण परमणीजणविसयपसंगो समयसत्थे ॥ ४ ॥

नियजीवरसवि उम्मसगगामिणो जइ करेमि न निरोहं । ता कह अन्ने अणशरचारिणो नणु निरुंभिस्सं १ ॥ ५ ॥
इय गोभेहेण तहा कंहं पि संभासिया सवेरगं । नियभायनिव्विसेसो जह जाओ तीए पडिबंधो ॥ ६ ॥

खणमेत्तं च विगमिऊण भणियं तीए—अहो महाणुभाव ! सुंदरो तुहाभिप्पाओ, एयं चिय सधुरिसलक्खणं,
एयं चिय धम्मसव्वस्सं, एत्तो सयलक्खणोवलंभो, इमाओ असेसुसज्झविज्जासिद्धीओ हवति, एयं खु सुरासुरा-
णवि दुरणुचरं, एयाणुगओ य नरो न रोगसोगदुक्खेहिं चाहिज्जइ, ता पत्तं तुमए जम्मजीत्रियफलं जस्सेरिसो
दुक्करपरिथीसेवापरिहरणपरिणामो, एयं च कुणमाणेण तए अहं पि निओइया सव्वकामुयसिद्धिआभेणति, गोभेहेण
भणियं—कंहं चिय मए निओइया सव्वकामुयसिद्धीए ?, तीए भणियं—महायस ! भायनिव्विसेसोत्तिकाऊण साहि-
जइ तुज्झ एस वइयो, निसामेहि, गोभेहेण भणियं—एसो निसामेमि, तीए कहियं—

अत्थि सयलतइलोयविक्खायं अणेगअच्चन्नुयभूयाइसयजणियजणविम्वयं आगरो विज्जारयणाणं कुलभवणं तं-
तप्पओगाणं ठाणं खुडुसिद्धीणं जालंधरं नाम पुरवरं, जत्थ—

आगट्ठिवसीकरणप्पओगअदिस्सकरणकुसलाओ । नहगमणदूरदंसणपमोक्खलद्धीसमिद्धाओ ॥ १ ॥

हुंकारमेत्तपडिभिन्नसत्तुसंदोहतुट्ठहियाओ । निरुवमरूचनिरक्खियंमहमहिलाभिमाणाओ ॥ २ ॥

अट्ठप्पयारअणिमाइसिद्धिसंवंधसस्सिरीयाओ । निवसंति जोगिणीओ देवाणवि बंदणिज्जाओ ॥ ३ ॥

इय्यरजणा दुव्विणयं जं नो दंसंति तं किमच्छरियं ? । तासिं महाबलाणं संकइ कुचिओ कयंतोऽवि ॥ ४ ॥
सुरखयरजन्नखरकखसमडप्फरप्फंसणावि नूण जरा । निचावट्ठियजोव्वणगुणाण जासिं न संकमइ ॥ ५ ॥
चिरदूरकालवोलीणभूवईणं समग्गचरियाइं । अज्जवि जाओ पयडंति सेललिहियप्पसत्थिच्च ॥ ६ ॥

इय तारिसपयडपभावजोगिणीचक्कवालकलियस्स । नयरस्स तस्स भण केण वन्नणा तीरए काउं ? ॥ ७ ॥

तत्थ य अहं चंदलेहाभिहाणा जोगिणी परिवसामि, एसावि विज्जासिद्धसमीववत्तिणी मम जेड्डा भइणी पसा-
हियप्रवरविज्जा अचंतदरिसणिज्जा जोगिणीपीढस्स चउत्थट्ठाणपूयणिज्जा चंदकंतानामा, गोभइण भणियं-भइणि !
को एस विज्जासिद्धो ?, किं नामो ?, कहं वा एरिसमाहण्यो ?, किं वा एस तुह जेड्डभइणीए एयं उवचरइत्ति, केहेसु
बाढं कोऊहलाऊलं मे हिययं, चंदलेहाए भणियं-कहेमि, एसो हि कामरूपाभिहाणजोगिणीपरिवेढियस्स डमरसी-
हस्स पुत्तो ईसाणचंदो नाम, एएण य पुरा अणेगप्पयाराओ साहिऊण विज्जाओ अखलियपसरं सयलकामियसिद्धिं
समीहमाणेण कच्चाइणीए भगवईए पुरओ कओ अट्टोत्तरविछलक्खेण होमो, तित्थियमित्तेणवि जाव न परितुड्डा
भगवई ताव आकट्टिऊण खगग्गेणुं समारद्धो नियकंधरं छिदिउं,

नियजीवियनिरवेक्खो, कंठइं जा न छिदए एसो । ताव सहसत्ति कत्तोवि आगया देवि रुदाणी ॥ १ ॥
अहह महाकट्टमिमं कीस तुमं पुत्त ! ववसिओ भीमं ? । इय जंपिरीए तीए कराओ छुरिया लहुं हरिया ॥ २ ॥

ताहे इमेण भणियं देवि ! पसीयसु ममेत्तिएणावि । पडिवज्जसु सिरक्कमलेण पूयणं होउ सीसेण ॥ ३ ॥
 देवीए तओ भणियं पुत्तय ! तुह साहसेण तुट्ठमिह । वरसु वरं एत्ताहे पज्जत्तं देहपीडाए ॥ ४ ॥
 तओ एएण भणियं-सामिणि ! जइ सच्चं चिय तुट्ठासि ता जं तुमए पुत्तत्ति अहं वागरिओ एसो चिय मम वरो,
 एत्तो य पुत्तबुद्धीए मम पेच्छेज्जासित्ति भणियावसाणे दाऊण सबसमीहियत्थकरं रक्खावल्यं पडिवज्जिऊण तव्वयणं
 अइंसणसुवगया कचायणी, एसोऽवि पाव्रियतिलोयरज्जं पिव अत्ताणं मन्नमाणो रक्खावल्यमुच्चहतो सगच्चं अक्खलि-
 यगमणो सच्चत्थ वियंभिउमाढत्तो । अविद्य—

न गणइ नरवइवग्गं नय भीमभएवि उव्वहइ कंप्पं । सच्छंदलीलगमणो जमंप्पि उव्वहसइ सबलेणं ॥ १ ॥
 अंतोउरेसु निवसइ उव्वसुंजइ कुलगयावि विलयाओ । आगरिसइ दूरगयंप्पि वत्थु वरमन्तसत्तीए ॥ २ ॥
 जप्पभिइं चिय कचाइणीए एयस्स वाहुमूलंमि । वद्धं रक्खावल्यं तत्तो चिय चित्तिंयं ल्हइ ॥ ३ ॥
 अह अन्नया कयाई हिंडंतो एस महियलं सयलं । संपत्तो जालंधरपुरंमि रामाभिरामंमि ॥ ४ ॥
 दिट्ठा य जोगिणीजणमज्झगया विहियपवरसिंगारा । अह तत्थ चंदकंता एसा मम जेड्डिया भयणी ॥ ५ ॥
 ताहे हठेण वररुवजोव्वणाइसरंजिओ एसो । कुणइ पसंगमिमीए सद्धिं सद्धम्मनिरवेक्खो ॥ ६ ॥
 ठाऊण कइवय दिणे सच्छंदं विविहदिवकीलाहिं । अणवट्ठियमणपसरो अमुणिजंतो विणिक्खंतो ॥ ७ ॥

तयणंतरं च कथयि एत्तियकालं परिब्रमिय इमिणा । दिवविमाणोरूढा अहयं एसावि मह भइणी ॥ ८ ॥
आगिटिसत्तिणा आणीयाओ संपइ पयंडडेण । सिरिपव्वयगमणट्ठा गेहाओ नीहरंतीओ ॥ ९ ॥
एत्तोऽणंतरमेवं जमेस वागरइ तं करेमोत्ति । बुज्झइ खंधेण हडो सच्चं चोरस्स बलियस्स ॥ १० ॥
एयमायन्निऊण गोभइेण चित्तिंयं-अहो रक्खसाणंपि भेक्खसा अत्थि, जमेवविहजोगिणीजणोवि एवं आणानि-
इंसंमि वट्ठाविज्झइ, अओ चिय भणिज्झइ-बहुरयणा वसुंधरां भगवई, एत्तोचिय वरगुणगणनिहिणोऽवि न गव्वसुव-
हंति सप्पुरिसा, चंदलेहाए भणियं-अहो महायस ! एवं किर साहियवं, जइ एस विज्जासिद्धो एत्थ पत्थावे मम
भइणीचंदकंताए न बंभचेरभंगं करेत्तो ता इमीए सयंपभा नाम महाविज्जा साहिया हुंता, मम पुण तुमए सील-
खंडणं अकुणमाणेण तस्साहणविही अज्जवि पडिपुन्नो चेव वट्ठइ, सत्तरत्तमेत्तेण य चित्तियत्थसंपत्ती भविस्सइ, ता
भो महाणुभाव ! जं पुरा पुच्छियं तुमए जहा कहं मए जोइया सबकासुयलाभसिद्धीयत्ति तत्थ एस परमत्थो, गोभ-
इेण भणियं-सुयणु ! किमतथ भणियवं ?

पीडंतु गहा विहडंतु संपया पडउ दुक्खदंदोली । सयणावि होंतु विमुहा तहवि न मुंचामि सच्चरियं ॥ १ ॥
नियजीवस्स खलस्सव जहिच्छचारेण दिन्नपसरस्स । दुक्खेण मामि ! सम्मग्गठावणं जइजणो कुणइ ॥ २ ॥
चंदलेहाए भणियं-एवमेयं, किं वन्निज्झइ तुम्ह निम्मल्लगुणाणं जस्स एरिसं जिहंदियत्तणं ? एवंविहो अज्जककरण-

नियमो एरिसं पावभीरुत्तणं एवंरूवा य वयणपइहा, सबहा धन्नाऽहं कथलक्खणाऽहं जं मए तुमं सप्पुरिससिरसेहरभूओ
दिट्ठोसित्ति, गोभेहेण भणियं-केत्तियमित्तोऽहं, अज्जवि महीयले दीसंति ते महापुरिसा जेसिं चरणेरणुमेत्तस्सवि नं सारि-
स्समुवहंति अम्हारिसा । तओ चंदलेहा सप्पणयं सीसे अंजलिं काऊण भणिउमारद्धा-अज्ज ! तुह असरिससच्चरियभत्ति-
परवसत्तणेण किंपि चिन्नविउमिच्छइ मम मणो, गोभेहेण भणियं-भेइ ! कीस एवं संखोहसुवहसि ?, निविसं कं भणसु
जहाभिस्सेयं, चंदलेहाए भणियं-जइ एवं ता कयाइ परिभमणपरिवाडीए कायवो अम्ह गेहागमणेण अणुगहो, गोभ-
हेण भणियं-किमणुचियं ?, नहि तुह गेहमागच्छंत्तस्स मम किंचि लहुयत्तणं, पत्थावंमि जहोचियं आयरिस्सामि, न
अन्नहा तुमए संभावणिज्जं, चंदलेहाए भणियं-महाभाग ! बाढं अणुगहियम्हि, न एयमन्नहा कायवंति, एवं च जाय-
तक्खणपेमाणुबंधंघुराहिं विविहसंकहाहिं सभावसाराहिं विमुमरियसेसवावाराणं ससहरजोणहावसोवलक्खियपरो-
पररूवाणं तेसिं झडत्ति जाया पच्छिमरयणी, उम्मीलिओ पुरंदरदिसिमुहे जवाकुसुमगुजद्धकुसुंभरसकिंसुयसुयसुहप-
उमरायसरिसवन्नो कुंकुमबहलरागोवसित्तोव सूरसारही, पविरलीभूयं गयणंगणे तारगावल्यं, वियंभिओ पच्चससिसिर-
मारुओ पल्हत्थिओ पच्छिमजलहिम्मि रस्सिरज्जुजडिओ ससिपुण्णकलसो सलिलाक्कहुणत्थं च पच्छिमदिसिरमणीए,
एत्थंतरे विज्जासिद्धेणं भणियं-भो भो गोभइ ! बहुप्पभाया रयणी पगुणो भवसु जेण गम्मइ, गोभेहेण भणियं-एस
पगुणीहूओऽम्हि, चंदलेहाऽवि तं आपुच्छिऊण गया चंदकंताए समीवं, विज्जासिद्धोऽवि ताओ सविमाणाओ वी-

सज्जिऊण गंतुं संपयहो, गोभदोऽवि पुणो पुणोऽणुचिंततो निसावुत्तंत लगो से अणुमगगओ, तओ आपुच्छिओ विज्जासिद्धेण-भद ! निसिंमि मए तुह समीचे पेसिया एगा तरुणी, तीए कया कावि पडिवत्ती ? गोभदेण भणियं-अज्ज ! बाढं कया, किं चिरं जीविउकामो कोइ तुह सासणमइक्कमइ ? केवलं अहं वाणारसीतित्थदंसणत्थं अबं भकयनियमो आसि, एवमायणिऊण भणियं विज्जासिद्धेण-भद ! ममावि चरणेहिं तत्थ गंतव्वंति अत्थि एस नियमो, न बंभचरपडिवत्तिरुवो, एवं ठिए विसेसेण मए तुह निमित्तं एस उवक्कमो कओ, जइ पुण तुहाभिप्पायं सुणितो ता अहंपि बंभचेरं करितो, एवं च कए तित्थदंसणं सफलं हवइ, गोभदेण भणियं-अज्ज ! एवमेयं, को तुम्हाहिं-तोवि अन्नो एरिसविवेयभायणंति ? अह पुवक्कमेण भोयणं कुणमाणा विदेसियमडेसु रयणिं अइवाहिंता पत्ता कमेण वाणारसिं, पक्खालियमुहकरचरणा य गया सुरमंदिरेसु, दिट्ठा य खंदसुगुंदरुहपमुहा देवया, कया तेसिं पूया, एवं च अणणणसुरमंदिरावलोयेणेण जाए वेयालसमए विज्जासिद्धेण भणिओ गोभदो-भद ! संपयमणुसरेमो सुरसरिपरिसरं, करेमो तत्थ पहाणेण पूयपावं अत्ताणं, गोभदेण भणियं-एह जामो, गया दोवि गंगातीरे, एत्थंतरे अविभाविय-आवयावड्ढेणेण अविचिंतियवत्थुपरमत्थेणं विज्जासिद्धेण अइरभसवसेण ओत्तारिऊण तं दिव्वरक्खावल्लयं समप्पियं गो-भदस्स, भणिओ य सम्मं रक्खेज्जासि जाव अहं इह भागीरहीवारिमज्झे सुहुत्तमेत्तं पाणायामं करेमि, एवंति पडिवज्जिय गहिय रक्खावल्लयं ठिओ गोभदो, इयरोऽवि पविट्ठो वारिमज्झे, अह सुहुत्तमेत्ते गए गोभदो विज्जासिद्धमपेच्छमाणो

संभंतन्यणो इओ तओ सयलं अवलोइउं प्रयत्तो, जाव तेहव सवओ पलोयमाणस्स पच्छिमदिसिमवलंविं भणु-
विं, विप्फुरिया वालप्पवालपाडला किरणा वाउलीह्वाइं रंहगमिहुणाइं, तओ गोभहेण निवेइया गंगतारगण
वत्ता, जहा-भो भद्दा ! अचंतखवो वरपुरिसो एत्थ तित्थंमि पविट्ठो, सो य संपयं दुत्तरउत्तुंगतरंगपरंपरापच्छाइओ
वा मगराइदुदुसत्तनिकंतिओ वा विसमपंकनिमग्गो वा भवेज्जत्ति न जाणिज्जइ परमत्थो, ता लहुं तविरहतरलियं
मम जीवियं अणुकंपमाणा पविसह नईमज्झे निरुवह तं महाभागं, मा अपत्थावे चिय अत्थमउ तारिसवरपुरिस-
दिणयरो, मा आजम्मं पाउब्भवउ सुरतरंगिणीए एरिस महाकलंकोत्ति भणियावसाणे करुणापरद्वसीकयहियया
पढाविया सवओ तारगा, समारद्धं च अमरसरियावारिप्पवाहावगाहणं, अह सद्वायेण दीहप्पसारियभुयाहिं आलो-
डिऊण जलं तेसु तेसु ठाणेषु आमूलाओ कत्थवि तं अलभमाणा पडिनियत्ता तारगा, निवेइया तदसंपत्तिवत्ता
गोभद्दस्स, सो य गाढमुग्गराभिहओव दुस्सहसोगवेगविहलंघलसरीरो विचिंतिउमारद्धो—

कह जणनयणाणंदो समुग्गओ सरयपुणिमाइंदो । कह दाहुंगाढमुहेण कवलिओ सो विडप्पेण ? ॥ १ ॥

कह भूमंडलमंडणकप्पो कप्पहुमंकुरो जाओ । कह वा मूलाओ चिय समुक्खओ वणवरोहेण ? ॥ २ ॥

कह एस सुवणतिलओ विजासिद्धो अकारणसिणिद्धो । मइ मित्तत्तमुवगओ कह वा अहंसणं पत्तो ? ॥ ३ ॥

मम मंदभग्गयाए मण्णे तस्सेरिसी दसा जाया । जत्थडहियइ कवोडो सच्चं सा सुसइ तरुसाहा ॥ ४ ॥

किल मे मणोरहो एस आसि जं चित्तियत्थसंपत्ती । एत्तो होही सयला सा पुण विहलीकया विहिणां ॥ ५ ॥
ता किं अज्जवि एरिस कलंकपंककियं नियसरीरं । विसपायवं व जणहुक्खकारयं परिवहिस्सामि ? ॥ ६ ॥

एवं च संचित्तुज सुक्ककंठं रोइउमारद्धो-हा परमच्छेरयरयणरयायर ! हा निक्कारणकरुणरससायर ! हा परम-
विज्जाहरीविलाससुभग ! हा असमसाहसपरितोसियकच्चाइणीदिणवर ! कत्थ सहसच्चिय अइगओसि ? देहि मे
पडिययणं मंदउण्णस्स, किं तुम्हारिसाणवि निवडंति एरिसीओ आवयाओ ? हा पावकयंत ! किमेक्कपएच्चिय पणहु-
पुरिसरयणं धरणिं काउमुज्जुओ सि, एवं परिदेविज्जुण तच्चिरहुइयवहपसमणत्थं गंगाजले निवडिउकामो आंबद्धनिवि-
डनियंसणो संजमियकेसपासो जोडियकरकमलो भागीरहिं विण्णविउमारद्धो-देवि ! सुरसरि एसं परमबंधवो
तुमए च्चिय अवहरिओ अओ तमणुसरिउकामो अहंपि संपयं पडेमि तुह सलिले, जओ अगिगदहाण अंगियच्चिय
ओसहंति तुहुवाओ, इइ भणिज्जुण जावज्जवि न सुयइ उचुंगदोत्तडीओ अत्ताणं ताव गहिओ सो समीववत्तिणा
नत्थियवांइजेणेण, पुच्छिओ य-अरे सुद्ध ! कीस तुमं इह निवडसित्ति ? निवेइओ अणेण गामनिगमाओ आरब्भ
सयलवुत्ततो जाव तदंसणं अभिकंखमाणो इह निवडाभित्ति, तेहिं भणियं-मूढ ! केण तुह निवेइयमेयं जमिह निवड-
णेण पियसंपओगो वाहिविगमो पावनासो वा हवेज्जत्ति, एसा हि असेसदेसंतरावगाढकोढसुद्धियसवंगनरनिवहावया-
हणदुगुंछणिज्जसलिला अणेगमडयट्टिसंधायणभक्खणपरा महारक्खसिच्च कहं मणवंच्छियत्थं पूरेज्जा ? अहो महामोहो

अहो गडरियापवाहो, सचं चिय पढंति इमं वियक्खणा—

कर्णविषेण हि दग्धः किं किं न करोति वालिशो लोकः?, । क्षपणकतामपि धत्ते पिबति सुरां नरकपालेन ॥ १ ॥

अह एत्थ निमग्गा पावंति समीहियत्थं ता रे किं कयमिमेहिं मच्छकच्छवाईहिं आजम्मंपि सलिलावगांढे-
हिंति, किं बहुणा?, सुयसु विसायं, परिच्चयसु मरणाभिलासं, कुणसु नियकरणिज्जं, न एवंविहजणो कयंतवयणपवि-
ट्ठोवि विवज्जइ, अह विणिवाओऽवि होज्ज ता विवणणीयं सरीरगं सलिलोवरि सयमेव ठाएज्जा, अओ अलं वाउ-
लत्तणेणं, होउ परिदेविएणंति । एत्थंतरे गुलुगुलियं गंधहत्थिणा वज्जियं मंगलतूरं पढियं वंदिणा रसियं सारसमि-
हुणेण, तओ तेहिं भणिओ—भो भइ ! एरिसनिमित्तेहिं अज्जवि सूइज्जइ से जीवियं, गोभइेण भणियं—तुम्ह वयणसा-
मत्थेण एवं हवउ, इय सो तेहिं मरणाओ वावत्तियचित्तो दो तिन्नि दिणाइं तत्थेव निवसिओ, अन्नदियहे य
चित्तियसणेण, जहा—न जुत्तं एत्थावत्थाणं, जओ—

वाणारसीवि वाणारसिच्च किंतइ सरीरमहिगं भे । मंदाइणीवि मं दाइणिव दूमेइ पयदियहं ॥ १ ॥

ता गच्छामि जालंधरं, पेच्छामि चंदेलेहाए भणियं पणयंति चिमाविऊण तमभिमुहं गंतुं पयट्ठो, गच्छंतेण य
संपत्ते मज्झणहसमए विज्जासिद्धभोयणाइललियं सुमरणमाणेण असुजलाविलोयणजुयलेण चित्तियमणेण—

तारिसजणदुस्सहविरहजलणजालातविज्जमाणंपि । अज्जवि न लज्जसि वज्जघडिय ! निळज्ज हयहियय ! ॥ १ ॥

तथा—तं चिय महप्पभावं रक्खावल्यं इमो य सो समओ । तेणेक्केणव चिणा-सुन्नं सत्वं दिसापडलं ॥ २ ॥
अहवा रक्खावलएवि होज्ज निप्पुन्नयस्स किं मज्झ ? । चिंतामणिलाभेऽविहु सीयइ विमुहो विही जस्स ॥ ३ ॥
आधारवसेण धुवं गुणोदया न उण जहा तहा होत्ति । सलिलं पि सिप्पिसंपुडपडियं सुत्ताहलं होइ ॥ ४ ॥
इय एवं भावितो तमेक्कचित्तेण सो निराणंदो । जालंधरमणुपत्तो कमेण अविलंविथगईए ॥ ५ ॥
तवासिजणं च पुच्छितो पविट्ठो चंदकंताए गिहे, सुन्नप्पायं च तं दट्ठुण भणिया दुवारट्ठिया गेहरक्खिया,
जहा—भदे ! किमेत्थ कोऽवि न दीसइ, तीएवि बहिरत्तणेण वयणमसुणमाणीए दंसिया नियसवणा, तेणावि बहिरिति
नाऊण जंपियं महया सहेण, एत्थंतरे समीवगिहट्ठिएण ईसाणचंदविज्जासिद्धेण सुणिओ सो सद्दो, पच्चभिन्नाओ य,
तओ भणिओ सो-गोभद्द ! इओ इओ एहि, इहाहं निवसाभि, गोभद्दोऽवि ससंभमं वयणमेयं निसामिऊण कंहं विज्जा-
सिद्धो इव मं वाहरइत्ति जायसंको जाव कित्तिथं पि भूभागमइक्कमइ ताव समक्खं चिय दिट्ठो अणेगनाडीनिविडज-
डियसरीरो चरणपसारणं पि काउमसमत्थो ईसाणचंदो विज्जासिद्धो, तं च दट्ठुण चित्तिथमणेण—
किं किं पि कूडमेयं विभीसिया वा मइब्भमो किं वा । दिट्ठीए मोहणं वा होज्जा छलणप्पगारो वा ? ॥ १ ॥
अहवा पीढमिमं जोगिणीण सबं पि संभवइ एत्थ । नूनं सकम्मपवणप्पणामिओ जामि निहणमहं ॥ २ ॥
सुरसरियातीरे जइ तइया काऊण धम्मकिच्चाइं । परलोयं साहितोऽस्मि ता धुवं लट्ठयं होतं ॥ ३ ॥

इय जाव मरणभयकंपमाणदेहो स चिंतइ ससोगो । तुरियं ताव पुणोऽविहु विज्ञासिद्धेण वाहरिओ ॥ ४ ॥

गोभइ ! भइ किं कुणसि विव्वमं नत्थि तुज्झ भयमेत्थ । पुव्वोवणीयमहुणा रक्खावल्यं समप्पेसु ॥ ५ ॥

इय भणिए गोभइो वीसत्थो अइगओ समीवंमि । पेच्छइ विज्ञासिद्धं विविहपयारोहिं अवरुद्धं ॥ ६ ॥

अह सो ते दइणं वाहाऊल्लोयणो भणइ एवं । हा अज्ज ! तुज्झवि कंहं दुत्थावत्थाः समोत्थरइ ? ॥ ७ ॥

विज्ञासिद्धेण भणियं-गोभइ ! अलं विसाएण, लहुं बंधेहिं मम बाहुमूले रक्खावल्यं, जमज्जो आणवेइत्ति भणि-
ऊण वद्धमणेण, एत्थंतरे तडयडत्ति विहडियाइं नियालाइं, जाओ पगुणसरीरो, पुच्छिओ गोभइेण-अज्ज ! को एस
बुत्तंतो ? , कहिं नईनिमज्जनं ? कहिं एत्थ आगमणं ? , कंहं वा एस निरोहो ? , बाढं कौऊहलाउलं मम हिययं,
साहेसु परमत्थं, विज्ञासिद्धेण भणियं-साहेमि, जं तइया तरलत्तणेणवि सुमरियजुत्ताजुत्तवियारो दिव्वमाहप्पमण्णि-
ऊण तुह रक्खावल्यं पविट्ठोऽम्हि गंगाजले तस्स फलमेयं, गोभइेण भणियं-कंहं ? , सो भणइ-जाव किर तत्थ
मुत्तमेत्तं पाणायामं काऊण ठिओ ताव सहसच्चिय अच्चंतं सरीरविवलत्तणं लंभिऊण तुम्हारिसेहिं अपेच्छिज्जमाणो
उक्खित्तो अहं एयगिहसामिणीए पुव्ववेराणुबंधुसुव्वहंतीए चंदलेहाभिहाणाए जोगिणीए, उवणीओ एत्थ ड्ढाणे, दढं
निजंतिओ निगडाईहिं, गोभइेण भणियं-अज्ज ! केण पुण कारणेण-इमीए सद्धिं वेराणुबंधो ? , विज्ञासिद्धेण भणियं-जं
तइया विमाणमारुहिय समागयाए जेइमइणीए चंदकंताभिहाणाए मए बलापरिभोगो कओत्ति, गोभइेण भणियं-

कहं पुण चिंतियमेत्तसमत्थवत्थुलाभेऽवि संपयं तुह एरिसं अचित्तिणिज्जं विसममावडियं?, विज्जासिद्धेण भणियं-देवया-
दिन्नरक्खावल्यविरहो एत्थ कारणं, परं भद्द! तुमए नित्थारिओऽहं इमाओ आवयाओ, साहु साहु तुह वियक्खणत्त-
णस्स, एरिसमवत्थंतरनिवडियस्स न तहा जाया मह देहपीडा जहा तुह अदंसणेणं, मन्ने इह भवे चियं पसन्ना भा-
गिरही देवी जीए तुमं अणुवचरियपरूढपणओ मित्तो पणामिओ, ता वाढं पसन्नं मे मणो, वरेसु जहा पियंति भणिए
गोभेहेण भणियं-अज्ज! देवो वऽण्णो जाणइ कोवि अणुवचरियपरूढपणओ कस्सवि मित्तो पणामिओ, विज्जासिद्धेण
भणियं-अलं इमीए संकहाए, वरेहि जहिच्छियं वरं, गोभेहेण भणियं-महापसाओ, पत्थावे वरिस्सामि, एत्थंतरे डम-
डमिरडमरुयनिनायभरियमुयणंतराला वराभरणकिरणविच्छुरियनहंगणा दिव्विमाणारूढा पविट्ठा चंदलेहा य चंद-
कंता य, तओ गोभेहेण भणियं-विज्जासिद्ध! कहमिणिह तुमं एयासु वट्ठिस्ससि?, विज्जासिद्धेण भणियं-जहा सत्तुसु
वट्ठिज्जइ, गोभेहेण भणियं-अज्ज! माभेवं जंपसु, जओ विसवल्लि वट्ठती वेरपरंपरा न कोसल्लमावहइ, विज्जासिद्धेण
भणियं-ता किं कीरइ?, विवक्खांभिभवेणेव अत्तणो अवत्थाणंति, नहि निसासंतमसखंडिऊण पभवइ मायंडमंडलं,
नेव य पंकत्तणमपावेऊण धूलिपडलं चिरावत्थाणं वंधेइ सलिलं, गोभेहेण भणियं-अत्थि चिय एस ववहारो, परं मम
वयणोवरोहेण ताव उदासीणेण होयवं तुमए, विज्जासिद्धेण भणियं-जं तुमं जाणासि, एवं वुत्ते जणेण अमुणिज्जंतो
तत्तो सो नीहरिऊण पट्ठिओ तंमंदिराभिमुहं, इंतो य दिट्ठो चंदलेहाए, रयणियरप्पगासदिट्ठरूपाणुमाणेण य

जायपच्चभिन्नाणाए तीए गाढमालिंगिऊण सुहासणत्थो हरिखुल्लसियलोयणाए पुच्छिओ-अज्ज ! कत्तो कहं वा समा-
 गओऽसिस्सि ? , तेणावि से साहिओ सामन्नेण वुत्ततो, चंदलेहाए भणियं-सुहु कयं तुमए जमेत्थ पत्थावे समाग-
 ओऽसि, जओ अम्ह पडिपुन्ना इयाणिं सवे मणोरहा, गोभदेण भणियं-कहं चिय ? , तीए भणियं-जं तइया तुमए
 मम वंभचेरखंडणा रक्खिया तेण सत्तरत्तपज्जंते सम्ममाराहिज्जमाणा सिद्धा भगवई सयंपभाभिहाणा विज्जा, सो य
 दुट्ठविज्जासिद्धो ईसाणचंदो सव्वकामुयरक्खावलयविहूणो जणहुकन्नाजलमज्झगओ झसोच्च विवसो पाविओ, गोभ-
 देण भणियं-कहमियाणिं सो संठविओ ? , तीए भणियं-जहा दुट्ठकरिवरो, तेण भणियं-किमित्थं पुण तहा धरि-
 ज्जइ ? , तीए भणियं-कसिणचउइसीए चंडिगाए बलिविहाणत्थं, गोभदेण भणियं-जइ एवं ता दंसेसु तं थेवदिणपरि-
 चियत्तणेण तेण समं मे किंपि यत्तव्वमत्थि, तीए भणियं-को दोसो ? , एहि जेण दंसेमि, तओ पट्ठियाइं गंतुं, जाव
 य केत्तियमेत्तमंतरमुवगया चंदलेहा ताव दिट्ठो विज्जासिद्धो बाहुवद्धरक्खावलयो वियलियनियलंबंधणो महाकोव-
 फुरंताहरो पायडियनिडालभिउडिभासुरोत्ति, तं च दट्ठण चित्तियमेयाए-अहो कहं रक्खावलयलाभो इमस्स रक्ख-
 सस्स ? , कहं वा नियडच्छेओ संपत्तो ? , अहो अवितक्कियं केरिसमावडियंति ? , जायभयावि आगारसंवरणं काऊण तेण
 समेया समीवमुवगया एयस्स, तेणवि इतिं दट्ठूण ईसि पच्छाइयकोवविरागेण संभासिया, जहा भदे ! उवविस,
 तओ आसणनिसन्नाए चंदलेहाए पुणो कइयवेण उट्ठमवल्लोइऊण भणियमणेण-अहो कहं पुव्वपरिचिओ गोभदो

दीसइ?, इओ एहि भइ!, किं तुमं पि अहमि व एयाए छलणगोयसुवगओत्ति जेण वाणारसीविमुक्कोवि एत्थ पेच्छि-
जसि?, गोभइण चित्तिं-अहो गाढो अमरिसो, ता तहा करेमि जहा अवरोग्परं पणयभावो हवइ एसिं, अणु-
चिया हिओवेहा विसिद्धपुरिसाणंति, इइ संचित्तिऊण आबद्धकरंजली सो भणिउमाढत्तो—

हे भइणि चंदलेहे! हे विज्जासिद्ध! गुणगणसमिद्ध! जइविहु कुसलत्तणओ तुम्हाण न किंपि वत्तवं ॥ १ ॥

तहविहु असरिसपेमप्यबंधसंधतरलियमणोऽहं। दिवभावभूरिजंपिरसभावओ किंपि साहेमि ॥ २ ॥

जो तुम्ह परोष्परमेस रोसलेसो कहंपि संभूओ। सो मोत्तवो होइत्ति परमेवरिच्च दुहदायी ॥ ३ ॥

जेणानलुच्च पढमं नियठाणं दहइ एस वहुत्तो। ता अवगासोऽवि कहं दायवो होइ एयस्स? ॥ ४ ॥

अह वेरिसु दोसकरणत्तणेण कोत्रो समुल्लसइ तुम्ह। कोवेचिय किं कोवं न कुणह दुक्खेक्कहेउंमि? ॥ ५ ॥

न चलइ गरुयाण मणो अवरहपए अईव गरुएवि। जह जलहरेण खुब्भुइ गिरिसरिया तह न नइनाहो ॥ ६ ॥

तथा-अवयारे अवयारो जं कीरइ एस नीयववहारो। उवयारकारगच्चिय गरुया अवयारिणि जणेऽवि ॥ ७ ॥

इहरा विसेसलंभो उत्तमनीयाण कह णु जाएज्जा!। न हि एगरूवत्थुंमि होइ विविहाभिहाणाइं ॥ ८ ॥

अलमेत्तो भणिएणं तुम्हं जइ मम गिरंमि पडिबंधो। जइ उत्तमगुणमगेण विहरिउं विज्जाए विच्छा ॥ ९ ॥

जइ ससहरजोणहासत्थं च किंतिं सया समभिलसह। पुद्वाणुसयं मोत्तुं परोष्परं कुणह ता पणयं ॥ १० ॥ जुम्मं।

अणं च-हे विज्ञासिद्ध ! पओसमुव्हंतो कंहं न लज्जिहिस्सि ? । इत्थीसु तिहुयणंमिवि अवज्झसब्भावसिद्धासु ॥ ११
इतिहासपुराणपमोक्खसत्थविक्खायमवि इमं तुज्झ । पम्हुट्टंकीस ? महाणुभाव ! कुसलावि मुज्झंति ? ॥ १२ ॥
आयन्निऊण एवं विज्ञासिद्धेण जायल्लेण । भणियं आप्सं मे देहि लहुं जमिह कायवं ॥ १३ ॥

उप्पहपवन्नमारिसज्जणबोहणकारेण निम्मविद्या । वेयत्थमहानिहिणो तुब्भे नूणं पयावइणा ॥ १४ ॥
एवं सोऊण गोभेहेण भणियं-साहु साहु विज्ञासिद्ध ! को अन्नो एवं वियाणेइ वोत्तुं ? अहवा-को सिसिरइ नि-
सिनाहमंडलं ? , को वा चित्तेइ सिहिसिंहडाई ? । देहसहसमुग्गओ चैव विणओ तुम्हारिसज्जणं ॥ १ ॥ उट्टेसु
संपयं ऊणसु चंदलेहाए पणामं, चंदलेहे ! तुमंपि विमुक्कमच्छरं परिचत्तपुवाणुसयं नियसु इमं सयणनिव्विसेसं,
विहेसु इमेण समं पणयभावं, इय भणियावसाणे निवडिओ चंदलेहाए चलणेसु विज्ञासिद्धो, भणिउमारद्धो
य-सुयणु ! तारुन्नमएण वा विज्ञावलावलेवेण वा अविवेयसुलभदुविणएण वा मए जमवरद्धं तं तुमए मरिसियव्वंति,
चंदलेहाए भणियं-विज्ञासिद्ध ! अलं खामणेणं, सब्बहा मंदभागिणी अहं जा थेवमेत्तावराहेवि एवंविहमणत्थं
काउं ववसिया ।

एत्थंतरंमि कइवयचेडीचक्केण परिवुडा झत्ति । विम्हयनिब्भरहियया समागया चंदकंतावि ॥ १ ॥
ताहे गोभेहेणं विज्ञासिद्धो पयंपिओ एवं । जीए कए वइरमिमं तहि(तुह)डिया सा इमा सुयणु ॥ २ ॥

ता परिमुक्तांमरिसं सविसेसं कुणसु खामणमिमीए । रोसावेसो थेवोऽवि होइ अग्निव दुहहेऊ ॥ ३ ॥
इय भणिए भइणीसिद्धसंधिसंधणतुट्टहिययाए । तीए विज्जासिद्धेण खामणा सायरं विहिया ॥ ४ ॥
एवं च पणट्ठकोवाणुबंधाणं एगजणीजणियाणं व जायदढपेमाणं तेसिं परोप्परं जंपिराणं महाणसिणीए आगं-
तूण विन्नत्ता चंदकंता-देवि ! कुणह पसायं, एह गेहस्मि, निष्फन्ना रसवई, मज्झंदिणमणुपत्तो य भयवं भुवणचक्खू
दिणयोत्ति, एवं च निसामिऊण चंदकंताए भणियं-हे चंदलेहे ! भोयणत्थमुचनिमंतेसु पाहुणगे अइकालो वट्टइत्ति,
तंओ चंदलेहाए उट्टविओ विज्जासिद्धो गोभदो य, गया भोयणमंडवं, कयं समगं चिय विविहविच्छित्तिप्पहाणं
भोयणं, तदुत्तरं च दवावियाइं कण्णूरधूलिधूसरपूगीफलदलसणाहाइं तंबोलबीडयाइं, एत्थंतरे विज्जासिद्धेण सिरंमि
करकमलं कट्टु भणिओ गोभदो, जहा-पुव्वपडिवन्नं गिणहसु वरं, नियत्तिउकामोऽहमियाणिं, गोभद्रेण भणियं—
जइ सचं चिय तुट्टो वियरेसु तुमं वरं महाभाग ! । ता तं एयाहिं समं (पे)म्मं सययं वहेज्जासि ॥ १ ॥
एवं कयंमि तुमए विहियं चिय मज्झ चित्तिमसेसं । परचित्ततोसदाणाओ दाणमन्नं पि किं अत्थि ? ॥ २ ॥
किर सिविवलिहरिचंदप्पमोक्खविस्संभराहिवा पुवं । नियजीवियदाणेणवि अकरेसु जणाणमुवयारं ॥ ३ ॥
खणनस्सरस्स दुहनिवहमाइणो जीवियस्स फलमेयं । जं उवथारो कीरइ दुहसंतत्ताण संत्ताणं ॥ ४ ॥
विज्जासिद्धेण तओ भणियं भो कीस वाहरसि एयं ? । तुम्हारिसाणवि पुरो किमन्नहा इति उल्लावा ? ॥ ५ ॥

निदाघुस्मिरनयणावि सज्जणा जं वयंति किर वयणं । नियजीवियवएणवि तं तह अहियं समत्थंति ॥ ६ ॥
 भिच्छाकारिं भिच्छा व भासिणं मं धुवं सुणेऊण । कच्चाइणीवि देवी लज्जाइ किं पुण परो लोगो ? ॥ ७ ॥
 ता-गोभइ ! परिच्चयसुं एत्थ मम संत्तियं अविस्सासं । अन्नं मग्गेसु वरं मा कीरउ मे पणयभंगो ॥ ८ ॥
 एयमायन्निऊण गोभइण भणियं-जइ एवं ता परिहरेसु परमहिलापसंगं, एसो हि कारणं वेरपरंपराए कुलभ-
 वणं अणत्थसत्थाणं वत्तणी नरयनगरस्स बंधवो दुव्विणयस्स ठाणं परिभवस्स आगरो अकित्तीए मसिकुच्चओ निय-
 कुलस्स निलओ पावपडलस्स मूलंकसो गुणकलावस्स जणगो उत्तरोत्तराधम्मपरिणईए, एत्तोच्चिय सुयणपयडावि
 वेरिसुयंदडकंडचंडिमखंडणेक्कसुंडावि असेसविज्जाइसयसालिणोऽवि पाविया लंकाहिबइपभिइणो विणासं, एत्तो चिय
 अविगणियतणनिविसेसैनियजीवियवा असुणियजुत्ताजुत्तकायवा तिकखलुक्खलक्खंपि अभिकंखंति पाणिणोत्ति, ता
 मूसगोव मज्जारस्स घयकुंभोव हुयवहस्स पयंगोव पईवस्स सारंगो इव पंचाणणस्स सुहाभिलासी दूरमवक्कमइ कुसलो
 परदारस्सत्ति निसामिऊण समुप्पणगाढपच्छायावो वेरगमगाणुलग्गचित्तो विज्जासिद्धो भणिउमाढत्तो-गोभइ !
 साहु समुवइठं साहु समुवइठं समुद्धरिओऽहं तुमए अपारपावपारावाराओ, होउ संपयं सदारपरिभोगं मोत्तूणाऽमर-
 णंतं निवित्ती मम सेसमहिलापसंगस्सत्ति, गोभइण भणियं-अज्ज ! जाओ इयाणिं मम वंछियत्थलाभो, एत्तो सुम-
 रिज्जासि मं सुहिसयणाइकंहंतरेसुत्ति । एवं वुत्ते विज्जासिद्धो जोडियपाणिपल्लवो पणामं काऊण संबेसिं सिणेहवस-

संदंतवाहफुरंतनयणो सायरमवलोलज्जमाणो चंदकंतापमुहेहिं अइंसणसुवगओत्ति । चक्खुपहमइक्कंतेऽवि तंमि खणं विरहवेयणासुन्नत्तणमणुभविकुण भणियं गोभेइण-अहो से वयणविन्नासो अहो पावपरिहारो अहो भीरुत्तणं अहो विणीयया अहो सुगुणज्जणसमुज्जमो अहो असरिसदक्खिणत्तणंति, चंदलेहाए भणियं-तुहाणुभावो खलु एसो, न हि नरिंदसामत्थमंतरेण भुयगफणाफलमइक्कमिउमभिसक्कइ साल्लो, न तिव्वंकुसकारोहगं विणा पहे पयट्ठइ मत्तदोघट्ठोत्ति, एवं च विविहसंकहाहिं ठाऊण कइवय दिणे अन्नदियहे य भणियं गोभेइण, जहा-बहूइं दिणाइं मम गिहनिगयस्स ता अणुजाणह सं गमणत्थं, न जाणिज्जइ कहंपि तुम्ह भाउज्जाया संपयभावणसत्ता निवसइत्ति, एवमायणिकुण चंदलेहाए पुणोवि कइवय वासराणि धरिऊण अन्नसमए य पभूयरयणदाणपुव्वगं सम्माणिकुण विसज्जिओ गोभहो सट्ठाणं पत्तो कहाणगविसेसेणं निययगांमं ।

अह जाव पिययमादंसणसुओ निययगेहाभिमुहं वच्चइ ताव दूराओ चिय दिट्ठं भग्गदुवारदेसं रेणुपडलसंछन्नं दरीपसुत्तसाणधुरधुरियघोरघोसभीसणं अणेगकोलबिलाउलं सुसाणं च भयावहं तं गिहं, तारिसं च दट्ठण खुभिय-हियएण पुच्छिया सहेज्जिया, तीएवि चिरकालागयं दट्ठण तं जायपणयाए आहूओ सगिहे, दावियं आसणं, कयं चरणसोयणं, भणियं च-गोभइ ! करेसु ताव भोयणंति, तेणावि तहाविहगेहदंसणजायसरीरदाहेण आपुट्ठा पुणोवि एसा सधरबुत्तंतं, तीएऽवि अणिट्ठं भोयणावसाणे सीसइत्ति लोयवायं परिभाविंतीए भणियं-पियहरं गया तुह

घरिणी, सेसं पुणो कहिस्सामि विहेसु ताव भोयणं, तओ आउलहिथएणावि तदणुविचीए कयमणेणाहारगहणं, तयणंतरं आयंतस्स सुहासणगयस्स निवेइयमणाए—गोभद्द ! तुह गयस्स कइवयदिवसावसाणे विओगदुक्खेण वा तहाविहवाहिवसेण वा परिकिसियसरीराए सिवमद्दाए अयंढेच्चिय समुप्पन्ना गाढं सुल्लवेयणा, आउलियं सरिरं, ओसहेहिवि न जाओ विसेसो, गया य मुहुत्तमेत्तेण पंचत्तंति, एयं च सो आयन्निऊण विओगवज्जज्जरियहियओ खणंतरमुच्छिओ इव विगमिऊण मुक्कपोक्कारकरुणसहं रोइउं पवत्तो, समासासिओ पासवत्तिणा जणेण, कयाइं मय-लोइयकिच्चाइं, कालेण य जाओ अप्पसोगो । अन्नया य भणिओ लोगेहिं, जहा—गोभद्द ! कीरउ कलत्तसंगहो, विसु-च्चउ सोगो, एसच्चिय गई संसारविलसियाणं, तेण भणियं—भो दूरमसरिसमेयं, तहाहि—

पढमं दवोवज्जणकएण देसंतरं गओऽहमहो । चिरकालकिलेसवसा तद्धाभे नियगिहं पत्तो ॥ १ ॥

किर मुंजिस्सामि अहं इण्हि नियपणइणीए परियरिओ । पंचविहविसयसोक्खं निरवेक्खो सेसकज्जेसु ॥ २ ॥

भविद्यव्यावसेणं अक्काले चिय दिवं गया सावि । एवं ठियंमि अन्ना परिणिज्जइ केण कज्जेण ? ॥ ३ ॥

जह सा मरणं पत्ता अहुणुवूढावि तह जइ मरेज्जा । ता होज्ज निप्फलच्चिय पुणोऽवि सब्बेऽवि आरंभा ॥ ४ ॥

नियजीचियस्सवि कहं विस्सासो बुज्झए सयन्नेण ? । आगयगयाइं जं किर कुणइ व मुहमारुयमिसेण ॥ ५ ॥

संघडणविहडणापडुपरक्कमे निक्किवे कयंतंमि । सच्छंदं वियरंते कत्थ व जाएज्ज थिरबुद्धी ? ॥ ६ ॥

दइयाधणपरियणसंगमेसु जइ सरिसवोवमं सोक्खं । पाविज विण्णओगे नियमा मेरूवमं दुक्खं ॥ ७ ॥
इय पज्जत्तं मह धरणिविसयतणहाए बहुकिलेसाए । एत्तियमेत्तंमि वए विसयासा हीलणाठाणं ॥ ८ ॥
एवं तन्निच्छयं मुणिऊण तुसिणीए ठिओ जणो, सो य धम्मकज्जेसु उज्जओ जाओ, अन्नदियहे समोसरिओ
तत्थ पंचसयसुणिपरिवुडो छत्तीसगुणरयणायरो नीसेसपाणिगणरक्खणपरो सुगहियनामो धम्मघोससूरी, गया
तस्स वंदणत्थं बहवे जणा, गोभदोऽवि भवविरत्तमणो जाणिऊण तदागमणं पत्तो सूरिसमीवे, पहिद्वचित्तो य पण-
मिऊण से पायपंकयं गुरुणा दिन्नासीसो उवविट्ठो भूमिवट्ठे, सूरिणावि पारद्धा धम्मदेसणा, जहा—

जीववहालियज्जणमदत्तधणगहणमेहुणनिवित्ती । जो य परिगगहचाओ एयं धम्मस्स सव्वस्सं ॥ १ ॥

जीववहे आंसत्ता सत्ता अट्ठप्पयारमवि कम्मं । बंधंति जंति नरए पावंति य तिकखदुक्खाइं ॥ २ ॥

तत्तो उव्वट्ठित्ता तिरिक्खजोणीसु लक्खमेयासु । उववज्जंति वराया नियदुच्चरिएण बहुकालं ॥ ३ ॥

जे उ नियजीवियसमं सम्मं रक्खंति सव्वपाणिगणं । ते सयललोयलोयणससहत्तुल्ला हवंति जणा ॥ ४ ॥

दीहाऊउववेया वररूवा दिव्वेदवसोक्खाइं । अणुभुंजिऊण नूणं कमेण मोक्खंमि वचंति ॥ ५ ॥

भूयत्थनिणहयकरं पाणिविणासेक्ककारणं घोरं । जं वयणं तं सव्वंमि वज्जणिज्जं सुबुद्धीहिं ॥ ६ ॥

इह लोए चिय जीहानिकंतणं निंदणं च लोयाओ । पावंति वित्तहभासणपरायणा परमेवे य दुहं ॥ ७ ॥

एत्तो विरत्तचित्ता कुडिलत्तणवज्जिया मियाभासी । जे ते अवजसपंकेण नेव छिप्पंति कइयावि ॥ ८ ॥
 पडिबुद्धकमलपरिमलसममुहनिस्साससुरहियदियंता । पूइजंति जणेण य आपएजगिरा य जायंति ॥ ९ ॥
 जो परधानं विलुंपइ सो झंपइ सुगइगिहकवाडाइं । निबिडाइं कम्मनिगडाइं कुणइ तुच्छेहियसुहत्थे ॥ १० ॥
 एत्तो चिय दोगचं पइजम्मं उवचिणेइ मूढप्पा । सुयदइयाविरहुब्भवदुहं च पावेइ दुव्विसहं ॥ ११ ॥
 जे पुण संतोसपरा तणंपि गिण्हंति नेव य अदिन्नं । ते देवाणचि पुज्जा हवंति किं पुण मणुस्साणं ? ॥ १२ ॥
 वहुंति धणविलासा निवडंति न आवयाउ कइयावि । पुजंति य निव्विग्धं मणोरहा तेसि नीसेसा ॥ १३ ॥
 जे अणिगिहियप्पाणो इहभवसुहलेसमेत्तपडिबद्धा । दासव कामलुद्धा सुद्धा जुवइण वहुंति ॥ १४ ॥
 नरवइसेवणसंगामकरणपमुहाइं विविहवसणाइं । मेहुणसन्नाभिरया असइंपि ल्हंति ते पुरिसा ॥ १५ ॥
 कामविवरंसुहा पुण नरसुरजणपूयणिज्जकमकमला । देहुब्भवमविणस्सरपरमाणंदं सइ चरंति ॥ १६ ॥
 पडिपुण्णवंमपालणपचित्तगत्ताण पुरिससीहाण । सुमरणमेत्तेणं चिय विज्जा मंता य सिज्जंति ॥ १७ ॥
 जे न परिग्गहविरइं कुणंति पावेसु संपयदुंति । वंधंति कोसियारोव्व अप्पयं ते सकिरियाए ॥ १८ ॥
 पइदियहलाभवसवहुमाणगुरुलोभदुमियसरीरा । सवत्थ ममत्तपरिग्गहेण सुचिरं किलिस्संति ॥ १९ ॥
 अपरिग्गहा उण नरा ससरीरेऽविहु ममत्तपडिबंधं । न कुणंति वत्थपत्ताइएसु सेसेसु का गणणा ? ॥ २० ॥

एतौ चिय तिद्वयरोवसगवगेऽवि ते ण ज्ञाणाओ । मंदरगिरिद्व विचलंति मोक्खसोक्खं च साहंति ॥ २१ ॥
इय भो देवाणुपिया ! अविरयविरयाण दोसगुणसहियं । कहियं तुम्हाण मए सुद्धं सद्धम्मसद्वस्सं ॥ २२ ॥
चिंतामणिद्व दुलहं संसारमहोयहिंमि भमिराणं । जीवाण नूणमेयं सकम्मगुरुभारपिहियाणं ॥ २३ ॥
एयंमि उ संपत्ते तं न जए जं न पावियं होइ । ता एयंमि पयत्तो कायद्वो कुसलबुद्धीहिं ॥ २४ ॥
एयं च निरइयारं न साहुदिव्खं विणा घडइ जम्हा । पडिवज्जह पव्वज्जं तम्हा दुहसेलवज्जसमं ॥ २५ ॥
एवं च गुरुणा उवइहे सद्धम्ममग्गे पडिबुद्धा बहवे पाणिणो पलीणा मिच्छत्तवासणा जाओ केसिंचि सच्चविरइ-
परिणामो अन्नसिं समुप्पन्ना देसविरइबुद्धिं, एत्थंतरे संसारासारं परिभावेंतो तक्कालतिद्वेवरगसमुग्गयपवज्जाप-
रिणामो गोभद्रो गुरुसमीवं गंतूणं विन्नविउमारद्धो-भयवं ! अमयं व परिणयं सम तुम्ह वयणं समुल्लसिओ विवेओ
तुद्दा गेहवासणा, ता तुब्भेहिं निज्जामगेहिं पव्वज्जाजाणवत्तमारुहिऊण भवोदाहिं लंघिउमिच्छामि, गुरुणा भणियं-
मइ ! जुत्तमेयं तुम्हारिसाणं, तओ सूरिं पणमिऊण गओ गेहे, रयणविक्कओवलद्वद्वेण दिन्न दीणाणाहाईणं महा-
दाणं, अह पसत्थे तिहिमुहुत्ते सूरिसमीवे गहिया पव्वज्जा, जाओ महातवस्सी, पालेइ निरयारं समणधम्मं अहि-
यासेइ सम्मं परीसहे पउंजइ बालगिलाणाईणं विणयं भावेइ भावणाजालं पदेइ समयसत्थं परिचितेइ तब्भावत्थं
कुणइ अपुद्वापुद्वतवचरणं, एवं च विमुज्झमाणस्स तस्स वोळिंति वासरा, अन्नया य गुरुमापुच्छिता समारद्धाईं तेण

मासखमणाइं,परिसुसियं च से सरीरं, तहावि वालाईण कजेसु अणिगूहियसामत्थो सबत्थ पयट्ठइत्ति । अन्नसमए य
 सो खमगो गओ खुड्डगेण समं वासियभत्तस्स, तेण य पहे गच्छमाणेण जुगमेत्तनिहित्तचक्खुपसेरेणवि कहवि दिव्वजो-
 गवसा चंपिया चलणेसु मंडुक्किया, चिवन्ना य सा, पट्ठिट्ठिएण य भणिओ सो खुड्डएण-जहा खमग ! तुमए एसा विरा-
 हिया, ता सम्मं निरूवेहि, सोऽवि एवमायन्निऊण ईसिसमुपन्नरोसावेसो असूयाएइयरजणचरणचंपणपणट्ठजीवाओ
 मंडुक्कलियाओ दंसितो भणइ-अरे दुट्ठसिक्ख ! इमावि मए मारिया ? इमावि मए मारिया ? इमावि मए मारियत्ति,
 खुड्डगेण नायं-होउ ताव, वियाले सयमेव गुरुपुरओ आलोइस्सइत्ति, एवं च पत्थुयकज्जं काऊण पड्डिनियत्ता दोवि
 निययासमं, कमेण य जाओ संझासमओ, आरद्धं आवस्सयं, गुरुपुरओ य खमयरिसी आलोइत्ता देवसियं उवविट्ठो,
 नवरं मा विस्सुमारियं होहत्ति चिंतयंतेण खुड्डएण कहिओ मंडुक्कियावइयो खमगस्स, एत्थंतरे निट्ठुरविगिट्ठुतवचरण-
 संतत्तत्तेणं सरीरस्स माहणजम्मसुलभत्तेणं तहाविहत्तिवकोवुब्भवस्स पणट्ठो से विवेओ, समुद्धाइओ महया
 वेगेणं खुड्डगताडणनिमित्तं, अंतरा य आगच्छमाणो निट्ठुरथंभसिरावडणघाइयमम्मपएसो तहाविहकलुसाभिप्पाय-
 विराहियसामन्नो कालं काऊण उववन्नो जोइसियदेवसु, कोहदूसियस्स एवंविहा विडंढणा, जेण—

छट्ठमाइदुक्करविगिट्ठुतवभेयसेवणुब्भूयं । गुरुत्तालसिक्खगेणपंडियविणओवणीयंपि ॥ १ ॥

दसविहजइजणकिरियापरिपालणपोसियंपि सुहपुन्नं । खणमेत्तेणवि तेणं तणं व कोहग्गिगणा दड्ढं ॥ २ ॥ जुम्मं ।

एतौच्चिय पसमविवज्जियाण सत्ता निरत्थिया किरिया । उक्किट्तवोऽविहु होइ केवलं भुक्खमारो सो ॥ ३ ॥

जह पच्चयाण मेरू नईण गंगा मियाण पंचसुहो । पक्खीण जहा गरुडो सेसाही सयलमुयगाण ॥ ४ ॥

जह साहूण जिणिंदो मणीण चिंतामणी तहा पसमो । सारो समत्थधम्मस्स तेण एत्थेव जइयवं ॥ ५ ॥ जुम्मं ।

अलं पसंगेणं । सो खमगजिओ जोइसदेवेसु अहाउयं पालिऊण चुओ समानो कणगखले आसमपए पंचतावस-
सयाहिवइस्स कुलवइणो गिहिणीए उववन्नो दारगत्तणेणं, जाओ य उचियसमए, कयं से कोसिओत्ति नामं, सो य
सभावेणं चंडरोसो, थेवावराहेऽवि सेसतावसकुमारो कुट्टेत्ति, ते य तेण ताडिज्जमाणा नियनियपिऊणं साहेत्ति, तेहि
य केण कुट्टियत्ति पुच्छिज्जमाणा निवेइत्ति कोसिएणं, तत्थ अन्नेऽवि तावसकुमारगा कोसियाभिहाणा अत्थि अओ
न मुणिज्जइ केणावित्ति तव्विसेसोवलंभनिमित्तं तप्पभिइं ठावियं चंडकोसिओत्ति नामं, तद्दिणाओ आरब्भ पावियं
च पंसिद्धिं, एवं सो चंडकोसिओ जाओत्ति । अन्नया य कुलवइं पंचत्तमुवगओ, पच्छा सो सेसतावसेहिं कुलवइपए
निवेसिओ समानो तत्थ वणसंडे अचंतं अज्झोववणो, अणवरयं अपुवापुवपायवसेयणपालणपरो कालं गमेइ, सेस-
तावसे य पुप्फफलाइं तहिं गेणहंते पयत्तेण निवारइ, ते य तत्थ कुलुममेत्तंपि अपावमाणा गुरुम्मि व गुरुपुत्तंगंमि
पवट्टियवंति सुमरिऊण तव्वयणमविकूलंता दिसोदिसिं गया, जोऽवि गोवालगाइं तत्थ फलाइनिमित्तमेइ तंपि
हंतूण सो निद्धाडेइ, जाया य समीवगामनगरेसु पंसिद्धी जहा चंडकोसिओ उववणं अवलोइउंपि न देइ । अन्नया य

सो निसियधारं परसुं घेत्तूणं वइकरणनिमित्तं कंठिगाणयणाय गओ दूरवणसंडे, इओ य आसमपयासन्नं सेयविया-
 पुरिवत्थवेहिं राययुत्तेहिं फलगहणनिवारणाकुविएहिं सुणियतगमणवुत्तेहिं पुवामरिसेण आगंतूण ओक्खया तरु-
 पोयगा छिंदिया सरलतरुणतरुवरा पाडियाइं फलाइं हयमहियो कओ से उडवओ भग्गा कलसगा फोडिया कंम-
 डलू खंडिया दक्खामंडवा पणासियाइं कयलीहराइं, अन्नपि जहासत्तीए उवइविउमारद्धत्ति, एत्थंतरे दिट्ठतहाविहा-
 समभंगवइयरोहिं गोवालगेहिं गंतूण सिट्ठं चंडकोसियस्स, जहा-पुह उववणं कुमारेहिं हणिज्झइत्ति, सो एवमायन्नि-
 ऊण कोवेण जलणोच्च धगधगन्तो परसुमुग्गीरिऊण धाविओ पवणवेगेण तदभिमुहं, दिट्ठो य एंतो कुमारेहिं, ते य
 सुणी अवज्झोत्ति चिंतिकुण पलाणा नियनयराभिमुहं, चंडकोसियोऽत्रि तयणुमग्गलगो वाहरइ—

रे खत्तियाहमा ! मज्झ उववणं छिंदिकुणवि परोक्खं । इण्ह नियजणीए किं पुण उयरंमि पविसिहिह ? ॥ १ ॥

मा वेगेण पलायह वट्ठह सवडंसुहा खणं एक्कं । तालफलाणिव सीसे जेण कुहाडेण पाडेमि ॥ २ ॥

एमाइ असब्भे गालिगन्भवयणे समुल्लवेंतो सो । तह कहवि कोववसवियल्लोयणो धाविओ तुरियं ॥ ३ ॥

जह खाणुखलणनिवडणअड्डिट्ठियपरसुल्लिन्नसीसस्स । अवमाणंदसणाउच्च तस्स लहु अइगयं जीयं ॥ ४ ॥

अह अट्टज्झाणगओ मरिउं सो तम्मि चैव वणसंडे । मुञ्छावसेण जाओ भीमो दिट्ठीविसो सण्णो ॥ ५ ॥

ते य तावसा तम्मरणवइयर निसामिऊण समागया तंमि वणसंडे ठाउमारद्धा य, अन्नया य पुच्चसिणेहाणुबन्धस-

मुपपन्नवणरक्खणपरिणामेण इओ तओ परिब्भमंतेण दिट्ठा ते दिट्ठीविससम्पेण, तओ सरोससूरबिंवावलोयणुगिग-
रियजलणजालाकलावेण निदुड्ढा अभिसुहट्ठिया अणेण, अदहंगा य पलाणा दिसोदिसिं, एत्रं च तिसंझं सो वणसंडं
तिपयाहिणीकाऊण जं सउणगमवि पासइ तंपि देहेइ, अनेउवि तम्मग्गेण बोलेमाणे तडियकप्पडियपमुहे पंथिगे
विदेवेइ, अह तब्भएण अवहो जा जाओ सो मग्गो, एसा चंडकोसियसम्पस्स उप्पत्ती ।

अह तेण सम्पेण उववणंतरे परिब्भमंतेण दिट्ठो जक्खमंडवियाए पडिमं ठिओ वद्धमाणजिणवरो, तं च दट्ठूण
समुच्छलियकोधानलो अहो मम सामत्थं एस न सुणइत्ति विगप्पिऊण तरणिमंडलावलोयणचउगुणीभूयविणिस्सरंतं-
विसुम्मिस्सदुस्सहसिहिसिहाभासुरच्छविच्छोहो निद्विउकामो भयवन्तं पेच्छिउमारद्धो—

अह जयगुरुणो देहे दिट्ठी दिट्ठीविसस्स पडिफ़लिया । पिऊससीयले साऽणुभावओ झत्ति विज्झाया ॥ १ ॥

असमत्था निद्विहं जाया जिणनाहलोममिच्छंति । ताहे पडिहयसत्ती तंडवियपयंडफ़णभित्ती ॥ २ ॥

गरलकणुक्करसम्मिस्सगरुयपम्मुक्कफ़ारुंकारो । वेगेणं डसिउमणो पहाविओ जिणवराभिमुहं ॥ ३ ॥

तओ तिव्वविसुब्भडाहिं दाढाहिं जिणं डसिऊण पच्छाहुत्तं अवक्कमेइ, मा उग्गविसविहयजीवियव्वो ममोवरि
एस निवडिहिति, भयवंतं च तहड्डियं चेव दट्ठूण पुणो पुणो तिन्नि वारे जाव डसित्ता अमरिसेणं पलोयंतो अच्छइ,
तहावत्थाणे य जिणसोमबिंवावलोयणोवसंतदुड्ढदिट्ठिविसविगारो सो करुणाए भणिओ भयवया—उवसम भो

चंडकोसिया!, उवसम महाणुभाव!, किन्न सरसि सयं चिय अणुभूयं तं वइयरं ? ।

पुवभवे जं समणो कोवविराहियसमग्गसामन्नो । कुञ्छियजोइसदेवत्तलच्छिमणुपाविओ मरिउं ॥ १ ॥

तत्तो इह वणसंडे तावसपुत्तो य जं तुमं जाओ । तत्तोऽविय तिब्बविसो इण्ह सप्पत्तणं पत्तो ॥ २ ॥

ता भइ ! एत्तोऽवि मुंच कोवं, एसो हि विग्गभूओ परमसुहसंपयाणं पडिखलणमल्लो कल्लणवल्लीणं महापडिक्खलो पवरविवेयस्स जलणो कुसलाणुद्धानवणसंडस्स जणओ दुग्गदुग्गइपडणस्सत्ति, सबहा अलभेत्तो कोवाणुवंधेणंति, इमं च सोच्चा मुयगस्स पुवाणुभूयसरणवसेण ईहावूहमग्गणवेसणं करमाणस्स जायं जाइसरणं, दिट्ठं च पुवाणु-
ट्ठियं तवचरणं सामणणपरिपालणं तच्चिराहणोवल्लज्जोइसियसुरजम्मं च, अह उम्मीलियविवेओ समुल्लसियधम्मपरि-
णामी जायपावदुगुंछो आयाहिणपयाहिणापुव्वगं परमभत्तीए भयवंतं भुवणगुरुं वंदिऊण अणसणं पडिक्खइ, भय-
वंपि सुणइ जहा एस पडिबुद्धो कयाणसणो य, तहावि तथणुकंपाए तत्थेव काउस्सग्गंगओ परिवालेइत्ति, चंडको-
सिओऽवि मा कहवि रोसवसेण नयणग्गिणा पाणविणासो होज्जत्ति परिभाविऊण चिलनिहित्तुंडो पयडियसेससरीरो
परमवेरग्गावडियमई चित्तेइ—

कह गुणरयणोयहिणा गुरुणा सह संगमो पुरा जाओ ? । कह पवज्जारयणं अपत्तपुवं मए पत्तं ? ॥ १ ॥

कह वा पीऊसंपिव असेसदोसग्गिविज्झवणदक्खं ? । सम्ममहीयं सुत्तं विचित्तनयभंगदुव्विगमं ? ॥ २ ॥

कह वा मासकखमणाइ दुकरं तह चिरं तवो चरियं ? कह दुद्धरं पि चरियं अकलंकं वंभचरं पि ? ॥ ३ ॥

खणमेत्ततिवकोवप्यभावओ कह इमं समगंगं पि । विफलत्तणमणुपत्तं ? हा मुद्धो मंदभागोऽहं ॥ ४ ॥

इण्हिं तु पयइभीसणमुयंगभावं गओ हयासोऽहं । सुणिधम्मस्स अजोगो कमुवायं संपवज्जामि ? ॥ ५ ॥

हा पाव जीव ! तइया जह सिरलोयाइ विविहदुक्खाइं । सहियाइं तहा खुड्डगवयणं पि य कीस नो सहियं ? ॥ ६ ॥

किं मूढ ! नियसिरंसी एवं पज्जालिओ तए जलणो ? । सुहकामिणा हणिज्जइ अप्पा किं अप्पणो चैव ? ॥ ७ ॥

इय उत्तरोत्तरपवहुमाणवेरगमगमणुलगो । सप्पो झंपियदप्पो संलीणंगो मओच्च ठिओ ॥ ८ ॥

अह भयवंतं समीवमुवगयं पेच्छिऊण गोवालादयो तरुवरतिरोहि्यसरीरा तहा निचलस्सवि मुयंगमस्स उवारं
अविस्ससेमाणा चैयणापरिकखणनिमित्तं पाहाणखंडे खिवंति, तेहिं ताडिज्जमाणोऽवि जाव न मणांगं पि विचलइ
एसो ताव समीवमागच्छन्ति, कट्टेण य घट्टेति, तहावि अफंदमाणे तंमि सेसलोयस्स साहेति, जहा—दिट्ठीवि-
ससप्पो देवज्जएणं उवसामिओ, न संपयं डहइत्ति, ताहे लोगो आगंतुं सामिं वंदित्ता तं पि वंदइ महिमं च करेइ,
अन्नाओवि गोडलियविलयाओ घयमहियाविक्किणत्थं तेणंतेण वच्चमाणीओ तं सप्पं तुप्पेण मक्खंति, घयगंधेण य
(अहि)सरंततिक्खंतुं डपिवीलिगापडलखज्जमाणंदेहुप्पणत्तिव्वेयणं सम्ममहियासमाणो अद्धमासियाए संलेहणाए
कालं काऊण सहस्सारे देवलोए देवो अट्टारससागरोचमो उववणोत्ति ।

इय सुहपरंपराए निजुंजिऊण चंडकोसियं परमेसरो तिहुयणेक्कदिणयो वीरो तत्तो निक्खमिऊण उत्तरचावा-
लसन्निवेसं गओ, तत्थ पक्खक्खमणपारणए पविट्ठो गोयरचरियाए, कमेण पत्तो नागसेणगाहावइस्स मंदिरं,
ताहिं च तद्दिणे दुवालसचरिसाओ पुत्तो समागओत्तिकाऊण पयट्ठो महूसवो, जेमियो नियगजणो, सो य निय-
गजणो सामिणो रूवसंपयाए आणंदसुद्धंतो परमण्णेणं भयवंतं पडिलाभेइ, एत्थंतरे अहो दाणं अहो दाणंति
वाहरमाणेहिं चेलुक्खेवं कीरंतेहिं कणगवुट्ठिं सुयमाणेहिं चउविहत्तूरनियरं वायंतेहिं गंधोदयं वरिसंतेहिं दसद्धवन्नं
कुसुमपयरं कीरंतेहिं नच्चमाणेहिं गायमाणेहिं तिवइं अप्फालेत्तेहिं सहरिसं थुणंतेहिं असुरसुरखयरनिवहेहिं भरिय-
मन्नरविवरंति, जयगुरुवि पारिऊण सेयवियं नयरिं गओ, तत्थ य नमंतसामंतमउलिमंडलीमंडियपायपीढो सम्महं-
सणमुणियजहट्टियजिणोवइइजीवाइतत्तप्पवंचो पएसी नाम नराहिचो परमसमणोवासओ, सो य भयवंतं आगयं
मुणिऊण चाउरंगसेणापरिवारिओ सयलनयरज्जणसमेओ निग्गओ वंदणवडियाए, दिट्ठो सामी, तिपयाहिणीकाऊण
य वंदिओ परमायरें, थोउं पयत्तो, कहं?—

जय भुवणेक्कनिसायर ! सायरसुरारायनभियकमकमल ! मलविरहिय ! हियकारय ! रयतमभरहरणदिवसयर ! ॥ १ ॥
करुणारसनिवावियभवगिम्हुत्तत्तसत्तत्तलनिवह ! जिणनाह ! तुमं पुव्वज्जिएहिं पुण्णेहिं दिट्ठोऽसि ॥ २ ॥
तं चिय दिणं पसत्थं सोच्चिय समओ समत्थसुहहेऊ ! जत्थ भुवणेक्कन्नंधव ! तुह सुहकमलं पलोएमो ॥ ३ ॥

अहनिस्सारस्सवि जीवियस्स पत्तं मए फलं अज्ज । जं तुम्हं चरणफरिसणपवित्तियं उत्तमंगं मे ॥ ४ ॥

इय ज्जिणनाहं थोउं बहुप्पयारं पराएँ भत्तीएँ । राया पुरजणसहिओ जहागयं पडिनियत्तोत्ति ॥ ५ ॥

भयवंपि सुरहिपुरनयराभिमुहं वच्चह, तत्थ य अंतरा पएसिनरवइसमीवमागच्छमाणा पंचहिं रहेहिं निज्जगा
रायाणो भयवंतं दट्ठूण पूयं सक्कारं सच्चायेरेण कुणंति, सामीऽवि नियप्पभावप्पवोहियसत्तसंघाओ बहुविहउग्गतव-
विसेसपणस्समाणासेसनिविडकम्मंसो विसुद्धसीलसुरभिसरीरो सुरभिपुरं अइक्कमिऊण संपत्तो जलहिपवाहाणुकारि-
चारिपसरं सयलसरियापवरं गंगामहानइ, अविच—

पवणुच्छालियजलंकणसेयवससिणिद्धतीरतरुसंडं । अन्नोन्नप्पिडणविफुट्टलोलकछोलरवमुहलं ॥ १ ॥

पप्फुरियफाराडिंडीरपिंडपंडुरियतारतीरंतं । जिणदंसणतोसवसां तक्खणविहियट्टहासं च ॥ २ ॥

वणकुंजरकुलमज्जणविदलियसिप्पिउडमोत्तियसमिद्धं । वियरंतहंससारसरहंगरवमणहरदियंतं ॥ ३ ॥

मज्जिरविलयाजणथोरथणहराघायभंगुरतरंगं । रंगंतमच्छकच्छवमयरोरगभीसणावत्तं ॥ ४ ॥

इय एरिसं सुरसरिं सरणागयवच्छलो जिणो जाव पेच्छइ कमलदलच्छो परतीरगमाभिलासेण ताव सुसिलिद्धनिट्ठुर-
विसिट्ठतरुकट्टफलगनिम्मविद्या परतीरगमणत्थं नाविएण पगुणीकया नावा, तंहिं च समारूढो परतीरगामी
जणो, भयवंपि आरुहिऊणं ठिओ तीसे एगदेसे, एवं च निलीणमि जणे पवाहिया नावा, ऊसिओ सियवडा

चालियाइं अवलगाइं पयहा महावेगेण गंतुं नावा, एत्थंतरे तडट्टिएण वासियं कोसिएण, तं च निसामिऊण भणियं
 खेमिलाभिहाणेनेमित्तिएणं—अहो इमो महासउणो इमं वाहरइ, जहा—तुब्भे इह मारणंतियं आवइं पाउणिस्सह,
 केवलमेयस्स महारिसिस्स पभावेण अक्खयंसरीरा नित्थरिस्सहत्ति, एवं निसुणिऊण विम्बिया नावाजणा जाव
 अवरोप्परं विविहं संलवंति ताव पत्ता अगाहसल्लिमज्झयारदेसं नावा,

एत्थावसरंमि जिणं नावारूढं पलोइउं पावो । संभरियपुव्ववरो नागसुदाढो विचिंतेइ ॥ १ ॥

एसो सो जेण पुरा तिविडुचक्कित्तणमुवगएणं । गिरिकंदरमल्लीणो सीहत्ते वट्टमाणोऽहं ॥ २ ॥

सच्छंदविविहकीलाविणोयलीलाविलासदुल्ललिओ । परिजुन्नपडोव दुहा विफालिओ पाणिणां धेत्तुं ॥ ३ ॥

एयस्स किमवरद्धं तइया विजणे वणे वसंतेणं ? । जेण तहा निहओऽहं अनिमित्तियसत्तुणा इमिणा ? ॥ ४ ॥

ता मज्झ पुन्नपंगरिसंवसेण जायं समीहियं अज्जं । जं एसं वेरिओ चक्खुगोयरं सयमिहावड्डिओ ॥ ५ ॥

जीयस्स एत्तियं चिय पसंसणिज्जं जए सुपुरिसाणं । उवयारे उवयारो जं किज्जइ वेरिए वेरं ॥ ६ ॥

आसन्नमुवगयंपि हु मरणं मम चित्तनिबुइं जणइ । जं पुव्ववरइसाहणमुवड्डियं एत्थ पत्थावे ॥ ७ ॥

इय असरिसनिचामरिसपगरिसायंअच्छिविच्छोहो । सो चिंतिउं सुदाढो वेगेण जिणंतियं पत्तो ॥ ८ ॥

अह अंतलिव्वमुवागएण किलकिलारावं कुणमाणेणं तेण अरे रे कत्थ वच्चिहत्ति भणिऊण विउव्विओ संवत्तगम-

हापवणो, तेण पहणिज्जमाणे उम्मूलिया तरुणो टलटलिया कुलसेला थरहरियं धरणिवट्ठं दूरमुच्छलियं गंगासलिलं
विसंतुला डोछिया नावा भग्गो तडत्ति कूवयसंभो जज्जरिओ सियवडो वामूढो मरणभयंभीओ इट्ठदेव-
ए सुमरिउं लग्गो नावाजणो, अवि य—

संचलियमच्छकच्छवजलकरिकरघायज्जरतरंगे । तारापहमोगाढे सलिलुष्पीले महापबले ॥ १ ॥

पव्वयमहोल्लकछोलपेछणुवेछिरी सफरिगव । बोलें आढत्ता ताहे नावा सुदाढेण ॥ २ ॥

एत्थंतरे कंबलसंबलाभिहाणा दो नागकुमारदेवा तक्खणचलियासणा परमत्थजाणण्डा जाव ओहिं पडंजंति ताव
पासंति भयवंतं नावारूढं सुदाढेण जले बोलिउमाढत्तंति, तं च पासित्ता अलाहि सेसकजेहिं, सामिं ताव मोया-
वेमोत्ति चिंत्तिऊण वेगेण समागया तं पएसं, आवडिओ य एगो नागकुमारो सुदाढेण सह जुज्झिउं, बीएणवि वियड-
पाणिसंपुडेणुप्पाडिऊण नावा नइपरिसरंमि पमुक्का ।

अह सो सुदाढनागो महिड्डिओ जइवि तहवि खीणबलो । आसन्नमरणनिच्चरणगुच्छायउच्छाहो ॥ १ ॥

अप्पट्ठिएहिवि तथा कंबलसंबलभिहाणदेवेहिं । अहिणवदेवत्तणदिवसत्तिणा निज्जिओं झत्ति ॥ २ ॥

उद्धियदाढे नागेव निव्विसे निम्मिए सुदाढंमि । नागकुमारा ताहे वंदिउ ज्जिणं विणयपणया ॥ ३ ॥

मुंचंति पुण्णपयरं सुरहिं गंधोदयं च वरिसंति । गायंति भत्तिभरनिस्सरंतरोमंचंकंचुइया ॥ ४ ॥

एवं च अवलोइकुण जायपरमविम्हओ नावाजणो चित्तेइ-अहो कोइ एस मेहापुरिसो माणुसवेसोवि अमाणु-
साणुरूपपभावो, जओ एयप्पभावाओ अम्हे समुत्तिन्ना आवयामहन्नवाओ, ता जुज्जइ एस महप्पा पणमिउंति
विभाविऊण निवडिओ तिहुयणगुरुणो चलणकमलंमि, कंबलसंबलावि जिणं पणमिऊण गया जहागयं ।

अह के पुण कंबलसंबला पुबभवे हुंतत्ति सुणेह मूलुपत्तिं-अत्थि सयलमहियलविकखाया समुत्तुंगपसत्थसुपास-
तित्थयरथूसोहिया महुरा नाम नयरी, तत्थ य अहिगयजीवाजीववियारो नियसुद्धबुद्धिपगरिसोवलद्धपुन्नपावो
आसवसंवरपमोक्खत्तवियारवियक्खणो पंचाणुबयाइसावगधम्मपरिपालणवल्लवखो जिणिंदसमयाणुरागरंजिय-
हियओ आगरो पसमाइगुणरयणाणं निवासट्टाणं गंभीरिमाए संकेयभूमी करुणाए वल्लहो धम्मियजणाणं बहुमओ
नरवइस्स सबत्थ पावियसाहुवाओ जिणदासो नाम सावओ, साहुदासी नामेण से भारिया, ताणि य दोन्निवि अच्चंत-
धम्मकरणलालसाइं अणवरयगुरूवएसपालणपरायणाइं फासुयएसणिएहिं असणपाणखाइमसाइमेहिं सुणिजणं
पडिलाभेमाणाइं कालं वोलंति । अन्नं च—

संसारावत्तविचिन्तणत्थ(प्प)भीयाइं जइवि अच्चत्थं । जइवि य गिहवाससमुत्थदोसपरिसंकिमणाइं ॥ १ ॥

तहविहु गिहंमि अन्नोन्नगाढपेमाणुबंधभावेणं । समणत्तणं पवज्जिउकामांवि ताइं निवसंति ॥ २ ॥

तेहि य अन्नया सुगुरुपाथमूले सुणिऊण तिरियाइअसंजयपाणिपरिग्गहतिवपावोवलेवासंमंजस्सं गहिंयं गोमहि-

सिचउप्पयाणं पच्चक्खाणं, अन्ने य अंगी कथां बहवे अभिगंगविसेसा, अह धेणूणमभावे साधुदासी साविगा दिवसे दिवसे गोरसं आभीरिहत्थाओ गिण्हइ, अन्नदियहे य तीए आभीरी भणिया, जहा-भहे! तुमं पइदियहं मम घरे महियं घेत्तूण आगच्छेज्जाहि, अहं जेत्तियं तुमं आणेसि तेत्तियं गिण्हस्सामि, अन्नत्थ मा वच्चिहिसि, पंडिवन्नं च इमं तीए, एवं च पइदिणदंसेणं निक्कवडकयविक्रयकरणेण य समुप्पन्नो तासिं परोप्परं सिणेहाणुबंधो, अंतरंतरा य साविगा से गंधपुडिगाइदाणेण उवयारं करेइ, इयरीवि सविसेसं दुद्धं दहिं पणामेइ, अन्नया य आभीरीए कन्नगा-विवाहो पारद्धो; तओ सा जिणदासं साधुदासिं च सपणयं भणिउमारद्धा—

जइवि न आसणदाणेऽवि तुम्ह सामत्थमत्थि मे किंपि । तहवि सिणेहवसेणं किमवि अहं विन्नविउकामा ॥ १ ॥
किर गुरुमणोरेहेहिं सुहिसयणविसिट्ठगोठिकज्जेण । अम्हारिसेण जायइ सुचिरेण महुसवारंभो ॥ २ ॥

तुम्हारिसाण पुण पुवजम्मसुविठत्तपुन्नविभवाणं । पइदियहमूसवच्चिय लीलाए संपयट्ठति ॥ ३ ॥

एयं च उल्लवंती सा भणिया सेट्ठिणा—भहे! फुडक्खरेहिं भणसु जमिह पओयणं?, तीए भणियं—अम्ह घरे विवाहो पारद्धो, अओ तुम्हेहिं तत्थ भोयणं कायच्चं, सेट्ठिणा भणियं—को दोसो?, कीरइ, केवलं बहुगेहवावा-वडत्तणेणं न पारेमो सुहुत्तमेत्तंपि गिहं परिचइउं, अओ न कायवो तुमए चित्तसंतावो न वोढवो अब्भत्थणाभंग-समुब्भवो अवमाणो न गणियवं निहविखन्नत्तणं न मोत्तवो मणांगं पि पुवपणओ, न हि निक्कवडसिणेहाणुबंधो सम-

वेकलइ वज्झोवयारं, ता गच्छ नियगेहे कुणसु समीहियपओयणंति पन्नविऊण समप्पियाइं धूयणवसणाइं पणांमि-
 याइं तदुचियाइं वत्थाभरणाइं दिन्नाइं कुंछुमाइविलेवणाइंति, सावि ताणि गहिऊण परमहरिसमुवहंती गया
 सगिहं, कओ विवाहो, मिलिया सुहिसयणबंधवा, जाया महई सोहा, पसंसियाइं ताइं इयरजेणं, जहा-सुंदरो
 विवाहमहसवो एएहिं कओत्ति, ताणि य पसंसं निसामिऊण चिन्तेति-अहो परमोवयारकारी महाणुभावो सेट्ठी
 जेण अन्ह विवाहे पयरोवगरणदाणेणं एवं सोभा निवत्तिथा, तां कहमेयस्स पच्चुवयारे वट्टिस्सामोत्ति संपेहिऊण
 उवचियसरीरे अतुच्छपुच्छोवसोहिए सुप्पमाणकुडिलचारुसिंगे सरयससहरकिरणसरिसवण्णे समाणदेहपरिमंडले
 अचंतसुंदरगोरे कंवलसंवलाभिहाणे तिवारिसिए गोवगगपहाणे जुवाणवसहपोयगे गहिऊण गयाइं ताइं सेट्ठिभवणे,
 पणामिया य ते सेट्ठिणो, चउप्पयपरिगहकयपच्चक्खाणेण निवारिया ते सेट्ठिणा, तहावि असुणियपरमत्थाणि भव-
 णंगणे ते वंधिऊण गयाइं ताइं नियगेहे, तेण सावएण चित्तिंयं-अहो संकडमेवमावडियं, जओ-जइ सुचंति एए
 वराया ता लोगो हलाइसु वाहेइ तहाचिहणीणसमायारो वा कोइ विहवेइ, अह एत्थेव धरिजंति ता निरुवयारि-
 त्तेण दुरणुपालणिज्जा हवंतित्ति खणं विगप्पिऊण जिणवरवयणायन्नणसमुप्पन्नकरुणापूरपूरियहियएणं संगोविया
 सेट्ठिणा, पइदिणं दावेइ किणिऊण य तेसिं फासुगचारिं, पणामेइ वत्थगलियं सलिलं, एवं पइदिणं उदंते वट्टइ,
 सो य सावगो अट्टमिचाउइसीसु आहारपोसहं सरिरसक्कारपोसहं वंभचेरपोसहं अद्वावारपोसहं च पडिपुन्नं काऊण

सामादयपडिवन्नो समणसमो अइयारंपकपरिक्खणपरो धम्मसत्थपोत्थं वाएइ, नियपरियणो य पंजलिउडो चित्त-
लिहिओव निसामेइ, तेऽवि कंबलसंबला अहामद्दयाए तहाविहमोहणिज्जकम्मलावणेण य थिरीकयसवणउडा
अव्विक्खत्तचित्ता सन्नित्तेण सुणियजुत्ताजुत्ता सम्मं सुणंति, जायभवभवभया य जद्विवसं सावगो उववासं कुणइ
तद्विवसं तेऽवि चारिं पाणिंयं च परिचयंति, पुणो पुणो दिज्जमाणंपि न गिण्हंति।

अह तेसु तिरियजोणीसमुब्भवेसुवि तवं करेतेसु । सगुणत्ति पक्खवायं वहमाणो चित्तए सेट्ठी ॥ १ ॥

एत्तियकालं अणुकंपणइया दिन्नमेसिमसणाई । साहम्मिगबुद्धीए एत्तो सबं करिस्सामि ॥ २ ॥

साहम्मियवच्छलं जेण जिणिंदेहिं भुवणपणएहिं । सम्मत्तसुद्धिहेउं निदिदं धम्मियजणस्स ॥ ३ ॥

अप्पुव्वो कोइ धुवं अहो पभावो जिणिंदवयणस्स । जं निसुणिऊण तिरियावि जंति वेरग्गमग्गंमि ॥ ४ ॥

इय चित्तिऊण सविसेसमायरं तेसिं दंसए सेट्ठी । भवेसु पक्खवायं वहंति जं वीयरागाऽवि ॥ ५ ॥

एवं च उच्चियकायव्वपरायणस्स सम्ममुवसंतचित्तस्स सरंति वासरा, अन्नया य तीए नयरीए भंडीरजक्खस्स
जणेण जत्ता पत्थुया, तत्थ य विविहतुरगाइवाहणाधिरूढो निगंतूण सयलपुरलोओ तस्स पुरओ वाहं करेइ ।

इओ य-जिणदाससेट्ठिणो पियमित्तो अचंतकोऊहलिओ जक्खजत्ताए वाहियालिं काउमणो सेट्ठिं अणापुच्छि-
ऊण पणयभावेण कंबलसंबले गंतीए जोत्तिऊण गओ जक्खपुरओ, वाहिया महतीवेलं, ते य अचंतदरिसणिज्जाथारत्तेणेण

अन्नपणयिणा जणेण वाहिज्जमाणा आरावेहनस्सरंतरुहिरधारापरिगया कोमलदेहा अदिट्टतहाविहवेयणा तुट्ट-
हियया नित्यामा जाया, तहाविहे य ते सेट्ठीगेहे बंधित्ता मित्तो पडिगओ, सेट्ठीवि भोयणसमए जाव जवसाइ
घेत्तूणं एइ ताव पेच्छइ एए कंपंतदेहे निस्सहगलंतनयणे वणमुहनीहरंतसोणिए दोवि गोणए, एवंविहे य दट्ठण रुट्ठो
पुच्छइ—अहो केण दुरायारेण इमे वराया इमं अवत्थमुवणीया ? निवेइयं च से जहावित्तं परियेणं, तदायन्नणेण
य समुप्पन्नो महंतो चित्तसंतापो, कंवलसंवलावि दट्ठघायज्जरियसरीरा अणसणं काउमणा सायरं पुरओ उवणी-
यंपि चारिपाणियं न गेण्हति, जाव य पुणो पुणो गवत्ताइयं दिज्जमाणं नेच्छंति ताव सेट्ठिणा सुणिऊण तदभिप्पायं
दिन्नमेतेसिं भत्तपच्चक्खाणं, पडिवन्नं च साभिलासं एएहिं,

ताहे कारुन्नेणं विमुक्कनीसेसगेहवाधारो । सुसिणिद्धवंधवाण व तेसिं पासे ठिओ सेट्ठी ॥ १ ॥;

भणइ जहा रोसमहो मणागमेत्तंपि मा बहेज्जाह । जं निहएण तेणं दुत्थावत्थं इमं नीया ॥ २ ॥

संसारपवत्ताणं जंतूणं जेण कित्तिं एयं ? । न हु नामेगंतसुहो जणंसि जाओ जणो कोई ॥ ३ ॥

दट्ठवज्जपंजरोदरगयंपि सेलाइदुग्गलीणंपि । पुवकयमसुभकम्मं जीवं संकमइ कुवियं व ॥ ४ ॥

विद्वइ तयणु विवसं सुवहुं अइविरसमारसंतं च । कूडपडियं व चडयं बहुण्णयारं तडफडंतं ॥ ५ ॥

ता भो महाणुभावा ! सम्मं अहियासणं विमोत्तूण । अन्नो निज्जरणविही न विज्जए पुवपावस्स ॥ ६ ॥

उवचियपुत्रा तुब्भे सफलत्तणमुवगयं च भे जीयं । जं दुक्खविमोक्खस्वमा पत्ता जिणधम्मसामग्गी ॥ ७ ॥

इय एवमाइवयणेहि पसमसारेहिं अमयसरिसेहिं । संठविद्या सुहमगे ते वसहा सेट्ठिणा सम्मं ॥ ८ ॥

एवं च विसुज्झमाणज्झवसाणा सरीरेवयणं सहमाणा सेट्ठिभिज्जमाणं पंचनमोक्कारं पडियच्छमाणा कालं काऊण नागकुमारेसु देवेसु उववणणा, ते इमे कंबलसंबलत्ति ॥

इओ य-भयवं महावीरो नावुत्तिन्नो संतो जलतीरंमि इरियावहियं पडिक्कमिय सुरसरियापरिसरे ईसिजलोल्लसु-
हुमवालुगोवरि मंदं मंदं पयाइं निसिंतो थूणागसंनिवेसे गंतुं पयत्तो, नवरि सामिणो पडिफलंतचक्ककमलकुलिसं-
कुसकलसपासायपमुहपहाणलक्खणंकिंयं पयंपतिं नइपुलिणे पलोइऊण पूसो नाम सामुहलक्खणवियक्खणो
चित्तिउमारद्धो-अहो आजम्मकालाओऽवि अदिट्ठपुच्चा अचंतमच्छरियभूया कस्सइ महाणुभावस्स छक्खंडमहिमंड-
लोवभोगिणो चक्किणोव पवरलंछणा पयपद्धई एत्थ दीसइ, जइ पुण कंहंपि कोइ अपत्तरज्जो वा देसदंसणकोऊहली
वा तहाविहविसमदसावडिओ वा चक्कवट्ठी एवं भमेज्जा, पेच्छामि तं महापुरिसं, जइ पुण एयावत्थंमि इमंमि
सेविज्जमाणंमि मम समीहियत्थसिद्धी जाएज्जत्ति परिभाविऊण तुरियगइए जाव कइवयपयंतरमुवगओ ताव दिट्ठो
अणेण थूणागसंनिवेसस्स बहिया बहलपल्लवालंकिंयकंकेल्लितरुणो हेट्ठओ पडिमासंठिओ जिणो, दट्ठण य परमे-
सरस्स सिरिवच्छलंछियं वच्छयलं दाहिणावत्तंगंभीरं नाभिमंडलं बालप्पवालपाडलं व करकमलं चित्तिमणेणंन

केवलं एयस्स चरणजुयले लक्खणं, सरीरंपि नियनियविभागाणुरुवलक्खणाणुगयं उवलक्खिज्जइ, ता कंहं एवं-
विहा समत्थपसत्थलक्खणसंपया?, कंहं परिजुन्नवत्थमेत्तंपि से न संपज्जइ? कंहं वा समग्गभरहरज्जसिरिसूयण-
परा तारिसा सामुहसत्थवयणविन्नासा?, कंहं असंपज्जंतलक्खभिक्षाहारकिसमेयस्स सरीरं?, अहो दूरं पच्चक्खेण
विरुद्धं लक्खणसत्थं ।

चिरकालं सेसकलाकलावमवि उज्झिऊण जत्तेणं । सामुहसत्थमेयं अवभिचारंति पढिओऽहं ॥ १ ॥
इण्हि तु एत्थ समणे निव्वसणे चक्खुगोयरं पत्ते । लक्खणसत्थमसेसं नूणं दूरं विसंवइयं ॥ २ ॥
हा हा धिरत्थु मज्झं परिस्समो जेण हरिणपोयव । माइणिण्यासमेणं लक्खणसत्थेण नडिओऽहं ॥ ३ ॥
मुट्ठीहिं हयं गयणं नवणीयत्थं विरोलियं सलिलं । अघटंतत्थनिबद्धं जं एयं अहिगयं सत्थं ॥ ४ ॥
केलिप्पिएण मन्ने संघडियमिमं पयारणपरेण । धुत्तकयं पिव कव्वं कालेणं होइ सिद्धतो ॥ ५ ॥
अलमेत्तो एएणं पलालकप्पेण दुट्ठसत्थेणं । इय तक्किऊण पूसो परमविसायं गओ सहसा ॥ ६ ॥
एत्थंतरंमि सक्को सुहासणत्थो पउंजए ओहिं । कह भयवं भवमहणो विहरइ परमेसरो वीरो?, ॥ ७ ॥
थूणागसन्निवेसे पेच्छइ पडिमड्डियं जिणवरिंदं । नेमिच्चियं च पूसं दुसंतं अत्तणो सत्थं ॥ ८ ॥
तो सिग्घं विघडकिरीडकोडिमणिकिरणविच्छुरियगयणो तियसेसो जिणकमकमलवंदणत्थं लहुं एइ, जहा-

मणियविहिणा य नमंसिऊण सामिं महुरवयेणें पूसं भणइ-भह ! किमेवं दूसेसि लक्खणसत्थं, नहु मिच्छा-
मासिणो महाणुभावा सत्थयारा, किं तुमए न सुओ एस ससुरासुरखयरनरेसरसिरपणयचलणो सिद्धत्थनरिंदन-
दणो तिहुयणविकखायकित्ती धम्मवरचाउरंतचक्कवट्ठी खलमहिलंव रायलच्छिंछ छड्डिऊण एवं विहरइ । अन्नं च—
एसो सो जस्सेसरियकोडिलेसंपि न घडइ समगो । पायालसगनरखेततजायलो गो सुतुंगोऽवि ॥ १ ॥
एसो चिय भवभयभीमकूवमजंतसत्तउद्धरणो । वद्धंतुब्भडकलिकालदलणदक्खो इमो चेव ॥ २ ॥
एसो चिय सिवमंदिरकवाडपुडविहडणेकत्तछिच्छो । संजमलच्छिनिवेसियविसालवच्छत्थलो एस ॥ ३ ॥
एसो चिय करुणाजलनिवाचियमच्छरगित्तजणो । अप्पडिमनाणदंसणपमोक्खगुणगणनिही एस ॥ ४ ॥
पच्चाइऊण एवं पूसं तिविहेण वयणनिवहेण । पणमियजिणवरचरणो सहस्सनयणो गओ सगं ॥ ५ ॥
इय घोरपरीसहवेरिसमरविद्धंसणेक्कवीरस्स । वीरस्स भुवणपहुणो चरियंमि सुहोहभरियंमि ॥ ६ ॥
सुरसूलपाणिकोसियमहाहिपडिवोहणत्थसंवद्धो । पंचमओ पत्थावो समत्थिओ वित्थरेणो ॥ ७ ॥

इइ सिरिगुणचंदस्सरिइए महावीरचरिए सूलपाणिचंडकोसिअपवोहणो नाम पंचमो पत्थावो ।

अथ षष्ठः प्रस्तावः

पुत्रज्जियावज्जिणासणत्थं, एगागिणा वीरजिणेसरेण । तितिविख्या जे उवसग्गवग्गा, निंदसिया ते सयला कमेण ॥१॥
एत्तो य गोसालयदुव्विणेयजुत्तस्स तस्सेव महापटुस्स । होहिंति जे ते उ निंदसइस्सं, एग्गचिच्चा निमुणेह तुब्भे ॥२॥

अह पुव्वोवइद्वथूणागसन्निवेसाओ निक्खमिज्जण गामाणुगामेण परिब्भमंतो ठाणे ठाणे सुरविसरेण
पूइज्जमाणो अभणमाणोवि नियमाहप्पेण पाणिगणं पडिबोहिंतो पत्तो काणणुज्जाणदीहियारमणिज्जं रायगिहं
नयरं, तस्स य अदूरेदेसे समुत्तुंगपासायसहस्ससमद्धासिओ नालंदो नाम संनिवेसो, तत्थ धणक्कणगसमिद्धो
अज्जुणो नाम तंतुवाओ परिवसइ, तस्स य अणेगे कम्मकरा विसालसालासु संठिया विसिद्वपट्टइसाइं वुणंति, भय-
वंपि वासारत्तं काउकामो अज्जुणं अणुजाणाविज्जण एगंतभूयाए तसपाणविरहियाए सुन्नसालाए मासखमणं पढम-
मुवसंपज्जित्ता विहरइ । इओ य गोसालो नाम मंखलिमंखस्स पुत्तो चित्तफलोगोवजीवी एगागी परिभमंतो तत्थेव
सालाए ठिओ जत्थ भयवं पलंबियमुओ चिद्वइत्ति । जहिं च एयस्स उप्पत्ती तं पच्छा भणिणी, पढमं ताव जस्स
सगासाओ मंखलीमंखो जाओ तहा कहिज्जइ ।

उत्तरावहविसए अत्थि सिलिंधो नाम संनिवेसो, तत्थ केसवो नाम गामरक्खगो, तस्स पाणप्पियाए विणीयाए

सिवाभिहाणाए भारियाए कुच्छिसि संभूओ मंखो नाम पुत्तो, सो य कमेण जोवणमुवगओ, अन्नया सो पिउणा सह सरोवरं गओ, जलमज्जनं च काऊण तडे निवन्नो पेच्छइ चक्कवायमिहुणं अन्नोन्ननिम्भरपेमाणुरागरंजियहिययं विविहकीलाविसेसे कुणमाणं, कहां चिय ?—

चंचपुडछिन्नवनलिणिनाललवसंविभागफुडपणयं । सूरत्थमणासंकाकयनिविडरोप्परसिलेसं ॥ १ ॥

जलपडिर्बिंविनियनिरूपेक्खणुप्पन्नविहपरिसंकं । अन्नोन्नविहियनिक्कवडचाडुवविखत्तमणपसरं ॥ २ ॥
एरिसं च तं नाऊणं मंदं मंदं परिसप्पिणा कयंतेणव असुणियागमणेण पारद्विएण आयन्नंतमाकड्डिऊण खित्तो तदभिमुहो सिलीमुहो, अह दिव्वसंजोगेण लग्गो चक्कवायस्स, मम्मिओ य सो तेण घाएणं, जावडल्लवि न चावल्लइ ताव तं तहाविहं पेच्छिऊण खणं रुणुञ्जुणिऊण य सकरुण विवन्ना चक्कवाई, इयरोऽवि मुहुत्तमेत्तं जीविऊण पंचत्त-
मुवगओत्ति । एवं च तव्वइयरमवलोइऊण मंखो सुच्छानिमीलियच्छो निवडिओ धरणिमंडले, दिट्ठो य केसवेण अहो किमेवमतक्कियमावडियंति विम्हियमणेण, समासासिओ सिसिरोवयारोहिं, खणंतरेण उवलद्धचेयणो पुच्छिओ य—
पुत्त ! किं समीरखोभो ? उय पवलपित्तदोसो ? अहवा नित्यामत्तणं ? अन्नो वा कोइ हेऊ ? जेणेवं निस्सहंगो चिरं मो-
हमुवगओऽसि ? साहेसु परमत्थं, तेणावि पिउवयणमायन्निऊण विमुक्कदीहुस्सासेण भणियं—ताय ! एवंविहं चक्कवाय-
मिहुणं नियच्छिऊण मए पुव्वजाई सरिया, किर अहं पुव्वभवे माणससरोवरे एवं चिय चक्कवायमिहुणत्तणेण वट्ठंतो पुलिं-

दसुक्कमग्गणाभिहओ तक्खणविरहफुट्टहिययाए चक्कवाईए अणुगओ मओऽहि, मरिऊण संपयं तुह पुत्तत्तणेण उववन्नो, इण्हि च चिरपणइणीए तीसे चक्कवाईए विरहं सोढुं न पारेमि, केसेवेण भणियं—वच्छ ! अलं समइक्कंतदुक्खसुमरणेणं, एसो चिय सहावो एयस्स दढकयंतस्स जं न सहइ दहुं चिरकालं पियसंपओगसुहिंयं कमवि जणं, अवि य—

देवाविय नियपणइणीविरहुब्भवदुक्खदहणसंतत्ता । मत्तव मुच्छिया इव कहकहवि गमंति नियजीयं ॥ १ ॥
तुम्हारिसाण पुत्तय ! केत्तियमेत्तं इमं अओ दुक्खं । जेसिं चम्मोणद्धं देहं सवावयासज्जं ॥ २ ॥

ता विरम पुवभवसुमरणाउ वट्टेसु वट्टमाणेणं । तीयाणागयचित्तणवसेण सीयइ सरीरंपि ॥ ३ ॥

तेणं चिय संसारो नूणमसारो इमो दढं जाओ । जं जम्ममरणजरोगसोगपमुहाइं दुक्खाइं ॥ ४ ॥

इय पन्नविउं विविहप्पयारहेऊहिं केसवेणं सो । नीओ कहमवि गेहे विरहमहावेयणाभिहओ ॥ ५ ॥

तत्थ गओऽवि सो पसुक्कपाणभोयणो सुन्नमणो धरणिनिसियलोयणो महाजोगिच्च निरुद्धवाचारंतरपरिचित्तणो तणंपि व नियजीवियंपि गणेमाणो अन्छइ, एयावत्थं च तं पासिऊण जायचित्तपरितावेण सयणवग्गेण मा छलणा-
विगारो कोऽवि होज्जत्ति संकियमणेण सद्वायरेण वाहराविया तंतमंतवाइणो, दंसिओ तेसिं, कया य उवयारा, न जाओ मणागंपि विसेसो, अन्नया य देसंतराओ आगओ एगो थेरपुरिसो, ठिओ एयस्स चव गिहे, दिहो अणेण मंखो, पुट्टो य पासवत्ती केसवो, जहा—भइ ! किं कारणं जं एसो जुवावि रोगाइणा निरुवहओवि ससल्लो इव लक्खिज्जइ ?

केसवेणवि साहिओ दोसुब्भवो, तेण भणियं-कयं किंपि तुमए एवंविहदोसस्स पडिविहाणं ? केसवेण भणियं-दंसिओ एसो पवरमंतताइजाणगाणं, थेरेण जंपियं-निरत्थओ सवोवक्को, पेसगहस्स किं करिंति ते वरागा ? तहाहि—

उग्गविसस्सप्पसंभूयेयेणोवसमकरणदक्खावि । पंचाणणहुट्टकरिंदरक्खसीथंभणपरावि ॥ १ ॥

अयससुत्थोवहवविणासकुसलावि परमविज्जावि । पेसपरव्वसहिययं पगुणं काउं न पारिंति ॥ २ ॥

केसवेण भणियं-किं पुण एत्तो कायद्वं ? तेण भणियं-जइ मं पुच्छसि ता जावज्जवि दसमिदसं न पावइ एस ताव आलिहावेसु चित्तफलहगे पुद्ववइयरं, जहा-पुल्लिंदेण चक्कवाओ सरेण पहओ, जहा तंमि जीवंते चेव तप्पणइणी मयत्ति, एवं च काराविऊण चित्तफलगहत्थं एयं परिब्भमावेसु गामनगराहसु, मा एवं कए कहवि विहिव-सेण पुद्वभवभज्जावि पावियमहिलाभावा फलगलिहियचक्कवायमिहुणवइयरवलोयणजायजाईसरणा इमिणा सद्धिं संघडेज्जा, सुवंति य पुराणागमेसु एरिसवुत्तता, एवं च कए एसोऽवि आसाभुयगगलाखलियजीओ कहवय-दिणाणि जीवेज्जा, एवमायन्निऊण केसवेण साहु साहु तुह बुद्धीए, को जाणइ परिणयमइणो पुरिसे मोत्तूण एवं-विहविसमत्थनिन्नयं ? ति अभिणंदिऊण तवयणं निवेइयं मंखस्स, तेणावि भणियं-ताय ! किमजुत्तं ? सिग्घमुचट्ट-वेह चित्तफलंगं, एसो चेव हवउ कुवियप्पकळोलमालाउलस्स चित्तस्सुवक्खेवो, तओ केसवेण सुणिऊण तदभिप्पायं आलिहावियं जहावट्ठियचक्कवायमिहुणरूवाणुगयं चित्तफलंगं, समप्पियं च मंखस्स, दिन्नं संबलं, तयणंतरं च सो

चित्तफलगत्यो सहाङ्गा एगेण अणुगम्ममाणो नयंरपुरखेडकब्बडमडंबपमुहेसु सन्निवेसेसु आसापिसायनडिओ निव्विस्सामं परिब्भमइ ।

दंसेइ पइगिहं चिय समूसियं तं च तियचउकेसु । चउमुहमहापहेसु य पवासभादेउलेसुपि ॥ १ ॥

ताहे रहंगमिहुणं तहासरूवं निरूविऊण जणो । कोऊहलेण पुच्छइ साहेइ य सो जहावित्तं ॥ २ ॥

अणवरयंपि सवित्थरमसमत्थो नियकहं च सो कहिउं । संखेवत्थनिबद्धं साहइ दुवईए नियवत्तं ॥ ३ ॥

जहा-माणससरोवरंमि अवरोप्परपोढपेमाणुरंजियं, नयणनिमेसमेत्तविरहदूभिज्जंतदेहयं । लुद्धयमुक्कनिसियसर-
विडुरियमह पंचत्तमुवगयं, संपइ संपओगमभिवंछइ एयं चक्कमिहुणयं ॥ ४ ॥ इमं च निसामिऊण केई पहसंति
केई अवहीरंति केइ अणुकंपंति, सोऽवि अविलक्खचित्तो सकज्जापसाहणेक्कनिरओ परियंडंतो चंपं नयरिं गओ, तत्थ
य निड्डियं पुद्वाणियं संवलं, तओ अन्नं जीवणोवायमपेच्छंतो तं चेव चित्तफलं पासंडं ओड्डिऊण गायणाइं गाय-
माणो भिक्खं भमिउं पवत्तो, अविय—

अइतिक्खल्लुहाभिहयस्स पिययमाजोगऊयुयमणस्स । एक्काविय से किरिया उभयत्थपसाहिया जाया ॥ १ ॥

इओ य-तत्थेव पुरे वत्थवो मंखली नाम गिहवई, सुभद्दा य से भज्जा, सो य अपरिहत्थो वाणिज्जकलासु अकु-
सलो नरिंदसेवाए असमत्थो करिसणसमए अलसो कट्टकिरियाए अविक्खणो वावारंतरेसु, केवलं भोयणमेत्त-
पडिबद्धो कं सुहेण निवाहो होज्जति अणवरयं उवायंतरं विचिंतंतो पेच्छइ मंखं चित्तपट्टपयडणपडियकणभिकखा-

चित्तीए पइदिणं सुहेण निवहतं, तं च दट्ठुण चित्तीयमणेण-अहो एयस्स इमा अणुवरोहिणी चित्ती अचोरहरणिज्जं मंडोलं निचंडुहा कामधेणू असलिला सस्सनिप्फत्ती अपरिकिलेसो महानिही, ता जीविओऽम्हि चिरकालाओ जं पाविओ एस परमोवाओत्ति विगप्पिऊण गओ मंखस्स समीवं, पडिवन्ना तस्स सेवा, सिक्खियाइं गायणाइं, अह तंमि पुब्बभज्जाविरहवज्जज्जरियहियंमि पंचत्तमुवगए सुणियतत्तं व अप्पाणं मन्नतो महया वित्थरेण चित्तफल-गमवरमालिहाविकुण समागओ निययमंदिरं, भणिया नियगेहिणी-पिए ! पाडेसु संपयं खुहासिरे वजासणिं पगुणा भवाहि य विहारजत्ताए, तीए बुत्तं एसा पगुणाऽहं, वच्चसु जत्थ मे रोयइ, तओ चित्तफलं घेत्तुं तीए समेओ नीहरिओ सो नयरीओ, तच्चित्तीए परिब्भमिउमारद्धो य देसंतरेसु, तच्चासिलोगोऽवि पुच्चदिट्ठनाएण तमागयं पेच्छिऊण मंखो आगओत्ति वाहरइ, एवं मंखली मंखोवइड्ढपासंडसंबद्धेण मंखो जाओत्ति । अन्नया य सो परिब्भ-मंतो पत्तो सरवणसन्निवेसे, ठिओ गोबहुलमाहणस्स गोसालाए, तत्थ निवसमाणस्स पसूया सुभद्दा, जाओ से दारगो, कयं उचियसमए गुणनिप्फन्नं गोसालोत्ति नामं, संवड्ढिओ कमेणं, अइकंतो बालत्तणं, सो य दुट्ठसीलो सभावेषणं, कुणइ विविहाणत्थे सभावेण, न वट्ठइ आणानिद्देसे, सिक्खविज्जमाणो पवहइ पओसं । अवि य-

सम्माणदाणपगुणीकओवि उज्जुत्तणं खणं धरइ । सुणपुच्छंपिव पच्छा कुडिलत्तं झत्ति दंसेइ ॥ १ ॥
अत्थक्कजंपिरं मम्मवेहगं कूडकवडपडिवद्धं । वेयालं पिव तं पेच्छिऊण को को न संकेइ ? ॥ २ ॥

पाव ! नवमासमेतं गन्धे बूढोवि पालिओवि बहं । सयवारंपि य भणिओ वट्टसि नो वयणमेत्तेऽवि ॥ ३ ॥
 इय जणणीए एसो लुत्तो पच्चुत्तरं इमं भणइ । अम्मो ! ममोदरे विससु जेण दुगुणं तुमं धरिमो ॥ ४ ॥
 जत्थ दिवसंमि कलहं पिउणावि समं पउंजइ न एसो । भोयणरुईवि पावस्स तस्स जायइ न तत्थ फुडं ॥ ५ ॥
 नीसेसदोसनिवहेण निस्मिओ निच्छियं पयावइणा । जं तारिसो न दीसइ अन्नो सर्वमिवि जयंमि ॥ ६ ॥
 तह कहवि तेण नियदुट्ठिमाइ लोगो परंसुहो विहिओ । जह दुस्सीलजणाणं सो पढमनिंदसणं पत्तो ॥ ७ ॥
 इय विसतरुव्व दिट्ठीविसोव्व पढमुगग्गेवि वट्टतो । दंसणमेत्तेणं चिय भयावहो सो जणे जाओ ॥ ८ ॥
 अन्नया य सो पिउणा समं नाढं कलहिऊण तारिसयं चिय चित्तफलं आलिहवेत्ता एकूळो भमंतो उवागओ
 तत्थेव सालाए जत्थ भयवं ठिओत्ति । एसा गोसालगस्स उप्पत्ती ॥

अह सामी पढमं मासक्खमणं काऊण पारणगदिणे पविट्ठो भिक्खट्ठा, गोथरचरियाए पत्तो विजयाभिहाणस्स
 सेट्ठिस्स मंदिरं, दिट्ठो य तेण भयवं, तओ परमहरिसवसविसण्णमाणसमुच्चरोमंचमुव्वहंतेण पाराविओ भूरिभक्खवं-
 जणसनिद्धाए भोयणविहीए, पाउब्भूयाणि नहयले गंभीरभेरीभंकारुम्मिस्सचउविहत्तूरसणाहाइं सिंदूरपूरारुणचा-
 मीयरधारापज्जवसाणाइं पंच दिव्वाइं, वियंमिओ तियचउक्कचचरपहेसु विविहो साहुवाओ, निसामिओ गोसालेण
 एस लुत्तंतो, तओ चित्तियमणेण-अहो न सामन्नमाहण्यो एस देवज्जो, ता परिचइऊण चित्तपट्टिगापासंडं पडिव-

ज्जामि एयस्स सीसत्तणं, न कयाइ निष्फला हवइ रयणायरसेवा, एवं विगप्पमाणस्स भयवं पारिऊण पत्तो तमेव तंतुवायसालं, ठिओ काउस्सग्गेणं, गोसालोऽवि सामिणो अट्ठंगं निवडिऊण चलणेसु विन्नवेइ—

एरिसमाहप्पं तुह देवज्जय ! नो सए पुरा नायं । कुसलोऽवि सुणइ नग्गं अहवा थवियाण रयणाणं ॥ १ ॥

नियजणगच्चाओऽविहु वंछियसुहअत्थसाहगो जाओ । अणुकूले वा दइवे अनओऽवि नयत्तणमुवेइ ॥ २ ॥

हवउ बहुजंविएणं पडिवज्जिस्सामि तुम्ह सीसत्तं । अब्भुवग्गेसु सामिय ! पत्तो एक्को तुमं सरणं ॥ ३ ॥

सामीवि इमं सुणित्तावि विहिपडिसेहे अकुणमाणो तुसिणिक्को ठिओ, इयरोऽवि निययाभिप्पाएण पडिवन्न-
सिस्सभावो भिक्खाए पाणवित्तिं काऊण भगवओ समीवं न सुयइ, अह बीयमासखमणपारणए आणंदनामस्स
गिहवइस्स घरे गोयरचरियाए पविट्ठो भयवं, पडिलाभिओ य खज्जगविहीए, तइए य मासखमणपारणए सुनंदस्स
मंदिरे सच्चकामगुणिएणंति । एत्तो चउत्थमासखमणमुवसंपज्जित्ताणं विहरइ, गोसालोऽवि बहुदिवसेवासंभाविय-
पणयभावो कत्तिथयुन्निमादिवसे संपत्ते पुच्छइ—भयवं ! एरिसियंमि चारिसियमहूसेवे किमहमज्ज भत्तं लभिस्सामि ? ,
एत्थंतरे जिणवरतणुसंलीणेण भणियं सिद्धत्थवंतरेण—भइ ! अज्ज तुमं पाविहिसि अबिलेण समं कोद्वक्कुरं, कूड-
रुवगं च दक्खिणाएत्ति, सो एवं निसामिऊण सूरुग्गमाए आरब्भ सच्चायेरेण उच्चावएसु गिहेसु परिभमिउभा-
रद्धो, जत्थ जत्थ वच्चइ तत्थ तत्थ आरनालकल्लवियं कोद्वक्कुरमेव लब्भइ, अह जायंमि अवरणहसमए छुहा-

पिवासाभिहओ जाहे अन्नं किंपि न पावेइ ताहे एगेण कम्मारएण गेहे णेऊण जेमाविओ
 उवणीओ य से भोग्यावसाणे रूवगो, गहिओ य तेण, नवरं वीहीए दंसिओ, कूडगो य ज.
 जहा भवियवं, न तं हवइ अन्नह'त्ति नियइवायं गिण्हइ, भयवंपि तंमि चिय कत्तियपुणिणमादिणे । १ ॥ खमिऊण नालं-
 दाओ गओ कोल्लागसन्निवेसं, तत्थ य बहुलो नाम माहणो तद्धिणं दियवरे परमायरेणं सुंजावेइ, तस्स य गिहे
 चउत्थमासखमणपारणं काउकामो सामी पविट्ठो भिक्खं, दिट्ठो अणेण, तओ परमन्नेण घयमहुसणाहेण पडिला-
 भिओ, चियंभियाइं पंच दिवाइं । इओ य—

कूडगरूवयहत्यो लज्जाए मंदमंदसंचरणो । जाए वियालसमए गोसालो एइ सालाए ॥ १ ॥

जिणनाहमेच्छतो संभंतो पुच्छई समीअगयं । लोयं जिणप्पउत्तिं पुणरुत्तं सव्वजत्तेणं ॥ २ ॥

जाव न कोइ निवेयइ सवाहिरब्भंतरं समंतेणं । नालंदं तावेसो हिंडइ सामिं निहालंतो ॥ ३ ॥

न य कत्थवि उवल्लो तग्गमणविही तओ स चिंतेइ । पडिक्कलो मज्झ विही पुणोवि चिहिउडमिह एगागी ॥ ४ ॥

एवं च सुचिरं परिङ्खरिऊण परिचत्तचित्तफलपमुहोवगरणो विमुक्कनियंसणो सउत्तरोट्ठं सिरं खउराविऊण नीह-
 रिओ तंतुवायसालाओ, तुरियं वंचतो य पत्तो कोल्लागे, तत्थ य वहिया जणो अणमणं एवं जंपेइ—अहो धणणो
 कयउण्णो उवल्लजम्मजीवियफलो माहणो जस्स घरंमि तहाविहमहामुणिदाणवसेण निवडिया कणगवुड्डी, तिय-

सेहिं उगघुष्टं अहो दाणं, जाओ जयंमि निम्मलो साहुवाओ, गोसालोऽवि एयभट्टं जणंतियाओ सोचा हट्टतुट्टो
एवं विचिंतेइ-जारिसं महासुणिं एए वयंति तारिसप्पभावो सोच्चिय मम धम्मायरिओ महावीरो, जेण न खलु अत्थि
अन्नस्स कस्सइ तहारूवस्स समणस्स वा माहणस्स वा एवंविहा इट्ठीसक्कारपरक्कमत्ति निच्छिऊण कोछागसंनि-
वेसंमि स चाहिरब्भंतरं सुनिउणदिट्ठीए जाव पलोएइ ताव दिट्ठो भयवं काउस्सगमुवगओ, तं च पेच्छिऊण हरिस-
वसूससियरोमकूवो वियसियवयणो पावियंचितारयणं व अप्पाणं मन्नतो तिवखुत्तो आयाहिणपयाहिणं काऊण
निवडिओ भयवओ चरणेसु, भालतले घडियपाणिसंपुडो य एवं भणिउं पवत्तो—

असरिसगुणगणयणायरो तुमं तिहुयणस्स पुज्जो य । विहलियजणसाहारो य जेण ता विणवेमि इमं ॥ १ ॥
पुवं वत्थाइपरिग्गेहण जोगो न आसि दिक्खाए । संपइ पुण परिचत्तंमि तंमि जाओ अहं जोगो ॥ २ ॥
ता तेलोक्कदिवायर ! पडिवज्जसु जेण संपइ भवामि । तुह सिस्सो जा जीवं एत्तो तं चेव धम्मगुरू ॥ ३ ॥
तुह थेवमेत्तविरेहेवि नाह ! हिययं कंहपि फुट्ठंतं । पुणरुत्तसंगमसमीहणेण कट्टेण संघरियं ॥ ४ ॥
जाणामि वीयरगे कीरंतो नेव निव्वहइ नेहो । पेमगहिलं सचिच्चं किंतु न पारेमि पडिखलितं ॥ ५ ॥
अन्नं च-अच्छउ दूरे सेसं वियसियनवल्लिमणहरच्छीए । जं पेच्छसि तं तेणवि सुणेवि अब्भुवगओऽहंति ॥ ६ ॥
इय सविणयं सपणयं भणमाणे तंमि तिहुयणेक्कपह । उज्झियपेमवियारोवि तस्स वयणं पडिस्सुणइ ॥ ७ ॥

जाणंताविहु अइदुइसीलयं भाविरं अणत्थं च । गरुया पणएसु तहावि हुंति न परंमुहा कहवि ॥ ८ ॥

एवं च सामी तेण पडिवणणसिस्सभावेण समेओ सुवन्नखले सन्निवेशे वच्चइ, तस्संतरे गोवाले बहुखीरं गहाय महतीए थालीए अखंडफुडिंहिं नवएहिं सालितंदुलेहिं पायसमुवक्खडेंते प्रेच्छिऊण गोसालो भणइ-भयवं ! दढं छुहाभिभूओऽम्हि, ता एह एत्थ पायसं परिभुंजामो, अह सिद्धत्थेण चिरकाललद्धावगासेण भणियं-भइ ! मा तम्मसु, एसा थाली अद्धसिद्धा चेव बिहडीहि, ताहे सो नियदुइसीलयाए तं वयणं वितहं काउमणो गंतूण ते गोवे भणइ-अरे एस देवज्जगो तीयाणागयजाणओ एवं कहेइ, जहा-एस पायसथाली अद्धसिद्धा चेव विवज्जिही, ता पयत्तेण संठवेह, एवं च निसामिऊण ते भयभीया वंसदलेहिं तं पिढरं गाढं वेढिऊण रंधिउमारद्धा, अह पउरतं-दुलपक्खेवविहसिया निमेषमेत्तेण फुट्टा थाली, पच्छा गोवेहिं जं जहा पावियं तीसे पायसालिद्धं कप्परं तं तहा धेत्तूण परिमुत्तं, गोसालोऽवि कंदुकविरालोच्च पेच्छमाणो विलक्खो चेव ठिओ सुट्टुयरं च नियइवायं पडिवन्नो, अह सामी वंभणगामं गओ, तत्थ य गामे दोन्नि पाडगा, तेसु दो भायरो नंदउवणंदनामाणो सामित्तं कुणंति, सुवणगुरूवि छट्टुपारणगंमि पविट्ठो नंदपाडयंमि, दिट्ठो नंदेण, पडिलाभिओ दहिमिस्सेण वासियकूरेण, गोसालोऽवि गओ इयरपाडयं, उचुंगपासायमवलोइऊण पविट्ठो उवनंदस्स मंदिरे, भणिया उवनंदेण कम्मयरी, जहा-देहि एयस्स भिक्खंति, उवणीओ अणाए वासियकूरो गोसालयस्स, सो य तं अणिच्छंतो उवणंदं एवं निव्वभच्छेइ-

गामुक्कोडं गिण्हह नरनाहस्स व न देह किंपि करं । विविहे कुणह विलासे अक्खलियं पावमायरह ॥ १ ॥

अम्हारिसाण सुणिपुंगवाण गेहंगणमुवगयाणं । वासियभत्तं दावितया कंहं नेव लजेह ॥ २ ॥

एवं च आयन्निऊण रुट्टेण उवणंदेण भणिया दासी-भदे ! एयस्स चैव समणस्स सीसंमि पक्खिवसु भत्तमेयंति, खित्तं च तीए, तओ गोसालो वाढमुबूढाभिमाणो दडोढुभिउडिमासुरो अन्नं किंपि तस्स अणत्थं काउमसमतथो गेहदुवारो ठाऊण भणइ-जइ मम धम्मायरियस्स अत्थि तवो वा ता एयस्स मणुयाहमस्स भवणं डज्झ-उत्ति, अह अहासन्निहिएहिं वाणमंतरेहिं भगवओ पक्खवायमुवहंतेहिं विउव्विओ हुयवहो, दहं से मंदिरं ।

तयणंतं च भयवं चंपानयरिं गओ, तत्थ य तइयं वासारत्तं ठाइ, दोमासिएण य खमणेण तवोकम्ममुवसंपज्जइ, विविहाणि य उक्कुड्यासणाईणि करेइ, चरिमदुमासियपज्जवसाणे य बाहिं पारेत्ता गोसालेण समेओ कालायं नाम सन्निवेसं वच्चइ, तहिं च एगंतभूए तसपाणरहिए सुन्नागारे निसासमयंमि पडिमं पडिवज्जइ, गोसालोऽवि चवल-त्तणेण निरोहमसहमाणो गेहदुवारदेसे निलुक्को अच्चइ, एत्थंतरे सीहो नाम गामाहिवपुत्तो विज्जुमईनामाए दासीए समेओ भोगत्थी तं चैव सुन्नघरं पविट्ठो, तेण य महया सहेण भन्नइ-अहो जइ कोइ एत्थ समणो वा बंमणो वा पडिओ वा वसिओ ता सो सोहेउ जेण अम्हे अन्नत्थ वच्चाओ, इमं च सुणिऊण सामी ताव पडिमापडिवन्नत्तणेण तुण्हक्को जावेइ, इयरो पुण कवेडेण न देइ पडिवयणं, ताणि य अणुवलद्धपडिवयणाणि निस्संकं सुरथविणोएण

खणं अचिच्छत्ता नीहरिउमारद्धाणि, एत्थंतरे दुवारदेसंतरट्टिएण गोसालेण गच्छंती छित्ता विज्जुमई, तओ तीए भणियं-अज्जउत्त ! अहं पुट्ठा केणावि, एयं च निसामिऊण सीहेण वलित्ता गहिओ वाहाए गोसालगो, भणिओ य-अरे कइयवेण अम्हे अणायारमायमाणानि पाससि, पुच्छिओऽवि न साहेसि जहा अहमिह निवसाभित्ति निब्भ-च्छिऊण जहिच्छं पिट्ठिओ लट्ठीए, गओ य सट्ठाणं, तओ-गोसालो भणइ जिणं-तुम्ह समक्खंपि एक्कओ अहयं । एवं निट्ठुरघाएहिं कुट्ठिओ कारणेण विणा ॥ १ ॥ न मणागंपि इ तुम्हे निवारणं कुणह तस्स पावस्स । मम घाय-णुज्जुयस्सवि जुज्जइ गरुयाण किमुवेहा ? ॥ २ ॥

अह जिणतणुमल्लीणो सिद्धत्थो वागरेइ गोसालं । रे दुट्ठसील ! जइ तं सचं चिय सुहसमायारो ॥ ३ ॥

ता किं अनिमित्तं चिय तं महिलं छिवसि पाव ! गच्छंति । जह अम्हे संलीणा तह ठासि न गेहमज्झगओ ॥ ४ ॥

तुह पक्खं कुणमाणा अम्हेवि तुमं व नणु हणिज्जामो । दुट्ठोवट्ठभपरा होति सदोसा अदोसावि ॥ ५ ॥

एत्थंतरंमि सामी निक्खमिउं पत्तकालगामंमि । पुव्वविहाणेणं चिय सुन्नघरे संठिओ पडिमं ॥ ६ ॥

अह तत्थवि रयणीए गामउडसुओ उ खंदओ नाम । नियमज्जालज्जाए एइ समेओ सदासीए ॥ ७ ॥

दंतलियानामाए ताहे पुव्वं व पुच्छइ इमोऽवि । गोसालोऽवि निलुक्को भएण गेहेक्कदेसंमि ॥ ८ ॥

विज्जणंति मन्नमाणो तत्तो तीए समं जहिच्छाए । उवमुंजिऊण भोगे सो निससरिउं समारद्धो ॥ ९ ॥

तेसिं मिहो कहुहावसवणसंवड्डमाणपरितोसो । कहकहकहत्ति पहसइ गोसालो अह पिसाओव ॥ १० ॥
 सोच्चा पहसियसहं खंदो कोवेण जट्टिसुट्ठीहिं । हणिऊण तं विमुंचइ ताहे सो एइ जिणमूले ॥ ११ ॥
 भणइ य सोवालंभं नायगधम्मो किंसेस संभवइ ? । पेच्छंताणवि तुम्हं जं एवमंहं हणिज्जाभि ॥ १२ ॥
 रक्खाकएण तुब्भे ओलगिज्जइ सया पयत्तेणं । जइ पुण सावि न विज्जइ निरत्थिया ता धुवं सेवा ॥ १३ ॥
 अज्जविं सहोसाणवि पहुणो नियसेवगाण परिताणं । सच्चायेरेण कुब्बंति किं पुणो नीइनिरयाणं ? ॥ १४ ॥
 सिद्धत्थेणं भणियं केत्तियमित्तो इमो विणिग्घाओ ? । अज्जवि मुहस्स दोसेण नत्थि तं जं न पाविहिसि ॥ १५ ॥
 तओ सामी कुमारसंनिवेशं गओ, तत्थ य चंपगरमणिज्जाभिहाणे उज्जाणे पलंविद्यमुओ ठिओ काउस्सग्गेण, तहिं
 च सन्निवेशे अपरिमियधणधन्नसमिद्धो अचंतसुरापाणप्पिओ कुवणयनाम कुंभकांरो परिवसइ, तस्स आवणंमि पास-
 जिणसिस्सा ससमयपरसमयत्थपरिन्नाणनिउणा भवोयहिनिवडंतपाणिगणसमुद्धरणसमत्था छत्तीसगुणरयणनिहिणो
 जहोवइट्ठपगिड्डइकिरियापरूवणापरायणा अणेगदेसंतरागयविण्यभमरलिहिल्लमाणसुयमयरंदा सुणिचंदा नाम
 स्वरिणो निवसंति, ते य बाढं बुड्डभावमुवगया एवं विचिंतंति—

सव्वणुजिणपणीओ धम्मो सव्वत्थ वित्थरं नीओ । मिच्छत्तवसपसुत्ता सत्ता पडिबोहिया बहुसो ॥ १ ॥
 सुत्तत्थेहिं सिस्सा संपइ निप्फाइया जहासत्तिं । परिवालओ चिरं तह सवालुबुड्डाउलो गच्छो ॥ २ ॥

ता एत्तो जुत्तं मे विसेसपरिकम्मणं सरीरस्स । काउं जहसत्तीए सवत्थवि उज्जमेयवं ॥ ३ ॥

इय चिंतिऊण सपए निवेसिओ तेण वद्धणो नाम । सिस्सो पडिख्वणुणो विहिआ से तह गणाणुन्ना ॥ ४ ॥

भणिओ य वच्छ ! गच्छो जहा मए पालिओ पयत्तेण । तुमएवि तहा एसो पालेयवो सयाकालं ॥ ५ ॥

सिद्धंतदेसणावि य अविगणियपरिस्समेण कायवा । सिस्साणं एवं चिय रिणमोक्खो कम्मविगमो य ॥ ६ ॥

एत्तोऽवि मद्द ! मद्दं नूणं भुवणत्तएवि नो अत्थि । तो सुहसीलो होउं मुहाए मा हारिसिं एयं ॥ ७ ॥

भो सुणिणो ! तुम्हेहिं पयट्ठियवं इमस्स वक्कमि । निब्भच्छिहिवि वहुं कमकमलं नेव मोत्तवं ॥ ८ ॥

जं किंपि मए पुवं तुम्हे सम्मं गुणेषु नो ठविया । अपए वा सिक्खविया तं सबं मरिसणिज्जं मे ॥ ९ ॥

इय सुणिचंदसुणिंदा तक्कालोचियविहिं विहेऊण । पारंभंति सुधीरा दुक्करजिणकप्पपरिकम्मं ॥

अन्नया य ते महाणुभावा भावियदुवालसविहभावणा पंचणहं तुलणाणं तवसत्तसुत्तएगत्तवलसरूपाणं मज्झया-
राओ वीयाए सत्तुलणाए अप्पाणं भावेमाणा विहरंति । इओ य-गोसालो मज्झंदिणसमए भगवंतं भणइ-एहि
पत्थावो वट्ठइ, पविसामो गाममज्झे भिक्खानिमित्तं, सिद्धत्थेण भणियं-पज्जत्तं अम्ह अड्डणेणं, तओ गोसालो
पविठ्ठो भोयणत्थं गामे, दिट्ठा य अणेण इओ तओ परिभमंतेण ते पासनाहसिस्सा विचित्तपडपाउरणा पत्तयमुहो-
वगरणकलिया यत्ति, ते य पेच्छिऊण गोसालेण पुच्छिया-के तुम्भे !, तेहिं भणियं-समणा निगंथा, सट्ठकमढवि-

णिम्भियमहामेहवारिधारोवसगावलोयणाउलफणिरायफणाफलगविरइयातुच्छत्तस्स पासनाहस्स सिस्सा, इति सोचा सो सिरं धुणंतो भणइ-अहो अहो निगंगा दुक्करकारया तुम्हे जे एत्तियमेत्तपि गंथमुव्वहंता अत्तणो निगंगत्तणं ठावेह, अहो पच्चक्खमुसावाइत्तणं अहो निन्निमित्तमत्तुकोसो तुम्हाणं, सबहा निगंगाणं मज्झे न केवि तुब्भे, मम धम्मायरिओ चेव दुरुज्झियवत्थाइपरिगहो दुक्करतवचरणनिरओ महप्पा जहत्यनिगंगथो भन्नइ, तेहि य जिणनाहं अयाणमाणेहिं उलुंठयाए भासंतं पेच्छिऊण भणियं-भइ ! जारिसओ तुमं तं मन्ने धम्मयरिओऽवि तारिसो चेव, जओ-जाणिज्जइ पुत्तविसरिसचेट्ठाए जणणीए सीलसंपया, कंतिगुणेणवि मुणिज्जइ रयणस्स आगरस्स सुद्धी, ता अलं वन्नणाएत्ति वुत्ते रुद्धो गोसालो भणइ-जइ मम धम्मगुरुणो तवो वा तेओ वा अत्थि ता एएसिं धम्मायरियदूसगाणं पडिस्सओ उज्झउत्ति, तो तेहिं भणियं-न अम्हे तुम्ह वयणेणं उज्झामो, तो विलक्खो सो गंतूण सामिं भणइ-भयवं ! अज्ज मए सारंभा सपरिग्गहा निगंगा दिट्ठा एवमाइ जाव पडिस्सओ न दट्ठोत्ति किमिह कारणं ? सिद्धत्थेण भणियं-ते पासावचेज्जा थेरा साहुणो, न तेसिं पडिस्सओ तुह वयणेण उज्झइत्ति । एत्थं-तरे जाया रयणी, कज्जलभसलसामलाइं पसरियाइं दिसिमुहेसु तिमिरपडलाइं, इओ य ते मुणिचंदसूरिणो चउक्कंमि तद्दिणे रयणीए दूगागिणो उस्सग्गेण ठिया, सोऽवि कूवणयकुंभकासो सेणिभत्तंमि निम्भरमइरापाणपरव्वसो विसंठु-लधुलंतचलणो सभवणाभिमुहमइतो पेच्छइ बाहिंमि काउस्सग्गपडिवन्ने ते सूरिणो, तओ चोरो एसोत्ति जायकु वि-

यप्येण तेण निविडकरसंपुडेण पीडियं तेसिं गलयं, निरुद्धो उरसासपसरो, तहवि अविचलियचित्ता सुभज्जाणे वट्ठता-
 तक्खणेमेव कम्मलाघवयाए ससुण्णोहिनाणा कालं काऊण देवलोयं गया, तेसिं च अहासन्निहियसुरेहिं कुसुमवरि-
 सपुवयं कया महिमा । इओ य गोसालो ते देवे विज्जुपुंजमासुरसरीरे उप्पयंते निवयंते य साहुनिवाससमीचे पेच्छऊण
 सामिस्स सोहेइ-भयवं ! तेसिं तुम्ह पडिणीयाण पडिस्सओ डज्झइ, सिद्धत्थो भणइ-भइ ! मा एवमासंकेहि, तेसिं
 आयरिया देवलोगसुवगया, अओ देवा महिमं करेति, ताहे सो कोऊहलेण गओ तं पएसं, देवावि पूयं काऊण सट्ठाणं
 पडिनियत्ता, अह तत्थ गंधोदकं पुण्फवासं च दट्ठण दुगुणजायहरिसो पडिस्सए गंतूण सज्झायझाणविणयकरणपरिस्संते
 निब्भरं पसुत्ते तेसिं सिस्से उट्ठविऊण वागरेइ-अरे दुट्ठसिस्सा ! तुब्भे सुंडियसिरा चेव हिंडह, जहिच्छं भिक्खं
 परिमुंजिऊण सबं रत्तिं सुयह, एत्तिंयपि न सुणह-जहा सूरिणो महाणुभावा पंचत्तमुवगया, अहो तुम्हं गुरुसु
 पडिवंधो, एवमाइ कलकलं करेत्तंसि उट्ठिया साहुणो, णवरं तच्चयणासंक्रिया सहसा गया ते सूरिसमीचे जाव
 पेच्छंति कालगयमायरियं, तओ सुचिरं अट्ठिइ काउमारद्धा । कहं ?-

तह पालियावि तह पाडियावि तह गुणगणेषु ठवियावि । तह सिक्खवियावि दढं हा हा अकयन्नुया अम्हे ॥ १ ॥
 किं दुक्करतवचरणेण अम्ह किं वावि कुसलबोहेणं । किं चिर गुरुकुलसंवाससेवणाएवि विहलाए ॥ २ ॥
 जं असरिस्ससंजमरयणरोहेणं नियगुरुं पि कालगयं । पच्चक्खयम्मरासिं पि नेव सुणिमो पमाएणं ॥ ३ ॥

इय ते नियदुच्चरियं पुणो चेव जंपिरे समणे । गोसालो निव्वच्छिय बहुसो सामिं समंणीणो ॥ ४ ॥
तओ सामी चोरागसन्निवेसं गओ, तत्थ य तद्दिवसं परचक्कभयसुवट्ठियं, तब्भएण य खंडरक्खा तियचउक्कसुन्न-
मढसभादेउलकाणुज्जाणेसु अन्नेसु य तद्दाविहठाणेसु अपुच्चपुरिसं चारियसंकाए निभालेमाणा पेच्छंति भयवंतं
एगंमि वणनिगुंजे फासुगविज्जरूवे गोसालएण परिवुडं काउस्सग्गेण संठियंति, तं च पिच्छिऊण 'भीओ भयाइं
पासइ' त्ति जायसंका चित्तिउमारद्धा-अहो एरिसंमि एगंतदेसे एएसिं अवत्थाणं न कोसल्लमावहइ, तद्दाहि-जइ
इमे निद्दोसा ता किं पयडे चिय नो गाममज्झे दुत्था?, अओ निच्छयं चारोवलंभत्थं परचक्कसंति या केइ आगयत्ति
निच्छिऊण पुट्ठो तेहिं सामी गोसालगो य, अहो के तुब्भे? किं निमित्तं वा एत्थावत्थाणंतिवुत्ते भयवं मोणेण
चिट्ठइ, गोसालोऽवि तयणुचित्तीए तहेव जावेइ, जाव य पुणो पुणो वागरिज्जमाणाऽवि न देति पच्चत्तरं ताव निव्वभंतं
चारगा एएत्ति कलिऊण तेहिं नीया कूवतडे, पारद्धा य वरत्ताए बंधिऊण तत्थ पक्खिविउं, नवरं पढमं गोसालं पक्खि-
वंति, पच्छा तं उत्तारिऊण भयवंतं बोलेंति, एवं च उव्वोलणनिवोलणे कुणमाणाण सोमाजयंतीनामाओ पासजिणति-
त्थपडिवन्नसामनुपपन्नपरीसहराइयाओ जीविगानिमित्तधरियपरिद्यायगनेवत्थाओ पुव्वभणियस्स उप्पलनेमित्तियस्स
भगिणीओ निसुणियएवंविहवइयराउ मा भयवं चरिमत्तिथयो गहियदिकखो एस होज्जत्ति जायसंसायाउ जाव
तत्थ पएसे आगच्छंति ताव पेच्छंति भयवंतं तद्दा वाहिज्जमाणंति, तओ ताहिं भणियं-ओ रे दुरायारा! नूणं विण-

स्तिसउकामा तुब्भे जे इमस्स सिद्धत्थनरवंइसुयस्स सुरविसरपणयचलणस्स एवं उवसगं करेह, एयं च निसामि-
 ऊण भयभीएहिं सबहुमाणं खामिऊण सुक्को खंडरक्खेहिं जयगुरू, तं च ताओ वंदिऊण भावसारं गयाओ सट्ठा-
 णंमि । सामीवि तत्थेव कइवय दिणाइं परिपालिऊण गोसालेण समेओ नीसेसनयरमंडलमंडणाए पिट्ठिचंपापुरीए
 गंतूण चउत्थं वासारत्तं उवसंपज्जइ, वीरासणलगंडासणाइनिसेज्जाहिं निरंतरं जावेइ चाउम्मासियं च महाखमणं
 करेइ, तस्स पज्जंतदिणंमि य अन्नत्थपारणयं काऊण कयंगलसन्नियेसंमि बच्चइ, तत्थ य दरिहत्थेरा नाम पासंडत्था
 सारंभा समहिला सपरिगहा सपुत्तनचुगाइसयणा परिवसंति, तेसिं च गेहपाडगस्स मज्झे सकुलक्कमागयदेवया-
 समद्धासियब्भंतरं विउलपट्टसालपरिक्खेवमणहरं समुत्तुंगसिहरोवसोहिअं देवउलमत्थि, तस्स एयंतकोणे समा-
 गंतूण सामी ठिओ पडिमाए, तद्विसं च भंदमंदनिवडंतजलतुसारवायं निरारियंतसिसिरमारुयं निवडइ महंतं
 सीयं, तेसिं च पासंडत्थाणं तंमि दिणे जाओ महुसवो, तम्मि दिणे देवउले मिलिऊण सडिंभा सदारा भत्तीए गायंति
 यं नचंति य, तेऽन्नि तहारूवे दट्ठूण अविगणियभाविभओ गोसालो सोवहासं भणिउमाढत्तो—

जत्थ गिहिणीसु पेमं झाणज्झयणेहिं सह महावेरं । सुरययंचवरूपवणपरायणाइं च सत्थाइं ॥ १ ॥

जीवदयानामंपिवि न सुणिज्जइ जत्थ नूण सुमिणेऽवि । निब्भरमइरापाणंमि निचसो उज्जमो जत्थ ॥ २ ॥
 गाइज्जइ नच्चिज्जइ सविलासं नियकुंडुबसहिएहिं । को होज्ज नाम एसोऽवि कोऽवि पासंडपरमत्थो ? ॥ ३ ॥

ते एवं फरसकखरं तं जंयमाणं पेच्छिऊण समुप्पन्नरोसा भणंति-अरे बाहिं निच्छुभह एयं दुद्धमुहं, न कलमेएण इहट्ठिएणं, एवं कहिए कंठे घेत्तण इयेरोहिं निस्सारिओ देवउलस्स बाहिंमि गोसालो; तहिं च हिमनुसारसंवलियानिरेण अब्भाहओ समाणो निविडबाहुवल्लीसंछाइयवच्छथलो कंपंतकाओ दंतवीणावायणं कुणमाणो समुद्धसियरोमक्खवो अच्छिउं पवत्तो, तारिसं च तं दट्ठण जायाणुकंपेहिं अइनीओ सो अन्नोहिं देवउलमज्झे, खणमेत्तं च जायसीयावगमो नियदुद्धसीलयं पडिक्खलिउमपारयंतो पुणोऽवि वागरेइ-‘जत्थ गिहिणीसु पेम’मिचाइ, तओ पुणोऽवि नीणिओ पवेसिओ च जाव तिन्नि वारे, चउत्थवाराए भवणमज्झपविट्ठो गोसालो भणइ-

दूरे अच्छउ नियमयविगट्ठियं जं न लब्भए वोत्तुं । सब्भूयंमि न पावेमि भासिउं किं करेमि अहं ? ॥ १ ॥
नमिमो तिसंझमेयं ठाणं न जाहिं सदुच्चरीयस्स । रूसिज्जइ थेवंपिहु जइ पर फुडवाइणो चेव ॥ २ ॥

एवं च निसामिऊण परिणयबुद्धीहिं भणिया-एस इमस्स देवज्जगस्स कोऽवि पीडियावाहगो वा छत्तधारगो वा पडिचारगो वा होही, ता किं अरे एएण ? तुणिहक्का अच्छह, नियनियकज्जाइं करेह, जइ सोढुं न तरेह ता सब्बतूराइं वाएह, जहा से सदो न सुणिज्जइ, तहेव विहियं तेहिं, अह जायंमि पभायसमए समुगए दिणयेरे पच्चक्खी-भूयंमि जीवनियेरे तओ ठाणाओ पडिमं उवसंहरिऊण सामी सावत्थिं नयरिं गओ, ठिओ तीसे बाहिं पडिमाए, इओ च भोयणसमए गोसालो पुच्छइ-भयवं ! तुब्भे भिक्खवुं अईयह ?, सिद्धत्थो भणइ-अज्ज अम्ह उववासो, सो पुच्छइ-

भयवं ! अज्ज किमाहारं भुंजिस्सामि ? , सिद्धत्थो भणइ-अज्ज तुमए माणुसमंसं खाइयवं, सो भणइ-अज्ज मए तं भोत्तवं जत्थ इयरमंसंभवोऽवि नत्थि, किमंग पुण माणुसमंसस्स ? , एवं निच्छयं काऊण सवत्थ हिंङ्खिउमारद्धो ।

इओ य-तत्थेव नयरीए पियदत्तो नाम गाहावई, तस्स सिरिमहा नाम भारिया, सा य मरंतवियायणी, पुत्तभंड-जीवणनिमित्तं उवयेरेइ मंतवाइणो पुच्छेइ संवच्छरिए सविसेसं पूएइ देवयाओ तहवि न जाओ कोइ विसेसो, तंमि य समए बेलामासे वट्टमाणे देसंतरागयं पसिद्धं सिवदत्तनामधेयं नेमित्तिं पुच्छइ-कह मम पया जीविस्सइत्ति ? , तेण भणियं-जइ जायमेत्तं मयल्लयं बालं ससोणियमंसं पीसिऊण दुद्धपक्खेवपुब्बयं पायसविहाणेण रंधिऊण घयम-इहिं सुसंभियं काऊण सुतवस्सिणो उद्धूलियचरणस्स सबहुमाणं भोगणत्थं पणामसि तांघे पया थिरा होइत्ति, केवलं तंमि कयभोगेणे सट्ठाणमुवगए गेहस्स अन्नओसुहं दारं करेज्जासि, मा सो कहंमि सुणिता भोगणसरूवं गेहं देहेज्जात्ति, पडिवन्नं च सयलं तीए, तस्मि य दिणे पसूया सा मएल्लयदारयं, तओ जहाभणियविहाणेण पायसं काऊण दुवारदेसे ठिया अतिहिं निहालेइ ।

एत्थंतरे गोसालो अणेगमंदिरपरिचागं कुणमाणो समागओ तं पएसं, दिट्ठो अणाए, सायरं उवणिमंतिओ य समाणो पविट्ठो तंमि गेहे, दिन्नमासणमिमीए, उवविट्ठो एसो, ठावियं से पुरओ भायणं, परिवेसियं च घयमहुस-णाहं पुब्बसंसिद्धं पायसभत्तं, कहं एत्थ मंससंभवोत्ति सबुद्धीए निच्छिऊण संतोसमुव्वहंतेण सुत्तमणेण, भुंजिऊण

गओ भगवओ मूलं, ईसिं विहसियं काऊण भणिउं पवत्तो-भयवं ! तुमए चिरं नेमित्तिगत्तणं कयं, नवरि अज्ज विह-
डियं, सिद्धत्थेण भणियं-भइ ! मा ऊसुगो होसु, अवितहम्मह वयणं, जइ पुण न सहहेसि ता उच्चमेसु जेण
पच्चक्खं हवइ, तओ अंगुलिं गलए दाऊण वमियमणेण, दिट्ठा कुवियंमि पायसे मंसकेसाइसुहुमावयवा, तहंसणे य
रुद्धो सो तं घरं मग्गिउमारद्धो तं पुण तेहिं घरं तच्चएण चैव अन्नओसुहं कयं, सो य तंमि पएसे पुणो पुणो
हिंडमाणो जाव न लहइ ताव भणइ-जइ मम धम्मगुरुणो तवतेयप्पभावो अत्थि ता डज्झउ इमो पएसो, जिण-
माहप्पमवितहं कुणमाणेहिं अहासन्निहियवाणमंतरोहिं निहह्वो सबो सो पएसो, भयवंपि कइवय दिणाइं विगमि-
ऊण गंतुं पयट्ठो, संपत्तो हलहुयाभिहाणंमि गामे ।

तस्सं वहिया अणेगसाहप्पसाहाभिरामो बहलपत्तपडलपडिखलितरणिमंडलपभापसरो महाखंधो हलिह्वगो नाम
तरुवरो, तस्स हेट्ठओ ठिओ भयवं काउस्सग्गेणं, इओ य सावत्थि नयरिं गंतुकामो रयणिंमि आवासिओ तत्थेव
सत्थो, सो य सीयपीडिओ संतो पज्जालिऊण जलणं सुचिरं तप्पिऊण य पभायसमए उट्ठित्ता गओ, जलणोऽवि
जणेण अविज्झविओ निहहंतो कमेण पत्तो जिणंतियं, गोसालेण भणियं-भयवं ! नासह एस डुयवहो एइ,

इय निसुणिएऽवि सामी अविचलचित्तो तहेव जावेइ । अह पसरिएण सहसा पयकमलं ज्ञामियं सिहिणा ॥ १ ॥
गोसीसचंदणंपिच तुसारवरिसं व सिसिरसलिलं व । परिभाविंतो तिच्चं सिहिदाहं सहइ जिणनाहो ॥ २ ॥

गोसालोऽवि तहाविहमसंजसमिक्खिऊण भयभीओ । अइदूरमवक्कंतो नियजीवियरक्खणट्ठाए ॥ ३ ॥
 अह उवसंतंमि जलणंमि सामी मंगलाभिहाणे गामे गओ, तहिं च वासुदेवमंदिरे ठिओ पडिमाए, गोसालोवि
 निलुक्को एगतथ पएसे, केवलं केलिकलहाइविणोयाभावेण वाढं दुक्खमणुहवंतो फालुक्कोव मक्कडो दिसीओ अवलो-
 एइ, एत्थंतरे कीलानिमित्तमागयाइं तं पएसं गामचेडरूवाइं, तओ ताइं पेच्छिऊण उवलद्धरयणनिहाणं व पच्चुज्जी-
 वियं व मणमाणो विडंबियवयणकंदरो दूरं निछालियलोलजीहो पसारियवीभच्छिजुयलो धाविओ वेगेण भय-
 जणनिमित्तं तेसिमभिमुहं ॥

अह तं भीसरूवं दट्ठणमतक्किं समुहमितं । गामाभिमुहं भयओ चेडाइं लहु पधावंति ॥ १ ॥
 धावंताणं ताणं पक्खलणवसेण केसिमवि जंधा । भज्जइ अत्तेसिं पुण फुट्टइ सीसं टलइ चलणो ॥ २ ॥
 इथरेसिं पुण वियलंति देहनद्धाइं भूसणाइंपि । केसिं चिय वत्थाइं निवडंति तदा भयवसेण ॥ ३ ॥
 अह तारिसमसंजसमम्मापियरो पलोइऊणेसिं । रोसेण दोसमूलं गोसालं संपवज्जंति ॥ ४ ॥
 रे पाव पिसाय किमग्गं चेडरूवाइं तमिह माएसि । इय तज्जिऊण तेहिं कुट्टिज्जइ सो दढं विवसो ॥ ५ ॥
 ताहे तं हम्मंतं दंहु वारिंति गामजणबुद्धा । देवज्जगस्स एसो खु नूनं सिस्सो अओ सुयहा ॥ ६ ॥
 कहमवि तेहि विमुक्को गोसालो वागेरइ जिणनाहं । किं मइ हणिज्जमाणे तुम्हाणं जुज्जइ उवेहा ॥ ७ ॥

एत्तिदिणाइं समसोक्खदोक्खसहणेवि नेव पडिबंधो । किं उप्पन्नो तुम्हं ? अहो सिलानिहुरं हिययं ॥ ८ ॥
सिद्धत्थेणं भणियं-किं रुससि निन्निमित्तमम्हाणं ? । अप्पाणमप्पणच्चिय दोसकरं भो निरुंभेसु ॥ ९ ॥
अह उस्सगं पाराविऊण सामी तओऽवि निक्खमिउं । आवत्तनामगामे वलदेवगिहे ठिओ पडिमं ॥ १० ॥
तत्थवि कलहिकरुइ गोसालो दारिएक्कवयेणेण । पुद्वाणत्थं विसमरिऊण डिंभाइं भेसेइ ॥ ११ ॥
रुयमाणाइं ताइं गंतुं मायापिऊण साहिति । तेहि पुणोवि हणिज्जइ गोसालो पुव्वाणाएणं ॥ १२ ॥
गामपहाणजणेणं भणियं किं हम्मए सुहा एसो ? । एयमनिवारयंतस्स होइ दोसो गुरुस्स इमो ॥ १३ ॥
इय कहिए झत्ति जएक्कक्खुणो सम्मुहं च ते लोया । उग्गीरियदढदंडा उवट्टिया ताडणट्टाए ॥ १४ ॥
एत्थंतरंमि जिणपक्खवाइणा वंतरेण सा पडिमा । लोआण भेसणत्थं नंगलहत्था समुट्टविया ॥ १५ ॥
ताहे अदिट्ठपुवं पडिमाचलणं पलोइउं झत्ति । भयभीया ते सामिं भूरिपयारेहिं खाभिंति ॥ १६ ॥

खामिऊण विमुक्को जयगुरु चोरायसन्निवेसं गओ, तत्थ पच्छन्नपएसे पडिमं पडिक्खो, गोसालोऽवि छुहाए
परिकिलंतो पुच्छइ-भयवं ! अज्ज चरियवं न वा ?, सिद्धत्थो वागरेइ-अंतरं अम्हं, तथो गोसालो पविट्ठो गाममज्झे,
तहिं च गोट्ठीभोयणकएण बहुभक्खभोयणजायं उवक्खडिज्जइ, सो य अत्थिरत्तणेणं केवलं देसकालो भविस्सइत्ति
जाणणट्टा निहुओ होऊण पुणो पुणो तथभिमुहमवल्लोयइ, तत्थ य गामे तदियहं महंतं चोरभयं, ताहे गामवासिणो

जणा जाणंति-एस पुणो पुणो पलोएइ, मजे चारो चारिओ वा हवेजा, ता जइ पुण कहं पि एत्तो पुवमोसोवल्ली
जाइज्जत्ति विगप्पिक्कण गहिओ तेहिं निस्सठं हणिउमारद्धो, य, पुच्छिज्जमाणो जाव न किंपि जंपेइ ताव सुक्को
कुट्टिक्कण, तओ सो विलक्खो चित्तेइ-अच्छउ दूरे भोयणसंपत्ती, सरीरस्सवि जं न चुक्को तमच्छरियं वट्ठइ, अहो
निक्कारणदुज्जणाण मील्लो, अहवा किमेएण ? जइ अत्थि मम पडुणो पभावो ता डज्झउ एएसिं पावाणं मंडवोत्ति
भणिए निहद्धो जिणाणुराणिणा चाणमंतरेण, जिणिंदो पहाविओ कलंबुयाभिहाणसन्निवेसाभिमुहं, तत्थ य दो पच-
न्तिया भायरो मेहो कालहत्थी य, सामित्तं कुणंति य, तस्मि पत्थावे कालहत्थी भडचडयरपरियरिओ करयलकलि-
यविविहपहरणो चोराणुमगलंगो जाव केत्तिरं पि भूभागं गच्छइ ताव पेच्छइ समुहमित्तं जिणं गोसालयं च, ते
य दट्ठण भणइ-के तुब्भे ? सामी तुसिणीए जावेइ, गोसालोडवि केलिपियत्तणेण मोणमवलंबिक्कण ठिओ, तओ
सो रुद्धो निस्सट्ठं हणिक्कण भयवंतं गोसालगं च बंधिक्कण महल्लगस्स भाउणो मेहस्स पेसेइ, सो य भयवंतं तहा-
खुवं दट्ठण समुट्ठिओ बंधणावणयणपुघयं पूएइ खामेइ य, तेण किर सामी कुंडगामे नगरे सिद्धत्थनरवइणो
समीवसुवगएण दिट्ठो आसि, अह तेण सुक्को समाणो भयवं ओहीए इमं आभोएइ-अज्जवि बहुं कम्मं निज्जरियवं,
तं च सहायविरहेण निजरिउं न सक्किइ, ता अत्थारियादिट्ठतो एत्थ जुत्तो, सो य एवं—

जह फलभरविणमंतगसंस्ससभारपूरियं छेत्तं । दट्ठण तस्स सामी सिग्घं गहणं समीहंतो .॥ १ ॥

एगागि चिय लुणिउं अपारयंतो परंपि बहुलोगं । समुचियसुहृपयाणेण सस्सलुणेण पयद्वेइ ॥ २ ॥
तह मज्झवि चिरभवसंभवस्स कम्मस्स निज्जरणिमित्तं । जुज्झइ अणज्जणसंगएसु देसेसु विहरेउं ॥ ३ ॥
जं तत्थ अणज्जणो निक्कारणकोवसंगओ धणियं । उवसग्गणेण काही सोहेज्जं कम्मनिज्जरणे ॥ ४ ॥
इय चिंतिकुण नाहो लाढाविसए मिलेच्छज्जणकिन्ने । गोसालेण समेओ अह निज्जाओ विजियमोहो ॥ ५ ॥
अह तत्थ गयं नाहं हेरियबुद्धीए केइ पाचिह्वा । निट्ठुरमुट्ठियहारेहिं विहवंति निरणुकंपा ॥ ६ ॥
अन्ने असब्भवयणेहिं तज्जणं हीलणं च कुवंति । अइचंडतुंडसाणेहि पेसणेण वंहंति परे ॥ ७ ॥
वंतरसुरसुरवइजक्खरक्खसपमुहंमि देवसंघाए । बहुमाणपरेडवि जिणो एगागी सहइ उवसग्गे ॥ ८ ॥
धम्मायरिओ एसोत्ति मज्झं हिययंमि निहियपडिबंधो । पट्ठि ठिउ गोसालोडवि सामिणो दुक्खमणुहवइ ॥ ९ ॥
अह तत्थ भूरितरकम्मनिज्जरं पाविकुण जिणनाहो । आरियखेत्ताभिमुहं आगच्छइ पुन्नवंछोव ॥ १० ॥
आरियखेत्ताभिमुहंमि तस्स भयवओ पुन्नकलसाभिहाणगामसन्निहिंमि वट्टमाणस्स दोन्नि चोरा लाढाविसयसुस-
णट्ठा नीहरंता अवसउणोत्तिकाऊण जमजीहासन्निहं खगं उगिरिऊण धाविया संमुहं, एत्थंतरे पुरंदरो कहिं
जिणो वसइत्ति जाणणठुं जाव ओहिं पउंजेइ ताव पेच्छइ थेवेणासंपत्ते आयड्डियकरवाले चोरे वहनिमित्तं
जिणस्स उवट्ठिए, अह जायतिवकोवावेगेण तेण तहट्ठिएणेव समुत्तुंगगिरिसिहरदलणदुल्लिएण निहया कुल्लिसेण,

सामीवि गामाणुगामं विहरमाणो गओ भद्विलनयरिं, तत्थ य वासारत्तो पंचमो समुवागओ, तो भयवं विचित्तास-
णाइं कुणमाणो चाउम्मासियं खमणमुवसंपज्जइ, कमेण समइकंते वासारत्ते बाहिं पारित्ता विहरमाणो पत्तो कय-
लिसमागमे गामे, तत्थ य तद्विवसमत्थारियाभत्तं जहिच्छं भोयणं पहियकप्पड्डियाईण विपणामिज्जइ, गोसालोडवि तं
दइण पविट्ठो, सामिं भणइ-एह एत्थ जामो, सिद्धत्थो भणइ-अज्ज अंतरं अम्हाणं, एवं निसामिय गओ गोसालो
अत्थारियाभत्तट्ठाणे, उवविट्ठो भोयणत्थं, परिवेसिउमारद्धं जणेण, सो य बहुयासित्तणेण न पावइ कहिंपि तित्तिं,
ततो गामजणेण महल्लं भायणं दहिकल्लवियकूरस्स भरिऊण समप्पियं एयस्स, सोडवि समग्गमवि तं भोत्तुमपाययंतो
भणइ-एत्तियं न नित्थरिही, तओ पाव ! दुक्कालकवल्लिओव नियभोयणमाणंपि न याणसित्ति भणिऊण रोसेण
खित्तं तं भायणं से मत्थयंमि जणेण, पच्छा उयरं परामुसंतो गओ सो जहागयं ।

पुणोवि जंबूसंडं गाममुवागयस्स जयपहुणो तहेव सो अत्थारियाभत्तमल्लीणो खीरं कूरं च जेमिओ तहेव पज्जते
जणेण धरिसिओ य, अह सामी अहाणुपुट्ठीए विहरमाणो तंवायनामसन्निवेसं गओ, तस्स बहिया ठिओ पडिमाए,
तत्थ य गामे बहुस्सुया बहुपरिवारा पासजिणसंताणवत्तिणो नंदिसेणा नाम थेरा गच्छच्चितं मोत्तूण मुणिचंद-
सूरिणोव जिणकप्पपरिकम्मं करेति, गोसालो य पविट्ठो गाममज्झे, ते समणे सवत्थकंबलोवगरणे दइण पुव्व-
साहूणं पिव खिसं काऊण सामिस्स सयासमेइ, ते य नंदिसेणा थेरा तीए चेव रयणीए चउक्के काउस्सेगेण निचवला

संठिया, पच्छा आरविखयपुत्तेण इओ तओ परिभंतेण चोरोत्ति कलिऊण महल्लभल्लएण आहया, तव्वेलं चिय
समुप्पण्णोहिनाणा मरिउं दिवमुवगया, अहा सन्निहियदेवनिवहेहि य तेसिं महिमं कीरमाणिं पासित्ता तं पएसं
गओ गोसालो, दिट्ठा य कालगया थेरा, तओ सुहपमुत्ता पडिस्सए गंतूण पडिवोहिया तेसिं सिस्सा, निब्भच्छि-
ऊण साहिओ थेरमरणवइयरो, गओ य सट्ठाणं, जयगुरूवि कुवियसन्निवसेमेइ, तत्थवि चारियत्तिकाऊण गहिओ
दंडवासिएहिं, बंधणताडणपमुहकयत्थणाहिं पीडिउमारद्धो य ।

अह जिणनाहे तेहिं वहिज्जमाणे जणे समुल्लावो । जाओ जह देवज्जो अप्पडिमो रूवलच्छीए ॥ १ ॥
कह चारिओत्ति गहिओ किं सोऽवि करेज्ज एरिसं कम्मं । अहंवा विचित्तरूवा कम्मगई किं न संभवइ ? ॥ २ ॥
तहविडु इमं सुणिज्जइ जत्थागिति तत्थ निवसइ गुणोहो । ता नूण मूढयाए एए एयं कयत्थंति ॥ ३ ॥
भोगोवभोगहेउं साहूवि विरूवमत्थमायरइ । जो वत्थंषि न वंछइ स चारियत्तं कहं काही ? ॥ ४ ॥
इय लोयपवायं निसुणिऊण विजया तहा पगम्भा य । पासजिणसिस्सिणीओ तक्कालविमुक्कदिवखाओ ॥ ५ ॥
निवाहत्थं परिवाइयाए वेसं समुव्वहंतीओ । मा वीरजिणो होहित्ति संसएणाउलमणाउ ॥ ६ ॥
गच्छंति तहिं दट्ठूण जिणवरं आयेरेण वंदंति । पच्छाऽऽरक्खिगपुरिसे तजंति सुनिट्ठुरगिराए ॥ ७ ॥
रे रे किं न हयासा ! सिद्धत्थनरिंदनंदणं एयं । धम्मवरचक्कवट्ठिं मुंचह ? सिगं च खामेह ॥ ८ ॥

जइ रे वइयरमेयं सुणइ सुरिंदो कहंपि ता नूणं । तुम्हे सरज्जरहे किणासगेहंमि पेसेइ ॥ ९ ॥

इय भणिए भयभीया भयवंतं ते णमंति विणयनया । खामेति सदुच्चरियं निडालतलयडियकरकमला ॥ १० ॥

अह तेहिं परिसुक्को भयवं वेसालिनयरिमणुसरिडं । चलिओ गच्छंतस्स य जाया विच्चे दुवे मग्गा ॥ ११ ॥

अह लाढाइसु देसेसु विविहतिबोवसग्गवग्गेणं । पडिभग्गो गोसालो सामिं विन्नविउमाढत्तो ॥ १२ ॥

एकं पेच्छंतोऽविहु हणिज्जमाणं ममं न रक्खेसि । अन्नं तुहोवसग्गेण एइ मज्झंमि उवसग्गो ॥ १३ ॥

अवरं पढमं लोगो मं चेव हणइ पच्छओ तुम्हे । भोयणवित्तीवि महाकिलेसओ पइदिणं होइ ॥ १४ ॥

माणावमाणसमच्चित्तिणो सुणसेवणपरस्स । नायगधम्मोऽवि न तुज्झ कोऽवि पेच्छज्जइ समीवे ॥ १५ ॥

जेण-जो सेवगंमि सुहिए नो सुहिओ दुक्खिए य नो दुहिओ । सोक्खाभिकंखिणा नणु सेविज्जइ सोऽवि किं सामी? ॥ १६ ॥

तम्हा अज्जवि चिरजीवियत्थिणो सोक्खकंखिरमणस्स । एत्तो तुह सेवाए देवज्जय ! मज्झ पज्जत्तं ॥ १७ ॥

इय कहिए सिद्धत्थो वागरइ करेसु जं तुहावडइ । अम्हाण एरिसच्चिय ववहरणा किमिह तुह भणिमो? ॥ १८ ॥

एवं जाए परोप्परुखावे सामी वेसालीमग्गेण लग्गो, इयरोऽवि भगवओ निच्चट्टिज्जण रायगिहमग्गेण पड्डिओ,

अंतरा य करिहरिहरिणविरुवगघपमुहसत्तसंकुले गयणतलावलंविदीहरतरुभीसणे निवडिओ महारण्णे, तत्थ य

चोरवइणा एगंमि महातरुसिहरे पहियजणावल्लोयणनिमित्तं आरोहिओ नियपुरिसो, तेण य दिड्डो सो सच्छं-

दलीलाए आगच्छमाणो, दडूण य साहियं चोरवइणो, जहा-एगो नरगसमणो एइ, तेण भणियं-न हरियवमत्थित्ति एस न भाइ, अन्नहा कंहं एत्थ अमाणुसाए अडवीए पविसेज्जा?, अहवा एस कोइ दुरायारो अम्हाणं एवंविह-रूपपडिवणो मणो परिभवं उप्पाएइ, ता एउ अक्खलियगईए जेण अवणेमो से दुव्वियं, एवं च जंपत्ताणं समीवमागओ गोसालो, तओ तेहिं दूराओ चिय साहिलासं-एहि माउलग! सागयं तुहत्ति भणिऊण गहिओ करेण, उड्ढाविओ पडिं, मरणभयविडुरेण य उड्डिया अणेणं, तओ चोराहिवइणा पंचसयचोरसमेएण आरुहिऊण जहक्कमं वाहिओ सुचिरेवेलं, छुहातणहापरिस्समभिहओ जया कट्टगयजीओ जाओ ताहे मोत्तूण जहाभिमयं गया तक्करा, गोसालोडवि बाढं सुट्टियसरीरो मोगरपहारजज्जरिउच्च कुलिसताडिउच्च विगयचेयणो तरुसंडछायाए सुहुत्तमेत्तं विगमिऊण सिसिरमारुएण उवलद्धचेयणो सोगं करेउमारद्धो, कंहं?—

हा दुहु दुहु विहियं हियत्थिणा नड्डुद्धिणा उ मए । जं सो सामी सुक्को अचित्तमाहण्णपडिहत्थो ॥ १ ॥
निहोसंमिवि नाहे कुवियप्पेहिं मए हयासेण । जा किर कया अवणणा सा संपइ निवडिया सीसे ॥ २ ॥
तस्स पभावेण पुरा अणेगठाणेसु दुड्ढसीलोडवि । निवूढोडहं संपइ तद्विरहे नत्थि मे जीयं ॥ ३ ॥

अहवा-सहसच्चिय सम्ममर्चित्तऊण कीरंति जाइं कज्जाइं । अप्पत्थभोयणं पिव ताइं विरामे दुहावेंति ॥ ४ ॥
मणो इमिणच्चिय कहयेवेण मं छलिउमिच्छइ कयंतो । कहमन्नहा कुबुद्धी हवेज्ज एयारिसी मज्झ ॥ ५ ॥

ता किं एत्तो सरणं सेरेमि ? किं वा गइं पवज्जामि ? । कस्स व पुरओ दुक्खं निवेइउं होमि निच्चित्तो ? ॥ ६ ॥
 अहवा कयं विगप्पेहिं नत्थि मम तिहुयणेऽवि साहारो । तं चेव धम्मसूरिं मोचुं ता तं निहालेमि ॥ ७ ॥
 इय निच्छिऊण कहमवि संसारं पिव सुभीसणमरणं । लंघित्ता गामाइसु हिंडइ सामिं निरुवित्तो ॥ ८ ॥
 इओं य-भयवं महावीरो अहाणुपुवीए परियडंतो पत्तो विसालसालवलथपरिवेडियाए मयणुम्मत्तरामाभिरामाए
 वेसालीए नयरीए, तत्थ य बहूणं कम्माराणं साहारणाए सालाए अहासन्निहियजणं अणुजाणावित्ता ठिओ पडि-
 माए, अन्नया य एगो कम्मारागो रोगपीडिओ संतो छट्ठमि मासे पगुणसरीरो जाओ समाणो पसत्थे तिहिमुडुत्ते
 मंगलतूरपुरस्सरं चंदणुकिन्नदेहो हरहासकासकुसुमपंडुरदुकूलनिवसणो सिरे निसियदोवक्खयसरिसवो सयणजणेण
 अणुगम्ममाणो तमेव कम्मारासालमागओ, पेच्छइ पुरड्डियं उद्धट्टाणं पडिचन्नं विगयवत्थं जिणवरं, तं च दट्ठण विं-
 भियपलयकोवानलो पढमं चिय अमंगलरूवो नग्गओ दिट्ठो, ता अमंगलं एयस्स चेव उवणेमिति चित्तिऊण लोह-
 घणं घेचुं धाविओ सामिवहणत्थं, एत्थंतरे सुराहिवइणा कहं नाहो विहरइत्ति जाणणनिमित्तं पउत्तो ओही, दिट्ठो
 एयख्वो वइयो, तओ नयणनिमेसमेत्तेण आगओ चलंतमणिकुंडलो आखंडलो तं पएसं, नियसत्तीए य निवाडिओ
 घायगस्स चेव सिरंमि सो घणो, तग्घायाभिहओ य पत्तो पंचत्तमेसो, तओ हरी तिपवाहिणादाणपुच्चयं पणमि-
 ऊण जयगुरुं भणिउमाढत्तो—

निरुवमेकछाणकलावकारणं लोयलोयणाणंदं । तं पेच्छऊण सामिय ! कहमिव पावा पउस्संति ? ॥ १ ॥
तिकरणसुद्धीएविहु जणरंखं जो समीहए काउं । तस्स तुहोवरि दुट्ठा कह वा बुद्धी पयट्ठेज्जा ? ॥ २ ॥
किं अमयंपिव विसनिव्विसेसबुद्धीए कोऽवि बोहेज्जा । अहवा विमूढहिययाण होइ एसेव नूण मई ॥ ३ ॥
धुवमग्धाणं देवत्तदिच्चमाहप्पसंपया विहला । जा तुग्धावइविणिवारणेण नो होइ सकयत्था ॥ ४ ॥
निच्छउ सा पडुभत्तीवि कह व लक्खिज्जए सयणणेहिं । जाव न निच्चं पासट्ठिएहिं सेविज्जसे तंसि ॥ ५ ॥
इय सुरनाहो सुचिरं उवसगकरं जणं सभत्तिं च । दूसित्ता सुदुहत्तो नमिउं अहंसणं पत्तो ॥ ६ ॥

सामीवि विहरमाणो गामागरसन्निवेशमागओ, तस्मि य विभेलगो नाम जक्खो, सो य पुवभवफासियसम्मत्त-
वसेण समुप्पणपरमपमोओ भयवओ पडिमापवणस्स अहिणवपारियायमंजरीपरिमलुम्मिलंतफुल्लंधयधुसराहिं
हरियंदणरसुम्मिस्ससुसिणधणसारविलेवणेण य पूयं परमाथरेणं निवत्तेइ, अह पुण को एस विभेलगजक्खो पुवभवे
आसि ? भणइ—

मग्धाविसए सिरिपुरे नयरे महासेणो नाम नरवई, तस्स सिरी नाम भज्जा, तीसे य असेसविन्नाणकलाकलाव-
कुसलो सुरसेणो नाम पुत्तो, सो य संपत्तजोव्वणोऽवि न खिवइ चक्खुं पवररूवासुवि रमणीसु, वहुं भणिज्जमा-
णोऽवि न पडिक्खइ पाणिग्गहणं, किं तु सुणिवरोव्व संहरियवियारो चित्तपत्तच्छेयाइविणोदेहिं कालं वोलेइ, रायावि

एरिसं तं पेच्छिऊणमच्चंतमाउलमाणसो अणेगेसिं मंततंताइजाणगाणं एयवइयरं परिकहेइ, ते य करेंति विविहि उवाए,
न य जायइ कहिंपि कुमारस्स भावपरावत्ती ।

अह अवरावासंभी बाहिं नगरस्स करिवरारूढो । सह परियणेण राया नीहरिओ रायवाडीए ॥ १ ॥

विविहपएसेसु खणं परिभमिउं बाहिउं च करितुरगे । पच्छाहुत्तं इंतो पेच्छइ नयरीजणं सयलं ॥ २ ॥

रहतुराजाणसिविगापयप्पयारेण सिग्घवेगेण । कयसुंदरनेवत्थं वच्चंतं काणणाभिमुहं ॥ ३ ॥

तं पेच्छिऊण रणणा पयंपियं रे किमेस पउरजणो । परिमुक्कावरकज्जो वच्चइ एगेण मग्गेण ॥ ४ ॥

नो अज्ज जेण कस्सवि महुसवो देवयाविसेसस्स । नडपेच्छणयाईयं कोउगमवि दीसइ न किंपि ॥ ५ ॥

अह परियणेण भणियं तुब्भे नो सुणह देव ! किं एयं । जं एत्थ समोसरिओ सूरी सूरप्पहो नाम ? ॥ ६ ॥

जो तीयाणागयवत्थुविसयसंदेहतिमिरहरेणं । पुहईए पत्तकित्ती जहतथनामेण परमग्घा ॥ ७ ॥

जस्स पयपउमधूलीफासेणचिवि विहरोगकलियावि । जायंति तक्खणं चिय मयरद्धयसन्निभा पुरिसा ॥ ८ ॥

जस्सेस दंसणेणवि समत्थतित्थोहपूयसलिलं व । विद्धंसियपावरयं पाणिगणो गणइ अप्पाणं ॥ ९ ॥

जे पिउणोऽवि पणामं कुब्बंति न दुब्बहेण गब्बेण । जस्संहिनक्खकिरणा ताणवि सिरसेहरीभूया ॥ १० ॥

सूरिस्स तस्स पयवंदणत्थमेसो पुरीजणो जाइ । तुम्हंपि देव ! जुत्तं पयंपंकयंदंसणमिमस्स ॥ ११ ॥

एवं सोचा विम्हवियमाणसो तक्खणेण नरनाहो । उज्जाणत्ताभिमुहं वच्चइ कोऊहलाउलिओ ॥ १२ ॥
 ता दूराओच्चिय करिवराउ ओयरिय परमभत्तीए । वंदित्ता मुणिनाहं निसीयए धरणिवट्ठमि ॥ १३ ॥
 सूरीवि जोग्गयं से पलोइउं दिव्वनाणनयणेण । गंभीराएँ गिराए एवं भणिउं समाढत्तो ॥ १४ ॥
 भो नरवर ! संसारे पढमं चिय दुल्लहो मणुयलंभो । तत्थवि य निरुवयरिया कुलरूवारोग्गसामग्गी ॥ १५ ॥
 तीएवि पवरकरितुरयजोहरहनिवहभूरिभंडारं । भयवसनमंतसामंतमंडलं नरवइत्तंपि ॥ १६ ॥
 तत्थवि सत्थत्थवियक्खणेहिं अच्चंतभवविरत्तेहिं । कुसलेहिं समं गोट्ठी दुल्लभा थेवमेत्तंपि ॥ १७ ॥
 एयं च तए सयलं संपत्तं पुन्नपगरिसवसेणं । ता एत्तो सविसेसं पाणवहाईण वेरमणे ॥ १८ ॥
 नयसेवणंमि सुगुणज्जणंमि करुणाय दुत्थियजणाणं । धम्मत्थविरुद्धविवज्जणे य परलोयचिंताए ॥ १९ ॥
 भंगुरभवभावविभावणंमि वेसइयसुहविरागंमि । तुम्हारिसेण नरवर ! पयट्ठियव्वं मणो निच्चं ॥ २० ॥
 इय गुरुणा उवइट्ठे नरनाहो पुरजणो य हिट्ठमणो । सच्चं तहत्ति पडिसुणिय पट्ठिओ नियगिहाभिमुहं ॥ २१ ॥
 नवरं भूमीनाहो गंतुं थोवंतरं पडिनियत्तो । पुव्वभणियस्स पुत्तस्स वइयरं पुच्छिउं सहसा ॥ २२ ॥
 ता एगंते ठाउं वंदिय सूरिं पयंपए एवं । भयवं ! अगोयरं नत्थि किंपि तुह नाणपसरस्स ॥ २३ ॥
 ता कहसु मज्झ पुत्तो भणिज्जमाणोवि विविहहेऊहिं । किं कारणं न वंछइ सोउं परिणयणनामंपि ? ॥ २४ ॥

किं भवभएण अहवा भूयपिसायाइछलणदोसेण । धाउविवज्जासेण व कूरगगहपीडणेणं वा ? ॥ २५ ॥

गुरुणा भणियं नरवर ! मा संकसु कारणाइं एयाइं । दढुव्वभवावज्जियमेगं कम्मं विमोत्तण ॥ २६ ॥

संजोगविओगुप्पायपलयसुहुदुक्खपमुहकिरियासु । सद्वावत्थासुं पिय पभवइ कम्मं चिय जणस्स ॥ २७ ॥

रणणा भणियं भयवं ! किं पुण एएण पुव्वजम्मंमि । पकयं कम्मं ? साहह महंतमिह कोउगं मज्झ ॥ २८ ॥

सूरिणा पंयंपियं-महाराय ! एस तुज्झ पुत्तो पुव्वभवे संखपुरंमि नयरे रूवलायन्नसोहगाइगुणसंगओ चारुदत्तो नाम वणियसुओ आसि, तेणवि एगया निक्कारणकुवियाए भज्जाए दुव्वयणेहिं तज्जिएण सरोसं पंयंपियं-आ पावे ! तहा काहं जहा सदुक्खं जीवसि, तीए बुत्तं-जं तुह पिउणो पडिहाइ तं करेज्जासि, तओ सो एगेण नम्मसचिवेण सद्धिं कन्नगंतर-परिणयणत्थं पयट्ठो गंतुं दक्खिणदिसाए, अविलंबियपयाणएहिं वच्चतो पवरामारयणनिहाणभूयाए पत्तो कंची-पुरीए, तहिं च पविसमाणेण दिट्ठाइं परोप्परं कीलंताइं डिंभाइं, तेसिं च एगेण डिंभेण सुरहिमालइमाला अन्नस्स डिंभस्स कंठे पक्खिविउमारद्धा अन्नस्स निवडिया, तं च दट्ठण चित्तिं चारुदत्तेण-अहो सोहणो सउणो, परं दूर-वगमो, जओ एसा कुसुममाला अन्नत्थ पक्खिविउमारद्धा अन्नत्थ निवडिया, अहवा किमणेण ?, चित्तियत्थसं-पत्तीए सयं चेव होही एयावगमोत्ति विभाविऊण पविट्ठो सयणवग्गगेहंमि, कओ तेण ण्हाणविलेवणभोयणप्पया-णप्पमुहो से य वावारो, ठिओ य कइवय वासराइं, पत्थावे य सयणवग्गस्स सिट्ठमणेण निययप्पओयणं, पडि-

सिद्धो य बहुप्यथारं तेण एसो । इओ य तत्थेव पुरे गंगदत्तसिद्धिणो कन्नगा अप्पडिमरुवजोव्वणाइगुणकलावकलिया कणगवइसहीजणपरिलुडा उज्जाणंमि कुसुमावचयं कुणंती सिरिदत्ताभिहाणं वणियजुवाणमवलोइऊण भयणुम्मु-
क्कसरविसरपहारजज्जरियसरीरा कहकहवि पडिनियत्तिऊण संगेहे निसट्ठं निवडिया सुहेसेज्जाए, वाउलत्तं च से सुणि-
ऊण भेलिओ गेहजणो, पुट्ठा सरीरवत्ता, अलद्धपडिवयणेण य तेण कओ तक्कालोचिओ विही, सो य जुयाणो तहं-
सणमेत्तेणवि हरियहियओ तक्कालवियंभमाणमयणजलणजालाकलावकवलियसरीरो कहिंपि रइं अपावमाणो तमेव
कुवल्यदलदीहरिंछि चिंततो अच्छिउं पवत्तो, नवरं पुच्छिओ एसो एगाए पच्चाइगाए-वच्छ ! किमेवं सुन्नचक्खुक्खेवो
लक्खिज्जसित्ति, तेण भणियं-भयवइ ! किं कहेमि ? अवलाएवि हुंतीए विसट्ठकंदोदुदीहरच्छीए । हरियहियस्स वट्ठइ
विहलं चिय मज्झ पुरिसत्तं ॥ १ ॥ एत्तियमेत्तेणं चिय न ठिया सा छणमयंकंविंवसुही । अवहरिउमिच्छइ धुवं संपइ मह
जीवियध्वंपि ॥ २ ॥ ता एव ठिए भयवइ ! तसुवायं किंपि लहु विचिंतेसु । पसमियमणपरितावो जेणेस जणो सुहं वसइ ॥ ३ ॥
पच्चाइगाए जंपियं-पुत्त ! फुडक्खरं साहेसु, तओ तेण कहिओ कणगवइदंसणवुत्तंतो, तीए भणियं-पुत्त ! वीसत्थो
होहि, तहा करेमि जहा तीए सह निरंतरं संपओगसुहमणुहवसि, तेण वुत्तं-जइ परं तुह पसाएणंति, भणियावसाणे
गया सा गंगदत्तसिद्धिणो गिहे, दिट्ठा य सदुक्खेण परियणेण संवाहिज्जमाणसरीरा कणगवइ, भणियं चउणाए—
भो ! किं कारणं सरीरे विहुयत्तणमिमीए ? परियणेण भणियं-भयवइ ! न सुणेमो, तीए वुत्तं-जइ एवं ता अवसरह,

खणमेकं कुणह विजणं, न होइ सामन्नो एस दोसो, उवेहिजंतो जीवियंपि हरेजा, एवमायन्निऊण दिन्नं से परि-
 यणेण आसणं, विजणं च कयं, तओ तीए सुचिरं अहुवियद्धां पल्लविऊण महया वित्थेण कओ सुहाविन्नासो,
 पारद्धं मंतसुमरणं, कुसुमक्खयखेवेण य पूइयं जोगिणीचक्कं, सुद्धो हुंकारो, अचंतसमीवे य ठाऊण महामंतोव सिद्धो
 तस्स वणियस्स वुत्तंतो, कणगवईवि झत्ति तं निसामिऊण पच्चुल्लीवियच्च हरिसभरसुव्वहंती भणिउं पवत्ता-भयवइ !
 एत्तो तुमं चेव पमाणं, तो तहा कंहंपि कुणसु जह निरंतरो तेण सह संजोगो जायइ, तीए वुत्तं-एवं करेमि, अह
 दिन्नतंतोला उट्ठिया एसा, सिद्धो य एस वइयरो तस्स जुवाणस्स, तेणावि पवरवत्थाईहिं उवचरिया एसा, अवर-
 वासेर य तेसिं सिद्धमेयाए, जहा-अज रयणीए जामडुगंमि अइक्कंतंमि सोहणो सुहुत्तो ता तुब्भेहिवि भगवओ कुसु-
 माउहस्स भवणे गंतव्वं, विवाहो कायव्वोत्ति, पडिवन्नं च तेहिं । इओ य सो चारुदत्तो सयणजणेण दारपरिग्गहाओ
 पडिसिद्धो समाणो असिद्धकज्जोत्ति सोगसुव्वहंतो तेण सहाइणा समं नीहरिऊण रयणीए सयणघराओ पसुत्तो तंमि
 चेव कुसुमाउहमंदिरंमि, खणं च समागयनिहो पडिबुद्धो समाणो जाव कुसुममालानिमित्तनिष्फलत्तणपमुहं पुव्वव-
 इयरं विचिंतंतो अच्छइ ताव गिहजणेण अविद्याणिज्जंतो अविमुणियरयणिविभागा अपत्तेऽवि मज्झरत्ते परिणयणाणु-
 खोवगरणहत्थाए पद्वाइगाए अणुगया मंदमंदसुक्कचलणा समागया कणगवई, विरइया कुसुमाउहस्स पूया, पद्वा-
 इगाएवि भवणब्भंतरं करेण परामुसंतीए पत्तो चारुदत्तो, पुव्वभणियवणियसंकियाए सवणमूले ठाऊण भणिओ-अहो

किमेवं विलंबेसि?, अवकमइ एस पसत्थहत्थलगमुहुत्तो, एयं च सोच्चा चारुदत्तेण चिंतियं-मन्ने एसा वराई पुवदिन्नसंकेयपुरिसवुद्धीए मं समुल्लवइ, ता जावड्जवि सो न आगच्छइ ताव करेमि कुसुममालासउणं जहत्ययंति चिंतिकुण झडत्ति उट्ठिओ एसो, नीओ तीए कुसुमाउहस्स पुरओ, पाडिओ तच्चरणेषु, गहाविओ कणगव-ईए सभावपाडलं पाणिपल्लवं, कओ संखेवेण सेसोऽवि तक्कालोचियविही, इय वित्ते विवाहे पणमिऊण कणगवईए विसज्जिया सट्ठाणं पवाइगा, भणिओ य चारुत्तो-अज्जउत्त! उत्तमाणं एसो नो सम्मओ ववहारो, ता कइवय वासराइं जुल्लइ अन्नत्थ निवसिउं, पडिवन्नं चारुदत्तेण, निहरियाइं कुसुमाउहस्स मंदिराओ, नवरं चारुदत्तेण मयण-पायपडणकइयवेण पडिनियत्तिकुण तं नम्मसच्चिवं निव्वरपसुत्तं पवोहिकुण सिट्ठो परिणयणवुत्तंतो, तेण भणियं-चारुदत्त! जइ एवं ता वच्चसु अलक्खियसरूवो चिय तीए सह तुमं, अहं पुण खणंतरं एत्थेव पडिवालिकुण आगमि-स्सामि, एवं भणिए चारुदत्तो तच्चयणं पडिवज्जिय तीए समं सभयं नयरहुत्तं गंतुं पवत्तो। इओ य समइक्कंते रयणीए जामहुगे पत्थावं मुणिकुण सो वणियजुवाणो विवाहसामग्गिं घेत्तूण समागओ तंमि कुसुमाउहमंदिरे, मंदगिराए भणिउं पवत्तो य-भो कणगवइ! एहि संपयं आगओऽहं वट्ठामित्ति, सो य नम्मसच्चिवो केलीकिलत्तणेण इत्थी-भासाए निहुयं पडिवयणं दाऊण ठिओ तदभिमुहो, तेणावि रमसभरवक्खित्तचित्तणेण अविभाविऊण परमत्थं खित्ता से कंठमि कुसुममाला, कंकणबंधपुरस्सरं च कओ पाणिगहो, एत्थंतरे य कहकहत्ति प्हसंतेण भणियं तेण-भो

भो महाणुभाव ! किं अत्थि एस ववहारो तुह नयरीए जं पुरिसो पुरिसेण परिणिज्झइ, सव्वहा असुयमदिट्ठं च चो-
ज्जमिणंति जंपिऊण पलाणो वेगेणं, इयरोऽवि विलक्खमाणो एवं परिभाविउमाढत्तो—

हे हियय ! हयास तुमं एवंविहवंचणाएँ जोगंसि । जं कूडकवडभरियासु पावग ! रमणीसु पत्तियसि ॥ १ ॥

किं एत्तियंपि न सुणसि जं एयाओ विचित्तसीलाओ । नियकुसलयाए सहसा सुरगुरुमवि विप्पयारेंति ॥ २ ॥

तथा-एगेण समं पणयप्पहाणवयणेहिं बहुप्पयंपंति । साणंदचक्खुविक्खेवमेत्तओ अक्खिवंति परं ॥ ३ ॥

अन्नेण समं कीलेंति निब्भरं हरियहियमविरामं । अवरस्स य संकेयं लीलाए चिय पयच्छंति ॥ ४ ॥

इय मूढ ! हियय ! मा तम्म निप्फलं मुणिय वत्थुपरसत्थं । अभिरमसु जहादिट्ठसु संपयं निययकज्जेसु ॥ ५ ॥

एवं अत्ताणं संठविऊणागओ जहागयं । सो य नम्मसचिवो समुगगच्छंतंमि तरणिमंडले मिलिओ चारुदत्तस्स,
तेणावि से वाहुंमि कंकणं बद्धमवलोइऊण जंपियं-अरे णवपरिणीओव लक्खिज्जसि, ता दंसेहि निययभज्जं, ईसिं
पहसिऊण भणियं तेण-पियमित्त ! तुह पसाएण अहं सयं चिय भज्जा वट्ठामि, चारुदत्तेण कहियं-कहं चिय ? तओ
तेण सिट्ठो सबो पुच्चुत्तंतो, इमं च सोचा मुणियजहड्डियवइयरा परिचत्तलज्जं हसिउं पवत्ता कणगवई, दिट्ठरूवाइ-
सया य अणुरत्ता चारुदत्तंमि ।

अह परोप्पररूढगाढपेस्माणि ताणि पत्ताणि संखपुरं, पविट्ठाणि य निययगिहं, सुहसागरावगाढाणि य बोलेति

कालं, सा य पुत्रभज्जा असमंजसाहं पलवती निद्राढाविद्या कणगवईए, तप्पच्चइयं च वद्धं भोगंतराहयं कम्ममणाए । काल-
क्केमेण य मरिऊण उववन्ना सा तिरिएसु, चारुदत्तोऽवि तप्परियणयोवट्टियवणियविसंवायणपरिणामज्जियनिविडभोगं-
तरायपाहिज्जो कालं काऊण पत्तो तिरियत्तणं । एवं च सुचिरं तीए विण्णउत्तो संसारं परियट्टिऊण सुचरियसुहकम्म-
वसेण भो महाराय ! तुह मंदिरंमि जाओ पुत्तत्तणेणं, सावसेसभोगंतरायकम्मवसओ य पुत्रभवभज्जमपेच्छंती न वंछइ
अन्नं परिणेउं, एवं सूरिणा कहिए सूरसेणकुमारवुत्तंते राया विस्सियमणो गओ नयरिं । सूरिंवि अन्नत्थ विहरिओ ।

सा य कणगवई चिरभवभमेण जायकम्मलाववा कुलुमत्थलनयेरे जियसत्तुरन्नो उववन्ना धूयत्तणेणं, उच्चिय-
समए कयं रयणावलित्ति नामं, सा य संपन्नजोवणावि तेण पुत्रभवपियपरुढपणयवसेण सुरूवंपि रायसुयनिवहमण-
भिलसंती कालं वोलेइ । अन्नया य तं सूरसेणकुमारं रामापरंसुहं सोचा नियधूयं च पुरिसपडसिणिं सुणिऊण चित्तिंय
रन्ना-जइ पुण एयाणं परोप्परं विहिणा संजोगो काउं वंछिओ वट्टइ ता दंसावेमि एयाण परोप्परं पडिरूवाइं, एवंपि
कयाइ समीहियसिद्धी जाएज्जत्ति विभाविऊण लिहाविया रयणावलीरूवाणुगा चित्तपट्टिया, समप्पिया य दूतस्स,
भणिओ य एसो-अरे वच्चसु तुमं महासेणरणो समीवे, केहेसु य जहा-अहं जियसत्तुरणा तुह सुयस्स निय-
धूयादाणत्थं पेसिओऽस्सित्ति, पत्थावे य चित्तवट्टियं दंसिऊण कुमारपडिरूवं च गहाय एजाहित्ति, गओ य एसो,
दिट्ठो राया, पत्थावे य कहियं पओयणं, राइणावि भणियं-भो सुणियं मए एयं, केवलं दूरट्टियाए रायसुयाए रूव-

मपेच्छमाणो कहमिहट्टिओ कुमारो तीए पणयमुद्धेज्जा ? , सा वा अविण्णायकुमारसरूवा सहसच्चिय परिणाविया पच्छा कहं न संतपेज्जा ? , ता न जुत्तमेयं । जेण—

सुनिरूविज्जण कीरंति जाइं कज्जाइं निउणबुद्धीए । दिवाओ विहडियाणिवि न ताइं लोए हसिजंति ॥ १ ॥

एवं भणिए रत्ता तेण उवणीया चित्तफलहिगा, राइणावि समग्पाविया सा कुमारस्स, सो य पुव्वभवपेम्मवसेण तदवलोयणे समुप्पण्हरिसो चिरलद्धावसरकुपुमसर्रोसनिस्सट्ठाकुंठदुस्सहविसिहकीलिओव्व निच्चलसरीरो परिचत्त-चावारंतरो थुलमुत्ताहलविन्वभमसेयविंजालभासुरियमालवट्ठो जाओत्ति, तं च तहाविहं दट्ठुण सुणियमणोगयभा-वेण पासट्टियजेण सिट्ठं नरनाहस्स, समुप्पण्णो से परिओसो, कहियं चउणेण दूयस्स-अरे जाओ तीसे उवरि कुमारस्स पडिबंधो, नवरं रायसुया एयंमि केरिसित्ति सुणियच्चमियाणिं । जओ—

एगंमि नेहनिम्भरमणंमि अन्नंमि नेहरहियंमि । धीपुरिसाणं भोगा विडंवणामेत्तया होंति ॥ १ ॥

अणुवक्खारियं अकुडिलं परोप्परं छिड्डयेच्छणविमुक्कं । उभओ चिय जं तुळं पेम्मं सलहिज्जइ जयंमि ॥ २ ॥

दूएण भणियं-देव ! सच्चमेयं, ता समप्पेह मम कुमारस्स पडिरूवयं रायसुयाए उवदंसणत्थं, राइणा कहियं-जुत्तमेयं, तओ चित्तफलगे आलिहाविज्जण कुमाररूवं गओ दूओ, पत्तो कालक्कमेण जियसत्तुनरिंदसभीवं, पण-मियपायवीढो उवविट्ठो सन्निहियधरणिवट्ठे, पुट्ठो राइणा, जहायुत्तं सिट्ठं च अणेण, तदवसाणे य आकट्टिज्जण दंसिया

चित्तपट्टिगा, अवलोइया य सायरं रत्ना, चिरं निवन्निऊण पेसिया रयणावलीए, सावि तेण पुच्चभवपरूढपेम्मवसेण तं पलोइऊण मयणमहिसिद्धियहियया समुच्छलियसेयविंदुपिसुणियविचारवि कुमारीजणोचियं लज्जं पमोत्तुमपारयंती नियगविगारगोवणत्थं आवद्धकवडभिउडिभीसणं वयणं काऊण भणिउमारद्धा-अहो केणोवणीया एसा चित्तपट्टिगा?, चेडीहिं भणियं-सामिणि ! ताएण, (तीए भणियं-किमट्टं?, चेडीहिं) भणियं-तुम्ह दंसणनिमित्तं, तीए भणियं-किं ममं दंसियाए?, काऽहमेत्थ?, गुरुजणायत्तो कण्णगालोगो हवइ, सच्छंदचारित्तणं तु परमं कुलदूसणं, ता अलमेयाए इति भणिऊण पविट्ठा भवणब्भंतरे, निसण्णा सुहसेज्जाए, तग्गया य चिरकाललद्धावसरेणं व सवंगं गहिया रणरणएणं, धाईएव्व अणुसरिया उक्कंठाए, चित्तालिहियकुमारावलोयणविरामपरिकोचिएणं व बाढमालीढा परितावेण, तओ तत्थट्ठाउमपारयंती कइवयपहाणचेडीपरिखुडा गया पमयवणं, ताहिं च अणवयवहंतजलजंतगंभीरघो-सघणविब्भमुब्भंतपहिट्ठनीलकंठमणहरारावाडंबरेसु सुरहिमालइकमलपरिमलसुंदरदियंतरेसु खुच्छा खणमेक्कं कयलील-याहरेसु, भणिया य चेडीओ-हलाओ ! वाहरेह सरसनलिणनालाइं विरएह सेज्जं, बाढं दुस्सहा अज्ज मज्झंदिणदिणयरते-यलब्बही, जं भट्टिदारिया आणवेइत्ति भणिऊण समासणसरसीओ आणीयाइं नलिणीनालाइं कया सेज्जा निवन्ना रयणावली, समारद्धो अन्नोहिं विमलयरसघणसारपमुहोहिं वत्थूहिं सिसिरोवयारो, न य मणागैपि जाया से संतावहाणी । अवि य-जह जह कीरइ तीसे सीयलवत्थूहिं तणुपडीयारो । तह तह मयणहुयासो हवइ हयासो सहस्सगुणो ॥ १ ॥

किं च—उद्यत्तद् परिश्रुतद् दीहं नीससद् जंपद् न किंपि । थोयजलगज्झलीणा मीणस नरेसरस्स सुया ॥ २ ॥

एवंविहं च उद्धृतं देहदाहं पलोद्भूतं पुच्छिया चेडीहिं—सामिणि ! किं कारणं जमेवं अज्झ बाढं वाउलसरीरा उवलक्खिजसि ? , किमपत्थभोग्यणवियारो उयाहु पित्तदोसो अन्नं वा कारणंतरं ? , सपद्दा कहेउ भगवती, जेण सा-
हिज्जद् वेजस्स, कीरद् समुच्चियभेसहाइसामग्गी, अणुवेहणिज्जा खलु रोगा सत्तुणो य, रयणावलीप्प भणियं—न मुणेसि
किंपि संपद् विसेसकारणं, चेडीहिं भणियं—सामिणि ! जप्पभिद् तुगप्प सा चित्तपट्ठिया पलोद्भूया तपोलंचिय जाओ
कित्तियओवि सरीरस्स अन्नहा भावो इद् अस्से वित्तेमो, निच्छियं पुण सरीरधारणं तुमं जाणेसि । तओ लक्खिय-
मेयाहिंति विगप्पिज्जण भणियगणाए—दुला ! तुब्भे जाणद्, तओ ताहिं चित्तियं—जाव अज्जवि विरहेण न नाढं
वाहिज्जद् इगा ताव निवेएमो रज्जो, जेण विसमा कज्जगद् निद्दुरा सरा लुसुगाउहस्स सिरीसकुसुमकोमला सरीर-
सिरी इग्गीए, न जाणिज्जद् किंपि एवइत्ति निच्छिज्जण कदायिओ एस वइयरौ राइणो, तेणावि आहूया रयणावली,
सपणयं भणिया य—पुत्ति ! सूरसेणलुमारेण तुगं परिणाविउमस्से वंछामो, जुत्तभयं ? , तीप्प भणियं—ताओ जाणद्,
तओ लक्खिज्जण तदभिप्पायं राइणा भणिया नियपद्दाणपुरिसा—अरे गच्छद् महासेणनैरवइणो सयासे, आणेह
सूरसेणलुमारं, जेण विवाहो लुं कीरद्, जं देवो आणवेइत्ति मणिज्जण निग्गया पद्दाणपुरिसा, गंतुमारद्धा, कमेण
य पत्ता सिरिपुरं, दिट्ठो राया, निवेइयं पथोयणं, नरिदेणवि पवरगंतिसागतं चाउरंगसेणाणुगओ रयणावलीविवाहनि-

मित्तं पेसिओ सूरसेणकुमारो, अविलं वियपयाणेहिं पत्तो सिरिथलनयरसमीचं, निवेइयं जियसत्तुनरिंदरस कुमारागमणं,
परितुट्ठो एसो, दावियं पियनिवेयगाण पारिओसियं, समाइडा य अणेण नियुरिसा-अरे मोयोवेह वंघणवद्धं जणं
दवावेह अविसेसेण महादाणं सोहावेह कारावेह हट्ठसोहाओ पयट्ठेह मट्ठसवं सजेह मंगलतूरं वायावेह
हरिखुक्करिसकारए जमलसंखे, ढोवेह करणुगं जेण निगच्छामो कुमाराम्भिमुहं, संपाडियं इमं रायसासणं पुरिसेहिं,
निगओ राया, दिट्ठो यऽणेण लच्छीसमागमसमूखो चैव महुमहणो कुमारो सूरसेणो, दूराच्चिय पणमिओ कुमारेणं,
गाढमालिं गिज्जण अभिन्नं दिओ राइणा, पवेसिओ महाविभूईए पुरं, दिन्नो उचियठाणे जन्नावासओ, अन्नपि संपा-
डियं तक्कालोचियं कायच्चं, कमेण समागओ विवाहदिवसो, तओ कयमज्जणो गहियसुंदराभरणो पवरचारुवारणाधिरूढो
संखकाहलागवभंगं भीरतूरनिगवोसपूरियदिसामंडलो गहियकणयदंडधयवडुग्घायनरनिवहाणुगओ मंगलपहाणगायं-
तगायणसणाहपेच्छणयसंकुलो पइन्नवरवासधूलिधूसरियमणहरुत्तालनचंतवेसविलओ कुमारो सूरसेणोवि विवाहमं-
डवमागओ, कयं से सासुयाए उचियकरणिज्जं, पेसिओ कोउयहरयं, दिट्ठा अणेण पसाहिया विविहवन्नएहिं विभू-
सियंगमंगा पवरयणालंकारेहिं नियंसिया निम्मलखोमजुयलयंति चच्चिया हरिचंदणेणं पडिनद्धा सुरहिसियकुसुमदा-
मेहिं, तं च दट्ठूण पुवभवदढपेम्मदोसेण सहसा वियंभिओ कुमारस्स अणोरपारो पेम्पसरो, चित्तिं चऽणेण-अहो नि-
रुवमा रूवसंपया अहो अखंडियपसरं सरीरलावणं, असारेवि संसारे एरिसाइं कण्णगारयणाइं दीसंति त्ति पमोयमुच्च-

हंतो काराविओ पुंखणगाइकिंचं, सविसेसं, च पूइया देवगुरुणो, पारद्धो परमविभूइए हत्थगहो, जाओ राइणो परि-
तोसो, सम्माणिया सामंता, कयत्थीकया तक्कुजणा, अभिनंदिता नायरया, भमियाइं चत्तारिवि मंडलाइं, वित्तो
विवाहमहूसवो, अनन्नसरिसं च रयणावलीए सह विसयसुहमणुहवंतस्स समइक्कंता कइवि वासरा । अब्बदियहे य
नरवइमायुच्छिऊण तीए समेओ निययनयराभिमुहं गंतुं पयट्ठो कुमारो, वचंतस्स य अंतरा समागओ वसंतसमओ ।
सो य पुण केरिसो?—उद्दामरामाजणमणविंयंभंतंपंचाणो मडुरपरहुयववित्तसियपहियहियओ कुसुममयरंदविंदु-
पाणपरवससिलीसुहसंकारसुहरो पफुछसहयारेणुधूलीधूसरियसयलदिसामंडलो कुरवयकुसुमामोयहरियमडुरिय-
गणो सेवणसुहपसुरिहम्मंतपामरो जणचचरीतूरमडुरनिग्घोसो तरुसंडमंडवावद्धहिंडोलाउलो वीयरगोव अइमुत्त-
याणुगओ लच्छीनाहोव छप्पयरिच्छोलिसामंलच्छओ माणससरोव पाडलापसूयसुंदरो तरुणीजणोव ससिणिद्धलोद्ध-
तिलयपसाहिओ सुमुणिगणुव असोगाणुगओ, अवि य—

गिमहुणहताविगाइं पल्लपंकुल्लियंगमंगाइं । गिरिकूडा इव नजंति जत्थ वणमहिसजुहाइं ॥ १ ॥

कुडयसिलिंधसिरीसाइविविचिहतरुकुसुमंगंधरमणिज्जो । छज्जइ गंधियहट्ठो व जत्थ वरकाणणाभोगो ॥ २ ॥

रेहंति कुसुमसंचयसमोत्थया जत्थ किंसुयसमूहा । तकालपहियपफुट्ठहियरुहिरौवलित्तव ॥ ३ ॥

जत्थ य परइयकलरवगीयनिनायं रणंतअलितूरं । पवणेरियतरुपल्लवबाहुल्यं नचइव वणं ॥ ४ ॥

जन्मि य पियंति तरुणा दइयासुहकमललद्धसुहवासं । मइरं मयरद्धयजीवणेक्कपरमोसहिरसं च ॥ ५ ॥

वेइल्लमउलदसणा कुवल्यनयणा मरालरवसदा । उग्गायइव जहियं उउलच्छी कमलवयणेण ॥ ६ ॥

सुमारियपणइणिवगं पहियसमूहं विलुत्तचेयन्नं । वउलाण कुणइ गंधो विसपुप्फाणं च पसरंतो ॥ ७ ॥

जन्मि य उच्चा तरुणो वियसियसियकुसुमगुच्छसंछन्नो । तारानियराउलगयणदेसलच्छि विडंबंति ॥ ८ ॥

एवं गुणाभिरामे य पत्ते वसंतसमए सो सूरसेणकुमारो तक्कालदेसंतरागवणियजणोवणीयपवरतुरंगमाभिरूढो
विसेसुज्जलनेवत्थेण परिगओ जणेण पयट्ठो काणणसिरिं पेच्छिउं, गच्छंतस्स य विवसीभूओ तुरंगमो विवरीयसिक्ख-
त्तणेण य जहा जहा वेगपडिखलत्थं रज्जुमायड्डइ कुमारो तहा तहा अपत्थसेवाए उइन्नरोगोव वेगेण सो गंतुमा-
रद्धो, दूरपरिसुक्कपरियणो य दुक्कयक्कमुणव निवाडिओ कुमारो एगागी महाडवीए घोडएण, परिस्समक्किलंतो य
मओ एसो, कुमारोवि तण्हाभिभूयो इओ तओ सलिलमन्नेसिउं पवत्तो, अइगंभीरयाए अडवीए कहिंचि तमपाव-
माणो निसन्नो सिसिरतरुच्छायाए, चिंतिउमारद्धो य-अहो कुडिला कज्जपरिणइ अहो सच्छंदाभिरइ दुल्लिओ दइवो,
जं सव्वहा अपरिचिंतियंपि कज्जं एवमुवदंसेइ, अहवा किमणेण?, सत्तधणो चेव सप्पुरिसजणो होहिति, एवं च
विगप्पमाणो जाव खणंतरं विगमेइ ताव समागओ एगो पुलिंदगो गहियकोदंडो करकलियबाणो तं पएसं, सपणयं
पुच्छिओ य अणेणं, जहा-भइ ! को एसप्पएसो ? कत्थ वा सलिललाभोत्ति ?, तेण भणियं-कायंबरीए महाडवीए

मञ्जुदेसो एस, सलिलं पुण एत्तो वणसंडाओ केत्तिएणवि भूभागेणं वट्ठइ, केवलं दुट्ठसत्ताउलत्तणेणं न सुहगेज्झं, भो
महाणुभाव ! जइ पिवासिओ ता एहि जेण सयमेव दंसेमि, एवमायन्निऊण पडिवन्नं कुमारेणं, पयट्ठो य तयभिसुहं,
तओ पुल्लिंदगेण चडावियचावगुणारोवियारोवेण देसिज्जमाणमग्गो पत्तो सरोवरं, कयं जलावगाहणं, अवणीया
तण्हा, अहो णिक्कारणोवयारी एसोत्ति चित्तिऊण कुमारेण दिन्नं से नामंकियं सुद्धारयणं, परिहिंयं च अणेण अंगु-
लीए, नीओ य तेण नियगुहाए, काराविओ कयलीफलाइणा पाणवित्तिं, अह परिणयंमि वासरे कुमारेण भणिओ
पुल्लिंदगो-अहो बाढं कोऊहलं मे बहुअच्छरियनिलयभूया य एसा संभाविज्जइ महाडवी, अहो दंसेसु किंपि अच्छ-
रियनिलयभूयं इमीए पएसंतरं, पुल्लिंदगेण भणिंयं-जइ एवं ता एहि दंसेमि, तओ गया एगं वणगहणंतरं, तं च
केरिसं ?-एगत्थ रत्तचंदणालिहियमंडलगं निहित्तरत्तकणवीरकुसुमदामंदतुरं अन्नत्थ मंतवाइजणहुणिज्जमाणगुग्गुलुगु-
लिकांगंधुद्धयाभिरामं एगत्थ मिलियधाउवाइनिवधमिज्जंतधाउपाहाणं अन्नत्थ विविहोसहीरससाहिज्जमाणभूइयं
एगत्थ पउमासणनिविट्ठजोगिजणपारद्धमणपरिकम्भणं, एवंविहं च तं दट्ठण जायपरमविम्हएण पुच्छिओ सो कुमा-
रेण-भइ ! किं नाम एयस्स पएसस्स ? तेण भणिंयं-सिद्धिखेत्तंति, कुमारेण चित्तिं-अहो नामेणवि मुणिज्जइ एयस्स
महिमासारो, ता निच्छियं तं नत्थि अच्छरियं जमिह न होही, अहो एयं सट्ठाणे पेसिऊण असंभंतो पलोएमि
निहुयदिट्ठीएत्ति विगप्पिऊण भणिओ अणेण पुल्लिंदो, जहा-भइ ! गच्छसु तुमं गुहाए, अहंपि खणमेकं परिभमिऊण

विगयकोऊहलो पडिनियत्तिस्सामि, तेण भणियं-अज्ज ! न जुल्लइ निसाए एत्थ निमंसंवि वसिउं, जओ इह पाउब्भ-
वंति पिसाया मिलंति वेयालंबदाइं समुच्छलंति घोरफेकारसद्दा जायंति छिद्दपवे सा, अओ अलभेत्थावत्थाणेण, कुमा-
रेण भणियं-जइ एवं ता तुमं इहेव निलुक्को पडिवाडेसु खणंतरं जाव अहं संखेवेण पेक्खिउमागच्छामि, तेण भणियं-जं
भे रोयइत्ति, परं सिग्घं एज्जाहि जेण समइकंता जाममेत्ता रयणी, एवंति पडिव ज्जिऊण कुमारो अइगओ वणगहणब्भं-
तरं, पज्जलंतदिबोसहीपहापंसारेण य इओ तओ पलोयंतो पत्तो दूरविभागं, अह एगत्थ माहवीलयाहरे जालाउलं
पज्जलंतं जलणकुंडं पेच्छिऊण सकारणमेयंति जायबुद्धी पहाविओ वेगेण तयभिसुहं, जाव केत्तियंवि भूभागं वच्चइ
ताव निसुणइ साहगविहिबुक्कमंतसाहगं पंडुच्च सकोवं चेडयसुरं समुल्लवंतं, कहं तं?—

रे सुद्ध ! मरिउकामोऽसि नूण जं मंतसाहणं कुणसि । अविगप्पिऊण पुवं समुद्धिविभवस्स माहृप्पं ॥ १ ॥
किं कोऽवि तए दिट्ठो निसुओ वा साहगो महियलंमि । जो साहणंमि चुक्को सुक्को हि मए जमेणं व ॥ २ ॥
जह इयरदेवमंताण सुमरणं कुणसि तं जहिच्छाए । तह मज्झवि कुणमाणो न भवसि तं निच्छियं एत्तो ॥ ३ ॥
कयमणपरिकम्मेहिं सुणिनाहेहिवि दुसाहणिज्जोऽहं । पायडियकूडकवडी न चेडओ किं सुओ तुमए ? ॥ ४ ॥
इमं च भणिज्जमाणं कुमारेण निसुणिऊण चित्तिं-नूणं कोइ महानुभावो साहणविहिपरिमट्ठो एस चेडएण
निवभंछिऊण हणिज्जइ [लग्गो], ता जुत्तं मम एयपरित्ताणंति विगप्पिऊण दाहिणकरेण नीलमणिच्छायं छुरियं

धरंतो धाविओ तम्मग्गेण, दिट्ठो यडणेण तवेलं चिय भो भो सुरासुरा परित्तायह परितायहत्ति भणमाणो
 चलणेसु चेत्तण चेडगेण उप्पाडिओ सिलायले पच्छाडणनिमित्तं विज्जासाहगो, तओ देवेषु सत्थं न कमइत्ति चिं-
 तिऊण मुक्कपहरणो निवडिओ कुमारो चेडयसुरस्स चलणेषु, विण्णविउमाढत्तो-देव ! पसीयह पसीयह, परिच्चयह
 कोवं, मम जीविण एखखह एयं, को तुम्ह इमिणा सह कोवो ? न हि सुकुद्धोऽवि पंचाणणो पहरइ गोमाउयंमि,
 किं तुम्हेवि अहमजणोचियं कम्मं काउमरिहह ? इमं च सोच्चा ईसिं जायपसमो चेडगो समुल्लविउमारद्धो-भो
 कुमार ! अविलंबणिज्जोऽसि तुमं, तद्वावि नियुणेषु एयावराहं, इमिणा हि मम मंताराहणंपरेणावि न संमं वहिज्जइ,
 कुमारेण भणियं-महावराहंकारीवि ममं जीवियमोल्लेण मोत्तवो, मा कुणसु विहलं देवदंसणएवायं, चेडगेण भणियं-
 सुयणु ! किं तुमए निखराहेण विणासिएण ? एसो चेव विणासणिज्जो आसि, परं तुह महाणुभावयाहयहियएण
 पसाउत्तिकाऊण एस परिचत्तोत्ति मणिऊण अक्खयसरीरं चेव मंतसाहगं मोत्तूण अहंसणमुत्रगओ चेडओ, सोऽवि
 मरणभयागयमुच्छाभिभूयचेयणणो अहसन्निहियमंतसाहणत्थोवणीयहरिचंदणरसेण समासासिओ कुमारेण, सुहुत्त-
 मेत्तेण य उवलद्धचेयणो पच्चुजीवियं व अप्पाणं परिकप्पितो मंदमंदमवलोइउं पयचो, खणंतरे य समुल्लविओ कुमा-
 रेण-भद ! निब्भओ निरुद्धिगो अच्छसु, दूरमवक्तो तुह कयंतो, केहसु परमत्थं, को तुमं ? किं नामधेओ ? कुओ
 वा आगओ ? किमियं सुहपसुत्तकेसरिकंइयणं व विणासपज्जवसाणं मंतसाहणं समारद्धं ? कहां वा विहडियं ? जीव-

दाइति पेमसुवहंतेण भणियमणेण—

सुंदर ! विज्जाहरो कणयचूडयनामोऽहं गयणवल्लहपुराओ चेडगसाहणं काउमिहागहो म्हि, मंतं च परावत्तयंतस्स मे कहवि भवियवयावसेण सुप्पणिहियस्सवि विसंखुलियमेक्कमक्खरं, एत्तियमेत्तावराहसंभवेऽवि परिक्खविएण उप्पा-
डिओ सिलायले निवाडणत्थमणेणं, तक्कालं भयविहुरेण थ न सरियाणि तणुरक्खामंतक्खराणि, तयणंतरं च न मुणेमि किंपि जायं, एत्तियमेत्तं ईसिं जाणामि जं तुमए भणियं-मभ जीवियमोह्लेणऽवि मोत्तवो एसत्ति, कुमा-
रेण भणियं-भइ ! के अम्हे ? , नियसुकियदुक्कियाणि चेव सच्चत्थ सुहदुक्खेसु पभवति जीवाण, कणयचूडेण भणियं-
को सद्देज्ज अहिसमाणरूवाइं सुकयदुक्कयाइं । तुमए सजीयदाणेण रक्खमाणेण मह जीयं ॥ १ ॥
कहमिव बहुयणा नो वसुंधरा ? जत्थ तुम्ह सारिच्छा । परहियकरणेक्कपरा अज्जवि दीसंति सप्पुरिसा ॥ २ ॥
जाय चिय नीसेसावि मज्झ नूणं समीहिया सिद्धी । दुल्लभंदसणो दिट्ठिगोयरं जं गओ तंसि ॥ ३ ॥
अन्नं च-तुह सच्चरिएणवि नामगोत्तमुक्कित्तियं जइवि भुवणे । तहवि सविसेसजाणकएण तम्मइ मंहं हिययं ॥ ४ ॥

तओ कुमारेण मुणिऊण तदभिप्पायं साहिओ दुट्टतुरगावहरणपज्जवसाणो सवो नियवइयरो, विज्जाहरेण भणियं-
कुमार ! किमिह मे जीवियप्पयाणत्थमेव तुम्ह आगमणं ? , किं वा कारणंपि आसि ? , कुमारेण भणियं-कोऊह्लेण,
न पुण अन्नं कारणंतरं, विज्जाहरेण भणियं-जइ एवं ता कुणह ममाणुगहंति एह वेयहुपव्वयं, पेच्छइ तत्थ अणे-

गच्छरियाई, अणुगिणहह नियंदसनदाणेण मम कुंडुवयंति, अचंतकोऊहलावलोयणसयणेण पडिवन्नं च कुमारेण ।
 तयणंतरं सो कुमारं घेत्तूण उप्पइओ तिमिरुणीलसामलं गयणयलं, निमेसमेत्तेण पत्तो वेयडुगिरिं, पविट्ठो सभवणं,
 कया कुमारस्स महई भोयणाइपडिवत्ती ॥ सो य पुल्लिंदगो तत्थ जाममेत्तं पडिवाल्लिऊण जाव कुमारो नागओ
 ताव वणनिगुंजेसु सुचिरं पलोइऊण दुहत्तो सगुहाए गओ ॥ कुमारोऽवि कणगचूडेण समेओ वेयडुगिरिपरिसरेसु
 सुरहिपारियायतरुमंजरीगंधुडुरेसु विसमगिरितडनिवडंतनिज्झरझंकारमणहरेसु सविलासकिन्नरभिहुणसंगीयसइसुंदरे-
 सु निकुंजेदसोवसोहिएसु विहरिउमारद्धो, अह परिब्भमंतेण कोऊहलवियसियच्छिणा कुमारेण दिट्ठो एगत्य
 सिलायले एक्कचलणावट्ठमनियमियसयलंगमारो उट्ठसमुक्खित्तोभयभुयालुयलो ज्ञाणवसनिसियनिचलपयंडमायंडमं-
 डलुम्मुहलोयणप्पसरो निप्पकंपत्तणतुलियकुलाचलो पडिमासंठिओ एगो चारणसमणो, तं च दट्ठूण अंतो वियंभि-
 यउट्टामहरिसवसपयट्ठंतपुलथपडलेण कुमारेण भणियो कणगचूडो-भइ ! एहि एसस्स महासुणिस्स चंदणेण पक्ख-
 लियकल्लिमलं अत्ताणं केरमोत्ति, विज्जाहरेण संलत्तं-एवं होउ, तओ गया सुणिसमीवे, पणमिओ सविणयं, सुणिणावि
 जोगयं नाऊण पारियं काउस्सगं, उवविट्ठो समुचियट्ठाणे, अज्जवि मूलगुणट्ठाणवत्तिणो एए इति परिभाविऊण
 भणिया साहुणा-भो महाणुभावा ! एसस्स निस्सारसंसारस्स सारमेत्तियं जं वीयरगेहिं करुणापरियरियंतकरणेहिं
 देसिओ सव्वजत्तेण कीरइ धम्मो, तस्स पुण मूलं अहिंसा, सा य मज्जमंसनिमिभत्तपरिहारेण जडुत्ता संभवइ, तत्थ

मज्जं ताव चिसिट्टजणपेयवज्झं, अमेज्झरसंपि व परिहरणिजं दूरओ, न मणसावि तप्पिवासा कायवा, एयं हि पिज्जमाणं निट्ठावेइ दविणं अवणेइ विसिट्टत्तणं जणेइ उम्मायं संपाडेइ विहलत्तणं दोवेइ कज्जहाणिं पयडेइ अत्त-
सम्माणि लज्जावेइ मित्ताइं कलुसेइ बुद्धिपसरं विनडेइ कुलजाइओ भंजावेइ निम्मलं सीलं उप्पाएइ वेरपरंपराओ
भंसेइ धम्मकम्माओ संजोएइ अकुलीणजणमेत्तीए अभिगमावेइ अगम्माणि भक्खावेइ अभक्खाणि उवहसा-
वेइ गुरुजणं महलावेइ सयणवगं बोद्धावेइ अवोह्णिज्जाणि, तहा इमं हि मज्जपाणं मूलं असुइत्तणस्स अवगासो
वेरियाणं पडिबोहो कोहाइणं संकेयट्ठाणं पराभवाणं अट्ठाणीमंडवो अणत्थाणं । अविय-

पच्चक्खंपि य दावेइ कलुसभावं जमेत्थ जंतूणं । मज्जस्स तस्स का होज्ज चंगिमा पावमूलस्स ? ॥ १ ॥

वरसुगगतालपुडभक्खणेण अत्ता विणासमुवणीओ । मा मज्जपाणवत्थाए थेवमित्तंपि संठविओ ॥ २ ॥

एत्तो चिय लोइयसाहुणोऽवि मइरं सुयंति दूरेण । वेयपुराणेषुपिवि निसिद्धमेअं जओ भणियं ॥ ३ ॥

गौडी पैष्टी तथा माध्वी, चिन्नेया त्रिविधा सुरा । यथैवैका तथा सर्वा, न पातव्या द्विजोत्तमैः ॥ ४ ॥

नारीपुरुषयोर्हन्ता, कन्यादूषकमद्यपौ । एते पातकिनस्तूक्ताः, पञ्चमसैः सहाचरन् ॥ ५ ॥

तथा-सुरां पीत्वा तु यो मोहादग्निवर्णां सुरां पिबेत् । तथा सकाये निर्दग्धे, सुच्यते किल्बिषात्ततः ॥ ६ ॥

यस्य कायगतं ब्रह्म, मध्येन ग्राव्यते सकृत् । तस्य व्ययैति ब्राह्मण्यं, शूद्रत्वं च नियच्छति ॥ ७ ॥

इय भो देवाणुपिया ! मज्जं पाउं न जुज्झइ कयावि । सग्गापवग्गसंगमसुहत्थिणो सव्वकालंपि ॥ ८ ॥

जहा य किर विसिद्धानं मज्जमपेज्जं एवं मंसमवि अमक्खणिज्जं । एवं हि—

अवचओ सुहज्झाणस्स पयरिसो अट्ठरुहाणं उवसंहारो संपाइमसत्ताणं उप्पत्तिपयं किमियाणं आरंयितियजीवा-
(ववा)ओ सव्वावत्थासु हेऊ विसेसरसगिद्धीए कारणं पारद्धिक्कम्मस्स निमित्तं महारोगायंकाणं वीमच्छं पेच्छगच्छीणं
पउणपयवी दुग्गईए जलंजलिदाणं सुहाणुबंधसुहाणु भावस्स, ता को नाम सयन्नो एवंविहदोसनिहाणमिणं मणसावि
समभिलसेज्जा ? , अवि य—

धम्मे सलाहणिज्जं परपीडावज्जणं पयत्तेणं । तं पुण मंसासीणं न वडइ गयणारविंदव्व ॥ १ ॥

मंसमसारयस्स सरीरयस्स परिपोसणत्थिणो मणुया । सुंजंति परभवेसुं तिकखदुक्खाइं अगणित्ता ॥ २ ॥

को नाम किर सयन्नो मोहोत्तियतुच्छसोक्खकज्जेण । अस्संखभवपरंपरदुहरिच्छोलं पवट्टेजा ॥ ३ ॥

लोइयसत्थेवि इमं बहुप्पयाणेण भणिइनिवेहेण । पयडं चिय पडिसिद्धं अविक्खं जेण भणियमिणं ॥ ४ ॥

हिंसाप्रवर्धकं मांसं, अधर्मस्य च वर्धनम् । दुःखस्योत्पादकं मांसं, तस्मान्मांसं न भक्षयेत् ॥ ५ ॥

स्वमांसं पर मांसेन, यो वर्धयितुमिच्छति । उद्विग्नं लभते वासं, यत्र तत्रोपजायते ॥ ६ ॥

दीक्षितो ब्रह्मचारी वा, यो हि मांसं प्रभक्षयेत् । व्यक्तं स नरकं गच्छेदधर्मः पापपौरुषः ॥ ७ ॥

आकाशगामिनो विप्राः, पतिता मांसभक्षणात् । विप्राणां पतनं दृष्ट्वा, तस्मान्मांसं न भक्षयेत् ॥ ८ ॥
 शुक्रशोणितसंभूतं, यो मांसं खादते नरः । जलेन कुरुते शौचं, हसंते तं हि देवताः ॥ ९ ॥
 श्रूयन्ते यानि तीर्थानि, त्रिषु लोकेषु भारत ! । तेषु प्राप्नोति स स्वानं, यो मांसं नैव भक्षयेत् ॥ १० ॥
 नाग्निना न च सूर्येण, न जलेनापि मानव ! । मांसस्य भक्षणे शुद्धिः, एष धर्मो युधिष्ठिर ! ॥ ११ ॥
 किं लिङ्गवेषग्रहणैः ? किं शिरस्तुंडमुण्डनैः ? । यदि खादन्ति मासानि, सर्वमेव निरर्थकम् ॥ १२ ॥
 यथा वनगजः खातो, निर्मले सलिलार्णवे । रजसा गुण्डते गात्रं, तद्रन्मांसस्य भक्षणम् ॥ १३ ॥
 प्रभासं पुष्करं गङ्गा, कुरुक्षेत्रं सरस्वती । देविका चन्द्रभागा च, सिन्धुश्चैव महानदी ॥ १४ ॥
 मलया यमुना चैव, नैमिषं च गया तथा । सरयू कौशिकं चैव, लौहित्यं च महानदम् ॥ १५ ॥
 एतैस्तीर्थैर्महर्द्धिक्यैः, कुर्याच्चैवामिषेचनम् । अभक्षणं च मांसस्य, न च तुल्यं युधिष्ठिर ! ॥ १६ ॥
 यो दद्यात्काञ्चनं मेरुं, कृत्वा चैव वसुन्धराम् । अभक्षणं च मांसस्य, न च तुल्यं युधिष्ठिर ! ॥ १७ ॥
 हिरण्यदानं गोदानं भूमिदानं तथैव च अभ० ॥ १८ ॥ कपिलानां सहस्रं तु मासे मांसं गवां ददे । अभ० ॥ १९ ॥
 इय लोइयसत्थेसुवि परिहरणिज्जत्तेण निदिट्ठं । मंसं महाविसंपिब किं पुण लोउत्तरे समए ? ॥ २० ॥
 जह मज्जमंसविरई बहुदोसत्तेण होइ कायवा । तह रयणिभोगणंपिबि परिहरणिज्जं सयन्नोहिं ॥ २१ ॥

जइविहु फासुगमन्नं कुंथूपणगा तहावि दुप्पस्सा । पच्चक्खनाणिणोवि हु राईभत्तं परिहरंति ॥ २२ ॥
 जइविहु पीथील्लिगाई दीसंति पईवजोइउज्जोए । तहवि खलु अणाइन्नं मूलवयविराहणा जेण ॥ २३ ॥
 इय भो देवाणुपिया ! संसारतरुस्स रुंदकंदसमं । मज्जं मंसं निसिंभोयणं च नाउं परिच्चयह ॥ २४ ॥
 किं वा मूढा अच्छह नो पेच्छह छिड्डपाणिपुड्डपड्डियं । सलिलंपिव विगलंतं पइसमयं चेव नियजीयं ॥ २५ ॥
 केत्तियमेत्तं एयं ? अज्जवि संसारचारगविरत्ता । रज्जंपि विवज्जित्ता पव्वज्जं संपवज्जंति ॥ २६ ॥

एवं च सुणिणा कहिए कणगचूडो समुट्टिऊण परमं भवविरागमुद्धहतो निवडिओ सुणिचलणेसु, भणिउमाढत्तो य-
 भयवं ! जाव कुमारं संठाचेमि ताव तुम्ह समीचे पव्वज्जापडिचत्तीए करेमि सफलं नियजीवियं, सुणिणा भणियं-एसो
 चिय परिच्छेओ भवपासस्स, अओ जुज्जइ तुम्हारिसाण काउमेयं । एत्थंतरे कुमारोऽवि जायसंवेगो पणामं काऊण
 भणइ-भयवं ! ममंपि मज्जमंसनिंभत्ताणं आमरणंतं देह पच्चक्खाणं, साहुणावि नाऊण जोग्गयं दिन्नं से पच्च-
 क्खाणं, तओ गुरुं वंदिऊण गया सगिहं, पवराभरणाइदाणेण सम्माणिऊण भणिओ कुमारो कणयचूडेण, जहा-
 कुमार ! भवविरत्तोऽम्हि, संपयं दिक्खागहणेण विगयपावं अत्ताणं करिस्सामि, अओ तुमं साहेसु जं मए कायवं,
 कुमारेण भणियं-किमहं साहेमि ?, दुप्परिहारो तुमं, केवलं चिरकालविमुक्को गुरुजणो मम दंसणसुओ कहंपि वट्ट-

इत्ति वाढं परितप्पइ मणो, कणयचूडेण भणियं-जइ एवं ता वच्चाभो तत्थ, पडिच्चन्नं कुमारेण, तंओ विमाणमारु-
हिऊण दोवि गंतुं पयट्ठा ।

इओ य तं सेन्नं दुट्ठतुरगावहरियं कुमारं सुचिरं अरन्ने पलोइऊण कहवि अपत्तवत्तं निराणंदं निरुच्छाहं गयं
सिरिपुरं नयरं, निवेइया नरवइस्स कुमारवत्ता, तओ राया अवहरियसवस्सो इव संतावमुच्चंतो परिचत्तपाणभो-
यणो चाउरंगिणीए सेणाए अणुगम्ममाणो अंतरेण दुस्सहदुक्खकंतहिययाए रयणावलीए य समेओ निगगओ
नयराओ कुमारन्नेसणनिमित्तं, पत्तो य कमेण तं चैव कायंवरीए मज्झदेसं, पेसिया कुमारावलोयणत्थं सवत्थ
पुरिसा, समारद्धा य निरुविडं, अन्नया इओ तओ परिममंतेहिं दिट्ठो सो पुलिंदगो, पलोइयं च से अंगुलीए कुमा-
रनामंकिं सुद्धारयणं, तं च दट्ठूण जइ पुण अणेण विणासिओ होज्ज कुमारोत्ति कुविकप्पकलुसियहियएहिं उव-
णीओ सो नराहिवस्स, तेणावि अणाउलहियएण पुच्छिओ एसो-अहो सुद्ध ! मह अचित्तं साहेसु कत्तो एस सुद्दा-
रयणलाभो ? कत्थ वा कुमारोत्ति भणिं एसो पुलिंदगो अदिट्ठपुवं हरिकरिहभड्डभंडं रायलच्छिं पेच्छिऊण जाय-
संखोभो अड्ढविअड्डं खलंतक्खरं कुमारवत्तं कहिउमारद्धो, तओ राइणा भणियं-अरे अवरोप्परविरोहिणा वयणसं-
दब्भेण सुणिज्जइ जहा कुमारो अणेण विणासिओत्ति, कहमन्नहा सुद्धारयणलाभो हवेज्जा ? , न हि जीवंतस्स भुय-
गाहिवस्स फणारयणं केणा वि धेचुं पारिज्जइ ? , एवं टिएवि पंचरत्तं जाव सुसंगोविं करेह एयं, ण सुणिज्जइ कोऽवि

परमत्थो, गंभीराइं विहिविलसियाइंति भणिए पुरिसेहिं निगडिओ पुल्लो, राया हि संदेहदोलाहिरूढो अंसुजल-
 पुन्नलोयणो मनुभरं रोविउं पवत्तो, अह पसरिया कुमारपंचत्तगमवत्ता खंधाचारे, दूमिया सामंता, विच्छायत्तं
 पत्तो पायक्कजणो, विमणदुम्मणीभूया संतिणो, हाहारवगब्भं रोविउमारद्धमंतेउरं, चिरं अक्कदिऊण सोगभरमारियंगी
 निस्सट्ठं निचडिया धरणिवेट्ठे रयणावली, समासासिया कहकहवि चेडीचक्कवालेण, एत्थंतरे जाया रयणी, अंजण-
 गिरिविन्भमाइं वियंभियाइं तिमिरपडलाइं, एवं च कमेण पत्ते मज्झरत्तसमए रयणावलीए मणिया निययधावी-
 अम्मो ! किं एत्तिएवि गए धरियव्वं नियजीवियं मए सहिअद्वा हीणजणण्णुसणा दट्ठ्वाइं पियगेहे सामलाइं सयणाण
 वयणाइं सुणियवाइं अकारणकुवियखलदुव्वयणाइं, ता सावियासि तं मए नियजीविएण, मा अन्नहा काहिसि, होसु
 संपयं सहायणी, पज्जत्तं पेसुब्भयसुहेण जस्स एरिसा गई ॥ अविय—

किंपागतरुस्स फलं उवमुंजंतं जणेइ पज्जंते । दुक्खं पियजोगो पुण पढमारंभेऽवि विद्वइ ॥ १ ॥

करिकन्नविज्जुसुराचावचावलेणं विणिम्मियं मत्ते । पियजणसंगमसोक्खं नूनं विहिणा हयासेण ॥ २ ॥

तेणेव पंडिया परिहरंति पेम्मं अहिं बिलगयं व । जाणंति जेण पियविप्पओगविसवेगमाहणं ॥ ३ ॥

अंबधाईए भणियं—पुत्ति ! कस्स कजस्स ममं सहायणीं पत्थेसि ?, तीए भणियं—अम्मो ! दुस्सहविरहदुयासण-
 परितावियस्स नियजीवियस्स परिचागकएणं, धावीए भणियं—वच्छे ! मा ऊसुगा होसु, अज्जवि न सुणिज्जइ

कोऽवि निच्छओ, पच्छावि सुलभो चेव मरणाभिलासो, तओ रयणावलीए सुणिऊण तीसे निसेहपरं वयणं कंयं मोणं, खणंतरेण य दिट्ठिं से वंचिऊण परियणेण असुणिज्जमाणा निगया आवासाओ; पविट्ठा दूरदेसपरिसंठियंमि वणनिगुंजे, जोडियपाणिसंपुडा य भणिउं पवत्ता—

भो काणणदेवीओ ! वयणं मे सुणह मंदपुट्ठाए । को अन्नो इह ठाणे ? साहिज्जइ जस्स नियकज्जं ॥ १ ॥

एसाऽहं दुहहेउं विरूवलक्खणचएण निम्मविद्या । परिणयणुत्तरकालंपि जीए जाओ इमो विरहो ॥ २ ॥

एत्तो तुज्झ समक्खं अत्ताणं तरुवरंमि लंबित्ता । मोएमि अजसकालुस्सकलुसिएणं किमेएण ! ॥ ३ ॥

सिरिपुररायतणुब्भव ! तुमंपि दूरट्ठिओऽवि लक्खिज्जा । जह तीए वराईए मम विरहे उज्झिओ अप्पा ॥ ४ ॥

इय भणिऊण संजमिओ केसपासो निचिडमापीडिया नियंसणगंठी उत्तरिह्वत्थेण रइओ तरुसाहाए पासओ आवद्धो नियकंधराए, सुक्को अप्पा, एत्थंतरे सेज्जाए तमपेच्छमाणी अणुमग्गेण धाविया अंबघाई, पत्ता कम्मधम्म-संजोएण तं पएसं, चंदजोणहाए य लंबमाणा दिट्ठा रयणावली, तओ हाहारवं कुणमाणी तक्कालियं पडियारं काउमस-मत्था लग्गा वाहरिउं—भो भो भो सुरविंतरखयरा ! परित्तायह परित्तायह, इमंमि इत्थीरघणंमि देह पाणभिव्खं, छिन्नह पासगं, मा अंगीकरेह उवेहाजणियं पावपंकति । इओ य कणगचूडो सुरसेणकुमारो य पत्ता तं पएसं, सुणिया एसा उग्घोसणा, तओ गयणाओ ओयरिऊण छिन्नो से पासओ संवाहियं अंगं, पुच्छिया य अणेहिंसुयणु ! को

एरिसदुरज्झवसायस्स कारणं जाओ?, रयणावलीए चिरं निस्ससिऊण भणियं-दुक्खिकम्माहं, कुमारणे भणियं-त-
 हावि विसेसेण साहेसु, जइ एवं ता सुरसेणकुमारस्स महासेणतणयस्स विरहोत्ति, तओ पच्चभिन्नाया कुमारणे,
 भणिया य-जइ एवं ता पज्जत्तं एत्तो दुरज्झवसाणेणंति वुत्ते जायपच्चभिन्नाणा लज्जावसनिमित्तलोयणा तुण्हक्का
 ठिया रयणावली, सुणियपरमत्थाए 'सागयं सागयं चिरागयकुमारस्स'त्ति जंपियं धावीए, निवेइओ नरिंदस्सागमण-
 वुत्तंतो य । एत्थंतरे विन्नत्तं विज्जाहरेण-कुमार ! पडिपुन्नमणोरहा तुब्भे, ता अणुजाणह ममं सट्ठाणगमणाय संपयं,
 अह तच्चिओगकायरमणेण कहकहवि विसज्जिओ सो कुमारणे, गयमेत्तेण य तेण पडिवन्ना भावसारं चारणमुणिस-
 मीचे पवज्जा । कुमारोऽचि रयणावलीए समेओ गओ खंधावारं, मिलिओ राइणो, सिट्ठो नियवुत्तंतो, जायं वद्धावणयं,
 मुक्को सम्माणिऊण सो पुल्लंदगो, पडिनियत्तो य राया सनयराभिमुहं, पत्तो य कालक्कमेणं, समप्पिओ कुमारस्स
 सुंदरो पासाओ, तत्थ ठिओ य गमेइ वासरे विविहकीलाहिं । अन्नया य सो पंचत्तमुवागओ महसेणराया, कयाइं
 कुमारणे मयगकिच्चाइं, पडिवण्णं च रज्जं, परिवालेइ रायनीतीए पुहइं । अन्नया य सो कणयच्चूडो सुमुणियमुणिधम्मो
 अहिगयसुत्तत्थो विहरमाणो समागओ वाहिरुज्जाणे, विन्नायतदागमणो वंदणत्थमागओ सुरसेणनरिंदो, वंदिओ
 अणेण परमभत्तीए, दिन्नासीसो य निविट्ठो गुरुपायमूले, कहिओ साहुणा जिणप्पणीयधम्मो, पडिबुद्धा बहवे
 पाणिणो, धम्मकहावसाणे य सुणिणा पुच्छिओ राया-सम्मं निव्वहंति चिरगहिया मज्जमंसनिसिभोयणवेरमणरूवा

अभिगगहत्ति, रायणा भणियं-चाढं निवहंति, तओ पुणो समणेण भणिओ राया, जहा-पडिवज्जसु असेसदोसरहियं जिणनाहं देवबुद्धीए, अंगीकरेसु सम्मत्तं, परिचयसु कुत्तासणासमुत्थं मिच्छत्तं, एत्तियमेत्तेणवि कएण परमत्थेण कयं चिय परभवहियं, रायणा भणियं-एवमेवं, पडिवन्नो मए एत्तो जिणधम्मो, जाया तुम्हाणुभावेण मम मिच्छत्तचा-यबुद्धी, सवहा कयत्थीकओ तुब्भेहिंति अभिन्नंदिऊण य गओ जहागयं, सुणीवि कप्पसमत्तीए विहरिओ अन्नत्थ । अन्नया राया तहाविहसमुप्पन्नसरीरेवयणो अविमुद्धज्जवसाणवसदूसियसम्मत्तो कालं काऊण उववन्नो जक्खत्तणेण । एसा विभेलगजक्खस्स मूळुप्पत्ती ॥

अह महावीरजिणवरो तस्स विभेलगजक्खस्स उज्जाणाओ निक्खमित्ता सालिसीसयनामस्स गामस्स बाहिरु-ज्जाणे संठिओ पडिमाए, तम्मि य समए माहमासो चट्ठइ, तत्थ कडपूयणा नाम बाणमंतरी, सा य सामिस्स त्तिवि-हुभवे चट्टमाणस्स विजयवई नाम अंतेउरिया आसि, तथा य न सम्मं पडियरियत्ति परं पओसमुच्चहंती मया समाणी संसारपरिभमणवसमासाइयमाणुसत्ता बालतवायोरेण पावियवंतरीभवा पडिमोवगयस्स जिणस्स पुच्चवेरेण तेयम-सहमाणा तावसीरूवं विउच्चइ, तओ वक्कलनियंसणा लवंतगुरुजडाभारहिमसीयलसलिलेण सवं सरीरं उद्धिऊण सामिस्स उवरिं ठिया, अंगाणि धुणिउं पयत्ता, तयणंतरं च—

हिमकणनिवहुम्मिस्सा अइसिसिससमीरेण परिगहिया । लगंति जिणंगे सलिलविंदुणो बाणनिवहव ॥ १ ॥

पइसमयं चिहडियजडकडप्पक्कलगलंतजलकणिया । अंतो विसंति तणुणो जयगुरुणो दुस्सहा धणियं ॥ २ ॥
पर्यईए चिय माहुब्भवस्स सीयस्स दुस्सहं रुवं । किं पुण परोट्टुच्चेट्टवंतरीसत्तिपग्गहियं ॥ ३ ॥

पागयनरस्स तारिससीउब्भववेयणाविणिहयस्स । फुट्टइ देहं निरुक्कमाउयत्ता ण उण पहुणो ॥ ४ ॥
इय चउजामं रयणिं जिणस्स सीओवसग्गसहिरस्स । सविसेसं संलगं धम्मज्झाणं भवुम्महणं ॥ ५ ॥

तथो तदहियासणेण जायंमि विसेसकम्मक्खए वियंभियं ओहिनाणं, सवं च लोणं पासिउमारद्धो, पुवं पुण
गब्भसंभवाओ आरब्भ सुरभवकालमित्तो ओही आसि, एक्कारसय अंगाणि सुयसंपयं होत्था, अह कडपूयणा निप्प-
कंपं भयवंतं वियाणिऊण रयणिविरामंमि पराजिया समाणा उवसंता कयपच्छावाया य भत्तीए पूयं काऊण गया
सट्ठाणं । सामीवि तत्तो निक्खमित्ता भदियं नाम नयरिं छट्ठं वासावासं काउसुवागओ, गोसालगोडवि मिलिओ छट्ठ-
मासाओ, सामिं दट्ठूण जायहरिसो नमिऊण पायंपकयं पमोयसुवगओ समाणो पुव्वपवाहेण पज्जुवासिउं पवत्तो,
सामीवि तत्थ विचित्ताभिग्गहसणाहं चाउम्मासखमणं काऊण वासारत्तपज्जंते बाहिं पारेत्ता गोसालेण समेओ
मगहाविसए अट्ट मासे उउवद्धे निरुवसग्गं विहरइ ।

सत्तमं च वासारत्तं काउकामो आलहियं नाम नयरिं एइ । तत्थवि चाउम्मासखमणाणंतरं बाहिं पारेत्ता कंडा-
गनामसन्निवेशसुवागच्छइ, तहिं च उउंगसिहरस्स महुमहणभवणस्स समुच्चिए एगदेसे ठिओ काउस्सग्गेण सामी,

गोसालोऽवि जीयरक्खं व जिणनाहमाहप्पमुव्वहंतो चिरकालं संलीणयापीडिओ अचिगणियपडिभओ दूरपरिचत्तल-
जावलोवो भंडोव महमहपडिमासुहे अहिट्ठाणं दाऊण ठिओ । एत्थंतरे पुप्फपडलगहत्यो धूवकडुच्छुयसमेओ
समागओ देवच्चगो, दूराउ चिय तहट्ठियं दट्ठूण गोसालयं सविम्वहयं चित्तियमणेण—

बोलिणो बहुकालो देवमिगं मज्झ पूयमाणस्स । न य दिट्ठो कोइ मए कुणमाणो एरिसं भत्तिं ॥ १ ॥

ता किं होज पिसाओ कोऽवि इसो अहव गहपरिगहिओ । धाउविवजासवसेण किं नु एवं ठिओ कोऽवि ? ॥ २ ॥

इय भावैतो जाहे भवणब्भंतरमुवेइ ताहे सो । समणोत्ति नगभावेण लक्खिओ तेण छेएण ॥ ३ ॥

परिचिंतियं चऽणेणं जइ दंडमहं इमस्स काहामि । तो जाणिस्सइ लोगो जह दुट्ठो धम्मिओ एस ॥ ४ ॥

तम्हा गामस्स परिक्खेमि सोऽविय संयंपि दट्ठूण । एयस्सुचियं काही किं मम इमिणा अणत्थेण ? ॥ ५ ॥

इय चिंतित्तुण सिट्ठं जणस्स तेणावि तत्थ गंतूण । तह चैव ठिओ दिट्ठो गोसालो वासुदेवपुरो ॥ ६ ॥

कुविएण जट्ठिसुट्ठीहिं कुट्ठिओ गहिह्छओत्ति काऊण । सुक्को चिरेण कहवि हु जणेण सो जजरसरीरो ॥ ७ ॥

सुक्कंमि तंमि सामी मद्दणनामंमि सन्निवेसंमि । गंतुं बलदेवगिहे फासुयदेसे ठिओ पडिमं ॥ ८ ॥

दुस्सिक्खियत्तणेणं गोसालो पुण सुगुंदपडिमाए । लिंगं दाऊण सुहे अपमत्तो अच्छइ सुणिव्व ॥ ९ ॥

तत्थवि पुव्वपवाहेण गामलोगेण जायकोवेणं । सुचिरं निस्सट्ठं ताडिऊण तो तंमि परिचत्ते ॥ १० ॥

पडु सालगाभिहाणे गामे तत्तो विणिक्खमेऊणं । सालिघणंमि जिणिंदो धम्मज्झाणं समारुहइ ॥ ११ ॥
 सालज्जानामेणं वंतरदेवी अकारणं कुविया । कुणइ विविहोवसग्गे तत्थेव ठियस्स जयगुरुणो ॥ १२ ॥
 सयमेव परिस्संता जाहे उवसग्गणेण सा पावा । ताहे पूयं काउं जहागयं पडिनियत्तत्ति ॥ १३ ॥
 उवसग्गकारगच्चिय परिस्सममुव्वहंति चोज्जमिणं । कीरंति जस्स सो पुण कत्थवि नो गणइ जयनाहो ॥ १४ ॥
 अह मुवणतिलयभूए सुविभत्तचउक्कचचारवसेहे । लोहग्गलंमि नयरे सामी पत्तो विहरमाणो ॥ १५ ॥
 तत्थ य राया दरियारिसूरनिहलणदंतरासिसिहो । जियसत्तू नामेणं मुवणपसिद्धो समिद्धो य ॥ १६ ॥
 तइया तस्स विरोहो जाओ पच्चंतराइणा सद्धिं । ताहे अपुव्वपुरिसो पेहिज्जइ चारपुरिसोहिं ॥ १७ ॥
 दिट्ठो य तेहिं सामिय पुट्ठोऽवि न देइ जाव पडिवयणं । रिउहरिउत्ति कलिऊण ताव गहिओ विमूढेहिं ॥ १८ ॥
 अत्थाणमंडवत्थस्स राइणो तक्खणं समुवणीओ । अह पुव्वविणिहिट्ठो उप्पलगो पेच्छउं सामी ॥ १९ ॥
 हरिसुक्करिससमुट्ठियरोमंचो वंदिऊण भत्तीए । भणइ नरिंद एसो न होइ भो चारिओ किं तु ॥ २० ॥
 सो एस जेण तइया आवरिसं कणगवारिधाराहिं । निव्ववियमत्थि जायगकुटुंबमिच्छाइरित्ताहिं ॥ २१ ॥
 सिरिधम्मचक्कवट्ठी सिद्धत्थमहानरिंदकुलकेऊ । पव्वजं पडिवन्नो सयमेव जिणो महावीरो ॥ २२ ॥
 किं वा सुरक्खयरनरिंदविंदवदिज्जमाणचरणस्स । एयस्स पुरा तुमए निसामिया नेव कित्तीवि ? ॥ २३ ॥

जइ मम वक्कं नो सद्देह ता उयह निउणदिट्ठीए । एयस्स चक्कयकुलिसकलसकमलंकिए पाणी ॥ २४ ॥

इय लद्धनिच्छएणं जियसत्तुनराहिणेण सविसेसं । सक्कारिऊण मुक्को गोसालेणं सह जिणिंदो ॥ २५ ॥

तओ पुरिमतालंमि नयरे गओ भयवं, ठिओ काउस्सग्गेणं, तत्थ य नयरे धणउच्च समिद्धिसंगओ तोणीरुव
मग्गणगणसाहारो मुणिच्च उभयलो गहिणपचित्तिपरो पयइसरलो पयइदक्खिन्नो निम्मलगुणहरिण-
वगुरासमो वगुरो नाम सेट्ठी, निरुवचरियेपेभायणं भद्दा नाम से भारिया, सा य वंझा, वहूण देवयाणं उवाइय-
सयाणि विविहोसहसयपाणाणि य पुत्तयनिमित्तेण काऊण परिस्संतत्ति । अन्नया सेट्ठिणा सह सिक्किगासमारूढा
सयणजणेण परियरिया विविहभव्वभोयणसमिद्धरसवइसणाहसूयारसमेया महया विच्छेडुणं निग्गया उज्जाणजत्ताए,
पत्ता नाणाविहविहगकुलकलरवमणहरं विचित्ततरुवरसुरहिक्कुमुपरिमलसुंदरं सगडमुहाभिहाणं उज्जाणं, तहिं च
सुचिरं सरोवरे जलकीलं काऊण पुष्पावचयं कुणमाणो वगुरो भद्दा य पेच्छंति जुणं खडहडियसिहरदेसं विह-
डियनिविडसिलासंचयं विणट्ठनट्ठलट्ठथंभसालानिचेसं देवकुलं, तं च पेच्छऊण पविट्ठाइं कोऊहलेण अब्भंतरे,
दिट्ठा य तत्थ सरयससिमुत्तिच्च अचंतपसंतसरीरा निराभरणावि भुवणमहग्घरयणभूसियव सस्सिरीया चिंतामणिच्च
दंसणमेत्तमुणिजंतपरममाहप्पाइसया फलिणीदलसामलच्छाया सिरिमल्लिजिणनाहपडिमा, तं च दट्ठूण वियंभिओ
तेसिं भावाइसओ, जाओ य एस अभिप्पाओ-जहा नूणं इमीए पडिमाए जारिसा कलाणुगया रुवलच्छी तारि-

सीए ण हवइ एसा सामन्ना, ता फलियव्वमियाणिं अम्ह मणोरहपायवेणंति चिंतिऊण एवं थोउमारद्दाइं—

अज्जं विहडियनिविडुहनिगड पविहाडिय [अज्ज परपवरसुगइ] मंदिरदुवाराइं ।

अज्जं चिय करकमलि लीण, सुहाइं संसारसाराइं ॥ १ ॥

अज्जं चिय तिहुयणसिरीहिं, अम्हि पलोइय नाह ! । जं तुह लोयणपहि गयउ, नासियदोसपवाह ॥ २ ॥

अहह अम्हेहिं तिक्खदुक्खोहसिहित्तगत्तिहिं, कह नाह ! तुम्ह पयमंडवंतरि ।

नहनिवहनिम्मलरयणकिरणजालसंछाइयंबरि ॥ ३ ॥

संपइ लद्धु निवासु फुड्डमरुपहिएहिं व देव ! । जं तुह दिट्ठं सुहकमलु, खालियकम्मवलेव ॥ ४ ॥

एवं च भत्तिसाराहिं सुसिलिद्धाहिं मणाणंददायिणीहिं गिराहिं हरिसुफुल्ललयणाहिं थोऊण पुणो पुणो नि-
डालतडताडियधरणिवट्ठाइं भणिउमाढत्ताइं—देव ! जइ एत्तो अम्ह दारगो वा दारिगा वा तुम्ह पसाएण होज्जा
ता इमं तुह भवणं कणथकलसकलियसिहरं थूरथंभाभिरामविसालसालापरिक्खत्तं कविसीसयसओवसोहिंयं पवर-
पागारसंपरिगहिंयं सुसिलिद्धावियसालभंजियासुंदरगोयराणुगयं कारवेमो, सयावि तुम्ह भत्तिपरायणाणि य
होमो, अणवरथं पूयामहिमं च विरएमोत्ति भणिऊण उज्जाणकीलं काऊण गयाणि सगिहं । अह तेसिं भत्तिपगरि-
सागरिसियहियथाए अहासन्निहियवाणमंतरीए देवयाए अणुभावेण आहूओ भदाए सेट्ठिणीए गन्मो, समुप्पन्नो

सेष्टिस्स पच्चओ, तथो तद्धिणाओ आरब्भ समारंभियं जिणमंदिरे कम्मंतरं, कओ अकालखेवेण जिनुद्धारो, तिसंझं च सुरहिंपच्चन्नकुमुभेहिं निम्मवेइ पूयं, पयद्दावेइ वरविळासिणीनट्टविहिं, वायावेइ मंजुगुंजंतसुरयसणाहं चउविह्हा-उज्जं, एवं च कुणमाणस्स वच्चंति वासरा ।

अन्नया य जिणचंदणवडियाए अणिययविहारेण परियडमाणा समागया सूरसेणा नाम सूरिणो, ठिया य सूरि-समुच्चियपएसे, सुत्तपोरिसीपज्जंते य गया मल्लिजिणाययणं, वंदिया देवा, उवविट्ठा उच्चियट्ठाणे, काउमारद्धा य भव्वसत्ताण धम्मदेसणा । एत्थंतरे पूयासामग्गिसणाहो समागओ वग्गुरसेट्ठी, जिणपूयं वंदणं च काऊण अल्लीणो सूरिसयासे, पणमियं चउणेण से पायपंकयं, दिन्नासीसो य आसीणो महीयले, गुरुणावि तज्जोग्गयाणुसारेण पारद्धा धम्मदेसणा । कहं चिय ?—

जिणनाहभुवणकरणं तप्पडिमापूयणं तिसंझं च । दाणंमि य पडिबंधो तिन्निवि पुन्नेहिं लब्भंति ॥ १ ॥

नीसेससोक्खतरुवीयमूलसुदामदुग्गइकवाडं । कारिंति मंदिरं जिणवरस्स धन्ना सचिभवेणं ॥ २ ॥

तुहिणगिरिसिंगसंगारहारि जे निम्मवंति जिणभवणं । ते कह न लीलाएच्चिय चिंतियमत्थं पसाहिंति? ॥ ३ ॥

सामन्नेणवि जिणगेहकारणे को मिणिज्ज पुन्नभरं? । को पुण तंमिं विहिणा जिन्नंमि समुद्धरिज्जंते ॥ ४ ॥

ता भो महायस ! तए नियमा सम्मं समायरियमेयं । समुयजियदच्चेणं जिनुद्धारो जमेसकओ ॥ ५ ॥

एयंमि अकीरंते तित्थुच्छेओ जिणे अभत्ती य । साहूणमणागमणं भव्वाणमवोहिलाभो य ॥ ६ ॥
 काराविण् इमंभी भवजलनिहितरणजाणवत्तंमि । अचंतसंतकंता कारेअवा जिणप्पडिमा ॥ ७ ॥
 तीसे तिसंझमपमत्तमाणसेहिं परेण जत्तेणं । पूया य विरइयवा सा पुण अट्टपयारेवं ॥ ८ ॥
 चासकुसुमक्खएणं धूवपईवेहिं वारिपत्तेहिं । फलभोयणभेएहि य जणनयणाणंदजणगेहिं ॥ ९ ॥
 इय अट्टविहा पूया कीरंती भत्तीए जिणिंदाणं । तं नत्थि नूण कल्लणमेत्थ जं नो पणामेइ ॥ १० ॥
 तथाहि-हरियंदणघणसारुभवेहिं गंधेहिं सुरहिगंधेहिं । सब्बणुसिरे निहिएहिं होति भवा सुरहिदेहा ॥ ११ ॥
 नवमालइकमलकयंबमल्लियापमुहकुसुमदामाहिं । विरयंता जिणपूय धरंति भवा सिवसुहं च ॥ १२ ॥
 नहरुइजलपडिहत्थे जिणपयच्छेत्ते जमक्खया खित्ता । पसवंति दिव्वसुहसस्ससंपयं तं किमच्छरियं ? ॥ १३ ॥
 घणसारारुरुधूवो जयगुरुपुरओ जणेण डज्झंतो । उच्छलियधूमपडलच्छलेण अवणेइ पावं च ॥ १४ ॥
 जे दीवं दैत्ति जिणिंदमंदिरे सुंदराय भत्तीए । ते तिहुयणमुवणब्भंतरेक्कदीवत्तणसुविंति ॥ १५ ॥
 तिहुअणपहुणो पुरओ ठवैत्ति जं वारियुन्नपत्ताइं । तं नूणं पुव्वज्जियहुहाण सलिलं पयच्छंति ॥ १६ ॥
 परिपागवससमुगयविसिट्ठगंधेहिं तरुवरफलेहिं । जिणपूयं कुणमाणा लहंति मणवंछियफलाइं ॥ १७ ॥
 चहुभक्खवंजणाउलओयणचरुपागपमुहवत्थूहिं । घन्ना विरइंति वल्लिं सुहनिहिउक्खणहेउत्ति ॥ १८ ॥

अहवा किमिति एणं ? जं किंचिवि अत्थि वत्थु सुपसत्थं । तित्थेसराण तं तं विणिओगे निति कयपुत्ता ॥ १९ ॥
 दाणमवि सुगइसंगमनियाणमनियाणमेव दिज्जंतं । पुत्ताणुवंधिरूवं कल्लाणपरंपरं जणइ ॥ २० ॥
 तं पुण तिविहं भणियं अभयपयाणं च नाणदाणं च । धम्मपवत्ताणं पुण तइयमुवट्ठंभदाणं च ॥ २१ ॥
 तत्थाभयप्पयाणं लोइयलो गुत्तरेसुवि पसिद्धं । सद्वावत्थासुपिवि अनिसिद्धं सिद्धिरिसियाणं ॥ २२ ॥
 करिसणमिव कणरहियं नरनाहंपिव विवेयपरिहीणं । एयविउत्तं धम्मं न कयाइ बुहा पसंसंति ॥ २३ ॥
 जं पुण नाणपयाणं दीवोच्च पयासयं तमत्थाणं । भवजलहिपडियजंतूण तारणे दढतरंडसमं ॥ २४ ॥
 उम्मगगपयट्ठाणं च विसममिच्छत्तभीमरत्नंमि । सम्मग्गदेसयं सिवपुरीए वरसत्थवाहोच्च ॥ २५ ॥
 तइयं पुण भेसहवत्थपत्तकंवलगपमुहद्वेहिं । साहूण धम्मनिरयाण होइ उवट्ठंभकरणेण ॥ २६ ॥
 जं ते महाणुभावा कह दूरविमुक्कसवसावज्जा । संकति तवं काउं आहारार्इण विरहंमि ? ॥ २७ ॥
 एत्तियमेत्तेणं चिय गिहिणो लंघंति गुरुभवसमुदं । उवयोरे जं असणाइएहिं वट्ठंति साहूणं ॥ २८ ॥
 धणसत्थाहिचसेयंसमूलदेवाइणो य जयपयडा । दिट्ठता निहिट्ठा इत्थं सिद्धंतपुपसिद्धा ॥ २९ ॥
 इय भो देवाणुपिया ! तिन्नि पयत्था मए तुह पसत्था । परिकहिया एएसिं पढमो तुमए सयं विहिओ ॥ ३० ॥
 अन्ने पुण सावगधम्मकुसलबुद्धीहिं जंति काउं जे । सद्धानानाणसारं ता गिहिधम्मं पवजेसु ॥ ३१ ॥

इय गुरुणा निदंसिए वत्थुपरमत्थे जायपवरविवेगो पणमिऊण गुरुणो पयंपकयं सेढी वागरिउं पवत्तो-भयवं !
 सुहु वोहिओऽहं तुम्हेहिं, उवदंसेह मे सावगधम्मं, सिक्खवेह जुत्ताजुत्तं, तओ सूरिणा भयप्पभेयसाहासहस्ससं-
 कुलो सुहफलोहकलिओ कहिओ वित्थरेण गिहिधम्मकप्पहुमो, पडिवन्नो य भावसारमणेण । तप्पभिइं च अट्ठप्प-
 यारजिणपूयारओ मुणिदाणसमुज्जयचित्तो सावगतं पालेइ । पसूए पुत्ते सविसेसं धम्मपरिवत्तो जाओत्ति ।

अन्नया सो पंडुरपरिहियपडो कुसुमाइसमग्गसामग्गीसणाहो सयलपरियणसमेओ पयट्ठो मल्लिजिणपडिमापूय-
 णत्थं, इओ य तवेलं भयवंतं महावीरं नगरस्स सगडमुहुज्जाणस्स य अंतरा पडिमं पडिवन्नं ओहीए आभोइत्ता ईसाण-
 सुरनाहो अणेगसुरकोडिपरिवुडो पंचरायरयणविणिम्मियविमाणारूढो आगंतूण तिवखुत्तो आयाहिणपयाहिणपुरस्सरं
 सहस्सरिंसं वंदिऊण अन्नोन्नघडियपाणिसंपुडो भयवओ चरियं गायमाणो सामिणो वयणंमि दिन्नदिट्ठी पल्लुवासमाणो
 चिट्ठइ, वगुरसेट्ठीवि भयवंतमइक्कमित्ता चलिओ मल्लिजिणाययणाभिमुहं, तं च वच्चंतं ईसाणिंदो पासित्ता भणइ-
 भो वग्गुर ! दूरयरदेवा सच्चोवाया हवंति(त्ति) सच्चो कओ तुमए लोयप्पयाओ, जं पच्चक्खं तित्थगरं मोत्तूण पडिमं
 अच्चिउं वच्चसि, किं न सुणासि जं एस विसमभवावत्तनिवडंतंभुवणत्तयसमुद्धरणधीरो सिरिमहावीरो सयमेव इह चिट्ठ-
 इत्ति ? , तओ सेढी एवं निसामिऊण जायअतुच्छपच्छायाओ मिच्छामिदुक्कंडंति भणिऊण तिपयाहिणादाणपुवं जिणं
 वंदइ महिमं च करेइ, सुचिरं च पल्लुवासिऊण जहागयं पडिनियत्ते सुरिंदे मल्लिजिणभुवणंमि वच्चइ ।

जयगुरुवि तत्तो निखलमिता पट्टिओ तुन्नागसन्निवेशाभिमुहं तस्स य अंतरा तल्लपरिणिग्याणि चह्वराणि स-
पडिजुत्तमिति, ताणि पुण दोणिवि टप्परकन्नपुडाणि मज्जराणुरुवनयणाणि अइलंमोद्वपोट्टाणि दीहरकंधराणि
कसिणकुसंठाणसरीराणि अहरसीमासमइकंतदीहरदंताणि, गोसालो पेच्छिऊण जायपरितोसो सहासं भणइ-अहो
भमिओऽम्हि पउरजणवएसु नियधम्मगुरुपसाएण, एत्तिक्कालं परियडंतेण एरिसो संजोगो न कत्थवि पलोइओ ।

ता नूणं—

तत्तिच्छो विहिराया जणेऽइदूरेवि जो जहिं वसइ । जं जस्स होइ सरिसं तं तस्स दुइज्जयं देइ ॥ १ ॥

एवं च पुणो पुणो पुरा ठाऊण समुल्लवित्तो जाव न कहंषि विरमइ ताव तेहिं चाढं पिट्टिऊण वद्धो पक्खित्तो
य वंसीकुडंगे, तत्थ य उत्ताणो निवडिओ अच्छइ, महया सदेण य वाहरइ, जहा-सामि ! कीस मं उवेक्खह ?,
एसोऽहं एत्थ वंसकुडंगे निवडिओ वट्टामि, सच्चहा मोअह इमाओ वसणाओत्ति पुणो पुणो उल्लवंतं तं सो सि-
द्धत्थो पडिभणइ-भइ ! संयं कडं संयं चेव भुंजाहि, किं सुहा परितप्पसि ? , सामीवि अदूरदेसं गंतूण करुणाए चिर-
समसुहदुक्खसहणपक्खवाएण तं पडिवाल्लिउमारद्धो, एत्थंतरे तेहिं नायं, जहा-एस कोइ दुट्ठसीलो एयस्स देवज्ज-
गस्स पीडियावाहगो छत्तधारगो वा होही, तेण एस एयं पडिवालेमाणो निचलो अच्छइ, ता न जुत्तं एयस्स
धरणंति चित्तिऊण मुक्को गोसालो, मिलिए य तंमि गंतुं पवत्तो जयगुरु । कमेण य पत्तो गोभूमिंमि, तत्थ य

सुलभचरणपाणियत्तणेण गावीओ चरंति, तेण सा गोभूमी वुच्चइ । तत्थ य कलहपियत्तणेण गोसांलो गोवालए भणइ-अरे मिलिच्छा ! जुगुच्छणिज्जरूवा ! एस मग्गो कहिं वच्चइ ?, गोवेहिं भणियं-अरे पासंडिया ! कीस अम्हे निक्कारणं अक्कोसेसि ?, सो भणइ-दासीपुत्ता ! पसुयपुत्ता ! जइ न मरिसिहिह ता सुहुअरं अक्कोसिस्सामि, किं अलियमेयं ?, मिच्छजाइया एसिगा चेव तुब्भे, किं जहट्ठियंपि न भणिस्सामि ?, को मे तुम्ह पडिभओत्ति, तओ तेहिं ससुण्णन्नगाढकोवेहिं मिलित्ता पण्हमुट्ठिलेइहिं विहवित्ता बद्धो वंसीगहणे य पक्खित्तो, तत्थवि पुव्वनाएण करुणाए पहियजणेण विमोइयंमि गोसाले तिहुअणगुरू रायगिहे नयरे अट्टमवासारत्तं काउसुवसंपज्जइ, विचित्ताभि-ग्गहसणाहं च चाउम्मासखमणं आरंभेइ । तस्स पज्जंते बहिया आहारगहणं कुणइ ।

तओ अणिज्जरियं अज्जवि बहुं कम्मं अच्छइत्ति चिंतिऊण पुणोऽवि सामी अत्थारियादिट्ठतं परिभावितो कम्मनिज्जरणनिमित्तं अचंतपावजणसंगएसु लाढावज्जभूमिसुद्धभूतिनामेसु मिलिच्छदेसेसु गोसालेण समेओ विहरिओ । तत्थ य ते अणारिया कयाइ असुणियधम्मक्खरा निरणुकंपा लोहियपाणिणो परमाहम्मियासुरसरूवा भयवंतं विहरमाणं पासित्ता हीलंति निंदंति तहाविहण्यारेहिं विहवित्ति, साणादओ य दुट्ठसत्ते सामिस्स अभिमुहं सुयंति । अवि य-जह पविरेयणतणुतयत्तच्छणखारोवलेवपामोक्खं । किच्छविगिच्छं विज्जं कुणंतमभिणंदए रोगी ॥ १ ॥

तह जयनाहोवि समग्गमुग्गउवसग्गकारयं लोयं । उवयारिवंधुबुद्धीए बंधुरं पेहइ पहिड्डो ॥ २ ॥

जेण दरंगुठविकिहुमेरुविस्सुलं धरावडुं । हलहलियसत्तकुलसेलसाथं विरइयं सिसुणा ॥ ३ ॥
 सोवि कह अतुलबलसारविक्रमो निक्खिंवेण कम्मेण । कीडप्पायकयावयमहह सहाविज्जइ जिणिंदो ? ॥ ४ ॥ जुम्मं ।
 किंच-जो हरिणा सिद्धत्थो आवयविणिवारणट्ठया मुक्को । गोसालगपच्चुत्तरवेलाए वियंभई सोवि ॥ ५ ॥
 अन्नं च-जइ किर तिलोयरंगे अतुल्लमल्लोऽवि जिणवरो वीरो । एवंविहावयाओ विसहइ सुपसंतचित्तेण ॥ ६ ॥
 ता कीस थेवमित्तावधारकरुणुज्जएऽवि लोयंसि । मुणियजहट्ठियभावा वहंति रोसं महासुणिणो ? ॥ ७ ॥ जुम्मं ।
 अहवा चुन्निज्जइ थेवघायमेत्तेवि सक्करालेडू । निट्ठुरकालायसघडियदुधणघाएहिं नवि वहरं ॥ ८ ॥
 अह तिहुयणेक्कनाहो अणज्जभूमीसु तासु हिंडंतो । पत्ते वासारत्ते नवमेऽनवमासयविहाणे ॥ ९ ॥
 वसहिं च अलभमाणो सुन्नागारेसु रुक्खमूलेसु । धम्मज्झाणाभिरओ वरिसायालं अइक्कमइ ॥ १० ॥ जुम्मं ।
 वित्ते य तम्मि सामी सिद्धत्थपुरमागओ, तत्तोऽवि कुम्मारगामं संपट्ठिओ, तस्स य अंतरा तिलच्छित्तसमीवेण
 बोलेमाणो पुच्छिओ गोसालगेण सामी-एस तिलत्थंनो किं निप्फज्जिही नवत्ति ?, तओ तहाभवियवयावसेण
 समयमेव भणियं जिणेण-भइ ! निप्फज्जिही, परं सत्तवि पुप्फजीवा उद्दाएत्ता एयस्स चेव तिलत्थंनस्स एगाए तिल-
 संगलिगाए सत्त तिला समुवज्जिस्संति, एयं च असहहमाणेण अणजेण तेण अवक्कमिता मूलावणद्धभूमिलेड्डुसणाहो
 समुप्पाडिओ सो तिलत्थंनो, एगंते उज्झिओ य, एत्थंतरे अहासंनिहियदेवेहिं भयवओ वयणमवितहं कुणमाणेहिं

विडविद्या घणावली, जायं सलिलवरिसं, समासासिओ तिलथंबओ, तेण पएसेण वेगेण आगच्छमाणीए गावीए खुरेण चंपिय मूलविभागो पविट्टो जलसेयसुकुमारं धरणिवट्टे, जाओ दढपइट्ठाणो, कमेण परूढाईं मूलाईं, उस्मीलियाईं कंदलाईं, पयट्टो फुल्लिउंति । भयवं पुण कुम्मारगामनगरं संपत्तो, तस्स बाहिं सूरमंडलस्सुवरिं निहियदिट्ठी उद्धी-कयभुयपरिहो दीहरजडाकडप्पो पयइविणीओ पयइपसमपरो पयइदयादक्खिणणाणुगओ समारद्धसद्धम्मज्झाणवि-हाणो वेसियायणो नाम लोइयतवस्सी मज्झंदिणसमयंसि आयावेइ । तस्स य उप्पत्ती भन्नइ—

मगहाविसए धणधन्नसमिद्धलोयकलिए गोन्बरगामे आभीरलोयाणं अहिवाई गोसंखीनाम कुडुंबिओ, बंधुमई नाम से भज्जा, सा य अवियाउरी, ताणि य परोप्परं दढसिणेहाणुरायाणि विसयसुहमणुहवंताणि कालं वोलेति, इओ य तस्स गामस्स अदूरे खेडयं नाम संनिवेशो, तत्थ य अविगप्पिया सन्नद्धवद्धकवया पउरपहरणसणाहा मिलेच्छाण धाडी पडिया, तीए य सो गामो निवाडियारक्खिगजणो लुट्टियधणधन्नकंसदूसो विणिहयपहरणहत्थसुहडसत्थो कओ, तओ बंदिग्गेण लोगं गहिऊण पट्टिया सट्ठाणं, एगा य गामइत्थिया तवेलं पसूया पईमि मारिए करक-लियवाल्या सुरूवत्तिकाऊण चालिया चोरोहिं, सा य चेडवावडकरत्तेण न पारेइ सिग्घगईए समागतुं, तओ तेहिं सरोसं भणिया—भहे ! परिच्चयसु सुयं जइ चिरजीवियत्थिणी, इमं च सुणिऊण अइगरुययाए मरणभयस्स परिचत्तो तीए सुओ तरुच्छागाए, गया य चोरोहिं समं, सो य गोसंखिओ गोरूवाइं धेत्तूण पहायसमए समागओ तं पएसं,

दिद्वो य सो रुक्खच्छायाए पडिपुन्नसंवंगोवंगो सस्सिरीओ अक्खयसरीरो चालओ, गहिओ य तेणं, पणामिओ नियभज्जाए, भणिया य एसा-पिए ! एस तुह अपुत्ताए पुत्तो होही, सम्मं रक्खिज्जाहि, गोसे य पणासियं जहा मम महिला गूढगन्भा आसि, सा य संपयं पसूया, दारगो से जाओ, एयस्स चैव अत्थस्स निच्छयनिमित्तं छगलकं वा-वाइत्ता लोहिगंधो कजो, सा य सूइयनेवत्थेण ठाविया, वद्धावणयं च विहियं, सम्माणिओ सयणवग्गो, पसारिया लोयम्मि वत्ता, निवत्तियाइं छट्ठीजागरणचंदसूरदंसणियमुहाइं किचाइं, समुचियसमए ठवियं वेसियायणोत्ति नामं, कालक्कमेण य पत्तो जुव्वणं, सावि से जणणी चंपाए नयरीए नेऊण चोरोहिं विक्कयनिमित्तं ओड्डिया रायमग्गो, सुरू-वत्तिकाऊण गहिया थेरीए वेसाए, सिक्खाविया गणियाण वेज्जं । अविग्र—

सुरविलयवमहियविसिट्ठरूवसोहगपवरलायन्ना । सुरयण्पंचंछुसला वियक्खणा गेयनेट्ठेसु ॥ १ ॥

उवयारभणियपरिचत्तबोहसमयाणुरूवचेट्ठासु । पत्तट्ठा सा जाया लद्धपसिद्धी य नयरीए ॥ २ ॥

दंसणमेत्तेणं चिय जणस्स पुवं जणेइ विक्खेवं । किं पुण उव्भडसिंगारसारनेवत्थरुहरा सा ? ॥ ३ ॥

इओ य सो वेसियायणो अत्थोवज्जणनिमित्तं कोरेइ विविहयाणिज्जाइं, अन्नया य घयस्स सगडिं भरिऊण वयं-सएहिं समेओ गओ चंपानयारिं, तम्मि य समए समारद्धो पुरे महुसवो, पवराभरणरुहरदेहा नियंसियपहाणपट्ठणु-ग्गयचीरंसुयाइवत्था जहिच्छं तियचउक्कचचेरेसु रामाजणेण परिगया विलसंति नायरा, ते य दट्ठूण चित्तिथमणेण-

अहो एएं एवं विलसंति, अहंपि न कीस रमेमि?, ममावि अत्थि केत्तिथमेत्तावि अत्थसंपया, किं वा इमीए रक्खि-
याए?, धम्मट्ठाणदाणभोगोवभोगफलं हि पसंसिज्जइ धणं । जेण भणियं—

दानं भोगो नाशस्तिन्नो गतयो भवन्ति वित्तस्य । यो न ददाति न भुङ्के तस्य तृतीया गतिर्भवति ॥ १ ॥

देवात्कथमपि जाते सति विभवे यस्य नैव भोगेच्छा । दाने च न प्रवृत्तिः स भवति धनपालको मूर्खः ॥ २ ॥

इति परिभाविऊण कओ अणेण सिंगारो, परिहियाइं पहाणवत्थाइं, गओ पेच्छणगे, दिट्ठा य वेसाजणमज्झ-
गया सच्चिय पुच्चमाया, जाओ तीए उवरिमणुरागो, वियंभिओ से पंचवाणोऽवि सहस्सवाणोच्च मयरद्धओ, सम-
प्पियं तंवोलदाणपुच्चगं से गहणगं, रयणिसमए घणसारुम्मिस्सचंदणरसविलित्तगतो केसपासविणिम्मियकुसुमदामो
गहियंतवोलवीडओ पयट्ठो तीसे गिहाभिमुहं, एत्थंतरे तत्स कुलेदेवया चित्तेइ—अहो अमुणमाणो परमत्थं अकज्जमा-
यरिउं लग्गो एस वरागो, ता संबोहेमिति विभाविऊण अंतरा सवच्छगाविरूवं विउच्चित्ता ठिया, वेसियायणस्सवि
सिग्घं गच्छमाणस्स लित्तो अमेज्जेण चलणो, जाया से आसंका जहा असुइत्ति, तओ अन्नं विसोहणं किंपि अपाव-
माणेण तेण तीसे चेव गावीए सन्निहंमि निविट्ठस्स वच्छस्स पट्टीए पारद्धं चलणलूहणं,

तयणंतरं स वच्छो माणुसभासाए पडिभणइ गाविं । अम्मो! पेच्छसु एयं विगयासकं ममंगंमि ॥ १ ॥

मिज्झविलित्तं चलणं लूहन्तं चत्तधम्मववहारं । किं कोइ कुणइ कइयावि सुरहिसुए एरिसं हीलं? ॥२॥ जुम्मं ।

गावी वागरइ तओ पुत्तय ! मा वहसु अद्धिइं किंपि । अइधम्मववहारा वाहिरो वट्टए एसो ॥ ३ ॥
 वच्छेण भणियम्ममे ! कहमेवं ? पुत्त ! कित्तिं कहिमो ? । नियजणीएवि समं जो वासं वंछइ अणजो ॥ ४ ॥
 ता वच्छ ! सहसु सबं तं धन्नो एत्तिएण जं मुक्को । उब्बियनियमज्जाया किमकजं जं न कुवंति ? ॥ ५ ॥
 तावच्चिय तत्तरुइं तावच्चिय धम्मकम्मपडिंवंधो । लोयाववायभीरुत्तणं च तावेव विप्फुरइ ॥ ६ ॥
 तावज्जवि न चिणस्सइ लज्जा जणणी गुणाण सयलाणं । अह साविकहवि नट्ठा ता नट्ठा कुसलचेट्ठावि ॥ ७ ॥ जुम्मं !
 इय सुराहिं साभिप्पायवयणसंदोहमुल्लवेमाणिं वच्छस्स पुरो दट्ठुं सो सहसा संकिओ हियए, चित्तिउमारद्धो य-
 अहो पढमं ताव इमंपि महअच्छरियं जं तिरिच्छजोणिया होऊण माणुसियाए भासाए संलवइ, तत्थवि नियमाया-
 भिगमलक्खणं दूसणं मे दंसेइ, कहमेवं संभवइ ? कत्थ मम माया ? कत्थ अहं ? कहां संवासो ? , सबं अचंतमघडंत-
 मेयं, अहवा होयवमेत्थ कारणेणं, चित्तरूवाइं विहिणो विलसियाइं, संभवइ सबं, अओ पुच्छिस्सामि तं चेव
 वेसाविलयं उट्ठाणवडियंतिभाविऊण गओ तीसे वरं, अब्भुट्ठिओ अणाए दावियं आसणं पक्खालिया चरणा ठियाइं
 खणंतरं अवरोप्परुल्लावेण, अह पत्थावमुवलम्भ पुच्छिया सा अणेण-भेइ ! साहेसु कत्थ तुमह उप्पत्ती ? तीए
 सहासं भणियं-जत्थ एत्तिजणस्स, तेण भणियं-अलाहि परिहासेण, अहं सकजं पुच्छामि, तीए भणियं-मुद्धो-
 ऽसि तुमं, जेण-

नरह नरिंदह रिसिकुलह वरकामिणिकमलाहिं । अनुगमणु न पुच्छिग्रह कओ कुसलत्तणु ताह ? ॥ १ ॥

पंकात्तामरसं शशाङ्कमुदधेरिन्दीवरं गोमयात्, काष्ठादग्निरेहः फणादपि मणिर्गोपिततो रोचना ।

कौशेयं कुमितः सुवर्णसुपलाद्दूर्वापि गोलोमतः, प्राकाश्यं स्वगुणोदयेन गुणिनो गच्छन्ति किं जन्मना ? ॥ २ ॥

अओ किं तुह एएणंति भणिऊण हावभावखवं महिलाविब्भमं दंसिउमारद्धा, तोहे तेण भणियं-अन्नपि एत्तियं मोछं दलयिस्सामि साहेहि मे सब्भावं, अइगरुयसवहसावियाऽसि तं, मा अलियमुल्लविस्ससित्ति भणिए जहा-वित्तं मूलाओ आरब्भ सवं सिट्ठमेयाए, तहावित्तंतनिसामणेण य जाया से आसंका, जइ पुण एयाए जो तरुच्छा-गाए छड्ढिओ सो अहं चेव होजा, एवं च सुरहिवयणं पि घडेज्जा, इमं च परिभाविऊण दुगुणमत्थपयाणं काऊण पडिनियत्तो जाव तत्थप्पएसे सवच्छं सुरभिं निज्झाएइ ताव न किंपि पेच्छइ, तओ नायमणेणं-नूणं अहं केणइ देवयाविसेसेण इयवइयेरेण अकज्जमायरंतो नियत्तिओऽम्हि । अह सगडिं घेतूण गओ नियगामं, उचियपत्थावे अम्मापियरो उट्ठाणपारियावणियं अत्तणो पुच्छिउमारद्धो, ताणि य कहेंति-पुत्त ! अम्ह कुच्छिसंभूओऽसि तुमं, मा अन्नहा विकर्प्पेसु, को परडिंभरूवाइं परिपालेइ ?, तओ सो गाढनिब्बंधेण ताव अणसिओ ठिओ जाव से तेहिं कहियं, जाओ तस्स जणणित्ति निच्छओ, गयो य चंपानयरिं, साहिओ तीसे गणियाए बुत्तंतो, जहाऽहं सो तुह पुत्तो जो तरुमूले उज्झिओत्ति । तओ सा एवमायन्निऊण सुमरियपुववइयरा विरहदुक्खेण अकज्जपवित्ति-

पारंभसमुल्लवियसवियारवयणविलिएण वाढमन्माहया समाणा उत्तरिजेण वयणकमलमवगुंठिऊण दीहरुम्मुक्कपो-
क्कारं रोइऊण विलवित्तं पवत्ता । कहां चिय ?—

हा पाव दइव निग्घण निछज्जाणज्ज ! सुक्कमज्जाय ! । किं अन्नो तुह नाही विडंवणाडंवरपवंचे ? ॥ १ ॥
जं कुलविलयामलिणत्तकारिणा उभयलोगदुट्टेण । वेसाभावो विणिम्मियऽम्भिह सुकुलप्पसूयावि ॥ २ ॥
तत्थवि न ठिओ तं एत्तिएण वडिअम्भिह नियसुएणावि । हा हा गरुयमकज्जं सत्थेसुवि सुम्मइ न एवं ॥ ३ ॥
जइ पुवं चिय पावेहिं तेहिं चोरेहिं विणिहया हुंता । ता किं असच्चमविगोवणिज्जमिमज्ज पेच्छेज्जा ? ॥ ४ ॥
किं कूवयपक्खेवेण अहव उल्लंघणेण सोहेमि । सासनिरौहेणं वा लहुं समुज्झामि अत्ताणं ॥ ५ ॥
एवं चिय मेरुगिरिंदविन्ममाओ इमाओ दुक्खाओ । पावाए मज्झ नूणं होही संपइ परित्ताणं ॥ ६ ॥
इय दुस्सहदुहकरत्तगाढफालिज्जमाणहियया सा । अइसुचिरं विलवित्ता निमीलियच्छी गया सुच्छं ॥ ७ ॥

तारिसं च दट्टूण वेसियायणेण सित्ता सीयलसल्लेण वीजिया दुगुलंचलेण संवाहिया पासच्चत्तिणा चेडीजणेण,
कह कहवि लद्धचेयणा संभासिया अणेण—अम्मो ! कीस तावसंभारसुवहसि ? , को एत्थ तुज्झावराहो ? , एसो
चिय सच्छंदाणिबद्धघडणविहडणरसिगो दइवो एत्थावरज्झइ जो विविहसंविहाणगनेवत्थेहिं नडं व विवसं माणुसं
विनडेइ, अचंतविरुद्धमवि वत्थुं कारवेइ, अगम्मेणवि सह संगमं संपाडेइ, ता उज्झसु संतावं पडिबज्जसु धीरत्तणं

होसु निवडियसहा, तीए भणियं-पुत्त ! बाढं असहणिज्जमगोवणिज्जं च इममावडियं, इमं च संभरंती वज्जगंठिनि-
 दुरहियत्तणेण चैव जीवामि, न पुण अन्नं किंपि दुज्जम्मजायाए मज्झ जीवियंकारजं, संपयं पुण वच्छ ! वंछामि
 अतुच्छवच्छसाहासमुल्लवणाइणा सकुलकलंकभूयं जीवियं परिचइउं, अओ अणुमन्नेसु मं, तुमं चैव इयाणिं पुच्छणिज्जो,
 तेण भणियं-अम्मो ! अलं दूरज्झवसाएण, इओ मए वेसाहत्थाओ मोइया समाणी तवनियमेहिं अत्ताणं अत्ताणं
 साहेज्जासि, अपत्तकालजीवियवरोवणं हि दूसियं समयसत्थेसुत्ति संठविऊण वहुदवदाणपुव्वगं मोइया सा वेसासया-
 साओ, नीया सग्गामे दावियं जीवणं ठाविया धम्ममग्गंमि, अन्नया इममेव वेरगमुव्वहंतो सो चित्तिउं पवत्तो, जहा-

तिव्वाववायजलवाहुलंयणिज्जं, दोगच्चमच्चुमयरज्झसभीममज्झं ।

संसारसायरमिमं परियाणइत्ता, सत्ता सुहेण निवसंति कहं व गेहे ? ॥ १ ॥

जे इत्तिंयपि न सुणंति किमज्ज होही, सोक्खं व दुक्खमुचियं व तेहेयरं वा ।

संसेवणिज्जमिममन्नयरं च मोहमाहुप्पझंपियपहाणविवेयनेत्ता ॥ २ ॥ जुम्मं ।

किंच-कालंमि तंमि बहुला जइ नो कहेज्जा, संभोगदुव्विलसियं जणणीगयं मे ।

ता तारिसं दढमकज्जमहं करेत्ता, तिवानलेणवि लभिज्ज न नूण सुद्धिं ॥ ३ ॥

एवंविहाण विविहाण विडंवाणं, भोगाभिलासमहमेक्कमेवमि मूलं ।

ता होउ संपइ इमेण दुगुंछिएणं, सबोवहाविरहियं पकरेमि धम्मं ॥ ४ ॥

इति निब्बिऊण बहुप्पयोरहिं गोसंखियं जणणिं च पडिवज्जाविकुण पाणामाए पव्वजाए पव्वइओ एसो, करेइ विविहे तवोविसेसे, अब्भसेइ निययधम्मसत्थाइं, रक्खेइ पाणिणो, पज्जुवासेइ गुरुणो, लद्धट्ठो य जाओ निययधम्ममग्गंमि । अब्भया सो विहरंतो कुम्मारागामवाहिं ठिओ आयावेइ, एसा वेसियायणस्स उप्पत्ती ॥

तस्स य जडाजूडाओ दिणद्धदिणमणिकिरणपरितत्ता निवडंति धरणीअले जूयानियरा, सो य जीवाणुकंपयाए निवडियमेत्ताओ करेण गिणिहऊण खिवइ जडामउडे, इओ य तेणंतेणं भगवया समं गच्छंतो गोसालो तं दट्ठूण अणत्थसीलयाए ओसरित्ता महया सहेण वागरेइ-भो भो किं भवं सुणी मुणिओ उयाहु जूयासेजायरो?, इत्थी पुरिसो वा?, न सुणिज्जसि सम्मं, अहो ते गंभीररुवत्तणं, एवं च भणिए खमासीलयाए जाव वेसियायणो न किंपि जंपेइ ताव दुव्विणयरसिगत्तणेण तिन्नि वाराओ पुणो पुणो पुच्छिओ गोसालगेण ।

अह तस्स पसमसीलत्तणुणोऽविहु दुट्ठवयणमहियस्स । अइघट्ठचंदणस्सव वियंभिओ तिच्चकोहग्गी ॥ १ ॥

तो तेणुब्भजालाकंलावपसरप्परुद्धगयणयला । गोसालगदहणत्थं तेउल्लेसा विणिस्सिद्धा ॥ २ ॥

एत्थंतरे जिणेणं तीसे विज्झवणपचला झत्ति । गोसालगरक्खक्खा सीयल्लेसा पडिबिमुक्का ॥ ३ ॥

अह तीएँ तेउलेसा बाहिरओ वेढिया समंतेण । सिग्घं चिय विज्झाया हिमबुढीएव जलणकणा ॥ ४ ॥

ताहे तिलोक्कपहुणो अणणुरूवं वियाणिउं रिद्धिं । सो खामिउं पवत्तो इमाहि वग्गूहिं विणयणओ ॥ ५ ॥

भयवं ! न नायमेवं जह सिस्सो तुम्ह एस दुस्सीलो । इणिंह चिय सुणियमिमं ता इणिंह खमह अवरहं ॥ ६ ॥

इमं च जंपमाणं वेसियायणं दट्ठण गोसालगेण भणियं-भयवं ! किमेस जूयासेज्जायरो उम्मत्तोव पलवइ ? भय-
वया भणियं-भइ ! जया तुमए मम पासाओ ओसरित्ता एसो एवं भणिओ, जहान्किं तुमं सुणिमुणिओ इच्चाइ,
तया पढमवेलाए सहित्ता ठिओ, पुणो तुमए भणिओ समाणो तुज्झ दहण्डयाए उगगं महापमाणं सलिला-
इसिसिरवत्थुणावि अप्पडिहयसामत्थं तेउल्लसं निसिरइ, सा य जावज्जवि तुह देहदेसं ईसि न पावइ ताव मए तप्प-
डिघायनिमित्तमंतरा ताराहिवहिमसिसिरा सीयलेसा पक्खित्ता, तप्पभावेण य तुह सरीरं तहट्ठियं दट्ठण उवसंह-
यकोवविद्यारो ममं पडुच्च एवं भणिउं पवत्तो-भयवं ! न सुणिओ तुज्झ एस सिस्सो, ता मरसियवो मम दुव्विण-
उत्ति । इमं च आयन्निऊण गोसालगो भयसंभंतो भयवंतं भत्तीए पणमिऊण भणइ-कंहं नं भंते ! तेउल्लेसालद्धो
हवेज्जा !, भयवया बुत्तं-जे णं गोसालया ! छट्ठुछट्ठुणं निरंतरेणं तवोक्कम्मेणं आयावेइ, पारणगदिवसे य सनहाए
लुक्खलुक्कम्मासमुढीए एगेण य सलिलबुलुगेणं जावेइ जाव छम्मासा, तस्स विउला तेउल्लेसा संपज्जइत्ति । इमं च
तव्विहाणं सम्ममवधारियं गोसालगेणं ।

अन्नया य सामी कुमारगामनयराओ सिद्धतयपुरंमि संपट्टिओ, संपत्तो य पुच्चभणियतिलथंवपएसं, तओ पुच्छिओ गोसालगेण भयवं-सो तिलथंवो मन्ने न निप्फन्नो होजा?, भगवया भणियं-भद! मा एवं उल्लेखसु, निप्फन्नो चैव सो असुगप्पएसे वट्ठत्ति तुत्ते गोसालो भयवओ वयणमसदहंतो गंतूण तस्स एगंते निहितस्स तिल-थंवस्स तिलसंगलियं हत्थेण फोडित्ता तिले पत्तेयं गणमाणो भणइ-चूणं सब्बजीवा एवं परियट्ठिऊण भुज्जो भुज्जो तत्थेव नियसरीगे उववज्जंत्तित्ति वाढं पउट्ठपरिहारं नियइवायं च सम्ममवलंवेइ । अन्नया य सो तेउलेसासाहणत्थं भयवंतं विमुत्तूण गओ सावत्थिं नयरिं, ठिओ कुंभकारसालाए, कयं छम्मासियसुग्गं तवकम्मं, सिद्धा तेउल्लेसा, विन्नासिया कूवतडड्डियाए दासीए सरीरदहणेणं, तओ जायनिच्छओ पमुइयमाणसो अणवरयकोऊहलावलोयणस-यण्हो गामागराईसु परिभमिउमारद्धो ।

अह अन्नया कयाई अट्ठंगनिमित्तसत्थपत्तट्ठा । पासजिणनाहसिस्सा सिद्धिलियसद्धम्भवावारा ॥ १ ॥
कोऊहलेण गामागरेसु उस्सिखलं परिभमंता । गोसालगस्स मिलिया जाओ य परोप्परुद्धावो ॥ २ ॥
सिट्ठं च तेहिं गोसालगस्स सनिमित्तसत्थलवमेत्तं । तेणावि सो वियंभइ जणस्स तीयाति साहिंतो ॥ ३ ॥
पयइइ चिय उट्ठमरसीलयं तस्स को तरइ कहिउं? । पाउब्भूयाइसयस्स किं पुणो पावनिरयस्स? ॥ ४ ॥
भयवंपि तेण रहिओ हरिणंको इव विडप्पपम्मुक्को । अब्भहियसस्सिरीओ विहरइ वसुहं विगयमोहो ॥ ५ ॥

इय निरुवमसंजमभूरिभारधरणेक्कधीरधवलस्स । वीरस्स भुवणगुरुणो चरिए तइलोककवित्थरिए ॥ ६ ॥
 वहुणत्थसत्थसालयगोसालयदुव्णिणयपडिचद्धो । वित्थरओ पत्थावो समत्थिओ छट्ठओ एस ॥ ७ ॥ जुम्मं ।
 इति गोसालदुव्णिणयपडिचद्धो छट्ठो पत्थावो सम्मत्तो ॥

॥ इति पष्ठः प्रस्तावः ॥

अथ सप्तमः प्रस्तावः

गोसालएण सहियस्स सामिणो संसिया उ उवसग्गा । एग्गिणो उ एत्तो जह जाया ते तह कहेमि ॥ १ ॥
 अह पलयपयंडानलाणुरुवधम्मज्झाणनिज्झोसियासुहमलोचलेवो दाहोत्तिणजच्चकणच्छाएण पभापसरेण ससु-
 गमंतदिणयरनियराउलं दिसियक्कवालं कुणंतो सो महावीरजिणवरो कमेण विहरमाणो वेसालिं नयरिं संपत्तो,
 तत्थ य अहिगयजिणभणियजीवाजीवाइनवपयत्थो विविहाभिग्गहग्गहणनिग्गहियाविरइभावो भवभयारद्धसुविमु-
 द्धाणुवयाइसावगधम्मो सिद्धत्थनरवइवालमित्तो संखो नाम गणराया, सो य भयवंतं पच्चभिजाणिऊण पराए
 भत्तीए महया रिद्धिसमुदएण सक्कारेइ, अह कइवयदिणावसाणे सामी वाणियगामे पडिओ, तस्स य अंतरा रंग-
 तंभंगुरतरंगा महाजलुप्पीलपूरियपुलिणा महिलाहियं व दुग्गेज्झमज्झा रणभूमिच्च कच्छवयमयरहिया गंडईया नाम

महानई, तं च सामी नावाए समुत्तिन्नो समणो वेळुयापुलिणंसि सुल्लनिमित्तं धरिओ नाविगेहिं, एत्थ य पत्थावे दिणद्धसमओ वट्ठइ, खरं तावंति वेळुयं सूरस्स करपहकरा, तीए य संतप्पइ कमलकोमलं चलणतलं जिणस्स । इओ य तस्सेव संखस्स गणराइणो भाइणिज्जो चित्तो नाम द्वयकजेण पंचंतराइणो समीवे गंतूण नावाकडएण पडिनियत्तो पेच्छइ य तहट्ठियं सामिं, तओ ते दुवयणेहिं बहु तज्जित्ता सोयावेइ, महिमं च से करेइ । अह—

सुसमाहियमणपसरो संरक्खंतो चराचरं लोयं । विविहपडिमाविसेसे पइदिथहं चेव फासंतो ॥ १ ॥

कत्थइ निंदिजंतो उस्सिखलखलजणेण कुविणं । कत्थइ शुणिज्जमाणो नमंतसाभंततियसेहिं ॥ २ ॥

कत्थइ पागयजीवियविणासखमतिक्खआवयक्कंतो । कत्थइ अणुक्कलजणोहविहियपूयामहामहिमो ॥ ३ ॥

उभयत्थवि धम्मतुलं व चित्तवित्तिं समं चिय धरंतो । विविहाउ भावणाओ भावितो भमइ वसुहाए ॥ ४ ॥

तस्स य भगवओ अणेगतवोविहाणनिरयस्स न मणांगपि कंपिज्जइ मणो पढमुम्मिहमाणसारसहयारमंजरी-
पुंजपरिमलमिलंतभमिरभमरभमरोलिरोलरमणीएण पल्लविल्लकंकल्लिसरलसल्लईपमुहदुमसंडेण कन्नाडचेडीनिडाल-
विलुलंतोलयवल्लीचलणलंपडदाहिणानिलाडंबरिल्लेण पवरनेवत्थकुरंगनिज्जिजंतचचरीरुदीरिउद्दाममयरद्धएण महु-
समएण १ न य पयंडमायंडमंडल्लुल्लसियपवलकिरणजालकरालियमुवणंतरालेण तणहभिभूयवप्पीहगनिवहघोरसर-
संछाइयावरसइंतरेण खरसभीरसमुदुहफरिससक्करुक्कमणदुग्गमेण निदाहकालेण २ न य घोरघोसघणाघण-

गयघडाडोवडरियपथियसत्थेण विप्फुरंतविज्जुपुंजुप्पिच्छपउत्थकामिणीहिययदारिणा पहिट्टनीलकंठकोलाहल्लिहेण
 पाउसकालेणं ३ न य विसट्टकंदोट्टकमलकल्हारपरागधूसरियरायहंसेण परिपक्कसस्ससंपयाभिरामधरणीमंडलेण गइंद-
 दाणगंधसरिच्छातुच्छसत्तच्छयपुप्फगुच्छुच्छलंतामोयवासियदियंतरालेण सरयकालेण ४ न य फुल्लंतफलिणीमंजरीपुंज-
 पिंजरियवणविभागेण पहिट्टपाभरारद्धवणमलणुत्तालकंकेल्लिकलकलक्खिज्जभाणगामसंनिविसेण हेमंतागमेण ५ न य
 हिमलुसारसंमिलियसिसिरसमीरपकंपंतपहियमुकसिक्कारकेउणा ठाणठाणपज्जालियगिट्ठियपासपासुत्तपावासुयनिवेहेण
 परिफुट्टकुसुमट्टहासहसिरुज्जाणाभोगेण सिसिरसमएणंति ६ ।

इय धम्मज्झाणनिवेसगाढवक्खित्तचित्तपसरस्स । छप्पिवि उउणो पडुणो भीयव कुणंति न वियारं ॥ १ ॥

एवं च विहरमाणो वाणियगामं नगरमुवागओ, ठिओ य तस्स वहियाविभागे काउसग्गेणं । तत्थ य नयरे
 आणंदो नाम सावओ, सो य छट्ठछट्ठेणं निरंतरेणं तवोविसेसेण आयावेइ, तस्स य तवप्पभावेणं ओहिन्नाणं
 समुप्पन्नं, तयणुभावेण य सो पडिमापडिवन्नं जयगुरुं दट्ठूण अचंतमत्तिभरनिभरंगो गओ सामिसमीवं, जहा-
 विहिं वंदित्ता भणिउमाढत्तो य-भयवं ! चिरमहियासिया दुस्सहपरीसहा तुमए, अहो तुम्ह वज्जसारसरीरत्तणं अहो
 निप्पकंपत्तणं, पत्तं च इमस्स किलेसस्स तुम्हेहिं फलं, जओ कइवयवरिसेहिं केवलणाणसुप्पज्जिहित्ति भणिऊण गओ
 सगिहं । सामीवि तत्तो निक्खमिन्ता सावत्थीनयरीए विचित्ततवकम्मसणाहं दसमवासारत्तं अइवाहिऊण नयरीय

वाहिंमि कयपारणगो साणुलद्धयनामोमे य गामे वचइ । तत्थ य भदं पडिमं ठाइ, ताहिं च अणसिओ पढमं पुद्वा-
भिमुहो एगपोगलणिसियदिट्ठी दिवसमसेसमच्छिऊण रयणिंमि दाहिणाभिमुहो ठाइ, तओ अवरेण दिवसं उत्तरेण
रत्तिं, एवं छट्ठतवोकम्मेण इमं भदपडिमं सम्ममणुपालिऊण सामी अपारिउं चेव महाभदं ठाइ, तीए य पुद्वाए दिसाए
अहोरत्तं, एवं चउसुवि दिसासु चत्तारि अहोरत्ताइं, पलंविद्यमुयपरिहो उस्सग्गेण ठाऊण दसमेण इमं समत्थेइ ।
पुणो अकयपारणगो सवओभदं पडिमसुवसंपज्जइ, एईएवि पुद्वाइयासु तमापज्जवसाणासु दससुवि दिसासु उस्सग्गेण
अच्छइ, नवरं उट्ठदिसाए जाइं उट्ठलोइयाणि दव्वाणि ताणि ज्ञायइ, अहोदिसाएवि हिट्ठिळाणित्ति । एवं एयं वावीस-
इमेण पज्जंतसुवाणेइ । समत्थियासु य इमासु तिसुवि पडिमासु ददं परिसंतो भयवं, जाए य पारणगसमए पविट्ठो
आणंदगाहावइस्स गेहे, तवेलं च बहुलियाभिहाणाए दासीए भंडयाणि खणीकरंतीए दिट्ठो जयगुरू, अह तप्प-
एसं संपत्तस्स तइलोकदिवायरस्स वासियभत्तं पणाभियमणाए, सामिणाडवि असंभंतेण जोगंति कलिऊण पसा-
रियं सभावसोणिमासुभगं पाणिसंपुडं, परमसद्धाविसेसमुवहंतीए दिन्नमेयाए, एत्थंतरे दुक्करतवचरणपज्जवसाणजाय-
जिणपारणयपहिट्ठहयहियएहिं सुरासुरकिन्नरनिवहेहिं पूरियमंवरतलं, सुक्का य पंचरायकुसुमसमूहसणाहा अद्धतेरस-
कोडिमेत्ता कणयवुट्ठी, ताडियाइं चउविहतूराइं, जाओ य जणाण परितोसो, सा य बहुलिया दासी ण्हाविया
नरवइछत्तच्छायाए, अवणीयं से दासित्तणं ।

इय एत्थेव भवंमिवि विसिद्धभत्तीए पत्तदाणेणं । पाविज्जइ धणरिद्धी समुद्धुरा किं पुणऽण्णभवे? ॥ १ ॥

एत्तोच्चिय रुंदोचिहु भवन्नवो गोपयं व लीलाए । दुक्करतवविरहेणवि लंघिज्जइ पुन्नवंतेहिं ॥ २ ॥

लब्भइ तिलोयलच्छी लब्भइ सर्वपि कामियं सोक्खं । एकं चिय नवि लब्भइ सुपत्तदाणं जयपहाणं ॥ ३ ॥

नानांपि तवोवि हवेज्ज निप्फलं कहवि दिव्वजोएणं । दिन्नं सुपत्तदाणं वभिचरइ न नूण कइयावि ॥ ४ ॥

इय जाणिऊण कल्लाणकोसकलणेक्कपच्चले दाणे । न करेज्जा नणु जत्तं को अत्तसुहं समीहंतो? ॥ ५ ॥

अह जयगुरु तत्थ पारिएण वहिया विहरिउमारद्धो । अन्नया य गामाणुगामेण गओ वहुमेच्छजणसंकुलाए दढभूमीए, तत्थ य पेढालाभिहाणस्स गामस्स वहिया पेढालुज्जाणे पोलासचेइए अट्टमेणं तवोकम्मेणं अपाणएणं ईसिं ओणयकाओ अचित्तलुक्खपोगलनिवेशियानिमेसनयणो गुत्तसव्हियगामो सुप्पनिहियगत्तो अहोपलंविद्य-
मुयदंडो सुसिलिद्धसंठवियनिच्चलचलणो दुरणुचरं कायरनरुद्धोसकरं एगराइयं महापडिममारभेइ । एत्थंतरे सोहम्माए सभाए नाणामणिरयणभासुरकिरणपज्जलंतमहंतसिंहासणसुहासीणो अणेगपुरसुरंगणाकोडाकोडिसंबुडो किरीडाइवराभरणपहाविच्छुरियेदेहो पुरंदरो तथा पडिमापडिवन्नं जयनाहमोहिए पलोइऊण तक्खणविमुक्का-
सणो अचंतभत्तिभरनिंबभरंगो पुणरुत्तनिडालताडियमहीवट्ठो पणमिऊण आणंदसंदोहसंदिरीए सबभूयत्थगुणगणु-
ब्भासणसमत्थाए परमपक्खवायसुंदराए गिराए सुचिरं संथुणिऊण य निस्सामन्नं सामिणो असामन्नगुणपव्वभारं हि-

ययंमि धरिउमपारयंतोव धुणिउं पवत्तो-भो मो तियसा ! एस भगवं महावीरो पंचसमिओ तिगुत्तो अकोहो अमाणो
अमाओ अलोभो अणासवो अममो अकिंचणो संखोव निरंगणो जचकंचणं व जायरुवो जीवोव अप्पडिहयगमणो
गयणंपिच निरालंबणो समीरणोव अप्पडिवद्धो सायरसलिलं व सुद्धहियओ पुक्खरपत्तं व निरुवलेवो कुम्भुच्च
सुगुत्तिदिओ खगविसाणं व एगो विहगोव विष्पमुक्को मारुण्डपक्खिअ अप्पमत्तो मंदरो इव निष्पकंपो सागरो
इव गंभीरो चंदो इव सोमलेसो दिवायरोव दित्तेओ कुंजरो इव सौंडिरो पंचाणणोव दुद्धरिसो वसभोव
जायथामो वसुंधरव सव्वासाविसहो घयमहुसित्तो हुयासणोव तेयसा जलंतोत्ति, तहा एयस्स भगवओ न कत्थइ
पडिवंधो समुप्पज्जइ, सो य चउविहो, तंजहा-द्वओ खेत्तओ कालओ भावओ य, तत्थ दवओ माया मे पिया मे
भाया मे सुहिसयणसंगंथसंशुया मे सच्चित्ताचित्तमीसाणि य दवाणि मे, एवं न ममीकारो जाएज्जा, खेत्तओ य-
गामे वा नगरे वा रत्ने वा खेत्ते वा खले वा घरे वा अन्नत्थ वा तहप्पगारे पडिवंधो न हविज्जा, कालओ य-
समए वा आवलियाए वा आणपाणए वा खणे वा सुहुत्ते वा दिवसाइए वा न ममत्तं जाएज्जा, भावओ य-कोहे
वा माणे वा माथाए वा लोभे वा पेजे वा दोसे वा कलेहे वा अब्भक्खाणे वा पेसुत्ते वा परपरियाए वा अरइ-
रइए वा मायाभोसे वा मिच्छादंसणसहे वा न ममत्तं उप्पजेज्जत्ति । तहा एसो भगवं चासारत्तवज्जं अट्टगिम्हेह-
मंतियमासेसु गामे एगराइए नगरे पंचराइए ववगयहाससोगभओ निरहंकरो निगंगंथो वासीचंदणकप्पो समत-

णमणिलेहुकंचणो समसुहदुक्खो इहलोयपरलोयअप्पडिवद्धो जीचियमरणेसु निरवकंखी पुव्वज्जियकम्मसंधनिग्घाय-
णट्ठाए अन्मुट्ठिओ विहरइ । किं च—

एयं महाणुभावं नियधीरिमतुलियतिहुयणजणोहं । नो धम्मज्झाणाओ खमंति संखोहिउं केई ॥ १ ॥
देविंदा तियसा वा जक्खा रक्खा व खयरवग्गा वा । भूया महोरगा वा अणप्पमाहप्पजुत्तावि ॥ २ ॥
अवि चालिज्जइ मेरू पल्हत्थिज्जइ महीवि पायाले । ससिसूरविमाणाणिवि बलिणा केणवि दलिज्जंति ॥ ३ ॥
अवि सोसिज्जंति महण्णवावि बहुमीणमगरभीमावि । न य भगवं चालिज्जइ ज्ञाणाओ तिहुयेणेणावि ॥ ४ ॥
इय सोच्चा जायपयंडकोवदट्ठोड्ढीमभिउड्डिसुहो । दोसाण संगमो इव संगमओ नाम गिवाणो ॥ ५ ॥
सुरवइसमाणविभवो तक्कालचिसुक्कलज्जमज्जाओ । ववगयचिवेयभावो सया अभवो भणइ सक्कं ॥ ६ ॥
सामि ! किमेवं भण्णह निग्गुणमवि समणयं सुरसहाए । अहवा सच्छंदाचिय सोहंति पट्ठण उल्लावा ॥ ७ ॥
सच्चं चिय सुविसुद्धा जइ होज्ज इमस्स कावि चंगिमया । गिहपालणं विमोचुं ता किं पासंड मंडेज्जा ? ॥ ८ ॥
गिहवासाओवि न धम्मकम्ममन्नं वयंति किर कुसला । कीवत्तणेण चत्ते य तंमि किं संसणिज्जमिह ? ॥ ९ ॥
वागरियं जं च तए ज्ञाणाओ एस सुरचरोहिंवि । नो तीरइ चालेउं तंपि न वोचुं खमं तुज्झ ॥ १० ॥
जे लीलाए चिय पाणिपल्लवे संठवंति भूवीढं । गुरुसिहरभरक्कंतं गोलं व तुलंति मेरुंवि ॥ ११ ॥

वायामेतेनपि तिहुयणांपि कुविया खिवन्ति जमवयणे । निवडियगुणाण सुराण ताण को वहड समसीसिं ॥ १२ ॥
जइ सदेहेसि एयं ता अच्छड खोभिएण किं इमिणा ? । अह नो ता पेच्छ जहा भगपइण्णं नियत्तेमि ॥ १३ ॥
इय भणिए पुरंदरो विचिंतेइ-अहो महापावपडलविलुत्तवित्रेओ सबहा एस, अओ जइ एत्थ पत्थावे निवा-
रिजइ ता निच्छियं इमं परिकप्पेज्जा-सुरवइसामत्थेण एस भगवं तवोकम्ममविचलचित्तो कुणइ, न उण सत्ति-
एत्ति परिभाविऊण ठिओ सोणेणं । संगमयसुरोऽवि अतुच्छमच्छरमुद्धंतो निवारिजमाणोऽवि नियपहाणपरियेण
केत्तियमेत्तो एस ? अज्जेव खोभेमि इमंति पइण्णं काऊण नीहरिओ अत्थाणीमंडवाओ, गओ भगवओ समीवं, तओ
दंसणवसुप्पन्नगाढकोवेण विउंविओ पलयकालोच्च पवलो धूलिनिवहो, तेण य चलणजुयलाओ आरब्भ जाव अ-
च्छीणि सवणा य ताव पच्छाइओ, सामी जाओ निरुस्सासो, नवरि तिलतुसतिभागमेत्तंपि न चलिओ ज्ञाणाओ,
अचलियचित्तं च नाऊण कओ अणेण कुलिसकढिणचंडंतुंडभीमो पिवीलियासमूहो, सो य लद्धावयासो दुज्जणोच्च
जिणं विद्वविउं पवत्तो, किंतु निब्भग्गजणमणोरहोच्च जाओ निप्फलो, तओ दुन्निधारे सूइतिक्खमुहे उदंसे पेसेइ,
तेहिंवि अखोभिज्जमाणे भुयणबंधवे घइलाओ चंडमुहमंडलाओ निवत्तेइ, ताहिंवि खजमाणसरीरे निप्पकंपे जयनाहे
निम्मिमया पिंगलसरीरइणो अतुच्छपुच्छविसालिद्धकढिणकंटया विच्छुया, तेसुवि जहासत्ति कयप्पहारपडिहयसामत्थेसु
पसंरतमच्छरेणं विउंविआ दाढाकडप्पकराला नउला, तेहिंपि अभिमवियं भयवओ सरीरं, न उण ईसिंपि सत्तं,

अह सविसेसत्रियंभियकोवप्पसरेण तेण तियसेण । मुक्का फुरंतफणरयणभासुरा दुस्सहा भुयगा ॥ १ ॥
 चंदणतरुणोच्च तणू जिणस्स आवेढियं दढं तेहिं । अइतिक्खदीहदंतग्गदसणतंडवियंतुंडेहिं ॥ २ ॥
 न मणागंपि विचलियं तिलेयनाहं पलोइउं तियसो । ताहे मूसगनिवहं निवत्तइ दिव्वसत्तीए ॥ ३ ॥
 पुणरवि पयंडदोघट्टघट्टयं तक्खणं पयट्टेइ । उल्लालियसुंडादंडभीसणं सेलतुंगतणुं ॥ ४ ॥
 तेणवि विविहकयत्थणविसेससंपीडिएवि देहंमि । धम्मज्झाणाउ जिणो न चालिओ चालमेत्तंपि ॥ ५ ॥
 एवं चिय करणीहिवि पिसायनिवहेहिं एवमेव जिणो । खोभेउं पारद्धो तेणं सुरकुलकलंकेणं ॥ ६ ॥
 अचलंतंमि जिणिंदे करालदंतग्गविसिहभीममुहो । सज्जिज्जइ सहूलो तेण लहुं जिणवरस्सुवरिं ॥ ७ ॥
 अइतिक्खनक्खदाढाहिं पीडिउं सोवि जयगुरुं बाढं । विज्झाओ झत्ति पउससमयदुग्गयपईवोच्च ॥ ८ ॥
 इय खलियारणनिवहे पागयजजजीवियंतकरणखमे । पक्कएवि जिणं दट्ठुं सुनिच्चलं दूमिओ देवो ॥ ९ ॥

तओ जहाचट्टियरूवं सिद्धत्थरायं तिसलादेविं च विउच्चइ, ताणि य कलुणाइं विलवंति, भणंति य-पुत्त ! किं
 तए दुक्करमिममारद्धं ? उज्झाहि पव्वज्जं आगंतूण परिपालेह अम्हे, तुह विरहे वच्छ ! असरणाणि अत्ताणाणि य
 जायाणित्ति, एएणवि जा न सक्को खोभिउं ताव खंधावारं विउच्चइ, सो य पेरेत्तेसु आवासिओ जिणस्स, तत्थ
 सुयारो पत्थरे अलभमाणो जिणचलणोवरि पिढरं ठविऊण हेट्ठा वज्जानलजालेण रंधिउं पयत्तो, अह तक्कालसवि-

सेससमुच्छलियधम्मज्झाणजलुप्पीलकछोलविज्झाविएव निष्फलत्तणं पाविए तंमि पक्कणं निम्मवेइ, सो य अणेगाइं सउणिपंजरगाणि जयगुरुणो सवणे सुयदंडेसु खंधतलंमि जंधाजुयले य ओलंवेइ, तेहिंतो य नीहरिऊण पक्खिणो नहसिहाहिं तिव्खगंगंचुप्पहारेहि य विद्वंति जिणसरीरं, तहावि अबुमिए जयनाहे पइसमयवट्टंतकोवेणं उप्पा-
इओ जुगखयसमएव सक्करकलुसो खरानिलो, तेणावि समहिंयं सामिस्स पज्जालिओ कम्मतणगहणम्मि झा-
णानलो, न उण चित्तसंखोभोत्ति, पच्छा कलंकलियावायं विरएइ, तेणवि चक्काविद्धोव सलिलावत्तनिवडिओव भा-
मिओ जिणो देहमेत्तेण, न उण चित्तासएणं ।

इय एवंविहतिवोवसग्गकरणेऽवि निच्चलं नाहं । आभोगिऊण चित्तइ संगमओ जायगुरुकोवो ॥ १ ॥

वज्जसरीरो एसो खलीकओऽविहु बहुप्पयोरेहिं । नो तीरइ खोभेउं किं काउं जुज्जइ इयाणिं ? ॥ २ ॥

जइ एयमुज्झिऊणं सुरालयं जामि भग्गसपइन्नो । ता सुरवइपमुहेहिं आजीवमहं हसिज्जामि ॥ ३ ॥

किंच-निययस्सवि हिययस्सा नत्थि एवं कयंमि परितोसो । पारद्वयथुनिवाहणंमि पुरिसाण पुरिसवयं ॥ ४ ॥

अहवा होउ विगोवण निहणं एयं नएमि कूडमुणिं । एयस्स विणासंमी झाणंपि विणस्सिही नूनं ॥ ५ ॥

एयंपि य निवाहियगरुयपइण्णाभरो भविस्सामि । सुरवइपमुहाणमहं अहीलणिज्जो य तियसाणं ॥ ६ ॥

इय निच्छिऊण पज्जलियजलणजालाकलावसंचलियं । विज्जुलयाउलयसमयमेहचंदं व दुप्पेच्छं ॥ ७ ॥

कालायस भारसहस्सकोडिघडणुब्भडं महाचक्रं । जंबुद्वीपसमुग्गयवयणपिहाणं व धेत्तुण ॥ ८ ॥
उप्पइओ संगमओ दूरं गयणंगणं गुणविमुक्को । थालकरो तइलोकं भोत्तुं छुहिओ कयंतोव ॥ ९ ॥
तो तं सुमेरुद्वणपंयडमाहप्पपायडं चक्रं । मुक्कं सव्वससत्तीए तेण जयवंधुणो उवरिं ॥ १० ॥

तेणावि जिणिंदतणू तडत्ति संताडिया गुरुभरेणं । आकरनहं निमग्गा महीए दढवज्जसंकुव ॥ ११ ॥
तत्थवि छज्जीवहिंयं ज्ञायंतं जिणवरं सुणेऊणं । वेलक्खसुवगओ सो चितइ तियसाहमो एवं ॥ १२ ॥
लइक्कचक्कपहओवि नेव पंचत्तमेइ जो एस । सो सत्थस्साविसओ ता संपइ किं करेमि अहं ? ॥ १३ ॥
एवंविहोवसग्गा दिट्ठावि हरंति जीयमियराणं । किं पुण सरीरगोयसुवागया दुस्सहा नूणं ? ॥ १४ ॥

इइ विगण्णिऊण एगूणवीसइमोवसग्गपज्जंते जइ पुण अणुकूल्याए खोभिज्जइत्ति जायविब्भमेण संगमएण
विणिम्मियं नाणामणिकिरणचिंचइयं पवरं विमाणं, तंमि समारूढो दिवाभरणपहाविच्छुरियसरीरो नियंसिय-
विमलदुगुल्लो दिवं सामाणियदेविहिं दंसेमाणो मडुरेहिं वयणेहिं भयवंतं भणिउं पवत्तो—भो महरिसि ! तुट्ठोमिह
तुह सत्तेण तवेण खमाए वलेणं पारद्धवत्थुनिवहणेणं जीवियनिरेवक्खत्तणेणं पाणिगणरक्खणुज्जयमणेण य, ता अलाहि
एत्तो तवकिलेसाणुभावणेणं, जइ भणसि ता पवरसुरमणीजणाभिरामं अणवरयपयट्ठविसट्ठनहं विचित्तसत्तिजुत्ता-
मरकीरमाणच्छरियं इमिणच्चिय सरीरेण तुमं नएमि तियसालयं, अहवा उत्तरोत्तरभयपरंपरापरूढजराइदोस-

निवहरहियं एंगतिथसुहसणाहं पणामेमि सिद्धिनिवासं, अहवा इहेव धरामंडले मंडलाहिवसहस्ससविणयाणुस-
रिजमाणसासणं पउरकरितुरयरहजोहकोससंभियमेगच्छत्तं संपाडेमि नरिंदत्तणं, वरेसु एएहिं किंपि जं भे रोयइ,
उज्झसु संखोहं परिच्चयसु कुवियप्पंति भणिएवि जाव भयवं पलंविथसुओ एगगचित्तो धम्मज्झाणपडिवन्नो न
किंचि जंपइ ताव संगमएण अलद्धपडिवयणेण चित्तिं, जहा-दुविलंघं मयरद्धयरायसासणं, महासुणीणवि कुणइ
चित्तसंखोहं, ता तस्स सवस्सभूयाओ पेसेमि दिव्वाकामिणीओ, जइ पुण ताहिं हीरिज्जा एयस्स मणंति कलिऊण
कओ समकालं सवेसिं उऊण समवाओ, तप्पभाविण य फुल्लिया सहयारा पल्लविया कंकिळ्णिओ जायं दुहिणं
पयट्ठो मलयमारुओ उच्छलिओ परद्धयाराओ मउरिया नीया पणच्चिया वरहिणो विथंभिओ य कमलपरिमलो
जायाइं कासकुसुमपंडुराइं दिसिसुहाइं, मुक्का भगवओ परंतसु दसद्धवन्ना कुसुमवट्ठी, तयणंतरं च विसज्जि-
याओ विविहसरमंडलपहाणेयकुसलाओ करणप्पवंचमणहरनट्टविहिवियक्खणाओ वीणावेणुप्पमुहाउल्लसंजुयाओ
पवरालंकारधारिणीओ तियसत्थिलासिणीओ, संपत्ताओ य जयंगुरुसमीवं, सविलासं विथंभिउं पवत्ताओ य,
कहं चिय ?—

उब्भडसिंगारसनानेहलायन्नजलपवाहेण । सरियव वणामोगं लीलाए पूरवंतीओ ॥ १ ॥

पमहलविसालदीहरतरलच्छिच्छोहचक्खवालेणं । दिसिदिसिविसट्टकंदोदृपयरसंकं कुणंतीओ ॥ २ ॥

काओवि कुणंति नमंतसीसनिचंडंतकुसुमदामाओ । जिणसंगमसोकुक्खिरीउ बाढं पयावणइं ॥ ३ ॥
 काओऽविहु गलियंसुयसंजमणमिसेण पायडिंति पुरो । जयगुरुणो पीवरकणयकलसपरिरेहिणं सिहिणं ॥ ४ ॥
 मिच्छच्चिय कारुणियत्तणं तुमं उव्वहेसि हे सुहय ! । मयणसरजज्जरंगंणि जं न रक्खेसि जुवइजणं ॥ ५ ॥
 मुंच कढिणत्तणं देहि नाह ! पडिवयणमम्ह दुहियाणं । पेम्मपरायत्तमणं सण्णुरिसा नावहीरंति ॥ ६ ॥
 तुह दंसणमेत्तेणवि दसमदसं पाविउव एस जणो । एत्तोऽवि मा उवेहसु एवं तज्जंति काओऽवि ॥ ७ ॥
 इय सविलासं सुरकामिणीहिं पायडियवडुवियाराहिं । न मणागंणि विचलियं चित्तं ज्ञाणाओ जगगुरुणो ॥ ८ ॥
 अह उग्गयंमि सूर अखुभियहिययं पलोइउं नाहं । संगमओ हयसत्ती चित्तिउमेवं समाढत्तो ॥ ९ ॥
 अणुकूलवसगगेहिवि न चलइ एसो सुणी महासत्तो । ता किं एत्तो मोत्तुं एयं वच्चामि सुरलोए ? ॥ १० ॥
 अहवा न जुज्जइ इमं काउं मे दीहरेण कालेण । उवसग्गियस्स जइ पुण इमस्स चित्तं पक्कपेज्जा ॥ ११ ॥
 इय कलुसासयगोयरगएण तइलोककवंधुणो धणियं । उवसग्गं गामेविहू विहरं परिचत्तभत्तस्स ॥ १२ ॥
 बालुयपंथ सुभूसे सुछेत्त मलयंमि हत्थिसीसंमि । ओसलिमोसलितोसलिपमुहेसुं संनिवेसेसुं ॥ १३ ॥
 ते केवि तेण तियसाहेमेण विहरंतयस्स उवसग्गा । विहिया अइदुव्विसहा जे कहिउंणि हु न तीरंति ॥ १४ ॥
 एएणं चिय ते कारणेण चरिए न एत्थ वित्थरिया । सिद्धंताओ कुसलेहिं किंतु सयमेव नायवा ॥ १५ ॥

एवं तदुवसगवग्गावि अविचलचित्तो गामार्हणं बहिया बहुकालं गमिऊण सामी छंममासियं पारणयं काउं कामो समागओ वयगामे गोउलंमि, तत्थ य तद्विवसं ऊसवविसेसो, सबत्थ पायसं उवक्खडिज्जइ, तिहुयणेक्कनाहोडवि अण- वरयसुवसगवग्गं कुणमाणस्स संगमयामरस्स जाया छंममासा नेव उवसग्गेइ संपयं, जइ पुण परिसंती सट्ठाणं गओ होज्जा, इय विगप्पिऊण पविट्ठो भिक्खानिमित्तं, संगमएणवि तत्थ पत्थावे जहिं जहिं गिहे भयवं वच्चइ तहिं तहिं समारंभिया अणेसणा, सामिणाडवि पउत्तो ओही, सुणिओ य एसो, तयणंतरमद्वाहिं डिओ चेव नियत्तिऊण ठिओ पडिमाए, संगमएणावि आभोइओ भयवं,—किं भग्गपरिणामो नवत्ति?, जाव पेच्छइ ताव छंजीव- हियमेव परिचिंतियंतं जिणवरं, ताहे संखुद्धो चिंतेइ—जो छहिं मासेहिं भूरिप्पयारोवसग्गेहिं अणवरयं कीरमाणे- हिवि न चलिओ सो दीहेणावि कालेण न सक्को चालिउं, निरत्थओ मज्झ उवक्कमो, दीहकालं चुक्कोडमिह सुर- विलासाणं, अहो नियसामत्थमचिंतिऊण कहं मए अप्पा विनडिओ? । इय बहुप्पयारोहिं नियचिद्धियं दूसिऊण निवडिओ भगवओ चलणेसु, भणिउमाढत्तो य—भयवं! भग्गपइन्नोडहं, तुब्भे पुण समत्तपइन्ना, अवित्तहं भणियं महाणुभावेण सभागएण सुरवइणा, केवलं दुट्ठु कयं मए जं न तइया सइहियं ।

अलमेत्तो भणिएणं खमेसु मे पुच्चदुक्कडं कम्मं । उवसंतोडहं संपइ तुह उवसगं न काहामि ॥ १ ॥
ता वच्चसु निस्संकं गामागरपमुहविविहठाणेसु । पविससु भिक्खनिमित्तं किलिस्ससे किं छुहामिहओ? ॥ २ ॥

एतथंतरमि भणियं जिणेण संगमय ! सुंच मम तत्ति । पत्थावे चिय अम्हे सकज्जकिरियासु वट्टेमो ॥ ३ ॥
 इय सोउं जिणनाहं पणमिय परमायेरेण संगमओ । अइपावभरकंतोवि पट्ठिओ सुरपुराभिमुहं ॥ ४ ॥
 इओ य-सोहम्मं देवलोए तंकाळं सव्वे देवा देवीओ य उव्विगा निराणंदा निरुच्छाहा अञ्छति, सक्कोऽविय
 मुक्कविलेवणाळंकारो समुज्झियपेच्छणयाइविलासो परिचित्तेइ—अहो एत्तियमेत्तस्स भगवओ अणत्थसत्थस्स अहं
 मूलकारणं जाओ, जओ मम पसंसाकुविएण इमिणा सुराहमेण इमं महापावं ववसियंति, एतथंतरे सयलतइलोयजी-
 वरासिविणासजणियपावपंकविलित्तोच्च नीसेसावजसंपसुपडलविलुत्तगत्तोच्च अकल्लाणावलीकलिओच्च पणहुपुव्वकंति-
 पवभारो पडिभग्गपइन्नाविसेसुस्मिच्छंतलज्जाभरसंकुचियलोयणो संपत्तो सोहम्मसभाए संगमयाहमो । तं च दट्ठण
 पुरंदरो ठिओ परंमुहो, भणिउमारद्धो य—

भो भो सुरा ! निसामह मम वयणं एस संगमयेदेवो । चंडालो इव तुम्हं दट्ठुपि न जुज्जइ कयावि ॥ १ ॥

एएण पावमइणा चिरमवरद्धं निराणुकंपेण । जं अम्ह पूयणिज्जो कयत्थिओ तिहुयणेक्कपहू ॥ २ ॥

जइ-ताव इमस्स नत्थि पडिब्भयं भीमगुरुभवाहितो । ता किं ममवि न भीओ ववसंतो दढमकज्जमिमं ? ॥ ३ ॥

जह जयगुरुणा निचलसामाइयगुरुभरो समुक्खित्तो । तह किं मएवि जं एस मज्झ संकंपि नो कुणइ ? ॥ ४ ॥

एएण जिणिंदऽवमाणेण जणिओ पयंडपावभरो । तुम्हे पुण इत्थ ठिया पाविहिह इमस्स संगेण ॥ ५ ॥

किमहमिमं निगगहिउं सक्को नेवोवसग्गकालंमि ? । किंतु मुणस्सइ एसो हरस्स निस्साएँ तवइ जिणों ॥ ६ ॥
पज्जत्तं एत्तो जंपिएण निविसयमाणवेह इमं । वरि सुन्न चिय साला मा भरिया चोरवग्गेण ॥ ७ ॥

इय सुरनाहेण सरोसभासिणा चलणकोडिणा विवसो । निच्छूढो संगमओ एगागी सुरपुरीहिंतो ॥ ८ ॥

एवंविहं च भाणमलणं पेच्छिऊण चिंतियं संगमएण—अहो एयाइ ताइं असमिक्खियकयाइं पायडीहवंति संपइ
दुव्विलसियाइं, इय झूरिऊण सो जाणएण विमाणेण पट्ठिओ मंदिराभिमुहं, तओ अक्कोसिज्जमाणो सुरचिलयाहिं
हीलिज्जमाणो नियपरिवारेण पेच्छिज्जमाणो सक्कसुहडेहिं उवेहिज्जमाणो सामाणियदेवेहिं नीहरिऊण सुरपुरीओ
ठिओ मंदरचूलियाए, तस्स य सागरोवमं सेसमाउयंति । इओ य—से अग्गमहिसीहिं विन्नविओ पुरंदरो—जइ सामि !
तुम्ह आएसो हवइ ता अम्हे पियमणुसरामो, तओ विसज्जियाओ य इंदेण, सेसो पुण परिवारो पडिसिंदोत्ति ।

इओ य—भयवं वद्धमाणसामी जायंमि निरुवसग्गे तत्थेव गांमे वीयदिवसे पविट्ठो गोयरचरियाए, हिंडंतो य
समागओ वच्छवालथेरीगिहे, तओ तीए भत्तिभरनिस्सरंतपयडपुलयपडलाए वासियपायसभत्तेण पडिलाभिओ
छमासस्स निरसणो भयवं । एत्थंतरे चिरकालजायजिणपारणगंदसणपरितुट्ठेहिं अहासन्निहियसुरनिवेहहिं पहायाइं
तूराइं मुक्का कणगबुट्ठी परिखित्तो कुसुमनियरो वरिसियं गंधोदयं अहो दाणमहो दाणंति उग्घोसणा कया, तत्थेव
ताव जाया अदरिदा थेरी । अह सामी निव्वियसरीरो गओ आलभियाभिहाणं नयरिं, तत्थवि पडिमापडिचन्नस्स

भक्तिनिम्बरो हरीनाम विज्जुकुमारिंदो तिपयाहिणापुव्वगं निवडिऊण चलणेसु संधवं काउं पवत्तो । कंहं?—

जय निज्जियदुज्जयकुसुमवाण !, अविणस्सरपावियसुहनिहाण ! ।

उवसग्गवेरसमरेक्कधीर !, तुह सच्चं नाउँ जिणिंद वीर ! ॥ १ ॥

संसारजलहिनिवडंतसत्त !, पइं एक्किं रक्खियवहुदुहत्त ।

तुह सुमरणमित्तेवि पावरासि, नासइ तिमिरं पिव रविपयासि ॥ २ ॥

तुह दंसणमेत्तेऽवि जे न बुद्ध, ते तिवखदुक्खलक्खेहिं रुद्ध ।

तुह चलणकमलमुद्धंकियस्स, भद्दाइं होंति धरणीयलस्स ॥ ३ ॥

स कयत्थ जाय हरिहरिणपसुह, भुवणेसर ! ते तेरिच्छनिवह ।

गिरिकंदरपडिमासंपवन्न, तुहं दिट्ठु जेहिं जिण ! कणयवन्न ॥ ४ ॥

तावच्चिय घोरभवाडवीए, निवडंति जीवा दुहसंकडाए । जावऽज्जवि तुम्ह पयारविंद—सेवं कुणंति नो जिणवारिंद ! ॥ ५ ॥

हिमवंतपसुहकुलपव्वएसु, खीरोयहिचेइरसायलेसु । गांयति किंत्तिं तुह भुणनाह !, किन्नरसमूह दइयासणाह ॥ ६ ॥

तुह एक्कह कह वित्थारु पत्त, नीसेसकंहतर जणिहिं चत्त । उइयंमि अहव रविमंडलंमि, खज्जोय न सोहइं नहयलंमि ॥ ७ ॥

इय विज्जुकुमारिंदो थोउं कहिउं च केयलुणपत्ती । पच्चासन्नं पच्छा नियमवणं अइगओ नमिउं ॥ ८ ॥

सामीवि सेयवियानयसुवगओ, तत्थवि हरिस्सहो नाम भवणाहिर्वई देवो एइ वंदइ य पियं च पुच्छइ, जहा-
भयवं ! नित्थिन्ना बह्वसग्गा, थेवमियाणिं सोढवं, केवलनाणं च लहुं उप्पज्झिहत्ति भणिऊण जहागयं पडिनियत्तो ।
तिट्ठयणपह्ववि तत्तो विहरिऊण सावत्थीए नयरीए परिसरे पलंबियमुयंदडो ठिओ काउस्सग्गेणं, तम्मि य दिणे
लोगो सिंगारियसरीरो गहियसुरहिक्कुसुमदामो विविहविलेवणभरियकचोलयसणाहो खंदपडिमाए पूयणत्थं भयवंतं
अइक्कमिऊण गंतुं पयट्ठो । सा य खंदपडिमा तवेलं ण्हवियां विलित्ता य जात्रऽज्जवि न समारोविज्जइ रहवरे ताव
कहं महावीरो विहरइत्ति परिन्नाणनिमित्तं पउत्तो ओही सुराहिवेण, दिट्ठो सो पुरजणो भयवंतं मोत्तूण खंदप-
डिमाए पूयामहिमं कुणमाणो, तथणंतरं ओयरिओ सुरलोयाओ, अणुपविट्ठो य खंदपडिमं, ताहे पुरंदराहिट्ठिया
चलिया भयवओऽभिमुहं खंदपडिमा, तं च सयमेव चलंतिं दट्ठूण तुट्ठो लोगो-अहो देवो ! सयमेव रहं आरुहइत्ति,
खंदपडिमावि रहं मोत्तूण गया भगवओ समीवं, निपयाहिणदाणपुव्वयं च पडिया पाएसु, भूमितलनिविट्ठा य
पज्जुवासिउमारद्धा, लोगोऽवि तहाविहमच्छरियं पेच्छिऊण विम्हिया चिंतंति-अहो वंदियवंदणिज्जो एस कोइ
महप्पा निप्पडिमप्पभावसंगओ य ता सबहा न जुत्तमायरियमहेहिं जं इममइक्कमिऊण गयत्ति अत्ताणं निंदंतेहिं
सामिणो कया सवायेरेण महिमा, अह जाए पत्थावे जयगुरू तओ पएसओ निक्खमिऊण गओ कोसंबिं नयरिं,
तत्थ य उस्सग्गसुवगयस्स जयगुरूणो जोइसचक्काहिर्वइणो सूरससहरा सविमाणा वंदणत्थं ओयरिया वसुंधरापीठं,

गाढविम्वहयक्खित्तनरनियरपलोइज्जभाणा य तपयाहिणापुव्वयं पणमिऊण तइलोक्केक्कल्लमल्लं जयवंधवं, निसन्ना जहो-
इयट्ठाणेसु, पुच्छिया सुहविहारवत्ता, खणभेक्कं च ते जिणरूवदंसणसुहमणुहविऊण जहागयं पडिनियत्ता ।

अह जयनाहो गामाणुगामयं विहरिऊण भूवीढं । वाणारसीएँ पत्तो तत्थ य महिओ सुरिंदेण ॥ १ ॥

पुणरवि रायगिहंमि य फुरंतमणिरयणमंडियसिरेण । ईसाणतियसवइणा शुयमहिओ पुच्छिओ य पियं ॥ २ ॥

महिलानथरीएवि हु पत्थिवजणेण परमभत्तीए । धरणिंदेण य नागाहिवेण हिट्ठेण पणिवइओ ॥ ३ ॥

गामागराइसु चिरं विहरिय पत्तंमि वरिसयालंमि । एक्कारसमे सामी वेसालीएँ पुरीएँ गओ ॥ ४ ॥

तसपाणवीयरहिए थीपसुपंडगविवज्जिए ठाणे । चाउम्मासियखमणं पडिवज्जित्ता ठिओ पडिमं ॥ ५ ॥

भूयाणंदो य ताहिं सुयगवई भगवओ भवभएण । भत्तिभरनिब्भरंगो पूयामहिमं पयट्टेइ ॥ ६ ॥

अह तत्थेव पुरीए सावगधम्मंमि बद्धपडिबंधो । दक्खिन्नदयापसमाइपवरगुणरयणरयणनिही ॥ ७ ॥

नामेण जुन्नसेट्ठी सुसावगो वसइ विस्सुयजसोहो । अन्नो मिच्छादिट्ठी अहिणवसेट्ठित्ति नामेण ॥ ८ ॥

एगम्मि वासरंमी कज्जवसा नयरि वाहि नीहरिओ । सो जुन्नसेट्ठी सट्ठो परमवियहो गुणट्ठो य ॥ ९ ॥

पेच्छइ कंचणसच्छहसरीरकरपसरभरियनहविवरं । नीसेसलक्खणधरं उस्सगठियं महावीरं ॥ १० ॥

तं पेच्छिऊण निच्छउमजायसव्वणुनिच्छओ सहसा । हरिसुच्छलंतरोमंचकंचुओ वंदिउं सामिं ॥ ११ ॥

सो चिंतितुं पवत्तो भिक्खाकालेऽवि नीइ जन्न पहू । पडिमोवगओ चिद्धइ तं अज्जुववासिओ मन्ने ॥ १२ ॥
जइ कळंमि य कल्लणवल्लिकंदो करिज्ज पारणयं । एसो भयवं मह मंदिरंमि ता सुंदरं होइ ॥ १३ ॥
इय चिंततो पइवासंमि सो पज्जुवासए सारिंमि । ता जाव चउम्मासक्खमणं पज्जंतमणुपत्तं ॥ १४ ॥
तो बीयवासरे आगयंमि सुणिऊण पारणगसमयं । सारिं निमंतइत्ता तुरियं गेहं गओ सेट्ठी ॥ १५ ॥
पगुणीकयाइं तेण य सनिमित्तं पुवकालसिद्धाइं । फासुयएसणियाइं भत्तीए पवरभोजाइं ॥ १६ ॥
एयाइं अज्ज जयबंधवस्स दाहामऽहंति कयबुद्धी । अणिमिसवियसियनयणो जयगुरुमगं पलोयंतो ॥ १७ ॥
धम्मो कयपुन्नोऽहं सुलद्धनरजम्मजीवियफलो य । होहामि अज्ज नूणं तिहुअणपहुणो पयाणेण ॥ १८ ॥
चिरभवपरंपरज्जियनिचिडासुहकम्मनिगडजडिअस्स । संपज्जइ जइ परमज्जमेव मोक्खो धुवं मज्झ ॥ १९ ॥
इय चिंततो सुचिसुज्झमाणेलेसो स जायए जाव । ताव पविट्ठो सामिय अहिणवसेट्ठिस्स गेहंमि ॥ २० ॥
अच्चंतविभववित्थरदप्पगव्वेण सेट्ठिणा तेण । भणिया दासी भदे ! समणं दाउं विसज्जेहि ॥ २१ ॥
तीएविहु तच्चयणाणुरोहओ चट्ठएण कुम्मासा । उवणीया दाणत्थं पहुणावि पसारिओ पाणी ॥ २२ ॥
खित्ता य तीए तयणंतरं च देवेहिं दुंदुही पहया । परिसुक्का वसुहारा चेलुक्खेवो कओ झत्ति ॥ २३ ॥
घुट्ठं च अहोदाणं महया सदेण पंचवन्नाणं । बुट्ठी विहिया कुसमाण सुरहिगंधुद्धुराणं च ॥ २४ ॥

मिलिओ य नयरलोगो रायाविय विम्हिओ गिहं पत्तो । वित्तंतमिमं पुट्टो य तेहिं सेट्टी पहिट्टेहिं ॥ २५ ॥
 तेणावि कवडसीलत्तणेण काउं बहुं फडाडोवं । सिट्ठं जहा महप्पा एसो परमन्नपाणेहिं ॥ २६ ॥
 सयमेव मए पाराविओत्ति अचंतमत्तिजुत्तेण । एत्तो चिय तियसेहिं धुट्टमहो दाणमेयंति ॥ २७ ॥
 सोच्चा एवं लोगो रायाविय गाढहरिसपडिहत्यो । तग्गुणगहणं काउं जहागयं पडिनियत्तोत्ति ॥ २८ ॥
 सो पुण पुराण सेट्टी अचंतविसुज्झमाणसुहभावो । दुंदुहिसदं सोच्चा झडत्ति सोगाउलसरीरो ॥ २९ ॥
 पडिचिंत्तिउं पवत्तो हाहाऽहं मंदभगजणजणो । जणिओ विहिणा नूणं जस्स घरं लंघिउं नाहो ॥ ३० ॥
 अन्नत्थ पारिओ अज्ज सायरं उवनिमंतिओऽवि मए । अहवा निप्पुन्नाणं न घरे चिंतामणी एइ ॥ ३१ ॥ जुम्मं ।
 अह भयवं पारित्ता गामागरसुंदरं धरावीढं । विहरइ हरियतमभरो सूरो इव भवकमलाण ॥ ३२ ॥
 अन्नंमि य पत्थावे समोसढो तत्थ पासजिणसिस्सो । सूरी केवलनाणप्पईवपायडियपरमत्थो ॥ ३३ ॥
 नाउं समोसढं तं नयरिजणो नरवाई य हिट्टमणो । वंदणवडियाएँ लहुं समागओ तस्स पासंमि ॥ ३४ ॥
 वंदित्ता भत्तीए उचियट्ठाणंमि सन्निसन्नो य । सुचिरं धम्मं सोउं पुच्छिउमेवं समाढत्तो ॥ ३५ ॥
 भयवं ! एत्थ पुरीए अणेगजणसंकुलाए को धन्नो ? । लहुईकयसंसारो य ? कहसु अइकोउगं मज्झ ॥ ३६ ॥
 तो केवल्लिणा मणिंयं अइधन्नो एत्थ जुन्नसेट्ठित्ति । रत्ता बुत्तं किं नणु सामी पाराविओ तेण ? ॥ ३७ ॥

किं वा अद्धत्तेरसुवन्नकोडिप्पमाणवसुहारा । तम्मंदिंरमि पडिया ? अइधन्नो जेण सो जाओ ॥ ३८ ॥
तो केवल्लिणां भणियं भावेणं तेण तिहुयणेक्कपहू । पाराविओ चिय तहा दाणत्थं कयपयत्तेण ॥ ३९ ॥
वसुहाराविहु परमत्थओ परं तस्स मंदिरे पडिया । जं सग्गमोक्खसोक्खणाण भायणं सो इहं जाओ ॥ ४० ॥

किंच-जइ खणमेत्तं नो दुंदुहीएँ सद्दं तथा सुणिंतो सो । खवगस्सेणिं आरुहिय केवलं ता लहु लहंतो ॥ ४१ ॥
पत्तपहाणत्तणओ कणगं मोत्तूण तेण उ न अन्नं । भाववियलत्तणेण फलमहिणवसेट्ठिणा लद्धं ॥ ४२ ॥
इयं भो देवाणुपिया ! चरणं दाणं च देवपूया य । कासक्कुसुमं व विहलं सच्चं चिय भावपरिहीणं ॥ ४३ ॥

एवं केवल्लिणा पन्नत्ते जहागयं गओ सभाजणोत्ति । अलं चित्थरेणं, पत्थुयं भन्नइ-सो महावीरजिणो कमेण
विहरमाणो गओ सुसुमारपुरं, तत्थ य असोगसंडंमि उल्लाणे असोगपावयस्स हेट्ठओ पुढविसिलापट्टए कयअट्टम-
भत्तस्स एगराइयं पडिमं पडिवन्नस्स एगपुग्गलनिवेशियानिमेषनयणस्स ईसिपब्भारगयदेहस्स भयवओ चमरो
नाम असुरिंदो पुरंदरभयविहुरो संखमीणुप्पलोवसोहिंयं महागउच्च कमजुयलसरोचरतरुमल्लीणो, अह को एस च-
मरो ? कहं पुरंदराहितो भयं ? को वा पुव्वभवे आसित्ति ? , निसामेह

अत्थि गइंदकुलकवल्लिजंतमहल्लसल्लईपल्लवो नियसिहत्तुंगिमाखलियरविहपयारो पवरकाणणाभोगभूसियदिसि-
निवहो विज्झो नाम गिरिवरो, तस्स पायमूले विभेलो नाम संनिवेशो, तंमि य दयादक्खिन्नसवसोयाइगुणोववओ

अपरिमियदवसंचओ पूरणो नाम गाहावई परिवसइ, सो य सम्मओ सयणवग्गस्स वल्लहो नरिंदस्स चक्खुभूओ पयइवग्गस्स हिययनिच्चिसेसो धम्मियलोयस्स उभयलोयाविरुद्धेणं ववहारेणं कालं वोलेइ । अन्नया य पच्छिमरयणी-समयंमि सुहसिज्जागयस्स निहाविगमुम्मिहमाणनयणनलिनस्स जाया से चिंता, जहा—

पुवभवे नूण मए दाणं दिन्नं तवं च आयरियं । तस्स पभावेणेसा मणवंछियकज्जनिप्फत्ती ॥ १ ॥

तहाहि-नरवइसम्माणेणं धणेण कोसविभवेण । पुत्ताइपरियेण य पइदियहमहं पवहामि ॥ २ ॥

पडिक्खलोवि हु लोगो दंसणमेत्तेऽवि होइ अणुक्खलो । अनिवारियपसराविहु निवडंति न आवया मज्झ ॥ ३ ॥

ता जावऽज्जवि पुवज्जियस्स कम्मस्स कुसलरूवस्स । विज्जइ थेवोऽवि लयो जावऽज्जवि उज्जमो अत्थि ॥ ४ ॥

जाव जणे सम्माणो जाव य रोगादओ न दूमिंति । जाव न विहडइ सरयवभविब्भमा निच्छिद्यं लच्छी ॥ ५ ॥

जाव न जज्जरइ जरा जाव न जायइ पिएण सह विरहो । आणानिहेसम्मि य जावज्जवि वट्टइ कुडुवं ॥ ६ ॥

ताव पुणोवि हु धम्मं परभवसुहसाहगं उवचिणेमि । नहु कारणविरहेणं कज्जं उप्पज्जति कयावि ॥ ७ ॥

धम्मपभावो एसो जं किर साहारेणोऽवि मणुयत्ते । एगे करेति रज्जं अन्ने ते चेव सेवंति ॥ ८ ॥

तमहा सूरम्मि ससुगयंमि भुंजाविउं सयणवग्गं । ठविउं च गिहे पुत्तं तावसदिकखं पवज्जामि ॥ ९ ॥

इय चित्तिंयंतस्स उग्गओ दिवायरो, तओ निमंतिओ सयणवग्गो काराविओ परमविच्छेड्डेणं भोगणं संमाणिओ

तं वीलाइदाणेण, जोडियकरसंपुडेण भणियसणेण-भो भो सयणा! निसुणह मह वयणं, एसोऽहं विरत्तो विसयाणं पडिनियत्तो गेहवावाराणं पणट्टसिणेहो पियपणइणीपुत्तमित्तपमुहपरियणे, अओ अणुमन्नेह मं दाणिं दाणामाए पवज्जाए पज्जलमणुगिणिहउं, चिरं एत्थ दुत्थेण य मए जन्न मे सम्मं वट्ठियं तमियाणिं खमणिज्जं, जहा य ममोवरि पुवं पक्ख-वायमुवहंता एवं मम पुत्तस्स संपयं वहेज्जह, इह सप्पणयं भणिकुण ठविओ नियपए पुत्तो, समप्पिओ से गेहपरियरो, साहियाइं निहाणाइं भलाविओ सयणजणो, अन्नं पि कयं तक्कालोचियं कायवं। अह सोहणतिहिसुहुत्ते विसंव गेहवासं परिच्चइऊण चउप्पुडं दारुमयं भायणं गहाय दाणामाए पवज्जाए पवइओ पूरणो। तं चेव दिवसमारब्भ छट्ठछट्ठेणं अणि-विखेत्तणं तवोविसेसेणं आयावणाभूमीगओ अत्ताणं सोसेइ। पारणगदिवसे य तं चउप्पुडगं भायणं गहाय उच्चावएसु गेहेसु मज्झंदिणसमए भिक्खं परिभमित्ता जं पढमपुडए पडइ तं पहियाणं अणाहाणं च देइ, जं दोचे तं कागसुणग-पमुहाणं, जं च तच्चे तं मच्छमगराईणं जलचरजीवाणं पणामेइ, जं च चउत्थपुडए पडइ तं अप्पणा अरत्तदुडो आहारेइ।

एवंविहदुक्करतवविहाणनिरयस्स निचमवि तस्स । न तथा पावविणासो जायइ सन्नाणहीणस्स ॥ १ ॥

जह थेवतवेऽवि जिणिंदमगमणुलगयस्स साहुस्स । कालायसंपि अहवा रसाणुविद्धं हवइ हेमं ॥ २ ॥

अह तेण दुरणुचरेण बालतवेण अब्भाहओ सो पूरणो लुक्खो अट्ठिचम्ममेत्तगत्तो चित्तेइ-खीणोऽहमियाणिं, ता-जावऽल्लवि अत्थि किंपि पुरिसक्कारपरक्कमविसेसो ताव सयमेव तहाविहभूविभागे गंतूण अणसणं करेमिति विभा-

विऊण चउपुडयपमुहुउवगरणमेगंते परिचइऊण विभेलगसन्निसेसस्स ईसाणदिसिविभागे गंतूण भत्तं पच्चक्खाइ ॥
 एत्थंतरे चमरचंचा रायहाणी अणिंदा यावि होत्था, सोऽवि पूरणो बालतवस्सी बहुपडिपुन्नाइं दुवालस वासाइं
 परियायं पाउणित्ता मासियाए संलेहणाए अप्पाणं झोसिऊणं मओ समाणो तीए चमरचंचाए रायहाणीए चमरिंद-
 ताए उववन्नो, तयणंतरं पंचविहाए पज्जत्तीए पज्जत्तिभावं गओ समाणो विविहमणिरयणनियरकिरणविच्छुरियाइं चिय-
 सियसरसकुसुमपथरपरिरेहिराइं सविलासधावंतसुरकामिणीललियकरथलुत्तालचालियचामराइं नियभवणंतराइं इओ
 तओ आमोएमाणो वीससाए जाव उहुं पलोयइ ताव पेच्छइ सोहम्मदेवलोए सयलेदेवरिद्धिसंभारसुंदरिल्ले महमहंतघ-
 णसारसंचलियकालागरुवहलधूमपडलिल्ले दुवारदेसनिवेशियवियसियसहसपत्तपिहाणपुन्नकलसे निम्मलमणिभित्तिजो-
 ण्हापणासियसंतमसे रणिरकणयकिंकिणीजालाउलउपंतधयवडाडोए ठाण्ठाणपलंबंतयुक्कमुत्ताहलकलावे विवि-
 हमणिरयणविणिम्मवियवरवेइयावेढियेपंतविभागे सोहम्मवडिसयविमाणे सोहम्माए सभाए सक्कसि सीहासणंसि
 निसन्नं चउरासीए सामाणियसहस्सेहिं अन्नाहि य अणेगाहिं देवकोडाकोडीहिं पंजलिउडाहिं पज्जुवासिज्जमाणं
 पहयपडुपडहसुखपमुहत्तूरनिनायसंचलियतंतीतलतालाणुगयसंगीयपमोयभरनच्चमाणविलासिणीपलोयणपरं असंभा-
 वणिज्जसुहसंभारमणुभवमाणं सयमेव वज्जपाणिं पुरंदरं, तं च दट्ठूण सामरिसं चित्तियमणेणं-अहो को एस अप-
 त्थियपत्थओ दुरंतपन्तलक्खणो लज्जामजायपरिवज्जिओ सुरकुलकलंकभूओ अपत्तकाले चिय कालवयणं पविसिउ-

कामो ? जो ममावि असुरराइणो सीसोवरि वट्टमाणो दिवाइं भोगाइं भुंजमाणो अणाउलं विलसइत्ति, एवं संपे-
हिता सामाणियपरिसोववन्नए देवे संसयसएसु आपुच्छणोचिए सद्दविता भणिउं पवत्तो-भो भो देवाणुपिया !
को एस दुरप्पा मम सियोवरि वट्टइत्ति ? ते य सिरसावत्तं करयलपरिगहिंयं मत्थए अंजलिं कट्टु विजएणं वद्धा-
विरुण य सविणयं जंपिउमारद्धा-भो भो देवाणुपिया ! एस सुरिंदो सोहम्माहिंयइं महग्गा महाजुइं अपरिमविय-
सासणो सयमेव विहरइ । तथो तच्चयणसवणानंतरसमुप्पन्नामरिसवियंभंतमिउडिविकरालयणो भणिउं पवत्तो-
भो भो बुहा ! किमेवं अदिट्ठपरक्कमा मम पुरोवि । कइवयसुरपरियरियं एयं तुम्हे पसंसेह ? ॥ १ ॥
जइ उच्चट्ठाणठिओ किमेत्तिएणवि गुरुत्तणमिमस्स ? । न हु वरइ तरुसिरत्थो कथोडओ नीलकंठसिरिं ॥ २ ॥
अहवा तोलिज्जेते तुलाए वत्थुमि जं हवइ सारं । तं हेट्ठच्चिय ठायइ इयरं पुण वट्टइ उवरिं ॥ ३ ॥
एत्तो य लहू एसो अरिट्ठवसएण पाविओ सगं । जह कोइ लहइ रज्जं मायंगकुलप्पसूओऽवि ॥ ४ ॥
भो भो सुचिरं इमिणा सूरविहीणे रणेव सुरलोए । काउरिसेण व सुरसुंदरीहिं सद्धिं सुहं वुत्थं ॥ ५ ॥
संपइ पुण अवणिज्जइ इमस्स चिररूढदप्पमाहणं । दुट्ठा उवेहियवा न हुंति रोगव कुसलाणं ॥ ६ ॥
तत्थ-जो ववसायं न कुणइ सकमागयसामिभावपरिट्ठो । स सिरीएवि हु सुच्चइ सो काउरिसोत्ति कलिरुणं ॥ ७ ॥
इय होउ अज्ज सुरलोयसामिणो माणदलणमलिनत्तं । सहसच्चिय कीरंतं पयडं वलसालिणावि मए ॥ ८ ॥

एवं च चमरासुरदंस्स अपरिभाविद्यनियमुयवलमाहृद्वप्यजंषियं परिभाविऊग पशंषियं सामाणिग्रसुरेहिं-देव !
 एसो हि परभवोवज्जियविसिद्धुन्नपगरिससमासाइयपवरलोयथलञ्छिविच्छडो पुरंदरो, तुमं पुण उज्जभववसायबलाइ-
 गुणगणपरिगओऽवि भवणवासीण अम्हारिसाणं सामी, ता नाह ! मुयसु मच्छरं, उवभुंजेसु तुमं सकमावज्जियं सामि-
 त्तणं, एसो पुण सुरपुरसंपयं, निरत्थओ एत्थ परोप्परं विरोहो, किं कज्जं संसयतुलावलंबिएण नियमाहृपेणं ? , निउण-
 वुद्धीए परिचिंतउ सामी । अपरिभाविद्यकथाणं कजाणं उवमुज्जंतविसतरुफलाणं व पज्जंतविरसत्तणं, नहु एक्कसिंपि
 माणखंडणासमुब्भूओ अवजसंपसू सुकयसहस्सवारिधारावरिसणेणवि पसमिउं तीरइ, ता सामी ! सयमेव मुणइ
 जमेत्थ जुत्तं, को अम्ह तुमाहिंतो विवेयभावो ? ॥

इमं च निसामिऊण गरुयामरिसवसविसप्यंतभिउडिमीमभालयलो चमरासुरिंदो समुल्लविउमारद्धो-भो भो
 सामाणिथा ! सुरा निरत्थयं समुब्रहह परियायपरिणयविवेयविरहियं थविरत्तणं, जेण एवंविहसपहुपराभवपिसुण-
 वयणनिवहसुल्लवंताण दूरमक्कंतं तुम्ह गरुत्तणं, गुणा हु गोरवमुवजणिंति, एत्तो चिय लहुओऽवि परियाएणं गुणा-
 हियत्तेण गुरुव घेप्पइ जणेणं, कहमणहा अणुमेत्तोऽवि सुचित्तसुंदरयामहग्धाविओ सिरम्मि निहिप्पइ सरिसवो ? ,
 अहवा किमेएण ? , अदिट्टमहपरक्कमणं तुम्हाणं को दोसो ? , ता साहेह किं हेलाकरयलतालणुदुप्पयंतनिवडंतैहिं
 गंडुएहिं व कीलेमि कुलाचेलैहिं उयाहु गयणं गणविसप्पमाणकल्लोलपेल्लुल्लूरियतारयविमाणमालं निरुंभेमि पव्वल-
 पवणपक्खुभियजलहिजलवेलं ? , अहवा पयंडमुयदंडचंडिमावसपरिशत्तिं एगत्तीकरेमि सुवणत्तयं, इइ वहुप्पयारा-

श्रीगुणचंद
महावीरच०
७ प्रस्तावः
॥ २३७ ॥

मरिसभरचित्तवयणाडंचराऊरियभवणब्भंतरुच्छलंतपडिसद्वयच्छलेण अणुमन्निउव निगओ सकेण सह जुज्झिउं
सो भयभीयाए सामाणियसभाए, अह ईसिजायविवेगेण पुणो चित्तिं चमरेण-एए मम सामाणियसभावत्तिणो
असुरा वाढं भायंति पुरंदरस्स, ता सम्मं न सुणिज्झइ कज्जगई, जइ पुण तत्तो हवेज्ज गंजणा अओ तदभिहम्ममा-
णेण को मए सरणं पवज्जणिज्जोत्ति परिभाविऊण पउत्तो ओही, दिट्ठो य भयवं महावीरो सुसुमारपुरपरिसरतरुसंडे
पडिमापडिवन्नो, तं च दट्ठुण ससुट्ठिओ सयणिज्जाओ, नियंसियं देवदूसं, गओ नाणाविहवयरमयपहरणपडिहत्थाए
चोप्पालगनामाए पहरणसालाए, कयंतभुयदंडविन्भमं गहियं महप्पमाणं परिहरयणं, तयणंतरं साहिलासं नयणंजलीहिं
पिज्जमाणो असुरतरुणीहिं किंकायवयावामूढेहिं निरिक्खिज्जमाणो अंगरक्खेहिं दुव्विणीओत्ति उवेहिज्जमाणो
सामाणियासुरेहिं किंपि भविस्सइ इह इति संसइज्जमाणो भ्रवणवइवग्गेण निगओ चंमरचंचारायहाणीओ, वेगेण
य गच्छंतो संपत्तो भयवओ महावीरस्स समीवं, तिपयाहिणीकाऊण वंदिओ परमभत्तीए, पवत्तो विन्नवेउं, जहा-
नाह ! तुह पायपंकयाणुभावेण दुल्लहावि पुज्जंति मणोरहा, अओ इच्छामि तुह निस्साए पुरंदरं हयपरक्कमं परिमुक्कप-
डुत्तणाभिराममियाणि काउंति भणिऊण अवक्कतो उत्तरपुरच्छिमंमि दिसिविभागे, समारद्धो वेउवियसमुग्धाओ,
विउवियं वेगं महंतं घोरायारं जोयणलक्खण्णमाणमेत्तं सरीरं । तं च केरिसं ?-

उत्तुंगघोरसीसग्गभागधोलंतकुंतलकलावं । अंजणगिरिसिहरं पिव नवमेहसमूहपरियरियं ॥ १ ॥

सामानिक-
देवोपदेशः
गमनाय
वैक्रियं.

॥ २३७ ॥

अइधोरवयणकंदरुंरतदाढाकडपुदुपेच्छं । वयणुच्छलंतपज्जलियजलणजालाकलाविहं ॥ २ ॥
दिसिचक्कमुक्कउब्भडमुयदंडकंततोरयाचकं । उरंपजरुंदत्तणपच्छाइयसूरकरपसरं ॥ ३ ॥
गंभीरनाभिमंडिलपुत्तफणिमुक्कफारफुक्कारं । उद्दामदीहजंवाभरभज्जिरचलणतलदेसं ॥ ४ ॥
कवल्लिउमणं व ससुरासुरंपि तेलोक्कमेक्केहेलाए । भीमाणवि भयजणगं गयणयले पसरियं झत्ति ॥ ५ ॥

एवंविहेण य सरीरेण पहाविओ तुरियतुरियं सुराहिवइसंमुहं, तओ वेगवसवियम्भमाणमुहसमीरपवलत्तणपल्हत्थि-
यसवडंमुहावडंतसुरविमाणो लीलासमुच्छासियचलणकोडिताडियसमुचुंगसेलटालियगंडपाहाणपहयभूमिवट्ठो अंजणपु-
जमेहसंदोहकलयंठभमरनियरसरिसेण देहपहापसरेण लवणजलहिंवेलाजलुण्णीलेणव पूरयंतो गयणंतरं सरीरगरुयत्तणेण
भरितोव तिरियलोयं अणवरयगलगज्जिरवकरणेण फोडयंतोव बंभंडंभंडोदरं कत्थइ जलुडिं सुयमाणो कत्थइ रेणुकरं
किरंतो कत्थइ तिमिरनियरं निसिरंतो कत्थइ विज्जुपुजसुगिरंतो वाणमंतरदेवे भएण छिन्नधन्नं व कंपयंतो जोइसिय-
तियसे वित्तासित्तो फलिहरयणमंवरतले वियट्टमाणो निमेषमेत्तेण विलंघियसूरसत्तिनक्खत्तमंडलो पत्तो सुरपुरं ।

अह तारिसविगरालरूवाप्रलोयेणेण विम्बिया सुरसमूहा, हा किमेयंति समुद्धयंतीउ भयवसविसंडुलगलिअनीवी-
बंधणाओ(जाया)धंभियव विहाविया सुहडसत्था जीवियनिरवेक्खावि संखुद्धा अंगरक्खा वालव विचलत्तणसुवगया
लोयपाला, किंकायवयाविमूढा जाया सामाणियदेवा, अच्चंतं चमक्किया तायत्तीसा विसरसमारसंतो य नट्ठो एरावणो,

चमरिंदो पुण एगं चरणं पडमवरवेइयाए अवरं च सुहम्माए सभाए ठविऊण फलिहरयेणं महया संभेण तिवसुतो इंदकीलं ताडिऊण सरोसं एवं भणिउं पडत्तो-भो भो तियसाहम ! कहिं सो सगिहसच्छंदलीलाविलासलालसो असमिक्खिवत्थुसमत्थणवियक्खणो नियसोँडीरिमावगन्नियसेससुहडलोगो अदिट्ठकुसलमेत्तसंभावियसमग्गवेरिवग्गविजओ पुरंदरो ? कहिं वा अलियवियट्ठिमावगणियजुत्ताजुत्तसमाथारो सकज्जयसाहणामेत्तपयासियसामिसेवापराओ ताओ चउरासीइं सामाणियसाहस्सीओ ? कत्थ वा निष्फलकलियविहिपयंडपहरणाडंबराओ चत्तारि ताओ चउरासीओ आयरक्खदेवसाहस्सीओ ? कहिं वा उचुंगगिरिसिहरदलणदुल्ललियं तमियाणिं कुलिसं ? कत्थ वा ताओ अप्पडिमरूवलायन्नमणहराओ अणेगाओ अच्छरकोडीओ ? अरे मा कज्जविणासंमि भणिस्सह जहा चमरंचाराइणा अमुणियपयप्पयारेण छेलेण विणिहया अम्हे, एसोऽहं संपयं तुब्भे अणाहे जरतरं निम्मूलमुम्मूलेमि सकरालेट्ठुं फलिहरयेण चूरेमि, किं बहुणा ? जुगवमेव सरणविरहिए कीणासवयणकुहरे पक्खिवामि, कुणह जमिह कायद्वं सरेह सरणिज्जं मग्गह सजीवियसंरक्खणोवायं, अहवा दूरुन्नामियउत्तिमंगादंसियसब्भावसारा समप्पह सुरलोयसिरिं, किं निरत्थयमुद्वह पुरंदरपक्खवायं ? पयडोच्चिय एस ववहारो-जं चिरकालपरिपालियावि कुलंगणा कालंतरेऽवि नूणमणुसरइ पाणनाहं । अन्नं च-

अववइणच्च पुरंदर ! मह विरहे जं तए इमा सुत्ता । विणयपणयस्स तं पुण तुह सबमहं खमिस्सामि ॥ १ ॥

सुमिणेवि अदिट्ठमया नियनियभवणोदरेसु य निलुक्का । विलसंतु सुरसमूहा मम पयपणइप्पसाएण ॥ २ ॥
 अणुरूपइसमागमपमोयभरनिस्सरंतपुलइच्छा । सुरपुरलच्छी वच्छत्थलंमि कीलउ जहिच्छं मे ॥ ३ ॥
 अहवा किमिच्छिणं ?-मम बाहुपंजरंतरमल्लीणं तिहुअणंपि नीसेसं । आचंदकालियं वसउ मुक्कपरचक्कभयसंकं ॥ ४ ॥
 इय ताव कुण पणामं सुरिंद ! नो जाव उत्तिमंगंमि । मोडियमउडकडण्णं निवडइ निविडं फलिहरयणं ॥ ५ ॥
 असमिक्खियनियमुयविक्रमो तुमं जुज्झिउं मए सद्धिं । रंभातिलुत्तमाईण कीस वेहवमुवणेसि ? ॥ ६ ॥
 पढमं चिय कीरंते नयंमि नो दिंति दूसणं कुसला । कहविहु कज्जविणासे पच्छायावोऽवि नो होइ ॥ ७ ॥

एवं च असमंजसपलाविणं चमरमसुरिंदं निसामिऊण हेलए तिक्ककोवभरउक्कुडुभिउडिभंगुरियमुमयभीसणपलो-
 यणेण भणियं पुरंदरेण-रे रे दुराचारसिरसेहर दूरपरिमुक्कमेर चमरासुराहम दुट्ठचिट्ठिमामित्तचित्तासियतियससत्थ !
 पत्थेसि नूणमियाणिमपत्थणिज्जं ?, कहमन्नहा तुहेहागमणविसओ संभविज्जा ?, ता रे चारणोच्च ससरीरसंभवेण दसणा-
 इणा सुरहिच्च केसकलावेण सारंगोच्च कत्थूरिगाए चंदणतरुच्च सोरब्भेण सुयंगमोच्च फणारयणेण एस तुमं नियदपेण
 पणामिज्जसि विणासगोअरंति भणिऊण सिंहासणगएणं चिय सुरिंदेण सुमरियं वज्जं, तं च सुमरणाणंतरमेव उक्का-
 सहस्साइं विणिम्मुयंतं जालाकलावं निसिरंतं जलणकणकोडीओ विक्खिरमाणं फुल्लिंगमालासहस्सेहिं चक्खुवि-
 क्खेवमुप्पाएमाणं असेसहुयवहनिवहनिम्मियं व सयलसूरकरनियरविरइयं व समगतेयलच्छिविच्छडुसंपिंडणुप्पाइयं

व ठियं करयले पुरंदरस्स, मुक्कं च तेण, तं च तहाविहमदिट्ठपुवं वेगेणागच्छमाणं पेच्छिऊण संभगसमरमच्छरुच्छाहो सुमरियसामाणियासुरसिक्खावचणो वयणविणिस्सरंतदीहनिस्सासो पुब्बेहिं जइ परं पावेमि रसायलंति कयसंकप्पो संभमुप्पिच्छतरलतारयच्छिविच्छोहसंचलियनहंगणाभोगो कहिंपि अत्ताणं गोविउमपारयंतो भयवसपंकपमाणपाणिंसं- पुडपडियं फलिहरयणंपि अविगणंतो अविमुणियतक्कालोचियकायवो अलाहि सेसोवाएहिं, परं तिहुयणपहुणो पाय- पंकयमियाणिं सरणंति सुमरिऊण उडुचरणो अहोसिरो वेगगमणसमुपपन्नपरिस्समनिस्सरंतकक्खासेयसलिलोव उ- क्किट्ठाए चवलाए [दीहाईए] गईए जिणाभिमुहं पलाइउं पवत्तो, अविच—

निद्वलियदप्पविभवत्तणेण जायं न केवलं तस्स । लहुयत्तं देहेणवि वेगेण पलायमाणस्स ॥ १ ॥

एसो सो किं वच्चइ जेण तहा जंपियं हरिसमक्खं । पहसिजंतो इय दिन्नहत्थतालेहिं तियसेहिं ॥ २ ॥

तह कहवि देहपब्भारभरियभुवणोदरोऽवि चमरिंदो । तवेलं लहु जाओ जह न मुणिजइ पयंगोव ॥ ३ ॥

तं च कुलिसं सुरवइपयत्तपक्खित्तं जलणजालाकलावाउलियदिसामंडलं कवलयंतं व एक्केहलाए सयलंमाखंडल- पडिवक्खं जावऽज्जवि थेवमेत्तेण न पावइ सिरमंडलं ताव भयगरसर्रो-भयवं ! तुममियाणिं सरणंति जंपमाणो पविट्ठो जयगुरुणो उस्सग्गट्टियस्स चरणकमलंतरे चमरो एत्थंतरे सहस्सनयणस्स जाओ चित्तसंकप्पो-अहो न खलु दणुवइणो अप्पणो सामत्थेण सोहम्मकणं जाव संभवइ आगमणं, केवलं भगवंतं तित्थयरं अरिहंतचेइयं वा भावि-

अप्यं सुसमणं वा निस्साए काऊण इहागओ हविज्जा, ता वाढं अजुत्तं परभवदुहावहं एवमावडिहितिचिंतिऊण पउत्तो ओही, दिट्ठो य भयवओ पायपंकयमणुसरमाणो कुंथुव सुहुमदेहो चमरासुरिंदो, तं च दट्ठण सहसच्चिय जायचित्तचमक्कारो हाहा हओ मिह मंदभगोत्ति वाहरमाणो अच्चंतसिग्धाए गईए वज्जमगेण पहाविओ पुरंदरो, जाव य जिणुत्तमंगंमि चउरंगुलमपत्तं जायं वज्जं ताव तक्खणमेव पडिसंहरियमणेण, नवरं अइसिग्घगमणवसेण करयलसमीरणेण तरलिया जयगुरुणो कुंचिरा अगकेसा, तओ पुणो पुणो सदुच्चरियं निंदमाणेण तिपयाहिणी-काऊण वंदिओ सामी परमभत्तीए, खामिउमारद्धो य—

देव ! पसीयह न मए वियाणियं तुम्ह चरणनिस्साए । जं एसो चमरिंदो समागओ मं पराभवित्तं ॥ १ ॥

इण्ह चिय विन्नायं करयलपलहतिययंमि कुलिसंमि । ता पणयवच्छल ! लहुं अवराहमिमं खमसु मज्झ ॥ २ ॥

न पुणोवि भुवणवंधव ! संसारपरंपरापरमवीयं । एवंविहं अकिच्चं कइयावि अहं करिस्सामि ॥ ३ ॥

इति सविणयं खामिऊण जयगुरुं सक्को उत्तरपुरच्छिमदिसिविभागंमि ठाऊण वामेण चरणेण तिकखुत्तो भूमि-तलमवदालिऊण दणुनाहं भणिउं पवत्तो—भो भो असुराहिच ! सुंदरं तुमए कयं जमसेसजयजंतुसंरक्खणेक्कदिक्खि-यस्स पडुणो पयपंकयंतरे तिरोहिओऽसि, एवं च कुणमाणेण तए दढमावज्जियं मम हिययं, अवणीओ पुव्ववेरा-णुवंवो, जणिओ आमरणंतं अब्भिचरियणयभावो, ता विहरसु जहिच्छाए, भगवओ पहावेण नत्थि तुह ममा-

हितो भयंति आसासिऊण जहागयं पडिनियत्तो तियसाहिबो ।

चमरोऽवि हरिउक्करिसवियसंतवयणकमलो भगवओ पायकप्पपायवप्पभावपरिगहिओ निरुवसगं नीहरिऊण जहाविहिं भयवंतं पणमिऊण थुणिउमाढत्तो—

सयलजयजीवबंधव ! झाणानलदड्ढुकम्मवणगहण ! । तिच्चपरीसहसहणेक्कधीर ! जय जय महावीर ! ॥ १ ॥

सिद्धिवहुवद्धपडिबंध ! लुट्टसद्धम्मनंधुरनिहाण ! । चामीयरसरिससरीरं कंतिविच्छुरियदिसिनिवह ! ॥ २ ॥

नाह ! तुह पायछायालीणं नो भवभयंपि अक्कमइ । किं पुण सहावभंगुरगिरिदलणुद्धंतुरं कुलिसं ? ॥ ३ ॥

जत्थ तुह नाह ! सरणं उवेइ ससुरासुरंपि तइलोक्कं । पायतले तत्थ ठियस्स कह णु वयणिज्जाया मज्झ ? ॥ ४ ॥

पत्तच्चिय सुरपुरसंपयावि परमत्थओ मए देव ! । अब्भुदयमूलवीयं जं पत्तं तुम्ह पयकमलं ॥ ५ ॥

लब्भंति सामि ! जइ मग्गियाइं निरवग्गहाइं भत्तीए । पइजम्मं चिय ता तुम्ह चलणवासं लभेज्जमहं ॥ ६ ॥

इय चमरिंदो सब्भावसा रवयणेहिं संथुणिय वीरं । नित्थरियगरुहहरिभयमहन्नवो अइगओ सपुरिं ॥ ७ ॥

जयगुरुवि पभायसमए एगराइयं म्हापडिमं पडिसंहरिऊण निववंतो सुंसुमारपुराओ, कमेण य पत्तो भोगपुरं नयरं, तत्थ य महिंदो नाम खत्तिओ अकारणसमुप्पन्नतिच्चकोवाणुबंधो भयवंतं दट्ठूण खज्जरितरुलट्टिसुग्गीरिऊण धाविओ वेगेण हणणनिमित्तं, एत्थंतरे चिरदंसणपाउब्भूयभत्तिपब्भारो समागओ तं पएसं सणकुमारसुराहिबो, दिट्ठो य

सो तहाविहवेगेण जिणाभिमुहं इंतो, तओ तं निवारिऊण सुरिंदेण पणमिओ जयगुरू, पुब्बिया परीसहपराजय-
 पद्धानसरीरवत्ता, गओ य जहाभिमयं ।-भयवंपि वद्धमाणो पलीणमाणो सुरिंदकयमाणो । तत्तो विनिक्खमित्ता
 नंदिग्गमं समणुपत्तो ॥१॥ नंदीनामेण तहिं पिउमित्तेणं शुओ य महिओ य । तत्तो य नीहरित्ता समागओ मिंढय-
 ग्गमं ॥२॥ तत्थ य गोवो कोवेण धाविओ बालरज्जुयं धेत्तुं । जयगुरूणो हणणत्थं, सो य निसिद्धो सुरिंदेण ॥३॥

अह भयवं गामाणुगामगमेणेण पत्तो निरंतरधवलहरमालालंकिं सुविभत्ततिथच उक्कचचरेहिंरं कोसंविपुरिं,
 तत्थ य भूपालणगुणनाडीनिविडनिबद्धविपक्खरायलब्धिकंरंणुगो सयाणिओ नाम नराहिवो, तस्स य चेडगमहा-
 नरिंददुहिया अहिगयधम्मपरमत्था तित्थयरपायपंकयपूयणपरायणा मिगावई नाम भारिया, सुणियनिसेसरायं-
 तरचारो सुहुमबुद्धिभवपरिखालियरज्जभारो सुगुत्तो य अमच्चो, तस्स य सयावि जिणधम्माणुरागसंभिन्नसत्तसरी-
 रधाऊ नंदा नाम भज्जा, सा य सावियत्ति काऊण मिगावईए देवीए सद्धिचयंसियाभावं दंसेइ, अन्नो य सयलदरिसणभि-
 प्पायपरूवणानिरओ नरिंदसम्मओ तच्चावाई नाम धम्मपाढओ, तहा तत्थेव नयरीए विवणिजगचक्खुभूओ धणावहो
 नाम सेट्ठी, मूला य से भारिया, एयाणि नियनियकुसलाणुट्ठाणसंगयाणि वसंति, तत्थ य भयवया पोसवहुल-
 पाडिवए एवंविहो दुरणुचरो अभिगहो पडिवन्नो, जहा-जइ कालायसनियलवद्धचलणा अवणीयसिरोरुहा सोय-
 भरावरुद्धकंठगग्गरगिरं रुयमाणी रायकन्नगावि होऊण परगिहे पेसत्तणं पवन्ना तित्ति दिणाइं अणसिया घरभंतर-

निहितैकचलणा वीयचलणलंघियघरदुवारदेसा पडिनियत्तेसु सयलभिकखायेसु सुप्पेण कुम्मासे पणामेइ ता परमहं पारेमिति कयनिच्छओ पुरजणेण अणुवलक्खिज्जमाणाभिगहचिसेसो वावीसपरीसहसहणट्ठाए असंपज्जंत- जहिट्ठियंभोयणोऽवि पइदिवसं उच्चावएसु मंदिरेसु पयत्तो परिभमिउं जयगुरू । पुरजणोऽवि भयवंतं अगहियभि- कखं अणुदिणं गेहंगणाओ चेव नियत्तमाणं पेच्छऊण अच्चंतसोगसंभारतरलियमाणसो किंकायच्चयावामूढो चिंति- उमारद्धो, कहं ?—

किं दुहनिबंधणेणं धणेण ? किं तेण अणुयभावणे ? । भोगोवभोगलीलाए ताए किं वा दुहफलाए ? ॥ १ ॥
जइ एवंविहसुणिपुंगवस्स गेहंगणं उवगयस्स । पाणन्नपयाणेणवि उवयारे नेव वट्ठामो ॥ २ ॥ जुम्मं ॥
कह वा कम्मजलाउलमणेगदुहमयरभीसणावत्तं । संसारसायरमिमं दाणेण विणा तरिस्सामो ? ॥ ३ ॥
अहवा धन्नाण गिहे पविसइ एवंविहं सुमुणिरयणं । भिक्खापरिग्गेहेण य अइधन्नाणं जणइ हरिसं ॥ ४ ॥
जइ एक्कं चिय वेलं कहमवि पडिलाभिओ हवइ एसो । ता पाणिपह्वे संवसंति सुरमोक्खसोक्खाइं ॥ ५ ॥
इय जह जह जिणनाहो भूरिपयारेहिं दिज्जमाणंपि । भिक्खं नो अभिकंखइ तह तह खिज्जइ पुरीलोगो ॥ ६ ॥
एवं च चत्तारि मासे कोसंबीए हिंडमाणो भयवं अन्नया पविट्ठो सुगुत्तमंतिणो भवणं, दूराओ चिय दिट्ठो सुनं- दाए, पच्चभिन्नाओ य जहा सो एस भयवं महावीरसामिति, तओ अणाइक्खणिज्जं पमोयपब्भारसुव्वहंती उट्ठिया

झडत्ति आसणाओ, नीणिआ परमायेणं भिक्खा, भयवंपि निग्गओ गेहाओ, सुनंदावि अद्धिइं काउमारद्धा, ताहे
 दासीहिं भणियं-सामिणि ! एस देवज्जओ न सुणिज्जइ केणइ कारणेणं दिणे दिणे अगहियभिक्खो तक्खणे पडि-
 नियत्तइ, एवं भणिए तीए नार्य, जहा-नूणं कोइ अभिग्गहविससो, तेण तंमि असंपज्जमाणे अकयकज्जो चेव निज्जाइ
 जिणंदो, इमं च से चिंतयंतीए जाओ बाढं चित्तसंतावो पम्हुडा गेहवावारा विसुमरिओ सरीरसिंजारो पलहत्थियं
 करकिसलए गंडयलं, एत्थंतरे समागओ सुगुत्तामच्चो, पलोइया य एसा तेण, तओ पुच्छिया, जहा-कमलसुहि !
 कीस निकाएणं रणरणयसुव्वहंतिव लक्खिज्जसि ? , न ताव सुमरेमि मणांगंमि अत्तणो अवरहं, मइ अविणयपरि-
 हारपरायणे परयणोऽवि न संभाविज्जइ तुह पडिक्कलकारित्ति, तीए भणियं-पाणनाह ! अलमलियसंभावणाहिं,
 नत्थि थेवमेत्तोऽवि कस्सइ अवराहो, केवलं जस्सप्पभावेण लीलाए लंघिज्जइ दुग्गमोवि भवन्नवो मणोरहागोयंरंवि
 पाविज्जइ अपुणागमं सिवपयं अइदूखल्लसिओऽवि विद्विज्जइ अकल्लाणकोसो तस्स भयवओ सुवणनाहस्स वद्धमा-
 णसामिणो वट्ठइं वासराइं अणसियस्स, न सुणिज्जइ कोइ अभिग्गहविससो अणेण गहिओत्ति, अओ किं तुम्ह
 बुद्धीविभवेण ? किं वा अमच्चत्तेणं ? जइ एवं अभिग्गहं न जाणहत्ति, अमच्चेण भणियं-पिए ! परिचयसु संतावं,
 कल्ले तहा करेमि जहा एस अभिग्गहो सुणिज्जइ, इय एयाए कहाए वट्ठमाणीए विजया नाम पडिहारी मिगावईए
 देवीए संतिया, सा केणइ कारणेण आगया, तसुद्धावं सोऊण मिगावईए सबं परिकहेइ, इमं च सोचा मिगावईवि

महादुक्खेण अभिभूया, सोगाउरा जाया, राया य तं पएसमणुपत्तो पुच्छइ-देवी ! किं विमणदुम्मणा लक्खिज्जसि ? , तीए भणियं-देव ! किं परिकहेमि ? , तुम्हे दुग्गदुग्गइमणमूलेण इमिणा रज्जभरेण पच्छाइयविवेया एत्तिंयपि न सुणह, जहा कत्थ सामी विहरइ ? , कहां वा भिक्खं परिभमइत्ति, बडुं निब्भच्छिऊण साहिओ अभिगहवइयरो, राइणा भणियं-देवि ! वीसत्था होहि, कल्ले सबपयोरेहिं जाणामि परमत्थंति भणिऊण उवविट्ठो अत्थाणमंडवंमि, वाहराविओ सुगुत्तामच्चो, समागओ एसो, तओ पणमिऊण राइणो पायपीठं उवविट्ठो जहोचियासणे, भणिओ राइणा-अहो अमच्च ! किं जुत्तमेयं तुज्झ जं भयवंतं इह विहरमाणंपि न जाणसि ? , अहो ते पमत्तया अहो ते सद्धम्मपरंमुहया, अज्ज किर सामिस्स चउत्थो मासो निरसणस्स अविन्नायाभिगहविसेसस्स वट्टइत्ति, सुगुत्तेण भणियं-देव ! अवरावरकज्जंतराऊरियघवासवासंगित्तेण न किंपि सुणियं, इयाणिं पुण जं देवो आणवेइ तं संपा-डेमिन्ति भणिए रत्ता सहाविओ तच्चावाई धम्मसत्थपाढगो, पुच्छिओ य एसो-जहा भइ ! तुह धम्मसत्थेसु सब-पासंडाणं आयारा निरूविज्जंति, ता साहेहि को भगवया अभिगहविसेसो पडिवन्नोत्ति ? , तुमंपि अमच्च ! बुद्धि-वलिओ, अओ वीमंसेसु को एत्थ उवाओ ? , खणंतरं च वीमंसिऊण तेहिं भणियं-देव ! बहवे दव्वखेत्तकालभावभे-यभिन्ना अभिगहविसेसा सत्त पिंडेसणाओ सत्त य पाणेसणाओ हवंति, अओ न नज्जइ कोडवि अभिप्पाओत्ति । तओ रत्ता सबत्थ नयरीए काराविया उग्घोसणा, जहा-भयवओ भिक्खं भमंतस्स अणेगप्पगोरेहिं भिक्खा नीणि-

यवन्ति, इमं च निसामिज्ज परलोयसुहकंखिणा विचित्तनेवत्थधारिणा अण्णमत्तचित्तेण नयरज्जेण पइण्णामंदरस्स गोयरचरियं पविट्ठस्स भयवओ पइदिणं पणामिज्जइ अणेगण्णयारेहिं भिक्खा, न य विण्णइ सामिणा, एवं च कहिं पि असंपज्जमाणजहासमीहियपिंडविसुद्धीवि अमिलाणसरीरलायन्नो अदीणमणो य ठिओ तीए चेव पुरीए भयवं । एवं ताव एवं ।

इओ य-सयाणियस्स रन्नो चारपुरिसेहिं आगंतूण कहियं जहा-देव ! तुम्ह पुव्वेरी दहिवाहणो राया संपयं थोवपरिवारो पमत्तो य वट्ठइ, अओ जइ पंचरत्तमेत्तेण देवो तत्थ वच्चइ ता निच्छियं समीहियत्थसिद्धी जायइत्ति-पमणिए राइणा दवाविथा सन्नाहभेरी, संबूढा सुहडा संखुद्धा सामंता, चलिओ राया महासामग्गीए, आरूढो य नावासु, तओ अणुकूलयाए पवणस्स दक्खत्तणेणं कन्नधारजजस्स एगरयणिमेत्तेण अचित्तियागमणो संपत्तो चंपा-पुरी, असंखुद्धा चेव वेढिया एसा, दहिवाहणोऽवि सामग्गिण विणा जुज्झिमपायंतो किमेत्थ पत्थावे कायवन्ति वाउलमणो भणिओ मंतिजणेण-सामि ! कीस मुज्झइ, सबहा एत्थावसरे पलायणमेव जुत्तं ।

यतः-त्यजेदकं कुलस्यार्थं, ग्रामस्यार्थं कुलं त्यजेत् । ग्रामं जनपदस्यार्थं, आत्मार्थं पृथिवीं त्यजेत् ॥ १ ॥

प्रस्तावसदृशं वाक्यं, सद्भावसदृशं प्रियम् । आत्मशक्तिसमं कोपं, यो जानाति स पण्डितः ॥ २ ॥

विक्रमावर्जिताः सद्यः, संपद्यन्ते पुनः श्रियः । जीवितव्यमवक्रान्तं, तेन देहेन दुर्लभम् ॥ ३ ॥

सर्वेषामेव वस्तूनां, जीवितव्यमनुत्तमम् । तदर्थं राज्यलक्ष्म्याद्यास्तच्चैत् नष्टं वृथा परम् ॥ ४ ॥

एवं तेहिं भणिओ सरीरमेत्तेण पलाणो दहिवाहणो, संयाणियरन्नावि घोसाविंयं नियखंधावारे, जहा—भो भो ! दंड-
नाहसुहडपमुहा चमूचरा ! गेणहेज्जह जहिच्छाए एत्थ नगरीए जं जस्स रोयइ, मां ममाहितो मणांगं पि संकेज्जहत्ति,
एवं जग्गेहे थुठ्ठे पयट्ठो रायलोगो भग्गो पागारो विहाडियाइं गोपुरकवाडाइं लुंदिउमारद्धं असेसं पि नयरं, तहाविहे
य असमंजसे बहुमाणे दहिवाहणस्स रत्तो अग्गमहिसी धारिणी नाम देवी वसुमईए दुहियाए समं इओ तओ पलाय-
माणी पत्ता एगेण सेवगपुरिसेण, रायावि संपाइयसमीहियपओयणो पडिनियत्तो नियनयरिहुत्तं, सो य सेवगो
धारिणीदेवीए रुवेण लायन्नेण सोहग्गेण य अवहरियहिओ पहे वचंतो जणाणं पुरो भणइ—एसा मम पत्ती होही,
एयं च कन्नगं विक्किणिस्संति, एयं च से उल्लावं सुणिऊण भयभीया धारिणी चित्तिउं पवत्ता—

कह ससहरकरधवलं कुलंमि नीसेसभुवणपयंडंमि । जाया महं उष्पत्ती चेडयनरनाहगेहंमि ? ॥ १ ॥

कह वा नमंतसांमंतमउल्लिंढग्गपायवीढेण । दहिवाहणेण रत्ता ठवियाडहं पणइणिपयंमि ? ॥ २ ॥

कह वां जिणंदवयणारविंदसंभूयसमयसवणुत्था । मम सययं वसइ मणे अकज्जविवरंमुहा बुद्धी ? ॥ ३ ॥

कह एस हीणसत्तोवि मुक्कमेरं ममं समुद्दिस्स । वागरेइ जहा महिलं अहमेयं किल करिस्सामि ? ॥ ४ ॥

ता पावजीव ! अज्जवि अस्सुयपुवं इमं पि सुणिऊण । किं निहरेसि न निहज्ज ! गंजणं सहसिं सीलस्स ॥ ५ ॥

हरहासहंसधवलं सीलं मयलंति नो सुकुलजाया । करिकन्नतालंचंचलजीवियकज्जेण कइयावि ॥ ६ ॥

कह वाविहु मम दुहिया एसा उच्छंगसंगसंभूया । परहत्यगया धरिही नियजीयं विरहसंतता ? ॥ ७ ॥

इय एवंविहसंकपपकपणुपन्नतिवदुक्खाए । निव्वमच्छियं व जीयं नीहरियं से उरो भेतुं ॥ ८ ॥

तीसे य अपत्तकालभरणं अवलोइऊण चित्तिं तेण सेवगपुरिसेण, अहो दुट्ठं मए भणियं—महिला होहिस्ति, एसा हि महाणुभावा कस्सइ पुरिसोत्तमस्स भज्जा संभाविज्जइ, अओ चिय मम दुव्वयणायन्नणेण संखुहियहियया मया, ता किमित्थ अइकंततसोयेणेण ?, एवं कन्नगं इयाणि न किंपि भणिस्सामि, मा एसावि मरिहिति । ताहे महुरवयणेहि अणुअत्तमाणा आणीया कोसंवीं नयरिं, विक्कयनिमित्तं च उड्डिया रायमग्गे, अह धम्मकम्मसंजोएण तप्पएस-जाइणा दिट्ठा सा धणावहसेट्ठिणा, चित्तिं चउणेण-अहो एरिसाए आगिईए न होइ एसा सामन्नजणदुहिया, जओ अणलंकियावि जलहिवेल्हव वहइ किंपि अपुवं लावन्नं, किससरीरावि मयलंछणलेहव पायडइ कंतिपडलं, ता जुज्जइ एसा मम बहुदददाणेण गिणिहत्तए, मा हीणजणहत्यगया पाविही वराई अणत्थपरंपरं, एयसंगोवणेण य जइ पुण इमीए सयणवग्गेण ममं समागमो होज्जत्ति कलिऊण जेतियं सो मोहं भणइ तत्तियं दाऊण गहिया, नीया सगिहे, पुच्छिया य-पुत्ति ! कस्स तं धूया ? को वा सयणवग्गो ?, तओ उत्तमरायकुलपसूयत्तणेण सयं नियव-इयरं कहिउमपारयंती ठिया एसा मोणेणं, पच्छा सेट्ठिणा धूयत्ति पडिच्चन्ना, समप्पिया मूलाभिहाणाए सेट्ठिणीए, संलत्ता य एसा-जहा पिए ! धूया इमा तुह मए दिन्ना, ता गोरेवेण संरक्खेज्जासि, एवं च जहा निययघरे तहा

सा तत्थ सुहेण संवसइ, ताए य सो सेट्ठी सपरियणो लोगो य सीलेण विणएण वयणकोसहेण य बाढं रंजिय-
हियओ समाणो चंदणसिसिरसहावत्तणओ पुद्वाभिहाणमवणेऊण चंदणत्ति वीयं नामं ठवेइ, एवं सा चंदणत्ति परि-
यणेण वाहरिज्जंती वड्डिउमारद्धा, गच्छंतेसु य दिणेषु विथंभियो से ईसि जुवणारंभो, तवसेण य समुल्लसिओ
सचिसेसं लायन्नपगरिसो, विजियकुवलयविब्भमं वित्थरियं नयणजुयलं, अलिकुलज्जलकसिणो दीहतत्तणं पत्तो केस-
पासो । अविय—

रुवपरिवज्जिओऽविहु जुवणसमयंमि हवइ सस्सिरीओ । किं पुण सभावओ चिय सुकुमारा सा नरिंदसुया ? ॥ १ ॥

तीसे य पइदिणं वड्डुमाणिं रुवसंपयं पलोयंती मूला सेट्ठिणी बाढं मच्छरमावहइ, परिचिंतेइ य, जहा—को एयं
सद्धिज्जा जन्न इमं सेट्ठी परिणेऊण घरसामिणी करेज्जा ? ता सबहा मम विणासाय होअवमेयाए, अओ जइ
किंचि छिद्दं पावेमि ता एयं ववरोएमि । अन्नया य सो धणावहसेट्ठी गिम्हुणहकिलंतदेहो विवणिपहाओ आगओ
नियमंदिरं, तम्मि य पत्थावे परियणाओ नत्थि कोऽवि जो चलणपक्खालणं करेइ, ताहे अइविणीयत्तणेण चंदणा
समुट्ठिया पाणियं गहाय पायसोहणत्थं, निवारिज्जमाणावि सेट्ठिणा जणगोत्ति कलिऊण पयट्ठा धोविउं, अह नीस-
हत्तणओ कुमारभावस्स सिट्ठिलियवंधणो होऊण निवड्डिओ भूमियले दीहो से कुंतलकलावो, मा चिकखल्ले पडि-
हित्ति करकलियलीलालट्ठीए समुक्खित्तो निविथारमणेण सेट्ठिणा, वड्डो य । एत्थंतरे अणवरयछिद्दपेच्छणपराए

ओलोथणंतरगयाए दिट्टमिमं पाचाए अणत्थमूलाए मूलाए, ताहे ईसाभरवित्थरंतदढ सोवपाडलच्छीए इत्थीसमा-
 वओ चिय अचंतं तुच्छहिययाए चित्तियमेयाए इमं-जं पुट्ठिं तक्किं मए आसि तमियाणिं पयडत्तणमणुभवइ विगप्प-
 परिहीणं, कहमन्नहा जणगत्तं वायामेत्तेण जंविऊण पुरा सेट्ठी इमीए दइओव केसपासंवि संजमइ, ता जावज्जवि लज्जे
 समुच्चिऊणं न पणइणिपयंमि ठवेइ सेट्ठी एयं ताव उवायं करेमि अहं, इय सुविसुद्धंवि जणं विवरीयं नियमईए
 कलिऊण मूला मूलाउ चिय उद्धरिउं चंदणं महइ । अह पक्खालियवलणे खणं कयवीसामे बाहिं नीहरियंमि
 धणावहे ईसावसुग्गपन्नमच्छराए सेट्ठिमज्जाए वाहराविऊण पहाविंयं मुंडाविंयं चंदणाए सीसं, वहुं ताडिऊण लोहसं-
 कलाए चरणे निगडिऊण य पक्खित्ता एसा दूरयरमंदिरंमि, दिन्नं निविडकवाडसंपुडं, भणिओ य परियणो-जो
 सेट्ठिणो इमं वइयरं साहिस्सइ तस्सवि एस चेव दंडो मए कायवो, अओ वाढमापुच्छमाणेडवि सेट्ठिंमि न कहे-
 यवमेयंति पुणो पुणो पन्नविऊण गया सगिहं । विगालसमए य समागओ धणावहो, कहिं चंदणत्ति पुट्ठिओ
 परियणो?, मूलाभएण न सिद्धं केणावि, तेण नायं-पासायतले कीलंती भविस्सइ, एवं रयणीएवि पुट्ठिथा, तत्थवि
 तेण नायं-जहा पसुत्तत्ति, नवरं बीयदिवसेडवि न दिट्ठा, तइयदिणे य अचंतमाउलचित्तस्स आपुच्छमाणस्सवि पुणो
 पुणो जाव न कोइ साहेइ ताव जाया से आसंका-मा केणइ विणिहया होजत्ति, समुग्गपन्नगाढकोवो भणिउं पवत्तो-
 अरे रे साहेह अवितहं तीसे पउत्तिं, अहवा भे सहत्थेण मारइस्सं, जओ एरिसमुपउत्तडंभाडंबरेण न सुणिजइ तुम्ह

कुसलत्तर्णन्ति भणिण् चित्तियमेक्काए थेरदासीए, जहा जीवियहि बहुकालं सयमेव, पच्चासन्नभियाणिं भरणं, एत्तो-
ऽवि किं करिस्सइ मे मूला?, ता साहेमि चंदणं, जीवउ भम जीविणएणवि सा वराई, परजीवरक्खणं हि महापुञ्जं
बुचइ समयसत्थेसुत्ति चित्तिज्जण सिट्ठो सेट्ठिणो परमत्थो । दंसियं च तं गिहं जत्थ सा अवरुद्धा अच्छइत्ति, तओ
गंतूण उग्घाडियं तं गिहं सेट्ठिणा, पलोइया य सिरोऽवणीयकेसपभारा छुहाकिलाभियसरीरा मत्तमायंगचलणमलिय-
कमलमालच्च विमिलाणदेहच्छवी चंदणा, तं च दट्ठूण गलंतवाहण्णवाहाउल्लोयणो-युत्ति ! वीसत्था होहित्ति समा-
सासिज्जण गओ महाणससालाए, निरुवियाई भोयणभंडाई, कूराइयं च विसिट्ठं भोयणमपेच्छमाणेण कुम्मासे चिय
सुप्पकोणे घेचूण समप्पिया चंदणाए, भणिया य-युत्ति ! जाव अहं तुह नियलभंजणनिमित्तं आणेमि लोहयारं ताव
भुंजसु तुमं एयंति भणिज्जण गओ सेट्ठी, सावि सुप्पप्पणाभिए दट्ठूण कुम्मासे करिणिव जूहपेम्भट्टा नियकुलं संभ-
रिज्जण सोइउं पवत्ता । कहं?—

जइ ताव दइव ! तुमए नरवइगेहं अहं चिणिम्मविया । ता कीस एरिसावयमहणवे दुत्तरे खित्ता ? ॥ १ ॥

सा रायसिरी सो जणणिजणगसब्भावनिम्भरो नेहो । कह सवंपि पणट्ठं गंधवपुरच्च वेणेण ? ॥ २ ॥

खणमुल्लसंति उट्ठं खणेण निवडंति हेट्ठओ सहसा । खरपणुद्धुयधयवडसमाइं ही विहिंवलिसियाइं ॥ ३ ॥

इय दुववहसोगभरावरुद्धकंठवलंतवयणा सा । निवडंतसलिलवाहण्णवाहधोयाणणा बाला ॥ ४ ॥

तण्हाछुहाकिलामियकवोलमह पाणिपल्लवे ठविउं । वयणं खणंतरं रोचिऊण दीहं च नीससिउं ॥ ५ ॥
ते सुप्पकोणनिसिए कुम्मासे सुणिमणं व निन्नेहे । गिण्हइ भोयणहेउं किमभव्वं छुहकिलंताणं ? ॥ ६ ॥
अह चिंतियमेयाए जइ एज्ज इमंमि कोइ पत्थावे । अतिही ता से दाउं जुज्जइ मह भोयणं काउं ॥ ७ ॥
इति परिभाविऊण पलोइयं दुवाराभिसुहं, एत्थंतरे चुन्नियचाभीयरेंणुसुंदरेण कायकंतिपडलेण पूरयंतोव गयण-
यल्लगणं उवसंतकंतदिट्ठिप्पहापीऊसवरिसेण निव्वयंतोव दुहसंततत्तपाणिगणं नगनगरसिरिवच्छमच्छसोवत्थियलंछिएण
चलणजुयलेण विचित्तचित्तंकियं व कुणमाणो महीयलं सुहकम्मनिचओव पच्चक्खो अहाणुपुवीए विहरमाणो
समागओ तं पएसं भयवं महावीरजिणवरो, तयणंतरं अप्पडिमरूवं भयवंतं दट्ठूण अचंतमसारं कुम्मासंभोयणं च
निरिक्खिऊण दूरमजुत्तमेयं इमस्स महासुणिस्सत्ति विभावमाणीए सोगभरगगरगिरिए गलंतवाहप्पवाहाउल्लो-
यणाए भणियमणाए-भयवं ! जइवि अणुचियमेयं तहावि मम अधन्नाए अणुगहड्डं गिण्हइ कुम्मासंभोयणंति,
भयवयावि धीरहियएण निरुचिऊण समग्गाभिग्गहविसुद्धिं पसारियं पाणिपत्तं, तीएवि निविडनिगडजडियं कह-
कहवि दुवारस्स वाहिरुद्धेसंमि काऊण चलणमेक्कमवरं च भवणब्भंतरंमि सुप्पेण पणामिया कुम्मासा, अह जयगुरुग-
रुयाभिग्गहपूरणपरितुट्ठा गयणयलमवयरिया चउच्चिहा देवनिवहा पहया दुंदुही पडिया य पारियायमंजरीसणाहा
भणिरभमरोलिसंवलिया कुसुममुट्ठी वरिसियं गंधोदयं निवडिया अद्धत्तेरसकोडिमेत्ता सुवण्णरासी मंददोलियविलया

य बह्वरीकला पवाइओ सुरभिसंभरीणो वियंभियो भवणब्भंतरे जयजयारवो । अविय—

दिसिदिसिमिलंतहरिसियनायरजणजणियवहलहलबोलं । नचंततरुणिसत्थं वज्जंताउज्जसंघायं ॥ १ ॥

पइखणपहिट्टसुरगणतिवइप्फोडणनिनायभरियनहं । मंगलमुहलसुरंगणसमूहसंसोभियदियंतं ॥ २ ॥

इय जयपहुपारणगे न केवलं हरिसियं तमेव पुरं । सविसेसरंजियमगा जाया पायालसग्गावि ॥ ३ ॥

एवंविहे य परमपमोयसंभारे समुप्पन्ने मुणियजयगुरुपाणगयुत्तंतो समागओ केणुगाखंधाधिरूढो पहाणपुरजणा-
णुगओ अंतोउरसमेओ सयाणियनरनाहो, अमच्चोडवि भज्जासहिओ संपत्तो सेट्ठिमंदिरं, पेंखोलिरतारहाररेहंतवि-
च्छिन्नवच्छत्थलो माणिकमउडदिप्पंतउत्तिमंगो कडयतुडियथंभियबाहुपरिहो पुरंदरो य, तीसे य चंदणाए देवयाणु-
भावेण पुवंपिव नीहरिओ पवरचिहुरभारो नियलाणिवि जच्चकंचणमयाणि नेउराणि जायाणि, अन्नेहि य हारद्धहारक-
डिसुत्तयकडयंकुंडलतिलयंपमुहरयणाभरणेहिं अलंकियमसेसं सरीरं । एत्थंतरे संपुलो नाम दहिवाहणरत्नो कंचुइज्जो
सयाणियरत्ना पुवं बंधिऊण जो आणियो आसि सो तक्खणं चिय वसुमइं दट्ठुण जायपच्चभिन्नाणो सुमरियपुव्वसुव-
रिओ तीसे पाएसु निवडिऊण मुक्कपोक्कारं रोविउमारद्धो, महुवरयणेहिं आसासिऊण कोऊहलेण पुच्छिओ रंइणा-
भइ ! केण कारणेण एयाए पायपंकए निवडिऊण सहसच्चिय अचंतसोगनिब्भरं परुत्तोडसि ?, तेण जंपियं—देव ! चंपा-
पुरीपरमेसरदहिवाहणरायगमहिसीए धारिणीदेवीए असेससीमंतिणीतिलयभूया एसा, कंहं तारिसविभवसमुदयं

पाविऊण इयाणिं नियजणजिजणगरहिया परंगेहे वसइत्ति एएण कारेणं, राइणा भणियं-भइ ! मा सोएसु
 असोयणिजाा हि एसा जीए तिहुयणेक्कदिवायरो भवगत्तपंडतजणलग्गणेक्खंभो भयवं सहत्थेण पडिलाभिओ ।
 भिगावईए भणियं-जइ एसा धारिणीडुहिया ता मम भगिणीधूया हवइत्ति । एत्थ पत्थावे शुवमाणो सुरवइपमुहेहिं
 सामी पंचदिणोणछम्मासतवपज्जंतकयपारणगो नीहरिओ धणावहंसदिराओ, अह अञ्जुक्कड्याए लोभस्स अववाय-
 निरेवेक्खत्तणओ पडुभावस्स सयाणियराया तं सुवणणवुड्ढिं गहिउभारद्धो, तओ पुरंदरेण सुणिऊण से चित्तवित्ति
 भणियं-भो भो महाराय ! न एत्थ सामिकोडुवियभावो, किंतु जस्स कस्सइ सहत्थेण एसा कन्नगा इमं वियइ
 तस्सेव हवइ, एवं च भणिए पुच्छिया रत्ता चंदणा-पुत्ति ! कस्सेयं दिज्जइ ?, तीए भणियं-किमिह पुच्छणिज्जं ?,
 एयस्स चैव निक्कारणवच्छलस्स जीवियदाइणो मम पिउणो धणावहसेट्ठिणो पणावहत्ति, ताहे सेट्ठिणा संगोविया
 वसुहारा, पुणोऽवि सेक्केण भणिओ राया-एसा चरिमसरीरा भोगोवभोगपिवासापरंमुही महाणुभावा भयवओ बद्धमा-
 णस्स समुप्पन्नैकवल्लोयस्स पढमा अज्जाणं संजमुज्जोगपवित्तिणी सिस्सिणी भविस्सइ, अओ सम्मं रक्खेज्जासि इति
 भणिऊण अहंसणमुवगओ तियसाहिवो । राइणावि कन्नंतेउरे सबहुमाणं संगोविया चंदणा । तयणंतरं च असारथं
 संसारस्स तरलतरंगभंगुरत्तणं संजोगस्स कुसग्गयजललवंचवलत्तणं जीवियव्वस्स पज्जंतविरसत्तणं विसयपडिंबधस्स
 परिभावयंती सा गमेइ कालं, इमे य मणोरहे करेइ, जहा-

भगवद् पुरंदरदत्ते ! जणिहिसि तं वासरं तुमं कइथा ? । जत्थ सहत्थेण जिणो उत्तारेही भवाओ ममं ॥ १ ॥
कइथा ससुरासुरजीवलोथमज्झट्ठियस्स जयगुरुणो । वयणामयं पिबिस्सामि सबणपुडएहिं अचिरामं ॥ २ ॥
कइथा निस्सेयससोक्खमूलहेज्ज खणो भविस्सइ सो । देहंमिवि निरेक्खा निस्संगा जत्थ विहरिस्सं ॥ ३ ॥
कइथा उग्गमउप्पायेणोसणादोसलेसपरिहीणं । पिंडं अन्नेसंती भमिहं उच्चावयगिहेसु ॥ ४ ॥
इय पघरमणोरहकप्पणाहिं तीसे दिणाइं वोळिति । भावेण सच्चविरइं फासंतीए ससत्तीए ॥ ५ ॥
मूलाचि सेट्ठिणी सुणियचित्तेण बहुप्पयोरहिं निंदिया नयरीजणेण ।

जयगुरुवि पुरागराइसु परिब्भमंतो गओ सुमंगलाभिहाणगामे, तत्थ सणंकुमारसुरिंदो भत्तीए तिप्पयाहिणी-
काऊण भगवंतं वंदइ पियं च पुच्छइ, अह खणमेक्कं पज्जवासिऊण सट्ठणो पडिनियत्ते सुरिंदे सामी सुच्छेत्तसंनिवेसंमि
वच्चइ । तत्तोचि माहिंदकप्पाहिवइणा हरिसुक्करिसेणं वंदिओ समानो विनिक्खमिऊण पालयं नाम गासं पडिओ,
तहिं च धाहिलो नाम वाणिओ देसजत्ताए पयट्ठो सामिं संसुहमितं दट्ठूण अमंगलंतिकाऊण रोसवसायंविच्छो
नीलपहापडलपल्लवियगयणमंडलं करवालमायट्ठिऊणं एयस्स चैव समणगस्स मत्थए अवसउणं निवाडेमिति पहाविओ
वहतथं वेगेण, एत्थंतरे सुमरियसुरिंदाएसेण पुच्चभणियसिद्धत्थवंतरेण छिन्नमेयस्स सहत्थेण सीसं, तंमि च विणिहए
अहासुहं विहरमाणो जयगुरु पत्तो चंपानयरीए, ठिओ साइदिन्नमाहणस्स अग्गिहोत्तवसहीए एगदेसंमि, जाओ य

दुवालसमो वासारत्तो, अह चाउम्मासखमणपडिबन्नस्स सामिणो माणिभद्दुन्नभदनामाणो वाणमंतरसुरिदा भत्ति-
भरमुब्वहंता रयणीए समागंतूण चत्तारिवि मासे जाव पूयं करेति, ते य दद्रूण विम्बियमणो साइदत्तमाहणो विचिं-
तेइ-किं एस देवज्जगो जाणइ किंपि? जं देवा एयमणवरयं पूयंति पज्जुवासिंति य, तओ परिक्खानिमित्तं
जंपियमणेण—

भयवं! एत्थ सरीरे करिसिरपमुहंगसंगए अप्पा । को भणइत्ति? तत्तो भवोत्ति जिणेण से कहियं ॥ १ ॥

जो अहमेवं मन्नइ, केरिसओ सो? अइव सुहुमोत्ति । सुहुमंपि किं भणिज्जइ?, इंदियगेज्झं न जं होइ ॥ २ ॥

एत्तो चिय सदानिलंगंधाईया, लहंति न कयाइ । अत्तववएसमेए, जं गेज्झा गाहगो अप्पा ॥ ३ ॥

इय एवमाइपसिणप्पवंचपरमत्थवित्थरे कहिए । विप्पो उवसंतमणो जयगुरुणो कुणइ बहुमाणं ॥ ४ ॥

अह पजंतसुवगए वासारत्ते जिणेसरो वीरो । कम्ममहिमहणसीरो जंभियगामंमि संपत्तो ॥ ५ ॥

तत्थ सुरिंदो वंदित्तु सायरं दंसिऊण नट्टविहिं । कइवयवासरमज्झे नाणुप्पत्तिं परिकहेइ ॥ ६ ॥

तत्तो भिंढियगामे पुबुवयारं सरित्तु चमारिंदो । नमिऊण चलणजुयलं जहागयं पडिनियत्तोत्ति ॥ ७ ॥

इय अणवरयसुरविसरथुणिज्जमाणचरणो दुस्सहपरीसहमहोयहिदरतीरपत्तो आणुपुब्बीए परिब्भममाणो संपत्तो
छम्मासिगामं, ठिओ य तस्स बाहिभागंमि असेससत्तोवरोहरहियंमि पलंविद्यमुओ काउस्सग्गेणं । एत्थंतरे तिवि-

इय सबभावुब्भडवयणसवणपरिवद्धमाणपरितोसो । सामिचिकिच्छाकरणंमि उज्जुओ भणइ सो विज्जो ॥ ८ ॥
सिद्धत्थ ! अलमेत्थ पत्थणाए, तहा करेमि जहा लहुं अवहरामि भयवओ सल्लं, केवलं निष्पडिकम्मो एस नाभि-
लसइ चिगिच्छं न बहु मन्नइ सरीरसक्कारं नाभिनंदइ ओसहाइविहाणं, एवं च ठिए कंहं कायवओ सल्लसमुद्धरणोव-
क्कमो ?, सिद्धत्थेण भणियं-पज्जत्तं वाउलत्तणेणं, जहा तुमं भणिहिसि तहा करिस्सामित्ति अन्नोऽन्नं जंपिराणं
निगगओ भुवणगुरू, ठिओ वाहिरुज्जाणे, सिद्धत्थेणाचि नियपुरिसेहिंतो सवत्थवि अन्नोसाविओ सामी, दिट्ठो य
गामवाहिरुज्जाणे, तओ विज्जेण समेओ तदुवदिट्ठिद्वोसहसामग्गिसणाहो तत्थेव गओ सिद्धत्थो, तयणंतरं च वेज्जेण
तेल्लदोणीए निवेसाविओ सामी, पच्छा कयकरणेहिं चउद्विहविस्सामणावियक्खणेहिं पुरिसेहिं मद्दाविओ, तओ सिद्धि-
लीभूएसु संधिवंधणेषु बाढं निजंतिज्जण संडासएण अइच्छेयथाए लहुमाकट्ठिउमारद्धो कन्नोहिंतो सरुहिरं सल्लजुयलं,
अह नीहरिज्जमाणे सल्ले सा कावि वेयणा जाया । जीए मंदरधीरोऽवि कंप्पिओ झत्ति जयनाहो ॥ १ ॥ सुक्को य
घोरघणघोसविब्भमो जिणवरेण आरावो । कुलिसाहय(सुर)गिरिसिगदलणजाओव अइभीमो ॥ २ ॥ जिणमाहप्पेण
परं तडत्ति फुट्ठा समंतओ न मही । अन्नह चलणंगुलिचालियाचले केत्तियं एयं ?, ॥ ३ ॥

एवमुप्पाडियंमि सल्ले संरोहणोसहीरसनिसेगपक्खेवेण पगुणीकयंमि सवणजुयले सविणयं वंदिज्जण य जयनाहं
वेज्जवणिणो परमसंतोसमुव्हंता सग्गापवग्गसोक्खसिरिं भमरिं व करकमलनिलीणं मन्नंता गया सगिहं । परमोवगा-

रिति पृइओ वत्थकणगाइदाणेण विज्जो सिद्धत्थेण । एवं ते दोन्निऽवि आसयविसुद्धीए तिव्वमवि वेयणं भयवओ उदीरयंता सुरलोयलच्छिभायणं जाया । गोवालो पुण अइसंकिलिट्ठयाए सत्तमनरयपुढविं दुहनिवहभायणं पत्तो । तं च उज्जाणं महाभेरवंति पसिद्धिं गयं, देवउलं च तत्थ लोगेण कयं ।

एवंविहावयाणं हवंति जयभायणं जिणिंदावि । ता थोवायंकेऽविहु कीस जणो वहइ संतावं ? ॥ १ ॥

जइ एक्कसिंपि कयटुक्कयस्स एवंविहो दुहविवागो । ता असमंजसकिच्चेसुं पइदिणं कह जणो रमइ ? ॥ २ ॥

अतुलियवलकलिएणवि जिणेण तिद्वावयं सहंतेण । सहणे च्चिय कम्मविणिज्जरत्ति पडिवज्जइ जणेण ॥ ३ ॥

एवं च भगवओ वद्धमाणसामिस्स परीसहाणं जहन्नगाणं मज्झे उवरि कडपूयणासीयं मज्झिमगाण य काल-चक्कं उक्कोसगाण य इमं चेव सल्लुद्धरणंति । एवं गोवालेण मूलाओ आरद्धा उवसग्गा गोवालेण चेव निट्ठियत्ति । एवं ता उवसग्गाण संकलणा भणिया ।

इयाणिं सयलंपि तवोविहाणं जं जहा भगवया समायसियं तं तहा संकलिऊण भणिजइ—

नव किर चाउम्मासे छक्किर दोमासीए उवासी य । वारस य मासियाइं वावत्तरि अद्धमासाइं ॥ १ ॥

एगं किर छम्मासं दो किर तेमासिए उवासी य । अहाइज्जा य दुवे दो चेव दिवहुमासाइं ॥ २ ॥

भइं च महाभइं पडिमं तत्तो य सव्वओभइं । दो चत्तारि दसेव य दिवसे ठासीय अणुवद्धं ॥ ३ ॥

गोथरमभिगगहजुयं खवणं छम्मासियं च कासी य । पंचदिवसेहिं ऊणं कोसंबीए वरपुरीए ॥ ४ ॥
दस दो य किर महप्पा ठाह सुणी एगराइयं पडिमं । अट्टमभत्तेण जई एक्केकं चरिमराइयं ॥ ५ ॥
दो चेव य छट्ठसए अउणातीसे उवासिया भयवं । न कथाइ निच्चभत्तं चउत्थभत्तं च से आसि ॥ ६ ॥
बारस वरिसे अहिए छट्ठं भत्तं जहन्नयं आसि । सबं च तवोकम्मं अपाणियं आसि वीरस्स ॥ ७ ॥
तिन्नि सए दिवसाणं अउणापण्णे उ पारणाकालो । उक्कुड्डयनिसज्जाणं ठियपडिमाणं सए बहुए ॥ ८ ॥

इय एत्तियमेत्तं पवज्जादिणाउ आरब्भ सच्चगेण छउमत्थकालियाए भगवया तवचरणमायस्थितिं ॥ संपयं पारङ्गं भणिज्जइ—अह मज्झिमपावासन्निवेसाओ दुस्सहपरीसहनिसासंतमसं हणिऊण जिणदिवायरो समुम्मिलंतसमहि-
गाभिरामदेहप्पहापडलपयासियदिसामुहो नीहरिऊण अणिययविहारेण विहरंतो संपत्तो समुत्तुंगपायापरिचुंविंयंवर
नाणाविहवणसंडमंडियदियंतरं जंभियगामं नाम नयरं, तस्स य बहिया विभागे वीयावत्तचेइयस्स अदूरे अणे-
यतरुवरसुरहिक्कुसुमामोयमत्तमहुयश्चंकारमणहरपरिसराए उज्जुवालियानईए तीरंमि उत्तरिल्ले कूले सामागामिहाण-
गाहावइस्स छेत्तंमि समुम्मिलियपढमपल्लवपसाहियस्स सुपुरिस्स व सउणगणसेवियस्स सुरपुरस्स व सुमणसाभि-
रामस्स महानरिंदस्स पत्तनियरपरियारियस्स व सालमहापायवस्स हिट्ठओ द्वियस्स सुवणबंधवस्स छट्ठेणं भत्तेणं
अपाणएणं आयावेमाणस्स गोदोहियासणं निसन्नस्स अणुत्तेरोहिं नाणदंसणचरित्तेहिं अणुत्तेरोहिं आलयविहारमहवज्ज-

वेहिं अणुत्तरेहिं लाघवखंतिगुत्तिमुत्तिसच्चसुचरिएहिं अण्णाणं भावेमाणस्स सह्छम्माससमहिगेषु दुग्गलससंवच्छरेसु
 समइकंतेसु वइसाहसुद्धदसमीए सुवयाभिहाणंमि दिणंमि विजए सुहुत्ते हत्थुत्तरानक्खत्तंमि चंदेण जोगमुवागयंमि
 सुक्खज्झाणानलनिद्दुघघाथकम्मिधणस्स पुहत्तवियक्कं सवियारमेगत्तवियक्कमविथारं च झाइऊण उवरयस्स सुहम-
 किरियानिवट्ठिं वोच्छिन्नकिरियमण्णडिवाइं च सुक्खज्झाणचरिमभेयदुगमसंपत्तस्स अणंतमणुत्तरं निवाघायं निरावरणं
 पडिपुन्नं सयललोयालोयपयासयं केवलवरनाणंदसणं समुप्पन्नंति ॥

तयणंतं च दुक्करतवचरणफलंमि केवलालोए । जाए सूरेणं पिव पयडिज्जइ तिहुअणं पडुणा ॥ १ ॥

अह वत्तीस सुरिंदा तक्खणचलियासणा लहुं पत्ता । विरयंति समोसरणं पायारतिएण परियरियं ॥ २ ॥

सुविभत्तचारुगोउरपोक्खरिणीपवलधयवडाइन्नं । सिंहासणं च मणिकणयनियरनिम्मविशहरिचावं ॥ ३ ॥

ताहे तिलोयनाहो शुद्धतो देवनररिंदेहिं । सिंहासणे निसीयइ तित्थपणामं पक्काऊण ॥ ४ ॥

जइविहु एरिसनाणेण जिणवरो सुणइ जोगयारहिंयं । कप्पोत्ति तहवि साहइ खणमेत्तं धम्मपरमत्थं ॥ ५ ॥

इय निरुवक्कमविक्कमनिरक्खियब्भंतरारिविसरस्स । वीरस्स सुवणपडुणो चरिए सूरे व विण्णुरिए ॥ ६ ॥

संगमयाइंपरीसहसहणऽज्जियनाणलाभसंबद्धो । संखेवेण समत्तो सत्तमओ एत्थ पत्थावो ॥ ७ ॥

इइ सिरिमहावीरचरिए परीसहसहणकेवलुवज्जणो सत्तमो पत्थावो ॥

अथाष्टमः प्रस्तावः

एवं केवललाभो भणितो भुवणिक्कभाणुणो एत्तो । एक्कारसवि गणहरा जह से जाया तहा सुणसु ॥ १ ॥

अह निम्महिथनीसेसमोहमहिमो सो महावीरजिणवरो तहाविहोवयारविरहियं परिसं नाऊण परोवयारकर-
णिक्कतल्लिच्छो छिन्नपेम्मबंधणोऽवि धम्मदेसणाईहिं तित्थयरनामगोयं कम्मं वेइज्जइत्ति परिभाविंत्तो असंखेज्जाहिं
देवकोडीहिं परिलुडो सुरविरइएसु नवसु कणयकमलेसु नवणीयसुहफरिसेसु चलणजुयलं निवेसमाणो दिसासुहवि-
सारिणा देवजणुजोएण पडिहयंधयारे निसासमएवि दिवसेव समुवलक्खिज्जमाणपयडपयत्थसत्थो तित्थनाहो
दुवालसजोयणंतरियाए मज्झिमानयरीए गंतुं पवत्तो, तओ जाव सामी न पावइ मज्झिमापुरीं ताव तीसे अदूरदेसे
संठियंमि महासेणवणंमि उज्जाणे देवेहिं समोसरणविरयणा काउमारद्धा, कंहं चिय ?—

आजोयणपरिमंडलभूभागं विगयकयरुग्घायं । हरियंदणसुरहिरसच्छड्ढाहिं पडिहणियरयनियरं ॥ १ ॥

पंचविहरयणनिद्विवरविरइयातुच्छपीढियाबंधं । हरिसुल्लसंतरोमंचकंचुया निम्मविंत्ति सुरा ॥ २ ॥

वेमाणियेदेवेहिवि विरइज्जइ पंचरायरयणमओ । सालो विसालगोउरकविसीसयसुंदरो ज्झत्ति ॥ ३ ॥

तत्तो बाहिं पसरंतकिरणपब्भारभरियनहविवरो । जोइसिएहिं ठविज्जइ सुवणपागारपरिवेढो ॥ ४ ॥

तयणंतरं च दगरयधवलपहाहसियसारयमयंको । सुवणवईहिं कीरइ निम्मलकलहोयपागारो ॥ ५ ॥

पवरमणिरयणरुइरं वंतरदेवोहिं सालमज्झमि । सिंहासणं ठविज्जइ सपायपीठं सुरमणिज्जं ॥ ६ ॥
 तस्सोवरिं विउवइ सक्को उम्मिहपल्लवसिरिहं । जिणेदेहाउ दुवालसगुणियं कंकेल्लिपवरतरुं ॥ ७ ॥
 ईसाणसुरिंदो निम्मवेइ लंवंतमोत्तियसरीयं । छणमयलंछणधवलं फलिहदंडं च छत्ततिगं ॥ ८ ॥
 हेट्टासुहठियविंटा रुंतुद्दामभइयरसणाहा । आजाणु कुसुमवुट्ठी निवडइ गयणाओ वरगंधा ॥ ९ ॥
 सव्वरयणाभयाइं विचित्तरइयसक्कचावाइं । रेहंति तोरणाइं नववंदणमालकलियाइं ॥ १० ॥
 मंदरमहियमहोयहिरवगंभीराइं तियसनिवेहेण । दिसि दिसि पहयाइं चउव्विहाइं तूराइं दिव्वाइं ॥ ११ ॥
 पवणुडुयखीरोयहिमहल्लकलोलविब्भमेहिं नहं । छाइज्जइ धयनिवहेहिं वेजयंतीसएहिं च ॥ १२ ॥
 मयरदुद्दामसहस्सपत्तकीलंतहंसमिहुणाओ । पडिगोउरं वराओ पोक्खरिणीओ य कीरंति ॥ १३ ॥
 मिच्छत्तसत्तुविकखोभदक्खमक्खंडभाणुविंवसमं । जंतूण य कमलोवरि ठाविज्जइ धम्मवरचक्कं ॥ १४ ॥
 देवच्छंदयपमुहं अन्नपि जमेत्थ होइ कायवं । वंतरसुरेहिं कीरइ पहिडुहियएहिं तं सव्वं ॥ १५ ॥
 इय नियनियअहिगाराणुरूवओ विरइयंमि ओसरणे । जिणरविभीयव्व निसा निन्नट्टा तक्खणं चेव ॥ १६ ॥
 एत्थंतरे सायरसुरखयरनमंसिज्जमाणो माणाइरित्तिगुणरयणावासो वासवनिंदंसिज्जमाणमग्गो मग्गाणुलग्गभव्व-
 जणजणियपरितोसो तोसरोसपरिवज्जियगतो गत्तसमभवपडंतजणसमुद्धरणपरो परमकरुणरसनिव्वियजयजणदुहुज-

लणो दुरियगिरिदलणो जयगुरुपुवदुवारेण पविट्टो समोसरणभूमिं, तओ सीहासणं पयाहिणीकाऊण ममाविं पूयणिजं
तित्थंति दंसतो कयकिच्चोऽवि नमो तित्थस्सत्ति भगन्तो निसण्णो पुवाभिमुहो सीहासणे, तयणंतरं च सेसतिदिसि
सिंहासणेसु सुरेहिं रइयाइं जिणपडिरूवाइं, ताणिऽवि भगवओ माहप्पेण तयणुरूवाइं चेव सोहिउं पवत्ताइं, अह
एगरूवोऽवि सयलजंतुसंताणनित्थारणत्थं व चउरूवधरो जाओ जयगुरु, तयणंतरं च सयलतरणिमंडलसारपरमा-
णुनियरविणिम्मिन्नं व सरीरपरिक्खेमणहरं ससुगयं भांमंडलं, ठिया य भगवओ उभयपासेसु पंचवणरणविणि-
म्मियदंडुब्भडाओ तुसारगोखीरधाराओव गोराओ चामराओ करकमलेण कलिऊण दाहिणुत्तरभवणवइणो चमरव-
लिनामाणो असुराहिवा, अह—

गायंति केऽवि नचंति केऽवि फोडंति केऽवि तिवइंपि । पकरंति संथवं केऽवि भयवओ भत्तिए तियसा ॥ १ ॥

भेछंति सुरहिमंदारकुसुमसरंदविंदुसंवलिं । जिणपय पुरओ केऽविहु पंचविहं जलरुहसमूहं ॥ २ ॥

भवणवइवाणमंतरजोइसवेमाणि एहिं देवहिं । पूरिज्जइ नहविवरं विभाणमालासहस्सेहिं ॥ ३ ॥

पंचण्ययारमणिऽयणघडियसुंदरविमाणपडिहत्थं । उवहइ गयणविवरं पण्णुल्लियकमलसंडसिरिं ॥ ४ ॥

हरिहरिणसप्पसिहिनउलससगमज्जारमूसगाईया । अन्नोऽन्नमुक्खेरा ओसरणमहिं समल्लीणा ॥ ५ ॥

बहुपुवभवपरंपरसमुज्जियकम्मसत्तुभीयाणं । ओसरणं सरणंपिच रेहइ नीरोससत्ताणं ॥ ६ ॥

एत्थंतरे तिपयाहिणीकाऊण नमंतसिरिमउडमाणिककिरणविच्छुरियपायपीढा सुरासुरिंदा पणमिऊण जिणं निय-
नियठाणेसु निसन्ना, अह सहस्सनयणेण निसिद्धंमि कोलाहले निम्मलदसणमऊहजालपक्खालियाए इव निम्मलाए
एगाएवि अणेगजणसंसयलुच्छेयसमत्थाए सुरनरसवरतिरियसाहाराणाए सजलजहरनिगघोसंगंभीराए आजोअणमि-
त्तखेत्तपडिप्फलणपच्चलाए अमयवुड्डीए इव निव्ववियअसेसभवसत्तसंतावाए वाणीए पवत्तो जिणनाहो धम्मदेसणं
काउं । कहं ?—

जह पाणवहाइसमुत्थपावनिवेहेण भारिया जीवा । अयगोलगव भवसायरंमि मज्जंति वेगेण ॥ १ ॥

जह नाणदंसणचरित्तसेवणाहिं लहुं विमुज्झंति । पावंति य सोक्खपरंपराउ संग्गापवग्गेसु ॥ २ ॥

जह मिच्छत्तच्छाइयविवेयनयणा सुणंति न कयावि । नीसेसदोसरहिं देवं सुगुरुं च धम्मपरं (यं) ॥ ३ ॥

जह गिहकज्जासत्ता अवितत्ता कामभोगसोक्खेहिं । मणुअत्तं लडुपि हु सुद्धा थोवेण हारंति ॥ ४ ॥

जह तप्पमायपरयाए भूरिसो ताणसरणपरिहीणा । पावंति दहणभेयणपमुहाइं दुहाइं नरएसु ॥ ५ ॥

जह पंचमहद्वयकवयगूढदेहा दलंति लीलाए । अब्भतरारिवग्गं अजेयममरासुरेहिंपि ॥ ६ ॥

जह सत्तुमित्तमणिलेद्धुसोक्खलुक्खेसु तुल्लचित्ताण । अमराहिंतोऽवि सुहं पाउब्भूएइ बहुयथरं ॥ ७ ॥

तह जयगुरुणा नरतिरियदेवजणसंकुलाए परिसाए । हरिसभरनिब्भराए धम्मो सिद्धो जयवरिद्धो ॥ ८ ॥

लणो दुरियगिरिदलणो जयगुरुपुद्बदुवारेण पविट्टो समोसरणभूमिं, तओ सीहासणं पयाहिणीकाऊण ममांविं पूयणिज्जं
तित्थंति दंसतो कयकिच्चोऽवि नमो तित्थस्सत्ति भणन्तो निसण्णो पुवाभिमुहो सीहासणे, तयणंतरं च सेसतिदिसि
सिंहासणेसु सुरेहिं रइयाइं जिणपडिरूयाइं, ताणिऽवि भगवओ माहपेण तयणुरूवाइं चेव सोहिउं पवत्ताइं, अह
एगरूवोऽवि सयलजंतुसंताणनित्थारणत्थं व चउरूवधरो जाओ जयगुरू, तयणंतरं च सयलतरणिमंडलसारपरमा-
पुनियरविणिम्भयं व सरीरपरिक्खेमणहरं समुगयं भामंडलं, ठिया य भगवओ उभयपासेसु पंचवणरणविणि-
स्मियदंडुब्भडाओ तुसारगोखीरधाराओव गोराओ चामराओ करकमलेण कलिऊण दाहिणुत्तरभवणवइणो चमरव-
लिनामाणो असुराहिवा, अह—

गायंति केऽवि नच्चंति केऽवि फोडंति केऽवि तिवइंपि । पकरंति संथवं केऽवि भयवओ भत्तिए तियसा ॥ १ ॥

भेळंति सुरहिमंदारकुसुममयरंदबिंदुसंवलिं । जिणयय पुरओ केऽविहु पंचविहं जलरुहसमूहं ॥ २ ॥

भवणवइवाणमंतरजोइसवेमाणिएहिं देवेहिं । पूरिजइ नहविवरं विमाणमालासहस्सेहिं ॥ ३ ॥

पंचप्पयारमणियणघडियसुंदरविमाणपडिहत्यं । उवहइ गयणविवरं पप्फुल्लियकमलसंडसिरिं ॥ ४ ॥

हरिहरिणसप्पसिहिनउलससगमज्जारमूसगाईया । अन्नोऽन्नमुक्केवरा ओसरणमहिं समल्लीणा ॥ ५ ॥

बहुपुद्बभवपरंपरसमुवज्जियकम्मसत्तुभीयाणं । ओसरणं सरणंपिव रेहइ नीसेससत्ताणं ॥ ६ ॥

एतथंतरे तिपयाहिणीकाऊण नमंतसिरिमउडमाणिककिरणविच्छुरियपाथपीढा सुरासुरिंदा पणमिऊण जिणं निय-
नियठाणेसु निसन्ना, अह सहस्सनयेण निसिद्धंमि कोलाहले निम्मलदसणमऊहजालपक्खालियाए इव निम्मलाए
एगाएवि अणेगजणसंसयवुच्छेयसमत्थाए सुरनरसवरतिरियसाहारणाए सजलजलहरनिग्घोसगंभीराए आजोअणमि-
त्तेत्तपडिप्फलणपच्चलाए अमयवुडीए इव निव्ववियअसेसभवसत्तसंतावाए वाणीए पवत्तो जिणनाहो धम्मदेसणं
काउं । कहं?—

जह पाणवहाइसमुत्थपावनिवेहेण भारिया जीवा । अयगोलगव भवसायरंमि मज्जंति वेगेण ॥ १ ॥

जह नाणंदंसणचरित्तसेवणाहिं लहुं विसुज्झंति । पावंति य सोक्खपरंपराउ संग्गापवग्गेसु ॥ २ ॥

जह मिच्छत्तच्छाइयविवेयनयणा सुणंति न कयाचि । नीसेसदोसरहियं देवं सुगुरुं च धम्मपरं (यं) ॥ ३ ॥

जह गिहकज्जासत्ता अवितत्ता कामभोगसोक्खेहिं । मणुअत्तं लडुपि हु सुद्धा थोवेण हारंति ॥ ४ ॥

जह तप्पमायपरयाए भूरिसो ताणसरणपरिहीणा । पावंति दहणभेयणपसुहाइं दुहाइं नरएसु ॥ ५ ॥

जह पंचमहवयकवयगूढदेहा दलंति लीलाए । अंभितरारिवग्गं अजेयममरासुरेहिंपि ॥ ६ ॥

जह सत्तुमित्तमणिलेहुसोक्खलुक्खेसु तुल्लचित्ताण । अमराहितोऽवि सुहं पाउब्भूएइ बहुययरं ॥ ७ ॥

तह जयगुरुणा नरतिरियदेवजणसंकुलाए परिसाए । हरिसभरनिब्भराए धम्मो सिद्धो जयवरिद्धो ॥ ८ ॥

अह पत्थरंटकुक्कीरियव दढवज्जलेवघडियव । जिणवयणामयपाणेण सा सहा निच्चला जाया ॥ ९ ॥
किंच-अनिमेसच्छीहिं मुहं जिणस्स पेच्छंतया विरायंति । देवत्तलच्छिवरिअव तक्खणं तिरियनरनिवहा ॥ १० ॥

इओ य-तीसे नयरीए अचंतधणकणसमिद्धो छक्कम्मकरणपरो नियदरिसणपरूवियधम्मनिच्चलचित्तो सोमिलिज्जो नाम माहणो, तेण सगत्थिणा समारद्धो नयरीए बाहिंमि जब्बो, समाहूया दूरदिसाहितो बहुसिस्ससयपरिवारा असे-सविज्जाठाणपारगा चउव्वेयसुत्तत्थविसारया नियनियपन्नावलेवोवहसियसुरुरुणो इंदम्मूइपमुहा एक्कारस अज्झावगा, मीलियाइं घयमहुजवपमुहाइं जागोवगरणाइं, पगुणीकयाओ दक्खिणानिमित्तं पवरपट्टगुगयचेलकणगाइरासीओ, भत्तीए कोउगेण उवरोहेण य समागओ बहुजणवओ, समारद्धो हुयवहे अणवरयमंतुचारपुव्वयं जब्बोवगरणपक्खेवो । एत्थंतरे गयणयलमइवयंतइं सुरवहूसणाहाइं देवविंदाइं अवलोइऊण परितुद्धो पेच्छजणो, जंपेइ य-सुहु लहुं जहुं जन्निएहिं, जं सयमेव विग्गहवंतो तियसा परितुद्धा इहइं अवयरंतित्ति, अह चंडालनिलयं व जन्नवाडयं परिहरिऊण समोसरणसंमुहं गंतु पयट्टेसु तेसु वियंभिओ लोयप्पवाओ, जहा-सवन्नू तीयाणागयवत्थुजाणगो लोगुत्तरिस्सरियरूवसामत्थजसाइगुणावासो एत्थ समोसढो, तस्स पूयणत्थं एस नयरजणो विमाणारूढा तियसा य गच्छंतित्ति, अह सवन्नूत्ति गिरं सोउं उप्पन्नगाढपरिकोवो । नियलोयाणं पुरओ इंदम्मूइ इमं भणइ ॥ १ ॥

मोचूण ममं लोगा तस्स समीवंमि कीस वचंति ? । किं कोऽवि ममावि पुरो सवन्नू अत्थि एत्थ जए ? ॥ ३ ॥

गच्छंतु व सुखजणा देवा कहउणे विम्हयं नीया ? । पूयंति संशुणंति य जेणं सवणणुबुद्धीए ॥ ३ ॥
 अहवा जारिसओ सो सवणू तारिसा सुरा तेऽवि । अणुसरिसो संजोगो गामनडाणं व सुक्खाणं ॥ ४ ॥
 किं वा इमिणा बहुजंपिएण ? अजवि असिद्धकजंमि । सयमेव तत्थ गंतूण हेउजुत्तीहिं तं समणं ॥ ५ ॥
 काउं हयप्पयावं पुरओ देवाण दाणवाणं च । नासेमि अहमसेसं खणेण सवणणुवायं से ॥ ६ ॥ जुम्मं ।
 इय साहंकारं जंपिएण पंचहिं सएहिं सिस्साणं । परियरिओ सो पत्तो जयगुरुणो पायमूलंमि ॥ ७ ॥
 तथणु-ससहरकासकुसुमोहहिमपंडुरच्छत्तियनिहयतरणिकरनियरपसरह, पमिलंतसायरनरखयरसुरिंदंसदोहवंदह ।
 पेच्छवि जयनाहह महिम इंदभूइ मणंमि, किं एयंति चमक्कियओ तकखणि ओसरणंमि ॥ ८ ॥
 एत्थंतरंमि सुवणेक्कभाणुणा जिणवरेण संलत्तो । भो इंदभूइ ! गोयम सागयमिइ मडुरवाणीए ॥ ९ ॥
 ताहे चितियमिमिणा नाभंपिहु मे वियाणए एसो । सुवणेऽवि पायडजसं अहवा को मं न याणेइ ? ॥ १० ॥
 जइ हियगोयरं मे संसय मणेल्ल अहव छिंदेजा । ता होल्ल विम्हओ मे इय चितंतो पुणो भणिओ ॥ ११ ॥
 किं मण्णे अत्थि जीओ उयाहु नत्थित्ति संसओ तुज्झ । सुंदर ! परिचयसु इमं संदेहं माणपडिसिद्धं ॥ १२ ॥
 अत्थि जिओ निब्भंतं इमेहिं सो लक्खणेहिं सुणियवो । चित्तंचेयणसणाविणणाईहिं पयडेहिं ॥ १३ ॥
 जइ पुण न होल्ल जीवो अवट्ठिओ सुकयदुक्कयाहारो । ता जागदानानाणोवहाणपसुहं सुहा सवं ॥ १४ ॥

इय जयगुरुणो वयणं सोऽं परिभाविऽं च महपुत्रं । मिच्छत्तेण सभं चिय उज्झइ तं संसयं झत्तिं ॥ १५ ॥
अह ववगयकुविगणपो दग्गं सग्गं व उज्झिऽं दूरे । संसारविरत्तमणो निवडइ चलणेसु जगगुरुणो ॥ १६ ॥
भणइ य भयवं ! नियदिक्खदाणओ मज्झङ्गुग्गहं कुणसु । इय बुत्ते नियहत्थेण दिक्खिओ एस जयगुरुणा ॥ १६ ॥ १ ॥
तं पवइयं सोऽं अग्गिभूइवि चिंतइ एवं । वच्चाभि तमाणेमी पराजिणेऊण सच्चणुं ॥ १७ ॥
मण्णे छलाइणच्चिय छलिओ माइंदजालिएणं व । समणेण तेण तम्हा उवेक्खणिज्जो न सो होइ ॥ १८ ॥
संसयमेगं पि मभं जइ पुण छिंदेज्ज होमि ता सिस्सो । तस्सत्ति जंणमाणो सोवि गओ जिणवरसमीवं ॥ १९ ॥
हे अग्गिभूइ ! कम्मं अत्थी नत्थित्ति संसओ तुज्झ । बाढमजुत्तो एसो विज्झइ जं कम्ममिह पयडं ॥ २० ॥
कहमण्णहा समेऽवि हु करसिरपसुहंगदेहसंबंधे । एक्के भवंति सुहिणो अण्णे पुण दुक्खिया निच्चं ॥ २१ ॥
धारियधवलायवत्ता विलासिणीविहुयचामरा एगे । भडचडगरपरियरिया वच्चंति करेणुगारूढा ॥ २२ ॥
अण्णेऽणुवाहण चिय पए पए भयवसेण कंपता । एगागिणो वरागा कहकहवि पंहमि गच्छंति ॥ २३ ॥
एगे लीलाए चिय पूरेंति मणोरहे बहुजणाणं । नियउयरंपिऽवि अन्ने भरंति भिक्खाए भमणेण ॥ २४ ॥
ससहरसुहीहिं विंवाहरीहिं पप्फुल्लकुवलयच्छीहिं । एगे विलसंति विलासिणीहिं सद्धिं सभवणेसु ॥ २५ ॥
सक्कडसुहीहिं मिरियत्थणीहिं अइलंबमोदुपोद्दाहिं । पच्चक्खरक्खसीहिं व अन्ने गिहिणीहिं सह ठंति ॥ २६ ॥

तुल्यमिवि संबंधे समेऽवि कालादयमि एगस्स । संपज्जइ बहुलाभो मूलंपि पणस्सइ परस्स ॥ २७ ॥
इय एवंविहकज्जाण कारणं कम्ममेव नायवं । निक्कारणाइं जायंति जेण न विचित्तकजाइं ॥ २८ ॥
एवं बुत्ते निच्छिन्नसंसओ पंचसिस्ससयसहिओ । भववेरगगमुवगओ पडिवज्जइ सोऽवि पवज्जं ॥ २९ ॥ २ ॥
अह वाउभूइनाभो सहोथरो तेसिमेव लहुयथरो । पम्मुक्कमच्छरो भत्तिनिब्भरुद्धिभन्नरोमंचो ॥ ३० ॥
कह तेऽवि तेण विजियत्ति विम्हयं परममुवहंतो य । एइ जिणसन्निगासं संसयवोच्छेयमिच्छंतो ॥ ३१ ॥
अह सो जएक्कगुरुणा पर्यपिओ भद्द ! कीस वहसि तुमं । तज्जीवं तस्सरीरंति संसयं जुत्तिपडिसिद्धं ? ॥ ३२ ॥
जेण सरीरजियाणं एगंतेगत्तकप्पणे जीवो । नो होज्ज देहनासे घडभंगे तस्सरूवं व ॥ ३३ ॥
देहे य विज्जमाणे जीएण विवज्जिएवि जाएज्जा । चित्ताईया धम्मा न य ते तव्विरहओ दिट्ठा ॥ ३४ ॥
तम्हा भिन्नाभिन्नो विन्नाणघणो सरीरओ जीवो । अन्नोच्चिय सुणियद्वो एवं भणियंमि पडिबुद्धो ॥ ३५ ॥
पंचहिं सिस्ससएहिं सहिओ सोऽवि हु जिणस्स पांसमि । निच्छिन्नोपेमंवंधो सुंचइ धरवासवासंगं ॥ ३६ ॥ ३ ॥
अह इमे तिन्निवि गहियपवज्जे निसामिऊण दुरुम्मुक्कमच्छरो गच्छामि संसयं च पुच्छामि न सामन्नरूवो सो भय-
वंति बहुमाणमुवहंतो वियत्तो नाम अज्झावगो गओ जिणसमीवं, वागरिओ य भयवया, जहा-भद्द ! वियत्त ! तुह पंच-
भूयसत्ताविसओ संसओ, सो य न जुत्तो, जओ पच्चक्खदिरस्समाणा (भू) जलणजलानिलाइणो भूया कंहं अवलविडं

तीरंति?, जं च वेए भणियं-‘सुविणोवसा सध्वे भावा’ इच्चाइ, तंपि खणविलाससीलयं सध्वभावाणं पडुच्च, न उण सध्वहा भूयाभावसाहगत्तेणंति बुत्ते वियत्तो संसाराणुबंधेण समं चइऊण कुविगपं पंचहिं छत्तसएहिं अणुगम्ममाणो पवन्नो संजसुजोयं ४॥ तंमि य पवज्जं पवन्ने सुहम्मो नाम अज्झावगो विरुद्धवेयपयनिबंधणं संसयं पुच्छिउकामो संपत्तो जिणंतिं, सो य भयवंतं सिंहासणगयं पुव्वपव्वयसिंगाधिरूढं दिवायरं व पलोइऊण परमं पमोयपब्भारमणु- भवंतो संलत्तो जिणेण-अहो सुहम्म ! तुमं इमं संसयं वहसि-जो इह भवे पुरिसो पसू वा सो परभवेऽवि पुरिसत्तं पसुत्तं वा लहइ, इमं च न जुत्तं, जओ जो इह जम्मे सभावेण मद्दवज्जवाइगुणजुओ मणूसो सो मणुयाउयं कम्म बंधिऊण भवंतरे पुरिसत्तणं पाउणइ, पसूऽवि मायाइदोसजुत्तो पुणोऽवि पसुत्तणं पडिवज्जइ, न उण निच्छएण, जेण कम्मसध्वपेक्खा जीवाण गईरागइत्ति, न य कारणाणुरूवं कज्जंति सध्वत्थ वित्थारिउं पारीयइ, विलक्खणरूवाओ सिंगाइकारणाओऽवि सराईणमुप्पत्तिदंसणाओ, एवं च निसामिऊण वोच्छिन्नसंसओ पंचसयविणेयपरिखुडो सुहम्मो भयवओ सिस्सो जाओत्ति ५॥ अह तंमि पव्वइए मंडियनामो अज्झावगो पुव्वक्कमेण पत्तो समोसरणं, वागरिओ य भगवथा-हंत बंधमोक्खविसयं संदेहं तुमं कुणसि, नणु न जुत्तमेयं, जओ बंधमोक्खा सुपसिद्धा चेव । कंहं?—

मिच्छत्तपमायकसायदुडुजोगाइकारणेहिं दढं । जीवस्स कम्मबंधो जायइ अइभीसणो तत्तो ॥ १ ॥

अणुहवइ रज्जनहुव सध्वया नरयतिरियठाणेसु । किब्बिसदेवनेरेसु य दुक्खाइं परमतिक्खाइं ॥ २ ॥

मोक्खो पुण निम्मलनाणचरणसद्धाणपरमहेऊहिं । कम्माण जो विओगो सो नेओ सिवसुहएफलओ ॥ ३ ॥
 नणु कहमणाइनियकम्मजोगओ तेसि होज्ज उ विहुत्तं । सणणइ जह जलणेणं कंचणउवलाण अत्तोडन्नं ॥ ४ ॥
 एवं जियकम्माणवि विसिहुनाणाइकारणेहिंतो । होइ त्रिवेगो तत्तो मोक्खो सिद्धो सयं चेव ॥ ५ ॥
 एवं च पलीणंमि संसयतमंमि नमिऊण जयगुरुणो चलणुप्पलं अद्धुडसिस्ससयपरिचारो मंडिओ अणगारमग्गम-
 णुल्लगोत्ति ६ ॥ अह मोरिओऽवि अप्पडिममाहप्पं सामिं नाऊण समागओ समोसरणं, भणिओ य भगवया-भइ !
 तुमं देवाभावविसयं संदेहसुव्वहसि, तं च इयाणिं परिचयसु, जओ पच्चक्खदिससमाणंमि अत्थंमि किं अणुमाणखे-
 ङणाहिं?, एए देवा विमलमणिकुंडलपहापडलपल्लवियगंडलेहा नियंतियदिच्चसुया सरीरकंतित्तसुज्जोइयदिसिनिवहा
 महासोक्खा अपरिभूयसासणा सुणिणोव नभोगमणा इह चेव संपयं वट्ठति, अओ अणुचिया एयाण विसए अभा-
 वक्कप्पणा, जं च सेसकालं न दीसंति तत्थ लोयगंधस्स अच्चंतमसुभत्तणओ पेच्छयणावलोयणाइसु य निच्चमक्खि-
 त्तचित्तत्तेण न कंहपि आंगंतुसुच्छंहति, जिणमज्जणाइसु पुणो भत्तिभरायहििया आगच्छंति य । एवं सुणिए वत्थुत्तत्ते
 मोरिएण अद्धुडसिस्ससयपरियरएण अब्भुवगया भावसारं जिणपव्वज्जत्ति ७ ॥ अह अकंमिओऽवि कोऊहलाउलिय-
 चित्तो संसयमवणेउकामो संपत्तो भयवओ समीवं, सागयमणणपुच्चयं च संभासिओ जयगुरुणा-अहो अकंपिय ! तुमं
 एवं मन्नेसि, जहा-देवा चंदसूरतारयपमुहा ताव पच्चक्खदंसणेण नज्जंति, नारया पुण सुमिणेऽवि अदिससमाणा नूणं न

संतिति, अणुचियं इमं, जओ ते नारया कम्मपरतंतत्तणेण इहागंतुमसत्था, तुम्हारिसावि तत्थ गंतूणमक्खमा, ता कहमुवलंभो जाएज्जा?, खाइगनानोववेयाणं पुण वीयरागाण पच्चक्खा चेव, न य खाइगनानोववेया असेसपयत्थसत्थ-वेइणो न संतिति वोत्तवं, मए चिय वभिचारसंवाओत्ति, एवं छिन्नमि संसए तिहिं खंडियसएहिं समं अकंपिओ अणगारियं पडिवन्नोत्ति ८ ॥

एत्थावसरंमि अयलभाया नाम अज्झावगो सुणियजिणमाहण्पो मणोगयवियप्पनिब्भंजणत्थं गओ जयगुरुसमीवं, भणिओ य सामिणा, जहा-भो अयल! पुन्नपावाइं अत्थि नत्थित्ति संसयं तुममुच्चहसि, अजुत्तिसंगयं चेयं, सुहा-सुहफलजणगत्तणेण पुच्चभणियकम्मपक्खनाएण चेव पुन्नपावाणवि पसाहणाउत्ति भणिए जायजहावट्टियविवेओ तिहिं खंडियसएहिं समेओ चारंगव भववासं उज्झिऊण समणो जाओत्ति ९॥ तयणंतरं च तं पच्चइयं सोऊण जिण-तियं पाउब्भूओ मेअज्जो नाम अज्झावगो, सोऽवि संलत्तो तिडुयणेक्कचक्खुणा महावीरेण, जहा-सुंदर! तुमंपि इमं विगण्येसि-भूयससुदायधम्मत्तणेण चेयणारूवस्स जीवस्स कहं भवंतरगमणं घडेज्जा?, भूयववगमे चेयणारूवजीवस्सवि विगमाउत्ति, नणु अघडमाणमेयं, पुढवाईण भूयाण एगतथ मीलणेऽवि चेयणाणुवलंभाओ, तम्हा तच्चइरित्ता चेव चेयणा जीवधम्मरूवा अब्भुगंतच्चा, तदब्भुवगमे य जीवस्स निरुवचरिओ परभवगमो सिद्धो चेव, जाइसरणाईहिं परभवसाहणाओ य, एवं कहिए निब्बिन्नसंसओ भेयज्जो तिसयसिस्सपरियरिओ भयवओ समीवे पच्चइओ १० ॥

अह दससुवि तेसु पच्चजं पडिवन्नेसु पभासो सकोऊहलं तिहिं सएहिं खंडियाणं परिबुडो दूरसुक्कपंडिचाभिममाणो पंजलिउडो भुवणच्छेरयकारयविचित्तातिसयसमेयं सामिं दट्टण हरिसुफुल्ललयणो संसयं पुच्छिउकामोऽवि संखो-
 भेण वोत्तुमपारयंतो भणिओ पारगएण—अहो पहास ! निव्वाणमत्थि नत्थित्ति संदेहदोलमालंबेसि तुमं, नणु उज्झ-
 सु सव्वहा एयं, जओ अइसयनाणिपच्चक्खत्तणेण सयलकम्मकलंकपमुक्कजीवावत्थाणट्ठाणं निव्वाणं चउगगइयसंसा-
 रावासविलक्खणरूवं निरुवचरियं अत्थि, सुद्धपयकि(वच्च)त्तणाओ जीवोच्च, तं च बुहेहिं सहहियवं, जं पुण
 अविज्जमाणं तं सुद्धपयवच्चं पि न होइ, जहा आगासकुसुमंति भणिए पणट्टसंसओ जयगुरुं पणमिऊण सपरिवारो
 पभासोऽवि समणो जाओत्ति ११ ॥ एवं च—

वोच्छिन्नपेम्मवंचणा पणट्टकम्मसंधणा, विसिट्ठजाइसंभवा पसिट्ठगोत्तउब्भवा ।

पहाणरूवसालिणो विसुद्धकित्तिधारिणो, अचिन्तसत्तिसंजुया असेससत्थपायया ॥ १ ॥

पयंडकामखंडणा पहीणदोसभंडणा, सुरासुरिंदवंदिया समगलद्धिनंदिया ।

जिणिंदधम्मसंगया विसुक्कसव्वसंगया, गुणावलीहिं सोहिया न कामिणीहिं मोहिया ॥ २ ॥

इय इंदभूइपमुहा सुणिणो एक्कारसावि तवेलं । दिसिंदतिणोव रेहंति सिस्सकरिकलहपरियरिया ॥ ३ ॥

किं वा वन्निज्जइ तेसि जेसि सयमेव भुवणनाहस्स । कप्पतरु किसलयसमो हत्थो सीसंमि संठाइ ॥ ४ ॥

इओ य-जा पुद्गभणिया दहिवाहणरायसुया चंदणाभिहाणा कन्नगा पढमसिस्सिणी भयवओ भविस्सइत्ति सक्केण संगोवाविया आसि सा तक्कालं सयाणियरायमंदिरे निवसंती गयणंगणे अणवरयं सुरविमाणाइं इताइं गच्छंताणि य पलोइऊण निच्छियजिणकेवलनाणसमुप्पाया पद्गजागहणुक्कंखिरी अहासन्निहियदेवयाए करयलेण कलिऊण समोसरणसुवणीया समाणी परमं पमोयसंभारसुद्धहंती तिपयाहिणादाणपुद्गं वंदिऊण जिणसुवट्ठिया पद्गजागहणत्थं ।

एत्थंतरे अन्नाओवि राईसरतलवरसेट्ठिसेणावइमंतिसामंतकन्नगाओ जिणवइवयणायन्नजायभववेरगाओ सच्चविरइगहणत्थं तदंतियं पाउब्भूयाओ । तओ भगवया चंदणं पुरओ काऊण सहत्थेण दिक्खियाओ, पद्गजासमुज्जमऽसमतथा य वहवे जणा ठाविया सावयधम्मं, एवं एत्थ समोसरणे जाओ भगवओ चउव्विहो संघो ॥ जायंमि य गुणरयणरयणागंमि संघे भगवया इंदभूइपमुहाणं पहासपज्जवसाणाणं एक्कारसणंहंमि तेसिं सयलसुवणगयत्थसत्थसंगहधम्मथाइं 'उप्पन्नेइ वा विगएइ वा धुवेइ व'त्ति कहियाइं तिन्नि पयाइं, तेहि य पुद्गभवब्भत्थसमतथपरमतथसत्थवित्थारवियक्खणत्तणेण तक्कालुप्पन्नपद्गाइसयसुद्धहंतेहिं तयणुसारेण विरइयाइं दुवालस अंगाइं, तहा विरयमाणाणं च सत्तण्हं गणहराणं जायाओ विभिन्नाओ वायणाओ, मेअज्जपभासाणं अयलभाइअकंपियाण य परोप्परं समाओ चेव, एवं च निवत्तिए सुत्तविरयणे इंदभूइपमुहाणं गणहरपयंमि ठावणनिमित्तसुवट्ठिए सयमेव सुवणबंधवे अवसरंति कलिऊण पवरगंधबंधुरवासुम्मिस्सचुणभरियं रयणत्थालं गहिऊण सुरनियपरियरिओ सुरिंदो पाउ-

न्मूओ जिणंतियं, ताहे मामी सीहासणाओ उट्टिता पडियुणं सुट्ठिं चुण्णणं गिण्हइ, तयणंतरं गोयमसामिप्पमुहा
 एक्कारसवि गणहरा ईसिओणया परिवाडीए ठायंति, निरुद्धेहिं तियसेहिं तूरवे जयगुरू गुणेहिं पज्जवेहि य मए
 तुह तित्थमणुणायंति ऋणमाणो पढमं चिय सहत्थेण गोयमसामिणो सीसदेसंमि चुण्णणि पक्खिवइ, एवं चिय
 जहक्कमेण सेसगणहराणंपि, देवावि गयणयलमोगाढा आणंदवियसियच्छा गंधधीकयमुद्धुल्लंथुयमुद्धुल्लंथियमुहलं
 पुप्फवासं चुण्णवासं च निसिरंति, गणं पुण चिरजीवित्तिकल्लुण सुहम्मसामीं पंचमगणहरं धुरे ठवेत्ताभयवं अणुजाणइ ।
 चंदणंपि अज्जाणं संजसुज्जोगघडणत्थं ठावेइ पवत्तिणीयए । एवं एक्कारसहिं गणहरेहिं अणेगेहिं साह्वहिं साहुणीहि
 य परियरिओ जंबुदीवोच्च दीवंतरेहिं सुमेरुच्च कुलाचलेहिं ससिच्च तारानिवेहेहिं सामी सोहिउं पवत्तो । अवि य-
 एगागिणोवि सुवणेक्कबंधुणो को मिणेज्ज माहणं ? । किं पुण गोयमपमुहेहिं गणहरेहिं परिगयस्स ॥ १ ॥

अह कइवय दिवसाइं भवसत्तज्जणं पडिवोहिज्जण तत्तो निक्खंतो जयगुरू । तो आगासगएणं लंबंतमोत्तियजाल-
 विराइएणं छत्तेणं आगासगयाइं छुमुयमयंकमऊहमणहराहिं चामराहिं गयणयलावलंविणा समणिपायपीढेण सीहा-
 सणेणं रणज्झणिरकिंकिणीकुलकलकलमुहलेण अणेगकुडुभियाभिरामेण पुरोगामिणा माहिंदज्झएण य विरायंतो
 सायरं अणुगच्छंतीसु सुरासुरकोडीसु अणुकूलंतेसु वायंतसु सुरहिसमीरणेसु भत्तीएच्च नमंतसु मग्गतखरेसु सुणिय-
 विचारेसु खलेसु व हेट्ठओमुहं ठायंतसु कंटगेसु मणोरमेसु सवेसु उउसु निययमाहप्पेण तिलोयरज्जसिरं एगत्थ मि-

श्रीगुणचंद
महावीरच०
८ प्रस्तावः

॥ २५८ ॥

लियमुवदंसयंतो दुब्भिव्वमारिडमराइं उवसामितो ठाणठाणेसु समोसरणमहिमं पडिच्छमाणो परण्णवाए सुव्नीकुण-
माणो निवाणमगं पयासयंतो विरइप्पयाणेण भवसत्तजणमणुगिण्हंतो पुरगामखेडकब्बडाइसु विहरमाणो कमेण
संपत्तो पुव्वभणियं माहणकुंडगगमं नयरं ।

ताहिं च नयरादूरवत्तिंमि नाणाविहतरुलयासंकुलंमि बहुसालयनामंमि चेइयंमि विरइयं परमविच्छित्तिसणाहं
सुरेहिं समोसरणं, रथणपागारब्भंतरे पइट्ठियं पुवाभिमुहं समणिपायपीढं सीहासणं, निसन्नो तत्थ जएक्कचूडामणी
महावीरो, पायपीढपच्चासन्ने य निलीणो भयवं गोयमसामी, नियनियठाणेसु निविट्ठो देवनरतिरियनिवहो ।
एत्थंतरे वित्थरिया माहणकुंडगगमे नयरे पसिद्धी, जहा-बहुसालगचेइयंमि भयवं महावीरो समोसढोत्ति, एयं
च निसामिऊण पुव्वभणिओ उसभदत्तमाहणो परमपमोयभरनिब्भरभरियमाणसो देवाणंदं माहणीं भणिउमाढत्तो,
जहा-तइलोक्कतिलयभूओ भूयत्थकहापरूवणसमत्थो । सुंदरि ! सिरिवीरजिणो सयमेव समोसढो वार्हिं ॥ १ ॥

निरुवमक्ख्खाणकलावकारणं तस्स दंसणंपि पिए ! । किं पुण अभिगमवंदणपयसेवापमुहपडिवत्ती ? ॥ २ ॥

ता वच्चाओ तदंसणेण कुणिमो सजीवियं सफलं । तीए वुत्तं पिययम ! किमजुत्तं ? एह वच्चाओ ॥ ३ ॥

सा किर जइवसंचिय गब्भाओ अवहडो जएक्कगुरू । तत्तो चिय अच्चत्थं समुव्वहित्था महासोगं ॥ ४ ॥

अह तदब्भुवगमं नाऊण उसभदत्तेण आइया कोडुवियपुरिसा, भणिया य-ओ ! सिग्घमेव वररयणमयकैकिणी-

गणधर-
पदवी सूत्र-
रचना ब्रा-
ह्मणकुण्डे
गमनं०

॥ २५८ ॥

जालमंडियमज्झभागेहिं कंचननथापगहिं नीडुपलविरइयसेहरेहिं उल्लिहियसिंगेहिं लट्टपुट्टसरीरेहिं पवरगो-
 णजुवाणएहिं संगयं संजत्तेह संदणं जेण गंतूण वंदामो जयगुरुं, जं सामी आणवेइत्ति भणिकुण निगगया कुंडुविया
 पुरिसा, पगुणीकओ रहवरो, समुवणीओ उसहदत्तस्स, तओ देवाणंदाए समेओ तमारुहिकुण पुरिसपरिवारपरिय-
 रिओ पयट्ठो जिणाभिमुहं, पत्तो कमेण बहुसालयसमीवं, छत्ताइच्छत्तपमुहाइसयदंसणेण य रहाओ पच्चोरुहिकुण
 पंचविहेणं अभिगमेणं पविट्ठो समोसरणे, तिपयाहिणादाणपुव्वयं च पणमिकुण जिणं पडिड्डमणो निविट्ठो भूमिपट्ठे ।
 देवाणंदाउवि भगवंतं पणमिकुण सविणयं उसहदत्तं माहणं पुरओ काकुण उद्धट्टाणट्टिया चेव सुस्सुसमाणी
 भालतलारोवियपाणिसंपुडा पज्जुवासिउमारद्धा, नवरं जंसमयं चेव तीसे भयवं चक्खुगोयरमुवगओ तंसमयं चिय
 वियसियवयणकमला हरिसुफुल्ललोयणसंदमाणाणंदसलिला जलहरधारापहयकयंबकुसुमंपिव समूससियरोमकूवा
 थणमुहनिससरंतखीरधारा य जायत्ति, तं च तहाविहं पेच्छिकुण समुपपन्नसंसओ गोयमसामी जयगुरुं पणमिकुण
 पुच्छिउं पवत्तो-भयवं ! किं कारणं देवाणंदा अणिमिसाए दिट्ठीए तुम्ह वयणं पेहमाणा नियसुयदंसणाणुरूवा
 पेमपन्धारगन्धमवत्थं पत्तत्ति ? , भगवया भणियं-भो गोयम ! देवाणंदा ममं जणणी, अहणं देवाणंदाए कुच्छिसं-
 भवो पुत्तो, जओ सुरभवचवणाओ आरब्भ वायासी दिणाइं इमीए गन्धमि वुत्थो, अओ चिय पुव्वसिणेहाणुरागेण
 एसा असुणियपरमत्थावि एवंविहं संभममावन्ना ।

इय सोऊण जिणिंदस्स भासियं उच्छलंतरोमंचा । देवाणंदाए समं झडत्ति जाओ उसभदत्तो ॥ १ ॥
परिसाजणोऽवि सबो विम्हयमच्चंतसुवगओ सहसा । अस्सुयपुढे सुणिए को वा नो विम्हयं वहइ ? ॥ २ ॥
तओ उसभदत्तो देवाणंदा य समुप्पन्नगाढयरहरिसपगरिसाई पुणोऽवि निवडियाई जयगुरुणो चलणेसु, सयव-
यावि 'दुप्पडियारा अम्मापियरो'त्ति सेसलोयस्स उवदंसणत्थं च पारद्धा देसणा । कंहं चिय ?
भो भो देवाणुपिया ! अणाइरूवंमि एत्थ संसारे । को किर कस्स न जाओ मायापिइपुत्तभावेहिं ? ॥ १ ॥
कस्सवि न वा विओगे अणवरयगलंतनयणसलिलेण । पइसमयमुक्कपोक्कं हाहारवगब्भिणं रुन्नं ? ॥ २ ॥
चोइसरज्जुपमाणे लोगे नो कत्थ वावि दुत्थमहो ? । अणवरयमावयाणं काण व नो भायणं जाओ ? ॥ ३ ॥
कस्स व आणानिद्दसवत्तिणा दासनिद्विसेसेण । नो वट्ठियं दुहट्ठेण पाणिलोएण एएण ? ॥ ४ ॥
एवंविहदुहनिवहेक्ककारणे कह भवे महाभीमे । खणमेत्तंपि विजायइ निवासबुद्धी सुबुद्धीणं ? ॥ ५ ॥
एत्तो चिय सासयसोक्खकंखिणो लक्खिउं भवसरूवं । तणमिव रज्जाइ समुज्झिऊण पव्वज्जमल्लीणा ॥ ६ ॥
ता जाव पुन्नपब्भारपावणिज्जा इमा हु सामगी । तुब्भेवि ताव गिण्हह निस्सेयरासाहंगं धम्मं ॥ ७ ॥
इय जगगुरुणा कहिए तेसिं आणंदसंदिरच्छीणं । केवलमणुभवगम्भो कोइ पमोओ समुप्पन्नो ॥ ८ ॥
तओ उसभदत्तो देवाणंदाए समेओ हट्टुट्ठो उट्ठिऊण सामिं तिवखुत्तो वंदिऊण करयलकमलकोसेसेहरं सिं

दूरं उन्नामिऊण भणिउं पवत्तो-भयवं ! अवितहमेयं जं तुब्भे वयह, ता अणुगिणहह अम्हे सदिकखापयाणेणं, विर-
 त्तमिणिहं गेहवासाओ माणसं, भगवया भणियं-जुत्तमेयं भचारिसाणं, तओ कयकिच्चमप्पाणं मन्नंताइं उत्तर-
 पुरत्थिमदिसिसुज्झियभूसणकुलुमुदमाइं निवत्तिपयंपंचमुट्ठियलोकम्ममाइं ताइं तिपयाहिणादाणपुरस्सरं परमेसरं
 वंदित्ता भणिउं पवत्ताइं-भयवं ! जरामरणरोगसोगविप्पओगजलजालाकलावकवलियाओ अम्हे एत्तो भवजरकुडी-
 राओ नित्थारेसु सहत्थेण तुमं, तुह पयसरणमल्लीणो खु एसो जणो, इय भणिए भुवणगुरुणा सयमेव तेसिं दिन्ना
 दिक्खा, कहिओ साहुसमायारो परूविओ आवस्सयविही, एवं तक्कालोचियं सच्चं विहिं देसिऊण भयवं अज्जचंद-
 णाए पवत्तिणीए देवाणंदं सिस्सिणित्ताए पणामेइ, उसभदत्तं च थेराणं समप्पेइ, अह ताइं निकलंकसमणधम्मपरि-
 पालणवद्धलक्खाइं अपुच्चापुच्चतवचरणपरायणाइं अहिएक्कारसअंगाइं पज्जंतसमयसमाराहियसंलेहणाइं निव्वाणमहा-
 मंदिरारोहेज्जभूयं निस्सेणिंपिव खवगसेणिं आरुहिऊण पत्ताइं दोन्निवि सिवपयंमि ।

भयवंपि वद्धमाणो परिअरिओ गोथमाइसमणेहिं । हिययाहिंतोवि तमं अवणिंतो भवसत्ताणं ॥ १ ॥

गामागरनगराइसु विहरंतो सिवपयं पयासितो । खत्तियकुंडग्गामे नयरम्मि कमेण संपत्तो ॥ २ ॥

तत्थ य सुरेहिं रइयं चीतरुपायारोगोयरसणाहं । ऊसियसियधयनिवहं जणसुहकरणं समोसरणं ॥ ३ ॥

वत्तीसंपि सुरिंदा जिणसुहकमलावलोक्यणसतण्हा । विविहविमाणारूढा ओअरिया सुरपुरीहितो ॥ ४ ॥

अह पुद्गदुवारेणं पविसित्ता सुरगणेण शुद्धंतो । सिंहासणे निसन्नो निसन्नो पुद्गाभिमुहो जिणवारिंदो ॥ ५ ॥
एक्कारसवि गणहरा केवलमणपज्जवोहिनानी य । चउदसदसपुद्बीविउच्चिइह्दीपत्ता य मुणिवसभा ॥ ६ ॥
उद्धट्ठिया उ वेमाणियाण देवीओ तहय समणीओ । ठायंति जिणं नमिउं दाहिणपुब्बंमि दिसिभाए ॥ ७ ॥
अह दाहिणदारेणं पविसित्ता विणयपणयदेहाओ । भवणवइवाणमंतरजोइसदेवाण देवीओ ॥ ८ ॥
काउं पयाहिणं भुवणबंधुणो धम्मसवणलोभेण । निसियंति पहिट्ठाओ दाहिणपच्चत्थिमविभागे ॥ ९ ॥
तत्तो पच्छिमदारेण पविसिउं पवरभूसणसणाहा । भवणवइवाणमंतरजोइसिया हरिसपणयसिरा ॥ १० ॥
विहिणा जिणं नमंसिय गणहरकेवलपमोक्खमुणिणो य । निविसंति जिणाभिमुहा उत्तरपच्चत्थिमदिसाए ॥ ११ ॥
उत्तरदिसिदारेणं तत्तो पविसिउ दित्थरूवधरा । वेमाणियसुरवग्गा नरा य नारीजणा य तथा ॥ १२ ॥
पम्मुक्कपरोप्परवरमच्छरा धम्मसवणतल्लिच्छा । उत्तरपुरत्थिमंमि य ठायंति दिसाविभागंमि ॥ १३ ॥
न कुणांति हासखेड्डां नेव चक्खुं खिवंति अन्नत्थ । चित्तलिहियच्च सव्वे जिणिंदवयणं पलयंति ॥ १४ ॥
तयणंतरं च बीए पायारब्भंतरे तिरियवग्गो । हयमहिससीहपमुहो उज्झियवेरो सुहं वसइ ॥ १५ ॥ कंहं चिय ?-
दिणयरकरसंतत्तं भुयंगमं छाए सिंहडेहिं । तंडविण्हिं सिंहडी करुणाए विमुक्ककुविगप्पे ॥ १६ ॥
कंडूयइ दसणकोडीए कुंजरो केसरिस्स मुहभागं । धावारइ सीही हरिणसावयं दढळुहाभिहयं ॥ १७ ॥

मञ्जारेऽवि दु ससिरंमि मूसगं ठवइ गाढपणएण । वणसेरिहोऽवि तुरयं रसणाए दढं परामुसइ ॥ १८ ॥
 इय जत्थ निव्विवेयावि पाणिणो तत्थ तिथसनरनिवहा । उज्झंति मच्छरं जं परोप्परं तं किमच्छरियं ? ॥ १९ ॥
 तइए पायारब्भंतरंमि देवाण विविहरूवाइं । विजयपडायापयडाइं संनिसीयंति जाणाइं ॥ २० ॥
 एत्थंतरंमि भुवणेक्कभाणुणा कलियसयलभावेण । वयणकिरणेहिं मिच्छत्ततिभिरभवहरिउमारद्धं ॥ २१ ॥

इओ य पुव्वमेव जिणविहारनिवेयणवावारियपुरिसेहिं सामिसमागमेण वद्धाविओ नंदिवद्धनराहिवो, हरिसभर-
 निस्सरंतरोभंचेण य तेण दवावियं तेसिं चित्तियाइरित्तं पारिओसियं, भणिओ य संनिहियकिंकरवगो-अरे ! सिग्धं
 संजत्तेह जयकुंजरं पगुणीकरेह तुरंगघट्टाइं पयट्टावेह नयरसोहं उब्भवेह सच्चविजयचिंधाइं आइक्खह आधोसणा-
 पुव्वयं नयरीजणस्स जहा सिग्धं पाउब्भवह कयमज्जनविलेवणा नियविभवाणुरुवजाणजंपाणारूढा नरिंदसमीवं
 जेण वंदिज्जइ महावीरोत्ति भणिए जं देवो आणवेइत्ति पडिवज्जिऊण संपाडियं नरिंदसासणं, समुवणीओ जयकुं-
 जरो, समारूढो य नरिंदो, पुरजणेण परियरिओ पयट्टो भयवओ अभिसुहं, तओ छत्ताइच्छत्ते पेच्छिऊण पमुकराय-
 चिंधो परेणं विणएणं जयगुरुं विन्नवेउं पवत्तो । कहं ?—

गयणंगणं व ससहरविवज्जियं नाह ! एत्तियं कालं । नयरमिमं तुह विरहे पणट्टसोभं दढं जायं ॥ १ ॥
 अहमवि तुम्हऽणुवित्तीए नूण चत्तो न रायलच्छीए । अन्नह तुमए रहियस्स नाह ! का जोगया मज्झ ! ॥ २ ॥

तुह सचरियाणं कित्तेणेण पइदियहेमेव पुणरुत्तं । साहारो मह जाओ जीयस्सवि निस्सरंतस्स ॥ ३ ॥
 ता अज्जं चिय सुदिणं अज्जं चिय वंछियाइं जायाइं । चिरकालाओवि जएक्कनाह ! जमिहागओ तंसि ॥ ४ ॥
 इय सव्भावुब्भडपेम्मगब्भवयणाइं जंपिउं राया । सट्ठाणंमि निविट्ठो ठविउं दिट्ठिं जिणमुहंमि ॥ ५ ॥
 इओ य तत्थेव नयरे भयवओ भाइणिज्जो रूवलायणसाली जमाली नाम कुमारो परिवसइ, सो य वद्धमाणंमि
 पव्वज्जं पडिबन्ने नंदिवद्धणनरिंदेण भगवओ पुत्तिं पियदंसणाभिहाणं परिणाविओ समाणो केलाससेलसिहरसमुत्तुंग-
 धवलहरमारूढो वज्जंतोहिं चउविहाउज्जोहिं वरतरुणीसंपउत्तेहिं वत्तीसइवद्धेहिं नाडएहिं उवगिज्जमाणो उवन-
 चिज्जमाणो य पाउसवासारत्तसरयहेमंतवसंतगिम्हपज्जवसाणे छेव उउणो जहाविभवेण माणयंतो पंचविहे पवरे
 माणुस्सए कामभोगे पच्चणुब्भवमाणो सिंगाडगतियचउक्कचच्चेसु जिणगमणसवणहल्लफलियं परिचत्तवावारंतरं हल-
 बोलाउलियदियंतरं जणसमूहं एगमग्गाणुलग्गं अवलोइऊण सविम्हयं नियपरियणमापुच्छइ-अरे किमज्ज एत्थ
 नयरे इंदमहो वा खंदमहो वा सुगुंदमहो वा नागमहो वा जक्खमहो वा चेइयमहो वा ? जं एस पुरजणो एवमे-
 गाभिसुहो गच्छइ, परियणेण भणियं—कुमार ! नो अज्ज इंदखंदाईणं ऊसवचिसेसो, किंतु भयवं महावीरो तुम्ह
 माउलगो समणसंघपरिवुडो बाहिं समोसढो, तस्स वंदणवडियाए एस जणो वच्चइ, एवं च निसाभिऊण हरिस-
 वससमूससियरोमकूवो कयमज्जणविलेवणालंकारपरिगहो सकोरिंटमल्लदामेणं छत्तेणं धरिज्जमाणेणं नाणाविहपहरण-

करपुरिसपरिखित्तो पवररहनिसन्नो गओ समोसरणं, दूराओ चिय ओयरिओ रहाओ, परमायेरेण वंदिओ जिणो,
तओ अणिमिसाए दिट्ठीए सामिसुहमवल्लोयमाणो पज्जुवासिउमारद्धो । भगवयावि पयट्ठाविया धम्मदेसणा ।
कहं चिय ?—

करयलपरिगलियजलं व गलइ पइसमयमेव जीयमिमं । बाहिजरायंकाविय देहं दूमंति निच्चंषि ॥ १ ॥
अइवहुकिलेससमुवज्जियावि विज्जुव चंचला लच्छी । पियपुत्तसयणजोगोऽवि भंगुरो जलतरंगोव ॥ २ ॥
विसयपिवासा पिसाइयव दुन्निग्गहा तह कहंपि । वामोहइ जह थेवंपि नेव संभवइ वेरगं ॥ ३ ॥
अवरावरणिहवावारविरयणावाउलो सयावि जणो । कीणासमुहं वच्चइ अणुवज्जियधम्मपाहिज्जो ॥ ४ ॥
एसो चिय सुद्धजणस्स विव्वमो सव्वाहाऽविय अजुत्तो । जं पज्जंते धम्मं भोत्तुं भोगे चरिस्सामो ॥ ५ ॥
जं थेरत्ते पत्ते हयंमि सव्विंदियप्पयारंमि । अच्छउ दूरे करणं दुलहं धम्मस्स सवणंपि ॥ ६ ॥
किं बहुणा भणिणं?, जो बालत्तेऽवि नायरइ धम्मं । संगामसमयहयसिक्खगोव सो सोअइ विरामे ॥ ७ ॥
इय जयगुरुणा नीसेससत्तसाहारणाए वाणीए । मोक्खसुहमूलवीयं कहियं सद्धम्मसव्वस्सं ॥ ८ ॥
इमं च अवक्खित्तचित्तो सवणंजलीहिं पाऊण जप्पालिकुमारो हिययंतो समुल्लसंतवेरग्गवासणो भयवंतं पणि-
वइऊण भालयलनिच्चलनिवेशियपाणिपंकयकोसं भणिउं पवत्तो—

भयचं ! तुमए जह मज्झ देसिओ मोक्खसोक्खदाणखमो । धम्मो तह नो केणवि अन्नेणं निउणमइणावि ? ॥ १ ॥
मन्ने पुव्वभवेसुं बाढं समुवज्जियं मए पुन्नं । तेण जयनाह ! तुमए सद्धिं मह दंसणं जायं ॥ २ ॥

ता जाव अस्मापियरो पुच्छामि ताव तुब्भं समीवे सफलीकरेमि पव्वजापरिगहेण नियजीवियं, भयवयावि भणियं-बहुविरघाइं धम्मकज्जाइं मा पडिबं धं कुणसुत्ति, तओ जमाली कुमारो जयगुरुं वंदिऊण संदणारूढो गओ सगिहं, पत्थावेण य अस्मापिऊण पाए पणमिऊण भणिउमारद्धो-हंहो अम्मताया ! अज्ज मए भयवओ महावीरस्स अंतिए धम्मो निसामिओ, सो य अमयंपिव अभिरुइओत्ति, अस्मापिऊहिं भणियं-धन्नो कयलक्खणो उवलद्ध-जम्मजीवियफलोऽसि तुमं, नहु अकयपुन्नाण कइयावि सवणगोयरसुवगच्छइ जिणिंदवयणं, जमालिणा संलत्तं-अम्मताया ! तदायन्नणाणंतरमेव संसारमउच्चिगो भीओऽहं जम्मममरणाणं ता इच्छामि तुब्भेहिं समणुण्णाओ समाणो समणभावं पडिच्चज्जिउं । इमं च अस्सुयपुच्चं निसामिऊण जमालिस्स जणणी तक्खणुप्पन्नसंताववसविस्स-प्पमाणसेयसलिला सोगभरवेविरंगी पयंडमायंगकराहयकुसुयं च मिलाणलायन्नं वयणसुच्चहंती तक्खणकिसीभूय-बाहुवल्लीरगलंतकणयवलया धरणिवट्टपम्भट्टउत्तरिछा विकिण्णकेसहत्था सिट्ठिलसंधिबंधणा मुच्छावसनट्टचेयणा धसत्ति कोट्टिमतलंमि निवडिया, अह संसंभमपधाविएण परियेण निम्मलसलिलसीयरसंवलिएण तालियंटपव-णेण आसासिया समानी सुचिरं विलविऊण विमुक्कदीहनीसासा जमालिं भणिउं पवत्ता-अहो वच्छ ! अम्हाणं तुमं

चेव एगो पुत्तो संसओ पिओ हियनंदणो रयणकरंडगसमाणो ओवइयससुवलद्धो, ता नो खलु वच्छ ! अम्हे इच्छामो तुम्ह खणमेत्तमवि वियोंगं, किमंग पवजाणुमन्नणं ? अओ अच्छसु ताव जाव अम्हे जीवामो, कालगएहिं पुण परिणयवओ वड्हियकुलसंतई निविन्नकामभोगो पवजेज्जासि, जमालिणा भणियं—अस्मा ! एत्थ खलु माणुसए भवे अणेगसारीरमाणसोगजरामरणपमुहोवद्वसंपगाढे असासए जलवुब्बुयसमाणे सरयगिरिसिहरसरंतसरिया-तरंगभंगुरे को एवं जाणइ—के पुविं मरणधम्माणो के वा पच्छा मरणधम्माणोत्ति, किं च—

जइ नाम सुणिज्ज इमंपि कोइ ता किं न होज्ज पज्जत्तं ? किं तु अयंडेवि अखंडियागमो पडइ जमदंडो ॥ १ ॥ किंतु—कस्स न हरंति हिययं विसया ? नो कस्स वल्लहा सुयणा ? किंतु खरपवणपहयं किसलयमिव भंगुरं जीयं ॥ २ ॥ एत्तो विय दुज्जणमाणसं व मोत्तूण रजरट्टाई । धीरा दुरणुचरंपि इ संजममगं समणुलम्भा ॥ ३ ॥

ता मोहपसरमुच्छिदिज्ज गयमो(अणुमण्ण)धम्मकरणत्थं । किं वल्लहं निरुभइ कोवि इ जलणाउले गेहे ? ॥ ४ ॥ एवं च भणिए अस्मापिऊहिं कहियं—पुत्त ! इमं तुह सरीरं विसिट्ठलक्खणवंजणगुणोववेयं उत्तमवल्लवीरियसत्त-जुत्तं उदग्गसोहगसंगं समग्गरोगरहियं निरुवहयलद्धपंचिंदियं पढमजोव्वणगुणाणुगयं, अओ कंहं दुरणुचरं संजमं काळं पारिही ? जेण—

मत्तकरियायदढचलणचंपणं सहइ नेव कमलवणं । उवरमसु पुत्त ! दुक्करसंजमकरणाउ तेण तुमं ॥ १ ॥

जमालिणा भणियं—अम्मो ! माणुसगं सरीरं अणेगरोगसोगसंगयं अट्टिसंचयसमुट्ठियं ण्हारुसिराजालसंपिणद्धं अकुट्टिमट्ठियाभायणं व थेवेणवि विद्धंसणसीलं असुइयं रुहिरमंसवसेमयसुक्काइकुसपडिपुन्नं सवोवद्वसज्झं अवस्समुज्झणिज्जंति । अविय—

निस्सारस्सवि एयस्स सारया एत्तिएण निव्वडिया । जं उवयारे वट्टइ मोक्खत्थं उज्जमंताणं ॥ १ ॥

जइ ण्हाणविलेवणभूसणेहिं कीरइ इमस्स नो चेट्ठा । ता वासरससहरमंडलंव सोहं न उव्वहइ ॥ २ ॥

तओ पुणोऽवि भणियं जणणीए—पुत्त ! इमाओ समुन्नयरायकुलसंभवाओ सयलकलाकुसलाओ ख्वलायन्नमण-
हरंगीओ जलहिंवेलाओ व सकुलालंकरणाओ सुमुणिमालाओ इव सुत्ताहारपरिग्गहाओ मयगलावलीओ इव लीला-
लसगाभिणीओ पीणघणथणविणमियमुट्ठिगेज्झमज्झाओ मणोणुकूलवत्तिणीओ सवंगसुंदरंगीओ पियदंसणापमुहाओ-
अट्ट पियथमाओ अपत्तकालेच्चिय परिच्चइऊणमच्चंतमजुत्तं तुह तवोकम्ममारंभिउं, तम्हा एयाहिं सद्धिं ताव भुंजाहि
माणुस्सए कामभोए, परिणयवओ य एयाहिं चेव समं पवज्जं आयेरेज्जासि ।

जमालिणा कहियं—अम्मो ! एए माणुस्सया कामभोगा उच्चारपासवणवंतपूयसुक्कसोणियसमुब्भवा मयकलेवर-
निस्सरंतविस्सगंधा असुहुउस्सासुवेयजणा बीमच्छा तुच्छकालिया बहुकिलेससज्झा य अनुहजणजणियचित्तप-
रितोसा साहुगरहणिज्जा अणंतचाउरंतसंसारवद्धणा करयलकलियद्धदहकट्ठं व अमुच्चमाणा असंखतिक्खदुक्खाणुनं-

धिणो सुगङ्गमणविघकारिणो कंहं कुसलाण खणमेत्तं पि उवभोत्तुं जुत्ता हवंति ? । अविद्य—

को णाम जीवियत्थी तालउडविसं कयावि भुंजेज्जा ? । उग्गाढदाढकेसरिमुहकंदरमहव घट्टेज्जा ? ॥ १ ॥

जालाकलावभीसणवज्जानलमज्झमहव पविसेज्जा । निसियग्गखग्गधारासु वावि को वा परिभमेज्जा ? ॥ २ ॥

अहवा सबंधि इमं करेज्ज कोऽवि हु सुराइसामत्था ।

विसए पुण परिभोत्तुं खेमेण न कोइ (खणमवि न सुहेण) निवसेज्जा ? ॥ ३ ॥

जइ कहवि अयाणंता मूढा विसएसु संपयट्ठंति । ता किं सुणियजिणेसरवयणाणवि वट्ठिउं जुत्तं ? ॥ ४ ॥

इमं च निसामिऊण पुणोऽवि भणियं जणणीए—वच्छ ! इमं अज्जयपज्जयपिउपज्जायागयं वंडुं हिरणं रययं कंसं दूसं निहिनिवहं अलं सत्त पुरिसे जाव पक्कामं दाउं पक्कामं परिभोत्तुं ता जहेच्छं विलससु कइवय वासराइति, जमालिणा भणियं—अम्मो ! सुवहुं पि दव्विजजायं अग्गिसाहियं चोरसाहियं दाइयसाहियं अधुवं असासयं असेसाण-
त्थसत्थनिबंधणं, अओ को एत्थ पडिबंधो ?, एवं च अणेगप्पयारेहिं अणुक्खेहिं वयणेहिं जाव पन्नविज्जमाणोऽवि जमाली न किंपि पडिवज्जइ ताव पुणोऽवि संजमभयकरोहिं वयणेहिं अस्मापिउणो पयंपंति-वच्छ ! दुरणुचरं निगंगं पावयणं, जओ एत्थ लोहमया जवा चावेयवा गंगामहानईए पडिसोएण गंतव्वं महासमुदो भुयाहिं तरियव्वो असि-
धारं वयं अणुचरियव्वं, न य वच्छ ! एत्थ समणाणं कप्पइ आहाकम्मियं वा उद्देसियं वा भिस्सजायं वा कीयगड-

पसुहं वा दुष्प्रभक्खभत्तं वा गिलाणभत्तं वा वहलियाभत्तं वा सेज्जायरपिंडं वा कंदमूलफलवीयहरियभोयणं वा परिभोत्तुं, तुमं च वच्छ ! सुहलालिओ न समत्थो सीयवायायवखुहापिवासापमुहदुस्सहनावीसपरीसहसहणं सुहुत्त-
मवि काउं, ता अलाहि पुणरुत्तवायावित्थरेणं, जमालिणा भणियं-अम्मताया ! इमं निगंगं पावयणं कीवाणं कायराणं काउरिसाणं इहलोयपडिबद्धाणं परलोयपरमुहाणं विसयतिसियाणं दुरणुचरं, नो सप्पुरिसाणं पडिवन्नभरधरण-
धवल्लाणं नियसरीरजीवियनिरवेक्खाणंति, एवं च अणुकूलेहिं पडिकूलेहिं य वयणेहिं भणिओ समाणो आव
जमाली न परिचयइ पव्वज्जामिलासं ताव अकामएहिं चेव अणुमन्निओ जणणिजणेगेहिं । तयणंतरं आहूया निययपु-
रिसा भणिया य, जहा-सिग्घमेव खत्तियकुडग्गाभं नयरं सवाहिरवभंतरं सम्मज्जिओचलित्तं अवणियतणकयवरं
विसोहियरायमग्गं कारावेह, जमालिक्कुमारस्स य जोगं महरिहं निक्खयणभिसेयं निवत्तेह, ते य सविणयं पडिसु-
णित्ता नीहरिया भवणाओ संपाडियं रायसासणं, तयणंतरं च पुरत्थाभिमुहम्मि सीहासणे उववेसिऊण जमालि-
कुमारो मणिकणगरययपुढविमएहिं अट्टोत्तरसयसंखेहिं अणेगेहिं कलसेहिं गंधुदुरपवरसलिलभरिएहिं ण्हाविओ ।
अम्मपिऊहिं निवत्तियंमि य अभिसेगे भणिओ-वच्छ ! किमियाणिं तुह बहुमयं पियं पयच्छामो !, जमालिणा
भणियं-अम्मताया ! इच्छामि इयाणिं कुत्तियावणाओ रयहरणं पडिग्गहं च उवणिज्जमाणं तहा कासवं च वाहरि-
ज्जमाणं, एवं च निसामिऊण जमालिपिऊणा भणिया पुरिसा-अरे सिरिघराओ तिन्नि दविणसयसहस्साइं घेचूण

कुत्तियावणाओ रयहरणं पडिगहं च एगमेगलक्खेण आणेह, एगलक्खप्पयाणेण कासवंगं च सद्दावेह, एवमाणत्ते
 निग्गया पुरिसा रयहरणं पडिगहं कासवंगं च वेत्तूण पडिनियत्ता, सो य कासवो जमालिपियरं पणमिऊण एवं
 भणिउं पवत्तो-देव ! संदिसह जं मए करणिज्जं, तेण जंपियं-मह ! जमालिस्स कुमारस्स परेणं जत्तेणं चउरंगुलवज्जे
 निक्खमणपाओगे अग्गकेसे कप्पेहि, तओ सो कासवओ सुरभिगंधोदएण करचलणे पक्खालिऊण अट्टगुणाए
 पोत्तीए वयणं संजमिऊण जहुत्तेण विहिणा केसे कप्पिउमारद्धो, जणणीवि से अणवरयं कज्जलमलिणाइं अंसु-
 याइं सुयंती सुयगनिम्मोयनिम्मलेण उत्तरिज्जेण केसकलावं पडिच्छइ, तयणंतरं च सुरभिवारिणा पक्खालिऊण
 हरियंदसविलेवणपुण्णेहिं अच्चेइ, पंडुरवत्थंमि वंधिऊण रयणकरंडंगंमि पक्खिवइ, सोगभरगगरगिरं च रुयमाणी
 एवं भणइ-एत्तो मए मंदपुण्णाए जण्णेसु ऊसवेसु य वहीसु य इमेहिं पुत्तो जमाली सुमरणिज्जोत्ति, एवं च अभि-
 क्खणं जंपमाणी तं रयणकरंडंगं नियसयणिज्जस्स ऊसीसगमूले ठवेइ, अह निवत्तियमज्जनमहूसवो परिहियामल-
 दुगुल्लो हेममयमउडमणिकणयकडयकुंडालंकि यसरीरो वच्छत्थलरिखोलितविमलमुत्ताकलावसोहिळ्ळो विविहाभरण-
 पहाभरविच्छुरियनहंगणाभोगो तक्कालमिलियविलयासमूहकीरंतमंगलाथारो दाणाणंदियमग्गणिज्जंतुदामगुणनि-
 वहो खंभसयसंनिविट्ठं समीरंबुयधवलधयवडसणाहं सुविचित्तचित्तरम्मं अणेगजणजणियपरितोसं सुइनेवत्थधराणं
 छेयाणं पवरनरज्जुवाणाणं सहस्सेणं उक्खित्तं झडत्ति सिन्नियं समारूढो, रयहरणपडिगहधारिणीए दाहिणदिसि

निलीणाए धावीए परियरिओ, अन्नाहि य पयरमणीहिं धरियधवलायवत्तो चलंतससिकंतचामराचयंओ दिट्टिपह-
पइट्ठावियमणिमयअट्ठुमंगलओ करितुरयरहवरारूढसयणवगेण अणुगमिज्जंतो वज्जंताउज्जसमुच्छलंतरवभरियनह-
विवरो पासायतलट्टियपउरलोयनिवेहेण संथुणिज्जंतो झडत्ति जमालिकुमारो तयणु पयट्ठो जिणाभिमुहं ।

अह जमालिस्स भारिया पियदंसणा तहाविहवइयरमुवलब्भ जायभववेरगा पवज्जं पडिवज्जिउकामा तहेव
पड्डिया, कमेण य पत्ताइं ताइं जिणंतियं, तओ पंचरायसुयसयपरिवारो जमालिकुमारो पडिवज्जो जिणिंददेसियं
समणधम्मं, पियदंसणावि नरिंदुहिया सहस्सेण परिवुडा पवहुमाणसंवेगा समणी जायत्ति ।

अह जमाली सामाइयमाइयाइं एक्कारस अंगाइं ससुत्ताइं सअत्थाइं अहिज्जइ, बहूहिं चउत्थछट्ठुमपमुहेहिं अण-
वरयं विचिच्चेहिं तवोकम्मेहिं अण्णाणं भाविंतो भगवया सड्ढिं पुरागराइसु विहरइ, पियदंसणावि चंदणाए पव-
त्तिणीए समं परियडइ ।

अह अन्नया कयाइं जमाली भयवंतं महावीरजिणन्नरं वंदित्ता विन्नविउमारद्धो-भयवं! वंछामि अहं तुब्भेहिं
अब्भणुन्नाओ समानो अनिययविहारोहिं पंचहिं समणसएहिं सड्ढिं विहरिउंति, सामीवि विमलकेवलालोयावलो-
इयसयलजियलोयभूयभाविवहुमाणकालकलावलंबिसुहासुहपरिणामविसेसो भाविरमणत्थं सुणिऊण जमालिस्सं पुणो
पुणो भणमाणस्सवि मोणमवलंबिऊण जाविउं पवत्तो, जमालीऽवि अप्पडिसिद्धमणुमयंति कलिऊण पंचहिं समण-

सएहिं सहिओ तवस्सिणीसहस्सपरिवुडाए पियदंसणाए समणुगओ अपुवापुव्वगामनगरागराइसु भमिउमारद्धो, अन्नया य गामाणुगामेण विहरमाणो समागओ सावत्थि नयरिं, ठिओ य कुट्टगाभिहाणम्मि उज्जाणे, तत्थ य ठियस्स बिरसेहिं लुक्खेहिं सीयलेहिं तुच्छेहिं असुंदरेहिं कालाइक्कतेहिं पाणभोयणेहिं दुरहियासो पयंडो सरीरंमि पित्तजरो पाउब्भूओ, तेण य अच्चंतं अभिहओ सप्पाणो भणइ—अहो समणा! मम निमित्तं संथारयं संथारेह, ते य तव्वयणमायन्निकुण तक्खणमेव संथारयं संथारिउमारद्धा, जमालीवि अहिययरं वेयणाभिहओ निसन्नो ठाउमपारयंतो पुणो पुणो पुच्छइ—भो समणा! संथारगो संथरिओ न वा?, तेहिं भणियं—संथरिओ, एवं च सोच्चा उट्ठिओ जमाली गओ तदंतियं, संथारयं च संथरिज्जंतं पेच्छिकुण उप्पन्नमिच्छत्तो जंपिउं पवत्तो—भो सुणिणो! इयाणिं सुणियं मए तत्तं, निष्फन्नमेव निष्फन्नं भन्नइ, न उण निष्फज्जमाणंपि, अओ संथरिज्जमाणेऽवि संथारगे संथरिओत्ति तुव्वमेहिं वुत्तं तमसच्चं, एवं च—

कडमाणं कडुप्पज्जमाणमुप्पन्नमेवमाईवि । वागरइ जं जिणिंदो दिट्ठविरोहा न तं घडइ ॥ १ ॥

अवरावरसमथसमूहजोगनिष्फज्जमाणकज्जंमि । कह पारंभे चिय कडमिंभति वोचुं खमं होजा? ॥ २ ॥

अत्थकिरियापसाहणखमं च वत्थुत्तणं समुव्वहइ । पढमसमप्पसूए य तयंपि नो विज्जइ पयत्थे ॥ ३ ॥

जइ पारंभे चिय तं कडंति एवं च सेससमएसु । करणे कडस्स आवडइ उब्भडा नूणमणवत्था ॥ ४ ॥

ता जुत्तिसंगयमिमं कडमेव कडं पवुच्चए पयडं । किरियानिद्धासमयाण होइ एवं च न विरोहो ॥ ५ ॥
इय पडिवज्जह समणा ! पक्खमिमं सयलदोसपरिहीणं । वुत्तंति नेय गिज्झइ कुसलेहिं किंतु जुत्तंति ॥ ६ ॥
नय सव्वञ्चुत्ति पसिद्धिपत्तकित्ती जिणो वयइ मिच्छा । किं तु वए चिय कहयावि जेण गरुयावि सुज्झंति ॥ ७ ॥
इय समयसत्थसवणुब्भवंपि तं नियविवेयमवहाय । पित्तजरविडुरिओ इय पलवइ असमंजसं बहुसो ॥ ८ ॥
एवं च सुक्कमज्जायं अजुत्तजंपिरं च जमालिं वियाणिऊण थेरोहिं भणियं—भो जमालि ! किमेवं विवरीयं परूवेसि ? ,
न हु विजियरागदोसमोहा अन्नहा जंपति तित्थयरा, न य तवयणं मणांगंपि पच्चक्खविरुद्धाइदोसलेसमावहइ,
तहाहि—जं तए भणियं—अणेगुत्तरोत्तरसमएहिं निष्फज्जमाणंमि कजे कहं पारंभसमएवि निष्फण्णंति वुचइ ? , तमजुत्तं,
जओ—जइ पढमसमए निष्फण्णं न वुचइ ता समयविसेसत्तणेण वीयाइसु समएसु अनिष्फत्ती चेव हवेज्जा, जं च
अत्थकिरियाए साहगतं वत्थुलक्खणं भणियं तंपि इह अद्वमिचरियं जुज्झइ, अभिहाणनाणोवओगंसंमवाओ, तहा-
हि—तहाविहं वत्थुविसेसं पप्प पढमसमएवि लोगो किमेयं कुणसिति अन्नेण पुट्ठो वागरइ—घडं पडं वा करेमिति,
जं च पढमसमयकडे उत्तरोत्तरसमएसु कडकरणलक्खणाणवत्थादूसणं तंपि अन्नन्नकज्जंतरपसाहणेण अलियमेव,
किरियाकालनिद्धाकालभेयदूसणपक्खोऽवि विहलो, जं च कहियंन वुत्तं गिज्झइ किं तु जुत्तं, तत्थवि छउम-
त्थस्स तुम्हारिसस्स कहं जुत्ताजुत्तविवेओ संभवेज्जा ? , मयवं चिय केवलालोयकलियलोयालोयभावो एत्थ पमाणं,

जं च भणियं गरुयावि मुञ्चति तंपि उम्मत्तपलवियं व न कुसलाण चित्तं रंजितं पारइ, ता सुहु भणियं भगवया—कडमाणं कडमुप्पज्जमाणसुप्पन्नमिचाइ, किंच—

जइ तिहुयणेक्कचूडामणी जिणो चागरेज्ज वितहमहो । ता तवयणेण तवोविहाणभेयं किमायरसि ? ॥ १ ॥
रज्जं रट्ठं च विवज्जिऊण आणाए तस्स निक्खमिउं । तवयणं दूंसितो कह न तुमं लज्जसे इण्हि ? ॥ १ ॥
अहवाऽणाभोगसमुभवेण दोसेण दुहु भणिएवि । जायइ पुणो विसुद्धी आलोयणनिंदणाइहिं ॥ ३ ॥
ता मोचुं कुवियप्पं वच समीवे जएक्कदीवस्स । पडिवज्जसु पच्छित्तं मा विफलं नेसु नियजम्मं ॥ ४ ॥
अक्खरमेत्तंपि न जो जिणिंदवयणस्स सहइइ मणुस्सो । सो पावइ मिच्छत्तं तत्तो संसारपरिबुद्धिं ॥ ५ ॥
तत्तो चिय किब्बिसतियसतिरियवसहीसु मणुयजोणीसु । दुविसहदुहपरंपरमणंतमणिवारियं लहइ ॥ ६ ॥
गरुओऽवि पावरासी जिणिंदसमयत्थसइहणहणिओ । नावत्थाणं बंधइ घणोव खरपवणपडिहणिओ ॥ ७ ॥
इय सो थेरोहिं नहुप्पयारहेऊहिं अत्थसोरोहिं । तह गाढं पन्नविओ जह सहसा मोणमल्लीणो ॥ ८ ॥

अह विवरीयपरूवणापाउब्भूयपावपायच्छित्तमपडिवज्जमाणं जमालिं परिहरिऊण केऽवि थेरा भगवओ समीव-
मुवगया, अन्नो य तस्स चेव पासे ठिया, पियंदसणावि अजियासहस्सपरिवारा महिलाभावसुलभनिविवेययाए
पुवपडिवंधाणुवित्तीए य जमालिस्स पक्खमणुवत्तिउमारद्धा ।

एगया य जायनीरोगसरीरो जमाली तेण असग्गेहेण अप्पाणं च परं च पइदिणं दुग्गाहेमाणो दुप्पाएमाणो जिणनाहवयणं दूसेमाणो अहमेव उप्पन्ननाणंदसणधरो सव्वनुत्ति अहंकारसुव्वहंतो सव्वत्थ हिंछिउं पवत्तो । अन्नया य चंपानयरीए पुण्णभदे चेइए समोसढस्स अणेगसिस्सगणपरिबुडस्स भयवओ महावीरस्स अदूरदेसंमि सो ठाऊण सगव्वमेवं भणिउमाढत्तो-भयवं ! जहा तुज्झ बहवे सिस्सा छउमत्था चेव भवित्ता मरणधम्मयं पत्ता तहा न खलु अहं, जओ मम दिव्वमक्खयं केवलनाणंदसणं उप्पन्नंति, तव्वसेण य सवं जहड्डियं वत्थुतत्तं अवगच्छामि, अओ एत्थ धरामंडले अहमेव अरहा सव्वन्नू सव्वदरिसिन्ति । इमं च निसामिऊण भणिओ गोअमसामिणा-भो जमाली ! जइ तुमं एवंविहो ता तुज्झ नाणं सेलेण वा थंभेण वा थूभेण वा न वारिज्जइ, अओ इमाइ दोन्नि पसिणाइं मम वागरेहि, किं सासओ लोगो असासओ ?, किं सासओ जीवो असासओ वत्ति ?, एवं च पुच्छिओ जमाली संसय-मावण्णो जाव पच्चुत्तरं दाउमसमतथो विच्छायसुहच्छाओ तुसिणीए संचिहइ ताव भुवणेक्कमाणुणा महावीरेण वाग-रिओ-भो जमाली ! बहवे मम अंतेवासिणो जिणा इव समत्था इमं आयक्खिउं, किं तु तुमं व न एवं संगव्वमु-ल्लवंति, न य भद् ! एत्थ किंपि दुन्नेयं, जओ सासओऽवि लोगो असासओऽवि लोगो, कहं ?, कालत्तएवि अवड्ढि-यसामन्नरूवत्तणेण सासओ, ओसप्पिणीपमुहपज्जायपरियत्तणेण य असासओ, एवं जीवोऽवि सव्वावत्थासु अणुगा-मिच्चणेण सासओ, नरेनरइयतिरियाइपज्जायंतरंसंभवा असासओत्ति । एवं च भगवओ आइक्खमाणस्स जमाली

कुवियप्पाउलहियत्तणेण असद्वहिऊण तेण पुव्वबुग्गाहिएण नियसमणसमणीसंघेण परिबुडो पुरनगराइसु नियदं-
सणाभिप्पायं परूवयंतो विहरइ, वित्थरिया सब्वत्थ एसा संकहा जहा जमाली भगवओ मिच्छं पडिवन्नोत्ति ।

अन्नया य सो विहरमाणो पुणो गओ सावत्थि नयरिं, ठिओ य एगत्थ उज्जाणे, पियदंसणावि अजियासहस्स-
परिवारा महिद्धियस्स ढंकाभिहाणस्स कुंभकारस्स आवणे आपुच्छित्ता ठिया, सो य ढंको जिणवयणभावियप्पा
जाणइ जहा एयाणि मिच्छत्तमुवगयाणि, जिणवयणं न पत्तियंति, अओ जइ कहवि बोहिज्जंति तो सुहु लहुं हव-
इत्ति । अन्नया य भंडयाइ उव्वत्तंतेण पडिवोहणत्थं पियदंसणासाहुणीए वत्थंमि पक्खित्तो एगो जलणकणो, तेण
य दज्झमाणं वत्थं पेच्छऊण तीए भणियं—भो महाणुभाव ! किमेयं तए कयं ? पेच्छ मम पडगो दड्डो, तेण
भणियं—अजिए ! मा मुसं वयाहि, सब्वंमि चेव वत्थे निद्वहे एवं भणिउं जुज्जइ, एस किर तुम्ह संमयत्थो, अन्नहा
दज्झमाणं दड्डंति जिणवरवीरवयणं चेव पडिवज्जिउं जुत्तं ।

एयं च तीए सोचा तक्कालुप्पन्नसुद्धबुद्धीए । भणियं—सम्मं सावय ! मूढाऽहं बोहिया तुमए ॥ १ ॥

तइलोयतिलयभूयस्स भगवओ वद्धमाणसामिस्स । वयणं पावाए मए पडिक्खलियमेत्तियं कालं ॥ २ ॥

जस्स वयणेण विहिओ घरचाओ संजमो य पडिवन्नो । सोवि जिणो न गणिज्जइ, अहो महं मोहमाहण्यं ॥ ३ ॥
ढंकेण तओ भणियं—भयवइ ! मा वहसु चित्तसंतारं । समणीजणपरियरिया वच्चसु सब्वन्नुपासंमि ॥ ४ ॥

आणाए तस्स वट्टसु गरिहसु नियदुक्कडं समगंगं पि । उम्ममगं पडिवन्नं लोयं परिहरसु वेरिं व ॥ ५ ॥
इच्छामो अणुसट्ठिति जंपिउं साहुणीसहस्सेण । परियरिया सा तत्तो तिहुयणपहुणो गया पासे ॥ ६ ॥
मोत्तुं जमालिमेगं ढंकेणऽन्नेवि बोहिया समणा । तं मोत्तूणं सवे तेऽवि गया जिणवरसमीवं ॥ ७ ॥
इय ताव इह भवे चिय जिययणविकूलणाणुभावेण । मुक्को न केवलं सुणिवेरोहिं सुगुणेहिं वि जमाली ॥ ८ ॥
एवं च सो मिच्छत्ताभिणिवेसेणं अप्पाणं समीववत्तिजणं च बोप्पायएतो बहुयाइं वासाइं सामन्नपरियागं पाउ-
णित्ता अद्धमासियं च पज्जंते संलेहणं काऊण तस्स ठाणस्स अणालोइयपडिक्कतो मओ समानो लंतए कप्पे तेरस-
सागरोवमठिइएसु किब्बिसियसुरेसु देवत्ताए उववन्नो ।

इओ य भगयया गोयमेण जमालिं कालगयं जाणित्ता भयवंतं महावीरं परेणं विणएणं वंदित्ता भणियं-भंते !
तुब्भं कुसीसो जमाली नामं अणगारो तहाविहं उगं तवविसेसं आसेविऊण कहिं उववन्नो?, तओ भगवया
कहिओ सव्वो किब्बिसयदेवत्तलाभपज्जवसाणो से तवइयरो ।

अह भणइ इंदमूई-भयवं तारिस तवंपि काऊणं । किं कारणमुववन्नो किब्बिसियसुरेसु स जमाली? ॥ १ ॥
ताहे भणियं भुवणेक्कभाणुणा सुणियसयलभावेण । गोयम ! सुणेसु एत्थं कारणमेगगचित्तेण ॥ २ ॥
धम्ममायारयाणं आयरिआणं विसुद्धसीलाणं । सुत्तप्पवत्तयाणं उज्झायाणं गुणनिहीणं ॥ ३ ॥

कुलगणसंघाणंपिय पडिणीया जे हवंति इह जीवा । विउलंपि तवं काउं ते किन्त्रिसिएसु जायंति ॥ ४ ॥
 पुनरवि गोयमसामी पुच्छइ भयवं ! तओ सठाणाओ । चइउं कइहिं भवेहिं पाविस्सइ मोक्खपुरवासं ॥ ५ ॥
 जिणनाहेणं भणियं सुरतिरियनरेसु पंच बेलाओ । भमिऊण पत्तबोहीं लहिही निवाणसोक्खाइं ॥ ६ ॥
 ता भो देवाणुपिया ! जमालिसुणिणो निसामिउं चरियं । धम्मगुरुप्पमुहाणं विणयपरा होज्जह सयावि ॥ ७ ॥
 इय सिक्खविउं सुणिणो समत्थजियलोयवच्छलो वीरो । विहरइ पडिवोहिंतो भव्वजणं परमकरुणाए ॥ ८ ॥
 विहरंतस्स य पडुणो एत्तो ससिद्धवरविभाणाणं । अवयारणअच्छरियं जह जायं तह निसामेह ॥ ९ ॥

साएए नयरे सन्निहिपपाडिहेरो सुरप्पिओ नाम जक्खो, सो य पइवरिसं चित्तिज्जइ महूसवो य से परमो
 कीरइ, सो य चित्तिओ समाणो चित्तगरं वावाएइ, जइ न चित्तिज्जइ ता नयरे जणमारिं विउवइ, तब्भएण य सा
 चित्तगरसेणी पलाइउमारद्धा, णरवइणा विचिंतियं-जइ इमे सबे पलाइस्संति ता अवस्समेस जक्खो अचित्तिज्जंतो
 अम्ह बहाए भविस्सइत्ति परिभाविऊण ते चित्तकरा संकलियावद्धा कया, सबेसिं नामाणि य पत्तए लिहिऊण घडए
 छुढाणि, तओ वरिसे वरिसे जस्स नामपत्तयं नीहरइ सो चित्तकम्मं जक्खस्स करेइ, एवं कालो वच्चइ । अन्नया य को-
 संवीनयरीए वत्थवो एगो चित्तयरदारगो चित्तविजासिक्खणत्थं तत्थागओ ठिओ य चित्तगरथेरीए मंदिरे, जाया य
 तण्णुत्तेण सद्धिं तस्स भित्ती, एवं च तस्स अच्छंतस्स तंमि वरिसे समागओ थेरीसुयस्स वारगो, तओ थेरी बहुप्पयारं

उरसिराहं ताडंती रोइउमारद्धा, पुच्छिया य तेण कोसंबीचित्तगरदारणेण-अम्मो ! कीस रोयसि ? तीए भणियं-
पुत्त ! एगो चिय एस मे सुओ, संपयं जक्खं चित्तिऊण जममुहं पाविउकामोविव लक्खिज्जइ, तेण जंपियं-अम्मो !
मा रुयसु, अहं जक्खं चित्तिस्सामि, तीए भणियं-वच्छ ! तुमं मे पुत्तो किं न भवसि ? तेण कहियं-तहावि चित्ति-
स्सामि, अहं जायंमि पत्थावे सो छट्ठभत्तं काऊण ण्हाओ चंदणरससमालभियदेहो नियंसियवत्थजुयलो अट्ठगुणपो-
त्तीए मुहं संजमिऊण नवएहिं कुच्चगेहिं पसत्थेहिं वज्जगेहिं जक्खं चित्तिऊण परेण विणएणं पायवडिओ भणइ-
देव ! सुरप्पिय ! को तुज्झ चित्तकम्मं विणिम्मिउं तरइ ? । अच्चंतं निउणोऽविहु किं पुण अम्हारिसो सुद्धो ॥ १ ॥

तहवि हु चवलत्तणओ न सुट्ठु जं वट्ठियं मए किंपि । तं खमियवं तुमए सामिय ! पणयंमि को कोवो ? ॥ २ ॥
एवं थुणंतस्स तस्स परितुट्ठो जक्खो भणइ-अरे वरं वरेसु, तेण भणियं-देव ! एसो चेव वरो-मा एत्तो लोणं
मारिस्ससि, जक्खेण भणियं-तुज्झ अविणासणाओ चेव सिद्धमेयं, अन्नं मग्गेसु, तेण जंपियं-जइ एवं ता जस्स
दुपयस्स चउप्पयस्स अपयस्स वा एग्देसमवि पेच्छामि तस्साणुरूवं चित्तं निवत्तिज्जामि, जक्खेण भणियं-एवं
होहित्ति, तओ सो उवलद्धवरो रत्ता नगरजणेण सक्कारिओ संतो गओ कोसंबी नयरिं, तत्थ य पुच्चभणिओ सया-
णिओ राया, सो अन्नया रजेणं रट्ठेणं चउरंगवलविच्छेड्डेणं अन्नेण य विभूइविसेसेणं गव्वमुच्चंतो अत्थाणीमंडवे
निविट्ठो द्वयं पुच्छइ-अरे किं मम नत्थि ? जं अन्ननरिंदाणमत्थि, तेण जंपियं-देव ! तुम्ह चित्तसभा नत्थि, एवं च

भणिए आणत्ता राइणा समामंडवचित्तणत्थं चित्तगरा, तेहिं च समा भूमी विभइऊण पारद्धा चित्तिउं, तस्स य वरदिन्नस्स जो अंतेउरकीलापच्चासन्नो पएसो सो समप्पिओ, तथा य तत्थ चित्तकम्मं ऊणमाणेण एगया नरिंद-
ग्गमहिंसीए मिगावईदेवीए जालकडगंतरेण मणिमयमुद्धियाकिरणविच्छुरिओ चरणंगुडुओ दिट्ठो, उवमाणेण य नायमणेणं जहा मिगावई एसत्ति, तओ तेण अंगुट्ठगाणुसारेण जहावट्ठियं रूवमालिहियं, तंमि य च क्खुमि उम्मी-
लिज्जंते एगो मसिबिंदू ऊरूअंते निवडिओ, तेणावणीओ, पुणोऽवि पडिओ, एवं तइयवेलाए तं निवडियं पेच्छि-
ऊण नूणमणेण एत्थ होयव्रंति जायनिच्छएण नावणीओ, अह समत्तंमि चित्तकम्मे राया चित्तसभं पलोयंतो तं पएसं संपत्तो जत्थ तं मिगावईए रूवं, तं च अणिमैसच्छिणा पेच्छमाणेण दिट्ठो सो बिंदू, तओ आवद्धभिउडी-
भीमो रोसवसायं विरच्छि विच्छोहो तं च दट्ठुण नरिंदो चित्तिउमेवं समाढत्तो—

एएण पावमइणा मम पत्ती धरिसियत्ति निब्भंतं । कहमन्नहा नियंसणमज्झगयंपिहु सुणेज्ज मंसं ॥ १ ॥

इयरंमिवि परदारे परिभोगपरं वयं निगिण्हामो । किं पुण सए कलत्ते एयं नार्थंपिहु खमामो ? ॥ २ ॥

एवं परिभाविऊण सो वरदिन्नचित्तगरो समप्पिओ दंडवासियाणं, आणत्तो य वज्झो, एयं च वइयरं निसामि-
ऊण उवट्ठिया चित्तगरसेणी, विन्नविओ राया, जहा—देव ! वरलद्धओ एसो, जस्स अवयवमेत्तंपि पासइ तस्स पडि-
पुत्तं रूवमालिहइ, अओ कीस निक्कारणं कोवसुवहइ देवो ? जइ एत्थ न पच्चओ ता विज्ञासिज्जउ, एवं च भणिए

राइणां दंसाविद्यं खुज्जाए सुहमेत्तं, तेण य तदणुरूवं निवत्तिद्यं चित्तं, तहावि रत्ता पुद्यामरिसवसेण तस्स संडासओ छिंदाविओ निविसओ य आणत्तो ।

तथो सो चित्तगरो पुणोऽवि गओ जक्खसमीवं, ठिओ उववासेण, भणिओ य जक्खेण-भह ! सुंच विसायं, ममाणुभावेण पुवंपिव वामहतथेण चित्तिहिंसि, एवं च लद्धे वरंमि एसो परिचित्तेइ-अहो महा पावकारिणा कंहं निरवराहो चेव अहं एयमवत्थं पाविओ ? , ता संपयं तस्स दुस्सिक्खियस्स दंसेमि दुन्नयफलंति परिमाविऊण चित्तवट्ठियाए मिगावइए सिंगारुब्भंडं रूवमालिहिऊण इत्थीलालसं चंडपज्जोयं महानरिंदसुवट्ठिओ, दंसिया चित्तवट्ठिगा, अवलोइया साहिलासं चंडपज्जोएण, अवलोयमाणस्स य तक्खणं चेव विसट्ठकंदोद्वदीहरा वियसिया से दिट्ठी, पम्हुट्ठो कुलांमिमाणो परिगलिओ नथमगो वियंमिआ अरई समुच्छसिओ रणरणओ पज्जलिओ सवंगिओ मयणानलो, सविसेसं पलोयमाणो य थंभिओव कीलिओव निच्चलनिरुद्धनयणो ठिओ सुहुत्तमेत्तं, पुच्छिओ य चित्तयरो सुरसुंदरीए रूवं वम्महदइयाए नागकन्नाए ? । दट्ठूण तए सुंदर ! पडिबिंविमिमं इहालिहियं ॥ १ ॥

जइ सुरविलया एसा ता सच्चं भुवणविस्सुया तिग्गसा । अह वम्महस्स लीलाए जिणउ ता सो तिलोयंपि ॥ २ ॥
अहवा भुयगाण इमा ता सोहउ निच्चमेव पायालं । पडिहणियतिमिरपसरं एयाए सुहंदुकिरणेहिं ॥ ३ ॥
दूसिज्जइ पेच्छ इमीए कायकंतीए कंचणच्छाया । विच्छाइज्जइ नयणेहिं नीलनवनलिणलच्छीवि ॥ ४ ॥

अहरप्पहाएँ निहरइ विहुमकंकेछिपछवसिरीवि । रुवेऽणुरंजिएण व रंभाए वहइ समसीसिं ॥ ५ ॥
 किं बहुणा ?—एवंविहवरजुवईजणस्स विरहे विडंबणा कामा । मणुयत्तंपिहु विहलं दुहावहं भूवइत्तंपि ॥ ६ ॥
 तं कहसु कस्स एसा सुयणू ! को वा इमीए लाभंमि । कीरंतो य उवाओ अणुरूवो सिद्धिमावहइ ? ॥ ७ ॥
 एवं नराहिवेण भणिए चित्तंगरेणं जंपियं—देव ! न हवइ एसा सुराईण रमणी, किंतु सयाणियरन्नो अगमहिंसी
 मिगावइनाम, मए सामन्नेण आलिहिया, विसेसओ जइ पुण परं पयावई से रूवमालिहउ, जइ एवं नाम महिला
 चेव सा अओ रे वज्जजंघ ! वय सिग्घं, गंतूण भणसु मम वयणेण सयाणियनरवइं, जह सिग्घं पेसेसु मिगावइं, एवं-
 विह इत्थीरयणाण वरणे को तुज्झ अहिगारोत्ति ? , ता सिग्घं पेसेसु, जुज्झसज्जो वा होज्जासिस्ति बुत्ते जं देवो
 आणवेइत्ति भणिज्जण गओ दूओ, निवेइयं सयाणियस्स नरिंदसासणं, तेण य तमायन्निज्जण जायकोवेण भणियं-
 रे दूयाहम ! जइ कहवि सो कुलकमविमुक्कमज्जायं उस्सिखलं पयंपइ ता तुज्झवि किं खमं वोचुं ? , किं भिच्चो
 सोऽवि न जो ससामिणो उप्पहं पवत्तस्स नियबुद्धिवित्थरेणं अवजसंपंसु परिसमेइ ? , एवंविहुदुन्नयवियारिणोऽवि
 जायइ कुले गुरुकलंको, किं पुण बहुजणपुरओ पयडगिरा पभणिज्जंते ? , अन्नेसुवि रज्जंतरेसु दिट्ठं सुयं व रे तुमे एवंविहं
 अकज्जं कीरंतं केणइ निवेण, किंच—जत्थ सयं चिय राया दुन्नयमेवंविहं समायरइ ततो हया मूलाओ वराइणी

तत्त-नीर्हवि, किं बहुणा ? एवं जंपिरस्स, तुह चेव इहयं जुज्झइ विणासो काउं, जंच न कीरइ तं न, य तेउत्ति कलि-
ऊण, इय निंभत्थिऊण दुओ निद्धमणेण कंठे घेत्तूण निच्छूढो, गओ य सो चंडपज्जोयसमीचे, साहिओ. य चउग्गुणो
नियवइयरो, इमोवि तेण दूयवयेणेण बाढं रुद्धो. सच्चबलेण परियरिओ पयट्ठो कोसंबीए, अणवरयपयाणएहि य
आगच्छंतं. निसामिऊण सयाणिओ अप्पबलो. तहाविहसंखोहसमुप्पन्नाइसारो मओ, तओ मिगावइए, चितियं-
राया ताव संखोभेण विणट्ठो, पुत्तोऽवि असंजायबलो एयस्साणणुसरणे मा विवज्जिही, एयाणुस्सरणंमि गरुओ कुल-
कलंको, तम्हा इमं पत्तकालं-इहट्ठिया अंचंतमणुलोमवयणवित्थरेण चेव कालहारिं करेमि पच्छा जमुचियं तमा-
चरिस्सामिंति चित्तिऊण भणाविओ दूयवयेणेण चंडपज्जोयनरिंदो, जहा-राए सयाणिए परोक्खम्मि तं चेव मए
सरणं, केवलं मम पुत्तो असंपत्तबलो मए विमुक्को समाणो पंचंतनरिंदोहिं पेहेज्जिही, इमं च सोच्चा परमहरिसयगरि-
समुवहतेण भणावियं रत्ता-पिए ! मम पयंडमुयदंडपरिगहिंए तुह सुए को चिरजीवियत्थी पयं काउं समीहिज्जा ?
तीए भणियं-अत्थि महाराय !, केवलं उस्सीसए सप्पो जोयणसए वेज्जी, विणट्ठम्मि कज्जे किं तुमं काहिसिं ?
अओ जइ निप्पच्चवार्यं मए सह संगममभिलससि ता उज्जेणिपुरीसमुब्भवाहिं निट्ठुराहिं इट्ठियाहिं इमीए नयरीए
चउदिसिं कारवेसु समुत्तुंगपायारपरिक्खेवंति, इमं चायन्निऊण पडिवन्नं राइणा, तओ चउद्दसवि। नियरायाणो
सबला धरिया मग्गम्मि, पुरिसपरंपराए य आणियाओ इट्ठगाओ, निम्मविओ पायारो, तओ तीए, भणइ-इयाणिं

नगरि धन्नस्स वत्थस्स ईधणस्स य भरेहि, आसाविणडिएण य भरिया अणेण, जाहे नयरी रोहगसज्जा जाया ताहे सा विप्पडिवन्ना, दुवाराइं वंधिऊण जुञ्झिउं उवट्टिया, चंडपज्जोयरायावि विलक्खो नगरिं वेढिऊण ठिओ, अन्न-दिवसे य वेरगगसुवगयाए चित्तिं भिगावईए-धन्ना ते गामागरनगराइसन्निवेसा जत्थ भयवं महाधीरसामी भव-गिराए जणं पडिवोहंतो विहरइ, संपयं च जइ सो परमेसरो एत्थ एइ तो अहं पव्वयामि, इमं च तीसे संकप्पं केवललोएण कलिऊण गोयमपमुहमुणिजणपरिवुडो नवकणयकमलनिम्मियचलणो अणंतरमेव समागओ भयवं, कयं देवेहिं समोसरणं, उवविट्ठो सिंहासणे जयगुरु, तप्पभावेण य पसमियं वेरं, वद्धाविया भिगावई चारपुरि-सेहि, दिन्नमणाए चिन्ताइरित्तं तेसिं पारिओसियं, उग्घाडियाइं गोउरकवाडाइं, महया विभवेण निगया भिगा-वई, जहाविहिणा वंदिओ भयवं, ठिया य ससुचियठाणे, चंडपज्जोयरायावि समागओ, एत्थंतरे भगवया पारद्धा धम्मकहा ।

अह एगो पुरिसो करगहियकोदंडवाणो एस सवणणुत्ति लोयप्पवायं निसामिऊण भयवओ अदूरेसट्ठिओ निय-संसयं मणसा पुच्छइ, ताहे सामिणा भणिओ-भो देवाणुपिया ! वायाए पुच्छ, वरमन्नेडवि भव्वसत्ता पडिबुज्झंति, एवमवि सामिणा भणिए लोयलज्जाए तेण भणइ-भगवं ! जा सा सा सा सा ?; तओ भगवया जंणियं-एवमेयंति, अह पायपीढपासट्टिएण गोयमसामिणा सुयनाणमुणियपरमत्थेणवि भव्वजणपडिवोहणत्थं पुच्छियं-भयवं ! किं

एएण जा सा सा सत्ति संलत्तं ? भगवया कहियं—महती कहा एसा, एगगचित्ता निसामेह—

अत्थि इहेव जंबुद्वीवे दीवे चंपानाम नयरी, तत्थेवेगो सुवण्णगारो इत्थीलोलो जं जं पवररूवइं कन्नगं पेच्छइ तं
तं पंच सुवण्णसयाणि दाऊण परिणेइ, एवं च तेण परिणयंतेण कालक्कमेण पंच सयाणि महिलियाणं पिंडियाणि,
एक्केक्काए य तिलगहारहुहारनेउरपमुहाइं आभरणाइं दिन्नाइं, जद्विसं च जाए समं भोगे मुंजइ तद्विसं सा सवालं-
कारपरिगइं ण्हाणविलेवणाइ सिंगारं च करेइ, सेसकालं पुण उवसंतवेसेण अब्छइ, अण्णहा सुवण्णगारो निब्भ-
ब्छइ, न य ईसालुगत्तणेण सो निमेषमेत्तं पि गेहुद्वारं मुंचइ, सयणाणवि नावगासं देइ, एवं वंचंति वासरा, अन्नया
य सो अणिच्छंतो महया किलेसेण नीओ मित्तेण भोगणदाणत्थं नियमंदिरे, चिरलद्धावगासाहिं य चित्तियं
तस्स गेहिणीहिं—

किं अमह जीविणं ? किं वा मणिकणगभूसणेहिं पि ? किं विभववित्थेरेणवि बहुएण निरत्थएणिमिणा ? ॥ १ ॥
जं न लभामो निच्चं पि विलसिउं नणु कयंततुल्लस्स । एयस्स पावपइणो दढममहे गोयरे पडिया ॥ २ ॥
बहुकालाओ गेहं जाव विमोत्तुं गओ स अन्नत्थ । मणवच्छियसोक्खेणं ताव वसामो खणं एकं ॥ ३ ॥
इय चित्तिऊण ष्हाया सुरहिं विलेवणविलित्तसंवांगा । परिहियपवरदुगुल्ला आलिद्धासेसआभरणा ॥ ४ ॥
भालतलरइयकुरुला [तिलया] सिंदूरारुणियपवसीमंता । गंधुब्भडमियनाहीपंकलिहियगल्लपत्तलया ॥ ५ ॥

तं वोलपाडलुट्टीय जाव चिट्ठति दप्पणं घेचुं । समुहं पलोयमाणा ताव लहुं आगओ भत्ता ॥ ६ ॥
 दइण तासि तारिस दुच्चिट्ठं तेण जायकोवेण । एगा महिला पहया तह जह सा पाविया मरणं ॥ ७ ॥
 तयणंतरं च भयवसकंपिरदेहाहिं सेसमेहिलाहिं । चित्थियमिमं जहेसा तह अम्हेवि हु विवज्जामो ॥ ८ ॥
 तम्हा आयंसेहिं पहणामो रक्खिएण किं इमिणा ? । इइ चित्थिज्जण समगं खित्ता तदभिमुहमायंसा ॥ ९ ॥
 तओ एगूणपंचसयनारीसयपमुक्कदप्पणेहिं पहओ समानो सो मओ तक्खणेण, पच्छा समुप्पण्णो तासिं पच्छा-
 यावो-अहो का गई एत्तो पइमारियाणं भविस्सइ ? , उद्धलिस्सइ लोओ दंडिस्सइ नराहिवो अवमन्निस्सइ सयण-
 वग्गो गंजिस्सइ खलयणो, तम्हा मरणमेव संपयं पत्तकालंति परिभाविज्जण पिहियाइं सब्बदाराइं, पक्खित्तं गेहब्भं-
 तेरे वहुं तणकट्टपलाळं, पज्जालिओ सब्बओ जलणो, जालाउले य तंमि विमुक्को ताहिं अप्पा, अह पच्छायावेण
 साणुक्कोसयाए ताए अकामनिज्जराए सब्बाओ मरिज्जण मणस्सेसु उववन्ना, कम्मधम्मसंजोगेण य एगतथ मिलिया
 एगूणपंचवि सया ते चोरा जाया, एगंमि य विसमंमि पच्चए पस्विंसंति ।

सो य सुवणणयारो मरिज्जण तिरिच्छेसु उववन्नो, तत्थ जा सा अणेण पढमं चिय मारिया सा एगं भवं तिरिएसु
 उववज्जिज्जण पच्छा वंभणकुले पुत्तो जाओ, कमेण य पत्तो पंचवारिसियत्तणं, सो य सुवणणयारो तिरियभवाओ
 उव्वट्ठिज्जण तंमि चेव वंभणकुले तब्भइणित्तेण दारिया जाया, सो य पंचवारिसिओ समानो तीसे बालगगाहो

कओ, सा य अइदुदुत्तणेण निच्चमेव रोयइ, अन्नया य तेण बालग्गहेण उदरदेसपरिघट्टणं कुणमाणेण तह कहवि
सा जोणिहारे छिक्का जह तक्खणं चेव नियट्ठा रोयणाओ, तओ तेण नायं-लद्धो मए उवाओत्ति, एवं सो तीसे
रोयमाणीए निच्चकालं करेइ, अन्नया य तहा कुणमाणो नाओ सो मायापिऊहिं, ताहे हणिऊण निद्धाडिओ निय-
गिहाओ, पलायमाणो अ गओ तं चेव चोरपल्लिं जत्थ ताणि एगूणगाणि पंच चोरसयाणि परिवसंति, सा य दारिया
अप्पडुप्पन्नजोवणा विणट्ठसीला जाया, सच्छंदं परियडंती य एगं गामं गया, सो य गामो तेहिं चोरेहिं आगंतूण
लुंदिओ, सा य तेहिं गहिया, तओ तेसिं सवेसिंषि भज्जा जाया । अन्नया य चोराणं चिंता समुप्पन्ना-अहो इमा
वराई एत्तियाणं अम्हाणं पइदिणं सरीरचेट्ठं कुणमाणी खिज्जिस्सइ, ता जइ अन्ना बिइज्जिया संपज्जइ तो से
विस्सामो होजत्ति परिभाविऊण एगया तीसे बिइज्जिया आणिया, जंचेव आणिया तंचेव चिरमहिला ईसासद्धनि-
ब्भिमज्जमाणमाणसा तीसे मारणत्थं छिद्दाइं मग्गइ, अन्नया य ते चोरा गामंतरमुसणत्थं पधाविया, तीए नायं-एस
पत्थावो वट्ठइ, ता विणासेमि एयंति परिभाविऊण नीया सा कूवतडे, भणिया य-भदे ! पेच्छ कूवमज्जे किंपि
दीसइ, सावि अविगप्पभावेण दड्ढुमारद्धा, तयणंतरं च ताए पक्खित्ता तत्थेव, चोरा य आगया पुच्छति तीसे
वुत्तंतं, ताए भणइ-अप्पणो महिलं कीस न सारेह ? , किमहं जाणामि ? , तेहिं सुणियं-जहा एयाए मारिया,
तओ तस्स बंभणपुत्तस्स हियए ठियं, जहा-अवस्सं एसा सा मम पावकम्मा भगिणी एरिससीलेण संभाविज्जइ,

सुवहं य समीववती भगवं महावीरो सवण्णू सवदरिप्पी, ता तं गंतूण पुच्छामिप्ति, इहागओ लजाए मणसा पुच्छि-
उमारद्धो, तओ मए भणियं-देवाणुप्पिया ! वयणेण पुच्छ, तओ अणेण जा सा सा सत्ति कहियं, मएवि सचेव
सा तव भणिणीत्ति सिद्धं ।

इय गोयम ! एवंविहविडंबणाजालमूलगिहभूया । विसया विसं व विसमं दित्ति विवागं मणुस्साणं ॥ १ ॥
खणदावियसोकखाणं भवोहसंवह्दियासुहनिहीणं । भोगाण कए सुद्धा जुत्ताजुत्तं न पेच्छंति ॥ २ ॥
चोज्जमिणं रागंधा पुरिसा अणवेविलकण परमत्थं । जं अत्थि तं विमोत्तूण नत्थि जं तं विभावित्ति ॥ ३ ॥
तथाहि-मंसलवमेत्तनिच्चत्तियं अहरं पवालंबं व । जलबुब्बुयसच्छहमवि नयणजुयं नीलनल्लिणं वा ॥ ४ ॥
चम्मावणद्धअट्ठियमयं पि वयणं मयंकविंबं व । मंसुच्चयमेत्तं पि वि थणजुयलं कणयकलसं व ॥ ५ ॥
वेल्लहलमुणालं पि व बाहुजुयं अट्ठिमंसमेत्तं पि । सोणियमुत्तविलीणं रमणं पि वि असयकूवं व ॥ ६ ॥
मन्नंति विसयमूढा अवियारियपारमत्थियसरूचा । अच्चंत्तनिंदियाणि वि एवं अंगाणि जुवईणं ॥ ७ ॥
इय एवं करुणासायेण सिरिवद्धमाणनाहेण । कहिए वत्थुसरूवे समग्गमुवणप्पईवेण ॥

सो पुरिसो संवेगमावन्नो पवइओ । सा य ससुरासुरनरतिरियाउलावि परिसा पयणुरागसंजुत्ता जाया । एत्थंतरे
मिगावई देवी हरिसपगरिसवियसियनयणकमला महावीरं वंदित्ता एवं वोत्तुं पवत्ता-भयवं ! जाव चंडपज्जोयराय-

मापुच्छामि ताव तुम्हं सयासे पद्ययामिति भणिकुण चंडपज्जोयमुवट्टिया, एवं च कहिउमाढत्ता-महाराय ! जइ तुमं अणुमन्नसि ता अहं पद्ययामि, रायावि तीसे महतीए परिसाए लज्जाए वारिउमपारयंतो तं विसज्जेइ, तओ मिगावई नियपुत्तं उदयणकुमारं चंडपज्जोयस्स निक्खेवगनिक्खित्तं काऊण पवइया, पज्जोयस्सऽवि अट्ठ अंगारवइप्प-मुहाओ देवीओ पवइयाओ, ताणिवि एगूणपंचचोरसयाणि पुब्बं पडिवन्नपव्वज्जेण चोरेण गंतूण पडिबोहियाणि पव्वज्जं च पडिवन्नाणि, अन्नो य बहुजणो संबुद्धो, पज्जोयनरवईवि जयगुरुप्पभावपडिस्संतवैराणुबंधो उदयणं कुमारं रज्जे सहत्थेण संठाविकुण गओ सनयरिं, मिगावईवि भगवया अणुसासिकुण समप्पिया चंदणवालाए पव-त्तिणीए, तीसे य समीवट्टिया जहट्टियं साहुणीजनसमुच्चियं किरियाकलावमब्भसइ ।

भयवंपि विहरमाणो वाणियगामप्पमोक्खनयेरुं । आणंदकामदेवाइसावगे दस विबोहेइ ॥ १ ॥
जेसिं धम्ममहाभरधणुद्धुरकंधराण तियसावि । चालिं सु खोभकरणुज्जुयावि न मणो मणांगंपि ॥ २ ॥
जे इस्सरिएण लहुं करिं सु वेसमणजक्खरायमवि । पडिवालं सु य सम्मं निच्चं पि दुवालस वयाइं ॥ ३ ॥
गेहसमीचनिवेसियपोसहसालासु पोसहुज्जुत्ता । अट्ठमिचउहसीसुं समणा इव जे य निवसिंसु ॥ ४ ॥
जेसिं सरिरधाऊ सत्तवि सव्वन्नवणरसभिन्ना । कुप्पावयणियवयणाणि गोयरं नेव वच्चिंसु ॥ ५ ॥
इय तेसि गुणलवोविहु नो तीरइ मारिसेहिं परिकहिउं । विरइंसु नूण सयमेव गणहरा जेसि चरियाइं ॥ ६ ॥

अन्नेऽविदु नरचइदंडनाहसामंतमतिपसुहजणे । पडिबोहिऊण पुणरवि कोसविं आगओ सामी ॥ ७ ॥
 तहियं समोसढस्सा चरिमाए पोरिसीए जयगुरुणो । विम्हइयजीवलोयाइं फालिआइं विमाणाइं ॥ ८ ॥
 साहावियाइं पच्चक्खदिस्समाणाणि आरुहेऊण । ओयरिया भत्तीए वंदणवडियाए ससिसूरा ॥ ९ ॥
 तेसिं विमाणनिम्मलमऊहनिवहप्पयासिए गयणे । जायं निसिंपि लोगो अविद्याणंतो सुणइ धम्मं ॥ १० ॥
 नवरं नाउं समयं चंदणवाला पवत्तिणी नमिउं । सामिं समणीहिं समं निययावासं गया सहसा ॥ ११ ॥
 सा पुण भिगावई जिणकहाए चक्खित्तमाणासा घणियं । एगागिणी चिय ठिया दिणंति काऊण ओसरणे ॥ १२ ॥
 बोलीणे खणमेत्ते साइं विमाणाइं आरुहित्ताणं । ससिसूरेसु गएसु वियंभिए रयणित्तिमिरभरे ॥ १३ ॥
 समणीओ समीवंमी अपेच्छमाणी य सा महासत्ता । पगया पडिस्सयंमी पवत्तिणीए य तो भणिया ॥ १४ ॥
 तुम्हारिसीण सुळुळुग्गयाण जुळइ किमेवमायरिउं ? । एगागिणीवि य तुमं जंसि ठिया एत्तियं रयणिं ॥ १५ ॥
 पडिवजिय तवयणं सुळो सुळो सदुच्चरीयाइं । निंदंतीए तीए उप्पन्नं केवलं नाणं ॥ १६ ॥
 अह-पयलायंतीए पवत्तिणीए सण्णं पलोइयं इंतं । संथारगंभि हत्थो ठविओ तीए धराहिंतो ॥ १७ ॥
 निहावगमे पुच्छा अहिकहणं नाणबुद्धणऽणुतावो । निहयघणघाइकम्मा पवत्तिणी केवलं पत्ता ॥ १८ ॥
 इओ य-उप्पन्नसंसओ पढमगणहरो पणमिउं जिणं मणइ । किमवडियावि भावा चिवरीयत्तं पवज्जंति ? ॥ १९ ॥

जं ओइन्नाइं नहाओ नाह ! मायंडससिविमाणाइं । गुरुणा भणियं-गोयम ! दस अच्छरियाइं एयाइं ॥ २० ॥
उवसग गब्महरणं इत्थीतित्थं अभाविआ परिसा । कणहस्स अवरकंका ससिसूरविमाणओयरणं ॥ २१ ॥
हरिवंसकुलुप्पत्ती चमरुप्पाओ य अट्टसय सिद्धा । अस्संजयाण पूया जायंति अणंतकालाओ ॥ २२ ॥
इय साहियमच्छरियं ससिसूरविमाणसंगयं एत्तो । गोसालयवुत्तंत साहिजंतं निसामेह ॥ २३ ॥

सो पुव्वभणिओ गोसालो तेउलेसामाहप्पपडिहयपडिवक्खो अट्टगनिमित्तवपरिज्जाणसुणियजणमणोगयसंकप्पो
अजिणोऽवि जिणसइमत्तणो पगासेमाणो सबत्थ अणिवारियप्पसरं परिब्भमतो सावत्थि नयरिमागओ, ठिओ य
बहुधणधन्नपरिपुन्नाए हालाहलाभिहाणाए कुंभकारीए आवणंमि, तस्स य लोगो असुणियपरमत्यो मणोगयसंकप्प-
परिज्जाणमेत्तसमुप्पन्नकोज्जहलो जिणोत्ति पसिद्धिं निसामिज्ज अणवरयं पज्जुवासणं कुणइ, भयवंपि महावीरो सम-
णसंघपरिवुडो जहन्नेणऽवि कोडिसंखेहिं देवेहिं अणुगम्ममाणो सुवणच्छेरयभूयं विभूइसमुदयमुव्वहतो दिसिचक्कयाल-
परिसरिएण पसामंडलेण समुग्गयाणेगमायंडपरंपरं व गयणसुवदंसयंतो पयपरिवाडिसुरविरइयकणयंबुरुहनिवहेण
थलकमलसोहं व महियलस्स दावितो पइ सन्निवेसमसब्भूभावणं जणाणं पणासयंतो पयंडपासंडदप्पखंडणं कुणमाणो
निच्चाणनगरमगं पव्वत्तयंतो कोसंबीओ निक्खमिन्ता तमेव सावत्थि नगरिं संपाविओ, नाणाविहविहगविरायंततरुणत-
रुरमणीयंमि य समोसडो कोट्टगचेइयंमि, सुणियजिणागमा य समागया परिसा, पज्जुवासिज्ज य गया जहागयं, पत्ते य

भिक्खाकाले छट्टपारणयं कालकामो भयवओ अणुणणाए पविट्ठो भिक्खट्ठं गोयमो पुरीए, तहिं च तियचउक्कचच्चरेसु
 गोसालो जिणो सबन्नत्ति परोप्परं जंपतं जणं निसामिऊण जायसंसओ भिक्खं घेतूण पडिनियत्तो, जहाविहिं भुंजिऊण
 जायंमि पत्थावै समागए पुरीलोए सामिं पुच्छिउं पवत्तो-भयवं ! एत्थ जणो गोसालं जिणं सबन्नं च परिकित्तेइ तं किं
 घडइ मिच्छा वा ? भगवया भणियं-भो देवाणुप्पिया ! गोसालो मंखलिपुत्तो अजिणो जिणप्पलावी मए चेव पवाविओ
 सिक्खं च गाहिओ ममं चेव मिच्छं पडिवन्नो, अओ न सबन्नं न य जिणो हवइत्ति, एवं सोच्चा पुरीजणो सुणियपरमत्थो
 पडिनियत्तिय नयरीए सिंघाडगतिगचउक्कचच्चरेसु अन्नमन्नस्स सविम्हयं पखविउमारद्धो-अहो भयवं ! महावीरो
 समुप्पन्नदिवनाणदंसणो एवं भासइ-एसो गोसालो मंखलिपुत्तो अजिणो जिणप्पलावी, अहं जिणोत्ति मिच्छं संलव-
 इत्ति, इमं च कन्नपरंपराए सोच्चा गोसालगो अचंतकोवचसफुरंतओट्टुडो आजीवियसंधपरिखुडो अमरिसमुबहंतो
 अच्छइ । इओ य-भगवओ महावीरस्स अंतवासी आणंदो नाम थेरो अणिविखत्तछट्टवकम्मकरणपरो पारणगंमि
 पडिग्गहं गहाय निग्गओ गोयरचरियाए, उच्चावएसु य गिहेसु भिक्खं परिब्भमतो तीसे हालाहलाए कुंभकारीए
 कुंभकारावणस्स अदूरेण गंतुं पवत्तो, तं च दट्ठूण गोसालो भणइ-भो आणंद ! इओ एहि, निसामेहि दिट्ठतमेगंति,
 इमं च एवमायन्निऊण समागओ आणंदसाइ, भणिओ य गोसालेण-भो आणंद ! इओ चिरा समइकंताए अद्धाए
 केइ अत्थत्थिणो वाणियगा नाणाविहमंडविच्छइभरिएणं सगडीसगडेणं सुबहुं भत्तपाणपत्थयणं गहाय एगं महंतं

जणसंचारहियं छेत्तभूमिं व करिसयविराइयं भारहकहं व भीमअज्जुणनउलसउणिसेकुलं दीहछिन्नावायं उन्मडवि-
डविसंकडं महाडविमणुपविट्ठा, तीसे य कंचि देसमणुपत्ताणं तेसिं पुवग्गहियमुदयमणुदियहं पिज्जमाणं झीणं, तय-
णंतरं ते वणिया झीणसलिला तण्हाए परब्भाहया समाणा एगत्थ मिलिऊण एवं भणिउमारद्धा—
भोयणविरहेवि जियं कइवि दिणे वसइ देहेगहंमि । सलिलाभावे पुण दीवओव पवणेण विज्झाइ ॥ १ ॥
ता जावज्जवि तण्हा कालरयणिव अवहरइ जीयं । ताव परकज्जजायं मोचुं सलिलं पलोएह ॥ २ ॥
एवं च ते पयट्ठा सत्तासु दिसासु पाणियनिमित्तं । कत्थइ अपेच्छमाणा एगं वणसंडमल्लीणा ॥ ३ ॥
विच्छायमुहा दीणा अपत्तकालावि संपइ मरामो । एवं पयंपमाणा तण्हावससुसियसंवंगा ॥ ४ ॥
सिसिरतरुच्छायाए निमीलियच्छा य जाव चिट्ठति । तावेगनरजुवाणो समागओ तेसि पासंमि ॥ ५ ॥
भणियं च तेण सुंचह विसायमहुणा मए जओ दिट्ठो । वणसंडमज्झयारे चउम्मुहो वम्मओ गरुओ ॥ ६ ॥
ता एह तत्थ जामो पढमसुहं भिंदिमो य तस्स लहुं । पच्छा अच्छं पत्थं जलरयणं आपिबामोत्ति ॥ ७ ॥
एयं निसामिऊणं ते वणिया तक्खणेण गंतूण । भिंदती पढमसुहं तस्स तिसाविवससंवंगा ॥ ८ ॥
फलिडुज्जलं च सलिलं सारयससिणो मरुहजालं व । हेलाए नीहरंतं पेच्छंति तओ पहिट्ठा ते ॥ ९ ॥
तयणंतरं च करचरणखालणं वयणसोहणं पियणं । वीसत्था वाणियगा निव्वत्तंती जहिच्छाए ॥ १० ॥

पच्छा भरेति करवत्तयाइं दिइणो य कलसए चेव । दुलहं लद्धं वत्थुं कह वा नो घेप्पइ जणेण ? ॥ ११ ॥
 जाया पुणोवि चिंता तेसिं जह सलिलमित्थ लद्धमहो । तह वीयसुहे खणिए पाविज्जइ नूण तवणिज्जं ॥ १२ ॥
 ता भिंदह पुणरवि वस्मियस्स वीयं सुहं लहुं चेव । इय भणिए पुरिसेहिं तहत्ति सव्वं तओ विहियं ॥ १३ ॥
 ताहे सुजच्चकंचणनिचयं तत्तो विणिग्गयं संतं । हरिसुल्लसियसरीरा गिणहंति जहिच्छियं वणिया ॥ १४ ॥
 हिट्ठा भणंति वस्मियनिभेण चिंतामणी पयावइणा । अम्हारिसपहियहियट्ठयाए मन्ने कओ एत्थ ? ॥ १५ ॥
 ता अज्जवि तइयसुहं भेत्तव्वं होइ संपयमिमस्स । संभाविज्जति इमंमि जेण रयणाणि मणिणो य ॥ १६ ॥
 एत्थंतरंमि पुरिसेहिं भिंदियं तंपि लोभनडिएहिं । अह नीहरियाइं तओ रयणाइं अणेगभेयाइं ॥ १७ ॥
 कणगं परिहरिऊणं महग्घरयणेहिं तोहिं सगडाइं । भरियाइं गाढपहरिससंभारं उव्वहंतोहिं ॥ १८ ॥
 नवरं चउत्थयंमि य सुहंमि भेत्तुं पयट्ठिया वंछा । तेसिं तु उत्तरोत्तरविसिट्ठवत्थूण लोभेण ॥ १९ ॥
 अह जाव तं विहाडिंति नेव तावेगथेरपुरिसेण । तेसिं हियत्थिणा सुद्धुद्धिणां जंपियं एयं ॥ २० ॥
 भो भो देवाणुपिया ! जलं च कणगं च रयणनिवहं च । लद्धूण सुयह वस्मियमहुणा वच्चह सगेहेसुं ॥ २१ ॥
 मा पविहाडह एयं कज्जाण गईओ हुंति कुडिलाओ । सिट्ठो सिद्धंतेविहु लोभो मूलं विणासस्स ॥ २२ ॥
 लोगेऽवि पसिद्धमिमं जं किर निवसंति गाढदाढिछा । अचंततिवदग्ग्या सग्ग्या वस्मियनिवासेसु ॥ २३ ॥

जइ कहवि मणोवंचियजलाइलाभो इमंमि भे जाओ । तहवि न खणिउं जुजइ विले विले होइ किं गोहा ? ॥ २४ ॥
जओ-अनओ जणियगुणोऽविहु पयावंविहवं न देइ गरुयाणं । विहिवसविसंघडंतोऽविगुणकरो नयसमारंभो ॥ २५ ॥
अह तव्वयणं अवगणिऊण ते लोभतरलिया वणिआ । वम्मियचउत्थसुहमवि जवेण खणिउं समाढत्ता ॥ २६ ॥
खणमाणेहिं तेहिं पयंडजमबाहुदंडसारित्थो । तस्संतो निवसंतो सुहेण परिघट्ठिओ नागो ॥ २७ ॥
ताहे सो रोसारुणनयणपहापाडलीकयदियंतो । विरइयअकालसंझोव निगओ वम्मियाहितो ॥ २८ ॥
तहवि य फारफणफलगुफुरिययणुच्छलंतरइपडलो । पुच्छच्छडताडियभूमिवट्ट गुंजंतवणसंडो ॥ २९ ॥
सिगंधं नीहरिऊणं वम्मियसिहरगभागमारुइइ । पेच्छइ य भाणुमंडलमह सवियासाहिं अच्छीहिं ॥ ३० ॥
अह खणमेक्कं सूरं पलोइउं अणिमिसाए दिट्ठीए । ते वणिआ आलोयइ सो उगगविसो महासण्णो ॥ ३१ ॥
तयणंतरं च ते तस्स चक्खुणा तिबजलणजडिलेण । निहट्ठा समगं चिय समग्गभंडोवगरणेहिं ॥ ३२ ॥
नवरं सो एगो चिय थैरो नियमंडसगडियासहिओ । अणुकंपिगाए देवीए पाविओ वंछियं ठाणं ॥ ३३ ॥
तो भो आणंदसुणिंद ! ते जहा वाणिआ अइविमूढा । अइलोभेणभिसूया सण्णाओ विणासमावन्ना ॥ ३४ ॥
तह तुज्झ धम्मसूरी समणो वरनायकुलससुब्भूओ । लद्धपसिद्धी भुवणत्तएऽवि समणो महावीरो ॥ ३५ ॥
असुरसुरनागकिन्नरनरवइपूयणिज्जपयकमलो । एत्तियमेत्ताएविहु सिरीए संतोसमलहंतो ॥ ३६ ॥

जइ एत्तो मह संसुहमभत्तिपर वयणलेसमवि बइही । तमहं तवतेएणं भासरासिं करिस्सामि ॥ ३७ ॥
जह पुण सो थेरनरो ते वणिए सव्वहा निवारितो । न विणहो तह आणंद ! तं पि नाहं विणासिस्सं ॥ ३८ ॥
ता गच्छ तुमं नियधम्मसूरिणो कहसु सव्वमवि एयं । बलिणा समं विरोहो न कयाइ सुहावहो होइ ॥ ३९ ॥
एवं निसामिऊण आणंदमहरिसी सच्छहियत्तणेण समुप्पन्नभयसंकप्पो अपरिसमत्तं भिक्खाकज्जोऽवि तओ
ठाणाओ सिग्घाए-गईए समागओ जिणंतिंयं, तिक्खुत्तो आयाहिणपयाहिणपुव्वगं वंदिऊण गोसालगोवइहुं वणि-
यदिहुंतं दिट्ठीविसभुयगदहणपज्जवसाणं सव्वं परिकेहेइ, पुच्छइ य-भयवं ! किं गोसालो एवंविहस्सट्थस्स करणंमि-
समत्थो न वा ? भगवया भणिंयं-आणंद ! समत्थो चेव, केवलं अरहंताणं भगवंताणं असमत्थो, परितावंमेत्तं पुण
केरज्जा, ता गच्छ तुमं गोयमाईणं समणाणं एयमहुं कहेहि, जहा-मा तुब्भं कोइ गोसालं मंखलिपुत्तं ममंतिंयं
पाउब्भूयं समाणं धम्मियाएवि पडिचोयणाए पडिचोएज्जा, जओ एस ममं मिच्छं पडिवन्नोत्ति, एवं च विणएण
पडिसुणेत्ता गओ आणंदो गोयमाईण समीवं कहिउमारद्धो य तं वइयरं, एत्थंतरे गोसालो अत्तणो पराभवमस-
हुंतो संपत्तो जिणसमीवं, अदूरे य ठाऊण भगवओ अभिसुहं एवं भणिउं पवत्तो-भो कासव ! तुमं मम हुत्तं एवं
वयसि-एस गोसालो मंखलिपुत्तो मम धम्मंतेवासी इच्चाइ, तन्नं मिच्छा, जो हि गोसालो तुमंतेवासी सो सुक्काभि-
जाइओ भवित्ता कालमासे कालं काऊण अन्नयरसु देवलोएसु देवत्ताए उववन्नो, अहं पुण उदाई नाम महासुणी

विचित्तवचरासमत्थं नियदेहमुज्झिऊणं तस्स गोसालगस्स सरीरगं थिरं धुवं धारणिज्जं सीयसहं उण्हसहं खुहा-
पिवासासहं विविहदंसमसगाइपरीसहोवसग्गसहं थिरसंधयणंतिकाऊण तमणुपविट्ठो, ता भो कासवा ! साहु तुमं
अपरियाणिऊण मं गोसालं मंखलिपुत्तं वाहरसि, एवं च तेण भणिए भगवया महावीरेण जंपियं-भो गोसालग !
जहा कोइ चोरपुरिसो विविहपहरणहत्येहिं खंडरकुवपामोक्खनरनियरेहिं पारब्भमाणो णो कत्थइ गड्डं वा दरिं वा
दुग्गं वा वणगहणं वा अत्तणो गोवणत्थं अपावमाणो एगेण उन्नालोमेण वा सणलोमेण वा कप्पासपुंमेण वा तण-
सूएण वा तदंतरे दिन्नेण व अत्ताणमणावरियंपि आवरियंथिव मणेमाणो निब्भओ निरुव्विगो अच्छइ, एवमेव
तुमंपि गोसाला ! अणण्णो संतो अणमप्पाणं वागरेसु, ता मा एवमलीयं वाहरसु, सुचेव तुह सरीरच्छाया, नो
अन्नत्ति, एवं च भगवया हुत्तो समाणो पज्जलियपयंडकोवानलो उच्चावएहिं वयणेहिं जयगुरू अक्कोसिऊण भणइ-भो
कासव ! नट्ठोसि अज्ज, भट्ठोसि अज्ज, अज्जेव न भवसि तुमंति, जो गिरिकंदरसुत्तं सीहं बोहेसि कीलाए, एत्थंतरे
भयवओ महावीरस्स अंतेवासी सच्चाणुभूईनाभो अणगारो धम्मयारियाणुरागेणं एयमट्ठं सोढुमपायंतो समागंतूण एवं
भणिउमारद्धो-भो गोसालग ! तहारूवस्स समणस्स वा माहणस्स वा अंतिए जे एगमवि धम्मियं वयणं निसामिंति
तेऽवि तं वंदंति नमंसंति गुरुबुद्धीए पज्जुवासंति, किं पुण तुमं जो मूलाओ चिय भयवया चेव पच्चाविओ सिक्खाविओ
बहुस्सुतीकओ भगवओ चेव मिच्छं पडिवज्जंतो न लज्जसि ?, ता मा एवं ऊणसु, अज्जावि सो चेव तुमं, सा चेव

तुह देहच्छाया, कीस अप्पाणं अवलवैसित्ति बुत्ते सव्वाणुभूइं सुणिं गोसालो समुच्छलित्यकोवानलो तं दिव्वं पयडं
अण्हियासणिज्जं तेउलेसं पक्खिविऊण निदहइ तक्खणेण, सो य तेयनिदहो सुहज्झवसायाणुगओ मरिऊण सह-
स्सारे कप्पे अट्टारससागराऊ देवो जाओत्ति, गोसालगोऽवि पुणो भयवंतं अणेगप्पथोरेहिं दुव्वयणेहिं पहणिउं
पवत्तो, इओ य सुनक्खत्तनामो साहू तहा अवक्कोसिज्जमाणं भगवंतं निसामिऊण तणं व नियजीवियमवि गणंतो
सिग्घमांगतूण गोसालं जहा सव्वाणुभूइं तहेव अणुसासइ, नवरं गोसालगपक्खित्तेउलेसापलीविओ समाणो भय-
वंतं तिकखुत्तो वंदिऊण सयमेव पंच महवयाइं उच्चारैइ, समणा य समणीओ खामेइ, आलोइयपडिक्कंतो य कालं
काऊण अञ्चुए कप्पे वागीससागरोवमाउयदेवेषु देवत्तेणं उव्वज्जइ, एवं च तम्मि पंचत्तं गए संते गोसालो दुन्निग-
हिओ वेयालोव लद्धावयासो विसेसओ परुसक्खराहिं गिराहिं तज्जणं कुणंतो वागरिओ सकारणं जयगुरुणा-भो
महाणुभाव ! गोसालग सिट्ठपहसमइक्कंतं तुह चरियं, जं मए पव्वाविओ मए सिक्खाविओ मए बहुस्सुईकओ
ममावि अवण्णवाई जाओ सि, एवं च जयगुरुणा सयमेव संलत्ते तेण अणाकलित्यकोवावेगेण सत्तट्ठ पयाइं पच्चोस-
क्किऊण पमुक्का महया संरंभेण भगवओ अभिमुहा तेउलेसा ।

अह मंदरगिरियां व निट्ठुरं जिणसरीरमक्कमिडं । असमत्था मारुयमंडलिच्च सा निहयमाहप्पा ॥ १ ॥

सयलदिसामुहपसरियपयंडतरतेयरइयपरिवेसा । आरत्तियदीवयमालियच्च सक्खा विरायंती ॥ २ ॥

जचतवणिज्जपुंज्जलंगपहपडलविजियसोहस्स । भीयच्च तक्खणं । चियं सामिस्स पयाहिणं कुणइ ॥ ३ ॥
तप्फरिसवसेण य भुवणवंधुणो अमयसीयतणुणोऽवि । जाओ मणागमेत्तं परित्तवो सच्चगत्तंमि ॥ ४ ॥
सा य तेउलेसा अहो अहं इमिणा महापावेण एरिसभकज्जं कारावियत्ति जायतिवकोवच्च उहुं उप्पइत्ता गोसा-
लगस्स सरीरं डहमाणी अंतो लहुमणुपविट्ठा, तओं गोसालो काउरिसोच्च समत्थेण नियतेएण विणिहओऽवि-
धिट्ठिमभवलंविऊण एवं पयंपेइ-अहो कासवा ! तुमं मम इमिणा तेएण अभिहओ संतो अंतो छण्हं मासाणं पित्त-
जरपरिगयसरीरो दाहवेयणोवक्कमियाउओ छउमत्थो चेव कालं करिस्ससि, भगवया भणियं-भो मंखलिपुत्त ! नो-
खलु अहं तुह तेएण अहिहओ छण्हं मासाणं अंतो कालं करिस्सामि, किं तु अन्नाइं सोलस वासाइं पडिपुन्ननाण-
दंसणधरो विहरिस्सामि, पच्छा खवियसयलकम्मंसो सिवपयं गमिस्सामि, तुमं पुण अप्पणो तेएण निहइसरीरो
अंतो सत्तरत्तस्स पित्तमहाजरजलणपलित्तगतो छउमत्थो चेव कालं करिस्ससिस्सि ।

अह सच्चत्थवि नयरे सुद्धजणो जंपिउं समाढत्तो । दोण्हं एत्थ जिणाणं परोप्परं चट्ठइ विवाओ ॥ १ ॥
तत्थेगो भणइ इमं पुच्चिं कालं करिस्ससिस्सि तुमंति । इयरोविहु तदभिमुहं इममेव पयंपए वयणं ॥ २ ॥
न सुणिज्जइ परमत्थो को मिच्छा वयइ को य सच्चंति ? । कुसला भणंति वीरो सच्चं वागइ नो इयरो ॥ ३ ॥
इओ य जयगुरू नियसमणगणमामंतिऊण भणइ-भो समणा ! जह तणरासी तुसरासी पत्तरासी बुसरासी

चा जलणजालापलीविया. समाणी पणहुतेया जायइ, एवं गोसालो मम वहाय तेयं निसिरिता विणहुतेउल्लेसमा-
हण्यो जाओ, तम्हा छंदेण निब्भया तुब्भे एयं धम्मियाए चोयणाए पडिचोएह, हेऊदाहरणकारणेहिं निष्पिण्ड-
पसिणवागरणं करेहत्ति वुत्ते तहत्ति पडिसुणिता जयनाहं च सविणयं वंदिऊण समेणा तं भणिउं पवत्ता ।

किं च-भो गोसालग ! किं तुज्झ दंसणे एस सत्थपरमत्थो । जं लोगमग्गकुक्कं तमेरिसं कम्ममायरसि १ ॥ १ ॥
तहाहि-धम्मगुरुं अवमन्नसि नियमाहणं पवित्थरसि बहुसो । जुत्तीहि वि जं न घडइ तं भाससि मुक्कमंजाय ॥ २ ॥
वायाए जीवरक्खं पयडसि तं लोयमज्झयारंमि । सद्धम्मगुणपहाणे सयं तु निहहसि साह्वि ॥ ३ ॥

एवंविहं अकज्जं कुणंति न कयाइ किर चिलायावि । तुमए पुण अलियवियइमेव सबं समायरियं ॥ ४ ॥
न सरसि उवयारं एत्तिंयपि जं रक्खिओ सि जयगुरुणा । तह वेसियायणुम्मुक्कतेयनिडुज्झमाणंगो ॥ ५ ॥

इइ भगवओ समणेहिं धम्मियाए चोयणाए चोइज्जमाणो गोसालो आसुरुत्तो कोवेण मिसिमिसेमाणो समाणो
जाव साह्वणं सरिरस्स रोममेत्तंपि निडुहिउं न तरइ ताव पडिहयसामत्थं तं नाऊण केडवि आजीचियेथेरा जयगुरुं
गुरुत्तणेण पडिवन्ना, अन्ने पुण विवेगविरहिया तहेव ठिया, गोसालगोडवि खणमेत्तं विगमिऊण रोसेण व माणेण य
दीहुणं नीससंतो दाढियलोमाइं लुंचमाणो हत्थे पकंपयंतो चलणेहिं भूमिं कुट्टमाणो अंतो विसंयत्तंहुस्सहतेउल्ले-
सादाहवसेण य हा हओऽहमस्सीति पुणरुत्तं वाहरंतो अकयकज्जो चेव भगवओ समीवाओ नीहरिऊण गओ सट्ठाणं,

जयगुरुणाऽवि जंपियं-भो समणा ! जं इमं गोसालेण मम वहट्ठा तेयं निसिद्धं तं खलु अंगवंगमगहमलयमालवअ-
च्छवच्छकोच्छपाढलाढवज्जिमसिकोसलअवाहसुमुत्तराभिहाणाणं सोलसण्हं जणवयाणं उच्छायणाए भासरा-
सीकरणयाए समत्थंति बुत्ते विम्बिहयहियया सुणिणो जायन्ति ।

सो य गोसालो कोडरनिहित्तुयवहो तरुव निडुज्झमाणो कहिंपि रइं अलहंतो तस्स दाहस्स पसमणत्थं कर-
कलिएणं भायणेणं मज्जपाणगं पियमाणो तव्वससंभूयमएण य अभिक्खणं गायमाणो अभिक्खणं नच्चमाणो अभि-
क्खणं हालाहलाए कुंभकारीए अंजलिपगगहपुव्वयं पणामं कुणमाणो अभिक्खणं भंडगनिमित्तकुट्टियमट्टियतो-
निहित्तिसिरकलिलसल्लेण सरिरं उवासिंचमाणो अडुवियड्डाइं पइक्खणं जंपमाणो परमसोगमुव्वहंतेण सिस्सग-
णेण सिसिरोवयारकारिणा परिवुड्डो दिणे गमेइ ।

तत्थ य सावत्थीए नयरीए अयंपुलो नाम आजीविओवासओ परिवसइ, सो य पुव्वरत्तावरत्तसमयंमि धम्मजाग-
रियं जागरमाणो जायसंसओ विचित्तेइ-अहमेयं सम्मं न सुणामि-तणगेवालिया किं संठाणा हवइ ? ता गच्छामि
धम्मयारियं धम्मोवएसगं समुप्पन्नदिव्वनाणदंसणं सव्वहुं गोसालं हालाहलाए कुंभकारीए आवणंमि वट्टमाणमापु-
च्छामिन्ति संपेहित्ता समुग्गयंमि दिणयरे अप्पमहग्घाभरणाळंकियसरीरो साओ गिहाओ पडिनिक्खमित्ता पायवि-
हारचारेणं कइवयपुरिसपरियरिओ गोसालयाभिमुहं गंतुं पयट्ठो, कमेण य कुंभारावणसमीवमणुपत्तो समाणो तं

गोसालं करकलियभायणमभिक्षणं मइरापाणं कुणमाणं नच्चमाणं गायमाणं हालाहलाए कुंभकारीए अंजलिं
 विरयंतं मट्टियासल्लेणं सरीरं परिसिंचमाणं असंबद्धां वयणां पयंपमाणं पेच्छिऊण लज्जावसविमिलायंतलोयणो
 सहसच्चिय सणियं सणियं पच्चोसकंतो झडत्ति समीवट्टिएहिं दिट्ठो गोसालयसिस्सेहिं, तओ वाहरिऊण भणिओ-
 तेहिं-भो अयंपुल ! तुमं पच्छिमरयणीए तणगोवालियासंठाणविसयं संसयं पकओसि, अयंपुलेण भणियं-भयवं !
 एवमेयं, पुणोऽवि गोसालगडुविलसियगोवणट्टया भणियं तेहिं-भो अयंपुल ! जं च तुह गुरू हत्थगयभायणे जाव
 अंजलिं विरयंतो विहरइ तत्थवि एस भगवं इमां निव्वाणगमणसूयगां पजंतलिंगां वागरेइ, तंजहा—

चरिमं गेयं चरिमं नट्टं चरिमं अंजलिकम्मं चरिमं पाणं अन्नं च मट्टियासीयलसल्लिसरीराणुलिपणपमुहं
 वाचारं, ता अयंपुल ! भगवओ चउवीसमतित्थगरस्स गोसालगस्स पुव्वभणियलिंगेहिं सूइओ संपइ निव्वाणगमण-
 पत्थाओ वट्टइ, तम्हा गच्छ तुमं स एव तुह धम्मायरिओ इमं वागरणं वागरिही, एवं च सोच्चा सो दढहरिसुच्छ-
 लंतपुलयजालो तदभिमुहं गंतुं पयट्ठो, ते आजीवियथेरा सिग्घयरं गंतूण गोसालगस्स अयंपुलागमणं निवेएत्ति,
 तं च मज्झभायणाइ एगंते परिच्चयावैत्ति, आसणंमि य निवज्जावित्ति, एत्थंतरे पत्तो अयंपुलो तिकखुत्तो य पया-
 हिणीकाऊण परेणं विणएणं वंदित्ता गोसालयं निसण्णो समुच्चियासणे, तओ गोसालएण भणियं-भो अयंपुल !
 तुमं पच्छिमरयणीसमयंमि इमं संसयमुव्वहसि जहा तणगोवालिया किंसंठाणसंठियत्ति, नणु वंसीमूलसंठिया सा

पन्नत्ति, इमं च निसामिऊण पहिड्डुहियओ पुणो तं वंदिऊण गओ सो सट्ठाणं । अन्नम्मि य वासरे ईसिं समुवल्लद्ध-
चेयणो गोसालो नियमरणसमयमाभोइऊण अप्पणो सिस्से सद्देवइ, तेसिं पुरओ य इमं वांगरेइ-भो देवाणुप्पिया !
मं कालगयं जाणिऊण मम सरीरं सुरहिगंधोदएण पक्खालिऊण सरसेण चंदणेण चच्चिऊण य महरिहं हंसल-
क्खणं पडयं नियंसावेज्जह, तयणंतरं सद्वालंकारविभूसियं सहस्सवाहिणीसिबिगांसमारोविंयं काऊण नीहरावेज्जह,
सावत्थीए पुरीए सिंघाडगतियचउक्कचच्चेसु इमं उग्घोसिज्जह, जहा-इमीए ओसप्पिणीए चउवीसाए तित्थयराणे
चरिमो एस गोसालगजिणो तित्थयरत्तं पालिऊण समुपन्नकेवलो संपयं सिद्धिं गओत्ति, इमं निसामिऊण ते सिस्सा
विणएणं सबं पडिसुणंति, अह सत्तमदिणंमि परिणममाणंमि समुवल्लद्धसुद्धबुद्धिणा पुव्वदुच्चरियनिवहसुमरणुप्पन्ना-
तुच्छपच्छायावेण चित्तियं गोसालेण—

अहह महापावोऽहं अजिणंमि जिणं भणामि अप्पाणं । सच्चं च सुसावयणंमि मुद्धलोयस्स साहेमि ॥ १ ॥

सिरिवद्धमाणा तित्थंकरो गुरू धम्मदेसगो परमो । आसाइओ मए तह तेयनिसग्गेण दुग्गेण ॥ २ ॥

दुद्धरसंजमभरधरणपच्चले सुणिवरे दहंतेण । निदद्ध चिय वोही मए हयासेण एमेव ॥ ३ ॥

सच्छंदं उम्मगं पयट्ठमाणेण तह महीवट्ठे । अप्पा न केवलो चिय लोगोऽवि भवन्नवे खित्तो ॥ ४ ॥

अहवा समग्गमुवणत्तएऽवि तं नत्थि पावठाणमहो । जं कइवयदिणकज्जे मए अणजेण नो विहियं ॥ ५ ॥

तं चोजं जं इमिणावि दुदुदेहेण पावभरगुरुणा । जमवयणंपिव भीमं अज्जवि नासं न वच्चांमि ॥ ६ ॥
मुद्धेण मए चिरजीवियत्थिणा कवलियं हि तालउडं । आगामियमसुहमतक्किऊण जं एवमायरियं ॥ ७ ॥
इय वेरगगमुवगओ गोसालो तह न तेउलेसाए । संतप्पइ जह तेणं सपुवदुच्चरियवग्गेणं ॥ ८ ॥
एवं च सुचिरं परिच्छुरिऊण सो नियसिस्सगणं उच्चावयसवहसावियं काऊणं एवं भणितं पवत्तो-भो महाणु-
भावा ! नो खलु अहं जिणो सवन्नू सव्वदरिसीवि, किंतु गोसालो मंखलिपुत्तो भगवओ वद्धमाणतित्थंकरस्स
सिस्सोऽवि होऊण पच्चणीओ समणघायगो नियतेएणं चेवाभिहओ छउमत्थो विणस्सिउकामो ङंममेत्तपयट्ठिय-
पउट्टपरिहाराइदुन्नओ एत्तियकालमप्पाणं परं च दुग्गाहतो विहरिओ, अओ एवंविहंमहापावकारिणं कालगयं
जाणित्ता तुब्भे वामचलणंमि रज्जूए वंधित्ता इमाए सावत्थीए पुरीए सबत्थ सिंघाडगाइसु आकट्ठिविकट्ठिं कुणमाणा
तिक्खुत्तो वयणंमि निट्ठीयणं पक्खिवंता एसो सो गोसालो मंखलिपुत्तो अजिणो गुरुपडिणीओ समणघायगो
असेसदोसकारी, भयवं पुण महावीरो जिणो तित्थयरो उप्पन्नदिवंनाणंदं सणो सच्चवाई कारुणिओ धम्मदेसंगोत्ति
महया सहेण उग्घोसमाणा य मम सरिरस्स नीहरणं करेज्जहत्ति भणिऊण दारुणवेयणाभिहयसरीरो मओ गोसा-
लोत्ति । तं च कालगयं जाणित्ता ते आजीविथेरा नियगुरुपक्खंवायंसुबंहता कुंमकारावणस्स दुवारं पिहिऊण तस्स
मज्झयारे सावत्थिं नयरिमालिहत्ति, तओ गोसालगस्स वामपायंरंजुवंधणंपसुहं आघोसणापज्जवसाणं सवहपरिमो-

क्वणं करेति, तयणंतरं च तं सरीरं सुराहिसलिलेहिं ण्हाविऊण तप्पक्खवायपडिवन्नजणधिरिकरणट्ठया महाया पूयासक्कारसमुदएणं सिचियाए समारोविऊण नीहरावेति, मयकिच्चाणि य कुणंति ।

इओ य भगवं महावीरो सावत्थीओ नयरीओ निक्खमिऊण विहारक्कमेण गओ मिंढियगामनयरे, समोसढो य मणिकोट्टयाभिहाणचेइयंमि, धम्मनिसामणत्थं च परिसा समागया, खणमेगं च पल्लुवासिऊण जहागयं पडिगया, अह भगवओ महावीरस्स तेण तेउलेसापरितावसेण समुप्पन्नो पित्तजरो, तवसेण य पाउब्भूओ रुहिराइसरो, रविकरपडिवोहियकणयकमलसच्छंहं पि मिलायलायन्नं जायं वयणकमलं सरयदिणयरसमुज्जलावि विच्छाईभूया देहच्छवी वियसियकुवल्लयदलदीहरं पि मउलावियं लोयणजुयलं महानगरगोउरपरिहाणुरूपि किसत्तणमुवगयं बाहुदंडजुयलंति, एवंविहं च भगवओ सरीरलंछि पिच्छमाणो मुद्धजणो बाहरिउमारद्धो—अहो भगवं महावीरो गोसालगतवतेयजणियपित्तज्जरविहुरियसरीरो छण्हं मासाणमब्भंतरे परलोयं वच्चिस्सइत्ति, इमं च पवायं जणपरंपराओ निसामिऊण सीहो नाम भगवओ सिस्सो गुरुपेस्माणुरागेण एगंते गंतूण अहिययरमञ्जुभररुद्धकंठचिवरो कहकहविगन्धिणं रोविउं पयत्तो, इओ य केवलावलोएण अवलोइऊण भगवया वाहराविओ एसो, भणिओ य—

किं तं जणप्पवायं निसामिउं कुणसि चित्तसंतावं ? । नेवावयाए कइयवि विउक्कमंतीह तित्थयरा ॥ १ ॥

अन्नह संगमयविसुकुचक्ककडपूयणाइजणिएहिं । मरणं हविज तइयावि मज्झं तिकखेहि दुक्खेहिं ॥ २ ॥
 जो पुण तणुतणुयत्तणरुहिरइसाराइओ विगारो भे । सो(निरु)वक्कमत्तणेणं सोऽवि न दोसं समावहइ ॥ ३ ॥
 सीहेण तओ भणियं जइवि हु एवं तहावि जयनाह ! तुम्हावयाए तप्पइ सयलं ससुरासुरं सुवणं ॥ ४ ॥
 सिद्धिलियसज्झायज्झाणदाणपाभोक्खधम्मवावारो । चाउच्चन्नो संघोऽवि लहइ नो निव्वुइं कहवि ॥ ५ ॥
 ता पसियसु जयवंधव ! अम्हारिसहिययदाहसमणत्थं । उवइससु भेसहं जेण होइ देहं निरोगं भे ॥ ६ ॥
 एवं कहिए तथणुकंपाए भगवया भणियं-जइ एवं ता इहेव भिंढयग्गामे नथरे रेवइए गाहावइणीए समीवं
 वच्चाहि, ताए य ममनिमित्तं जं पुवं ओसहं उवक्खड्डियं तं परिहरिऊण इयरं अप्पणो निमित्तं निष्फाइयं आणेहिंत्ति,
 इमं निसामिऊण हरिसवसपयट्ठुल्यपडलाउरसरीरो सीहो अणगारो समुट्ठिऊण भयवंतं वंदइ नमंसइ, तयणंतरं
 पडिग्गहं गहाय रेवइए गाहावइणीए गिहमुवागच्छइ, साऽवि रेवइ तं अणगारं ईरियासमिइप्पमुहचरणगुणसंपन्नं
 समणधम्मं व पच्चक्खं गिंहमि पविसमाणमवलोइऊण खिप्पामेव आसणाओ अब्भुट्ठइ, सत्तट्ठ पयाइं सम्मुहमवसप्पइ,
 सविणयं वंदिऊण य एवं जंपइ-संदिसह भंते ! किमागमणकारणं ?, सीहेण भणियं-जं तुमए चद्धमाणसामीं पडुच्च
 कयं तं मौत्तण जं अत्तट्ठा निष्फाइयं ओसहं तं पणामेहिंत्ति, तीए भणियं-भयवं ! को एवंविहदिद्वनाणी जो रहसि-
 कयंपि एवंविहं वइयरं परिजाणइ, सुणिणा कहियं-सयलभावाभावनिब्भासणसमत्थकेवलवलोयनिलयं भयवंतं वी-

रजिणं मोत्तूणं को अन्नो एवंविहं साहिउं पारइ?, एवं सोच्चा सा पडिहियया सायरं तमोसहं मुणिणो पडिग्गहंमि पविस्खवइ, तओ सा तेण भावविसुद्धमेसहण्णयाणेण देवाउयं कम्मं निबंधइ, देवा य तीसे गिहंमि कणगरासिं नि-
सिरंति, महादाणं महादाणंति घोसंति, सीहोवि साहू तं गहाय भयवओ समप्पेइ, तं च भयवं आहारेइ, आहा-
रिए य तहिं ववगयपित्तज्जरससुत्थविगारो अमयपुन्नसरीरोव समहिगसमुम्मिहियजच्चकंचणसच्छहच्छवी वीरो वि-
राइउं पवत्तो । अह पडिहयरोगे वद्धमाणे जिणिंदे हरिसवियसियच्छो सव्वसंधोऽवि जाओ । असुरसुरसमूहा वडि-
याणंदभरा सह नियरमणीहिं नच्चिउं संपयत्ता ।

गोयमसामीवि गणहरो महावीरं वंदिऊण पुच्छइ-भयवं ! तुब्भं कुसिस्सो गोसालो कालं काऊण कहिं उववन्नो ?,
भयवया भणियं-अच्चुयंमि देवलोगे बावीससागरोवमाऊ देवो जाओत्ति, गोयमेण भणियं-भयवं ! कहं तहाविहमहा-
पावकरणेऽवि एवंविहदिच्चदेविह्विलाभो ससुप्पण्णोत्ति ?, तओ सिद्धो सामिणा से सव्वोऽवि मरणसमयसमुप्पन्नातुच्छ-
पच्छायावाई वुत्ततो, पुणोऽवि गोयमेण भणियं-भयवं ! तओ ठाणाओ सो आउक्खएण कहिं उववज्जिही ?, कइया
वा सिद्धिं पाविहित्ति ?, भगवया जंपियं-गोयम ! निसामेहि-इहेव जंबुद्दीवे दीवे भारहे वासे विंझगिरिपायमूले
पुंडाभिहाणंमि जणवए सुमइस्स रन्नो भद्दाभिहाणाए देवीए गब्भे सो गोसालो तत्तो चवित्ता पुत्तत्ताए पाउब्भवि-
स्सइ, तओ नवण्हं मासाणं समहिगाणं समइक्कंताणं पजाइही, तस्स य जम्मसमए तत्थ नयरे सब्भंतरवाहिरे

भारगसो य कुंभगसो य परिमलायद्विधुलं धुयधूसरा पउमवुट्ठी रयणवुट्ठी य भविस्सइ, चंदसूरंदसणप्पमुहजम्म-
 णमहूसवं काऊण य अम्मापियरो दुवालसमे दिवसे संपत्ते जम्मदिणाणुरूवं महापउमोत्ति से नामं करिस्संति, अह
 समुचियकाले अहिगयकलाकलावं तं सोहणंमि तिहिनक्खत्तमुहुत्तंमि महया रायाभिसेएणं अभिसिंचिहन्ति, तओ
 सो अक्खलियपरक्कमो पयंडपयावपडिहयपडिवक्खो अहमहमिगाए पणमंतनरिंदसंदोहमउलिमालालियचलणो
 महाराओ भविस्सइ, तस्स य महापउमस्स विजयजत्तमुवड्डियस्स पुन्नभइमाणिभइनामाणो दो देवा महड्डिया महापर-
 क्कमा सेणाकम्मं करिस्संति, ते य राईसरसेणावइमंतिसामंतपमुहा पहाणजणा एवंविहं वइयरमुवलब्भ पहरिसुस्स-
 सियरोमकूवा महापउमस्स रण्णो गुणनिष्फणं देवसेणोत्ति दुइज्जं नामधेयं निम्मविस्संति, अणण्या य तस्स रण्णो
 सरयससहरधवलं चउदंतं सत्तंगपइड्डियं लट्ठं हत्थिरयणमुप्पज्जिही, तस्मि य सो समारूढो एरावणपट्टिओव
 पुंरंदरो उवसोभमाणो इओ तओ परिभमिस्सइ, तयणंतरं पुणोऽवि ते राईसरादओ जणा नियपहुसिद्धिपलोयणु-
 प्पन्नपमोयभरतरलिया तस्स राइणो विमलवाहणोत्ति तइयं नामधेयं पइड्डिस्संति । अह अन्नया कयाई तस्स
 रज्जभरमणुपालितस्स पुवभवब्भत्थतवस्सिजणविणासहीलणप्पमुहाणत्थपचइयकम्मदोसेण समणसंधोवरि बाढं प-
 ओसो समुप्पज्जिही,

तो सो सधम्मकम्मुज्जएऽवि एगे तवस्सिणो हणिही । अन्ने पुण वंधिस्सइ विविहपयोरेहिं वंधेहिं ॥ १ ॥

अक्रोसेही एगे उवहसिही तदपरे महापावो । अन्नेसि निग्घणमणो काराविस्सइ छविच्छेयं ॥ २ ॥
 एगेसिं हरिस्सइ वत्थपत्तकंवल्पमोक्खमुवगरणं । अन्नेसिं समणाणं वारिस्सइ भत्तपाणंपि ॥ ३ ॥
 अन्ने निव्वासिस्सइ नियनयरपुरागरासयाहिंतो । अन्ने पुण मारिस्सइ सत्थेहिं ल्हू सहत्थेण ॥ ४ ॥
 इय एवंविहमसमंजसं तओ पेच्छऊण पउरजणा । भत्तिविणउत्तिमंगा तं एवं विन्नविस्संति ॥ ५ ॥
 देव ! न जुत्तं सोउंपि एयमच्चंतमजससंजणं । समणाण धम्मविग्घो जं एवं हवइ तुह रज्जे ॥ ६ ॥
 दुट्ठाण निग्गहो सिट्ठपालं नियकुलक्कमायरणं । रायाण एत्तियं चिय सलहिज्जइ किं थ सेसेहिं ? ॥ ७ ॥
 एकमकित्ती सच्चत्थ तिहुयणे उन्नमइ महापावं । अन्नं चिय रज्जखओ हीलिज्जंतेसु समणेषु ॥ ८ ॥
 अन्नं च-जइ देव ! कहव कुप्पंति तुम्ह समणा इमे समियपावा । ता सयलंपिचि रट्ठं दहंति हुंकारमेत्तेण ॥ ९ ॥
 एएसिं पभावेणं धरंति धराणि सुहेण नरवइणो । एत्तो चिय मज्जायं जलनिहिणोऽवि हु न लंधंति ॥ १० ॥
 ता देव ! विरमसु धुवं तवस्सिजणपीडणाओ एयाओ । अकलंकच्चिय कित्ती जह वियरइ तिहुयणे तुम्ह ॥ ११ ॥
 इय पुरजणेहिं सुवहुप्पयारवयणेहिं वारिओ संतो । भावविरेहेऽवि सो तं पडिसुणिही तयणुवित्तीए ॥ १२ ॥
 अन्नया य सो रहवरारूढो निग्गच्छिही, इओ य सुभूमिभागे उज्जाणे तिनानोवगओ विउलतेउलेसामाहप्प-
 दुद्धरिसो विविहतवचरणनिरओ सुमंगलो नाम तवस्सी आयाविस्सइ, सो य राया तेणप्पएसेण वच्चमाणो

तं दद्वृण निष्कारणुपपन्नतिविकोवानलो सुमंगलं काउस्सगड्डियं रहगभागेणं पणोछावेही, सो य तेण 'पणोछिओ
समाणो धरणीयले निवडिओऽवि सणियं सणियं समुट्टिऊण पुणो काउस्सगेण पलंविद्यमुओ ठाही, सो य राया
तं उड्डुसंठाणसंठियं दद्वृण पुणोऽवि रहगेण पणोछावेही, सो य मंदं मंदमुट्टिऊण तेहव उस्सगेण ठाइस्सइ, नवरं
ओही पंजिऊण तस्स पुव्वभवे आभोइस्सइ, तओ एवं भणिही—अरे नरिंदाहम ! न तुमं महापउमो न देवसेणो न य
विमलवाहणो, किं तु मंखलिपुत्तो गोसालगो तुमं, जेण निद्वृहा महातवस्सिणो अचासाइओ निययधम्मगुरू, ता
जइ रे तया सव्वाणुभूइणा मुणिवरिट्ठेण पड्डुणावि होऊण पड्डिविधायमकुणमाणेण निरुचमं पसममवलंबिऊण तुह
दुच्चिलसियं सम्ममहिद्यासियं, सुनक्खत्तमहारिसिणा वा तित्तिक्खियं, असेसतिहुयणरंगतुल्लमहामल्लेण महावीरेण
वा खमियं तं, नो खलु अहं सहिस्सं, किं तु जइ एत्तो पणोछावेहिंसि ता भवंतं सरहं सतुरयं ससारहियं नियतवते-
एणं छारुक्कुरुडं काहामि, सो य राया इमं निसामिऊण समुच्छलियपवलकोवानलो पुणोऽवि संदणगेण पणोछा-
वेही, अह तइयेवेलंपि पणोछिओ सुमंगलसाहू विमुमरियपसमसव्वसो पणट्टगुरूवएसो सत्तट्ठ पयाइं पचोसक्किऊण
तेउलेसं निसिरिही, ताए य सरहो ससारही सतुरंगमो सो निदज्झिही, सुमंगलसाहूवि तं निद्वहिऊण पुणरवि
पचागयसुहज्झवसाणो आलोइयनियदुच्चरिओ विचिच्चेहिं तवोकम्मोहिं कम्मनिज्जरणं काऊण बहुयाइं वासाइं सा-
मणं परिपालिऊण य मासियाए संलेहणाए संलिहियसरीरो मरिऊण सब्बट्टसिद्धे विमाणे तेचीससागरोवमाऊ

देवो भविस्सइ । तओ लुओ समानो महाविदेहे सिञ्जिहिति । गोयमसामिणा भणियं-भयवं ! विमलवाहणो कहिं उप्पज्जिही ? भयवया भणियं-गोयम ! विमलवाहणो तेण सुणिणा निहहो सत्तमाए निरयपुढवीए अप्पइ-
ट्ठाने नरयावासे तेत्तीससागरोवमाऊ नेरइओ भविस्सइति । तयणंतरं च—

सव्वत्तो पसरियतिक्खवज्जसूलगवेहणसमत्थं । अणिसं सहिही विवसो तेत्तीसं सागराईं दुहं ॥ १ ॥

तत्तो उव्वट्ठित्ता मच्छभवं पाविऊण तिव्वेणं । पुव्वभवसाहुमारणजणिणं पावदोसेणं ॥ २ ॥

सो सत्थहओ संतो दाहजरघोरेवयणाभिहओ । मरिउं होही पुणरवि नेरइओ सत्तममहीए ॥ ३ ॥

तत्तो मच्छो छट्ठीए नारगो इत्थिया य नेरइओ । छट्ठीए पुढवीए इत्थी नेरइओ पंचमीए ॥ ४ ॥

उरगो नेरइओ पंचमीए उरगो पुणो चउत्थीए । नेरइओ सीहो तह चउत्थपुढवीए नेरइओ ॥ ५ ॥

सीहो तच्चाए नारगो य पक्खी य तइय नेरइओ । विइज्जा पुढवीए नारगो सुयपरिस्सप्पो ॥ ६ ॥

बीयाए नेरइओ सुयपरिस्सप्पो य पढमपुढवीए । सण्णी तओ असण्णी नेरइओ पढमनरगंमि ॥ ७ ॥

तेण सुणिमारणल्लियपावेणं नरयवज्जठानेसु । सत्थहओ दाहज्जरविहुरो होही य मरिही य ॥ ८ ॥

तत्तो पक्खिसिरीसिवउरपरिसप्पेसु णेगभेएसु । जलयरजोणिषु तहा उव्वज्जिय भूरिवाराओ ॥ ९ ॥

चउरिंदिएसु तेइंदिएसु वेइंदिएसु य भवित्ता । सव्वत्थ सत्थनिहओ विवज्जिही णेगवाराओ ॥ १० ॥

वणसइपवणानलसलिलपुढविजाईसु विविहभेयासु । कालमसंखं वसिउं अकालमरणेण सो मरिही ॥ ११ ॥
इय उब्भडनियदुचरियजलणजालाकलावसंतत्तो । तं किंपि नत्थि दुक्खं जं पाविस्सइ न स वरागो ॥ १२ ॥

एवं च अणेगभवुम्मज्जणनिमज्जणाइं काऊण कहकहवि समासाइयथेक्कम्मविचरो सो गोसालगजीवो रायगिहे
नयेरे ब्राहिं वेसिथित्ताए उववज्जिही, तत्थवि चिरभवसाहुवहसमुत्थनिकाइयक्कम्माणुवत्तणवसेण रयणीए पसुत्ता
चेव एणेण विडपुरिसेण आभरणलिच्छुणा निसियखगधेणुनिदयनिहारियउदरा मरिऊण पुणोऽवि रायगिहस्संतो
वेसिथियत्ताए उववज्जिऊण विवज्जिही । तओ जंबुदीवे दीवे भारहे वासे विंझगिरिपायमूले विभेलए सन्निवेसे
माहणकुले दारियत्ताए पच्चायाही, तं च कालक्कमेण उम्मुक्कवालभावं अम्मापियरो समुचियस्स एगस्स माहणपुत्त-
स्स य भारियत्ताए पणामइस्संति, अन्नया य सा गुविणी ससुरकुलाओ पियहरं निज्जमाणी अंतरा समुच्छलियपव-
लदावानलजालाकलावकवलिया कालं काऊण अगिक्कुमारेसु देवेसु देवत्ताए उववज्जिही, तत्तो य चविऊण माणु-
सत्तणेण समुप्पन्नो समाणो तहाविहसुगुरुंदसणसमुवलद्धसच्चनुधम्मवोहो भववेरग्गमुवहंतो पव्वज्जं पडिवज्जिही,
कहिवि पमायवसेण विराहियसामणो य असुरकुमारेसु देवेसु उववज्जिही, एवं कइवयभवगहणाइं पुणो पुणो
विराहियसामन्नो असइं भवणवासिदेवेसु जोइसिएसु य सुरसंपयं समणुभविऊण पुणो समुवलद्धमाणुसत्तो अइयार-
कलंकपरिहीणं पव्वज्जं समायरिऊण सोहम्मे देवलोए देवो होही, एवं सत्त भवे जाव निक्कलंकं सामणमणुपालिऊण

महाविदेहे वासे ददपइण्णाभिहाणो ईसरसुओ होऊण जायभवेवरगो परिचत्तवणसयणो थेराण अंतिए सच्चविरइं गहाय छट्ठुमाइतवोकम्मविसेसेहिं पुच्चभवपरंपरासमज्जियाइं पावकम्माइं खविऊण केवलनाणमुप्पाडेही, तओ सो ददपइण्णकेवली सुणियगुरुजणावमाणसमुत्थमहापाववियंभियभवाडवीनिवडणकड्डुविवागो नियसमणसंघं सहाविऊण एवं भणिही—

हंहो देवाणुपिया ! जंबुदीवंमि भारहे वासे । मंखलिंपुत्तो गोसालनामओऽहं पुरा आसिं ॥ १ ॥
बहुकूडकवडनिरओ विवरीयपरूवगो समणघाई । धम्मगुरुंपच्चणीओ समत्थदोसाण कुलभवणं ॥ २ ॥
नियतेएणं चिय दज्झमाणदेहो दढं बहुदुहत्तो । कलुणं विलवंतोऽहं पंचत्तं पाविओ तइया ॥ ३ ॥
तम्मूलं चउगइभुयगभीसणे दीहरे भवारणणे । भमिओ सुचिरं कालं विसहंतो दारुणंदुहाइं ॥ ४ ॥
ता भो देवाणुपिया ! इय सोच्चा मा कयावि सुगुरुणं । संघस्स पवयणस्स य पडिणीयत्तं करेज्जाह ॥ ५ ॥

बहुओऽवि पावनिवहो वच्चइ नासं सुहुत्तमेत्तेण । गुरुसाहुसंधसिद्धंतधम्मवच्छल्लभावेंण ॥ ६ ॥
एवमणुसासिऊणं नियसमणे सो तथा महासत्तो । पडिबोहिऊण भवे पाविस्सइ सासयं ठाणं ॥ ७ ॥
इय तइलोयदिवायरसिरिचीरजिणेसरेण परिकहिंयं । गोसालयचरियमिमं गोयमसामिस्स नीसेसं ॥ ८ ॥
एयं च तच्चरियं महादुहविवागमूलं निसामिऊण बहवे समणा य समणीओ य सावयाओ य सावियाओ य गुरु-

प्पसुह्माणं सचिसेसं आसायणापरिहारपरायणा जायत्ति । अह भयवं महावीरो भिंढियंगामनयराओ निक्खल्लमित्ता
 समणसंधपरिबुडो गामाणुगामेण विहरमाणो संपत्तो रायगिहं नयरं, तस्स य अदूरविभागवत्तिंमि गुणसिलयाभिहा-
 णचेइए विरइयं देवेहिं समोसरणं, पुव्वक्केमेण निसन्नो सिंघासणे जयगुरू साहिउं पवत्तो दयामूलं खमामहाखंधं
 मूलगुणसाहासमाउलं उत्तरगुणपत्तनिगरसंछन्नं अइसयकुसुमविराइयं जससोरभमरियमुवणंतरं विसमसरतरणिताव-
 पणासगं सग्गापवग्गसुहफलदाणदुल्ललियं पवरजणसउणणिसेवणिज्जं धम्ममहाकप्पतरुवरं । एत्थावसरंमि सेणियनरा-
 हिवो भयवंतं समवसरणट्ठियं सोऊण पट्ठिओ अभयकुमारमेहकुमारनंदिसेणपुत्तपरियरिओ वंदणवडियाए जयजुरुणो ।
 कंहं चिय ?—

डिंडीरपिंडुंडरियहरियखरकिरणविंवकरपसरो । सहरिसहरिणच्छिकरयलुल्लसियचामरुग्घाओ ॥ १ ॥

गज्जंतमत्तकुंजरमयजलपडिहणियरेणुपन्भारो । तरलतरतुरयपहकरसंखोहियमहियलाभोगो ॥ २ ॥

रणज्झणिरकणयकिंकिणिमालाउलरहसमूहपरियरिओ । दग्घुन्भडसुहडसहस्सरुद्धनीसेसदिसिनिवहो ॥ ३ ॥

इय सेणिओ नरिंदो हरिसुक्करिसं परं पवहमाणो । करिणीखंधारूढो नीहरिओ नियपुराहितो ॥ ४ ॥

तयणंतरं च पत्तो समोसरणं । जहाविहिणा य पविट्ठो तयवभंतरे, तिपयाहिणीकाऊण वंदिउं जयगुरू निचिट्ठो
 समुचिए भूमिभागे, भगवयाडवि पारद्धा तदुचिया धम्मकहा । कंहं ?—

भो भो महाणुभावा निम्मलबुद्धीए चिंतह सयणहा । संसारं घोरमिमं महामसाणस्स सारिच्छं ॥ १ ॥
तथाहि-उब्भडविंभियमुही विसयपिवासा महासिवा एत्थ । दढमणिवारियपसरा सवत्तो चिय परिब्भमइ ॥ २ ॥
ओहामियसुरनरखयरविक्रमा तंतमंतदुग्गेज्झा । अनिवारियं पयट्ठइ भीमा जरडाइणी निच्चं ॥ ३ ॥
ययडियपयंडपक्खा निरवेक्खकंतजीयमाहप्पा । सवत्तो पासठिया कसायगिद्धा विसप्पंति ॥ ४ ॥
दावियविविहवियारा जीवियहरणेऽवि पत्तसामत्था । दढमसुणियप्पयारा रोगभुयंगा विंयंभंति ॥ ५ ॥
लद्धुं छिहं थेवंपि तक्खणुप्पन्नहरिसपब्भारो । भुवणत्तयसंचरणो मरणपिसाओ समुत्थरइ ॥ ६ ॥
इट्ठविओगाणिट्ठप्पओगपाभोक्खदुक्खतरुनिवहो । सवत्तो विणिवारइ विवेयदिणनाहकरपसरं ॥ ७ ॥
इय भो देवाणुपिया ! मसाणतुल्ले भवंमि भीमंमि । खणमवि न खमं वसिउं तुम्हाणं सोक्खकंखीणं ॥ ८ ॥
एवं भगवया वागरिए संसारसरूवे पडिबुद्धा बहवे पाणिणो, भावसारं च अणेगेहिं अंगीकया देसविरइसव्ववि-
रइपडिवत्ती, हरिस्सुसियसरीरो य सपरियणो राया गओ जहागयं, नवरं मेहकुमारारायपुत्तो अंतो विंयंभंतहरिसपसरो
संसारविरागं परममुव्वहंतो सेणियनराहिंव जणणिं च पणमिऊण भणिउं पवत्तो—अंवताय ! अहमेत्तो वंछामि
तुब्भेहिं अणुण्णाओ भगवओ समीवे पव्वज्जं पवज्जिउं, तेहिं भणिंयं-पुत्त ! विसमो जोवणारंभो दुरक्खणिज्जो मयर-
द्धयसरपहारो दुद्धरा विसयाभिमुहीभवता इदियतुरंगमा सम्मोहदायगा लडहमहिलाजणविसाला बाढं दुरज्झवसा

पव्वजा, अचंतं दुरहियासा परीसहा, ता पुत्त ! पडिवालेहि कइयवि वासराइं, मेहकुमारेण भणियं-अम्मताय ! तडि-
तरलमाऊअविलसियं सरयगिरिसरियावारिवेगचडुलं जोव्वणं मत्तकामिणीकडक्खभंगुरा रायलच्छी, जन्नारंभा इव
दीसंतवहुविप्पओगा इट्टजणसंजोगा, ता पज्जत्तमेत्तो गेहनिवासेण, सब्बहा मा कुणह धम्मविग्धंति भणिएं अणु-
ण्णाओ कहकहवि जणजिणगेहिं, तओ महाविभूइसमुदएणं गहिया अणेण भगवओ समीवे पव्वजा, अन्नेऽवि तं
पव्वज्जं अणुगिण्हंतं पासिऊण बहवे नरिंदसेट्ठिसेणावइसुया जायभवविरागा पव्वइया ।

अह दुस्सहत्ताए परीसहाणं चलत्तणओ चित्तवित्तीए तस्स मेहकुमारसाहुस्स अणुक्कमेण पढमंरयणीए चेव
पसुत्तस्स पविसंतनीहरंतमुणिचरणघट्टणुप्पन्ननिदाविगमस्स पव्वजापरिच्चायाभिमुहमाणसस्स कहकहवि अट्टुह-
ट्टियस्स दुक्खेण बोलीणा रयणी, समुग्गयंमि रविमंडले पमिलाणवयणकमलो समुट्ठिऊण तओ ठाणाओ पव्वज्जं
परिमोत्तुकामो गओ भगवओ समीवे ॥

अह केवलावलोएण जिणवरो जाणिऊण भग्गमणं । मेहकुमारं साहुं महुर्गिराए इमं भणइ ॥ १ ॥
किं भो देवाणुपिया ! संजमजोगंमि भंगसुव्वहसि । पुव्वभववइयरं नेव सरसि सयमवि समणुभवियं ॥ २ ॥
एत्तो तइयभवंमिं रण्णे किर वारणो तुहं हुंतो । तत्थ य वणग्गिणा पसरिएण संतत्तसव्वंगो ॥ ३ ॥
वाढं पिवासिओ सरवरंमि पाउं जलं समोगाढो । तडपंकंमि य खुत्तो तत्तो नीहरिउमचयंतो ॥ ४ ॥

पडिकरिणो दढदसणगगताडणुणपन्नतिद्ववेयणओ । मरिउं विंझमि तुमं पुणरवि जाओ गयांहिवई ॥ ५ ॥
वणदवपलोयेण य जाई सरिऊण भयवसेट्टण । रुक्खे उक्खणिऊणं अवणिता तणपलांलाई ॥ ६ ॥
करयलसमाइं तिन्नि उ महापमाणाइं थंडिलाइं तए । सरियातीरे पक्याइं नियययजुहरक्खट्टा ॥ ७ ॥ जुम्मं ।
अह अन्नया कयाई तरुवरसंधरिससंभवो जलणो । दहिउं वणं पयट्ठो पलंयानलविब्भमो भीमो ॥ ८ ॥
तं पेच्छिऊण भीओ तुमं पलाणो संधंडिलाभिमुहं । हरिहरिणससगसूयरपडिहत्थे थंडिले दुन्नि ॥ ९ ॥
लंघित्ता तइयंमिं संपत्तो अच्छिउं समाढत्तो । चरणो य समुक्खित्तो कंडुयणकए तए तणुणो ॥ १० ॥
एत्थंतरंमि अन्नन्नसत्तसंपेह्णिओ ससो एगो । उक्खित्तचरणेहेट्टा ठिओ सजीयस्स रक्खट्टा ॥ ११ ॥
तं दहूणं तुमए पयहेट्टठियं पराए करुणाए । आकुंचिऊण धरिओ नियचलणो गयणंदेसंमि ॥ १२ ॥
अह वणदवोऽवि दहिउं सयलं अडविं महाविडविपुन्नं । उवसंतो ते य गया जहागयं ससगपमुहजिया ॥ १३ ॥
ताहे छुहापिवासासंतत्तो तंपि सिग्घवेगेण । असुणियकुटियसचलणो पधाविओ पाणियाभिमुहं ॥ १४ ॥
अह एगचलणवियलत्तणेण पडिओ तुमं गिरिवरोव । तणहाछुहाकिलंतो कालगओ बंडुकिलेसेण ॥ १५ ॥
तेण य ससगणुकंपणसमुवज्जियपुन्नपगरिसवसेण । लहुईकयसंसारो संपइ जाओसि रायंसुओ ॥ १६ ॥
इय भो देवाणुप्पिय ! तइया पसुणावि जइ तहा तुमए । ससगजियरक्खणेणं बाढं दुक्खाइं सहियाइं ॥ १७ ॥

ता कीस वंभयारीण धम्मनिरयाण पवरसाहूणं । चलणाइघट्टणेणवि संपइ संतावमुच्चहसि ? ॥ १८ ॥
 सरथनिसायरधवले कुलंमि पडिवन्नमुज्झमाणस्स । किं सुंदर ! न कलंको होही आचंदकालंपि ? ॥ १९ ॥
 कइवयदिणसुहकजेण अज्जिऊणं पयंडपावभरं । किं कोइ भण सयन्नो अप्पाणं पाडइ भवोहे ? ॥ २० ॥
 इय एवंविहवयणेहिं भुयणदीवेण वीरनाहेण । पडिवोहिओ महप्पा मेहकुमारो सुणिवरिट्ठो ॥ २१ ॥
 जाओ सुनिचलमणो तहकहवि जिणिंदभणियमग्गंमि । जह दुक्करतवनिरयाण साहूण जिंदंसणं पत्तो ॥ २२ ॥
 तरसणुसट्ठिं सोचा संवेगकरिं पेरेडवि सुणिवसहा । सविसेसमणमत्ता पडिवन्ना संजमुज्जोगं ॥ २३ ॥
 अह अण्णंमि दिणंभी सोचा धम्मं जिणिंदमूलंमि । भववेरग्गमुयगओ रायमुओ नंदिसेणोडवि ॥ २४ ॥
 पवज्जापडिवत्तिं काउमणो सो य सेणियनरिंदं । जणणिं च बहुविहेहिं वयणेहिं पन्नेवेऊण ॥ २५ ॥
 जाव भुवणेक्कपहुणो पासे चलिओ पवज्जिउं दिक्खं । ताव य सो भणिओ देवयाए गयणट्ठियाए इमं ॥ २६ ॥
 भो भो कुमार ! विरमणु पवज्जागहणओ जओ अत्थि । अज्जवि तुह भोगफलं चारित्ताचारगं कम्मं ॥ २७ ॥
 थेवं कालं निवससु रागिहे ता कीस ऊसुगो होसि ? । सलहिज्जंति न कज्जाइं पुत्त ! अइरहसविहियाइं ॥ २८ ॥
 काले धिय कीरंतो ववसाओ कज्जसाहगो होइ । समयामावे सस्सं न फलइ अचंतसित्तंपि ॥ २९ ॥
 तत्तो कुमरेण भणियं देवि ! कीस तुममियं पयंपेसि ? । सयमेवणपडिवन्नं कहमिव उज्झामि विरइमइं ॥ ३० ॥

किं वा काही तंपिवि चारित्तावारंगं ममं कम्मं । कु(डु)स्सीलसंगरहियस्स गाढतवसोसियंगस्स ॥ ३१ ॥
इय तद्वयणं अवमण्णिऊण सिग्घं गओ समोसरणं । नवरं जयगुरुणाविहु पडिसिद्धो सो तहच्चेव ॥ ३२ ॥
तहविहु अइरमसवसा अभाविउं भाविरं विरइभंगं । सुवणगुरुणो समीवे निरवज्जं लेइ पव्वज्जं ॥ ३३ ॥
तो छट्ठमपमुहं कुणमाणो दुक्करं तवचरणं । जयगुरुणा सह विहरइ बहिया गामागराईसु ॥ ३४ ॥
पढइ विचि(वि)त्तं सुत्तं परिभावइ निच्चमेव य तदत्थं । गुरुणो मूले निवसइ परीसहे सहइ थिरचित्तो ॥ ३५ ॥
संजमनिसेवणपरो विसयविरागं परं परिवहंतो । आयावइ अणवरयं सुसाणसुन्नासमाईसु ॥ ३६ ॥
अह अन्नया कयाई एगल्लविहारपडिमपरिकम्मं । काउमणो स महप्पा जाए छट्ठस्स पारणगे ॥ ३७ ॥
भिव्वल्लहाए पविट्ठो एगोऽणाभोगदोसओ सहसा । वेसाए मंदिरंमी पयंपए धम्ममलाभोत्ति ॥ ३८ ॥
तो वेसाए सहासं सवियारं जंपियं अहो समण ! । मोत्तूण दम्ममलभं न धम्ममलाभेण मे कज्जं ॥ ३९ ॥
अहह कंहं हसइ ममंपि बालिसा संपयंपि(ति) चित्तिता । तेण तवल्लिणा नेवतणयमायड्डिऊण लहुं ॥ ४० ॥
अइपवररयणरासी निवाडिया एस दम्ममलाभोत्ति । भणिऊण य नीहरिओ तीए भणिओ य साणंदं ॥ ४१ ॥
भयवं ! उज्झसु दुक्करतवचरणं कुणसु मज्झ सामित्तं । इहरा चएमि जीयं पुणरुत्तं तीए इय वुत्तं ॥ ४२ ॥
भावियमईवि तवसोसिओऽवि विन्नायविसयदोसोऽवि । कम्मवसा भगमणो पडिवज्जइ तीए सो वयणं ॥ ४३ ॥

नवरं दस अहिंशो वा जइ नो वोहेमि अणुदिणं भवे । तो परिचएमि विसए विसंव इइ गिणहइ पइन्नं ॥ ४४ ॥
अह उज्झियमुणिवेसो चिंतितो देवयाए तं वयणं । जयगुरुणोऽवि निवसइ वेसाए गिहंमि स महग्गया ॥ ४५ ॥
मुंजेइ विसयसोक्खं धम्मकहाए य वोहिउं भवे । पवज्जागहणत्थं पेसइ पासे जिणिंदस्स ॥ ४६ ॥
अह अन्नया कयाई खीणे भोगप्फलंमि कम्मम्मि । वेरग्गावडियमई चिंतेउमिमं समाढत्तो ॥ ४७ ॥
तुच्छं सोक्खं तडितरलमाउयं भंगुरं च तारुन्नं । रोगविहुरं सरीरं दुल्लभां धम्मसामग्गी ॥ ४८ ॥
खंडियसीलाण निरंतरं च निवडंति दुस्सहदुहाइं । एवं ठिए न जुज्जइ संपइ मह निवसिउं एत्थ ॥ ४९ ॥
तो गंतुं जयगुरुणो पुणो समीवम्मि लेइ पवज्जं । आलोइयदुच्चरिओ विहरइ य समं जिणिंदेण ॥ ५० ॥
चिरपवज्जापज्जायपालणं भावसारमह काउं । सो नंदिसेणसाह मरिउं देवत्तणं पत्तो ॥ ५१ ॥
इओ य सो सुदाढनागकुमारदेवो नावारुढस्स भगवओ पुवं उवसगं काऊण आउयखयच्चुओ समानो समु-
प्पन्नो एगंमि रोरकुले पुत्तत्तणेण, दुड्ढिं गओ य संतो करिसगविचीए जीवइ, तंमि य पत्थावे सो जाव नियच्छेत्तं
लंगलेण करिसिउमारद्धो ताव पत्तो तं गामं सुवणेक्कंधवो जिणो, तओ भगवया तस्स अणुकंपाए पडिवोहणत्थं
पेसिओ गोयमसामी, गओ य तदंतियं, मणिओ य गोयमेण एसो-भइ ! किमेयं कीरइ?, करिसगेण भणियं-जं
कारवेइ एस हयविही, को वा अन्नो अम्हारिसाण कलाकोसल्लवज्जियाण जीवणोवाओ?, गोयमसामिणा जंपियं—

एवंविहगाढकिलेससंविदत्ताए भोयणविहीए । दिणगमणियं कुणंतस्स सुद्ध ! का चंगिमा तुज्झ ? ॥ १ ॥
किं वा सरीरसोक्खं संपज्जइ को य विसयवामोहो । किं वा सुचरियनिष्फायणं च संभवइ एवं च ? ॥ २ ॥
नो एयपरिचागो सुदुक्करो दिव्वसोक्खकंखीणं । तुम्हारिसाण जायइ जेणऽज्जवि किर महासत्ता ॥ ३ ॥
पउरमणिकणगरयणुक्कराइं तरुणीओ सुंदरे गेहे । मोत्तूण पन्नगंविव धन्ना लगंति धम्ममंमि ॥ ४ ॥
अन्ने पुण आकालियदुरंतदारिद्विहुयावि दढं । पावारंभपयट्ठा जम्मं सयलंपि वोळंति ॥ ५ ॥
ते अण्णत्थवि जम्मे तेहव पुणरुत्तदुक्खसंतत्ता । तल्लोविळिं पकुणंति थोवसलिलंमि मच्छोव ॥ ६ ॥
जइ पुण ते घरवाचारलक्खभागे व धम्मकज्जंमि । अब्भुज्जमंति रुंधंति निचुलं ता दुहदुवारं ॥ ७ ॥
किंच-एगत्तो संपज्जइ जहिच्छभोगोवभोगदुल्ललियं । धणमन्नत्तो सज्जणपसंसणिज्जा हि पव्वजां ॥ ८ ॥
एगत्तो छक्खंढाहिवस्स सेवा महानरिंदस्स । कीरइ अन्नत्तो पुण सुणिणो सद्धम्मनिरयस्स ॥ ९ ॥
सुंदर ! इमाओ दोन्नि उ गईउ लोयंमि सुप्पसिद्धाओ । एयाणं अन्नयरिं जे कुसला ते पव्वजंति ॥ १० ॥
ता वज्जसु कम्ममिमं धम्मं चिय सरसु तं महासत्त ! । दीणाण दुत्थियाण य एसो एक्को परं सरणं ॥ ११ ॥
इय गोयमेण भणिए सबइल्लं लंगलं च मोत्तूण । नमिउं चलणे सो भत्तिनिब्भरो भणिउमाढत्तो ॥ १२ ॥
भयवं ! विन्नाणविवज्जियस्स जइ जोगायत्थि मे काऽवि । ता देहि निययदिक्खं भववासाओ विरत्तस्स ॥ १३ ॥

इय वुत्ते से परियट्ठिणोवि सिरिगोयमेण पवज्जा । तक्खणमेव विदिन्ना वोहिन्नीयंतिकाऊण ॥ १४ ॥
 एवं तेण गहियदिक्खेण समं पयट्ठो गोयमसामी भगवओ अभिमुहं, अह जयगुरुणो चक्खुगोयरमुवागयस्स
 तस्स करिसगस्स तेण सीहभवावल्लियगाढेवरवेसण पम्हुट्ठा पवज्जापडिवत्ती जायपयंडकोवो य भणिउं पवत्तो-
 भयवं ! को एसो?, गोयमेण भणियं-अम्ह धम्मगुरू, तेण भणियं-जइ तुह एस धम्मगुरू ता मम तुमएवि न कज्जं,
 अलं पवज्जाएत्ति भणिऊण परिचत्तरयहरणो धाविऊण गओ खेत्तंमि, गहिया वलीवद्दा, उब्भीकयं लंगलं, पलङ्गो
 पुवपवाहेण खेडेउंति । गोयमसामीवि विम्हियमणो भयवंतं पणमिऊण भणिउं पवत्तो—

सुवणब्भुयभूयमहप्पभावपडिहणियपाणिगणपीड ! । जयनाह ! मए असरिसमिमज्ज पलोइयं चोळं ॥ १ ॥

जं सोक्खकरोवि हु तुज्झ दंसणे दूरओऽवि सो हल्लिओ । सूरस्स कोसिओ इव सोढुं तेयं अचाइत्तो ॥ २ ॥

सयमेव य पडिवन्नं पवज्जं उज्झिऊण संभंतो । अइसिग्घमन्नंकंतो सखेत्तहुत्तं परोट्टमणो ॥ ३ ॥

किर तुम्ह संकहावि हु जणइ अपुवं जणाण परितोसं । किं पुण चीतरुपमुहट्टपाडिहेरुम्भवं रूवं ? ॥ ४ ॥

अह जयगुरुणा भणियं गोयम ! सो एस केसरिस्स जिओ । जो किर तिविहुकाले मए दुहा फालिओ होंतो ॥ ५ ॥

तुमए मह सारहिणा निज्जविओ कोवफुरूफुरंततणू । सीहे सीहेण हए इचाईमडुरवयेण ॥ ६ ॥

तप्पच्चइएणं मइ दोसेणज्जवि स वेरमुवहइ । तेणं चिय तप्पडिचोहणडुया पेसिओ तंसि ॥ ७ ॥

इय पुव्वकम्मवसवत्तिजंतुकीरंतविविहवावारे । संसारे परमत्थेण किंपि नो विज्जाए चोज्जं ॥ ८ ॥
एवं गोथमं पच्चाइऊण सामी तामलित्तिदसन्नपुरवीभयचंपाउज्जेणिगयपुरकंपिळ्ळनंदिपुरमडुरापमुहेसु महानगरेसु
भवसत्तजणं पडिवोहिंतो पसन्नचंददसन्नभइउदायणसालमहासालपमुहं रायनिवहं पच्चाविंतो चंडपज्जोयारिमहण-
जियसत्तुपामोक्खं नरिंदवगं च सावगधम्मं ठवेंतो कइवयकालाणंतरं पुणो समागओ रायगिहं । तत्थ य—
कक्केयणीलयलोहियक्खपामोक्खरयणनिवेहेण । कुट्टिमतलं रइज्जइ सुरेहिं आजोयणमहीए ॥ १ ॥
मणिरयणजच्चकंचणकलहोयमया सुगोउरसणाहा । तिन्नेव निम्मविज्जंति तक्खणं पवरपागारा ॥ २ ॥
अब्भंतरंमि तेसिं विच्चित्तरयणोहरस्सिजडिलाइं । ठाविज्जंती सीहासणाइं जोगाइं जयगुरुणो ॥ ३ ॥
पुव्वदिसिक्खज्जसीहासणेसु तइलोयचिम्हयकराइं । कीरंति तिन्नि रूवाइं भुवणनाहस्स सरिसाइं ॥ ४ ॥
डुज्झंतगुरुधणसारसिल्हयामोयसुरहियदियंता । धूवघडीण समूहो पसुच्चइं सवपासेसु ॥ ५ ॥
मंदंदोलियकंकलिपल्लवो विधुयधयवडाडोवो । वित्थरंइ तित्थनाहाणुभावओ सीयलो पवणो ॥ ६ ॥
इय सुरगणेण सव्वायेरेण निवत्तिए समोसरणे । सिंहासणे निसण्णो पुव्वाभिमुहो जिणवरिंदो ॥ ७ ॥
जयगुरुपउत्तिविणिउत्तपुरिसपरिकहियजिणवरगमणो । अभयकुमाराइकुमारपरिबुडो सेणियनरिंदो ॥ ८ ॥
हरिसुस्ससियसरीरो वंदणवडियाए आगओ झत्ति । असुरसुरवाणमंतरताराहिवपमुहत्तियसावि ॥ ९ ॥

तिपयाहिणिऊण परेण भत्तिभारेण वंदिउं नाहं । सट्ठाणेसु निसीयंति ते य सद्धम्मसवणत्थं ॥ १० ॥
उप्पायपलयसत्तासमलंकियसयलवत्थुपरमत्थं । भद्धानं भवभयहरं तत्तो वागरइ भुवणगुरू ॥ ११ ॥
धागरमाणस्स य भुवणवंधुणो सुणियसयलभावोऽवि । भवजणवोहणत्थं गोयमसामी इमं भणइ ॥ १२ ॥
भयवं ! भवस्स पुणरुत्तजम्मजरामरणसोगपउरस्स । किं मूलकारणं जमिह नेव जीवा विरज्जंति ? ॥ १३ ॥
न य उज्जमंति तुह पायपउमपूयणपमोकखवावारे । नो देससव्वविरइओ भावसारं च गिण्हंति ॥ १४ ॥
भणियं जिणेण गोयम ! मिच्छत्तं अविरइं य मूलमिह । तदणुगया नो जीवा भवभमणाओ विरज्जंति ॥ १५ ॥
नो बहु मज्जंति जिणाहिंयं पि गिण्हंति नेव विरइं पि । मिच्छत्तमज्जमत्ता किं वा कुवंति नोऽकज्जं ? ॥ १६ ॥
जइ तेवि कम्मगंठिं सुनिट्ठुरं भिंदिऊण सम्मत्तं । पावंति कहवि ता भवसंवासाओ विरज्जंति ॥ १७ ॥
अब्भुज्जमंति जिणसाहुपूयणाइम्मि धम्मकज्जंमि । नवरं तेऽवि न विरइं धेत्तुं पारंति कम्मवसा ॥ १८ ॥
जं देसओवि सविसेसकम्मक्खयउवसमेण सा होइ । किं पुण पहाणसुणिजणकरणुचिया सव्वओ चेव ॥ १९ ॥
ता गोयमेण भणियं भयवं ! सम्मत्तरयणलाभाओ । अब्भहिंयं गुणठाणं एवं सइ विरइभावोऽयं ॥ २० ॥
ता सोहेसु जयगुरु ! पउरगेहवावावडमणाणं । संभवइ देसओविहु विरइं कहमिव गिहत्थाणं ? ॥ २१ ॥
तो जयगुरुणा कहियं पंचणहं तिण्ह वा चउण्हं वा । गहणे वयाण एगस्स वावि सा होइ निदोसा ॥ २२ ॥

गोयममुणिणा भणियं जइ एवं ता जिणिंद ! सदाइं । सोदाहरणाइं कहेह ताइं भेएहिं जुत्ताइं ॥ २३ ॥
 न तुमाहितो अन्नो भयवं एयं निंदसिउं सक्को । जं सवं सूरौच्चिय पयासिउं पभवए गयणं ॥ २४ ॥
 इय बुत्ते सिरिवीरेण धम्मपासायमूलखंभेण । भणियं गोयम ! निमुणसु सव्वमिमं परिकहिज्जंतं ॥ २५ ॥
 पंच उ अणुवयाइं गुणवयाइं च हौंति तिन्नेव । सिक्खावयाइं चउरो विरइए गिहत्यलोयस्स ॥ २६ ॥
 तत्थ य अणुवयाइं पढमं पाणाइवायवेरमणं । वयमवरवयपहाणं पाणाइवाओ य सो दुविहो ॥ २७ ॥
 चिन्नेओ बुद्धिमया सुहुमो थूलो य तत्थ पुण सुहुमो । एगिंदियजियविसओ थूलो बेइंदियाइगओ ॥ २८ ॥
 संकप्पारंभेहिं दुविहो थूलो य तत्थ संकप्पो । होइ हु उवेच्चकरणं आरंभो पयणकिसिपमुहे ॥ २९ ॥
 संकप्पोऽवि य दुविहो अवराहकरंमि निरवराहे य । जो हरइ देव(ह)दवं स सावराहोऽन्नहा इयरो ॥ ३० ॥
 एवं नाऊण इमं थूले अवराहविरहिए जीवे । संकप्पओ न घाएज्ज दुविहतिविहाइंभेएण ॥ ३१ ॥
 इय गहियजीववहविरइसुंदरो सावगोऽणुकंपपरो । अचंतं कोवेऽवि हु गोमणुयाइण न करेज्जा ॥ ३२ ॥
 बंधवहं छविछेयं अइभारं भत्तपाणवोच्छेयं । एए पंचऽइयारा जम्हा दूंसंति वहविरइं ॥ ३३ ॥
 एयाए दूसियाए विहलो सव्वोऽवि धम्मवावारो । कट्ठाणुट्ठाणंपिवि निरत्थयं रत्तरुन्नव ॥ ३४ ॥
 जं पाणिवहासत्तो सत्तो तं किंपि पावमायरइ । जेण निमेसंपि सुहं न लहइ नरयाइसु गइसु ॥ ३५ ॥

सवत्थवि सोवक्कममंइलहुयं आउयं समज्जिणइ । पियपुत्तविओगं वा पावइ हरिवम्मराउव ॥ ३६ ॥

गोयमसामिणा भणियं-भयवं ! को एस हरिवम्मरायाहिबो ? भगवथा जंपियं-गोयम ! निसामेसु, अत्थि इहेव भारहे वासे कुरुजणवए गयउरं नाम नयरं, तत्थ असंखदविणसंगओ दत्तो नाम माहणो परिवसइ, खवजोवणा-इगुणसंगया य सिरी नाम भारिया, सबकज्जेसु पुच्छणिज्जो पाणाइगेवल्लहो सबपसमसुस्सीलयाइगुणसंगओ नंदो नाम से बालमित्तो, सो य अचंतं कलयंठकोमलकंठो तहाविहवावारपरिसमत्तीए निगच्छिऊण निविजणंमि पएसे ठाऊण गंधवविणोयमायरइ, एवं च वचंति वासरा । अन्नया य दत्तस्स दिथवरस्स बाढं पाउब्भूया सिरोवेयणा, तच्चसेण य पणट्ठा रई वियंभिओ परितावो जायाणि नीसहाणि अंगाणि खलमहिलव चक्खुगोथरमइकंता निदा निच्छिण्णा भोयणवंछा तुट्ठा जीवियासा, एवंचिहं च विसमदसावडणं पेच्छिऊण तेणाहूओ नंदो, भणिओ य-अहो मित्त ! कुणसु किंपि उवाचं, सबहा वलवई सिरोवेयणा खुडइव लोयणजुयलं, मणांगंपि न पारेमि सुहसेज्जाग-ओवि चिट्ठिउं, जइ पुण कहवि मम निदामेत्तंपि होज्जा तो पच्चुज्जीवियं व अप्पाणं मन्नेज्जा, इय दीणं से वयणं निसामिऊण नंदेण भणियं-पियमित्त ! धीरो भव, परिचय कायरत्तणं, तहा करेमि जहा अकालक्खेवेण पगुणसरीरो भवसित्ति संठविऊण रयणिसमयंमि समारद्धं कागलीगेयं, जओ—

जह जह गेयनिनाओ पविसइ दत्तस्स सवणविवरंमि । तह तह निदावि विलज्जियव आगच्छए सणियं ॥ १ ॥

एवं च आगयाए निहाए पयुत्तो सो निबभरं, सा चेव भज्जा नंदस्स तेण सुइसुहकारिणा गेयवेण अवहरि-
यहियया तम्मणा जायत्ति, दत्तस्सवि परिगलंतीए रयणीए पण्डा सिरोवेयणा, संपत्ता सरीरनिवुइ, अन्नया रहंमि
सिरीए सपणयं भणिओ नंदो—

सुहय ! जहा नियमित्तस्स देहपीडा तए समवहरिया । मज्झंमि तहा संपइ अवहरसु सरीरसंतावं ॥ १ ॥
उज्जुयभावत्तणओ अवियाणिय से मणोगयं भावं । नंदेण जंपियमिमं-कत्तो ते सुयणु ! संतावो ? ॥ २ ॥
तीए भणियं—सुंदर ! सयमवि काउं तुमं न याणासि ? । किं सच्चं पयडिज्जउ ?, सो मणइ—कहसु, को दोसो ? ॥ ३ ॥
ताहे तीए सिद्धो कलगेयायन्नणाओ आरब्भ । सवो नियवुत्तं तो निबभरअणुरागसंबद्धो ॥ ४ ॥
आयन्निऊण एयं सुणिऊण य से असुंदरं भावं । नंदेणं सा भणिया कंहंमि एयं सुयणु ! वयसि ? ॥ ५ ॥
दूसिज्जइ निययकुलं अजसो य दिसासु जेण चित्थरइ । मरणेऽवि हु तं धीरा कहमवि नो संपवज्जंति ॥ ६ ॥
सुव्वंति य नरएसुं परदारपसत्तयाण सत्ताणं । विविहाओ वेयणाओ मयच्छि ! ता उज्जसु कुव्वंछं ॥ ७ ॥
इय पन्नविऊण बहुण्णयारवयणेहिं तं महाभागो । नंदो ठाणाओ तओ नीहरिओ सिग्घवेणेण ॥ ८ ॥

एसो य सयलवइयरो कडगंतरिएण निसामिओ दत्तेण, तओ चित्तिमणेण—अहो विणंठं कज्जं, जं मम महिला
नंदेण सद्धिं एवमुल्लवइ, मन्ने नंदो मं उवलविखऊण चित्तरक्खट्ठा सुद्धसमायारं अण्णाणसुव्वंसित्तो एवमुल्लविऊण

एत्तो ठाणाओ सिग्घमवक्कंतो, ता न जुत्ता उवेहा, जओ महिला पुरिसंतरखित्तचित्ता कयाइ अत्तणो मणोरहविग्घं
 संभाविकुण पइणो विसदाणाइणा विणासं करेज्जा, सयमसमत्था वा विडजणं विणासाय वाचारेज्जा, अओ जाव-
 ज्जवि न जायइ कोऽवि विणासो ताव वावाएमि एयं नंदं, न सबहा सुंदरो एस, कहमन्नहा एयाए सह रहसि
 ठाएज्जा?, किं न याणइ एसो सप्पुरिसाण चक्खुक्खेवोऽवि न जुज्जइ काउं परकलत्ते?, किं पुण निम्भरेपेमगम्भो
 परोप्परेमंगंतसंलावो?, एवं निच्छिऊण तस्स वावायणत्थं उवाए चित्तिउमारद्वो, सावि से भज्जा दुन्निगहयाए
 मयणवियारस्स अवजसनिरेक्खत्तणओ इत्थीसहावस्स गाढाणुरागसम्भावाओ दुल्लहजणंमि जत्थ जत्थ नंदं पासति
 तत्थ तत्थ लिहियच्च भंभियच्च विचेयणच्च निचला एतमेव अणिमिसाहिं दिट्ठीहिं पेच्छमाणा अच्छइ, तीसे य तहा-
 विहावलोयेण दत्तो बहुप्पयारं संतावमुच्चइ, नंदोवि सुद्धसीलयाए पुव्वप्पवाहेण मुक्कसंको तस्स सगांसमि पइ-
 दिणमुवेइ, अन्नया य अवगणिकुण पुव्वोवयारं, परिच्चइऊण चिरकालसंभवं सिणेहं, अविमंसिकुण जुत्ताजुत्तं, अणवे-
 क्खिकुण परलोयभयं तेण दत्तमाहणेण वीसत्थहिययस्स नंदस्स तालउडविससणाहो पणामिओ तंवोल्बीडओ,
 अविगप्पभावेण य गहिओ नंदेण, परिभोत्तुमारद्वो य ।

अह तंमि मुज्जमाणे अब्बुक्कडयाए विसविगारस्स । निन्नडुचेयणो झत्ति निवडिओ सो महीवट्ठे ॥ १ ॥

दत्तेणवि मायासीलयाए पणयं पयासमाणेण । पम्मुक्कदीहपोक्कं हाहारवगब्भणं रुन्नं ॥ २ ॥

मिलिओ य नयरलोगो कहिओ तेणावि तस्स बुत्तो । जह सहसच्चिय जीयं नीहरियमिमस्स अनिमित्तं ॥ ३ ॥
नयरजणेणं भणियं अलाहि सोगेण कुणसु कायवं । सच्छंदविलसिएसुं किं वन्निज्जइ कयंतस्सं ? ॥ ४ ॥

एमाइ जंपिऊणं नयरजणो पडिगओ संगेहेसु । दत्तेणवि से विहिओ सरीरसक्कारपमुहविही ॥ ५ ॥

एवं च वावाइयंमि तंमि पणट्टकुविगप्पो भज्जाए समं निप्पच्चवायं विसयसुहमणुहवमाणो कालं वोलेइ, अन्नया
य तीए समं वरिसयालंमि ओलोयणगओ जाव निवडंतजलधाराधोरीमणहरं गयणयलमवलोएइ ताव सहसच्चिय
तडयरारावभीसणा निवडिया तस्स सीसंमि कुलिंगमालापलीवियदिसामंडला विज्जू, तीए य तणपूलगो इव नि-
दड्डो दत्तो, मरिऊण य तइयनरयपुढवीए सत्तसागरोवमाऊ नेरइओ उववन्नो, तहिं च अणवरयदहणकुंभीपागसाम-
लिसाहारोहणकरत्तफालणवेयरणिनइप्पवाहणमोगरसंचुणणपमुहाइं तिकखडुक्खलक्खाइं निरंतरमणुभविऊण
आउयक्खंयमि तत्तो उव्वट्टिऊण मच्छकच्छपक्खिसरीसित्रपमोक्खासु तिरिक्खजोणीसु उववन्नो, तासुवि बहुकालं
चरिऊण पुणो पुणो नरगाईसु य उववज्जिऊण कहवि कम्मलाघवेण एगंमि पंचंतकुले जाओ पुत्तत्तणेणं, कयं च से
मंगलउत्ति नामं, तत्थ य जइवसाओ आरब्भ सो पसूओ तद्विक्खाओ चिय तंमि कुले पाउब्भूया विविहा
रोगायंका, ससुपन्ना विविहाणट्ठा, तओ तेहिं जणणिजणेगेहिं चिंतियं-अहो दुट्ठलक्खणाणुगओ एस अह पुत्तो ता
जाव न देइ अकाले चिय मरणं ताव पच्छन्नो चिय अडवीए नेऊण छडिज्जइ, जीवमाणामन्ने पुत्ता भविस्संति,

किमणेण विसहरसंघुणेणंति परिभाविऊण वरिसमेत्तवओ सुक्को एसो अडवीए, अह तेणप्पएसेण समागओ सिवो
 नाम सत्थनाथयो, दिट्ठो य तेण एसो, गहिओ अणुकंपाए, नीओ य वुट्ठिं । अन्नया य तस्स कम्माणुभावेण सो
 सत्थवाहो सधणो ससयणोऽवि अकालखेवेण खयं गओ, सो य भिक्खाविचीए अप्पाणं पोसंतो कमेण जीवण-
 मणुप्पत्तो, अन्नया य वसंतमासंमि पवरनेवत्थमणहरं नयरजं विलसंतं अवलोइऊण चिंतियमणेण-अहो नूनं महा-
 पावकारी अहं, कहमन्नहा समाणेवि मणुयत्ते इमे कथपुत्ता नायरया एवं विलसंति, अहं पुण पइदिणं लुक्खभि-
 क्खाकवलकलणेण निययउयरंवि(न) भरामि?, ता पज्जत्तं गिहवासेण, केरमि धम्मज्जणंति संचित्तिऊण गओ जल-
 णप्पभाभिहाणस्स तावसस्स समीवे, गहिया दिक्खा, काउमारद्धो य विविहं तवचरणं । एवं च अन्नाणतवेण
 उवज्जिया भोगा, अन्नदिवसे य पउरकंदमूलफलभक्खणेण समुप्पन्नं से पोट्टसुलं, तेण य अभिहओ मरिऊण
 वसंतपुरे नयेर हरिचंदस्स रण्णो अणंगसेणाभिहाणाए अगमहिसीए कुळिंसि पाउभूओ पुत्तत्तणेणं, पसूओ
 नियसमयंमि, कयं वद्धावणयं. पइट्ठियं च हरिवम्मोत्ति नामं, उम्मुक्कवालभावो य गहिओ कलाकोसलं परिणाविओ
 य अट्ट रायकन्नगाओ, अन्नया य जोगोत्ति कलिऊण हरिचंदराइणा महाविभूईए मंतिसामंतपउरजणसमक्खं उव-
 वेसिओ नियपए, जाओ सो महानरिंदो । हरिचंदरायाऽवि निव्विणकामभोगो गओ वणवासं, गहिया दिसापो-
 क्खगतावसाणं दिक्खा, परिवालेइ जहाभिहित्यं तेसिं धम्मंति । हरिवम्मरायावि जहाविहिपरिपालियपयइवगो

कालाणुरूपयद्वियनयमगो रजभरं समुद्वहइ, तस्स य विसयसुहमणुहवतस्स समुप्पन्नो पुत्तो, कथं च से हरि-
दत्तोत्ति नामं, तस्स य राइणो सयलरज्जवावारनिरुवणनिउणो असेसनीइसत्थवियक्खणो वेसमणो नाम अमच्चो,
सो य लद्धपसरत्तणेण एवं परिभावेइ-जइ किंपि अंतरं पावेमि ता इमं रायं वावाइऊण सयमंगीकरेमि रज्जं,
किमणेण साहीणेऽवि सामंते दासत्तकरणेण? तहावि केणवि उवाएणं एयस्स राइणो पढमं ताव पुत्तं विणासेमि
पच्छा एस सुहविणासो चेव होहित्ति परिभावेतो अवरंमि वासरे कहवयपहाणपुरिसपरियरिओ गओ उज्जाणं, उव-
विट्ठो तरुवरच्छायाए, अह खणंतरं अञ्छिऊण कवडेण सहसत्ति उट्ठिओ तट्टाणाओ भासमाणं च परियणं निवारि-
ऊण उट्ठसुहो निन्निमेसेण य चक्खुणा गयणमवल्लोइऊण परमविम्हयसुद्वहंतो नियपरियणं भणिउं पवत्तो-भो! भो!
किं निसामियं किंपि तुब्भेहिं एत्थ? तेहिं भणियं-सामि! किमिव? अमच्चेण भणियं-आगासे वचंतीहिं देवीहिं
इमं जंपियं-जहा एस राया नियपुत्तदोसेण मरिहत्ति, एवं च निसामिऊण अणुकूलभासित्तणं सेवगस्स धम्मोत्ति-
कलिऊण तयणुवित्तीए भणियं परियणेण-सामि! वाढं निसामियं, केवलममंगलंति काऊण पढमं चेव न कहियं,
जइ रे जणगणिद्विसेसस्स सामिसालस्सवि एवं होही ता पज्जत्तं मे जीविणंति वागरिऊण अमच्चेण आयद्विया
कज्जलपुंजसामलुम्मिलंतकंतिपडला खगधेणू, समाढत्तं कवडेण नियपोट्टवियारणं, तओ कहकहवि वला मोडिऊण
बाहुं परियणेण उद्दालिया खगधेणू, नीओ मंदिरं, उब्भडकवडसीलयाए य परिचत्तपाणभोयणसरिसक्कारो जरसि-

कडमंचए निवडिऊण ठिओ एसो असंसेपि दिवसं, वासरंते य अत्थाणीगंणं राइणा अमच्चं अपेच्छंतेण पुच्छिओ पडिहारो-अरे ! किं निमित्तं न आगओ अज्ज अमच्चो ? तेण कहियं-देव ! न सुणेमि सम्मं, राइणा भणियं-सयंपि गेहं गंतूण अमच्चं पुच्छसु अणागमणकारणं, तओ जं देवो आणवेइत्ति भणिऊण गओ पडिहारो, दिट्ठो जरसि-कडावडिओ सामवयणो अमच्चो, पुच्छिओ य अणेण-अमच्च ! किमकांडे च्चिय एवंविहमवत्थंतरसुवागओ सि ? साहेसु कारणं, उह अणागमणेण परितम्मइ नराहिवोत्ति बुत्ते दीहं नीससिऊण भणियमसच्चेण-भो पडिहार ! किं निरत्थएण पुद्दवुत्तंतविकत्थणेण ? एत्तियमेत्तमेव संपइ जंपियव्वं

जस्स पसाएण समगलोगपुजत्तणं समणुपत्तं । लच्छी चिरसुवभुत्ता तस्सवि हरिवम्मदेवस्स ॥ १ ॥

सुणिऊण असवणिज्जं विणाससंसूयगं तहावयणं । किं अज्जवि निल्लज्जं जीवियमहसुव्वहिस्सामि ? ॥ २ ॥

इमं च गाहाजुयलमुल्लविऊण पडेण वयणं समोच्छाइऊण ठिओ मोणेण अमच्चो, अह परमत्थं अवियाणमाणेण पडिहारेण पुट्ठो परियणो-अहो किमेवममच्चो वाहरइ ? तेहिं भणियं-पडिहार ! अज्ज उज्जाणगएहिं अस्सेहिं अ-मेच्चेण य गयणवाणी निसुणिया जहा देवो पुत्तदोसेण मरिहत्ति, तदायन्नणाणंतरमेव अमच्चो अप्पणो विणासं कुण-माणो महया किलेसेण निसिद्धो मरणब्भुवगमेण य अज्जवि भोयणं न कुणइत्ति, इमं च सोच्चा पडिहारेण भणियं-अहो ! अकित्तिमा पडुमत्ती, अहो ! असरिसं कयन्नत्तणं, अहो ! ससरीरनिरिवेक्खयत्ति, धुवं धन्नो एस हरिवम्मराया

जस्स एवंविहो अमच्चोत्ति वणिज्जण सो गओ नरिंदसमीवं, कहिओ य एंगंते सबो तवुत्तंतो, इमं च आयन्निज्जण अंचंतवल्लहयाए नियजीवियस्स उदयाओ पुवकयदुच्चरियाणं संबुद्धो नराहिबो, वाहराविओ अमच्चो, पुब्बिओ सच्चं जहावट्ठियवइयरं, कहिओ य अणेण, तओ राइणा भणियं-अमच्च ! किमियाणिं कालोचियं?, अमच्चेण कहियं-देव ! तुमहे चिय जाणह जमेत्थ उचियं, अहं पुण सयमेव सुणिज्जण देवस्स भाविणिं विसमावत्थं न सबहा जीवियमुच्चहिस्सांमि, जओ तुमह पायाण विरहे का अमह सोहा ? का वा पडुभत्ती ? किं वा सकज्जसाहणं ? ता अणुमन्नउ देवो, न एत्थ अन्नं वोत्तुं जुज्जइ अम्हाणंति, राइणा भणियं-अलं मरणेण, समायरसुजमिह जुत्तं, अमच्चेण कहियं-देव ! संकडमिमं, के तुब्भे ? को वा तुमह पुत्तो ?, अओ न किंपि काउं पारियइ, राइणा भणियं-जो देवीहिं विणासकारित्ति सिट्ठो सो पुत्तोऽवि परमत्थओ सत्तू चैव, ता समाएसेण तयणुरूवं करेज्जासु, अमच्चेण भणियं-देव ! एवंविहदुट्ठाण सासणे दंडवासियाण चैव अहिगारो, ता पसीयउ देवो तेसिमेव आएसदाणेणं, तओ निरुविओ राइणा कुमारविणासणत्थं दंडवासिओ, विणासिओ तेण, पहिट्ठो अमच्चो, कया भोयणाइया सरीरचेट्ठा, चित्तियं च तेण-निहओ एस एगो कंटयो, इयाणिं राया विणासणिज्जोत्ति ।

अह तंमि सुए वहिए नायरलोएण जंपियं एवं । हा हा अहो अकजं नरवइणा नूणमायरिं ॥ १ ॥
जं रज्जभरसमत्थो पुत्तो अविभाविज्जण परमत्थं । कुस्सुयनिसामणुगयभयवसओ मारिओ सहसा ॥ २ ॥

अच्छउ परेण कहिए तहाविहे दुन्निमित्तपमुहत्थे । सयमवि दिट्ठे कुसला जुत्ताजुत्तं वियारिंति ॥ ३ ॥ अन्नं च-
गहपीडामारीदुन्निमित्तदुस्सुमिणपमुहदोसगणा । देवाण पूयणाईहिं नूण सिग्घं उवसमंति ॥ ४ ॥
ता दढमणुचियमेयं कयं नरिंदेण धम्मपहवज्जं । गरुयाणं गरुउच्चिय उप्पज्जइ अहव सम्मोहो ॥ ५ ॥

इमं च सुयं कन्नपरंपराए राइणा, तओ पाउब्भूया अरई, उप्पन्नो पच्छायावो, पवह्ठिओ महासोगो, चत्ता रज्ज-
चिंता, इमं च परिभाविउं पवत्तो-अहो महापावोऽहं जेण मए एवंविहमकज्जमायरंतेण न गणिओ धम्मो, नावे-
क्खिओ अजसो, न अंगीकयं पोरुसं, नावलंबिया खंती, ता किमियाणिं परिचयामि रज्जं?, पविसामि जलणं? पव-
ज्जामि वा वणवासं?, केण वा कएण इमाओ पावाओ मोक्खो होहिंति चिंतमाणस्स राइणो पडिहारेण गंतूण
चिन्नत्तं-देव ! दुवारं नंदणुज्जाणपालगा समागया, ते य देवदंसणमभिलसंति, राइणा भणियं-लहु पवेसेह, एवं च
भणिए पवेसिया तेण, ते य निवडिया चलणेसु, विन्नविउमारद्दा-देव ! तुम्ह उज्जाणे भयवं अरिट्ठनेमी समोसढो,
ता वद्धाविज्जह तुम्हे तयागमणेणंति, इमं च सोचा चिंतियं राइणा-होउ ताव सोणेणं, तं च भयवंतं केवलालो-
यमुणियतिलोयचारं जहावित्तं पुत्तविणासेहउं दुन्निमित्तमापुच्छिऊण उचियं करिस्सामिति विभाविकुग पयट्ठो
जिणाभिमुहं । इओ य सो अमचो मुणियसव्वनुसमागमो पयडीमविस्सइ संपयं मज्झ कवडविलसियंति नियदुच-
रियसंकाए जच्चतुरंगममारुहिऊण जीवियमएण पलाणो वेणेण । रायावि गओ भयवओ समीयं, तओ वित्तंभंतल्ल-

संतहरिस्पसरो बहलरोमंचचियसरीरो भयवंतं तिपयाहिणापुव्वगं पणमिळण शुणिउमारद्धो । कंहंचिय ?—

जय नवतमालदलसामदेह, तुडु निम्मलगुणरयणोहगेह ।

अइदुजयनिज्जियकुसुमवाण !, जिण भवियहं दंसियसिद्धिडाण ॥ १ ॥

उत्तुंगपओहरहरिणनयणनवजोव्वणपव्वणचंदवयण ।

पइ उगगसेणसुय जेण चत्ता, तसु एक्कह तुह पर जयइ वत्त ॥ २ ॥

ओहामियसिंधुसमत्थरयणि, अवयरिए नाह ! जायवह भवणि ।

चिंतामणिंमि पइं समुहविजओ, सच्चं चिय जाओ समुहविजओ ॥ ३ ॥

आपूरियनिच्चरसंखघोस—संखोहियजयजण गयदोस ।

भुयपरिहंदोलियलच्छरमण !, सवायरेण सुरपणयचलण ! ॥ ४ ॥

तइलोक्कभवणनिम्मलपईव !, परमायररक्खियसयलजीव ! ।

भवि भवि जिणिंद ! तुडुं रिट्टुनेमि !, अम्हारिस लीयह होज्ज सामि ॥ ५ ॥

एय एवं थोऊणं पराए भत्तीए जयगुरुं नेमिं । हरिसियमणो नरिंदो तयणु निविट्टो महीवेट्टु ॥ ६ ॥

भयवयावि पयट्ठिया धम्मकहा, पडिबुद्धा बहवे पाणिणो, गहियनियनियसामत्थाणुरूवाभिगगहविसेसा गया य

जहंगयं । अह अवसरं सुणिऊण पुच्छियं राइणा-भयवं ! पुरा अमच्चेण जं अम्ह कहियं तं सच्चमलियं वा ? भयवया भणियं-अलियं, राइणा भणियं-भयवं ! किमेवंविहं तेणाकज्जमायरियं ? भयवया जंपियं-भो महाराय ! भोगत्थिणो रज्जत्थिणो परिवारत्थिणो पाणिणो किं किं पावं न करेंति ? किं वा मायामोसं न पयडेंति ? अहवा को तस्स दोसो ? पुव्वकयकम्माण चेव विलसियमिमं, सो पुण निमित्तमेत्तं चेव वरागो, राइणा जंपियं-भयवं ! किं मए पुव्वभवे एवंविहं पावमायरियं जस्स अणुभावेण अच्चंतवह्हस्स सुयस्स सहसच्चिय विणासं पडिवन्नो ? ,

ताहे जह पुव्वभवे महिलादोसेण दोसपरिहीणं । मित्तं विणासिऊणं समज्जियं पावमइगरुयं ॥ १ ॥

जह नारयत्तिरियभवेसु भूरिसो पाविऊण जरमरणे । कह कहवि माणुसत्ते लद्धे विहिए य बालतवे ॥ २ ॥

इह संपत्ते रज्जे जह मित्तविणासकम्मदोसेणं । जाओ पुत्तविणासो तह सवं भयवया कहियं ॥ ३ ॥

इमं च सोच्चा जायगाढभवभओ हरियम्मराया भणिउं पवत्तो-भयवं जह पाणाइवायस्स एवंविहो असुहो सहावो ता पज्जत्तं मम रज्जेण, गिण्हामि तुह समीवे पवज्जं जाव अभिसिंचेमि कमवि अत्तणो पयंमिन्ति वागरिऊण गओ नयरिं, निवेसिओ निययरज्जंमि भाइणेज्जो, सो य अमच्चो नाओ जहा पलाणेत्ति । तओ मोत्तूण य रायसिरि हरियम्मनराहिवो अणगारियं पडिवन्नोत्ति ॥

इय भो गोयम ! एसो पाणिवहाविरइमंतजंतूणं । पाउब्भवइ महंतो अणत्थसत्थो जओ तम्हा ॥ १ ॥

सद्यपयत्तेणं चिय संकप्पियपाणिघायवेरमणं । सग्गापवग्गसोकखाइं कंखमाणेहिं कायवं ॥ २ ॥ इइ पढममणुव्वयं ।
अह अलियवयणचिरईसरूवमेयं अणुव्वयं बीयं । भणिमो तं पुण अलियं दुविहं थूलं च सुहुमं च ॥ १ ॥
थूलं पंचवियप्पं कन्नागोभूमिनासहरणेसु । कूडगसक्खेलंमि य एसो इह नियमविसओत्ति ॥ २ ॥
कन्नागहणं दुपयाण सूयगं चउपयाण गोगहणं । अपयाणं दव्वाणं सव्वेसिं भूमिवयणं तु ॥ ३ ॥
इयरदुयग्गहणं पुण पाहन्ननिदंसणट्ठया भणियं । सुहुमं तु अलियवयणं परिहासाईसु नेयवं ॥ ४ ॥
थूलसुसावेरमणे एयंमि अणुव्वए पवत्तंमि । अइयारा पंच इमे परिहरणिज्जा सुसहेणं ॥ ५ ॥
सहसा अब्भक्खाणं रहसा य सदारमंतमेओ य । मोसोवएसणं कूडलेहकरणं च निच्चंपि ॥ ६ ॥
एयस्स पालणाऽपालणासु पयडा गुणा य दोसा य । दीसंति समक्खं चिय दिट्ठतो भायरो दोन्नि ॥ ७ ॥
ते य भायरो गोयम ! निसामेसु, एत्थेव भारहे वासे वडव्हनयरे पभाकरो नाम राया, सव्वत्थ विक्खायजसो
दुचालसविहसावयधम्मपरिपालणपरायणो जइजणपज्जुवासणवद्धक्खो परोवयारकरणाइगुणसहस्ससमलंकिओ
सच्चो नाम सेट्ठी, तस्स य इहलोगमित्तपडिबद्धो धम्माणुट्ठाणविरहिओ कणिट्ठो बलदेवो नाम भाया, सो य जाण-
वत्तेण परविसएसु गच्छइ, अन्नया य बहुलाभो हवइत्ति निसामिऊण गओ चोडविसए, चोडरायावि सच्चसेट्ठिणो
गुणनिवहं जणेण वन्निज्जमाणं सुणिऊणं तदंसणाणुरागरत्तो तन्भाउयं बलदेवं भणइ-सव्वहा मम दंसणत्थं सच्चसेट्ठिं

आणेजासित्ति, एवं च नरिंदारं पेच्छिऊण पडिपुयमणेण, कालक्केमेण नियमंदिरमुत्तागओ सच्चस्स परिकहेइ, अ-
 न्नया य चवलत्तणओ लच्छीए उदयत्तणओ अंतराइयकम्मस्स अप्पदविणो जाओ सच्चसेट्ठी, तओ तेण चोडविसयग-
 मणाय पुट्ठो पभाकरनरिंदो, अणुत्ताओ य तेण, तयणंतरं च उचियाइं महत्थाइं महग्वाइं विविहभंडाइं गहिऊण
 भाउणा समं गओ चोडविसयं सच्चसेट्ठी, तदागमणं च निसामिऊण तुट्ठो चोडराया, दयावियं निवासमंदिरं, पूइओ
 उचियपडिवत्तीए अत्तणो य समीवंमि धरिओ कइवयवासराइं, अह विणिवट्टिए भंडे गहिए सदेसपाउग्गे पडिभंडे
 चोडविसयाहिवइमणुजाणाविऊण समारूढो नावाए सच्चसेट्ठी,

अणुकूलपवणपेल्लियमहल्लयवडविवट्टियावेगा । गंतुं जवा पयट्ठा नियगुरहुत्तं तओ नावा ॥ १ ॥

तहियं आरूढा ते जाव पलोयंति कोउहल्लेण । अनिलुल्लंतकल्लोलभीसणं जलहिपेरंतं ॥ २ ॥

ताव नियतुंगिमाविहियिंझगिरिविब्भमो लहुं दिट्ठो । सलिलोवरिं वहतो अतुच्छदेहो महामच्छो ॥ ३ ॥

तं दट्ठुं वलदेवेण जंपियं एस पव्वओ एत्थ । इंताणं नासि जओ ता तुब्भे मग्गपब्भट्ठा ॥ ४ ॥

निजामगेहिं भणियं न पव्वओ एस किंतु मच्छोत्ति । सो चेव अयं मग्गो वामोहं कुणह मा सामि ! ॥ ५ ॥

वलदेवेण भणियं-अहं पुण इहं चेव विविहभंडपडिहत्थं जाणवत्तं हारेमि जइ मच्छो होजा, एवं च उभय-
 पक्खेहिवि सच्चसेट्ठिं सक्खि काऊण विहिया होइहा, ते य निजामगा पडिबेडएण गंतूण मच्छयपिट्ठिमि परिकल-

णत्थं तणपूलयपडलं पज्जालिउमारद्धा, सो य मच्छो तेण परितत्तसरीरो झडत्ति निबुद्धो अच्छाहे जले, एवं हारियं जाणवत्तं बलदेवेण, परितुट्ठा निज्जामगा, पत्ता य कमेण नियनगरं, तओ तेहिं पडिरुद्धं जाणवत्तं, समुत्तारिऊण तीरे सुक्को बलदेवो, पारद्धो अणेण झगडओ निज्जामगेहिं समं, जहा असच्चा इमे मच्छहारिणो चिलाया मए विजियत्ति काऊण आडंबरमुवदंसत्ति भणिऊण बला चेव भंडमुत्तारिउमारद्धो, निज्जामगेहिंवाहिया नरवइणो आणा, न ठाइ बलदेवो, तओ रायाणं उवड्डिया दोवि पक्खा, तेसिं च परोएपरं विवदंताणं परमत्थमवियाणिऊण भणियं रत्ना-अरे ! एत्थ ववहारे को सक्खी ?, निज्जामगेहिं भणियं-देव ! अत्थि चेव सक्खी, परं नियसहोयरमुवेक्खिऊण किं अम्हाणं सक्खित्तणं करिस्सइ ?, राइणा भणियं-को पुण सो ?, तेहिं भणियं-सच्चसेट्ठी, एवं वुत्ते एगंते ठाऊण पुन्निओ सो रत्ना कज्जपरमत्थं,

ताहे स सच्चसेट्ठी परिभावइ किं करेमि एव ठिए ? । जइ अवितहं न जंयेमि होइ ता मे वयकलंको ॥ १ ॥

जइ पुण जहेव वित्तं तहेव साहेमि ता लहू भाया । पावइ अणत्थमत्थो जाई हीरइ पसिद्धीवि ॥ २ ॥

ता दोन्निवि गरुयाइं आवडियाइं इमाइं कज्जाइं । एकंपि परिच्चइउं न तरामि करेमि किं इण्हि ? ॥ ३ ॥

अहवा इहलोयकए कहं च चिरकालपालियं नियमं । गुरुमूले पडिवन्नं जाणंतोऽहं विराहेमि ? ॥ ४ ॥

किं एत्तो अइपावं जं जाणंतावि भवअसारत्तं । पडिसिद्धेसुवि अत्थेषु मोहओ संपयदुंति ॥ ५ ॥

किं वहुणा ?-जइ पडइ सिरे वजं सयणोऽवि परंमुहो हवइ लच्छी । वच्चइ तहावि अलियं कहमवि नाहं वइस्सामि ॥ ६ ॥
 इति निच्छयं काऊण भणिओ सो सेट्ठिणा नराहिवो-जं इमे वरागा निज्जामगा जंपति तं सच्चं, मम भाया पुण
 अलियवाइत्ति, इमं च सोच्चा तुट्ठो राया चित्तिउं पयट्ठो-अहो अज्जवि एरिसा सच्चवाइणो दीसंति जे नियसहोयर-
 सिरीविणासेवि नियमज्जायं न चयंति, ता मंडिज्जइ एवंविहेहिं कलिकालेऽवि भूमिमंडलंति परिभाविऊण आहूया
 निज्जामगा, सरोसं तज्जिया य, जहाने दुरायारा ! जइ कहवि अमुणियपरमत्थेणं मम वणिएण तहाविहं जंपियं ता
 किं वयणछलेत्तेणवि अणेगभंडभरियवोहित्थं धेचुं उवट्ठिया ?, एवमाईहिं वयणेहिं निव्वमच्छिऊण किंचि दाऊण
 निद्धाडिया, दवसारंपि समप्पियं सच्चसेट्ठिस्स, वलदेवोऽवि भणिओ-मा पुण एवं करेज्जासु,

इय अलियवयणपरिहारकारिणो इह भवेऽवि जणपुज्जा । हुंति नरा परलोए लीलाए जंति निव्वाणं ॥ १ ॥ इइ वीयमणुवयं २
 भणियं वीयमणुवयमेत्तो तइयं अदत्तदाणवयं । साहिज्जइ सयलाणत्थसत्थनित्थारणसमत्थं ॥ २ ॥
 तं पुण दुविहमदत्तं थूलं सुहुमं च तत्थ सुहुममिणं । तरुछायाठाणाई अणुपुन्नायं भयंतस्स ॥ ३ ॥
 अइसंकिलेसपभवं जं निवदंडारिहं च तं थूलं । सच्चिचाइतिभेयं थूले गिहिणो हवइ नियमो ॥ ४ ॥
 एत्थ उ अप्पडिवन्ने जे दोसा ते जणेऽवि सुपसिद्धा । वहंचंधतरुछं वणसिरच्छेयाई चोराणं ॥ ५ ॥
 पडिवन्नेऽविहु एत्थं भवभयभीरुत्तणं परिवहंतो । सुस्सहो अइयारे पंच इमे वज्जइ सयावि ॥ ६ ॥

चोरोवणीयगहणं तक्करजोगं विरुद्धरज्जगमं । कूडतुलकूडमाणं तप्पडिरुवं च ववहारं ॥ ७ ॥
चोरिक्काउ विरत्ता कहंपि चोरोहिं संपउत्तावि । वसुदत्तोव न पावंति आवइं सुइसमायारा ॥ ८ ॥

गोयमसामिणा भणियं-भयवं ! को एस वसुदत्तो ? , जयगुरुणा कहियं-अव्वक्खित्तचित्तो निसामेसु, वसंतपुरे नयरे वसुदेवो नाम इब्भो, तस्स य वसुमिक्का नाम भारिया, तीसे य अवच्चं न होइ, तओ सा चित्तेइ-जइ अवच्चस्स कारणे एस मम भत्ता अन्नं परिणिस्सइ ता अहं गेहस्स असामिणी, अह अच्चंतनिब्भराणुरागरंजियमणो अन्नं न परिणेइ, तत्थ य मरणपज्जवसाणयाए एयस्स नरवरदाइदाईहिं हीरंते गेहसारे सविसेसं असामिणी चेव, अओ जइ कहवि मम पुत्तो हवइ ता सोहणं संपज्जइ, इमेण य अभिप्पाएणं सा अणवरयं देवयाणं उववाइयसयाणि पयच्छइ मंतंतवाइजणं चापुच्छइ । इओ य सोहम्मे कप्पे अरुणाभविमाणे महिद्धिओ विज्जुप्पभो नाम देवो, सो य पच्चा-सन्नचवणसमयत्तणेण अत्तणो पयइविवज्जासं पेच्छिऊण वक्खित्तचित्तो भयसंभंतो परिचित्तेइ—

कह रयणनियरउग्गाढपीढियादढनिबद्धमूलोऽवि । निच्चावड्डियरूवोवि कप्परुक्खो पंकपेइ ? ॥ १ ॥

सुंदरमंदारतरुप्पसूयमालाऽमिलाणपुवावि । कारणविरहेऽवि कहं पमिलायइ संपयं सहसा ? ॥ २ ॥

कह जच्चकंचणुड्ढामरोऽवि देहस्स कंतिपब्भारो । ताविच्छगुच्छसंछाइयव मालिन्नमुव्वहइ ॥ ३ ॥

कह वा भुयंगनिम्मोयनिम्मलाइंपि देवदूसाइं । कज्जलजलधोयाणिव अइकसिगाइं विभाविति ? ॥ ४ ॥

कह वा मम नयणजुगं सभावओ चिय निमेषपरिहीणं । देवत्तविरुद्धेवि हु निमीलणुम्मीलणे कुणइ ? ॥ ५ ॥
 कह अंतरंतरा पेच्छणाइयविखत्तचित्तमवि पावा । लद्धावसरच्चिय वेरिणिच्च विह्वइ मं निहं ? ॥ ६ ॥
 अचंतपेमपरवसचित्तोऽवि हु परिघणो कहमियाणिं । कइवयदिणदिहो इव न वयणमभिनंदए मज्झ ? ॥ ७ ॥
 ता सवहा न कुसलं तक्कमि अहं सजीविघवस । कल्लणकारिणो जेण होंति न कयाइ उप्पाया ॥ ८ ॥
 इय एवंचिहं चिंतासंताणुपन्नतिच्चपरिताओ । कप्पहुमोच्च वणदवपलीविओ भाइ सो तियसो ॥ ९ ॥
 एवं जाव सोगपमिलाणणो सिंघासणगओ अच्छइ ताव तस्स चेव पियमित्तो कणगप्पभो नाम देवो समागओ
 तं पएसं, तं च तहट्ठियं दट्ठूण चिंतियमणेण—कहं अज्ज पियमित्तो सुण्णचित्तलक्खोच्च लक्खीयइ ?, जओ अन्नवे-
 लासु दूराओ चिय मं आगच्छमाणं पलोइऊण सायरं सप्पणयं पढमालावासणप्पणामाइणा अभिणंदन्तो, संपयं पुण
 समीचसुवगयंपि न पचभिजाणइ, ता नूणं कारणेण होयव्वंति विभाविकुण भणिओ अणेण—भो विज्जुप्पभ ! किं चिं-
 तिजइ ?, उट्ठमवल्लोइऊण जंपियं विज्जुप्पभेण—भो वरमित्त ! कणगप्पभ इओ एहि, इमं च आसगमलंकारेहिहि हुत्ते
 उवविट्ठो एसो, पुच्छओ य अणेण वेमणस्सयाकारणं, कहिओ य विज्जुप्पभेण स निययवुत्तंतो, तओ कणगप्पभेण
 भणियं—पियमित्त ! सवहा न सुंदरमेयं, ता एहि तित्थगरस्स पुच्छामो, कहिं एत्तो तुह चुयस्स उप्पत्ती भविस्स-
 इत्ति, विज्जुप्पभेण भणियं—एवं होउ, तओ गया विदेहखेत्ते, वंदिओ तित्थगरो, सविणयं पुच्छओ य, जहा—भयवं !

कतथ अहं उववज्जिस्सामि?, भयवया भणियं-वसंतपुरे नयरे वसुदेवस्स वणिणो वसुमिच्चाए भारियाए गब्भंमि पुत्तो तुमे पाउब्भविस्ससि, एवं च निसामिऊण जहागयं पडिनियत्तो विज्जुप्पभो, अन्नंमि य दिवसे सिद्धपुत्तरूवं विउ-
च्चिऊण अवयरिओ वसुदेवणिहे, साइसओत्ति कलिऊण अब्भुट्ठिओ वसुमिच्चाए, पुट्ठो य-भो महाभाग ! जाणासि तुमं मम पुत्तो भविस्सइ न वत्ति?, देवेण भणियं-जइ तं पवयंतं न वारेसि अहं तथा करेमि जहा ते पुत्तो होइत्ति,
पडिस्सुयमणाए, अह कवडेण मंडलग्गपूयापुरस्सरं महया वित्थरेण देवयापूयं काऊण देवो भणइ-भहे ! अमुगंमि दिवहे विसिट्ठुमिणसूइओ पुत्तो ते गब्भे आयाही, तीए भणियं-तुम्ह पसाएण एवं होउ, देवो अहंसणमुवगओ,
अवरंमि य वासरे सो चविऊण उप्पण्णो तीसे गब्भे, जाओ कालक्कमेण, कयं वद्धावणयं, पइट्ठियं से वसुदत्तोत्ति नामं, उच्चियसमए य गाहिओ कलाकोसल्लं, नीओ य एगया साहूण समीवे, कहिओ य तेहिं दुवालसवयसणाहो
सावगधम्मो, पुव्वभवज्जिणवयणाणुरागरत्तत्तेण य परिणओ एयस्स, तओ पडिवण्णो भावसारं तेण, गहियाणि य दुवालसवि वयाइं, परिपालेइ य निरइयाराइं, अन्नया य सविसेसजायधम्मवासणाविसेसेण तेण पुच्छिया साहुणो
मुणिधम्मं, कहिओ य तेहिं । कहां चिय ?—

पंच उ महवयाइं गुत्तीओ तिन्नि पंच समिइओ । सीलंगसहस्साइं अट्टारस निरइयाराइं ॥ १ ॥

छुहतण्हापमुह परीसहा य बावीस वाढुविसहा । विणओ य चउब्भेओ अणिययवासो य सुत्ती य ॥ २ ॥

पिंडविसुद्धी सुत्तत्थचित्तणं गुरुकुले सया वासो । अणवरयं तवचरणंमि उज्जमो कोहचाओ य ॥ ३ ॥

गामकुलाइसु पडिबंघवज्जणं उत्तरोत्तरगुणेषु । अब्भुज्जमो य निच्चं वाढं संसारनिव्वेओ ॥ ४ ॥

जहठियजिणमग्गपरूवणा य सत्तेसु करुणभावो य । करणाण निग्गहो तह सत्तपरिभावणं निच्चं ॥ ५ ॥

इय आजम्मं सुंदर ! सुणिउं धम्मस्स (सुणिधम्मसमग्ग)साहणविहाणं । अच्चंतमपमत्तोहिं कीरमाणं सिवं देइ ॥ ६ ॥

एवं सुणीहिं कहिए संवड्हियगाढधम्मपरिणामो । वसुदत्तो भणइ लहुं भयवं ! मह देह पव्वज्जं ॥ ७ ॥

ताहे सुणीहिं भणियं जणणीजणगाणणुणवणपुव्वं । पव्वजापडिवत्ती जुज्जइ नेवडणहा काउं ॥ ८ ॥

ता सकुडुवं भोयाविऊण दिक्खं पवज्जसु जवेण । सण्णाणफलमिमं चिय जं चाओ सबसंगस्स ॥ ९ ॥

एवं सुणीहिं वागरिए गओ सो अस्मापिऊण सगासे, कहिओ नियचित्तपरिणामो, तेहिं भणियं—पुत्त ! सुत्तभोगो पव्वज्जं गिणहेज्जासि, अणुव्वयाइणा सावगधम्मेण ताव अत्ताणं परिकम्मेसु, तओ सो तेसिं अण्पत्तिवपरिहरणट्टया साहूण समीवे पढंतो गिहत्थवित्तीए चेव अच्छइ, पव्वजागहणनिच्छएण जोव्वणत्थोऽवि नेच्छइ परिणेउं, तं च तहाविहं पेच्छिऊण जणणीए भणिओ वसुदेवो—एस पुत्तो तवस्सिजणसंसग्गीए वासियहियओ नावेक्खइ विसयपडि-वत्तिं न मन्नइ दारपरिग्गहं नायरइ सरिरालंकरणं, ता पज्जत्तं धम्मियसेवाए, सबहा खिवसु एयं दुल्ललियगोद्धीए, जइ पुण तहाविहसंसग्गीए भावपरावत्ती जायइत्ति, पडिस्सुयमेयं सेट्ठिणा, तओ जे वाणियगा पुत्ता समाणजाइ-

वयविभवा ताण मज्झे मेलिओ एसो, ते य अच्चंतविसयगिद्धा दविणक्खयं कुणंतां पियेरहिं सिक्खविज्जंतावि दुहं-
तिंदियत्तणेण न तरंति नियत्तिउं, संगेहेसु य धणमलभमाणा चोरियं करंति । अन्नया य सुसणनिमित्तेण पलोइयं
तेहिं बहुधणधणसभिद्धं समिद्धजन्नजत्तागयतन्निवासिजणसमूहं विमुक्केक्कथेरीरक्खणं महेसरदत्तस्स मंदिरं, तओ
विज्जणंति काळण पयट्ठा रयणीए तं सुसिउं, सो य वसुदत्तो पुक्खरपत्तंपिव पंकत्तकलंकेण सुसाहुव्व कुसीलसंसग्गेण
न मणागंपि छिन्नो तेसिं कुसमायारेण, केवलं जणजिजणयाणुवित्तिमवलंबंतो रज्जुवद्धोव्व वसहो अमुणियपरमत्थो
चेव पट्ठिओ तेसिमणुमग्गेणं, ते य सणियं सणियं तस्स महेसरदत्तस्स गिहे पविसमाणा वसुदत्तेण पुच्छिया-भो
किमेत्थ तुम्हे पविसह ? तेहिं भणियं-भह ! चोरियाए एत्थ पविसिस्सामो, सुसमाहियचरणवयणवाचारो तुमं
एज्जाहि, तेण भणियं-नाहमिहमागमिस्सामि कुणह जं भे रोयइ, इइ भणिऊण ठिओ सो वाहिं चेव, ते पविट्ठा
भवणब्भंतरे, सुणिया य थेरीए, तओ सा पायवडणच्छलेण ते सुसंते मा पुत्ता ! एवं करेहिति भणंती मोरपि-
च्छतेण चलणेसु लंछेइ ।

वसुदत्तो पुण चिंतइ पेच्छह अम्मापिऊण मूढत्तं । जं एवंविहुस्सीलमज्झयारे खिवंतोहिं ॥ १ ॥
नो तेहिं चिंतियमिअं जह पावजणस्स संगइवसेण । जायइ गुणपरिहाणी पडंति विविहावयाओवि ॥ २ ॥
सयमवि पावपओयणपसाहणब्भुजओ इमो जीवो । किं पुण कुमिच्चसंजोगसंभवंतासुहसहावो ॥ ३ ॥

ता परिचएमि एए वचामि समंदिरंमि एत्तोहे । दुन्नयपरनरजोगे मरणंपि हु आवडइ जेणं ॥ ४ ॥

अहवा गुरुवयणं लंघिऊण गेहंमि वच्चमाणस्स । संपज्जइ दुव्विणओ तम्हा जं होइ तं होउ ॥ ५ ॥

इति परिभाविंतस्स ते सयलं गेहसारं सुसिऊण नीहरिया मंदिराओ, गया उज्जाणे, विविहप्पयारेहिं कीलि-
उमारद्धा, वसुदत्तोऽवि गुरुवयणरत्नसुंदानिओ अचंतविरागमुव्हंतो तेसिमेव समीवे चिट्ठइ, एत्थंतरे समुग्गयं मायं-
डमंडलं, विहडियं तमकंडं, सा य थेरी पाहुंडं गहाय गया नरवइसमीवे, कहिओ सयलो जहावित्तो रयणिवइयरो,
राइणा भणियं-अचंतगंभीरयाए नयरस्स को वा कहिं वा नजिही?, तीए भणियं-देव ! ते मए सबेऽवि मऊर-
पिच्छेण पाएसु अंकिया अच्छंतित्ति वुत्ते राइणा आणत्ता सबत्थ पुरिसा, सुनिऊणं गवेसंतेहि य तेहिं उज्जाणसं-
ठिया दिट्ठा ते सबेऽवि, उवलक्खिया इंगियागारेहिं, उवणीया य नराहिवस्स, तेणावि वाहराविया थेरी, तीएवि वसु-
दत्तं विमोत्तूण अन्ने परिकहिया चोरत्तणेणंति, रत्ता भणियं-कहमेसो चोरमंडलीमज्झगओऽवि न चोरो, थेरी भणइ-
न चलणेसु लंछिओत्ति, राइणा भणियं-जइ अदुट्ठो ता सुयह एयं, वसुदत्तो भणइ-देव ! कहमहं दुट्ठसंसग्गीएवि
न दुट्ठो जं समावि न कुणह निगहं, रत्ता कहियं-भइ ! जइ एयंपि जाणसि ता कीस दुट्ठसंसग्गिं मूलाओ चिय
न उज्जेसि?, तेण भणियं-देव ! दिव्वं पुच्छह, एत्थंतरे सुणियजहावट्ठियतवइयरेण भणियमेगेण पुरिसेण-देव !
एस पवजं पडिवज्जिउकामो भावपरावत्तिनिमित्तं अम्मापियरेहिं सिणेहाणुवंधकायरेहिं संपयं चेत्त दुल्ललियगेट्ठीए

पक्खित्तो, ता तदणुरोहो चेव एयस्स अवरज्झइ, एवं निसामिऊण तंबोलाइदाणेण सम्मानिऊण पेसिओ सगिहं, इयरे पुण दुक्खमारेण मारियत्ति ।

इओ य सुणिसमुच्चियविहारेण भवियपडिबोहमायरंता अप्पडिबद्धावि जिणाणाए पडिबद्धा दुरणुचरतवचरण-पज्जालियकम्मवणावि सव्वसत्तसुहकारया समोसढा विजयसिंहाभिहाणा सूरिणो, जाया य तियचउक्कचचरेसु हरि-सभरनिब्भरस्स जणस्स अवरोप्परसुछावा अहो ! अगाहभवोहनिवडंतजन्तुगणजाणवत्ता सिवसुहपसाहणासत्ता भयवंतो सुग्गहियनामधेज्जा सूरिणो इह समोसरिया, तहाविहाणं नामसवणमेत्तंपि पावपब्भारपणासणसमत्थं, किं पुण बंदणनमंसणं ?, अओ गच्छामो देवाणुप्पिया ! तेसिं बंदणत्थं, एवं च सोच्चा गंतुं पयत्ता सूरिसमीवे नायरया । सो ग वसुदत्तो राइणा पेसिओ समाणो गओ निययेगेहे, कहिओ जणणिजणगाण पुव्ववइयरो जहा तुम्ह कूडवच्छेणेण अहं अज्ज अकयधम्मो चेव विणासिओ होतो, ता कीस सिणेहवच्छेणेण अणत्थपत्थारीए, संखिवह जं न सुयह धम्मकरणायत्ति तुत्ते अणुन्नाओ सो जणणिजणगेहिं, गओ सूरिणो पासे, गहिया पव्वज्जा, तओ एगं-तधम्मकम्मज्जओ जाओत्ति ।

इय इंदभूइ गोयम ! विमुक्कचोरिक्कपावठाणाणं । मणुयाण उभयलोगेऽवि जीवियं जायए सफलं ॥ १ ॥ इइ तईयमणुव्वयं । कहियं तइयमणुव्वयमेत्तो मेहुणनिवित्तिनिप्फणं । मणइ चउत्थमणुव्वयमवहियचित्तो निसामेसु ॥ १ ॥

तं मेहुन्नं दुविहं सुहुमं थूलं च तत्थ सुहुममिमं । कामोदएण ईसिं जमिंदियाणं विगारोत्ति ॥ २ ॥
थूलं पुण संभोगो मणाइचेट्ठा व भोगकामस्स । तं पुण दुविहं नेयं ओरालविउव्वमेएणं ॥ ३ ॥
ओरालियं तु दुविहं माणुसतेरिच्छभेयओ होइ । वेउव्वं पुण दिव्वं माणुसयंपि य वयं तिविहं ॥ ४ ॥
परदारवज्जनं वा सदारतोसो य वंभचेरं वा । तत्थ य दिव्वतिरिक्खं मेहुन्नं पारदारं च ॥ ५ ॥
जो परिहरइ सुसट्ठो निचलचित्तो सुधम्मपडिवद्धो । सो तच्चिरओ एसो निर्इयारट्ठया सम्मं ॥ ६ ॥
वज्जेइ इत्तरियपरिगहियागमणं अणंगकीडं च । परवीवाहक्करणं कामे तिवाभिलासं च ॥ ७ ॥
किंच-असुइव्वभूएसुं निंदिएसु पज्जंतदुहविवागेसु । कामेसु केऽवि धन्ना निसग्गओ च्चिय विरज्जंति ॥ ८ ॥
अन्ने पुण उव्वमडमयणत्ताणनिब्भज्जमाणसव्वंगा । अगणियजुत्ताजुत्ता अविभावियनियतणुविणासा ॥ ९ ॥
पररमणीसु परिभोगलालसा सुक्कलज्जमज्जाया । तज्जम्मे च्चिय पायंति आवयं किं पुणऽन्नभवे ? ॥ १० ॥ जुम्मं ।
अवरे य तहाविहगुरूवएसओ जायनिम्मलविवेया । परजुवईणं संगं विवज्जमाणा पयत्तेण ॥ ११ ॥
तच्चिरइमेत्तउच्चिय वट्ठतविसुद्धधम्मपडिवंधा । होति सिवनयरनिलया सुरिंददत्तोव्व नरवसहा ॥ १२ ॥ जुम्मं ।
गोयमेण जंपियं-तइलोक्कदिवायर ! को एस सुरिंददत्तो ? कहां वा एयस्स गुरूवएसओ विवेयलाभो ? कहां च पर-
दारचिरइमेत्तेणवि से निव्वाणसंपत्तित्ति ? , जयगुरुणा वागरियं-निसामेसु । इहेव भारहे वासे नीसेसवसुधराभोगभूसणं

रणंतमणिकिंकिणीमणहरवेजयंतीचिराइयसुरमंदिरसमुत्तुंगसिंगं सिंगारुम्भडरूवरामागणोवसोहिंयं विजयपुरं नाम नयरं, तर्हि च समगनरिंदवगपणयसासणो सिवभदो नाम नराहिवो, सयलंतेउरप्पवरा रायसिरी नाम से भारिया, तेसिं च देवकुमारोवमरूवो धणुवेयपमुहकलाकोसल्लपडिहत्थो सुरिंदत्तो नाम पुत्तो, सो य पुवभववालगिलाण-गुरुथेरतवसुसियसुणिजणवेयावच्चावजियपुन्नपब्भारवसविढत्तगाढसोहगोदएण पढमुम्मिलंतजोवणगुणत्तणेण य अच्चं ताभिरामसरीरो जत्थ जत्थ परिब्भमइ तत्थ तत्थ परिचत्तवावारंतराहिं अवगणियगुरुजणलज्जाहिं अणवेक्खियकु-लाभिमाणाहिं नयरनारीहिं अणमिसच्छीहिं पिच्छिज्जइ, वाढमब्भत्थिज्जमाणो य सेट्टिसत्थवाहप्पहाणजणजुवइहिं सद्धिं सद्धम्मपरम्मुहो अभिरमइ य, लोगोवि एयमत्थं जाणमाणोऽवि जे चैव रक्खगा तेऽवि लुंपगत्ति चिं-तंतो न किंपि जंपइ ।

अन्नया य नयरंमि जाओ अच्चंतचोरोवह्वो, तओ पउरजणेण साहिंयं नरिंदस्स, तेणावि तल्लिओ आरक्खिगो, कया य सच्चप्पएसेसु जामरक्खगपरिखेवा, रयणीए सुत्तपमत्तारक्खिगनिरिक्खणत्थं कयवेसपरावत्तो पाणिपरिग्ग-हियक्खगो एगागी सयमेव निग्गओ गेहाओ तियचउक्कचच्चाइसु परिब्भमिउमारद्धो य, तहा भमंतस्स य रण्णो विजणंति पढियमेगेण थेरपुरिसेण—

चोरोहिं गेहसारी, हीरइ कुमरेण नयरतरुणिजणो । एवंविहरक्खाए नरिंद सिवभद ! भइं ते' ॥ १ ॥

पट्टिट्टिओ य राया सोचेंमं से गओ समीवंमि । अचंतविस्वियमणो सणियं भणिउं पवत्तो य ॥ २ ॥
 भो कहसु पडियगाहापरमत्थं तेण जंपियं सुहय ! । रायविरुद्धकहाए तीए किं मज्झ कहियाए ? ॥ ३ ॥
 रत्ता वुत्तं सच्चं एवमिमं किं तु एत्थ एगंते । साहिज्जंतीएवि हु न कोऽवि दोसो अओ कहसु ॥ ४ ॥
 तो तेण समग्गो नयरतरुणिविसओ कुमारवुत्तंते । चोरोवद्वसहिओ कहिओ सिवभद्दनरचइणो ॥ ५ ॥
 अह तं निसामिऊणं पलयानलभीमकोवरत्तच्छो । आवडुब्भडभिउडी राया एवं विचिंतेइ ॥ ६ ॥
 अहह ! महंतमकज्जं पावेण सुएण मज्झ आयरियं । हरिणंकनिम्मलं पि हु कुलमेवं मइलियं जेण ॥ ७ ॥
 ता किं अहुणच्चिय कंधराए धरिऊण तं महापावं । निद्धाडेमि पुराओ ? किं दुव्वयेणेहिं तज्जेमि ? ॥ ८ ॥
 अहवा मंतीहिं समं सम्मं वीमंसिऊण तस्सुचियं । पकरेमि जेण सहसा कयाइं दूमेंति कजाइं ॥ ९ ॥

इय चिंतिऊण राया गओ निययभवणं, पसुत्तो सुहसेजाए, जाए य पभायसमए वाहराविया मंतिणो, सिद्धो
 य तेसिं रयणिवुत्तंते, मंतीहिं भणियं-देव ! अम्हेहिं पुंघपि कुसमायावत्ता निसामिया आसि, परं न कोऽवि सो
 अवसरो जाओ जत्थ तुम्ह कहिजइ, रत्ता जंपियं-होउ ताव समइकंतत्थविकत्थेण, संपयं साहेह, किमेयस्स
 दंडं निवत्तेमो ? , मंतीहिं वागरियं-देव ! अलं दंडेण, एत्तियमेत्तमेव जुत्तं तुम्ह काउं जमेसो निज्जइ सुसाहुसमीये,
 सुणाविज्जइ धम्मसत्थाइं, पढाविज्जइ रायनीई, उववेसाविज्जए विसिद्धगोहीसु, एवमवि होही एयस्स कुसमायाव-

परिचायपरिणामो, पडिवन्नं रत्ना, बाहराविओ कुमारो, तेण य समेओ गओ धम्मसेणसूरिणो समीचे, तं च वंदिऊण निसन्नो उचियट्ठाणंभि, सूरिणाऽवि पारद्धा धम्मकहा ॥ कहं?—

भो भो देवाणुपिया! जइ वंछह सिवसुहाइं उवलडुं । ता मोत्तूण पमायं जिण्णिदधम्मंमि उज्जमह ॥ १ ॥
तं नो कुणंति अहिमरविसहरिणारिवेस्विआयाला । अचंतं कुचियाविहु जमिह पमाओ महापावो ॥ २ ॥
सो पुण पंचवियप्पो नेयवो निवुइपरिहरूवो । मइरा-कसाय-निहा-विगहा-विसयाण गहणेण ॥ ३ ॥
मइरापाणपरव्वसमणपसरो जुत्तमियरमसुणंतो । तं नत्थि नूण पावं जं जीवो नो समायरइ ॥ ४ ॥
एत्तो चिय सुरकयकणयपवरपागारगोउरावि पुरी । बारवइ जायवसंकुलावि मञ्जुसुहं पत्ता ॥ ५ ॥
पज्जंतकयविसाया महापिसाया व दिन्नअववाया । जणियदुरज्झवसाया न होंति सुहया कसायावि ॥ ६ ॥
एएहिं निहयमइणो जं जीवा चरियदुक्करतवावि । करडुक्कुरुडुव सत्तमनरयपुढवीए निवडंति ॥ ७ ॥
निहापमत्तचित्तावि पाणिणो पाउणंति न कयावि । सुयनाणघणं पत्तंपि कहिंवि हारिंति धीरहिआ ॥ ८ ॥
तेणं चिय चउदसपुद्धिणोऽवि निन्नट्टपवरसुयरया । मरिउं कालमणंतं अणंतकाएसुवि वसंति ॥ ९ ॥
मोत्तूण निययकिच्चं भोगणदेसिस्थिरायसंवद्धा । कीरंति जेहिं विकहा कह नो ते दुक्खिया होंति? ॥ १० ॥
कहवा न बालिसेणवि अच्चगलजंपिरत्ति गहिलत्ति । किच्चिज्जंती? मणुयत्तणेऽवि को वा गुणो तेसिं? ॥ ११ ॥

सेविज्जंता जमणिट्टकारिणो ते धुवं किमच्छरियं । सुमरणमेत्तेणंपिवि दित्ति दुरंतं भवं विसया ॥ १२ ॥
 विसयाण कए पुरिसा सुदुक्करंपिवि कुणंति ववसायं । आरोवेत्ति य संसयतुलाए नियजीवियवंपि ॥ १३ ॥
 चिरकालपालियंपि इ कुलमज्जायं चयंति तव्वसगा । सव्वत्थ वित्थरंतं अवजसंपंसुपि न गणंति ॥ १४ ॥
 वंचंति सयणवग्गं तणं व मन्नंति निययजणगंपि । धम्मोवएसदायगमवहीरंती गुरुजणंपि ॥ १५ ॥
 पहसंति विरागिज्जणं विसिट्ठगोड्ढिं चयंति दूरेण । वंछंति नेव सोउं सणकुमाराइचरियाइं ॥ १६ ॥
 इय ते त्रिसयमहाविसवामूढमणा मणागमेत्तंपि । नेव्वुइमपावमाणा पावेसु वहुं पसज्जंति ॥ १७ ॥
 वाहिरवित्तीए तहाविहेसु धम्मेसु संपवत्तावि । पंचगिगपसुहदुक्करतवसंतावियसरीरावि ॥ १८ ॥
 कम्मवसेणं अप्पुण्णविसयवंछा विणस्सिउं पाया । निवडंति दुग्गईए भागवयसुहंकरमुणिच्च ॥ १९ ॥
 इय पंचविहपमायं एवंविहदोसदूसियं नाउं । नरनाह ! तेदगमणो जिणिंदधम्मंमि उज्जमसु ॥ २० ॥
 एवं सूरिणा उवइहे पमायप्पवंचे सुरिंदत्तकुमारो जायनिम्मलचित्तपरिणामो भणिउं पवत्तो-भयवं ! को एसो
 पुवकहियसुहंकरमुणी ? कहं वा अपुण्णविसयवंछो सो मरिउं दुग्गई गओत्ति साहेह ममं, सूरिणा भणियं-साहेमि ॥
 मालवविसए चिक्खायजसा चक्कपुरी नाम नयरी, तहिं च अणेगवणियजणचक्खुभूओ पभूयदव्वसंभारो सोम-
 दत्तो नाम सेट्ठी, तस्स सत्तण्हं पुत्ताणं कणिट्ठिया अणेगोवजाइयसयसंपसया देवसिरी नाम धूया, सा य अच्चंत-

रूचा संपत्तजोवणावि तहाविहवराभावेण कालं वोलेइ, इओ य तीए नयरीए अहूर उच्छलंतमहछकछोलविदलिय-
कूलाए अणेगविहगकुलकलयलाउलदियंतराए जमुणामहानईए उत्तरपुरत्थिमदिसिविभागे वेयपुराणभारहरामा-
यणवक्खानानाणविन्नाणनिउणो नियदरिसणत्थवित्थारणपवणो सच्चत्थ विक्खायजसो नीसेसभागवयमुणिपहाणो
सुहंकरो नाम लोइयतवस्सी परिवसइ, सो य तवेण य वयणसोहग्गेण भविस्सजाणणेण य जणसम्मयत्तेण य सयलस्सवि
नयरजणस्स वाढं पूयणिज्जो, अन्नया य तेण सोमदत्तसेट्ठिणा गुणगणावज्जियहियएण निमंतिओ सो भोयणक-
रणत्थं नियमंदिरे, गाढतव्वयणाणुरोहेण य कइवयसिस्सपरियरिओ संपत्तो भोयणसमयंमि, सपरियेण परमभत्तीए
नमंसिओ सोमदत्तेण, सम्मज्जिओवलित्तंमि भवणभागंमि द्वावियं से आसणं, तहिं च निसन्नो एसो, सेट्ठिसुएहिं
कयं परमाथरेण चलणपक्खालणं, अणेगकलहोयमयकच्चोलसिप्पिसंकुलं च पइट्ठियं पुरओ परिसलं, सेट्ठी य सयमेव
निब्भरभत्तिभरतरलियचित्तो नाणाविहवंजणसणाहं पउरखंडखज्जयाइमणहरं रसवइं परिवेसिउं पवत्तो, सावि सेट्ठि-
धूया देवसिरी रणंतमणिनेउरारावमुहलियदिसावगासा हारद्धहारकुंडलकडयअंगयरसणापमुहाभरणभूसियसरीरा नि-
यंसियपवरपट्टणुगगयदिव्वचीणंसुया कणयंदंडतालविंदमादाय तस्स भोयणं कुणंतस्स वीजणत्थमुवट्ठिया, एत्थंतरे
साहिलासं तं पलोइऊण सुहंकरतवस्सी तक्कालवियंभमाणमयणहुयवहपलित्तहियओ विभाविउमारओ । कइं ?—

सुसहा पन्नगपम्मुक्कफारफोकारजलणजालोली । उब्भडकोदंडविक्खत्तत्तिक्खनारायराइवि ॥ १ ॥

न उणं इमीए एए कुत्रलयदलीहरिच्छिविच्छोहा । सोढुं सका निक्किमयरद्धयभावसंयलिया ॥ २ ॥
 रइरंभाहरिदइयातिलोत्तमापमुहदिवनारीओ । मन्ने इमीए रुवेण लज्जियाओ न दीसंति ॥ ३ ॥
 विन्नाणं ज्ञाणं सत्थकोसलं देवयाण पूया य । विहलं सर्वेपि इमं जइ एयमहं न पावेमि ॥ ४ ॥
 केवलमुवायओ संगमेऽवि एयाए कहवि दिववसा । सवत्थ वित्थरंतो अवन्नवाओ दुसंरोहो ॥ ५ ॥

अहवा किमणेण ?-हरिहरहिरणगन्भा वसिहुजमदग्गिवा(चा)सुद्धासा ।

हरिणच्छिवयणनिदेसकारिणो जइ पुरा जाया ॥ ६ ॥

ता किं अरुहारिसमुणिजणस्स सुद्धुवि विसिहुधम्मस्स । लज्जा वयणिजं वा ? ता पज्जत्तं विगप्पेहिं ॥ ७ ॥ जुम्मं ।
 तह कहवि केरेमि जहा इमीए सद्धिं समागमो होइ । इय निच्छिऊण गंभीरभावमब्भुवगओ एसो ॥ ८ ॥

आगारसंवरं च काऊण जहापउत्तनाएण भोचुं पवत्तो, अह तक्कालवियंभियमयणगुरूवएसवसओ इव जाया से
 बुद्धी, जहा विप्ययारेमि एयं सेट्ठिं, जेण वयणिज्जविरहिओ एयाए लाभो हवइत्ति, एवं संपेहिऊण सेट्ठिणो पलोय-
 माणस्स दुरसहदुक्खावेगसंसूयगो विमुक्को अणेण सिक्कारो, ससंभमेण निरुव्विओ सेट्ठिणा, खणंतरंमि य गए पुणोऽवि
 पुवक्कमेण पयडियलोमुद्धोसनिम्भरे सवयणभंगभासुरे दोचं तचं च विमुक्कंमि सिक्कारे अहो किंपि अचंतमणिहुमावडि-
 हित्ति विभावितो जाव सेट्ठी अच्छइ ताव सो मुहसुद्धिं काऊण समुद्धिओ भोगमंडवाओ, उगविट्ठो अन्नत्थ, सेट्ठीवि

कज्जसेसं काऊण समागओ तस्सभीयं, निवडिओ तस्स चलणेसु, जोडिय करसंपुडं च भणिउमाढतो-भयवं! पसायं काऊण साहेह, किं कारणं भोयणं कुणंतेहिं तुमेहिं तिवंबुत्तो दुस्सहदुक्खावेगसूयगो इव सिक्कारो विमुक्कोत्ति?, सुहंकरेण भणियं-भो महाणुभाव! किं साहिज्जइ?, एरिसा चेव हयपयावइणो रुई, जं सद्यं चिय रयणं सोवह्वं निम्मवेइ, तथाहि-

सयलकलानिलयस्स य गयणसरोवरसहस्सपत्तस्स सुरलोयभवणमंगलसस्स पइपक्खं खओ कओ निसायरस्स, नीसेसत्तिरियलोयपईवस्स कमलसंडजडुखंडणेक्कपयंडकिरणस्स भयवओ मायंडस्स अणिवत्तयउग्गाढकुट्टदोसेण विणासियां चरणा, अणेगरयणसंभारभरियगंभीरकुच्छिभागस्स महाजलुणीलपवाहियविवरंसुहंसरियासहस्सस्स सायरस्सवि अणवरयसलिलसंहारपच्चलो निवेसिओ कुच्छिमि वज्जानलो, एवं च ठिए वत्थुपरमत्थे किमत्थि कहणिज्जं? को वा वोढवो चित्तसंतावो?, सेट्ठिणा भणियं-भयवं! न सुणेमि किंपि गंभीरवयणेहिं, ता फुडक्खरं साहेह, किमिह कारणं?, सुहंकरेण भणियं-कहेमि, अलाहि एत्तो जंपिण्ण, नियमज्जायाविघायपरिहारसमुज्जओ चेव जइजणो होइ, एवं भणिऊण डंभसीलयाए समुट्ठिऊण गओ सो निययासमपयं, सेट्ठीवि अयंडविडुरसूयगं से वयणं निसामिऊण सं-खुद्धो परिभाविउं पवत्तो-अहो तिकालगयत्थपरिन्नाणनिउणेण महातवस्सिणा अणेण नूणं अम्ह किंपि गाढमावयाव-डणमवलोइऊणवि चित्तपीडापरिहरणट्ठया न य पयडक्खरोहिं समुल्लवियं कज्जतंतं, ता जावज्जवि न समुप्पज्जइ कोऽवि अणत्थो ताव तं सुणिवरं गाढाणुरोहपुद्गमापुच्छिऊण जहोचियमायराभित्ति चित्तिऊण गओ तंस्स आसमं,

पडिओ से पाएसु, पणयगन्धपत्थणाहिं बहुप्यारं तथा तथा भणिओ जहाँ जाओ सो अणुकूलचित्तो, तओ भणिय-
मणेण-अहो सोमदत्त ! बाढमकहणिज्जमेयं, केवलं तुह असरिसपक्खवाएण विहरियं मे हियं, न एत्तो गोविउं पारेइ,
अओ आयन्नेहि-भो महायस ! जा एसा तुह दुहिया सा थेवदिणमज्झंमि कुडुंक्खयमाणिस्सइत्ति लक्खणेहिं
नाऊण मए भोयणे पारद्धे अकंडविणिवायतरलियचित्तेण तथाविहमणिठं गोविउमसहंतेण पुणो पुणो सिक्कारो
कओ, तां भो महाणुभाव ! एयं तं कारणं, इमं च सेट्ठी निसुणिऊण वज्जासणिताडिओव सुञ्छानिमीलियन्छो
इव खणं ठाऊण कहवि समवलंविद्यधीरभावो भणिउमाढत्तो—

भयवं ! एत्तियमेत्तं जह तुमए जाणियं सुबुद्धीए । तह उत्तरं पि किंची जाणिहिंसिं अओ तयं कहसु ॥ १ ॥
जं पयडमिमं लोगे जो विज्जो सुणइ रोगिणो रोगं । सो तदुचियमोसहमवि तां भंते ! कुणसुं कारुणं ॥ २ ॥
तुम्हाणणुग्गहेणं जइ देवगुरूण पूयणं कुणिमो । अम्हे अहीणमणा ता किमजुत्तं हवेज्जं इह ? ॥ ३ ॥
निरुवमधम्माधाराण तुम्ह नोवेक्खणं खमं जेण । परहियकरणेक्कपरा चयंति नियजीवियं वंवि ॥ ४ ॥
तम्हा उज्झसु संखोभमणुचियं कहह जमिह कायवं । पुव्वसुणिणोऽवि जेणं परोवयारं करिंसु संया ॥ ५ ॥
एवं सेट्ठिणा कहिए ईसिमउलियनयणेणं जंपियं तेण-भो सोमदत्त ! सुनिच्चलं जंतिउम्हि तुह दक्खिण-

रज्जए, एत्तोचिय महाणुभावा गिहिसंगं मोत्तूण विजणवणविहारमञ्जुवगया पुव्वसुणिणो, सेट्ठिणां भणियं-अच्छउ

ताव तेसिं संकहा, संपेइ कालोचियं कहसु, तओ सुचिरं कहयेवेण सिरं धुणिऊण भणियं तेण-सेट्ठि! जइ अव-
स्समेयस्स दोसस्स पडिविहाणं काउमिच्छसि ता निव्वरविसिट्ठसुसिलिट्ठकट्ठवडणाए मंजूसाए अन्भितरंमि एयं
नियधूयं पक्खिविऊण सयलभूसणसणाहं सुमुहुत्तंमि दिसिदेवयापूयापुरस्सरं जमुणानईजलंमि पच्चाहिज्जासि, जेण
सेसगेहजणस्स जियरक्खा भवइत्ति, तओ गुरुवरणं न अन्नहा जायइत्ति कलिऊण भयभीएण अविमंसिऊण
तदभिप्पायं कालक्खेवपरिहीणं जहुत्तसमगसामग्गिपुरस्सरं नियधूयमन्भंतरे पक्खिवित्ता सुहंकरमुणिणो समक्ख
दुस्सहवच्चविओगसोगसंभाररुद्धकंठेण अणवरयगलंतनयणवाहप्पवाहपक्खालियगंडयलेण पच्चाहिया सेट्ठिणा जमु-
णाजले मंजूसा, सा य तरमाणा अणुसोएण गंतुमारद्धा, तेणावि सुहंकरेण आणंदसंदोहमुबहंतेण निययासमंमि
गंतूण भणिया नियसिस्सा-अरे तुम्हे सिग्घवेगेण गंतूण कोसमेत्तंमि नइहेट्ठभागंमि ठायह, तरमाणिं च मंजूसं
इंतिं जया पासह तथा तं गिणिहऊण अणुग्घाडियडुवारं मम पणांमेज्जहत्ति सोच्चा गया ते, ठिया य जहुत्तठाणंमि,
सा य मंजूसा कळोलपणोल्लिजमाणी जाव गया अद्धकोसमेगं ताव नइजले मज्जनलीलं कुगमाणेण एगेण रायपुत्तेग
दूराओ चिय पलोइया, भणिया य नियपुरिसा-अरे धावह सिग्घवेगेण, गिणहह एयं चारिपूरेण हीरमाणं पयत्थंति,
पविट्ठा य वेगेण पुरिसा, गहिया अणेहिं मंजूसा, समप्पिया य रायपुत्तस्स, तेणावि उग्घाडिया सकोउहल्लेण, पाया-
लकन्नगच्च सच्चालंकारमणहरसरीरा नीहरिया तत्तो सा जुवई, गहिया य सहरिसेण रायपुत्तेण, चित्तिं चाणेण-अहो!

अणुकूला मह कम्मपरिणई, केवलं एवंविहं रमणिरयणं एवं उज्झमाणे ग केणवि नूणमव्वणो असिवपसमणं संभावियं भविस्सइ, ता न जुत्ता रिता चेव मंजूसा पवाहिउंति परिभाविऊण सन्निहियवणदुट्टमक्कडं तदंभंतरे निक्खिख-विऊण निविडं दुवारं च से वंधिऊण भगवइ जमुणे मा मे कुप्पेजसित्ति भणिऊण पुव्वनाएण पवाहिया एसा, पावियसुरलोयसिरिसमुदयं व अप्पाणं मन्नतो तं कुवलयदलदीहरच्छि घेत्तण गओ जहागयं, सावि मंजूसा जलेण उज्झमाणी गया कोसमेत्तं, दिट्ठा य सुहंकरसीसेहिं, तओ नियगुरुणो विन्नाणाइसयं वन्नमाणेहिं नईमज्झे पवि-सिऊण आयद्धिया मंजूसा, उवणीया य गुरुणो, तेणावि असंभावणिज्जमाणंदसंदोहमुव्वहंतेण संगोविया गेहमज्झे, भणिया य नियसिस्सा-अरे अज्ज अहं देवयापूयं महया वित्थरेण भवणंभंतरे ठिओ सव्वयाणिं करिस्सामि, ता तुभेहिं वाढं निव्विजणं कायवं, पडिवन्नं तेहिं, अह समागयंमि रयणिसमए मयरद्धयनिह्यसरसहस्सपहारजज्जरिय-सरीरो पवरविलेवणकुसुमतंवलप्पमुहोवगरणपरियरिओ पिहिऊण सयलगेहदुवाराहं तं मंजूसमुग्घाडित्ता एवं जं-पिउं पवत्तो—

हे हरिणच्छि ! किसोअरि ! पीणत्थणि ! कमलवयणि ! वरतरुणि ! पम्मुक्कभयासंकं संपय मं भयसु दइयं व ॥ १ ॥
 वचउ विगासमहुणा लोयणकमलं मणोरेहेहिं समं । सुयणु ! तुह संगमेणं मयणोऽवि मणागमुवसमउ ॥ २ ॥
 एत्थंतरंमि गादावरोहसंजायतिव्वरकोवा । तण्हाछुहाकिलंता अच्चंतं चावलोवेया ॥ ३ ॥

वणहुट्टमक्की तडतडत्ति पुच्छच्छडाहिं ताडंती । तो विडंविद्यमुही नीहरिया गुरुहुंती सा ॥ ४ ॥ जुम्मं ।
आ कीसं चंदवयणे ! करेसि रोसंति वाहरंतो सो । चुंवनवंचाए मुहं तदभिमुहं जाव संठवइ ॥ ५ ॥
पढमं चिय ताव तडत्ति तोडिओ तिवखदसणकोडीहिं । तीए नासावंसो मूलाओ चिय समग्गो सो ॥ ६ ॥
तयणंतरं च अइत्तिक्खनक्खनिवेहेण दारियं अंगं । आमूलाओ उम्मूलियावि सवणावि से ताए ॥ ७ ॥
अणिवारियपसराए एवं तीए हणिज्जमायेण । तेण भयकंपिरेणं वाहरियं गुरुसरेणं ॥ ८ ॥
रे रे धावह सिस्सा ! उग्घाडह मंदिरस्स दाराइं । एस पिसाईए अहं निज्जामि जमस्स गेहम्मि ॥ ९ ॥
इय एवं वाहरंतो भयवसंसंखुद्धमाणसो धणियं । ताथारमलभमाणो नहदंसणुल्लिहियसवंगो ॥ १० ॥
रोसुक्कडाए वणमक्कीए पुणरुत्तयुरुहुंतीए । तह विणिहओ वरागो जह सो पंचत्तमणुपत्तो ॥ ११ ॥
अह उग्गयंमि दिणयरे समागया तस्स सीसा, कया तेहिं सदा, न देइ सो य पडिवयणं, तओ विहाडियाइं
कवाडाइं, दिट्ठो विणट्ठजीओ सुहंकरो, सावि वणमक्की उग्घाडिएसु कवाडेसु पलाइऊण गया जहागयं, सीसेहि-
वि असुणियपरमत्थेहिं कओ सुहंकरस्स सरीरसक्कारो ।

इय भो कुमार ! विसयाउराण अप्पुन्नवंछियट्ठाणं । निवडंति आचयाओ पयडंचिय जेण भणियमिमं ॥ १ ॥
सल्लं कामा विसं कामा, कामा आसीविसोवमा । कामे पत्थेमाणा, अकामा जंति दुग्गइं ॥ २ ॥

एत्तो च्चिय जुवईणं सवियारपलयणं पि वज्जेति । सुणिणो महाणुभावा निवसंति यं सुन्नरन्नेसु ॥ ३ ॥

एवं सोच्चा सुरिंदत्तकुमारो जायगाढविसयविरागो भावसारं सूरिणो निवडिऊण चलणेसुं भणिउं पवत्तो-भयवं ।
विरत्तमियाणिं विसयपडिबंघाओ मह मणं, ता देह सव्वचिरइं उत्तारेह भवन्नवाओ मोथावेह पुव्वदुच्चरियसत्तुनि-
वहाओत्ति, सूरिणा जंपियं-भो महायस ! अज्जवि भोगफलकम्मसब्भावओ नत्थि तुह पव्वज्जाजोगया, ता गिह-
त्यधम्ममेणावि केत्तियं पि कालमत्तणो तुलणं कुणसु, नरिंदेण भणियं-वच्छ ! समए च्चिय किरंतं सव्वं सुहावहं होइ,
न य गिहवासेवि दंतिंदियाणं पयणुकामकोहलोहाणं सव्वन्नुसाहुपूयापरायणाण विसिट्ठणयपरिपालणपराण पुरिसाण
न धम्मो होइ, ता पुत्त ! पत्तथेरत्तो पव्वज्जं गिण्हज्जासि, संपयं तु कयसदारपरितोसो परिचत्तकुमित्तसंगो अणवर-
यधम्मसत्थसवणतल्लिच्छो अणवच्छिन्नसप्पुरिसाचरियनयाणुसरणपरिणामो गिहे च्चिय निवससुत्ति, दक्खिन्नसील-
याए पडिबन्नं कुमारेण, नियदारपरिभोगं च मोत्तूण गहियं परित्थीपच्चक्खाणं, अन्ने य जिणवंदणपूयणगिलाण-
पडिजागरणोसहदाणपमुहा वहवे अभिग्गहविसेसा, पडिपुन्नमणोरहो य राया कुमारेण सहिओ वंदिऊण सूरिं गओ
जहागयं, अवरवासरे य एगेण केलीकीलेण भणिओ कुमारो-भो मित्त ! सुंदरं कयं तुमए जं सयं च्चिय सुक्को पर-
दारपरिभोगो, अन्नहा दुच्चरियनिसामणुपन्नकोवेण राइणा एत्तियदिणाणि दूरदेसंतरातिही तुमं कओ हुंतो,
कुमारेण कहियं-अरे किं सच्चमेयं परिहासो वा ? तेण भणियं-सच्चं, कुमारेण जंपियं-जइ एवं ता जहड्डियं

मूलाओ साहेसु, तओ तेण सिट्टो नरिंदमंतिजणणुणुल्लाववुत्तंतो, तं च सोचा समुप्पन्नलज्जो कुमारो परिचिंतिउं पवत्तो-अहो अच्चंतमजुत्तमायरियं मए, जं तहाविहं कुलक्कमविरुद्धं कुणंतेण न गणिओ लोयप्पवाओ न वीमंसिओ धम्मविरोहो न य परिभाविं तायस्स लहुयत्तणं, एवं च टिए कंहं विसिट्ठपुरिसाण निययवयणं दंसितो न लज्जामि, तम्हा न जुज्जइ इह निवसिउंति चिंतिऊण मज्झरत्तसमयंमि निब्भरपसुत्ते परियणे तोणीरं धणुदंडं च धेत्तूण पुव्व-देसाभिमुहं गंतुं पयट्ठो ।

इओ य-गयणवल्लहनयरे विज्जाहरन्ना महावेगनामेण पुट्ठो नाणसाराभिहाणो नेमिच्छिओ, जहा एयाए मह धूयाए वसंतंसणाए को पई होहिच्छि?, तेण? कहियं-जो सावत्थीनयरीनाहं कुसुमसेहरनरिंदं निय-भुयवलेण एगागी हयपरक्कमं काहिच्छि, एवं सोचा विज्जाहरेण भणिया खेमंकराइणो विज्जाहरा-अरे गच्छह तुब्भे सावत्थि नयरिं, तहिं च टिया जया एवंविहपरक्कमं पुरिसं पेच्छह तथा तं झत्ति धेत्तूण मम समप्पेह, जं देवो आणवेइत्ति सिरसा पडिच्छिऊण से सासणं गया ते तं पुरिं, सुरिंदत्तकुमारोऽवि एगागी नाणाविहदेसेसु परिभ-मंतो पत्तो तामेव नयरिं, ठिओ य नयरीसमीचवत्तिणो उज्जाणस्स एगंमि लयाहरे, तहिं च जाव पसुत्तो अच्छइ ताव कयवयचेडीपरिवुडा कुसुमसेहरायमुया इओ तओ कीलंती कहवि कम्मविचित्ताए एगागिणी पविट्ठा तमेव लयाहरं, दिट्ठो अण्णडिमरूवो पसुत्तो कुमारो, सा य तीए समुप्पन्नतिवाणुरागाए पडिबोहिऊण पारद्धो अणु-

कूलवयणेहिं उवसगिगुं, नियमविग्धकारिणिचि कलिऊण निम्भत्थिया सा कुमारेण, कहं?—

पाविट्ठि दुट्ठसीले! निक्कारणधम्मवेरिणि! तुमं मे । अवसर चक्खुपहाओ पजत्तं दंसणेण तुहं ॥ १ ॥

तुम्हारिणीण संभासणेऽवि असणिच्च दारुणा पडइ । इहपरभवपडिक्खला अच्चत्थमणत्थपत्थारी ॥ २ ॥

इय एवमाइवयणेहिं तज्जिया सा न जाव नीहरइ । ताव करे धेत्तूणं कुमारेण देढेण निच्छुढा ॥ ३ ॥

आ पाव ! पावसि तुमं एत्तो पंचत्तमिति य जंपित्ता । कवडेण संयंचिय नहसिहाहिं उल्लिहियकायलया ॥ ४ ॥

सा दूरे ठाऊणं हलवोलं काउमेवमारद्धा । रे रे लयाहरगयं गेण्हह पुरिसाहमं एयं ॥ ५ ॥

कुल्लुवइद्वसिया जेण मज्झ एवंविहा कयावत्था । तमुवेहंता संपइ दंसिस्सह कह मुहं रत्तो ? ॥ ६ ॥

एवं सोच्चा नरवइमुयाय वयणं परूढकोवेहिं । आरक्खियसुहडेहिं लयाहरं वेढियं झत्ति ॥ ७ ॥

कुमरोऽवि तीए हियं व निट्ठुरं पाणिणो धणुं धेत्तुं । तत्तो विणिक्खमित्ता तेसिं ठिओ चक्खुपसरंमि ॥ ८ ॥

ताहे तेहिं समगं पम्मुक्का चक्केसेल्लसरनियरा । छेयत्तणेण वंचात्रिया य सयला कुमारेण ॥ ९ ॥

तप्पहरणेहि य लहुं निहया गोमाउयव ते तेण । अह निमुणियवुत्तंतो रायावि समागओ तत्थ ॥ १० ॥

अचंतजायकोवो जुज्जेणोचट्ठिओ संयं चेव । करितुरयरहारूढा विंयंभिया सुहडसत्थावि ॥ ११ ॥

तो चउदिसि पसरियउ सत्तुसिन्नु, पेक्खेवि अबुडु जिंव कुंभयन्नु ।

आपीडियपरियरु सो कुमार, जुज्झणहं लगु सो दढप्पहारु ॥ १२ ॥
सरकप्पियपक्खरतुरयघट्टु, सुसुमूरियवेरियरुडमारट्टु ।
जसु संसुहु किर जो खिवइ चक्खु, सो तक्खणि जायइ जमह भक्खु ॥ १३ ॥
एगोऽविहु भयवसंकपिराण, सो णेरूव हूओ वेरियाण ।
लक्खिखजइ वाणमुयं तु केम्ब, जलधार सुयंतउ मेहु जेव ॥ १४ ॥
उच्चद्वज्जूडमडभिडिभीस, तिक्खंडिय सत्तहुं सरहिं सीस ।
तेमुदारुणरणकम्मेण तुट्ठ, ओइन्ननहंगणि तियसंवठ ॥ १५ ॥
अवरोप्परुपेछिरि सुहडसत्थि, नासणह पयट्टइ अइव हत्थ ।
विचरंसुहि सावत्थीए नाहि, पवंहंतइ नरुहिरप्पवाहि ॥ १६ ॥
समरंगणि जोअइ जा कुमार, संचिट्टइ रिउ अकयणपहारु ।
ता पुव्व भणियविज्जाहरेहिं, अवहरिवि हरिसभरनिम्भरेहिं ॥ १७ ॥
उवणीओ खयरनरायगंस्स, हरिसूसंतमुहपंकयस्स ।
अह आगंथमि सुदिणंमि तेण, परिणाविओ कुमर वसंतसेण ॥ १८ ॥

सो तीए सहिउ पंचप्यार, उवमुंजइ विसय अणन्नसार ।
अइनिचलु पालइ जिणह धम्म, दूरेण विवज्जइ पावकम्म ॥ १९ ॥
कालक्कमेण विसहय विरत्तु, पवज्ज लेइ सुपसंतचिनु ।

तवचरणेहिं झोसिउ पावकम्म, पच्चलु विरायइ नायधम्म ॥ २० ॥
अह ससहरनिम्मलु पाविवि केवलु, पडिवोहिवि चिरु भवजणु ।
सिवभइह नंदणु भवभयमइणु, वच्चइ निच्चइ वरभवणु ॥ २१ ॥

इय परदारनिचित्तीमित्तं पि अणुव्वयं पवन्नमिमं । एवंविहोत्तरोत्तरकल्लाणनिवंधणं होइ ॥ २२ ॥
भणियं चउत्थणुव्वयेत्तो पंचमगमाणुपुवीए । सयलपरिग्गहपरिमाणकरणविसयं पयंपेमि ॥ १ ॥
दुविहो परिग्गहो सो थूलो सुहुमो उ तत्थ सुहुमो य । परकीएसुवि वत्थुसु ईसिं सुच्छाइपरिणामो ॥ २ ॥
थूलो पुण नवभेओ धणे य धन्ने य खेत्तवत्थूसु । रुप्पगुवन्नचउप्पय दुप्पयकुविएसु सुणिअव्वो ॥ ३ ॥
इय नवभेयपरिग्गहपरिमाणं भावसारमादाय । पंचइयारविवज्जणपरायणो सावगो मइमं ॥ ४ ॥
खेत्ताइहिरन्नाइधणाइदुपयाइरुप्पमाणकमे । जोयणपयाणवंधणकारणभावेहिं नो कुणइ ॥ ५ ॥
जो पुण अइलोभवसा भणिज्जमाणोवि गुरुजणेण वहुं । थेवंपि नो परिग्गहपरिमाणवयं पवज्जेइ ॥ ६ ॥

सो दधिणाइनिमित्तं वचंतो दूरदेसनयरेसु । पविसंतोऽवि समुदे कुणमाणो विविहववसायं ॥ ७ ॥
 लाभेऽविहु पइदिणवहुमाणधणवद्धणाभिलासो य । अचंतमहाडुकलं वासवदत्तोव पावेइ ॥ ८ ॥ विसेसयं तीहिं ।
 अह गोयमेण भणियं वासवदत्तो जिणिंद ! को एस ? । जयगुरुणा संलत्तं सीसय ! सम्मं निसामेसु ॥ ९ ॥
 कणयखलंमि महानयरे सुवलयचंदो नाम सेट्ठी, तस्स धणा नाम गिहिणी, तेसिं अचंतवल्लभो सव्वकलाकलाव-
 निउणो वासवदत्तो नाम पुत्तो, सो य महारंभो महापरिगहो गरुयलाभसंभवेऽवि महालोभसंगओ, अहोनिंसं दवो-
 वज्जणोवाए पयट्ठंतो कालं वोलेइ, तस्स य अम्मापिउणो अचंतसावगधम्मकरणसीलाणि जिणवयणायन्नणेण सुणि-
 यअविरइकड्डुविवागाणि तं नियपुत्तं अणवरयाणेगपावट्ठाणपसत्तं पलोइऊणं भणंति-वच्छ ! सुमिणोवमं जीवियं
 असारा विसया सकज्जाणुवत्तणमेत्ता सयणसंजोगा खणविपरिणामधम्मा रिद्धिसमुदया, अओ किंनिमित्तं न कुगसि
 धणधन्नखित्तवत्थुहिरन्नसुवन्नदुपयचउपयाइसु इच्छापरिमाणं, न वा परलोयसुहावहं समज्जिणेसि धम्मं, तथा
 वच्छ ! पिउपियामहपुरिसपरंपरागयं न माइ दव्वं, अओ निरत्थओ तदज्जणगाढपरिस्समो, अह अपुवं लच्छिं उवव-
 ज्जिउमिच्छसि तथावि जहासत्तीए इच्छापरिणाममेव कल्लाणकारगमिच्चाइ बहुप्पयारवयणेहिं पन्नविज्जमाणोऽवि न
 पडिवज्जइ कम्मभारियत्तणेण एसो मणांगं पि तवयणं, सच्छंदचारित्ति उवेहिओ अम्मापिऊहिं । अन्नया य देसंत-
 रागयवणिया पुच्छिया वासवदत्तेण-अहो किं तुम्ह देसे भंडमग्घइ ? , तेहिं कहियं-अमुगंति, तओ तवयणनिसाम-

णचउग्गुणीभूयलोभाभिभूओ तहेसोचियंभंडनिवहभरियं सगडिसागडं गहिऊण पयट्ठो देसंतरं, निसिद्धो य वाढं
 जणणिजणगेहिं, तहावि न ठिओ, एवं च सो अणुदिणं वचंतो गओ तामलित्तिं नयरिं, विणिवट्ठियं भंडं, समा-
 साइओ दसगुणो लाभो, वियंभिओ य अचंतलोभसागरो, जाया बहुययरा तदज्जणवंछा, अन्नदिवसे य दुवारगएण
 तेण दिट्ठाइं दूरदेसागयाइं विविहसारवत्थुभरियाइं जाणवत्ताइं, ताणि य पेच्छिऊण पुच्छिओ तच्चाणियगो अणेणं-
 भो महायस ! कत्तो आगयाइं एयाइंति ? तेण जंपियं-कलहदीवाओ, वासवदत्तेण कहियं-भइ ! इहचभंडेण तत्थ
 गएण केत्तिओ संपज्जइ लाभो ? तेण भणियं-दीसगुणो, वासवदत्तेण जंपियं-किं सच्चमेयं ? तेण कहियं-अज्ज !
 किमसच्चभासणे फलं ? एवं च निसामिऊण वासवदत्तेण भाडियाइं जाणवत्ताइं भरियाइं विविहकंसदोसभंडस्स,
 पट्ठिओ कलहदीवाभिमुहं,

अह परियणेण भणियं-चिरं विमुक्काण जणणिजणगाणं । होही दढमणुतावो सामिय ! तुम्हं वियोगंमि ॥ १ ॥

ता सारिज्जउ गेहं सम्मानिजंतु सयणवग्गावि । पुणरवि अत्थोवज्जणकरणे को वारिही तुम्हं ? ॥ २ ॥

इय भणिए सो रुट्ठो निट्ठुरवयणेहिं भणिउमाढत्तो । रे तुम्ह कोऽहिगारो एवंविह भाणियवंमि ? ॥ ३ ॥

न तुमाहितोवि अहं जुत्ताजुत्तं पुणेमि किं पावा ! । लद्धावयासया अहव किं न भिच्चा पयंपंति ? ॥ ४ ॥

एवं खरफरुसगिराहिं तज्जिया तेण तह अदोसावि । लज्जाभि यणा जह ते मोणं समल्लीणा ॥ ५ ॥

तेणावि सायरे पवाहियाइ जाणघत्ताइ, सिग्घवेगेण गंतुं पयत्ताणि, कमेण पत्ताइ कलहदीवं, उत्तारियं तेहिंतो मंडं, विकिणियं च, जाओ बहुओ लाभो, ठिओ य कइवयवासराइ, गहिया मणिमोत्तियसंखपट्टसुत्तपमुहपहाणकया-
णगाइ, तओ पयट्टो तामलित्तिसंमुहं, इतस्स य जलहिमज्जे दंसिओ निजामगेहिं तस्स रयणदीवो, कोउहल्लेण पुच्छिया अणेण-अरे किमिह उपपज्जइ?, निजामगेहिं भणियं-कक्केयणपउमरागवज्जिंदनीलाइणो महारयणविसेसा ते इह उपपज्जंति, तेसिं समीवधरणमेत्तेण विहवइ रुंददारिदोवद्वयो, न पासंमि परिसप्पइ दग्घुब्भडो सप्पो, न नियडम-
कमइ चंडावि डाइणी, खिल्लियमुहोव न कडुयमुल्लवइ खलयणोवि, तओ अपरिकलियविणासेणं जायतग्गहणगाढा-
भिलासेण भणियं वासवदत्तेण-अहो निजामगा! जइ तत्तो हुत्तं नेह मह नावं तो चउग्गुणं देमि भे वित्तिं, तेहिं भणियं-निजइ, केवलं उवलपडलाउला भूमी, जइ कहवि नाचा भंगं पाविज्जा ता सब्बनासो जाएज्जा, तओ ईसि विहसिऊण वासवदत्तेण भणियं—

जइ गयणं निवडेज्जा पलहथेज्जा रसायलें पुढवी । कुलगिरिणो य सपक्खा हौंउं च महीए वजेज्जा ॥ १ ॥

जलनिहिणो वा वेलाए महियलं सब्बओवि बोलिज्जा । जणणी वा नियपुत्तं हणेज्ज पढमप्पसूयंणि ॥ २ ॥

ता रत्नंपिव सुन्नं होज्ज जयं किं तु हवइ नो एयं । नय सब्बहावि अघडंतमेरिसं चित्तिउं जुत्तं ॥ ३ ॥

जो पुण इय चित्ताए पयट्टए सो धुवं महासुद्धो । करकमलगोयगयं लच्छिं हारेज्ज किं चोज्जं ? ॥ ४ ॥

ता मेळह कुविगप्यं नावं पेळेह दीवयाभिमुहीं । उच्छिदह दारिद्रं आचंदं रयणगहणेण ॥ ५ ॥

एवं च तेण कहिए पणट्टविणिवायभएहिं निजामगेहिं पवाहिया तदभिमुहीं नावा, जाव य केत्तियं पि विभाग गया ताव समुट्टिओ महामगरो, तेण य मंदरमंथेणेव महियं जलहिजलं, उच्छालिया पयंडकल्लोला, तदभिघाएण भिन्ना सयसिकरा नावा, निवुडो अत्थसारो, खरपवणपहओ पलालपूलउव दिसो दिसि पलीणो परियणो, वासव-दत्तोऽवि कहकहवि समासाइयफलहखंडो वेलाजलेण वुज्झमाणो पाविओ सायरस्स पारं, कंठगंगयजीविओ य दिट्ठो एगेण तावसेणं, तेणावि करुणाए नीओ निययासमे, काराविओ कंदमूलाइणा पाणवित्तिं, वीसंतो कइवय-वासराइं, समुवलद्धसरीरावट्टंभो य पट्टिओ नियनयराभिमुहं

इओ य तस्स अम्मापिउणो परलोयं गयाइं, जाया य नयरंमि वत्ता, जहा-वासवदत्तोवि समुद्धे वोहित्थभंगेण विणासं पाविओ, ओच्छिन्नसामियं तिकाऊण गहियं धणकणसमिद्धं पि तम्मंदिंरं नरिं देण, वासवदत्तोऽवि संबलरहि-यत्तणेणं धणविणाससमुत्थसोगेण य किलंतदेहो महाकट्टकप्पणाए संवच्छरमेत्तकालेण संपत्तो कणगखलनयरं, पवि-सिउमारद्धो य नियमंदिंरं, एत्थंतरे उग्गीरियंदंडा पधाविया नरवइनिरुविद्या घराइखगपुरिसा, भणिउं पवत्ता-अरे कप्पडिय ! घरसामियव निअओ कीस इह पविससि ?, किं न याणसि इमं रणणो गिहं ?, तेण भणियं-कि-मेयं कुवल्लयचंदसेट्ठिणो न भवइ ?, तेहिं कहियं-हंतं हुंतं पुवकाले, संपयं पुण असाभियंति रत्तो जायं, तेण भणियं-

अरे ! कहं मइ जीवते असामियंति बुच्चइ ? , किमहं कुवलचंदसेट्ठिणो पुत्तो वासवदत्तो तुब्भेहिं नो सुणिओ न वा दिट्ठोत्ति बुत्ते किं रे ! मिच्छा पलवसित्ति निब्भच्छिऊण कंधराधरणपुव्वयं निइधाडिओ सो तेहिं मंदिराओ, गओ य एसो सयणाणं समीवे, तेहिंवि मा पुव्वदेयं दवं मग्गिस्सइत्ति कुविगप्पेण पच्चभिजाणंतेहिंवि न नयणभेत्ते, णावि संभाविओ, गहिलोत्ति कलिऊण रत्तावि उवेहिओ ।

अहं गेहसयणधननासपमुहुहुजलणजालपज्जलिओ । सो चिंतिउं पवत्तो विवन्नलायन्नदीणमुहो ॥ १ ॥
कहं अकलियपरिसंखं पुरिसपरंपरसमागयं दवं ? । कहं वा समुयवलेण य विटत्तयं तं च अइवहुयं ॥ २ ॥
एक्कपयं चिय सवं निन्नट्ठं मज्झ मंदभग्गस्स ? । हा ! किं करेमि संपइ ? पुवं व हवेज्ज कहं व धणं ? ॥ ३ ॥
एमाइविचित्तविकप्पकप्पणुप्पन्नचित्तवामोहो । उम्मत्तयं उवगओ हिंढतो नयरत्थासु ॥ ४ ॥
चिरकालमाउयं पालिऊण बहुरोगसोगसंतत्तो । अट्टज्झाणोवगओ मरिउं तिरियत्तणं पत्तो ॥ ५ ॥
इय गोअम ! जीवाणं परिग्गहारंभविरइरहियाणं । निवडंति आवयाओ जं तेणेमं गुणकरंति ॥ ६ ॥
पंचवि अणुवयाइं सोदाहरणाइं ताव कहियाइं । एत्तो गुणवयाइं तिन्निवि लेसेण सोहेमि ॥ १ ॥
उट्ठाहोतिरियदिसिं चाउम्मासाइकालमाणेणं । गमणपरिमाणकरणं गुणवयं होइ पढममिह ॥ २ ॥
वज्जइ उट्ठाइक्कममाणयणप्पेसणोभयविसुद्धं । तह चेव खेत्तयुहिं कहिंवि सइअंतरद्धं च ॥ ३ ॥

एयंमि निरइयारे दिसिद्वए भावओ पवत्तंमि । होइ सिरी मोक्खोविद्य जिणपालियसावगएस्सेव ॥ ४ ॥

गोयमसामिणा भणियं-जयनाह ! को एस जिणपालिओ ? , सामिणा कहियं-भो ! निसुणेसु पुंडवहुणनयरे विक्कमसेणो राया, मयणमंजूसा से पट्टमहादेवी, सुबुद्धी अमच्चो, तत्थ य नयरे जिणभावियमणो जिणदत्तसेट्ठिस्स सुलसाए भारियाए पुत्तो जिणपालिओ नाम सावगो परिवसइ, तेण य गुरुसमीचे दिसागमणपरिमाणव्वयं गिण्हंतेण पन्नासं पन्नासं जोअणाइं चउसुवि दिसासु सुक्काइं, एवं सो उत्तरोत्तरगुणब्भासं कुणमाणो अच्छइ । इओ य विक्कमसेणनराहिवस्स पच्चंतदेसवत्ती सीहसेणो नाम भिच्छाहिवई देसं विद्विउमाढत्तो, तस्स य उवरि महया संरंभेण हरिकरिरहजोहवूहपरिगओऽविकखेवण चलिओ विक्कमसेणो, भणिओ य सुबुद्धिणा अमच्चेण-देव ! किं तस्स गोमाउयस्स उवरिं तुम्हे विजयजत्तं करेह ? , तुम्ह पयपयावपडिहयपरक्कमस्स का तस्स सत्ती ? , ता नियत्तह नयरीहुत्तं देह ममाएसं जेण तहा करमि जहा पडिच्छइ सिरेण सो देवस्स सासणंति बुत्ते चउरंगिणीसेणासणाहो पेसिओ अमच्चो, सीहसेणोऽवि तं सवलवाहणं इतं चारपुरिसेहिंतो नाऊण विसमगिरिकडगं घेत्तूण ठिओ, अमचोऽवि तहाठियं पेच्छिऊण जुज्झिउमपारयंतो तमेव गिरिकडगं परिवेढिऊण तत्थेव आवासिओ, दुग्गमग्गत्तणओ य धन्नघयाइं महग्घीह्वं सिचिरे, जणपरंपराए य निसुणियमेयं जिणपालिएण, तओ भूरिघयभरियदोद्वियगाणं करभेसु समारोविद्य वणिजजणसमेओ चलिओ सो सिचिराभिमुहं, सो य सीहसेणो दुग्गे निरुद्धजवसाइपयारो

अच्छिउमचायंतो सारधणं करितुरयसाहणं च समादाय पलाणो रयणीए, सुणियवित्तंतो य अमच्चो लग्गो तस्स अणुमग्गेण, नासंतो य दस जोअणे गंतूण वेढिओ सवत्तो अमच्चसेत्तेण, तओ सो सीहसेणो वहलतरुवरगहणंमि गिरि-
निकुंजं निस्साए काऊण ठिओ, इओ य जिणपालिओ पुवावासियसिखिरसंनिवेसं पत्तो समाणो दिसिपरिमाणं चिंति-
ऊण भणइ-अहो किमहमिणिह करेमि ?, पन्नासं जोयणाइं मे परिमाणं, तं च इत्तियमेत्तेणं चिय पडिपुत्तप्पायं, सेत्ते
च दसहिं जोयणेहिं द्वीभूयमियाणिं, ता वलिस्सामि पच्छाहुत्तं, न कोसमेत्तेपि एत्तो वच्चिस्सामि, सहाइणा वलिय-
लोणेण भणियं-अहो ! मा मुहा अत्थहाणिं करेहि, तत्थ गयस्स तुह पभूयदविणलाभो जायइ, तेण भणियं-अलाहि
तेण दवेणं जं नियमखंडणाए संपज्जइ,

अह तस्स नियमनिच्चलचित्तपरिक्खट्ठया सुरो एगो । कयउब्भडसिंगारो सवत्तो पुरिसपरिअरिओ ॥ १ ॥
सत्थाहिवरूवधरो सुरलोआओ समोअरेऊणं । पच्चासन्नो ठाउं पयंपिउं एवमाढत्तो ॥ २ ॥
हंहो सावय ! नो कीस एसि तं सप्पिविक्कयनिमित्तं ? । जिणपालिएण भणियं वयभंगो हवइ जइ एसि ॥ ३ ॥
देवेण जंपियं सुहु वंचिओ तंसि धुत्तलोएण । जो कुग्गहेण हारसि करट्ठियंपि हु मंहालाभं ॥ ४ ॥
अहवा वयस्स भंगे पावं होइत्ति तुज्झ संकप्पो । ता तल्लाभेणं चिय पायच्छित्तं चरेज्जासु ॥ ५ ॥
जिणपालिएण वुत्तं अहो किमेवं अणगगलं वयसि ? । वच्चंति धम्मगुरुणो कयाइं किं भवसत्तज्जणं ? ॥ ६ ॥

हंत ! जइ तेऽवि वंचति कहवि तो किं न चंदविवाओ । अमयमयाओ निवडइ पलित्तगयणानलकणोली ? ॥ ७ ॥
 किं वा न सूरधिवे विष्णुरमाणेऽवि तिमिरसंभारो । मरियभुवणंतरालो विग्रइ रयणिं अकालेऽवि ? ॥ ८ ॥
 तो भइ ! नेव जुज्जइ गुरुहुत्तं तुज्झ जंपिउं एवं । अचंतपावजणगत्तणेण मज्झंणि नो सोउं ॥ ९ ॥
 जं च तए भणियमिमं वयलोवससुत्थपावसमणत्थं । पायच्छित्तं पच्छा सेविजाहित्ति तमजुत्तं ॥ १० ॥
 जं पढमंपि न जुज्जइ तं काउं जत्थ होइ वयलोवो । लुत्ते य तत्थ विहलो पायच्छित्ताइवावारी ॥ ११ ॥
 सहसकाराणाभोगओव वयमयलणंमि पच्छित्तं । पढमं चिय जाणंतो जो लोवइ तस्स तं विहलं ॥ १२ ॥
 इय भणिए सो देवो रंजियचित्तो विसिट्ठरुवधरो । चलियमणिकुंडलामलमऊहविच्छुरियगंडयलो ॥ १३ ॥
 ससिणेहं जोडियपाणिसंपुडो भणिउमेवमाढत्तो । धन्नो सि तुमं सावय ! वयंमि जो निच्चलो एवं ॥ १४ ॥
 देवोऽहं तुह सत्तं परिकिखउं संपयं समणुपत्तो । परितुट्ठो य इयाणिं ता भण किं ते पयच्छामि ? ॥ १५ ॥
 जिणपालिएण भणियं जिणसुणिपयपूयणाणुभावेण । सवंचिय परियुन्नं न मग्गियच्चं किमवि अत्थि ? ॥ १६ ॥
 तोहे सुरेण कहियं जस्सेरिस निच्चलत्तणं धम्मो । सो तं कयकिच्चो नणु तहावि ममणुग्गहट्ठाए ॥ १७ ॥
 विसदोसहरणदक्खं रयणमिमं गिणह तं महासत्त ! । एवं तमप्पिऊणं देवो अइंसणं पत्तो ॥ १८ ॥
 जिणपालिओऽवि गहिऊण तं गहिऊण घयाइभंडं च । इयरवणियाण दाऊण गओ सनयरं, तत्थ य जाव

कइवि दिवसाणि अच्छइ ताव अन्नदिवस सा नरिंदभजा मयणमंजूसा वासभवणंमि सुहपसुत्ता खइया विसहरेण,
तक्खणेण य निच्चिद्धा जाया, समाऊलीहूओ चिक्कमसेणो राया, वाहराविया गारुडिया, पउत्ता तेहिं मंतंतोवयारा,
न य जाओ कोऽवि विसेसो, तओ पच्चक्खाया तेहिं, नरिंदेणवि गाढनेहभोहिण्ण नीणाविओ पडहगो, उग्घोसावियं
च, जहा-जो देविं उट्टवेइ तस्स अद्धं गामनगरसमिद्धस्स रज्जस्स देमिस्ति, इमं च पडहगताडणपुच्चयं उग्घोसिज्ज-
माणं सुणियं जिणपालिण्ण, तओ निवारिओ-अणेण पडहगो, देवसमप्पियरयणं गहाय गओ नरिंदमंदिरं, रयणा-
भिसेगसल्लपाणचिहिणा विगयविसविगारा कया देवी, सुत्तपबुद्ध ससुट्ठिया सयणीयाओ, तुट्ठो राया, दाउमारद्धो
य रज्जद्धं, जिणपालिण्ण जहोचियं घेत्तूण सेसं पडिसिद्धं, रायावि से निछोभयं दट्ठूण पडिबुद्धो देवीए समं सावगो
जाओ, जिणपालिओऽवि संपुन्नघणवित्थारो चेइयसाहुपूयारओ सम्मसुभयलोगसफल जीवियं काऊण मओ समाणो
परंपराए मोक्खसोक्खभागी जाओत्ति ॥

इय गोयम ! दिसिवयपालणाए अइयारंपंकसुक्काए । हुंति विसिद्धसुहकरा गुणनिवहा इहपरमवसु ॥ १ ॥

भोगपरिभोगपरिमाणकरणमेत्तो गुणद्वयं बीयं । तं भोयणओ तह कम्मओ य दुविहं सुणेअवं ॥ १ ॥

भोयणओ पडिवन्ने इमंमि वज्जेअणंतकायाई । पंचुवरि महमेरयं च रयणीयभत्तं च ॥ २ ॥

सच्चित्तं पडिवद्धं अपउलहुप्पउल तुच्छभक्खणयं । भोअणओ अइयारा वज्जेयत्ता इमे पंच ॥ ३ ॥

कम्ममयओ पुण एत्थं पडिवन्ने सबमेव खरकम्मं । वज्जेअच्चं निच्चं किं पुण इंगालकम्ममाइं ? ॥ ४ ॥

इंगाली वणसाडी भाडी फोडी सुवज्जए कम्मं । वाणिज्जं चेव य दंतलक्खरसेकेसविसविसयं ॥ ५ ॥

एवं खु जंतपील्लणकम्मं निल्लंछणं च दवदाणं । सरदहतलायसोसं असईपोसं च वज्जेज्जा ॥ ६ ॥

दुविहपयारं च इमं जहभणियविहिए पालमाणाणं । धन्नाण भवभयं नेव होइ रविपालयाणं व ॥ ७ ॥

इंदभूइणा वागरियं-भयवं ! के इमे रविपालया ?, जयगुरुणा भणियं-कहेमि, एत्थेव जंबूहीवे दीवे भारहे खेत्ते कोसलविसयप्पहाणे दसपुरंमि नगरे नरिंदसम्मया माहणकूलसंभूया चउहसविज्जाठाणपारगा दोन्नि भायरो रवी पालगो य परिचसंति, अन्नया य गामाणुगामं विहरमाणा बहुसिस्सगणपरिबुडा विजयसेणाभिहाणा सूरिणो समागंथा, ते य तेसिं जाणसालाए अणुजाणाविऊण ठिया वासारत्ते, ते य दोवि भायरो सूरिसमीवे धम्मवीमंसाए समागंतूण भणंति-भयवं ! भणह नियधम्मं, सूरिणा भणियं-आयन्नह—

जीवदयापरिणामो सबन्नुनिवेइयइत्थपडिवत्ती । परिगहपरिमाणं चिय एसो धम्मो समासेण ॥ १ ॥

तेहिं कहियं-भयवं ! जीवदयापरिणामोत्ति जं तुम्हेहिं बुत्तं तं न घडेइ, जओ जन्नकजे पसुविणासोऽवि धम्मत्तणे निदिडो, तहा सबन्नुनिवेइयत्थपडिवत्ती एयंपि न सुंदरं, सबन्नूणं वेदे अकहणाओ, जं च परिगहपरिमाणंति बुत्तं तंपि निरत्थयं, जेसिं वराडियामेत्तंपि नत्थि तेसिं विफलमेव परिगहपरिमाणकरणं, विज्जमाणपयत्थे

चेव तस्स गुणकारित्तणओ, गामसंब्भावे चिय सीमासफलत्तणओत्ति, तम्हा अन्नं किंपि धम्मं परिक्केहसु, सूरिणा भणियं-आउसंतो ! न जुज्जइ तुम्ह एवं वोचुं, जओ इहलोयपडिबद्धपुरिसवयणमेयं जन्नकल्ले पमुविणासो धम्मोत्ति, कहमेयंति ? , वुच्चइ-‘आत्मवत् सर्वभूतानि, यः पश्यति स पश्यती’ति पारमार्थिकमुनिवचनात्, जइ पुण जीवविणासे धम्मो ता मच्छबंधलुद्धयाइणो सगंमि वचेज्जा । जं च सब्बुणो वेदेसु न कहियत्ति तुत्तं तंपि वेयरहस्सानिसामणाओ, यतस्तन्नैव शान्त्युद्घोषणाप्रस्तावे उक्तं—‘ऊं लोकप्रतिष्ठितान् चतुर्विंशतिं तीर्थकरान् ऋषभाद्यान् वर्धमानान्तान् सिद्धान् शरणं प्रपद्यामहे । ॐ पवित्रमग्निं उपस्पृशामहे, येषां जातं सुजातं येषां वीरं सुवीरं येषां नम्रं सुनम्रं ब्रह्म सत्रह्यचारिणो उचितेन मनसा अनुदितेन मनसा देवस्य महर्षिभिर्महर्षयो जुहोति, याजकस्य जनस्य च एषा रक्षा भवतु शान्तिर्भवतु वृद्धिर्भवतु दुष्टिर्भवतु स्वाहा ” एवं च पसिद्धेसु सब्बत्थपइडिएसु सब्बत्थुसु अभावकप्पणं महासंमोहो । जं च कहियं विज्जमाणपयत्थे चेव परिमाणं जुज्जइ एयंपि अणुचियं, असंतेवि अत्थे आसवनिरोहभावाओ पच्चक्खाणं गुणकरं चेव, ता भो महाणुभावा ! असेसदोसग्गिसमणघणसरिसं सब्बनुमयं अमयं व पियह अजरामरत्तकरं, सुंचह भिच्छत्तमोहसंपसूयं कदासयविसेसं, मज्झत्थत्तणमवलंविऊण चित्तेह परमत्थं, जच्चकणंगं व कसंछेयतावपमोक्खवहुपरिक्खाहिं सुपरिक्खिऊण धम्मं सम्मकरं सम्ममायरह । एवं च सूरिणा पन्नत्ते लहुकम्मयाए पडिबुद्धा ते महाणुभावा, पडिबन्नो भावसारं जिणधम्मो, गहियाइं अणुवयाइं, अंगीकयाइं

तिन्निचि गुणवयाइं, पालिति य सव्वजत्तेण । अन्नया य रविमाहणस्स भोयणं कुणमाणस्स उवरिट्ठियघरकोइलगेण कओ
उचारो, वक्खित्तचित्तत्तणओ न सुणिओ अणेण, तम्मिसभोयणकरणे य पवड्डियं से उयरं, खीणाइं मंससोणियाइं,
तणुईहूयाओ वाहाओ, सुक्काओ जंघाओ, सुसियं वयणं, वड्डिया तण्हा, जाओ सावसेसाउओ, दंसिओ य पालएण
विज्जाणं, तेहिवि असज्झोत्तिकाऊण पच्चक्खाओ एसो, एवं च विसमदसावड्डियं तं पलोइऊण झूरइ परियणो,
रोवइ भारिया, बहुप्पयाइं विलवइ पालगो, सो य अदीणमाणसो सम्ममहियासेइ, अन्नवासरे य समागओ एगो
देसंतरविज्जो, तस्स सयणवग्गेण दंसिओ रवी, तेणावि संमं पलोइऊण भणियं—अहो कुड्डिरोलियापुरीससंभवो
एस दोसो, ता पंचुवरिफलाइं समभागाइं चित्तगरोज्झमंसंभीसियाइं सुराए वट्टिऊण देह जेण सिग्घं पसमइ
महोदरवाही, रविणा भणियं—भो भो वेज्जा ! भोयणओ वीयगुणवयपरिमाणं कुणंतेण पच्चक्खायं मए एयं, वेज्जो
सयणवग्गो य भणइ—पगुणीभूयसरीरो सोहिं करेज्जासु, तेण कहियं—जराघुणजज्जरियविसरारुसरीरपंजरासारयं
जाणंतो नाहं मरणेवि एयमायराभि, एवं च उज्झिओ वेजेण । अन्नमि य वासरे जाव सो निसन्नो एगंतदेसे अच्छइ
ताव पेच्छइ वसहमुत्तमज्झे निवड्डियं घरकोइलंगं, तक्खणं चिय विणस्संतं च पेच्छिऊण चित्तियमणेण—अहो जहा
एयं कोइलगविणाससमत्थं तहा तं दुट्ठं विसविगारमवि हणिउमलं, तम्हा जुजइ मज्झ एयं पाउंति परिभाविऊण
सुमुहुत्ते णमोकारसुमरणपुरस्सरं वसहमुत्तं पीयमणेण, अहं धम्मपभावेणं वेयणिअखओवसमजोगा ओसह-

माहंप्येण य जलोयरं से पसंतंति, जाओ पुणन्नवंगी, जयइ जिणिंदस्स धम्मसामत्थं, इय सवत्थ पवाओ वित्था-
रिओ नयरलोएण

सो य पालगो तन्नयरसामिणा भणिओ जहा ममामच्चत्तणं पडिवज्जसु, पालगेण भणियं-देव ! मए खरकम्माणं
बलाहियत्तारक्खिगत्तपमुहाणं नियमो कओ, राइणा भणियं-किं कारणं ? तेण कहियं-देव ! न जुत्तमेयं सावगाणं,
जओ तत्थ निउत्तेहिं जणो पीडियवो, परच्छिद्दनिहालणं कायव्वं, नरिंदचित्तावज्जणपरेहिं सवप्पयारेण दवमुप्पाय-
णिज्जं, तं च न जुत्तं पडिवन्नवयाणंति, रत्ता भणियं-दुट्ठाण सिक्खणे साहूण पालणे किमजुत्तं ? पालयेण जंपियं-
देव ! को एवं सुणइ-एस दुट्ठो एसो साहुत्ति, जओ अवराहस्स कारीवि अत्तणो साहुत्तणमेव पगासेइ, न य अपडिवन्न-
दोसो विणासिउं पारियइ, कयाइ पिसुणोवणीओ साहूवि परिहम्मइ, तम्हा अइसयनाणसज्झं दुट्ठनिगहसिद्धपालणं,
अणइसइणा कीरंतं विवज्जासंपि जाएज्जा, एवं च भणिए पयंडसासणत्तणओ रुट्ठो राया भणिउमाढत्तो य-अरे
वंभणाहम ! वेयपुराणपइट्ठियं वंभणत्तं परिहरिय धम्मंतरं कुणमाणो मूलाओ च्चिय निगहट्ठाणं तुमं विसेसओ
इयाणिं ममाऽऽणालोवपयट्ठो, ता न भवसि संपयंति भणिऊण आणत्तो वज्झो, नीओ मसाणभूमीए, समारोविउ-
मारद्धो सूलाए, एत्थंतरे तप्पएसोवगएण दिट्ठो वाणमंतरेण, दढधम्मोत्ति जायाणुकंपेणं तेण सूलाठाणे कयं कण-
यसिंहासणं, तेहि य रायपुरिसेहिं पहओ खगपहारेहिं, देवप्पभावेण य पहारट्ठाणेषु समुट्ठियाणि भवेयपमुहाणि

आभरणणि, निवेइयं च रत्नो, अह भयसंभंतमणो राया सयमेव परियणसमेओ तस्स सगासोवगओ कयंजली
 भणिउमाढत्तो-भो भो सद्धम्मपरेद्धचित्त! जं निन्निमित्तमवि मोहा एवंविहं अवत्थं उवणीओ तं खमसु मज्झ,
 एवं च सुचिरं पसाइऊण करेणुगाखंधे समारोहिऊण य महाविभूईए पवेसिओ नग्गे पालओ, जहोचियं तंवो-
 लाइणा संमाणिऊण पेसिओ सगिहं, परितुट्ठो जेड्ढभाया, कयं वद्धावणयं । अवरावासरे य पालगेण भणियं-हे भाय!
 सवन्नुधम्ममाहणमेयं जं वसहसुत्तमेत्तेणवि तुह पसंतो जलोयरवाही, ममावि निक्कारणमेव कणयसिंहासणत्तेण
 परिणया सूलिगा, पहारावि जाया आभरणत्तणेणं, ता सुच्चउ गेहवासवासंगो, अंगीकीरउ एत्तो सब्बविरई, को हि
 नाम मुणियामयपाणगुणो विससलिलं पाउसुच्छेहेज्जा?, रविणा भणियं-एवं होउ, तओ ते दोवि थेराणं अंतिए
 पव्वजं गहाय समाराहियसंपुन्नसमणधम्मा सुरसिवसुहभायणं जायत्ति ॥

इय इंदभूइमुणिवर! वीयगुणवयमिमं विनिदिट्ठं । एत्तो तइयं वोचइ अणत्थदंडस्स विरइत्ति ॥ १ ॥

सो पुण अणत्थदंडो नेअवो चउव्विहो अवज्झाणो । पमयायरिए हिंसप्पयाण पावोवएसो य ॥ २ ॥

कंदप्पे कुक्कुइए मोहरियं संजुयाहिकरणं च । उवभोगपरीभोगाइरेगयं चेत्य वज्जेइ ॥ ३ ॥

जेऽणत्थदंडविरया न हुंति तेऽणत्थगाइं जंपता । पावंति धुवं मरणं लोइयकोरिंटियमुणिव ॥ ४ ॥

जो पुण एसो कोरिंटगो मुणी जह व मरणमणुपत्तो । तह संपय सीसंतं सव्वं गोयम! निसामेसु ॥ ५ ॥

सालिसीसयंमि गांसे भदिलो नाम माहणो, सोमदिनां य से भारिया, तेसिं च कोरिंटिगो नाम पुत्तो अच्चंतवि-
रूवो, कहं?—

मुहवाहिविणिगयदीहविरलदंतगभगगउड्डो । करहसिसुपुच्छसथहविफुट्टुहरोमदोपेच्छो ॥ १ ॥

मजारकक्कडच्छो अइटप्परकन्नघोरजुयलिवखो । अच्चंतकविलदेहो पायडदीसंतनसजालो ॥ २ ॥

संपज्जंततहाविहभोयणजायंतउदरपूरोडवि । कयमासुववासो इव अच्चंतं किसियसवंगो ॥ ३ ॥

इय सो पुव्वक्कियकम्मदोसओ गाममज्झयारम्मि । दुइंसणत्तणेणं हीलाठाणं परं जाओ ॥ ४ ॥

एयारिसे य तम्मि जोव्वणपत्ते जणणिजणगेहिं चिंतियं—कहं एस कलत्तभोगी भविस्सइ?, जओ सव्वायरम-
गियावि न सगामवासिणो दित्ति एयस्स कन्नयंति । अन्नया दूरयरगामवासिणो बंभणस्स वड्डुकुमारी बहुदविण-
दाणपुव्वयं वरिया अणेहिं से निमित्तं, जाए य लगसमए. कोरिंटिगं कयसिंगारचारुवेसं समादाय गयाइं तत्थ, तत्थ
पारद्धो विवाहोवक्कमो, रइया वेइगा, पज्जालिओ घयमहुसणाहो हुयासणो, पइविट्ठो वेइगामंडवंमि कोरिंटिगो,
तक्खणं चिय दिट्ठो तीए वड्डुकुमारीए, तं च पलोइऊण सचमक्कारं भणियमणाए—

अहह किमेस पिसाओ इहागओ? अहव रक्खसो वावि? । किं वा कयंतपुरिसो? नहु नहु तत्तोडवि भीमयरो ॥ १ ॥
सहि! पेच्छ पेच्छ कीलेव विलइओ दिव्वभूसणसमूहो । एयंमि पावरूवे कहमवि नेवावहइ सोहं ॥ २ ॥

पारद्धंमि विवाहे लखिखज्जइ एस धूमकेउव्व । ता भायइ मज्झ मणो सहसा एयंमि दिट्ठमि ॥ ३ ॥

सहिण् भणियं-सुयणु ! मा एवमुल्लवसु, एसो तुज्झ पाणनाहो भविस्सइ, तीए भणियं-सहि ! सच्चमेयं ? एस मे पाणनाहो भविस्सइ ?, तीए भणियं-सहि ! सच्चमेयं होही ?, सहिए भणियं-को इत्थ विव्वमो ?, वड्डकुमारीवि जइ परं पराभवित्ति भणिऊण विसायवसविसप्पमाणत्तिवसंतावा सणियं सणियमवक्कमिऊण जणमज्झयाओ पुरोहडा-वडंमि निवडिया वेगेण, तओ जाव इओ तओ समीवट्टियजणविमुक्कहाहारवनिसामणेण धाविओ उत्तारणत्थं जणो ताव अइपउरसलिलत्तणेण कूवस्स अवस्संभवियवयाए त्रिणासस्स मया एसा, विगयजीविया य वाहिं पक्खित्ता कूवयाओ, कओ से सरीरस्स सक्कारो, ताणि य कोरिंटगजणजणगाईणि जणेण हीलज्जमाणाणि गयाणि स-ग्गामं, भणिओ य तेहिं एसो-वच्च ! कोरिंटग तुह परिणयणनिमित्तं न सो कोऽवि उवाओ जो न कओ, केवलं तुह कम्मपरिणइवसेण सब्बो विहलत्तणं पत्तो, ता मा सुणिहिसि जहा अम्मापियरो ममं उवेहगाणित्ति, तेण भणियं-पुव्वकयकम्ममेव एत्थ अवरज्झइ, का तुम्ह उवेहा ?, जइ खुज्जओ दूरमूसवियवाह्वि फलं न पावइ ता किं कप्पतरुवरस्स वयणिज्जंति ?, एवं च तेसिं परोप्परोह्मावेण जाया रयणी, अह तेसु निव्वरपसुत्तेसु परमं चित्तपरितावमुव्वहंतो कोरिंटगो नीहरिओ गेहाओ, पयट्ठो तित्थदंसणत्थं, कमेण य दट्ठण सयललोइयतित्थाइं ग-हिया अणेण कावालियतवस्सिदिंक्खा, सुणिओ तहरिसणाभिप्पाओ, सिक्खियाइं भूमिलक्खणपमुहाइं विज्जाणाइं ।

इओ य कुसगपुरे नयरे अरिमइणो नाम राया, तस्स य पर्यइए चिय दयादाखिन्नविवेयसच्चविसिद्धुद्धिसंगओ
सुमई नाम अमचो, तेण य राइणा कारावियं महंतं सरोवरं, आरोविओ पालीउ विचित्तरुसमूहो, चउसुवि पासेसु
कयाओ अणाहसालाओ, निरुवियाइं अवारियसत्ताइं, तस्स य सरोवरस्स अचंतमरिअस्सवि विवरदोसेण कइवयदि-
णमेत्तेणवि सुसंतं सल्लिमवल्लोइऊण विसन्नेण जंपियं रत्ता-अहो निरत्थओ दव्वक्खओ जाओत्ति, परियेण भणियं-
देव ! मा संतप्पह, पूरिज्जउ एस सिलाईहिं विवरो, जइ पुण एवं कए न विप्पणस्सइ सलिलं, रायणा भणियं-
एवं कीरउ, तओ तक्खणं चेव कट्टसिलाइट्ठगाहिं पूरिओ सो विवरो, जाए य वरिसयाले निवडंतुद्दामसलिलधा-
राहिं भरियं सरोवरं, तं कहियं च नरेहिं नरवइणो ।

ताहे तुट्ठो राया पलोयणट्ठा गओ सयं तत्थ । जावडच्छइ खणमेगं उब्भिन्नो ताव सो विवरो ॥ १ ॥

पुणरवि पुव्वपवाहेण पाणियं तेण विवरसग्गेण । अणिवारियप्पयारं पायाले गंतुमारद्धं ॥ २ ॥

तं दट्ठूण नरिंदो सोगमहासल्लपीडिओ झत्ति । मंताइसत्थकुसलं पुरलोयं वाहरावेइ ॥ ३ ॥

भणइ य तुम्हे सत्थत्थपास्या ता कहेह सल्लिमिमं । पायाले वचंतं टाइस्सइ केणुवाएणं ? ॥ ४ ॥

परिचिंतिऊण सम्मं पयंपियं तेहिं देव ! विन्नाणं । नेवऽत्थि एत्थ वत्थुमि अम्ह किं साहिमो तेण ? ॥ ५ ॥

अह नरवइणा भणियं तहावि साहह किमेत्थ कायवं ? । मा विफलं चिय वच्चउ सुचिरेमं वेद्वियं दवं ॥ ६ ॥

तेहिं भणियं-देव ! जइ एवं ता नगरस्स वाहिं विदेसियसालासु य पवामंडवेसु य देवमंदिरेसु य पहियसमू-
हमीलगेसु य तवस्सिजणासमेसु य निरूवेह पुरिसे, पुच्छावेसु य तन्निवासिलेयं विवरपूरणोवायं, जइ पुण तेहिंतो
कोइ कंपि उवायं कहेज्जा, राइणा भणियं-साहु जंपियं, वडुरयणा वसुंधरा, किमिह न संभविज्जत्ति अणुमन्निऊण
तवयणं जहाभणियं सबट्ठाणेसु विसज्जिया पुरिसा, ते य जहामणियविहीए समारद्धा पुच्छिउं ।

इओ य सो कोरिंदगकावालिओ इओ तओ देसंतरेसु परिभमंतो मंतंतोसहीसंगहं कुणंतो वाउवायखन्नवायप-
मुहदवोचज्जणोवायं परिचिंतलो समागओ तमेव पुरं, ठिओ देसियसालाए, सबप्पयारेहिं अपुवुत्तिकाऊण सविणयं
पुच्छिओ सरोवरविवरपूरणोवायं रायपुरिसेहिं,

एतयंतरंमि तेणं नियचिन्नाणाचलेवनडिएण । भणियं साहंकारं कित्तियमेत्तं इमं मज्झ ? ॥ १ ॥

रायपुरिसेहिं कहियं-जइ एवं एहि ता नरिंदपुरो । पयडसु नियचिन्नाणं लहसु पसिद्धिं धरावलए ॥ २ ॥

एवं च सो बुत्तो समाणो अप्पणो चिन्नाणेण तिहुयणंपि तणं व मन्नंतो पट्ठिओ तेहिं समं रायउलं, कमेण य पत्तो
अत्थाणमंडवं, मुणित्तिकाऊण पणमिओ राइणा, दवावियं आसणं, निसन्नो एसो, पत्थावे य पुरिसेहिं निवेइओ
रत्नो तदन्नुवगमो, तओ हरिसवियसियच्छेण भणिओ रत्ना एसो-भो रिसिवर ! केरसु पसायं, पणासेसु सरोवरस्स
विवरं जेण तण्हापरिसुसियसरीरो चउविहोवि भूयगामो सुहेण सबकालं जहिच्छाए जलपाणं कुणइत्ति, कोरिं-

दगेण भणियं—महाराय ! केत्तियमेत्तं एयं ? दंसेह तं विवरं जेण तडुच्चियसुवायं साहेमि, एवं बुत्ते दंसिओ सो पएसो, तेणवि तं समंतओ पलोइऊण भणियं—महाराय ! जइ एत्थ विवरे कसिणचउहसीए टप्परकन्नं मंकडवन्नं वोक्कडुकुच्चं तालसरूव कक्कडयच्चं अइवीभच्चं वंभणगोत्तं संजमवंतं पुरिसं खिवेह दिसिदेवयाण बलिदाणपुव्वगं नूणं ता मिलइ एस विवरो, न नीरसुवरमइ थेवंपि, एवं तेण कहिए राइणा सच्चत्थ गामगराइसु पेसिया पुरिसा, निभालिउमारद्धा य जहोवइडुगुणविसिठ्ठं वंभणं, कत्थवि अपेच्छमाणेहि य तेहिं पडिनियत्तिऊण निवेइयं नरिंदस्स, तओ संभंतचित्तेण भणियं राइणा—भो सुमइअमच्च ! किमेवं अम्ह धम्मकज्जे निरुज्जभो तुमं ? न संपाडेसि जहोवइडु वंभणंति, इमं च निसामिऊण चित्तियं मंतिणा—अहो धम्मच्छलेण पावज्जणं सुद्धलोयस्स, अहो अणत्थदंडपंडियत्तणं पासंडियाहमस्स, जं एवंविहं पावट्ठाणसुवइसंतेण न गणिओ पंचिदियविणासो न परिचित्तिओ वंभणहच्चाकलंको न परिकलिओ नियतवलोवो, अहवा किमणेणं ? तहा करेमि जहा पावोवएससमुल्लाववंच्छा इयरलोयस्सवि न जायइत्ति परिभाविऊण भणियमणेण—देव ! जारिसो अणेण पुरिसो कावालिमुणिणा समाइडो तारिसो एसो चेव जइ परं हवइ, ता देव ! धम्मट्ठाणे एत्थ जइ एसो च्चिय खिप्पिही ता किमजुत्तं जाएज्जा ? ‘इष्टं धर्मे नियोजये’दिति लोकेऽपि कथ्यते, राइणा भणियं—एवं होउ । अह समागए चउहसीवासरे सो चिय कोरिटगो जहोवइडुविहिणा “हितं न वाच्यं अहितं न वाच्यं, हिताहितं नैव च भाषणीयम् । कोरिटकः साह महाव्रती यत्, स्ववाक्यदोषाद्विवरं विशामी ॥१॥” ति

पुनरुत्तं विरसमारसंतो बला चेव पक्खित्तो विवरम्मि पाविओ य विणासंति ।

अहं सबत्थवि नयरे वित्थरियं जहा क्खालियतवस्सी । नियजीहादोसेणं पंचत्तं पाविओ विवसो ॥ १ ॥

ताहे सबोऽवि जणो भासागुणदोसंचितणुल्लुत्तो । सुसुणिच्च संपयत्तो किमसक्कं मरणभीयाणं ? ॥ २ ॥

इयं तुज्झ मए कहिओ गोअम ! उच्छिखलुल्लवणरूवो । जमदंडोच्च पयंडो अणत्थदंडो दुहोहकरो ॥ ३ ॥

तिन्निवि (एयाइं मए) भणियाइं गुणवयाइं एत्ताहे । चत्तारिवि सीसंती (सिक्खाइं) निस्सुणसु तं गोअमसगोत्तं ! ॥ १ ॥

सावज्जेयरजोगाण वज्जणासेवणोभयसरूवं । सामाइयंति तेसिं पढमं सिक्खावयं होइ ॥ २ ॥

मणवयणकायदुप्पणिहाणं इह जं न उ विवजेइ । सयकरणयं अणवट्ठियस्स तह करणयं च गिही ॥ ३ ॥

सामाइए उल्लुत्ता अविचलचित्ता सुरोवसग्गेऽवि । होति भवपारगामी सत्ता नणु कामदेवोच्च ॥ ४ ॥

जह कामदेवसट्ठो संमत्तं पाविओ ममाहिंतो । सामाइए निक्कपो सुरोवसग्गेऽवि तह सुणसु ॥ ५ ॥

चंपानयरीए विजियमंडलो जियसत्तू नाम राया, कामदेवो सेट्ठी, नियनियकम्मसंपउत्ता कालं वोलेति, अन्नया

य गामाणुगामं विहरंतो अहं तत्थ समोसट्ठो, तजो उज्जाणपालगेहिं विन्नत्तो राया, जहा-देव ! भवियकमलवो-

हणदिचायरो चरिमत्तित्थयरो सहसंवणुज्जाणे समोसट्ठोत्ति, एवं सोचा रत्ता दिन्नं तेसिं महंतं पारिओसियं,

दवाविओ नयरीए पडहगो-जहा नायकुलकेउणो महावीरस्स भगवओ वंदणत्थं पत्थिवो निग्गच्छइ, ता भो

लोगा ! आगच्छेह भगवंतं वंदितं भणिए तक्कालमिलियपुरजणसमेओ समागओ राया ममंतियं ! इओ य सो कामदेवो पासायतलासीणो एगाभिमुहं जणनिवहमवलोइय परियणमापुच्छेइ—किं नं देवाणुप्पिया ! एस पुरजणसमुदओ एगदिसाए नीहरइ ? एयमट्टमुवलभिय सोहेह, तेहिं निच्छिऊण निवेइयं, जहा—तिहुयणेक्कनाहो जिणो समोसढो तवंदणवडियाए पुरलोगो वच्चइ, तओ सो समुप्पन्नसद्धाइसओ ण्हाओ चंदणोवलित्तगतो चाउग्घं-टरहारूढो अप्पमहग्घाभरणभूसिओ सियकुसुमदामोवसोहिओ निगओ नयराओ, समोसरणासन्ने य ओइन्नो रहवराओ पसुक्ककुसुमदामो परिहरियंतवोलो कयमुहसुद्धी एगसाडीएणं उत्तरासंगेणं चक्खुफासे अंजलि-पग्गहेणं मणसो एगत्तीभावेण य पविट्ठो समोसरणे, तिवखुत्तो आयाहिणपयाहिणं काऊण वंदिओ अहं, उवविट्ठो सट्ठाणे, निसामिए धम्मे संजायधम्मपरिणामो संमत्तमूलाइं पंचाणुच्चयाइं तिन्नि गुणच्चयाइं चत्तारि सिक्खावयाइं भावसारं पडिवज्जिय गिहमुवगओ, पालेइ निरइयारं सावगधम्मं । अन्नया य कुंडुवचिंताए जेट्ठपुत्तं ठवित्ता पोसह-सालाए पडिमापरिकम्मकरणट्ठा सामाइयं पडिवज्जिय ठिओ रयणीए काउसग्गेणं, एत्थंतरंमि तब्भावनिच्चलत्तं परिकिखुत्तं एगो तस्स समीवे ठाउं सुरो सरोसं इमं भणइ—

रे रे वणियाहम ! धम्मकम्ममेवं समुज्झसु जवेणं । पाविट्ठ कोऽहिगारो तुह एरिससाधुचेट्ठासु ? ॥ १ ॥
मा पविसअकाले चिय कयंतमुहकुहरमुग्गदाढिद्धं । मम वयणं अवगन्निय पुत्तकलत्ताइपरियरिओ ॥ २ ॥

एवं बुत्तोचि न जाच कंपिओ सो तथा महासत्तो । ताव परुद्धो देवो गइंदरूखं विउवेइ ॥ ३ ॥
 तयणंतरमुछ्छालियपथंडुंडो घणोच्च गजंतो । वेगेण धाचिऊणं गेण्हइ तं सावयं झत्ति ॥ ४ ॥
 सवत्तो गत्तं विद्वेइ चलणेहिं पक्खियइ गयणे । तत्तो निवडंतं पुण पडियच्छइ दंतकोडीहिं ॥ ५ ॥
 एवं बहुप्पयारं तं पीडिय कुणइ सुयगरूखं सो । पच्छा तिव्खाहिं दढं दाढाहिं तणुं विदारेइ ॥ ६ ॥
 तहविहु अलुब्भमाणे गिहिप्पहाणंमि कामदेवंमि । रक्खसरूखं काउं उवसगं काउमारद्धो ॥ ७ ॥
 अह खणमेगं घोरट्टहासकरतालंतालणं काउं । परिसंतो सो तियसो भत्तीए तयं इमं भणइ ॥ ८ ॥
 भो कामदेव ! सावय तियसोऽहं तुज्झ सत्तनाण्डा । एत्थागओ महायस ! ता पसिय वरेसु वरमेत्तो ॥ ९ ॥
 येवोऽविहु उवयारो विहिओ तुम्हारिसे गुणनिहिंमि । अस्संखसोक्खलंघस्स कारणं होइ निब्भंतं ॥ १० ॥
 एवं भणिओऽवि सुरेण सायरं वरमुणिच्च येवंपि । जात्र न स कामदेवो कहमवि पच्चुत्तरं देइ ॥ ११ ॥
 ताव नमंसिय चरणे उक्कित्तिय गुणगणं च से तियसो । परमच्छरियसुवगओ जहागयं पडिनियत्तो य ॥ १२ ॥
 इयरोऽवि धम्ममाराहिऊण तइए भवंमि निव्वाणं । सायत्ताणंदसुहं पाविस्सइ निहयकम्मंसो ॥ १३ ॥
 इय जइ गिहिणोऽवि समुज्जमंति धम्मंमि निचला धणियं । ता उज्झियगिहवासा तवस्सिणो किं पमायंति ? ॥ १४ ॥
 एवं वीरेण जिणेसरेण जइणो पडुच्च वागरिए । सविसेसंजमुज्जयचित्तो जाओ समणसंघो ॥ १५ ॥

इय जह सामाइयनिचलत्तणं कामदेवसङ्गणं । भवभयभीएण कयं अन्नेणवि तह विहेयच्चं ॥ १६ ॥
दिसिवयगहियस्स दिसापरिमाणस्सेह पइदिणं जं तु । गयणपरिमाणकरणं वीयं सिक्खावयं एयं ॥ १ ॥
वज्जइ इह आणयणप्पओगेप्पसप्पओगयं चेव । सद्धानुरूववायं तह वहिया पोग्गलक्खेवं ॥ २ ॥

इहलोयंमिवि पइदिण दिसपरिमाणंमि कीरमाणंमि । उभएवि नो अणत्था सांगरदत्तस्स वं हवंति ॥ ३ ॥

गोयमसामिणा भणियं-जयगुरु ! को एस सागरदत्तो ? कहं वा तस्स दिसिवयपरिमाणसेवणे इहपारभविया-
ऽणत्थप्पणासो जाओत्ति साहेसु, महंतमिह कोऊहल्लं, भगवया जंपियं-परिकहेमि, पाडलिसंछे नयेरं धणसारस्स
इब्भस्स सुओ सागरदत्तो नाम, सो य असेसवसणसयसंपरिगहिओ दुल्ललियगोछीए परिगओ, तेहिं तेहिं पयोरहिं
दव्वविणासमायरइ, अन्नया य विणड्डंमि दव्वसारे गओ सो देसंतरेसु, पारद्धा य वहवे दविणोवज्जणोवाया, समासा-
इयाइं कइयवि दीणारसयाइं, तेहिंवि गहिऊण किंपि भंडं गओ सिंधुदेसं, विणिवट्ठियं तं च, उट्ठिओ बहुलाभो,
जाओ से परितोसो, चित्तिउमारद्धो य-अहो किं इमिणा अत्थेण ? जो नियसुहियसयणवग्गस्स न जाइ विणि-
ओगं ? ता गच्छामि निययनयरं, पेच्छामि जणगं, समप्पेमि तस्स अत्थसंचयं, दुप्पडियारो खु सो महाणुभावो,
विविहाणत्थसत्थेहिं मए संताविओ य इति परिभाविऊण गहियपवरजच्चतुरंगमो पयट्ठो पाडलिसंछपुराभिमुहं,
अविच्छिन्नपयाणएहिं इंतस्स अद्धपेहच्चिय जाओ वासारत्तो, अणिवारियपसरा निवड्डिया सलिलवुट्ठी, पवूढा गिरि-

नईओ, नवहरियसदलं जायं धरणिमंडलं, नियनियगेहाइसु अल्लीणो पहियसत्यो, बहलचिक्खल्लोहत्तणेण दुग्गमी-
हूया भूमिमग्गा, तओ सो गंतुमसमत्यो तत्थेव य छाइऊण ठिओ, अन्नदिवसे य चरमाणं तुरंगमाणं अणुमग्ग-
लग्गो जाव कित्तिंयपि भूभागं वच्चइ ताव गिरिगुहागओ एगचलणोवरिनिहियसवंगभारो धम्मनिच्चओव सुत्तिमंतो
उवसंतपरोप्परवेरेहिं हरिहरिणसदलसूयरपमुहतिरिएहिं परिचत्तचरणपाणिएहिं उवासिजमाणो चउमासतवोविसेसं
पडिवन्नो दिट्ठो अणेण अजसमिओ नाम चारणो सुणिवरो, तं च दट्ठण परमविम्हयमुवहंतेण चित्तिंयं सागरदत्तेण-
अहो अच्छरियमच्छरियं जमच्चंतदुट्ठसत्तावि एवमेयं महासुणिं पज्जुवासंति, न सबहा हवइ एस सामन्नविक्रमो, ता
दंसणमवि एयस्स पवित्तयाकारणं, किं पुण विसेसवंदणंति समुच्छलियनिवभरभत्तिपभारनिससरंतरोमंचो समीवे
गंतूण पंचंगपणिवायपुरस्सरं निवडिओ से चलणेसु, सुणिणांवि उस्सग्गं पाराविऊण भवोत्तिकाऊण धम्मलाभेण
पडिलाभिओ एसो, तओ हरिसवियसियच्छिणा भणियं सागरदत्तेण-भयवं ! किमेवं अइदुकरं समायरह तुव्भे तवं ? किं
वा निवसह एवंविहे एगंतवासे ?, को वा फलविसेसो एयस्स दुरणुचराणुट्ठाणस्स ?, सुणिणा भणियं-भो महाणुभाव !
एयस्स अवस्सविणस्सरस्स सरीरस्स एस चेव लाभो जमणुट्ठिजइ संजमो, एसो य मणसो एगत्तीकरणमंतरेण न सम्मं
तीरइ कांडं, अओ एगंतवासो सुतवस्सीहिं सेविजइ, जं च तए भणियं-किमेअस्स फलं ?, तत्थ सुंदर ! निसामेसु ।
नरतिरियाइदुग्गइनिवायसंभवसुत्तिकखदुक्खाइं । दोगच्चवाहिंवेयणजरमरणपमोक्खवसणाइं ॥ १ ॥

लीलाए चिय उम्मूलिऊण सचरियसंजमा पुरिसा । वच्चंति सिवपयं जेण तेण (महयं) फलं तस्स ॥ २ ॥
 एत्तो चिय सप्पुरिसा रज्जं लच्छि च भोगविच्छड्ढं । एकपए चिय मोत्तुं संजमजोगं पवज्जंति ॥ ३ ॥
 ते धन्ना कथपुन्ना ते चिय कल्लाणकोसभूया य । जे परलोयसुहावहमेगं धम्मं उवचिणंति ॥ ४ ॥
 तत्तो सागरदत्तेण जंपियं जायपरमसद्धेण । भयवं ! भुवणच्छरियं एक्कं चरियं परं तुज्झ ॥ ५ ॥
 पढमवए चिय जेणं विणिज्जिओ दुज्जओ विसमवाणो । उम्मूलिओ य मोहो निग्गहिओ कोहजोहोडवि ॥ ६ ॥
 विद्धंसिओ य लोभो पणासिओ सव्वहाडभिमाणोडवि । नियडिक्कुडंगीगहणं निदहं ज्ञाणजलणेण ॥ ७ ॥
 एवंविहेण तुमए पवित्तियं तिहुअणंपि नीसेसं । भवक्खे निवडंतो जाओ लोगोडवि सालंबो ॥ ८ ॥
 एक्को अहं अधन्नो जो तुच्छेहियसुहस्स कज्जेणं । अज्जवि तुम्ह समीवे पवज्जं नो पवज्जामि ॥ ९ ॥
 चिंतामणिलाभंमिवि अहवा जो जेतियस्स किर जोगो । सो लहइ तत्तियं चिय ता मम उचियं कहइ धम्मं ॥ १० ॥
 एवं तेण भावसारं निवेइए निययाभिप्पाए पयडिओ साहुणा सम्मत्तभूलो दुवालसवयसणाहो सावगधम्मो,
 गहिओ अणेण, तओ कइवयवासराइं परिचत्तवावारंतरो तमेव सावगधम्मं सप्पभेयं सुणिणो समीवे सम्मं वियाणिऊण
 समागए सरयसमए उवसंतासु गिरिसरियासु वहंतसु पहिएसु ते जच्चतुरए गहाय गओ नियनयं, दिड्ढो जणगो,
 समप्पियं च से दविणजायं, जाओ य इमस्स परितोसो, सो य सामाइयाइधम्मनिरओ कालं वोलेइ । अवरंमि य वासरे

कओ सागरदत्तेण दिसिगमणसंखेवो, जहा अल अहोरत्तपि न गेहाओ बाहिं नीहरिस्सामित्ति, एत्थ च पत्थावे
 चरणट्टया गया ते जच्चतुरगा, हरिया दोहिं चोरोहिं, तदवहरणं च निवेइयं रक्खगेहिं सागरदत्तस्स, तेणावि नियध-
 म्माणुट्ठाणनिच्चलचित्तत्तणेण निसामिऊणवि न दिन्नं पच्चुत्तरं, सयणवगोवि लग्गो जंपिउं-अहो सागरदत्त ! किमेवं
 कट्टसमो मोणमवलंवि य चिट्ठसि ? न धावसि चोराणुमग्गओ, जओ गोसामिए उदासीणे तयणुचरा कह पयट्ठंति ?
 सागरदत्तेण भणियं-होउ किंपि, न विराहेसि मणांगं पि नियवयं, तओ निच्छयसुवल्लभ रोसेण जहागयं पडिनियत्तो
 सयणवग्गो, इओ य-ते दोउवि तक्करा पिट्ठओ कुडियमित्तमपेच्छमाणा निब्भया निरुद्धिग्गा गंतुं पयत्ता, गच्छंताण
 य नीसेसतुरगहणलोभदोसेण समुप्पन्नो दोणहंपि परोप्परं वहपरिणामो, तओ भोयणसमए पविट्ठा एगंमि गामे,
 कारावियं रंधणीगिहेसु पुढो पुढो थालीसु भोयणं, पक्खत्तं च अणलक्खिज्जमाणेहिं तत्थ दोहिवि महाविसं, सिद्धे
 य भोयणे कयत्तक्कालोचियकायद्या अमुणियावरोप्पराभिप्पाया उवविट्ठा भोयणं काउं, अह पढमकवल-
 कवलणेउवि अभिभूया ते विसविगारेण, निवडिया महीथले, कओ महाणसिणीए कलयलो, मिलिओ गामेलोगो, क-
 हिओ अणाए वुत्तंतो, ते य विसाभिभूया गया तक्खणमेव पंचत्तं, तुरंगमावि निस्सामियत्तिकाऊण रक्खिया
 गामजणेण, इओ य-सागरदत्तो पडिपुन्नंमि देसावगासियनियमे जिणविंबपूयापडिचित्तिं काऊण कइवयपुरिस-
 पक्खित्तो चलिओ तुरयाणुमग्गेण, अचंतविसिट्ठसउणोवल्लंभे य जायलामनिच्छओ समुप्पन्नचित्तुच्छाहो अविलंवि-

यगईए संसुहमागच्छन्तं पहियलोयं तुरयपउत्तिमापुच्छंतो कममधम्मसंजोएण पत्तो तं चेव गामं, पुट्ठो य तन्निवासि-
जणो, तेणांवि समप्पिया तुरगा, कहिओ य चोरवुत्ततो, सागरदत्तेणऽवि साहिओ गामलोगस्स नियमवइयरो, अओ
जिणिंदधम्मपसंसा ॥

अह सागरदत्तेणं चिंतियमुप्पन्नभवविरागेण । जह जिणधम्मपभावो पच्चक्खं चिय मए दिट्ठो ॥ १ ॥
ता किं अज्जवि वामूढमाणसो तिवखडुक्खदायारं । घरवासं पासंपिव सयखंडं नेव तोडेमि ? ॥ २ ॥
इय चिंतिऊण चत्ताइं तेण सद्वाणि पावठाणाणि । गहिया जिणिंददिक्खा सिवसुहभागी य जाओ य ॥ ३ ॥
इय इंदभूइ ! सिक्खावयस्स वीयस्स पालणे भणियं । फलमेत्तो तइयं पुण भणिमो सिक्खावयं ताव ॥ ४ ॥ १० ॥
आहारदेहसक्कारवंभवावारच्चागनिप्पणं । इह पोसहंति वुच्चइ तइयं सिक्खावयं पवरं ॥ १ ॥
दुविहं च इमं नेयं देसे सवे य तत्थ सव्वमि । सामाइयं पवज्जइ नियमा साहुब्ब उवउत्तो ॥ २ ॥
अप्पड्डिहुप्पडिलेहियऽपमज्जसेज्जाइ वज्जई एत्थ । सम्मं च अणुपालणमाहाराईसु सव्वेसु ॥ ३ ॥
पोसेइ कुसलधम्मे जं ताहाराइचागणुट्ठाणं । इह पोसहोत्ति भणणइ विहिणा जिणभासिएणेव ॥ ४ ॥
पाणंतिगोवसगेऽवि पोसहं धेत्तु जे न खंडंति । जिणदासो इव ते सुरसुहाइं मोक्खं च पावंति ॥ ५ ॥
गोयमसामिणा भणियं—भुवणेक्कदिवायर ! को एस जिणदासो ?, भयवया वागरियं—साहेमि, वसंतपुरे नयेर

अच्चंतंभवविरत्तचित्तो सबन्धवइदुपरमत्थभाविमई जिणदासो नाम सांवगो, नावव पडिक्कलचारिणी मंगलमुत्तिव
 तिधरागाणुगया मंगला नाम से भारिया, सो य बहुसो सामाइयपोसहतवोविसेसनिसेवणाभिरओ पव्वज्जं पडि-
 वज्जिउकामो बलतुलणं करेइ । सा य से भारिया अच्चंतसंकिलिट्ठयाए उक्कडवेयत्तणेण समणं व तं विजियमयण-
 विचारमवल्लोइऊण फरुसगिराए निब्भच्छंती भणइ—

हे सुद्ध ! धुत्तलोएण वंचिओ तंसि विज्जमाणेवि । जो भोगे वज्जित्ता अविज्जमाणं महसि मोक्खं ॥ १ ॥

निच्छक्खण ! दुरणुचरं तवोविसेसं निसेविउं कीस । सोसेसि नियसरीरं ? किं अप्पा वेरिओ तुज्झ ? ॥ २ ॥

जइ तं विसयविरत्तो पढमं चिय ता न कीस पव्वइओ । जाओ ? जमिणिह मं परिणिऊण एवं विडंबेसि ॥ ३ ॥

अह तं ममनिरवेक्खी जहाभिरुइयं करेसि एवं च । अहमवि तुह निरवेक्खा जं भावइ तं करिस्सामि ॥ ४ ॥

एवं तीए मज्जायवज्जिए जंपियंमि जिणदासो । उवसमभावियचित्तो महुरगिराए इमं भणइ ॥ ५ ॥

भेइ ! सद्धम्मपरम्मुहासि निम्मेरसुल्लवसि तेण । तुच्छेऽवि विसयसोक्खे कहऽन्नहा होज्ज पडिबंधो ! ॥ ६ ॥

थोयं जीयं जरमरणरोगसोगाऽणिचारियप्पसरा । एवं ठिएवि कह सुयणु ! कुणसि तं विसयवामोहं ? ॥ ७ ॥

तीए(ता) भणियं होउ अलं तुज्झ सद्धम्मदेसणाए ममं । सयमवि नद्धो दुच्चेट्ठ ! धिट्ठ अन्नपि नासेसि ॥ ८ ॥

इय तीए दुट्ठनिट्ठसुहीए दुट्ठिणयमूलभूमीए । निब्भच्छिओ समाणो जिणदासो मोणमल्लीणो ॥ ९ ॥

अन्नया यं चउइसिदिणंमि पडिवन्नो अणेण उववासो गहिउं चउविहंमि पोसहं, ठिओ य गिहेगंतभूयाए जाण-
सालाए निसिंमि काउस्सग्गेण, मंगलावि मयरद्धएण बाहिल्लमाणी उडिअयकुलाभिमामाणा अगणियाववायाः नीय-
गामिणीउ कामिणीउत्ति य पवायं सच्चवित्तिव घडिया सह विडेण, गेहजणलज्जाए पयडं चिय अकज्जमायरिउ-
मपारयंती पुवदिन्नसिंंगारेण विडेण सद्धि रयणीए समागया तं चेव जाणसालं, अच्चंधयारत्तणेण काउस्सग्गद्धियं
जिणदासमपेच्छमाणीए तंमि चेव पएसे पक्खित्तो लोहकीलगतिकखपइट्टाणो पल्लंको अणाए, तक्कीलेगेण य समी-
चवत्तिणो जिणदासस्स विद्धो सहावकोमलो चलणो, सा य विडेण सद्धिमकज्जमायरिउमारद्धा ।

जिणदासो पुण अइतिकखलोहकीलगविभिन्नचलणतलो । उप्पन्नगाढवियणो चित्तिउमेवं समाढत्तो ॥ १ ॥
मा ! जीव काहिसि तुमं मणागमेत्तंमि चित्तसंतावं । सयमवि दिट्ठे विलिए भज्जाए अकज्जसत्ताए ॥ २ ॥
जं परमत्थेण न एत्थ कोऽवि भज्जा व सयणवग्गो वा । किंतु सकज्जविणासे सवंपि परंमुहं ठाइ ॥ ३ ॥
अविय-तावच्चिय दंसइ पणइभावमायरइ ताव अणुकूलं । निययत्थविसंवायं जाव न पेच्छइ पणइलोगो ॥ ४ ॥
ता एयाए धम्मत्थसुन्नचित्ताए एत्थ को दोसो ? । इत्थी सभावओ चिय दुग्गेज्झा खुच्चई जेण ॥ ५ ॥
अइरक्खियावि अइपालियावि अइगाढरूढपणयावि । बाढं उवयरियाविहु देइ दुरंतं भयं महिला ॥ ६ ॥
एत्तो चिय सुणिवसभा सुबुद्धिमाहप्पमुणियपरमत्था । पच्चक्खरक्खसीहि व महिलाहिं समं न जंपति ॥ ७ ॥

ता ते चिय इह धन्ना सुलद्धनियजम्मजीवियफला य । जे उज्झिऊण महिला संजमसेल समभिरूढा ॥ ८ ॥
 धन्नो सण्डुमारो जो पुरमंतेउरं सिरिं रज्जं । उज्झित्ता निक्खंतो परमग्घा मोक्खसोक्खकए ॥ ९ ॥
 एक्को अहं अधन्नो जो कुलडाए अणत्थमूलाए । दुट्ठमहिलाए कजे एवं वुत्थोऽम्हि घरवासे ॥ १० ॥
 अहवा समइकंतत्थसोयेणं इमेण किं बहुणा ? । एत्तोवि सच्चविरइं भावेणाहं पवज्जामि ॥ ११ ॥
 इय चिंतिऊण तेणं तिचिहंतिविहेण चोसिरिय संगं । पंचपरमेट्ठिमंतो पारद्धो सरिउमणवरयं ॥ १२ ॥
 अह पवलचलणपीडोवक्कमियाऊ चइत्तु नियदेहं । भासुरसरीरधारी देवो वेमाणिओ जाओ ॥ १३ ॥
 आउक्खयंमि तत्तो सो चविऊणं विदेहवासंमि । निट्ठवियकम्मंगंठी पाविस्सइ सासयं ठाणं ॥ १४ ॥
 इय गोयम ! निच्चलमाणसस्स जिणभणियधम्मकज्जंमि । जायइ जीवस्स धुवं अकालखेवेण सिवलाभो ॥ १५ ॥ ११ ॥
 भणियं तइयं सिक्खावयं इमं संपयं पुण चउत्थं । एदंपज्जसमेयं जह होइ तहा निसामेह ॥ १ ॥
 अन्नार्हणं सुद्धाण कप्पणिज्जाण देसकालजुयं । दाणं जईणमुचियं चउत्थ सिक्खावयं एयं ॥ २ ॥
 सच्चित्तनिक्खवणयं वज्जइ सच्चित्तपिहणयं चेव । कालाइक्कम परववएस मच्छरिय पंचेव ॥ ३ ॥
 अन्नार्हण पयाणं निचंपिय होइ गिहिजणस्सुचियं । जइणो पडुच्च किं पुण पोसहउववासपारणए ? ॥ ४ ॥
 अतिहीण संविभागं नूणमकाउं न जे पजीमंति । ते साहुरिक्खओ इव देवाणवि होंति महणिज्जा ॥ ५ ॥

गोयमेण जंपियं-भुवणत्तयसामिसाल ! साहेसु को एस साहुरक्खिओत्ति, भगवया वागरियं-
आयन्नसु—अत्थि सयलदिसावलयविकखाया वाणारसी नाम नयरी, तहिं वसू नाम राया, सधेतेउरपहाणा वसुमई
देवी, वणियल्लोयसम्मओ जिणपालिओ सेट्ठी, जिणमई से भारिया, एयाणि चत्तारिवि परमसावगाणि परोप्परं
परुहगाढपेम्माणि य एक्कचित्तत्तणेणं जिणधम्मं पालेत्ति, अन्नया सेट्ठिणी नरिंदपत्ती य पंचवन्नसुरहिक्कुसुमदहि-
यक्खयसुगंधिगंधधूववासपडिपुन्नपडलकरपरियरियाओ गयाओ जिणालयं, विरइया अणेगविच्छित्तिमणहरा सच्च-
न्नुविंवाण पूया, तओ विचित्तशुइशुत्तदंडएहिं सुचिरं जिणं थुणिऊण पयाहिणं दाउं बाहिं नीहरिया, ताहिं एगत्य
पएसे अचंतदुइंसणो मच्छियाजालाभिणिभिणारावभीसणो वणसुहनिस्सरंतकिमिसंवलियपूयप्पवाहो सडियंगुलि-
नासोट्ठो कुट्टवाहिविणट्टदेहो एगो एुरिसो, तं च दडूण देवीए भणियं-भो महाणुभाव ! कीस सच्चन्नूणमासा-
यणं इहट्ठिओ करेसि?, तेण भणियं-नाहमेत्थ निवासत्थी समागओ, किंतु चेइयवंदणत्थं, सेट्ठिणीए भणियं-देवि !
जइ इत्तियमेत्तमेव पओयणं पडुच्च अच्छइ ता अच्छउ, को दोसो?, जओ सुस्समणावि जाव चेइयाइ वंदंति
वक्खाणं वा करेत्ति सिणाणं वा पेच्छंति (सिस्साणं वायणं वा पयच्छंति पु.) ताव जिणभवणे निवसेत्ति, देवीए
भणियं-तहावि विणट्टसारीरत्तेण न जुज्जइ एयस्स अच्छउं, अहवा निट्ठीवणाइं अकरिंतो सम्मसुवउत्तो निमेसमिच्चं
जिणविंवावलोयेणेण अण्णो समाहिमुप्पाएउ, किमजुत्तं?, सेट्ठिणीए भणियं-एवमेयं, को महाणुभावस्स एयस्स

अवराहो?, दुष्पण्डियाराणि पावकम्माणि एवंविहाहिं बिडंवणाहिं कयत्थिति निस्सरणं पाणिगणं, देवीए भणियं-
अलमुच्चावयभणियेव्वेणं, भो महाणुभाव ! साहम्मिओत्तिकाऊण पूयणिज्जोसि तुमंति ता साहेसु-किं ते पियं की-
रउ?, तेण जंपियं-किमेत्थ कायव्वं अत्थि?, पुर्विं दुच्चिन्नाणं कम्माणं फलविवागमणुहवंतस्स समाहिमरणं चिय मे
पत्थियव्वं, तंपि भागविवज्जएण दुल्लभं व लक्खिज्जइ, ताहिं भणियं-कहमेवं जाणिज्जइ?, कुट्टिणा भणियं-अहं
मंदभग्गो, अइसइणा भणियं-जहा तुमं मरणकाले सम्मत्तं वमिहिसि तेणेमं जाणामि, चित्तसंतावं च उव्वहामि,
ताहिं जंपियं-भइ ! तुह जइ एवं ता विसममावडियंति, एवं च खणमित्तं विगमिऊण विम्हियमणाओ गयाओ
ताओ सगिहं । अन्नंमि य वासेर चउनाणोवगओ सूरतेओ नाम सूरी समोसरिओ, तओ सेट्ठिणी देवी य गया
तवंदणत्थं, सुया धम्मकहा, पत्थावे य पुच्छियं ताहिं-भयवं ! पुवं चेइए गयाहिं अम्हेहिं जो कुट्टी दिट्ठो सो कीस
संमत्तं मरणसमए वमिही?, सूरिणा भणियं-सो पज्जंतसमए माणुस्सेसु आउवंधं काऊण उप्पज्जिहीं, न य गहिय-
सम्मत्तो अणंतरभवे मणुअत्तं तिरियत्तं वा पावइ, जेण भणियं-

सम्मदिट्ठी जीवो विमाणवज्जं न बंधए आउं । जइ उ न संमत्तजढो अहव न वद्धाउओ पुर्विं ॥ १ ॥

रायपत्तीए भणियं-कहिं पुण सो उववज्जिही?, सूरिणा जंपियं-एयाए सेट्ठिणीए पुत्तत्ताएत्ति, एवं सोचा वि-
म्हियाओ बंदिय सूरिं नियत्ताओ ताओ सगिहं, निरुवाविओ भाविपुत्तसिणेहेण सो कोट्टी सेट्ठिणीए, न य कंहंचि

दिद्वो, अइकंतेसु य कइवयवासेसु सो मरिऊण पाउभूओ तीए सेट्टिणीए गंभे, जाओ य पडिपुन्नदियेहहिं, कयं वद्धावणयं, समागओ राया सह वसुमईए देवीए, कयसुचियकायवं सेट्टिणा, तं च देवकुमारोचमं दारयं पेच्छिऊण भणियं देवीए-भो जिणमइ ! पेच्छ अच्छरियरूवं कम्मपरिणइं,

नीणंतपूयपवहो भीसणवणनिस्सरंतकिमिजालो । मच्छीहिं भिणिभिणंतो सडियंगुलि गलियनासोड्डो ॥ १ ॥

एवंविहो वराओ तुज्झ गिहे पवरविहवकलियम्मि । उववन्नो कयपुन्नो सो कोट्टी कह विसिड्ढंगो ? ॥ २ ॥

सेट्टिणीए भणियं-देवि ! एवंविहे संसारविलसिए परमत्थेण न किंपि अच्छरियमत्थि, जओ-कम्मवसवत्तिणो पाणिणो केण केण पयारेण न परिणमंति?, देवीए जंपियं-एवमेयं, अह अइकंते वारसाहे कयं से नामं साहुरक्खियत्ति, कालेण य पत्तो कुमारभावं, गाहिओ कलाओ, संपत्तजोवणो सोहणंमि तिहिमुहुत्तंमि परिणाविओ इब्भकंन्नंगं, विवाहपज्जंते य समाहूओ सेट्टिणा देवीए समेओ राया, पूइओ पहाणरयणाभरणवत्थसम्पणेण, पाडिओ तांण चलणेसु नववहूसणाहो साहुरक्खिगो, सो य देवीए सहासं भणिओ-वच्छ ! पेच्छ तं तारिसं इमं च एरिसं, साहुरक्खिएण भणियं-अंब ! न याणामि इमस्स अत्थं, एवं च तेण कहिए हसियं सहत्थतालं परोप्परं देविसेट्टिणीहिं, तओ रत्ता जंपियं-सेट्टि ! किमेयाओ हसंति?, सेट्टिणा भणियं-देव ! अहंपि सम्मं न याणामि, अओ ममावि कोउगं, पुच्छउ देवो, तओ पुच्छियं रत्ता-देवि ! किमेवं तए वागरियं?, सच्चहा साहेहत्ति वुत्ते तीए

सिद्धो पुबुत्तो कुट्टिबुत्ततो, तं च सोच्चा सुमरियपुबुभवो साहुरक्खिओ परं निवेयमावन्नो संसारयासस्स । अन्नया य तथुन्नपब्भारसमागरिसिओव समागओ विजयघोसो नाम सूरी, पउरलोणेण समं सो गओ तच्चंदणत्थं, सविणयं पणमिऊण निसन्नो गुरुचलणंतिए, सुया धम्मदेसणा, तहाविहकम्मक्खओवसमेण जाओ से देसविरइपरिणामो, पडिबन्नो य सूरिसमीवे दुवालसरूवो सावगधम्मो, अन्नया य अट्टमीए कओ अणेण पोसहोववासो, इओ य कप्पसमत्तीए विहरिया सूरिणो, सो य पारणगदिवसे पोसहं पाराविऊण उचियसमए अतिहिंसंविभागं काउमणो पडिओ य साहुसमीवे, गेहाओ नीहरंतो य भणिओ जणणीए-वच्छ ! कहिं वच्चसि?, भुंजेसु ताव सिद्धं वट्ठइ, साहुरक्खिओ भणिंयं-अम्मो ! अतिहिंसंविभागयं पडिवज्जिय कहं गुरुणो असंविभाइय सयं भुंजामि ?, ता वाहरामि ताव साहुणो, तीए भणिंयं-पुत्त ! विहरिया अन्नत्थ भयवंतो किं न याणसि तुमं ?, एवं तीए कहिए गहिओ सो रणरणएण समाहओ सोगेणं पारद्धो अरईए, नियत्तिऊण य पडिओ भंचिए, चिंतिउमाढत्तो य—

कह पोसहोववासो कओ मए ? कह व विहरिया गुरुणो ? । अन्नं चित्तियमन्नं च निवडियं मंदभगगस्स ॥ १ ॥

अहवा मरुत्थलीए किं कप्पतरू कयावि उग्गमई । मायंगमंदिरे वा छज्जइ अइरावणो हत्थी ? ॥ २ ॥

आजम्मरोगेहे विसहकंदोदुदलविसालच्छी । लच्छी कयावि पविसइ करयल्लेहंतसरसिरुहा ? ॥ ३ ॥

अम्हारिसस्स किं वा पुन्नविहीणस्स एत्थ पत्थावे । अधरियंचितामणिणो मुणिणो भिक्खट्टया इति ? ॥ ४ ॥
सग्गापवग्गसंसग्गमूलहेऊवि मज्झ पावस्स । एवं च निरणुवंधो मन्ने सम्मत्तलामोडवि ॥ ५ ॥

इय सो जाव अट्टुहट्टो सोगसमुदयरुद्धकंठो अच्छइ ताव जणणीए पुणो भणिओ-अहो पुत्त ! मा चिरावेहि,
करेसु भोयणंति, साधुरिक्खिएण भणियं-अम्मो ! अलाहि भोयणेण, जइ समणे एत्थ पत्थावे सहत्थेण न पडि-
लाभेमि ता निब्भंतं न भुंजामि, एत्थंतरे तेहसमागएण दिट्ठो सो देवेण, तओ चित्तियमणेण-अहो महाभागस्स
परिणई अहो निययसरीरनिरेक्खया, ता तहा करेमि जहा पारेइत्तिविगप्पिऊण अणेण विडविओ साहुसंधाडगो,
पविट्ठो तस्स गेहे, तं च पेच्छिऊण ससंभमं भणियं जणणीए-पुत्त ! तुह पुन्नोदएण आगया कत्तोडवि साहुणो,
ता एहि सहत्थेण पडिलाभेसु संपयं, एवं सोच्चा अणणसरिसं हरिसुल्लासं वंहंतो झत्ति परिचत्तसयणिज्जो वंदिऊण
तवस्सिणो परमभत्तीए पडिलाभिऊण य कयकिच्चमप्पाणं मन्नंतो केत्तिंयपि भूभागमणुगमिय नियत्तिओ सगिहं,
गिलाणाइचित्तं च काऊण जिमिओत्ति । एवं सो उभयलोगसाहगो जाओ ।

इय गोंयम ! संखेवेण तुज्झ कहियाइं बारस वयाइं । एत्तियमेत्तो य इमो सांवधम्मस्स परमत्थो ॥ १ ॥
एयस्स सेवणेणं गंतूण भवन्नवस्स पज्जंतं । पत्ता अणंतजीवा सासयसोक्खंमिं मोक्खंमि ॥ २ ॥
ते धन्ना सप्पुरिसा तेहिं सुलद्धं च माणुसं जम्मं । जे भावसारमतुलं एयं धम्मं पवज्जंति ॥ ३ ॥

ता गोअमं ! जं तुमए पुवं पुट्टोम्हि कह भवम्मि जिया । पुणरुत्तमणंतदुहोहपीडिया परिभमंतित्ति १, ॥ ४ ॥

तत्थेमं चिय नणु मूलकारणं जन्न सहरिसं विरइं । सम्मत्तगुणसणाहं भणियविहाणेण गिणहंति ॥ ५ ॥

एवं कहिए तित्थंकरेण गिहिधम्मवित्थरे तुट्टो । पयवीढलीढसीसो पढमो सीसो जिणं शुणइ ॥ ६ ॥

जय तियलोयपियामह ! वम्महमाहप्पनिहलणधीर ! । ललणासिंसारुम्भडकखखेवेडवि अक्खुब्भ ! ॥ १ ॥

भवगत्तपडंतजणोहसरण रणरहिय महिय तियसेहिं । नायकुलंवरपुन्निममयंक ! जय जय निरायंक ! ॥ २ ॥

एगेणवि जह तुमए पयत्थसत्था जए पवित्थरिया । तह अन्नतित्थिएहिं न समत्थेहिवि मणागंपि ॥ ३ ॥

तुह अत्थसारलेसं मन्ने रोरच्च तित्थिया घेचुं । जाया अनन्नमाहप्पगविया नाणविभवेण ॥ ४ ॥

जं न हणिज्जइ दिणयरकरपसरपईवजोइरयणेहिं । चित्तब्भंतरलीणं तंपि तमं पडु ! हयं तुमए ॥ ५ ॥

असरिसं जयगुरुगुरुभत्तिपभावनिस्सरंतरोमंचो । इय थोऊण निविट्टो सट्टाणे गणहरवरिट्ठो ॥ ६ ॥

एत्थंतरे दुवालसवयेदेसणानिसामणसमुप्पन्नभववेरगेहिं केहिवि पडिच्चन्ना देसविरइं, अन्नेहिं उज्झियाइं मिच्छत्त-
कायच्चाइं, केहिवि गहिया सब्बविरइं । इओ य सेणियनरिंदो थोवमेत्तंपि विरइं काउमसमत्थो तित्थाहिंवं पणमिऊण
भणिउमाढत्तो-भयवं ! जो अचंतमहारंभो महापरिगहो सब्बहा विरइरहियो सो कहां भवन्नवं नित्थरिस्सइ १,
जयगुरुणा भणियं-भो नरिंद ! सेणिय ! देसविरइं वा सब्बविरइं वा काउमपायंतो सम्मत्ते निच्चलो होज्जा, एवं

जयगुरुणा उवइष्टे तहत्ति पडिवज्जिऊण जहागयं पडिगओ राया नमंतमउलिमंडलो, देवलोगं पट्टिया आखंडला, विइक्कंता पढमा पोरसी । अह चारणगणेहिं शुबंतो जयगुरू सिंघासणाओ समुट्टिऊण पुबं चिय सुरविरइयंभि देवच्छंदयंमि सुहसेज्जाए निसन्नो । गोयमसामीडवि कप्पोत्तिकाऊण भगवओ मणिपायपीडासीणो धम्ममेदसण काउमारद्धो । सो य केत्तियं पुवभवाइं साहइ ? केरिसो वा लक्खिज्जइ ? तत्थ भन्नइ—

संखाईए उ भवे साहइ जं वा परो उ पुच्छेज्जां । न य णं अणाइसेसी वियाणई एस छउमतथो ॥ १ ॥

असुरसुरखयरकिन्नरनरतिरिया सुक्कसेसवावारा । सवणंजलीहिं तेहसणामयं परिपियंति दढं ॥ २ ॥

आइक्खइ गणनाहो धम्मं ता जाव पोरिसी बीया । पच्छा पइदिणकिच्चं सामायांरिं समायरइ ॥ ३ ॥

एवं च समइक्कंतेसु कइसुवि वासरेसु एयंमि वासरे सिंहासणे निसन्नस्स चद्धमाणस्स नियनियट्ठाणनिविट्ठे चउ-
विहेवि देवनिकाए पंजलिउडं पज्जुवासमाणे य सेणियमहानरिंदे एगो सुरो मायासीलयाए कुट्टिरूवं विउच्चि-
ऊण सरसगोसीसचंदणरसच्छडाहिं सररीरविणिस्सरंतपूयसंकाकारिणीहिं भयवंओ समीवमल्लीणो चलणकमलवि-
लेवणं काउमारद्धो, तं च तहाविहं दुगुंछणिज्जरूवं पेच्छिऊण चितियं सेणिएण-अहो को एस दुरायारो गलंत-
गाढकोढसुढियसररीरदुगंगंधवाहेण दूमितो सयलंपि परिसं भुवणेक्कगुरुणो समीवट्टिओ एवं अचासायणं
कुणइ ? अहवां कुणउ किंपि ताव उट्टियाए पुण परिसाए अवस्सं मए निग्गहियवोत्ति विक्कंपतेण छीयमाणेण

अह कोढियगुरेण भणियं-जीवसुत्ति, सुहुत्तरे य वोलीणे छिकियमभयकुमारेण, पुणो तेण भणियं-जीवाहि वा मराहि वा, कालसूयरिएण छीए भणियं-मा जीव मा मर, समइकंते य खणंतरे सुवणेफगुरुणा छीयं, भणियं-मर-सुत्ति, तं च सोचा अच्चंतजिणानाहपक्खवाएण विंभियपवलकोवानलेण राइणा भणिया समीववत्तिणो पुरिसा-अरे एयं दुरायारं गुरुपघणीयमुट्ठियाए परिसाए हत्थे घेत्तूण मे समप्पेज्जह जेण दंसेमिदुध्णिणयफलं, तेहिं भणियं-जं देवो आणवेइत्ति, अह जायंमि पहरपज्जवसाणे सट्ठाणं पट्ठिएसु तियसेसु सो कुट्ठिसुरो जयगुरुं परमायेरेण पणमिज्जण गंतुमारद्धो, ते य पुरिसा नरिंदाएसमणुवत्तंता तं घेतुमुवट्ठिया, तयणंतरं च एस गओ एस गओ सो कुट्ठी एवमु-ल्लवंताण रायपुरिसाण पुरओ देवो अइसणं पत्तो, [इय वाहरंतेहिं] तेहिं विलक्खीभूयमाणसेहिं निवेइयमेयं राइणो, अह बीयदिवसे परमकोज्जहलमुवहंतेण रत्ता पत्थावे पुच्छओ जयगुरू-भयवं! अइकंतवासरे तुग्हं समीववत्ती कुट्ठ-विलीणकाओ अविभावणिज्जसरूवो को पुरिसो आसि?, भयवया जंविंयं-महाराय! देवो, सो संपयं दहुरंकविमाणे समुप्पन्नो, रत्ता भणियं-कहं चिय?, भगवया वागरियं-निसामेसु,

‘अत्थि’ वच्छाविसए कोसंबी नाम नयरी, तहिं च सयाणिओ नाम नरवई, साडुयगो नाम माहणो, सो यं ज-म्माणंतरमेव रूंददारिद्रोवद्दवपीडिओ कहकहवि कणवित्तीए कालं गमेइ, अन्नया य आवन्नसत्ताए खरमुहीनामाए भज्जाए भणिओ एसो-भो बंभण! आसन्नो पसवसमओ, न य घरे घयंतंदुलाइं अत्थि, ता कीस निचिंतो चिट्ठसि.?

तेण भणियं-भेदे ! पइदिणभिव्खाभमणेण नट्टा मे बुद्धी, ता तुमं चेव साहेसु को एत्थ पत्थाचे दवज्जणोयाउत्ति ? , तीए भणियं-गच्छ, पत्थियं ओलगेसु सवायेरेण, न तं विणा अविज्जइ दालिहंति बुत्ते सो पइदिणं कुसुमहत्थो पत्थियं ओलगिगउमाढत्तो, अन्नया य अणुकूल्याए विहिणो से विणयमवल्लोइऊण तुट्ठो राया, भणियं च तेण-भो वंभण ! मग्गसु जहिच्चियंति, तेण भणियं-देव ! वंभणिं आपुच्छऊण मग्गामि, अणुमन्निओ रत्ता गओ गेहंमि, भणिया वंभणी-भेदे ! तुट्ठो राया, ता साहेसु किमहं पत्थेमि ? , तीए भणियं-पइदिवसमग्गासणे भोयणं दीणारं दक्खिणाए दिणमज्झे एगवारं ओसारयं च पत्थेहि, एत्तियमेत्तेण चेव तुज्झ पओयणं, किमन्नेण किलेसायासनि-बंधणेण अहिगाराइणत्ति ? , पडिस्सुयमणेणं, निवेइयं च एयं रत्तो, पडिचन्नं च तेण, एवं च राइणो पुरो पइदिणं भुंजमाणो जाओ सो महाधणो, रायाणुवित्तीए य पइदिणमामंतिज्जइ भोयणकरणे य मंतिसामंतेहिं, दक्खिणालोभेण य सो गले अंगुलीपक्खेवपुच्चयं पुच्चमुत्तभोयणं वमिऊण पुणो पुणो अक्करावरगिहेसु भुंजमाणो गहिओ कुट्टवाहिणा, संभिन्ना सबेवि तस्स सरीरावयवा, दुइंसणोत्ति पडिसिद्धो राइणा, तट्ठाणे से पइट्ठिओ जेट्ठपुत्तो, सो य रायउलंमि भोयणं लहइ, इयरो य वेलाए भोयणमेत्तमवि अपावमाणो पुत्तेहिं एगंतपरिचत्तो परिभूयमग्गणं कलिऊण हिययंतो अमरिसमुच्चंतो चित्तेइ-अहो अकयन्नुओ खलसहावो य पुत्ताइपरियणो जेण मं एवं परिभवइ, ता तहा करेमि जहा एयस्सवि एसा अवत्था हवइत्ति चित्तिऊण वाहराविओ तेण जेट्ठपुत्तो, भणिओ य-वच्छ ! वडुरोगभरविडुरियस्स

तुम्हारिसमुहकमलपलयेणेऽवि असमत्थस्स मे न जुज्झइ खणंपि जीविउं, केवलं वच्छ ! अम्ह कुले एस समायारो-
मंतेहिं पसुं चिरमभिमंतिऊण कुंहुवस्स भक्खणत्थं पणामिज्झइ, पच्छा उवसंहरिज्झइ, एवं कए पुत्ताइसंता-
णस्स कल्लाणं हवइ, ता संपाडिज्झउ मे एको पसू जेणऽहं तहा करेमि, परितुट्ठेण समप्पिओ पुत्तेण, तेणावि घया-
इणा अप्पाणं अब्भंगिऊण उवळणियाओ पइदियहं भुंजावंतेण कुट्टवाही संचारिओ तस्स, वाहिसंभिन्नगत्तं च ते
सुणिऊण आहूओ तेण जेट्टपुत्तो, भणिओ य-पुत्त ! एस पसू मए अभिमंतिओ वट्टइ, ता तुमं सपरियणो एयमंस-
सुवभुंजसु जेण कल्लाणभागी भवसि, अहंपि सरीरचायं करेमि, तहा कयं पुत्तेण, संकंतो य तम्मंसभोयणेण सपरि-
यणस्स तस्स कुट्टवाही, तओ पहिट्टहियओ सो निग्गओ नगराओ, पइदिणं गच्छमाणो पत्तो महाडविं च, तत्थ य
गिम्हुम्हकिलंतो तण्हासुसियकंठो सलिलन्नेसणत्थं इओ तओ परिब्भमंतो गओ एगं गिरिनिगुंजं, दिट्ठं च तत्थ विचि-
त्तकसायतरुपत्तपुष्पफलरसपागकलिलं सलिलं, तं च आकंठं पीयमणेण, तवसेण य जाओ से विरेगो, निवडियाइं कि-
मिजालाइं सुज्झिउमारद्धं सरीरं, एवं च अणुदिणं तप्पाणेण पणट्टुकुट्टवाही जायपुणन्नवसरीरो नियत्तिऊण गओ
सगिहं, तहिं च गलंतकुट्टविणट्टेदहं पुत्ताइपरियणं दट्ठूण सामरिसं जंपियं तेण-अरे पेच्छह नियदुच्चिलसियाणं
कडुवियागं, तेहिं भणियं-कहं चिय ? एवं पुच्छए तेण सिट्ठो पुच्चुत्तंतो । ताणि य एवमायन्निऊण रुडाइं अक्को-
सिउमारद्धाइं । कहं चिय ?—

रे पावकम्म ! निग्धिण ! चिलायसमसील ! एरिसं काउं । अज्जवि अम्हाण पुरो कह नियवयणं पयासेसि ? ॥ १ ॥
मायंगाणवि अणुचियमेवंचिहकम्ममायरंतेण । नरयंमि पाडियाओ कुलकोडीओ असंखाओ ॥ २ ॥
दुज्जम्मजाय ! तुमए लोयपवाओऽवि एस किन्न सुओ । जं सकरवट्ठिओ विसतरुत्ति नो छिंदिउं जुत्तो ? ॥ ३ ॥
इय गेहजणेण बहुप्पयारदुव्वयणद्धूमियसरीरो । तत्तो विणिक्खमित्ता संपत्तो एत्थ नयरम्मि ॥ ४ ॥

छुहाभिहओ य अल्लीणो नयरदुवारपालस्स, तेणावि किंपि भोयणविसेसं दाऊण भणिओ-अरे इह दुवारदे-
वयाए समीवट्ठिओ चिट्ठेज्जासु जाव अहं भयवंतं महावीरं वंदिऊण आगच्छामित्ति, पडिवन्नं च तेण, इयरोऽवि
आगओ मम वंदणत्थं, तत्थ य पत्थावे ऊसवविसेसवसओ पुरनारीजणो वलिपूयलियाईहिं तीसे दुवारदेवयाए पूयं
करेइ, सो य माहणो रोरव्व अच्छिन्नवंछो तं बलिं भक्खिऊण पकामाहारेण रयणीए समुप्पन्नतण्हो अइभरियपो-
ट्टत्तणेण अंतो अमायंतै सलिलंमि अट्टज्झाणोवगओ मरिऊण इहेव नयरादूरवत्तिणीए पउरजलभरियाए वावीए
दहुरो जाओ, तत्थ य जाव पज्जत्तीभावमुवागओ ताव निसामेइ जलवाहिविलयाणं परोप्परोह्वावं, जहा-इले ! हले
सिग्घं पयच्छसु मे मग्गं जेण कयकायवा झत्ति भयवंतं महावीरं वंदामित्ति, एयं च सुणंतस्स कत्थवि मए एस
सद्दो सुयपुव्वोत्ति ईहापोहमग्गणं कुणंतस्स समुप्पन्नं से जाईसरणं, सुणिओ पुव्वजम्मो, तओ अहंपि तं भयवंतं
वंदामित्ति चिंतिऊण भत्तीए नीहरिओ वावीओ, पयट्ठो आगंतुं रायमग्गेण, तक्खणं च तुह तरलतुरयखरखुरप्प-

हारज्जरियसरीरो सुहज्जवसायवसेण मओ समाणो दहुरंके विमाणे देवत्तणेणमुप्पन्नो, अवहिमुणियपुच्चवइयरो य मम वंदणत्थं आगओ । ता देवाणुप्पिया ! न एस कुट्ठी, किंतु-सुरोत्ति ॥

सेणिएण भणियं-भयवं ! कीस पुण इमेण मया छीए भणियं-जीव, अभयकुमारेण छीए-जीव वा मर वत्ति, कालसूयरिएण छिक्किए-मा जीव मा मर, तुब्भेहिं छीए भणियं-मरसुत्ति, जयगुरुणा जंपियं-सुणासु एत्थ कारण-तुमं हि जीवमाणो रज्जसुहसुवभुंजसि, मरणे य नरयं गमिस्ससि, अओ अणेण महाणुभावेण भणियं-जीवसुत्ति । अभयकुमारोऽवि धम्मनिरतत्तणेण सावज्जवज्जरई ता तस्स जीवमाणस्स रायलच्छिभोगो मयस्सवि सुरसोक्ख-लाभो, अओ जंपियं जीव वा मर वत्ति, कालसोयरिओऽवि जीवमाणो अणेगनिरवराहपाणिगणघायेणण वहुं पावम-ज्जिणइ, मओ पुण नियमा नरयगामी, तेण भणियं-मा जीव मा मरत्ति, अवि य—

अइहुट्ठकम्मवसओ अवस्स गंतच्च नरयठाणेण । नरनाहार्इण परं जीवियमेक्क हवइ सेयं ॥ १ ॥

तवनियमसुट्ठियाणं कल्लाणं जीवियंपि मरणंपि । जीयंतऽज्जंति गुणा मयावि पुण सोगगं जंति ॥ २ ॥

अहियं मरणं अहियं च जीवियं पावकम्मकारीणं । तमसंमि पडंति मया वेरं वहुंति जीवंता ॥ ३ ॥

जं च मए छीयंमि मरसुत्ति भणियं तत्थवि इमं निमित्तं-तुमं किमिह मच्चलोए विविहावयानिवासभूए वससि ?,

जं न माणुस्सं विग्गहसुज्झिऊण एगंतसुहं सिवं गच्छसिन्ति ।

अहं सेणियनरिंदो पुद्बुत्तनरयनिवडणायन्नणजायगाढसोगावेगो भणिउं पवत्तो-भयवं ! समग्गभुवणत्तयरक्खाव-
वद्धलक्खे तुमंमि सामिसाले किं मए नरए गंतव्वं ? जेण—

तुह नाममेत्तसंकित्तणं पि नासइ दिणुब्भवं पावं । कमकमलपलयणमवि विणिवारइ दुरियरासिं पि ॥ १ ॥

एक्केणऽवि तुह चलणोवरींमि खित्तेण नाह ! कुसुमेण । चोज्जमिणं रुंदाणिवि नरयदुवाराइं रुज्झंति ॥ २ ॥

एक्कोऽवि नमोक्कारो कीरंतो तुज्झ सामि ! भत्तीए । जायइ हेऊ सग्गापवग्गसंवाससोक्ख्खणं ॥ ३ ॥

ता वाहिरोगसोगुब्भवाइं दुक्खाइं नाह ! विलसंति । जाव न सवणपुडेहिं पविसइ वयणामयं तुज्झ ॥ ४ ॥

ता कह णु नाह ! तुह नाममंतसारक्खेरेहिं चिंततो । सेलुक्किन्नेहि वि होज्जा मे नरयदुहलाभो ? ॥ ५ ॥

दुग्गइ गत्तब्भंतरपडंततेलोकएक्कसाहारे । नाहे तुमएवि ममं एवंविहवसणमावडियं ॥ ६ ॥

धी धी निरत्थयं मज्झ जीवियं मंदभग्गसिरमणिणो । जं एरिससामग्गीयवि जस्स इमा दुग्गई जाया ॥ ७ ॥

इय एवंविहअइगाढसोगविगलंतनयणसल्लिणेण । नरवइणा जयगुरुणो विन्नत्तं नरयभीएण ॥ ८ ॥

एवं च ससोगजंपिरं पुहईवइं अवलोइऊण करुणाभरमंथरनयणेण भणियं जिणेण-भो देवाणुप्पिय ! कीस संता-
वमुच्चहसि ? जइविय सम्मत्तलाभाओ पुव्वमेव निवद्धाऊत्ति नरए निवडिस्ससि तहावि लद्धं तुमए लहिअव्वं, जओ

खाइगसम्मदिट्ठी तुमं, आगमिस्साए य उस्सप्पिणीए तत्तो उवट्ठित्ता पडमनाभनामो पढमत्तिथयरो भविस्ससि ।
एवं निसामिऊण पहिट्ठो राया भणिउमाढत्तो—

जइ तित्थयरो होहामि नाह ! तुह पायपूयणपसाया । ता थेवकालिया नरयवेयणा मज्झ किं काही ? ॥ १ ॥
किं चोजं जयबंधव ! जं तुह सरणेवि मारिसेहिं लहुं । सुवणब्भुयभूयाइं सामिय ! सोक्खाइं लब्भंति ? ॥ २ ॥
अहवा किं सोऽवि पट्ठ सेविजइ जोगयंयि दट्ठण । जो अत्तणो न तुल्लं देइ पयं सेवगजणस्स ॥ ३ ॥
एवंविहवरकल्लाणदायगं जाणिउंयि जो न तुमं । सेवेइ जो न मणुओ सो नूनं अत्तणो सत्तु ॥ ४ ॥
एवं सुचिरं जयगुरुं अभिनंदिऊण नयरं पविट्ठेण सेणिएण वाहरिओ मंतिसामंतअंतेउरपसुहो जणो, भणिओ
य-जो जयगुरूणो समीचे पव्वजं पडिवजइ तमहं न वोरमि, एवं सोच्चा बहवे कुमारा मंतिणो सामंता अंतेउरीजणो
नायरलोगो य निक्खंतो भयवओ समीचे, कइवयदिणावसाणे य अणेगाहिं देवकोडीहिं अणुगम्ममाणो भगवं वट्ठ-
माणो बहिया विहरिउमारद्धो ।

एगया तदिणदिविख्याणंयि थेवपव्वजापज्जायाणं सुणीणं केवलनाणमुपल्लमाणमवलोइऊण जायसंसओ जयगु-
रुमापुच्छइ-भयवं ! किमहं केवलालोयभागी भविस्सामि न वा ?, सामिणा जंपियं-भो देवाणुप्पिय ! मा संतप्पसु,
अंते तुल्ला भविस्सामोत्ति, इमं सोच्चा तुट्ठो गोयमो । अह भयवं तेसु तेसु पुरागराइसु अइसुत्तयलोहज्झयअभय-

कुमारधन्नयसालिभद्वंदयसिचपमुहं भवजणं पद्माविऊण चंपापुरिं वचंतो चिन्नविओ सालमहासालरायरिसीहिं-
सामि ! तुम्हाणुण्णाए अम्हे पिट्ठिचंपाए जामो, जइ पुण तहिं गयाण सयणवग्गस्स सम्मत्ताइलामो जायइत्ति बुत्ते
गोअमसामीं नायगं तेसिं दाऊण भुवणिक्कबंधवो गओ चंपापुरिं, तहिं च पुच्चक्कमेण विरइयंमि समोसरणे निसन्नो
जयगुरू, आगओ चउच्चिहो देवनिकाओ नयरजणो य, पत्थुया तित्थाहिवइणा धम्मदेसणा, तत्थ केणइ पत्थावेण
सामिणा इमं वागरियं-जो नियसत्तीए अट्ठावयं विलग्गइ सो तेणेव भवेण सिज्झइ, इमं च सोचा विम्बियमणा देवा
अन्नमन्नस्स कहिउं पवत्ता । इओ य गोअमसामी पिट्ठिचंपाए नयरीए सालमहासालाणं भगिणीसुयं गागलिनरिंदं जण-
णीजणगसमेयं पद्माविऊण इयरजणं च धम्मे ठाविऊण चंपानयरीहुत्तं गंतुं पयद्दो, तेसिं च सालमहासालाणं अम्मपि-
उसमेयस्स गागलिमुणिणो य सुहज्झाणवसाओ ससुप्पन्नं केवलं नाणं, एवं ताणि उप्पन्ननाणाणि अलक्खियसरूवाणि
मगंगंमि इत्ति । अह गोअमसामी तं जयगुरूवइदं अट्ठावयारोहसिद्धिभरूवं देवपवायं सुणेइ, तेण य विम्बियहियओ
पत्तो जिणंत्तियं, तओ तिपयाहिणापुव्वगं पणमिऊण जयगुरूं जाव मगगओ पलोयइ ताव सालमहासालाइणो सामीं
पयक्खिखणेउं 'नमो तित्थस्स'त्ति भणित्ता केवलिपरिसाभिमुहं पट्टिए दट्ठुण भणइ-भो भो कहिं वच्चह?, एत्तो एह,
सामीं वंदहत्ति, सामिणा भणियं-गोअम ! मा केवली आसाएहि, ताहे सो खामेइ, संवेगमुवगओ चित्तेइ य-अहो
इमेहिं महाणुभावेहिं थेवपव्वज्जापज्जाएणवि पावियं पावणिज्जं, अहं पुण सुचिराणुचरियसामन्नोऽवि न केवलालो-

यमुवलभामि, ता किमिह कीरइ?, अहवा किमणेण चिंतिण्ण?, वच्चामि अट्ठावयं, जेण देवेहिं इममाइहुं-जो किर
 ससत्तीए अट्ठावयमारोहइ सो तेणेव भवेण सिज्झइत्ति, एवं च चिंतयतस्सं तस्स अभिप्पायं अट्ठावयकडगवासि-
 तावसोवयारं च सुणिऊण भणियं जिणेण-भो गोयम! चेइयवंदणहुमट्ठावयसेलं वच्चसुत्ति, तओ भयवं गोअमो पहि-
 द्दहियओ पट्ठिओ अट्ठावयं, तहिं च अट्ठावए तमेव सुरप्पवायं निसांमिऊण पत्तेयं पंचपंचतावससयपरि-
 वारा कुंडिन्नदिन्नसेवालथनामानो तिन्नि कुलवइणो जहक्कमचउत्थछट्ठमपारणगदिणेसु सचित्तकंदमूलाइपरिसडि-
 यंपंडुपत्तसुक्कसेवालभोइणो पढमवीयतइयमेहलासु समारूढा समाणा तक्खणं चिय तरुणतरणिमासुरोदारसरीरं
 गोयमसामीं तं पएसमणुपत्तं दट्ठूण जंपंति-अहो किमेस पीवरसरीरो समणो आरुहिही जं अम्हे महातवस्सिणो
 तवकिसियसरीरा न तरामो आरुहिउं?, एवं च तेसिं जंपताणं भयवं गोअमो जंघाचारणलद्धीए लूयातंतुरविकर-
 मेत्तंपि निस्साए काऊण अविंलंविग्रइए समारूढो अट्ठावयं, अह तंमि चक्खुगोयरमइक्कंतंमि ते तिन्निवि कुल-
 वइणो विम्बिहयमाणसा चिंतंति-जइ एस महप्पा इमिणा पेहेण ओयरइ ता वयमेयस्स सिस्सा भवामोत्ति, गोअ-
 मसामीवि उसमाइजिणिंदे वंदिऊण ईसाणदिसिबिभागे असोगतरुतले मणिसिलापट्टए तं रयणीवासमुचगओ ।
 एत्थ य पत्थावे वेसमणो नाम सक्कदिसापालो चेइयपूयाए पज्जंते गोअमसामीं वंदित्ता समीवे निसीयइ, भयवंपि
 समणगुणे सचित्थरं कहइ, जहा-भयवंतो साहवो अंताहारा पंताहारा विचित्तवकिसियदेहा हवंति इच्चाइ, वेस-

मणो चित्तेह-एस भयवं एरिसे साहुगुणे कहेइ, अप्पणा उ तं सरिरसिरिमुव्हइ जा तियसाणवि नत्थि, इमं च तदभिप्पायं सुणिऊण गोयमसामी पुंडरीयज्झयणं परूवेइ । जहा—

पुंडरिगिणीपुरीए राया नामेण आसि पुंडरिओ । कंडरिओ से भाया पव्वजं सो पव्वनो य ॥ १ ॥

अइदुक्करयाए संजमस्स सो अन्नया परामग्गो । पव्वजं मोत्तुमणो विसयपिवासाए पारद्धो ॥ २ ॥

गुरुकुलवासं चेच्चा समागओ भाडणो समीवंमि । तेणाविह सो नातो जहेस रज्जं समीहेइ ॥ ३ ॥

ताहे पुंडरिएणं निययं रज्जं समप्पियं तस्स । तवेसो पुण गहिओ चलिओ य गुरुस्स पासंमि ॥ ४ ॥

गच्छंतो स महप्पा अणुचियआहारदोसओ मरिउं । सुद्धज्झवसाणाओ उवचियदेहोऽवि उववन्नो ॥ ५ ॥

सव्वट्ठविमाणंमि इयरो पुण गाढकिसियगतोऽवि । रुद्धज्झवसाणाओ सत्तममहिनारगो जाओ ॥ ६ ॥ जुम्मं ।

ता भो देवाणुप्पिय ! किसत्तमियरं च एत्थ नो हेऊ । किं तु सुहज्झवसाणं तं पुण जह होइ तह किच्चं ॥ ७ ॥

इय गोयमेण भणिए सो देवो सुणियमाणसविगप्पो । वंदित्ता भत्तीए जहागयं पडिनियत्तोत्ति ॥ ८ ॥

गोयमसामीऽवि निसावसाणे जिणविंवाइ नमंसिऊण नगवराओ ओयरंतो हरिसुन्नामियकंधरेहिं सविणयं विन्नत्तो तावसेहिं-भयवं ! अम्हे तुम्ह सिस्सा तुम्हे अम्ह धम्मगुरुणो, ता पसीयह दिक्खादाणेणं, गणहारिणा जंपियं-भो महाभावा ! तुम्हं अम्हाण य तिलोयनाहो गुरु, तेहिं भणियं-तुम्हवि अन्नो गुरु?, तओ गोयमो जयगुरुणो

गुणसंभवं काउमारद्वो, ते य सुहुयरं बह्मिपरिणामा उचट्टिया पवइउं, पवाविया य गणहारिणा, समप्पियाणि
 तेसिं देवयाए रयहरणाइं, अह तेहिं पन्नरसतावससएहिं परियरिओ गंतुं पयत्तो, जाए य भोयणसमए गोय-
 मसामिणा भणिया ते, जहां-भो देवानुप्पिया ! किं तुम्ह पियं भोयणं पणामिज्जउं?, तेहिं भणियं-पायसोत्ति,
 तओ सबलद्धिसंपन्नो भयवं घयमहुसणाहएस पायसस्स पडिगहं भरित्ता आगओ, अक्खीणमहाणसिलद्धिसामत्थेण
 य सवे जहिच्छाए पजेमिया, तदुव्वरियसेसं च अप्पणा भुंजति, एवंविहं च अइसयं भगवओ पेच्छऊण ते सुहुयरं
 आणंदिया, नवरं सुक्कसवोलभक्खीणं पंचणहवि तावससयाणं सुहज्झवसाणाओ केवलनाणमुप्पन्नं, कमेण य तत्तो
 वचंता पत्ता चंपापुरिं, तेहिं च दिन्नस्स सपरिवारस्सवि भगवओ छत्ताइछत्तं पेच्छंतस्स, कौडिन्नस्सवि सामिणो
 रूवदंसेणेण केवलमुप्पन्नं, एवं जायकेवलेहिं तेहिं पन्नरसहिवि सएहिं समेओ गोयमो भयवंतं पयाहिणीकरेइ, ते य
 पयाहिणावसाणे तित्थपणामं काऊण केवलपरिसं पडुच गच्छंते पेच्छऊण भणइ-भो किमेवं वच्चह?, एह सामिं
 वंदह, जयगुरुणा कहियं-मा केवल्लिओ आसाएहि, तओ सो मिच्छादुक्कडंति काऊण अप्पणो नाणानुप्पाएणं अद्धिइं
 कुणंतो वुत्तो सामिणा-भो देवानुप्पिय ! किं देवाणं वयणं गेज्झं? उयाहु जिणाणं?, गोअमो भणइ-जिणाणं,
 जयगुरुणा जंपियं-जइ एवं ता किं अद्धिइं पकरेसि?, जेण मए तं पुवंचिय भणिओ, जहा-अंते तुळा भविस्सामोत्ति,
 जं पुण संपयं चिय तुह नाणं न उप्पज्जइ तत्थ इमं कारणं—

चिरभवपरंपरापरिचिओ सि चिररूढगाढनेहोसि । तं मे गोयम ! जेण तेण न ते जायई नाणं ॥ १ ॥
अइथेवसंथवुत्तोऽवि नेहभावो दुमिहओ होइ । किं पुण बहुकालन्नोन्नतुछसंवाससंजणिओ ? ॥ २ ॥
एत्तो चिय विणिहयनायगव सेणाहयंमि मोहम्मि । कम्मावली दल्लिइ लीलायच्चिय समग्गावि ॥ ३ ॥
ता नेहपसरमुच्छिदिऊण मज्झत्थयं समायरसु । मोक्खभवाइसु किर परमसाहुणो निप्पिहा होति ॥ ४ ॥
इय भणिए जयगुरुणां सविणयपणओ तहत्ति भणिऊण । पडिवज्जइ तं वयणं गोयमसामी सुणिवरिंदो ॥ ५ ॥
एवं गोयमसामीं संबोहिऊण विहरिओ तत्तो जयगुरू । अह परिभमंतो गामागरनगरसुंदरं वसुंधराभोगं कमेण
पत्तो मिहिलापुरिं, समोसढो य माणिभद्दाभिहाणंमि चेइए, समागया ससुरासुरावि परिसा, सिद्धो य भगवया
अभयप्पहाणमूलो अलियवयणविरइप्पहाणो परधणपरिवज्जणमणहरो सुरनरतिरियरमणीरमणपरंसुहो आकिंचणगु-
णगघविओ समणधम्मो, तथा पंचाणुव्वयपरियरिओ गुणव्वयतियालंकिओ चउसिक्खावयसमेओ सावयधम्मो य ।
तं च सोऊण बुद्धा बहवे जंतुणो, केऽवि गहियसामन्ना अन्ने पडिवन्नदंसणा जायत्ति । एत्थंतरे गोयमसामी परेणं
विणएणं पणमिऊण जयगुरुं भणइ-भयवं ! महंतं मे कोऊहलं दूसमाए सरूवसवणविसए, कुणह अणुगहं, साहह
जहाभाचिरंति, भणियं जिणेण-गोयम ! भाविरमवि दूसमाए बुत्तंतं साहिज्जंतं एगगमणो निसामेसु—

मइ निवाणसुवगए पंचमअरओ उ दूसमा होही । तीए वसां भवोऽवि हु न जणो धम्मज्जमं काही ॥ १ ॥
 सुणिणोऽवि परोप्परकलहकारिणो बहुपरिग्गहासत्ता । वट्ठिस्संति न सम्मं बाहुल्लेणं सधम्मंमि ॥ २ ॥
 घासंडिणोऽवि नियनियगंथत्थपरंमुहा मयणमूढा । पम्मक्कधम्मकम्मा ओलग्गिस्संति राईणं ॥ ३ ॥
 पागयलोगो मोत्तुं कुल्लेमं तेसु तेसु कज्जेसु । अच्चंतगरहिएसुवि वट्ठिस्सइ जीविगाहेउं ॥ ४ ॥
 अत्थप्पिया य अइदप्पिया य परछिइपेच्छणपरा यं । पीडिस्संति जणोहं पयंडदंडेहिं नरवइणो ॥ ५ ॥
 एक्कजणणीपसूयावि भाइणो जणगदव्वलोभेण । अन्नोन्नजीवयायं काउं दढमभिलसिस्संति ॥ ६ ॥
 धम्ममच्छलेण पावं विमूढंमइणो समायरिस्संति । पसुमेहक्कुवखणणाइएसु कम्मेषु वट्ठता ॥ ७ ॥
 भूयमविस्संत्येसु य विज्जाणं देवयावयारो वा । विज्जा सिद्धी य वरा बाहुल्लेणं न होहिंति ॥ ८ ॥
 उम्मग्गदेसणांमग्गनासणावंचनाभिरयच्चित्ता । गुरुणोऽवि जहिच्छाए धम्मायारं अरिस्संति ॥ ९ ॥
 तविहिंति खरं रविणो नो वरिसिस्संति समुच्चियं मेहा । रोगायंका मारी य विद्विस्संति जणनिवहं ॥ १० ॥
 उस्सिखलंखलजणहीलणाहिं अणिमित्तऽणत्थघडणाहिं । पाविस्सइ खणेमेत्तंपि नेव सोक्खं विसिट्ठजणो ॥ ११ ॥
 वाससहस्सा इह एकवीसइं जात्र दोसपरिहीणं । दुग्गपसहंतं चरणं पवित्तिही भरहखेत्तंमि ॥ १२ ॥
 इय एसो संखेवेण तुज्झ गोयम ! मए समणुसिद्धो । दूसमकालससुत्थो बुत्तंतो भवभयजणगो ॥ १३ ॥

एयं सोच्चा मुणिणो संजमकजंमि तह पयट्टेह । तक्कालसमुत्थविडंवणाड पावह जहा नेव ॥ १४ ॥
 एवं जिणेण सिट्ठे सविसेसं संजसुल्लुया जाया । समणजणा अह भयवं मिहिलानयरीड निक्खंतो ॥ १५ ॥
 पत्तो पोयणपुरं, तहिं च संखवीरसिबभद्दपमुहा नरिंदा दिक्खा गाहिया, एवं च जएक्कनाहो महावीरो गोयम-
 सामिप्पमुहाणं चउद्दसण्हं समणसहस्साणं अज्जचंदणाईणं अज्जियासहस्साणं आणंदसखपमुहएग्गुणस-
 द्विसहस्ससमहियस्स सावयलक्खस्स सुलसारेवईपमुहाणं तिण्हं सावियलक्खाणं अट्टारससहस्सहिगाणं तिण्हं चउ-
 द्दसपुव्विसयाणं अट्टण्हं अणुत्तरोववाइयसयाणं मग्गदेसगत्तं गुरुत्तं सामित्तं उव्वहंतो नाणकिरणेहिं तमनियरमवहरंतो
 चिरं विहरिओ वसुंधराए । अह अग्गिभूइवाउभूईवियत्तमंडियमोरियपुत्ताकंपियायलभाइमेयज्जपहासनामेसु नवसु
 गणहरेसु सिद्धिं गएसु केत्तियंपि कालं भवसत्तपडिबोहणं काऊण अप्पणो मोक्खगमणकालं पच्चासन्नमुवलक्खिऊण
 भयवं वद्धमाणो गओ असेसेदसलद्धपसिद्धीए पावापुरीए, तहिं च नियभुयनिद्वलियपडिक्खो हत्थिपालो नाम नरिंदो,
 तस्स अणेगखंभसयसमहिट्ठियाए विसिट्ठिविचित्तचित्तकम्ममणहराए पवरसालभंजियाभिरामदुवारतोरणाए सव्वसत्तो-
 वरोहरहियाए महइमहालियाए सुंकसालाए नरिंदाणुन्नापुरस्सरं ठिओ चरिमवासारत्तंमि जयगुरु । कमेण पत्तंमि जय-
 गुरु कत्तियस्स अमावसादिणे अप्पणो उवरि केवलालोयविग्घकारयं सिणेहं कुणंतं गोयमं भणइ-भो देवाणुप्पिय !
 एत्थ पच्चासन्नगामे गंतूण देवसम्माभिहाणं माहणं पडिबोहेसुत्ति, जं सामी आदिसइत्ति जंपिऊण गओ गोयमो,

कयं जहाइहं, वुत्थो य तत्थ । अह तस्स चैव दिणस्स पच्छिमनिंसाए साइरिक्खंमि वट्टमाणंमि तीसइयरिससंखं
 केवलपज्जायं परिपालिऊण कयछट्टवोक्कम्मो पलियंकासणसंठिओ भयवं महावीरो सव्वसंवरूवं सेलेसिं जावज्जवि
 न पवज्जइ ता असंभसुब्भंतनयणनलिणीविणेण तक्कालुगगंभंतभासरासिक्कुरगगहविभावियजिणसासणोवपीडेण सबहु-
 माणं विन्नत्तो सक्केण—

भयवं ! कुणह पसायं विगमह एवंपि ताव खणमेक्कं । जावेस भासरासिस्स नूणसुदओ अवक्कमइ ॥ १ ॥

जं एयस्सुदएण तुम्हं तित्थं कुतित्थिएहिं दढं । पीडिस्सइ सक्कारं न तहा पाविस्सइ जणाउ ॥ २ ॥

न य तुमहे असमत्था एवंविहकज्जसाहणे जेण । जो तोलइ तइलोक्कं वलेण का तस्स इह गणणा ? ॥ ३ ॥

तथा—कहडणंतसत्तिजुत्ता जिणा हवंतित्ति वयणमवि अमहे । पत्तिज्जिस्सामो पहु ! जइ न तुमं ठासि खणमेक्कं ॥ ४ ॥

अह जयगुरुणा भणियं सुरिंद ! तीयाइतिविहकालेऽवि । नो भूयं न भविस्सइ न हवइ नूणं इमं कज्जं ॥ ५ ॥

जं आउक्कम्मविगमेऽवि कोवि अच्छेज समयमेत्तमवि । अच्चंताणंतविसिट्ठसत्तिपब्भारजुत्तोऽवि ॥ ६ ॥

अवि जोडिज्जइ सयखंडियंपि वयरगरुब्भवं रयणं । परिसडियमाउदलियं न उ तीरइ कहवि संघडिउं ॥ ७ ॥

ता जइ अच्चंतमभूयमत्थममहे न साहिमो एयं । किं एत्तिएण नाणंतसत्तिणो ? मुयसु ता मोहं ॥ ८ ॥

इय वोहिऊण सक्कं सेलेसिं जयगुरू समारुहिउं । समगं चिय वेयणियाउनामगोत्ताइं खविऊण ॥ ९ ॥

जंसंस्टाए कीरइ पुरमंदिरज्जलच्छिसंचागो । सुच्चइ सिणेहवंधुरवंधवजणगाढपडिंवंधो ॥ १० ॥
आयाचिजइऽसइ गिम्हुम्हवणिहंसंतत्तसक्करे । भूमीयलंमि हिमकणदुव्विसहे सीयकालेऽवि ॥ ११ ॥
भुंजिजइऽसइ सुंछुंछतुच्छमरसं च भोयणं पाणं । निवसिजइ भीमसुसाणसुन्नगिहरन्नमाईसु ॥ १२ ॥
सेविजंति पइदियहमेव वीरासणाइठाणाइ । छट्ठमाइदुकरतवचणाइं पि कीरंति ॥ १३ ॥
अहियासिजइ नरतिरियदेवविहिओवसग्गवग्गोऽवि । न गणिजइ दुव्विसहो परीसहाणं पंवंधोऽपि ॥ १४ ॥

तिहुयणपणमियचलणो भवभयमहणो जिणो महावीरो ।

उभउच्चिय एगागी तं मोक्खपयं समणुपत्तो ॥ १५ ॥ सत्तहिं कुलयं ।
अह सबेऽवि सुरिंदा चउविहदेवेहिं परिवुडा झत्ति । चलियासणा वियाणियजिणनिव्वाणा समोइन्ना ॥ १६ ॥
विगयाणंदा वाहप्पवाहवाउलियनयणपम्हंता । जगनाहस्स सरीरं नमिउमदूरे निसीयंति ॥ १७ ॥
अह सोहम्माहिचई गोसीसागरुपमोक्खदारूहिं । नंदणवणाणिएहिं चियमेगंते रया चित्ता ॥ १८ ॥
अह सुरहिखीरसायरजलेण ण्हविकुण जिणवरसरीरं । हरिचंदणोवलित्तं नियंसियामलदुगूलं च ॥ १९ ॥
सट्ठाणपिणद्धविचित्तरयणकिरणुब्भडाभरणरुइरं । सिबियाए संठवित्ता नेइ चियाए समीवंमि ॥ २० ॥
अह देविंदेसु जयजयारवं निब्भरं कुणंतेसु । कुसुमुकरं सुयंतेसु सबओ खयरनियरेसु ॥ २१ ॥

नचंतीसु सुरसुंदरीसु तूरेसु वज्रमाणेसु । अचंतसोगविहुरे संधंमि य संशुणंतंमि ॥ २२ ॥

अगिक्कुमाराण जलणजालजालापलीवियाए लहुं । आरोविंति चियाए जिणबुंदिं असुरसुरवइणो ॥ २३ ॥

वाउकुमारा वायं कुणंति अत्रे-सुरा पुण खिवंति । गंधद्वयमुट्ठिं घयमहुकुंमे य पुणरुत्तं ॥ २४ ॥

मंसाइएसु देहसु तो चियं निव्विंति थणियसुरा । खीरोयवारिधाराहिं सिसिरगंधाभिरामाहिं ॥ २५ ॥

अह पडुणो उवरिहं मंगल्लएण दाहिणं सकहं । गिणहइ सक्को हेट्ठिछयं च चमरो असुराया ॥ २६ ॥

ईसाणिंदो वामं उवरिहं तस्स हिट्ठिमं च वली । इयरे सुरासुरिंदा जहारिहं अंगुवंगाइं ॥ २७ ॥

तत्तो चियाय ठाणे विचित्तरणेहिं विरइयं थूमं । निवाणगमणमहिमं जत्तेण कुणंति जयगुरुणो ॥ २८ ॥

अह निव्वत्तियतक्कालजोगनीसेसनियकायच्चा । सोगभरमंथरगिरं एवं भणिउं समाढत्ता ॥ २९ ॥

अज्जं चिय अत्थमिओ दिवायरो अज्ज भारहं खेत्तं । अवहरियसारयणं जायं नाहे सिवं पत्ते ॥ ३० ॥

एत्तो पयंडमववरिपीडियाणं पणट्ठबुद्धीण । अम्हारिसाण सरणं को होही नाह ! तुह विरेहे ? ॥ ३१ ॥

सयुरासुरं पि भुवणं मन्ने निप्पुन्नयं समग्गं पि । अन्नह कुलसेलज्जं हुंतोसि तुमं जिणवरिंदा ! ॥ ३२ ॥

अहवाऽवस्संभाविसु वत्थुसु संतावकप्पणा विहला । एक्कमियाणिं विजयउ सइ तित्थं तुज्झ जयनाह ! ॥ ३३ ॥

इय जंपिक्कण दुस्सहजयगुरुविरहग्गिहूमिया सक्का । नंदीसरंमि गंतुं काउं अट्ठाहियामहिमं ॥ ३४ ॥

वचंति देवलोगं वइरामयवट्टवरसमुग्गेसु । जिणसंकहाओ ताओ खिवंति जत्तेण पूइत्ता ॥ ३५ ॥
 अह सा जिणस्स निवाणजामिणीसुरतनूकउज्जोया । दीवूसवोत्ति अज्जवि पइवरिसं कीरइ जणेण ॥ ३६ ॥
 गोअमसामीवि नहोयरंतसुरवरविमाणपेच्छणओ । नाउं जिणनिवाणं चित्तेउमिमं समाढत्तो ॥ ३७ ॥
 एकदिणमेत्तकज्जेण कीस नाहेण पेसिओऽहमिहं ? । चिरसंथुएसु किं वा जुज्जइ एवंविहं काउं ? ॥ ३८ ॥
 हा हा अहं अहन्नो जो सुचिरं सेविकुण कमकमलं । पज्जते जयगुरुणो संपइ विच्छोहिओ एवं ॥ ३९ ॥
 अहवा जिणंमि वोच्छिन्नपेमदोसंमि कीस हे हियय ! । पढमं चिय पडिवंधं कुणसि ? जमेत्तो वहसि सोगं ॥ ४० ॥
 संसारवल्लिजलसारणीसमो दुग्गदुग्गइदुयारं । सिवसोक्खकंखिराण मूलमणत्थाण पडिवंधो ॥ ४१ ॥
 ते धन्ना सप्पुरिसा लीलाए च्चिय निसुंभिओ जेहिं । सुहहरिणक्खयकारी मोहमहाकेसरिकिसोरो ॥ ४२ ॥
 इय सुक्कज्झाणानलनिदहुघणघाइकम्मदारुस्स । गोअमपहुस्स सहसा उप्पन्नं केवलं नाणं ॥ ४३ ॥
 बारस वासाइं विवोहिकुण भवे सिवं गए तंमि । भयवं सुहम्मसामी निवाणपहं पयासेइ ॥ ४४ ॥
 तेमिचि चिरकालं विहरिकुण सिरिजंबुसामिणो दाउं । गच्छगणामणुन्नं संपत्ते सिद्धिवासंमि ॥ ४५ ॥
 एवं विज्जाहरनरसुरिंदसंदोहवंदणिज्जेसु । समइक्कंतेसु महापहसु सेजंभवार्इसु ॥ ४६ ॥
 अइसयगुणरयणनिही मिच्छत्ततमंधलोयदिणनाहो । दुरुच्छारियवइरो वइरसामी समुप्पन्नो ॥ ४७ ॥

साहाइ तस्स चंदे कुलमि निप्पडिमपसमकुलभवणं । आसि सिरिवद्धमाणो मुणिनाहो संजमनिहिच्च ॥ ४८ ॥
 वहलकलिकालतमपसरपूरियासेसविसमसमभागो । दीवेणं व मुणीणं पयासिओ जेण मुत्तिपहो ॥ ४९ ॥
 मुणिवइणो तस्स हरअट्टहाससियजसपसाहियासस्स । आसि दुवे वर सीसा जयपयडा सूरससिणोच्च ॥ ५० ॥
 भवजलहिवीइसंभंतभविंसंताणतारणसमत्थो । वोहित्थोच्च महत्थो सिरिसूरिजिणेसरो पढमो ॥ ५१ ॥
 गुरुसाराओ धवलाउ सुविहिया (निम्मला पु.) साहुसंतई जाया । हिमवंताओ गंगच्च निगया सयलजणपुज्जा ॥ ५२ ॥
 अन्नो य पुन्निमायंदसुंदरो बुद्धिसागरो सूरी । निम्मवियपवरवागरणछंदसत्थो पसत्थमई ॥ ५३ ॥
 एंगंतवायविलसिरपरवाइकुरंगभंगसीहाणं । तेसिं सीसो जिणचंदसूरिनामो समुप्पन्नो ॥ ५४ ॥
 संवेगंगंसाला न केवलं कच्चविरयणा जेण । भच्चजणविम्हयकरी विहिया संजमपचित्तीचि ॥ ५५ ॥
 ससमयपरसमयन्नू विसुद्धसिद्धंतदेसणाकुसलो । सयलमहिवलयवित्तो अन्नो ऽभयदेवसूरित्ति ॥ ५६ ॥
 जेणालंकारधरा सलक्खणा वरपया पसन्ना य । नवंग (सिद्धंत पु.) वित्तिरयणेण भारई कामिणिच्च कया ॥ ५७ ॥
 तेसिं अत्थि विणेओ समत्थसत्थत्थवोहकुसलमई । सूरी पसन्नचंदो चंदो इव जणमणाणंदो ॥ ५८ ॥
 तच्चयणेणं सिरिसुमइवायगाणं विणेयलेसेण । गणिणा गुणचंदेणं रइयं सिरिचीरचरियमिमं ॥ ५९ ॥
 एयस्स विरयणंभी निव्वंधो जेसि गाढमुप्पन्नो । ते पुण मूलाओ च्चिय साहिज्जंते निसामेह ॥ ६० ॥

सियजसजोणहाधवलियनायकुलनहयले मयंकुव । पुव्वमहेसि महेसीपणओ सिरिजीवेवपहू ॥ ६१ ॥
तस्स सुसिस्सो सिद्धंतसिद्धसुविसिद्धसंजमाभिरओ । गुणरयणरोहणगिरी पयडो जिणदत्तसूरित्ति ॥ ६२ ॥
गंभीरिमाए पसमेण बुद्धिविसेवेण दक्खिणत्तेण । सुंदरनएण जेसिं कोडवि न तुछो जए जाओ ॥ ६३ ॥
तेहिंतो पडिबुद्धो वायडकुलभवणजयपडायनिमो । कप्पडवाणिज्जपुरे सेट्ठी गोवद्धणो आसि ॥ ६४ ॥
नंदीसरावलोयणमणाण भव्वाण दंसणत्थं च । कारावियं सुतुंगं वावन्नजिणालयं जेण ॥ ६५ ॥
धम्मधरणीए गिहिणीए तस्स सोढित्ति नामधेयाए । अगणिग्रगुणगणनिलया पुत्ता चत्तारि उप्पन्ना ॥ ६६ ॥
पढमो अम्मयनामो वीओ सिद्धोत्ति जज्जणागो य । तइओ चउत्थओ पुण विक्खाओ नन्नओ नाम ॥ ६७ ॥
नयचिणयसच्चधम्मत्थसीलकलिएहिं जेहिं दिट्ठहिं । नूणं जुहिट्ठिहाईवि सदहिज्जंति सप्पुरिसा ॥ ६८ ॥
अह संथारयदिक्खं पवज्जिउं भावसारमंतंमि । गोवद्धणंमि सगं गयंमि तह पढमपुत्तडुगे ॥ ६९ ॥
सो सेट्ठी जज्जणागो छत्तावल्लीए वासमकरिंसु । सब्बकणिट्ठो नन्नयसेट्ठी पुण मूलठाणेवि ॥ ७० ॥
तेसिं च भइणिपुत्तो नियपुत्ताओवि गाढपडिबंधो । आसि जसणागनामो सेट्ठी सुविसिद्धगुणनिलओ ॥ ७१ ॥
अह नन्नयस्स पुत्ता पयडा सावित्तिकुच्छिसंभूया । दोन्नि चिय उप्पन्ना गोवाइच्चो कवड्डी य ॥ ७२ ॥
सत्तुंजयपसुहसमत्थतित्थजत्ता पयट्ठिया जेण । पढमं चिय तस्स कवड्डिसेट्ठिणो को समो होज ॥ ७३ ॥

पुरिसत्थकरणनिरयस्स जज्जणागस्स विस्सुयजसस्स । अत्थि जिणधम्मनिरया कलत्तमिह सुंदरी नाम ॥ ७४ ॥
 जाओ तीसे सुंदरविचिच्चलक्खणविराइयसरीरो । जेद्धो सिद्धो पुत्तो बीओ पुण वीरनामोत्ति ॥ ७५ ॥
 को तेसि दाणविन्नाणबुद्धिसुविस्सुद्धधम्मगेहाण । निउणोऽवि गुणलवंपिहु होज्ज समत्थो य वित्थरिउं ? ॥ ७६ ॥
 नागो इव पिंडिज्जइ वंभंडकरंडए अमायंतो । जस्स जसोहो सारयनिसिच्छणमयलंछणच्छाओ ॥ ७७ ॥
 जिणविंवसुपसत्थतित्थजत्ताइधम्मकरणेण । धम्मियजणाण मज्झे जेहि य पत्ता पढमेरेहा ॥ ७८ ॥
 अन्नाणतण्हसमणी सुयनाणपवा पयट्ठिया जेहिं । सयलागमपोत्थयलेहणेण निच्चं पि भव्वाण ॥ ७९ ॥
 तेहिं तित्थाहि वपरमभत्तिसव्वस्समुच्चहेतेहिं । वीरजिणचरियमेयं कारवियं सुद्धवोहकरं ॥ ८० ॥
 जमजुत्तमेत्थ भणियं नियमइडुब्बल्लओ मए किंपि । तं साहंतु गुणह्वा ओच्छाइयमच्छरा विउसा ॥ ८१ ॥
 छत्तावल्लिपुरीए सुणिअंवेसरगिंहमि रइयमिमं । लिहियं च लेहएणं माहवनामेण गुणनिहिणा ॥ ८२ ॥
 नंदसिहिरुहसंखे(११३९)वोक्कंते विक्कमाओ कालंमि । जेट्टस्स सुद्धतइयातिहिंमि सोमे समत्तमिमं ॥ ८३ ॥

निहयसयलविग्घोऽणप्पमाहण्णजुत्तो जयइ जयपसिद्धो वड्डमाणो जिणिंदो ।
 तथणु जयइ तस्सासंखसोक्खेक्कमूलं, गरुयभवभयाणं नासणं सासणं च ॥ ८४ ॥

असिचसमणदक्खो पाणिणं कप्परुक्खो, जयइ जयपयासो पासनाहो जिणेसो ।
तयणु जयइ वाणी दिव्वपेकरुहत्था, सुयरयणघरिती पंकयालीणहत्था ॥ ८५ ॥
इय जिणवरवीरस्सऽड्ढमो ताव वुत्तो, परमपयपयाणो नाम पत्थाव एसो ।
चरियमवि समत्तं एयसंकित्तणाओ, हवउ सुहकरं वो नूणमाचंदसूरं ॥ ८६ ॥
एयं वीरजिणेसरस्स चरियं जे भावसारं जणा, वक्खाणंति पढंति निच्चलमणा निच्चं निसामिंति य ।
तेसिं इड्ढविओगऽणिट्ठपडणादोगचरोगावया-पामोक्खं खयमेइ दुक्खमखिलं सोक्खाणि वद्धंति य ॥ ८७ ॥

॥ ग्रंथाग्रं. १२०२५ ॥ शुभं भवतु श्रीसंघस्य ॥

यावल्लवणसमुद्रो यावन्नक्षत्रमंडितो मेरुः ।
यावच्चन्द्रादित्यौ तावदिदं पुस्तकं जयतु ॥

इति श्रेष्ठि-देवचन्द्र लालभाई-जैनपुस्तकोद्दारे ग्रंथाङ्कः ७५ ॥

इइ सिरिचन्दकुलीणऽभयदेवसूरिपट्टपहुसिरिपसणचंदसूरिवयणेण सिरिसुमइ-

वायगविणेयगणिसिरियुणचन्दनिम्मियं कप्पडवाणिज्जभिजण-

गोवद्धणसुतजज्जणागपुत्तसिट्ठवीरगहकारियं

सिरिवीरज्जिणचरियं सम्मत्तं

इति श्रेष्ठि-देवचन्द लालभाई-जैनपुस्तकोद्धारे ग्रंथांकः ७५ ॥

श्रीमहावीरचरित्रस्योपोद्घातः ।

श्रमणस्य भगवतो महावीरस्य चरित्रमिदमुपदाक्रियमाणं सज्जनेभ्योऽस्ति, यद्यपि भगवतश्चरित्राणि नैकानि श्रीहेमचन्द्राचार्य-नेमि-चन्द्राचार्यादिभिर्विहितानि सुन्दरतराणि मुद्रितपूर्वाणि च परं न किमप्येतावन्मानं प्रलं चातः किमपि, यत एतच्चरित्रं वैकृमीयायां द्वादशश-ताब्द्यामेकोनचत्वारिंशदधिकेषु समानां व्यतीतेषु विद्वद्भ्यं द्वादशशतहस्रमानं च, रचयितारश्चास्य चान्द्रकुलीनाः श्रीमन्तो गुणचन्द्राः सुमतिवाचकविनेयाः, एतच्च प्रस्तुतचरित्रग्रान्तभागावलोकनात् स्पष्टमवसीयते, यत आहुस्तत्र ते—

सिरिसुमह्वायगाणं विणयेलेसेण । गणिणा गुणचंदेणं रइयं सिरिवीरचरियमिणं ॥ ५७ ॥

गणिनश्चैमे चान्द्रकुलीनश्रीवर्धमान-जिनेश्वरबुद्धिसागर-जिनचन्द्र-अभयदेवसूरिशिष्यश्रीप्रसन्नचन्द्राचार्यवचनेन व्यधुरेनत्, यत उक्तं ग्रन्थकृद्भिरत्रैव ग्रान्त्यभागे—

साहाइ तस्स चंदे कुलंमि निप्पडिमपसमकुलभवणं । आसि सिरिवद्धमाणो मुणिनाहो संजमनिहिब्ब ॥ ४८ ॥

बहलकलिकालतमपसरपूरियासेसविसमसमभागो । दीवेणं व मुणीणं पयासिओ जेण मुत्तिपहो ॥ ४९ ॥

मुणिवइणो तस्स हरअट्ठहाससियजसपसाहियासस्स । आसि दुवे वरसीसा जयपयडा सूरससिणोव्व ॥ ५० ॥

भवजलहिवीइसंभतमवियसंताणतारणसमत्थो । वोहित्योव्व महत्थो सिरिसूरिजिणेसरो पढमो ॥ ५१ ॥

गुरूसाराओ धवलाउ सुविहिया (निम्मला पु.) साहुसंतई जाया । हिमवंताओ गंगव्व निग्गया-सयलजणपुजा ॥ ५२ ॥

श्रीगुणचंद
महावीरच०

॥ ३ ॥

अन्नो य पुन्निमायंदुंदरो बुद्धिसागरो सूरि । निम्नवियपवरवारणछंदसत्यो पसत्थमई ॥ ५३ ॥
एगंतवायविलिसिरपरवाइकुरंगभंगसीहाणं । तेसिं सीसो जिणचंदसूरिनामो समुण्णन्नो ॥ ५४ ॥
संवेगंगसाला न केवलं कव्वविरयणा जेण । भव्वजणविम्हयकरी विहिया संजमपवितीवि ॥ ५५ ॥
ससमयपरसमयन्नू विसुद्धसिद्धंतदेसणाकुसलो । सयलमहिवलयवित्तो अन्नोऽभयदेवसूरिति ॥ ५६ ॥
जेणालंकारधरा सलक्खणा वरपया पसन्ना य । नवंग (सिद्धंत पु.) वित्तिरयेण मारई कामिणिव्व कया ॥ ५७ ॥
तेसिं अत्थि विणेओ समत्थसत्थवोहकुसलमई । सूरि पसन्नचंदो चंदो इव जणमणंदो ॥ ५८ ॥
तव्वयणेणं सिरिसुमहवायगाणं विणयेलेसेण । गणिणा गुणचंदेणं रइयं सिरिवीरचरियमिमं ॥ ५९ ॥

अत्र नहि खरतरगच्छप्रादुर्भावस्य गन्धोऽपि, एवमेव च न श्रीजिनेश्वरसूरिशिष्यश्रीजिनचन्द्रकृतायां संवेगंगशालायां न च श्रीअभय-
देवसूरिकृतायां शास्त्रतौ न च श्रीअल्लदेवोपाध्यायकृते सुरसुन्दरीचरिते यावत् अशीत्यधिके समासहस्रे जावाल्लिपुरि चतुर्मासीस्थिताभ्यां
श्रीमज्जिनेश्वरबुद्धिसागरसूरिभ्यां विहितयोरष्टकवृत्तिबुद्धिसागरव्याकरणयोरपि न खरतरगच्छप्रादुर्भावगन्धोऽपि, एवं यदि श्रीजिनेश्वरसूरिभिस्त-
त्पट्टोद्भवैश्चान्यैः सूरिभिर्न स्वीकृता तदा खरतरोत्पत्तिस्तर्हि तत्परम्पराया बहिर्वर्त्तिभिः प्रलपितेन किम् ? खरतरगच्छप्ररूपणामूलभूतो जिनवल्लभ
एव प्रश्नोत्तरैकषष्टिशतके स्वस्य कूर्चपुरीयजिनेश्वरशिष्यतामाह, किंच-पुण्यपत्तनस्था या कोट्याचार्यीया विशेषावश्यकवृत्तिपुस्तिका सापि
स्पष्टमेव निगदति यदुत न श्रीजिनेश्वरसूरैः खरतरविरुद्धं न च जिनवल्लभस्तत्परंपरागत इति, यतः सा एकादशशतकीयसप्तत्रिंशद्वर्षेषु लि-
खिता, लेखकश्चास्या जिनवल्लभस्यान्तेवासी नेमिकुमारः, स स्पष्टमाख्याति यदुत कूर्चपुरीयजिनेश्वरशिष्यजिनवल्लभार्थं पुस्तकमिदमलेखीति,


अन्यच्च विशेषावश्यकभाष्यप्रतेः प्रान्तेऽपि नेमिकुमार इत्यमेवाह, तयो च न तत्र जिनेश्वरसुरेः खरतरविरुदं जिनवल्लभस्य तत्परंपरानि-
र्गता च, पाश्चात्यैः खरतरैर्महतामभिधानेन प्रतिष्ठाभिलाषुकैः कल्पित एवैषः वृत्तान्तः, अत एवोपदेशसप्ततिकारैः 'येभ्यः प्रतिष्ठाभाष्यो,
गच्छः खरतराभिधः' इति वाक्येन स्वाद्यानां प्रलापो ध्वनितः सत्य एव लक्ष्यते ।

किंच—या खरतरगच्छमूलभूतेन जिनवल्लभेन श्रीवीरस्य भगवतो गर्भोपहारः षष्ठकल्याणकतया मतः सोऽपि नैभिर्गणिभिर्मतः,
अत एव च श्रीमद्भिरत्र चतुर्थप्रस्तावस्योपसंहारे पत्रे १४१ 'गम्भावयारजम्मणदिक्खाकल्लाणकहणपडिबद्धो—चउत्थओ एस पत्था-
वो' इत्युक्त्वा गर्भोपहारस्य कल्याणकता निराकृता, यद्यपि श्रीमद्भिर्हरिर्मद्रसूरिभिर्यात्रापञ्चाशके श्रीमद्भिरभयदेवसूरिभिः स्वार्धैरात्मपूर्वज-
तया स्वीकृतैश्च तद्वृत्तौ 'हत्थुत्तरजोएणं चउरो' इत्येतत्सूत्रेण तद्विवरणेन च स्पष्टतया षट्कल्याणकवादिनां जिनवल्लभादीनां यद्वच्छांवादिता
दर्शितैव तथापि केचन स्वगच्छाग्रहवन्त आहुः यदुत सर्वजिनकल्याणकानां समतां दर्शयितुं तैस्तथोक्तं, यद्यपि कचनपि षष्ठकल्याण-
कस्यानुक्ततया न तत् श्रद्धातुं शक्यमागमरसिकैः, परमत्र तैरपि तथा वक्तुं न शक्यं, यतो वीरचरित्रे अत्र अन्यत्र च कुत्रापि विहाय
जिनवल्लभं तदनुसारिणं च न कोऽप्यागमश्रद्धालुराह कल्याणकषट्कं, तथा च यथा श्रीमलयगिरिभिः जिनवल्लभस्य संहननानां शक्तिवा-
चकतां सिद्धान्तानभिहितामपि सिद्धान्ताभिहितां मन्वानस्योत्सूत्रवादिता श्रीजीवाभिगमप्रज्ञापनादिवृत्तौ स्पष्टमभिहिता तथैवात्रापि तस्य
तथात्वं ध्वन्यमानं न व्याहन्यते इत्यलं चसूर्या गच्छकदाग्रहरसिकैः ।

चरित्रे चात्र स्त्रीबालसुबोधा प्राकृतैवाहता भाषा, तथाच प्राकृतवाणीविलासिनामप्राकृतानामतीवादरास्पदमिदं, विशेषतस्तत्र तत्रा-
नेकविषयगतान् प्रबन्धान् दिदक्षूणां । प्रस्तावाश्चात्र श्रीमद्भिः कृता अष्ट, प्रतिप्रस्तावं चात्राधिकारा इमे

प्रस्तावः	विषयः	पत्रं	प्रस्तावः	विषयः	पत्रं
१	श्रीवीरस्य सम्यक्त्वलाभः	२	५	चण्डकौशिकप्रतिबोधनावसानं वृत्तं	१८२
२	मरीचिः षट्पस्त्रिजाजकभवाश्च	२८	६	गोशालकाय तेजोलेश्योपायकथनान्तं वृत्तं	२२३
३	प्रियसित्रान्ता भवाः	७०	७	केवलज्ञानोत्पत्त्यवसानं वृत्तं	२५०
४	श्रीवीरस्य न्यवनगर्भजन्मदीक्षाः	१४१	८	निर्वाणान्तं वृत्तं ग्रन्थकृत्प्रशस्तिश्च	३६०

चरित्रं चैतत् श्रीमतां प्रसन्नचन्द्रसूरीणां वचनेन श्रीमद्भिर्विहितं, परं विधापनायाम्यर्थिताः श्रीमन्तः श्रीमद्भ्यां छत्रावली(छत्राल)-वास्तव्याभ्यां श्रेष्ठिभ्यां शिष्टवीरनामभ्यां, तयोः पिता जज्जनागः कर्पटवाणिज्यात् छत्रावल्यामागतः, तत्र च कर्पटवाणिज्ये जज्जनागपित्रा श्रीमद्वायडगच्छीयजीवेदेवसूरित्तिच्छिष्यश्रीजिनदत्ताभ्यामधिगतसम्यक्त्वेन नन्दीश्वरचैल्यं विहितं श्रीमता गोवर्धनश्रेष्ठिना, तत्कुटुम्बवृक्षश्चायं



स्पष्टं चेदं ग्रन्थप्रशस्तौ, तथाहि—

एयस्स विरणंभी निव्वंधो जेसि गाढमुण्णो । ते पुण मूलाओ चिय साहिअंते निसामेह ॥ ६० ॥
सियजसजोणहाधवलियनायकुलनहयले मयंकुव्व । पुव्वमहेसि महेसीणओ सिरिजीवेदवपहू ॥ ६१ ॥
तस्स सुसिस्सो सिद्धंतसिद्धसुविसिद्धसंजमाभिरओ । गुणरणरोहणगिरी पयडो जिणदत्तसूरीति ॥ ६२ ॥
गंभीरिमाए पसमेण बुद्धिविभवेण दक्खिणत्तेण । सुंदरनएण जेसिं कोऽवि न तुल्लो जए जाओ ॥ ६३ ॥
तेहिंतो पडिबुद्धो 'वायड'कुलभवणजयपडायनिमो । कप्पडवाणिज्जपुरे सेढी गोवद्धणो आसि ॥ ६४ ॥
नंदीसरावलोयणमणाण भव्वाण दंसणत्थं च । कारावियं सुतुंगं वावन्नजिणालयं जेण ॥ ६५ ॥
वम्मघरणीए गिहिणीए तस्स सोढित्ति नामधेयाए । अगणियगुणगणनिलया पुत्ता चत्तारि उप्पन्ना ॥ ६६ ॥
पढमो अम्मयनामो वीओ सिद्धोत्ति जज्जणागो य । तइओ चउत्थओ पुण विक्खाओ नन्नओ नाम ॥ ६७ ॥
नयविणयसच्चधम्मत्थसीलकलिण्हि जेहिं दिट्ठहिं । नूणं जुहिडिलाईवि सद्दहिअंति सप्पुरिसा ॥ ६८ ॥
अह्म संथारयदिक्खं पवज्जितं भावसारमंतंमि । गोवद्धणंमि सग्गं गयंमि तह पढमपुत्तदुगे ॥ ६९ ॥
सो सेढी जज्जणागो छत्तावल्लीए वासमकारिंसु । सव्वकणिट्ठो नन्नयसेढी पुण मूलठाणेवि ॥ ७० ॥
तेसिं च भइणिपुत्तो नियपुत्ताओवि गाढपडिवंधो । आसि जसणागनामो सेढी सुविसिद्धगुणनिलओ ॥ ७१ ॥
अह नन्नयस्स पुत्ता पयडा सावित्तिकुच्छिसंभूया । दोन्नि चिय उप्पन्ना गोवाइओ कवड्डी य ॥ ७२ ॥

संतुंजयपमुहसमत्थतित्थजत्ता पयट्ठिया जेण । पढमं चिय तस्स कवड्डिसेट्ठिणो को समो होञ्ज ? ॥ ७३ ॥
 पुरिसत्थकरणनिरयस्स जज्झागस्स विस्सुयजस्स । अत्थि जिणधम्मनिरया कलत्तमिह सुंदरी नाम ॥ ७४ ॥
 जाओ तीसे सुंदरविचित्तलम्बणविराइयसरीरो । जेढो सिद्धो पुत्तो बीओ पुण वीरनामोत्ति ॥ ७५ ॥
 को तेसि दाणविन्नाणडुद्धिसुविमुद्धधम्मगेहाण । निउणोऽवि गुणलवंपि हु होञ्ज समत्थो पवित्थरिउं ? ॥ ७६ ॥
 नागो इव पिंडिअइ वंमंडकरंडए अमायंतो । जस्स जसोहो सारयनिसिच्छणमयलंछणच्छाओ ॥ ७७ ॥
 जिणविंबवसुपसत्थतित्थजत्ताइधम्मकरणेण । धम्मियजणाण मञ्जे जेहि य पत्ता पढमेरहा ॥ ७८ ॥
 अन्नाणतण्हसमणी सुयनाणपवा पयट्ठिया जेहिं । सयलागमपोत्थयलेहणेण निव्वंपि मव्वाण ॥ ७९ ॥
 तेहिं तित्थाहिंवरपरमभत्तिसव्वस्समुव्वहंतेहिं । वीरजिणचरियमेयं कारवियं मुद्धबोहकरं ॥ ८० ॥
 जमजुत्तमेत्थ भणियं नियमइदुव्वल्लओ मए किंपि । तं साहंतु गुणट्ठा ओच्छाइयमच्छरा विउसा ॥ ८१ ॥
 छत्तावल्लिपुरीए सुणिअंभेसरगिहंमि रइयमिमं । लिहियं च लेहएणं माहवनामेण गुणनिहिणा ॥ ८२ ॥
 नंदसिंहिरुदसंखे(११३९)वोक्कंते विक्कमाओ कालंमि । जेहस्स सुद्धतइयातिहिंमि सोमे समत्तमिमं ॥ ८३ ॥
 विट्ठवं चैतच्चरित्रं छात्रावल्यां श्रीमद्भिः स्थितिं दधद्भिः, मानं चास्य द्वादश सहस्राणि श्लोकानां ॥ चरित्रे चात्र विचक्षणानां विलोक-
 नार्हाणि बहूनि स्थानानि, विशेषेण चेमानि—

१ पत्तो मगहाविसए, तहिं दिट्ठा कोडिपुरिसवोज्झा महासिला—मोत्तूणं कोडिसिलं, पत्रे ५९, अत्र कोटीशिलेति शिला कास्सीति
 प्रश्ने निश्चितं तस्या मगधविषये स्थानमिति

२ जिणवरो नाउं । चालइ मेरुं चलणंगुलीइ १२० । इह चावधेयं सिद्धान्तश्रद्धारहितैः, यतो न श्रीमद्भिहमचन्द्रैः केवलमेतत् मेरुचालनं प्रत्यपादि, किन्तु तत्राक्कालीनैरपि श्रीगुणचन्द्रगणिभिः, श्रीमहानिशीथतृतीयाध्ययने श्रीपद्मचरित्रेऽपि च एवमेवाख्यातं स्पष्टतया

३ सिरिवद्धमाणचरियंमि—गम्भावयारजम्मणदिक्खलक्खणकहणपडिब्बो—चउत्थओ एस पत्थावो १४१, अनेन वचसा खा-
द्यानां जिनवल्लभादीनां षट्कल्याणकवादिनां श्रीमञ्जिनेश्वरामयेदेवसूयोः परंपराया बहिर्वर्तिता स्पष्टीभवति

४ ताहे तिलोयनाहो शुव्वंतो देवनरनरिदेहि—कप्पोत्ति तहवि साहइ २५१, अनेन वचसा भगवतः प्रथमदेशनाक्षणे नैव देवनरणां सम्राव इति न संमतं गणिभिः, 'पुल्वि देवाणं धम्मं आइक्खइ' इत्यादिवाक्यं तु देवपर्वसाधान्येनेति ख्यापितं श्रीमद्भिः

५ तामलित्तिदसन्नपुरवीभयचंपाउञ्जेणीगयपुरकंपिल्लनंदिपुरमहुरापुरेसु महानगरेसु भव्वसत्तजणं पडिबोहिता २६१, अनेन वचसा निरस्तास्ते मूलतो ये निजगदुरवन्त्यादीनां देशानां श्रीसंप्रतिनृपात् प्रागनार्यतां, यतः स्पष्टतयाऽत्र श्रीश्रीरस्य केवलित्वे उज्जयिनीदशार्णभद्रा-
दिषु विहारो दर्शितः, तेषां त्रिमूलं कौशाम्ब्या अटव्याः स्थाने कौशाम्ब्या नगर्यो ग्रहः, अस्ति च गोदावर्यो उपकंटं कौशाम्ब्यटवी यत्र श्रीकृष्णस्य प्रेतता पाण्डुमथुरां गच्छतः, एवं च सौराष्ट्रकलिंगादीनां न व्याहन्येत श्रीश्रीरकालेऽप्यार्यता

६ अन्नया सेट्ठिणी नरिंदपत्ती य पंचवणणसुराहिक्खुमुमदहिक्खयसुगंधिगंधवूवासपडिपुण्णपडलकरपरियरियाओ गयाओ जिणालयं, विरइया अणेगविच्छित्तिमणहरा सव्वण्णुर्विवाण पूया ३२७, अनेन स्त्रीणां जिनविम्बानां पूजाया निषेधकस्य जिनदत्तस्य शास-
नतत्त्वापलापिता ध्वनिता

७ कप्पुसमत्तीए विहरिया मुणिणो ३२९, इत्थुत्तया मासकल्पविहारसोत्सूत्रतावादिनो जिनदत्तस्य सूत्रोत्तीर्णवादितो व्यक्तीकृता

८. गुरुसाराजो धवलाउ सुविहिया साहुसंतई जाया ३४०, इत्येवं श्रीजिनेश्वरसुरेः सुविहितानामुद्भवो वर्णितः, तथाच तेभ्यः खरतरोत्पत्तिं वावदुका दूरं निरस्ताः, यद्यपि कैश्चिदपास्य भवभियं न्यस्तमत्र 'खरयया' इति पदं न च तत् प्रबोधादर्शेषु, न च यथार्थं, तदनुयायिभिर्व्याकरणसंवेगंगशालादिद्वृत्तिसुरसुन्दरीचरित्रादिषु तदुल्लेखस्याकृतेः, न च मात्रागणोऽपि उकारादारब्धो यथायथं समाप्नोति इत्यलमतिविस्तरेण । चरित्रस्यास्य मुद्रणमारब्धपूर्वं अष्टि देवचंद लालभाइ जैनपुस्तकोद्धारसंस्थया, परं समाप्तेरवसरे श्रीराजनगरे अष्टिसुबाभाइ रवचंद इत्यनेन स्थापिताया विद्याशालासंस्थायाः कार्यवाहकैः अष्टिशिवाभाइ मोहनभाइ (२) जीवनभाइ इत्येभिः आगमाराधनोत्सवागतेनान्येन च द्रव्येण साहाय्यं चिकीर्षुभिः पंचविंशतिशतिका दत्ता द्रम्माणां संस्थायै एतस्यै, तेनानया संस्थया यथायथं समाप्य प्राकारयं नीतं चरित्रमेतत् । शोधने विहितेऽपि श्रमे स्वलितं यत् शोधयन्तु धीमन्तः सञ्जनास्तदित्यर्थयते

आनन्दसागरः १९८५ कार्तिकशुक्ल ३ गुरुवासरे राजनगरात्

श्रीवीरचरित्रस्य विषयानुक्रमः

प्रस्तावः	१ प्रस्तावः	वामासुतमरीचिदीक्षा	११	परिवाड्वृत्तं भोगदोषाः स्थावरदीक्षा	२८
महावप्रजयन्तीशत्रुमर्दनवर्णनं		संगारवधकहृष्टान्तः	१३	ब्रह्मदेवः	
नयसारवर्णनं		पारिव्रज्यं	१४	३ प्रस्तावः	
अटवीमध्ये सायुभ्यो दानं		मरीचिदेशनादि	१५	विश्वभूतेर्मधुक््रीडा	३१
धर्मदेशना सम्यक्त्वं च		इन्द्रचक्रिच्छतमवग्रहदानं	१७	देव्याग्रहः कूटपुरुषाः रणयात्रा विश्वन-	
सौधर्मे देवत्वं धर्मकार्यं च		मरीचैः कुलमदः	१९	न्दिक््रीडा विश्वभूतेरपमानं संवेगश्च	३६
		अष्टापदे चैत्यं तद्रुणाश्च	२०	संभूत्याचार्यवर्णनं देशना विश्वभूतिदीक्षा	
		कपिलदीक्षा मरीचिकालः आसुरि-		परिजनाक्रन्दः बोधश्च	
		दीक्षा अव्यक्तादि	२३	विश्वभूतेस्तपः गोनुन्नस्य पातः निदानं	४१
विनीतावर्णनं		सूरसेनपरिव्राजकचरित्रं अभिद्योतदीक्षा	२५	महाशुक्रे देवः	
श्रीऋषभप्रभुवर्णनं		सनत्कुमारे देवः श्वेतांशिकायां भारद्वाजः	२५	रिपुमर्दनः अचलः मृगावतीपुत्री राज्ञी च	
समवसरणवर्णनं		माहेन्द्रे देवः संसारः	२५	सप्त स्वप्नाः त्रिपुष्टजन्म	४३

प्रेक्षणकं अश्वग्रीवदूतापमानं सिंहवधः ५०

युद्धं प्रतिवासुदेववधः अंतःपुरविलापः

अंगादिदेशसाधनं कोटीशिलोत्पाटनं ६०

पोतनपुरे श्रेयांसजिनागमः धर्मकथा

सम्यक्त्वं ६२

गायकमृतिः देव्यपमानं सप्तमनरकगमनं ६३

धर्मघोषसूरिदेशना अचलदीक्षामोक्षौ ६३

प्रियमित्रचक्री अनार्यदेशसाधनं चक्रिकृद्धिः

वैराग्यं प्रोष्ठिलाचार्यदेशना दीक्षा शुक्रदेवः ७१

४ प्रस्तावः

नन्दनजन्म प्रोष्ठिलाचार्याः देशना ७२

नृपो नरसिंहः चम्पकमाला देवी मन्त्रिवर्गः

सुतचिन्ता घोरशिवागमः मन्त्रसाधनं

घोरशिवमूर्च्छा श्रीभवनपुरं अवन्ति-

सेनो राजा वीरसेनविजयसेनौ राज्यं

खेचरयुद्धं गगनवल्लभे विजयरजसुतो

जयशेखरः वैर्यमितेजाः वीरसेनरा-

जस्यापहारः विजयसेनकृतो राज्यक्रमः

सोमदत्तगृहे स्थानं प्रस्थानं योग्याचार्यो

महाकालनामा प्रब्रज्या, अष्टशतेन होमः

क्षत्रियैः, वैताल्यगमनं चंपकमालाया

ध्वजस्वप्नः घोरशिवस्य राज्यं नर-

विक्रमाभिधानं हर्षपुराधिपदेवसेनदु-

हितुर्वरणं कालमेघमल्लजयः शीलवत्यै

पितृशिक्षा पुरप्रवेशः युवतिविभ्रमा

जयकुञ्जरवशीकरणं कुमारस्य प्रवासः

पाटलगृहे वासः शीलवत्या अपहारः

जयवर्धने राज्यं नद्या नरविक्रमापहारः

सामन्तभद्रः देशना सुतौ गोकु-

लिकगृहे सुतसंयोगः शीलदाढ्यं शी-

लवत्या योगः मालाकाराय चौडराज्य-

दानं जयन्यां गुरोर्गमनं देशना पित्रा

योगः राज्यभिषेकः शिक्षा साधु-

नृपयोः १०९

नन्दननृपस्य दीक्षा विंशतिस्थानकारा-

धनं प्राणते देवः १११

देवानन्दाकुक्षवतारः स्वप्नानामुपलभश्च १११

इन्द्रस्तुतिः गर्भापहारः देवानन्दाक्रंदः ११२

त्रिशलाकुक्षौ संक्रमः स्वप्ना वृद्धिर्मनोरथाः ११४

निष्पन्दत्वं शोकः अभिप्रहः ११५

श्रीवीरस्य जन्मनि दिक्कुमारीमहः ११७

अभिषेकसामग्री मेरुचालनं अभिषेकः १२३

नृपकृतो महः	१२५	कूर्मोऽग्रामे गोपोपसर्गः शककृता निर्भे-	ल्यं गंगायां प्रवेशः नास्तिकवाक्-
वर्धमाननामकरणं		र्त्सना दूइज्जंताश्रमे गमनं वर्षायाः	जालन्धरे गमनं ईशानचन्द्ररक्षा यो-
भ्यामभीतिः लेखशालानयनं	१२७	पक्षे गते निर्गमः अभिग्रहपंचकं १४८	गिनीशान्तिः परस्त्रीनियमः गृहे आ-
यशोदाभिधानकारणं	१३०	वर्धमानग्रामस्यास्थिग्रामत्वे हेतुः वृषसा-	गमनं भार्योमरणश्रवणं धर्मघोषस्य
यशोदया श्रीवीरस्य विवाहः, प्रियदर्शना-		प्रतिजागरणाद् द्वेषः मारिः चैलम् १५२	देशना दीक्षा मंडूकीविराधना क्रोधः
जन्म	१३२	शूलपाणिष्ठना उपसर्गः तत्प्रतिबोधः	ज्योतिष्कः तापसः चंडकौशिकः
मातापित्रोः स्वर्गमनं, नन्दिवर्धनस्य रा-		स्वप्नदशकं इन्द्रशर्मोक्तं तत्फलं (१) १५६	बोधः १७६
ज्यामिषेकः	१३४	अच्छंदकस्य कुटिलता शक्रशिक्षादि १५८	उत्तरवाचाला श्वेतां विकायां प्रदेशि-
संवत्सरदानं नन्दिवर्धनकृता महानसशा-		सुवर्णवालुकायां वस्त्रार्थस्य पातः, नन्दि-	नृपकृता स्तुतिः १७७
ला लोकान्तिकागमनं च	१३६	वर्धनाय लक्ष्मण दानं तस्य १५९	सुरसिपुरं सुदंष्ट्रसुरोपसर्गः कंबलशंबली
दीक्षाभिषेकः चन्द्रप्रभा शिबिका दीक्षा-		कनकललाश्रमः (गोभट्टो विप्रः वना-	मथुरा जिनदासः साधुदासी गंगोत्तारः
महोत्सवः	१४१	रसीप्रस्थानं विद्यासिद्धाकृष्टा रसवती	स्थूणाके गमनं पुष्यबोधः १८२
		युवतिश्च शीलदाढ्यं जालन्धरे चन्द्र-	६ प्रस्तावः
सोमनाह्मणाय वस्त्रार्थदानम्	१४४	लेखाचन्द्रकान्ते ईशानचंद्रः रक्षाव-	राजगृहनालन्धरायां तन्तुवायार्जुनशालायां
			वर्षावासः (२) १८३

उत्तरापथे सिलिन्ध्रे केशवशिवापुत्रो मं-
खः पूर्वप्रियोपलब्धये पट्टिकाकृतिः मं-
खलीमुभद्रयोर्मखत्वं गोशालजन्म,
श्रीवीरेण मीलनं कोल्लकं शिष्यत्वं प्रा-
गृहीताया नियतेः खालीस्फोटे दाढ्यै
ब्राह्मणग्रामे उपनन्दगृहदाहः चंपायां
वर्षावासः (३) कालके पात्रालके च ताडनं
कुमारे मुनिचन्द्राः चौराके सोमाजय-
न्तीभ्यां मोचनं पृष्ठवम्पायां वर्षावासः (४)
कुतांगले दरिद्राः श्रावस्यां मनुष्यमांसं
हरिद्रुमेऽग्निः मंगलग्रामे वासुदेवगृहे
आवर्ते बलदेवगृहे च स्थानं चौराके
मंडपदाहः कलंबुकायां कालमेघ-
स्तिनौ म्लेच्छदेशे गमनं पूर्णकलशे स्तो-

नवधः भदिलायां वर्षावासः (५) कद-
लीसमागमे जंबूखंडे चास्तारिकामकं
तंत्राके नन्दिषेणाः कृषिके विजयप्र-
गरमाभ्यां मोचनं वैशालीप्रस्थानं (६)
गोशालो वाधितः अयस्कारघातः १९८
विभेलकयक्षस्योत्थानपर्याणिका २१२
शालिशीर्षे कटपूतनोपसर्गः लोकावधिः २१३
आलम्बिकायां वर्षारान्नः (७)
गोशालमीलनं २१३
कुण्डागे मधुमथनगृहे गोशालचेष्टा मर्दन-
ग्रामे बलदेवगृहे च २१३
सालाग्रामे सालज्जोपसर्गपूजे २१४
लोहागले जितशत्रुकृतः सत्कारः २१४

पुरिमताले वगुरश्रेष्ठिकृता पूजा, धर्मघोष-
सूर्युक्तं पूजाफलं दानं च २१७
तुन्नागपथे श्रीभूमौ च गोशालस्य ताडनं
राजगृहेऽष्टमो वर्षावासः (८) २१८
लाढावज्रभूमिशुद्धभूमिपूषर्गाः वृक्षमूले
वर्षावासः (९) २१८
सिद्धार्थकूर्मरामयोरन्तराले तिलप्रभादि २१८
वैश्यायनस्योत्थानपर्याणिका तेजोलेख्या
तन्निवारणं तदुपायप्रश्नोत्तरे २२३
कूर्मरसिद्धार्थपुरोरन्तराले तिलनिश्चयात्
प्रवृत्तिपरिहारो नियतिवाददाढ्यं च
श्रावस्यां तेजोलेख्या पार्थन्तेवासि-
संगमः २२४

७ प्रस्तावः

वैशाल्यां शंखसत्कारः गंडकिकायां नावि-
कोपसर्गः ऋतुषट्स्यविकारिता २१९
वाणिज्यग्रामे आनन्दगाथापतिः अव-
धिमान् २१९
श्रावस्यां वर्षारान्नः (१०) सानुषष्टिके
प्रतिमाः २२६
हृदभूमौ पेढाले संगमोपसर्गः, संगम-
कस्य सौधमार्गनिर्वासनं २३१
आलंभिकायां विद्युत्कुमारेन्द्रस्तुतिः श्वेतां-
विकायां हरिस्सहस्तुतिः श्रावस्यां स्क-
न्दप्रतिमासत्कारः कौशांब्यां चन्द्र-
सूर्योवतारः वाराणस्यामिन्द्रपूजा रा-

जगृहे ईशानार्चो मिथिलायां जनक-
स्तुतिः धरणेन्द्रवन्दना २३३
राजगृहे वर्षारान्नः (११) भूतानन्दस्तुतिः
जीर्णश्रेष्ठिभावना केवलदेशना २३४
चमरेन्द्रोत्पातः सुसुमारे २४०
भोगपुरे माहेन्द्रोपसर्गः सनत्कुमारेन्द्र-
नतिः नन्दीग्रामे नन्दिस्तुतिः ४४१
चम्पापातः धारणीमरणं चन्दना कुल्मा-
षाभिग्रहः २४७
षाण्मासिकः कीलकोपसर्गः मध्यमापापायां
कीलकनिर्गमः २५०
तपःसंकलना केवलज्ञानं च ३५१
८ प्रस्तावः
समवसरणरचनं धर्मदेशना २५३

गणधराणां प्रतिबोधः दीक्षा चन्दनाया
दीक्षा संघस्थापना २५९
ऋषभदत्तस्य देवानन्दायाश्च दीक्षा २६०
क्षत्रियकुण्डे समवसरणं पर्वदश्च नन्दि-
वर्धनकृता स्तुतिः जमालिदीक्षा (मा-
न्नादिवचनप्रतिवचनानि) महः २६५
जमालेर्निहवत्वं प्रियदर्शनाया बोधः ज-
मालेर्गतिः २६९
कौशांब्यां सुरप्रियलब्धवरे नृपस्य क्रोधः
चण्डप्रद्योतकृता मृगावत्याः प्रार्थना शी-
लरक्षार्थं छलं मृगावत्या दीक्षा या सा
सा सोदाहरणं आनन्दादीनां वाणि-
ज्यग्रामादिषु बोधः कौशांब्यां चन्द्र-
सूर्योवतरणं कैवल्यं २७४

आश्चर्यदशकं आनन्दश्रवणः गोशालक-
कृत उपसर्गः सर्वानुभूतिः सहस्रारे सु-
नक्षत्रोऽच्युते २७९
गोशालकदाहः अयंपुत्रः शिष्येभ्यो निर्ह-
रणदेशः सप्तमदिने सम्यक्त्वं आदेशः २८२
सिंहानीतौषधेन नीरोगत्वं श्रीवीरस्य २८३
गोशालकस्य भवाः २८६
राजगृहे धर्मदेशना मेघकुमारस्य दीक्षा २८९
भग्नमनस्कत्वं पूर्वभवौ
नन्दिषेणस्य दीक्षा, देवेन कृतो निषेधः
जिनेनापि, वेद्यागृहे स्थानं दशकदश-
कबोधः दीक्षा देवत्वं २९०

सुदंष्ट्रीवकर्षकस्य दीक्षा तन्मोचनं च २९१
तामलिह्यादिषु विहारः प्रसन्नचन्द्रादी-
नां बोधश्च २९१
राजगृहे समवसरणं २९२
प्रथमाणुव्रते हरिवर्मकथा २९८
द्वितीयाणुव्रते सत्यश्रेष्ठिकथा ३००
तृतीयाणुव्रते वसुदत्तकथा ३०३
तुर्याणुव्रते सुरेन्द्रदत्तकथा (शुभंकर-
कथा) ३१२
पंचमाणुव्रते वासवदत्तकथा ३१४
द्विग्व्रते जिनपालितकथा ३१६
भोगोपभोगमाने रविपालकथा ३१९
अनर्थदण्डविरतौ कोरटकथा ३२२

सामायिके कामदेवकथा ३२३
देशवकाशिके सागरदत्तकथा ३२५
गोपधोपवासे जिनदासकथा ३२७
अतिथिसंविभागे साधुरक्षितकथा ३२९
सेडुकद्विजवृत्तं ३३४
गागलिप्रब्रज्यादि ३३४
अष्टापदयात्रा तापसानां बोधादि ३३५
मिथिलायां दुष्षमास्वरूपोक्तिः ३३७
आयुर्वर्धने विज्ञप्तिः ३३८
निर्वाणमहः गौतमकेवलं ३३९
परम्परा ग्रन्थकारकाणामितिहा च ३४१

इति श्रीमहावीरचरित्रस्य विषयानुक्रमः

शैठ-देवचन्द-लालभाई-जैन-पुस्तकोद्धारसंस्थायाः क्रेयग्रंथाः

अंक.	मूल्य.	अंक.	मूल्य.	अंक.	मूल्य.
३०	आनन्दकाव्यम० मौक्तिक ४ शुं ०-१२-०	६०	विंशतिस्थानकचरित्रं पद्यबद्धं	६८	नवपदप्रकरणं लघुवृत्तिः
३२	" " ५ मुं ०-१०-०	६१	कल्पसूत्रसुबोधिका	६९	पंचवस्तुकग्रंथः सटीकः
४३	" " ६ हुं ०-१२-०	६२	सुबोधा सामाचारी	७०	आनन्दकाव्यम० मौक्तिक
४८	श्राद्धप्रतिक्रमणसूत्रवृत्तिः २-०-०	६३	श्रीपालचरित्रं प्राकृते साव- चूर्णिकं		८ मुं.
५१	सेनप्रश्नानि (प्रश्नोत्तररत्नाकरः) १-०-०	६४	प्रवचनसारोद्धारः सटीकः उ- त्तरार्ध,	७१	आचारप्रदीपः
५३	आवश्यकटिप्पनं. १-१२-०			७२	विचाररत्नाकरः
५४	जम्बूद्वीपप्रज्ञप्तिः सटीकाउत्तरार्ध. २-०-०			७३	नवपदप्रकरणं बृहद्वृत्तिः
५६	श्रीपालचरित्रं संस्कृते. ०-१४-०	६५	(द्रव्य) लोकप्रकाशः भाग १ लो २-०-०	७४	(क्षेत्र) लोकप्रकाश भाग. २ जो २-८-०
५७	सूक्तसुक्तावली. २-०-०	६६	आनन्दकाव्य म० मौक्तिक ७ मुं. १-८-०	७५	महावीरचरियम्
५८	प्रवचनसारोद्धारः सटीकः पूर्वार्ध. ३-०-०	६७	तत्त्वार्थोधिगमसूत्रं भाष्यटीका- युक्तं पूर्वार्ध		४-०-०
५९	तंदुलवेयालीयपयसो सटीक. १-८-०			७६	प्रियङ्करचरुपकथादि
					१-०-०

श्रीआगमोदय-समिति संस्थायाः क्रेयग्रंथाः

ग्रंथाः

॥ १० ॥

अंक.	नाम.	विषयक्रमः
३४	विशेषा० गाथा	विषयक्रमः
३५	विचारसारप्रकरणं	
३६	गच्छाचारपयज्ञो	
३७	धर्मविन्दुप्रकरणं	
३८	विशेषा० भाषांतर भाग १ लो	
३९	जैनफिलोसोफी (अंग्रेजी)	
४०	योग	"
४१	कर्म	"
४३	अनुयोगद्वारसूत्रं	
४४	नंदीसूत्रं	
४५	भक्तामरकाव्यसंग्रह भाग १ लो	
४६	दशपयज्ञा छायायुक्त	
४७	पंचसंग्रहः (स्वोयन्नवृत्तियुतः)	

किंमत.	अंक.	नाम.	किंमत.
०-५-०	४८	विशेषा० भाषांतर भाग २ लो	३-०-०
०-८-०	५०	जीवसमासः	१-८-०
०-६-०	५१	शोभनस्तुतिः (संस्कृत) प्रेसमां	८-०-०
०-१२-०	५२	स्तुतिचतुर्विंशतिका सचित्रा शोभनमुनिकृता	६-०-०
२-०-०	५३	चतुर्विंशतिका सचित्रा वज्रभट्टिसंस्कृत	६-०-०
१-०-०	५४	भक्तामरकाव्यसंग्रह भाग २ लो	३-८-०
०-१४-०	५५	नंद्यादिसप्तसूत्रीगाथाऽपकारादियुतो विषयानुक्रमः	२-०-०
०-१२-०	५६	आवश्यकमलयगिरिकृतटीका भाग १ लो	४-०-०
२-८-०	५७	श्रीचतुर्विंशतिजिनानन्दस्तुतयः सचित्राः सचित्राः	६ ० ०
२-४-०	५८	लीवडीभंडारना हस्तलिखितपुस्तकोलुं सूचीपत्र	१-४-०
३-०-०	५९	जैनधर्मवरस्तोत्र	प्रेसमां
२-०-०		लोकप्रकाश गुजरातीभाषांतर भाग १ लो	प्रेसमां
२-०-०		आवश्यकमलयगिरिकृतटीका भाग २ लो	प्रेसमां
२-८-०		प्रासिस्थान सुरत गोपीपुरा.	

* श्रेष्ठ देवचन्द लालभाई जैन पुस्तकालय फण्ड. *



गोपीपुत्र, -सुरत.

१०,०००. जान्युवारी १९३६

बाइन्टर

भीकाजी बाबाजी. रागकुवा, मुंबई ३